


Yoac kekehagocac
Dzadzahac gboria nga
Mitiyegec



The New Testament and Psalms in the Dedua Language of Papua
New Guinea

**Yoac kekehagocac Dzadzahac gboria nga Mitiyegec
The New Testament and Psalms in the Dedua Language of Papua New Guinea
Buk Baibel long tokples Dedua long Niugini**

copyright © 2005 Wycliffe Bible Translators, Inc.

© 2012 Wycliffe Bible Translators, Inc.

Language: Dedua

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2015-01-02

PDF generated using Haiola and XeLaTeX on 4 Mar 2019 from source files dated 27 Nov 2018
19b7c48c-f4ce-5007-838d-58f01dc01ecc

Contents

MITIYEGEC	1
	3
MATAIO	106
MAREKO	148
RUKA	174
YOHANE	218
APOSORO	250
ROMA	292
1 KORINTI	314
2 KORINTI	334
GARATA	347
EFESO	354
FIRIPI	361
KOROSAI	366
1 TESARONIKE	371
2 TESARONIKE	375
1 TIMOTEO	378
2 TIMOTEO	384
TITO	388
FIREMONG	391
HEBIRAO	392
YAKOBO	408
1 PETORO	414
2 PETORO	420
1 YOHANE	424
2 YOHANE	429
3 YOHANE	430
YUDA	431
YOHANEAC KPEFING	433
	454

Yoac kekehagocac Dzadzahac gboria nga Mitiyegec
 The New Testament and Psalms in the Dedua Language of Papua
 New Guinea
 Buk Baibel long tokples Dedua long Niugini

Yoac kekehagocac Dzadzahac gboria nga Mitiyegec
 The New Testament and Psalms in the Dedua Language of Papua New Guinea
 [ded]

Translation by Wycliffe Bible Translators

© 2005, Wycliffe Bible Translators, Inc.

Print publication, 2005 by Wycliffe Bible Translators

Web version
 © 2013, Wycliffe Bible Translators, Inc.
www.Wycliffe.org

<http://pngscriptures.org>

www.ScriptureEarth.org

This translation is made available to you under the terms of the Creative Commons license (Attribution-Noncommercial-No Derivative Works).
<http://creativecommons.org/licenses/by-nc-nd/3.0>

Your are free to share — to copy, distribute and transmit the text under the following conditions:

- Attribution. You must attribute the work to *Wycliffe Bible Translators* (but not in any way that suggests that they endorse you or your use of the work).
- Noncommercial. You may not use this work for commercial purposes.
- No Derivative Works. You may not alter, transform, or build upon this work.
- In addition, you have permission to port the text to different file formats, as long as you don't change any of the text or punctuation of the Bible.

Notice — For any reuse or distribution, you must make clear to others the license terms of this work.

Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem yu ken givim kopi long narepela manmeri. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. Yu mas givim nating. Na tu, yu no ken senisim Tok.

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stremt samting i no orait long dispela tok orait, stremt tok, salim Buk Baibel, o tainim Tok bilong God long nupela tok ples, yu ken askim mipela.

Olgeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, plis askim mipela.

Table of Contents

page

Mitiyegec MITIYEGEREC KIBI 1

1

Mitiyegec 1-41

Faka yohockang

¹ Ngic goa yeni Anutu ngadehema mangana megecdeac ayemmeu ngic mong ye imoc wama yeneac dederecgeyoac mi modacande, me ngic kopocsicgoc yeneac sinnu mi kengande, nga ye desusuicngic, yeneac botucfu naric mi tarude, ngic ifia ye kenehagoc.
² Ye Anutuac dedeseriyoacac songo negemma hadzing toforec imoc hennegeng amma negengising angkecde.

³ Ngic yeneng doku eacdae ic mong homecgec nasoya hau fora amma maria mi dzanggeande, mong ye siriha imocacsoc kecma wiac sasawa angande, imoc forayagoc anu ngereeude.

⁴ Ngic Anutu ngadehema mangana megecdeac ayemmeande, yeni ngic dindingac, yeni isoc kpac. Firanggo padi sebera homemea mafiranggeande, yeni ifia isoc. ⁵ Imocac ngic mangana yeni Anutuac yoacfu namma naric mi serigecde. Yeni kopocsicmemengo dindingac yeneac kpebunnu Anutuac kicfu mi serigecde. ⁶ Anutungo ngicngac dindingac yeneac sing hennegeng amma garengyunuude. Nga ngic Anutu ngadehema mangana megecdeac ayemmeande, yeni ine kpac anggecde.

2

Meising ngictau

¹ Foracngoc, bangec monnunac ngicngac Anutu mi negemmidae, yeneng faka mangana anggecdeac yoac dedzege andae nga ngiha ngiha yeni negen negeng ua mema kpedzongemeandae. ² Bangecac ngictau yeni efaigec ngic enara uayoacnginagoc, yeni kpeturanggema KEBU memagecde. Nga yeng ngic meisinggema kerecdokungo nadzicmie, ye ifingoc memagecdeac yoac yofi deandae, ³ “Yeri sengngo witicnunuoc, nenang imoc herecgema rekongngirango mendannunude, imoc merecgema ukubisina.”

⁴ Ngic kurumenga kurumenga, imohai kecde, ye dzomorede. KEBUNGO yenemma detenic ayemmemma ⁵ yoac ngabayagoc deu herebuyango kengec maficgeyemmemma yofi deude, ⁶ “Foracngoc, ni ngictauna neac Siong tiki kpetiacfu bic faiba tacde.” ⁷ KEBUNGO yoac desima neac deec, imoc dekperagiba, yofi edenuec, “Ni yagucnoc megudua. Ge medacna nga ni geac Mangga. ⁸ Ge wiac gembadeac kpesinenna ni ngicngac bangec monnunac desigemba yeneng maridzomingga anggecde. Bangec tegia fekende, yeni sasawa geac anggec geng mingningngina annade. ⁹ Ngictauyasuga aiengngo memea mekecne, ge imoc mema ngicngo enang kpedzameandae, ifi isoc yasugango kpedzameyununade.”

¹⁰ Imocac ngictau ngeni yomoc negensibisia. Bangecac enara uayoacnginagoc kecdae, ngeni goroyoac yomoc negemma garengemema kecbisia. ¹¹ Ngeni KEBU kengecgoc kingang kpemima dzonong fede fedegoc desogai ammibisia. ¹² Medac ye herebu bic angkecde. Yeng ngaba angemmeu ngeni sinnu manganema kpac ambauac haniau ngonducnema titikokoc ammibisia.

Ngicngac yeac hoannu sufuma kecdae, yeni kenecnginagoc.

3

Ngicngacfora garengyunuude

Dawidingo medaha Absaronggac kicfunac worama yegec yofi heiec.

¹ O KEBU, ngic ngabafocna yeni homac yombong nga ngic homacnggo yacma nubeso andae. ² Ngic homac yeneng neac yofi deandae, "Anutungo ye ebicfunac naric mi mesiude." *Selac*

³ O KEBU, gennoc oronnuma kasona annec. Geng kuc nga kibikpergiagoc ambadeac anengkecma orucna memiacma meserinukec nec. ⁴ Ni KEBUARU seria kiacba yeng kpetiac tikiyau tacma yoacna turunga merennenude. *Selac*

⁵ KEBUNGO nanggenuude, imocac ni mafema monggoc yacbade. ⁶ Ngic teng taoseng nga noc yeneng habuya habuya kpedzucnema noboc nobocnac hama nubeso oronnugec ni yeneac mi kengecnuude.

⁷ O KEBU, ge hama ebicfunac mesinuna. Anutuna, ge ngabafocna ngebacngina kpedzamema manganameme enacngina kpemoronggena mabeso. ⁸ KEBU ye ebic mesi mesi mingina. Kebu, ge ngicngacfogca kene cnununa. *Selac*

4

Makpekpea yeneac nunumu

Yegecgareng yearu. Gitakurere nga noc kpema yegec yomoc heibesonga. Dawidingo mitiyegec yofi heiec.

¹ O Anutu, ge dindingac kekecna, ni kpacguba ge kpakpacna negemma turunga merennenenna. Ebicfu ubaebic meficgeba geng titing meficgenenna kekecna ngeree u naric kefai. Ge wosoefac anemma nunumuna negenna.

² Ngicac medacfora, ngeni neac eweheihei kekec heimeremma desofoc anengadae, imoc naso dafiguc angkecgecde? Ngeni yoac sicsauc foraya kpac, imocac songo negemma ikocac sing meficgegecdeac ua meandae, ngeni imoc naso dafiguc angkecgecde?

³ KEBUNGO yengena enac tofoc tofohongic bic segereu yengena areng ande, ngeni imoc negembisia. Ni KEBU kpacba yeng ubaudumenna negenude.

⁴ Ngeni herengina buu kopocsic mi meficgebisia nga fefenginau fema ubanginau wiac negensima waicke febisia. *Selac*

⁵ Ngeni sese sirihau meficgema faima KEBU negenserima kecbisia.

⁶ Ngicngac homacnggo yofi deandae, "Wiac gombunga edzacnunugecdeac anemmede. O KEBU, ge kicmesugaac kperagingo nerarannununa." ⁷ Ngic goa yeni semeng uanginau wit nga waing gboria efea kpac fingeru sogai gecde anu geng sogac sogai herenau fainec, imocnggo ine yeneac ubangerec ferahade. ⁸ O KEBU, geng onggonnuna ruaegoc kecbadeac ruaegoc fefenau mama gau febade.

5

Anutu ye memeficna

Yegecgareng yearu. Kungac fima heibesonga. Dawidingo yegec yofi heiec.

¹ KEBU ge kedzac faima yoacna negenna nga asoringa anende, imoc negensina.

² Ngictauna nga Anutuna, ni numugenduaeac kedzac kpena nga meficnunadeac kpacguba ge kpakpacna nga enacudumenna negenna. ³ O KEBU, ni asoacngoc kpacguba enacudumenna negengannec nga asoacngoc sesena mengerema gearu faima tomai kecbade.

⁴ Anutu, geng ngic ngadeguma mangana megecdeac ayemmeande, yeneac ubangerec mi negennec nga ngic mong ye faka mangana hoanggeande, yeng gegoc naric mi kefude. ⁵ Ngic yoackpekpe yoac homac osoandae, yeni geac kicfu naric mi hama nanggecde. Ge yarengic ubango ukuyunudacma wayununade. ⁶ Geng ngic ikocyao deandae, yeni kpetotieyununa kpac anggecde. Nga ngic ogofocngina kpebucyunuma sac hembeso ayemmeande nga ogofocngina tobangyunuandae, ngic ifia KEBUNGO ubango wayunuude.

⁷ Geng yoac dedzege amma imoc modackecnec. Imocac ni amagau erema kicna kpetiac womonggau fima eweheiheigocfafoc heigemma numugembade. ⁸ O KEBU, ni

ngabafocna kecdaeac geangga faka dindingacfу hesicnuma singga mesorongainenna tima kembade.

⁹ Yeni enanginaiu yoac fora mong mi fede nga herenginai ogofocngina memanganeyunugecdeac negen negensac fede. Yeni ubangina imoc kicsere angge anggea nga nedzarangnginango yoac deandae, imocngo ngicngac kerec ayemmemma manganau faiyunugecde. ¹⁰ O Anutu, ge ngic ifia yoacfу faiyunuma kopocsicnginaac turunga yemmebesena. Yeni yenaoc yoac goa dzeggegac yoac imocngo memayunubeso. Yeni singyoac kpekecgec homac andeac kporacyununa yeni ngadeau kemema kecbisia. Yeni yoacga kpegec, imocac ge memayunubesena. ¹¹ Ngicngac hoanggau hama sufuma kecdae, yeni sogac sogai meficgeyemmemma ubangerec ayemmena nasosoc ubangerec ac yegec heikecma sogac sogaigoc kecbisia. Geng orongyunuma onggongyununa. Ge ifi anna ngicngac yeneng kpacgaac songo negemma geac negenggec engena anu sogaigecde. ¹² KEBU, geng ngic dindingac kenehema gombunga ammina imocngo mariku isoc kasoya anude.

6

Kebu, ge mengerenuna

Yegecgareng yearu. Gitakurere nga noc kpema sheminic uba modacma heibesonga. Dawidingo mitiyegec yofi heiec.

¹ KEBU ge ngaba amma ngabasiricfu yoac mi anenna amma herega buu numeme mi anenna. ² O KEBU, ni kucna kpac anu homebeso anduae nga kengec amma dzononna fededeac neac ubaga manganeu sebina mengerena. ³ O KEBU, ni ongana kengectoa meficgema ebirima kecdeac ubaebicna bic meickenadeac tomai kecduae.

⁴ O KEBU, ge dzigene hama kekecna ebicfunac mesina. Ge yoac dedzege amma imoc modackecnecac ebicfunac mesinuna. ⁵ Homecfu kemegec, yeni ge mi negensigugecde nga mong ye homec amau kemema fede, yeng ge naric mi dengereguude.

⁶ Ni asoringa anengkefu kucna kpac ande. Ni tofocnacsoc kiaca kickumana dokutoa isoc mama heifefena heiude. Amma ni homac kiaca kickumanango fefena meu boroc boroc yombong angande. ⁷ Ni ubahodunnagoc kecduaeac kiaca kicna ngopic kpede nga kiaca ngabafocna sasawa ebic meficgenenggec kicna kuha kpac ande.

⁸ KEBUNGO kedadzak kpema neac kiaca ubamangang bic negendacac manganameme ngic ngeni sasawango wanuma meickegec. ⁹ Ni ubamangang amma KEBU dekpesi ammiba imoc bic negendac. KEBU ye nunumuna negenu ngereede. ¹⁰ Ngabafocna yeni gameyunudaru homac yombong kengencyunu fakanginaac amma gameyunuu wanuma bic yombong woragecde.

7

Ngaba witiau kefec

Yegec yomoc Shiggaiong uba modacma heibesonga. Dawidingo Benyaming ngic mong kpara Kushiac yoac negemma yegec yofi KEBU heimie.

¹ O KEBU, Anutuna, ni geac hoannu hama sufuduae. Ngic yeni sasawango kisanuma menubauac onggonuma ebicfunac mesinuna. ² Ngic mongngi yeneac mariunac naric mi mesinuudeac raiong yangtoa isoc sorienacnginango sebina merecgegac kapuc kpeu menuma kembauac geng onggonnuna.

³ O KEBU, Anutuna, ni faka mangana dedaemoc anaiu me marinango ngicngac goa memanganeyunubai dede. ⁴ Me ngic mongngi nigoc ruae kecmanu mangana hoanggema ammibai me ngabangicnaac finac eng wangecmamekembai dede ⁵ ngabangicna geng negemmana kisanuma naric menubeso. Ye kpebucnuudeac ubana tindziru onganango bangecac gotennu febeso. Selac

⁶ O KEBU, ge ngaba amma yacna. Ngabafocna yeni herengina buu geng yacma memayunubesena. O Anutuna, kopocsicac turunga fingecyemmeudeac deserinecac amma ge gborima yacma meficnuna. ⁷ Ngicngac yeni kicgau hama kpeturanggegac ge

wi kurumennu ngictau tatacgau tacma garengyununa. ⁸ KEBUNGO ngiha ngiha sasawa faka angammengina isinggedacma foraya deude. O KEBU, ni dindingac kecma kopocsic mong mi meficgeai. Ge imocac faka angammemena yoacfу isinggema foraya dena faka dindingac meficgenenna firang ambesare.

⁹ O, gennoc Anutu dindingac amma ngicngac negengngina nga herenginaac hengising mingina. Geng ngic mangana megedeac ayemmeande, yeneac yarefakaac kpae heina kpac ambeso nga ge ngicngac dindingac tatacngina meficgema faiyununa ihai seria tacisia.

¹⁰ Anutu Kuctoa mingina, ye neac kasona. Yeng ngicngac hereninau ikoc nga hamangec mong mi fede, nenang ebicfunac mesinunuude. ¹¹ Anutungo ngicngac faka angammemengina yoacfу isinggema faka dindingac modacma foraya deude. Amma ye wenacsoc mangana hemma modzea tide. ¹² Ngic mong ye ubea mi merendeu Anutungo soea dzumuma tebea kpesaiudeac efaiude.

¹³ Ye kpebucyunuudeac dzikacac iwaiya mengerema tebemedaha gerec borangagoc memengere bic andac. ¹⁴ Negenggec, ngic imoc ye wiac mangana kpenanggema ebicngo tobangyunuudeac heregoc kecma wiac hereau meficgeu imohacnac fingerude, imoc kpara ikoc. ¹⁵ Ngicngac botacfу meyunuudeac negemma yeng teng keme kemea anudeac bangec homac usuma yengenaocngoc makpema tengau kemeude. ¹⁶ Ye tobangyunuudeac ebic arenggema ngicngac ogofora ayemmeu ebic imocngo dzigene hama yengena oruhau heiude. Nga ye ogofora memanganeyunuuu faka imocngo yengenaaru dzigenema ye memanganema oruhau heiude.

¹⁷ KEBU ye dindingac, imocac ubangerec ammibade. Ni yegec heima KEBU Kuctoa minginaac kpac kuneng heiwayong memibade.

8

Ge kpacga Engenatoa

Yegecgareng yearu. Gati yeneac musiwiac kpema heibesonga. Dawidingo mitiyegec yofi heiec.

¹ O KEBU, ge Kebunina, bangetoa bangec fekendeu kpacga Engenatoa yombong feude. Ge kurumenga kurumenga feracyunuma kucga kibikperagiagoc wi yombong faina fede. ² Ge nambarac kapia nga sabac namuu kecdae uayoac yemmena yeneng geac kpac kuneng heiwayong memigec faka kuhagoc fingerude. Ge ngabafocga kecdae, yeneac amma ifi annec. Nambarac yeni ifi anggec ngabafocga nga ngicngac goa yeni turung kpoukpouyoac homac osoandae, yeni yoacngina kpac anu waicke tacgecde.

³ Geng kurumenga kurumenga meficyununa marikibiga andae nga ge afо nga asomeng sasawa wi faiyununa tatacnginau seria tacgec yenenganduae. Yenemma ⁴ yofi negensima deba, "Geng bangecfu ngicngacne negensinunuma ngicac medacfora gombunga garengnunukecne, imocac warecguduae. ⁵ Geng ngic meficgema tatahau faina yeng Anutuac siric anu Anutungo kunenga kecde. Ye kuc kibikperagigoc kefudeac ge imocngo iraya isoc heiminec. ⁶ Ge marikibiga sasawa meficgena yeng imocac mingina kefudeac fainec. Ge wiac sasawa yengena haniaac bageu fainec. ⁷ Imoc amau rama burumaka sasawa nga manennu yang sasawa ⁸ amma sawau neng sasawa nga kondunnu kondungyang amma kondung manau yang hania singngina mema kenghaandae, imoc yeac haniaac bageau faina garengyunuude."

⁹ O KEBU, ge Kebunina, bangeha bangeha fekendaeu kpacga imoc engenatoa yombong fekefude.

9

Makpekpea onggongyunuude

Yegecgareng yearu. Yegec mong kpara Medac homeec, imocac uba modacma yegec yomoc heibesonga. Dawidingo mitiyegec yofi heiec.

¹ KEBU, ni heregoc yombong ubangerec megemma yofi edeyunuba, “Ye ua sasawa mekecde, imoc bibiagoc yombong.”

² Ni ubangerec negemma geac amma sogaibade. O Kuctoa mingina, ni geac kpac kuneng heiwayong memima yegec heibade.

³ Ngabafocna yeni gemma dzigenema tifainggema mayunuu kpac anggec. ⁴ Nga geng yoacf u nanggenuma yoacna faka dindingafu desina yoacf firang anai. Ge ngictau tatacgau tacma faka dindingac modacma yoac isingga desinec.

⁵ Geng ngicngac bangec monnunac Anutu mi negemmidae, yeni yunumeting ayemmenec nga ngic Anutu ngadehema mangana megecdeac ayemmeande, yeni kpetotieyununa kpac anggec kpacngina meickenec. Nga imoc sufuma nasoya nasoya kpac anude. ⁶ Ngabafocnina yeni amangina sesuhasac wisic wisickea kpac anu ngaba yeneng imohai kpac anggec. Geng taongngina hembarackena kpac anggec ngic mongno yeneac naric mi negensiude.

⁷ KEBU ye ngictau amma tatahau nasoya nasoya tarude. Ye ngictauac tataha faiu seria taru yoacf faifai uaya meudeac efaide. ⁸ Ye faka dindingac modacma bangectoa bangecac ngicngac yoacngina isingga foraya dema mondea kpac kecma ngiha yoacngina desiude.

⁹ Ngicngac goa yeneng ngic ogofocngina ebic maficgeyemmegec ubaebicnginagoc kecgec, yeneac sufu sufuamangina seria, imoc KEBUNOC. Naso mangana hau yeng amangina seria anu ihai sufugecde. ¹⁰ O KEBU, ngicngac yeneng geac kpac kuneng negengandae, yeni negenserigugecde. Ngicngac yeneng ge hofocguguec geng yeni mi ngadeyunuma wayununade.

¹¹ KEBUNGO Sionnu ngictau tatahau tacde, ngeni ye yegec heimima dengerebisia amma yeng ua mekecde, imoc ngiha ngiha botucnginau dekperagibisia. ¹² Ye ngic sac hetinggec, yeni negengyunuma kopocsicnginaac turunga kpouyemmeude. Ngicngac ebicnginagoc kecma ye kpacgec yeng imoc naric mi nigeckpeude.

¹³ O KEBU, ngabafocna yeneng ngadenuma kpenzeng nga ebic nenggec kecduae. Ge neac ubaga manganeu maficnuna. O Kebu, ni homecac naguu febare geng miacnuna monggoc imohacnac erebade. ¹⁴ Ge ifi anna ni faka gombunga anganne, imocac siduc andacma eriendzong megebade. Nga ge ebicfunac mesinunec, imoc Siong naroangaac naguu namma sogac sogaigoc dekperagiyemmebade.

¹⁵ Ngicngac bangec monnunac Anutu mi negemmidae, yeni yenaoc teng usuma imohai kemegec nga ufc mesufuma faigec, imocngo haninginau meu mayunuec.

¹⁶ KEBUNGO yoacf faifai uaya ngicngac yenearu meu nen iye negemmidimbe. Ngic Anutu ngadehema mangana megecdeac ayemmeande, yeni mariginango ua megec, imocngo yenang botacngina amma witicyunuude. *Higgaiong, Selac*

¹⁷ Ngicngac Anutu ngadehema mangana megecdeac ayemmeande nga bangec monnunac ngicngac Anutu nigecyuu kecanda, yeni ngic homegec, yeneac amau kemma kecgecde. ¹⁸ Ngicngac iwaiac obohoma kecanda, Kebungo yeneac ebicngina nasosoc mi nigeckpeude, kpac. Ngicngac makpekpea yeneng Anutungo maficyuuudeac negensima tomai kecanda, yeni nasoya hau wiac imocac fora henggecde.

¹⁹ O KEBU, ge bangecngic kpae heiyemmena firang mi ambisia. Bangec monnunac ngicngac yeni geac kicfu nanggec geng yoacf faiyunuma fakangina isingga. ²⁰ O KEBU, geng kengec maficgeyemmena. Ngicngac bangec monnunac yeni bangecngicsac andae, imoc edzacyununa negembisia. *Selac*

Ebicfunac mesi mesiac nunumu

¹ O KEBU, ge nocac neac hereau yombong nannec nga ge nocac ebicnaso anu sufuma kecne? ² Ngic Anutu ngadehema mangana meudeac ammiande, ye yengenaac negenu engena ande. Ifi anu gereagoc kemma ngicngac kucmama kisangyunuma ebicngina arenggema mendangyunuuude. ³ Ngic Anutu ngadehema mangana meudeac ammiande,

ye hereau negensongo mangana fede, imocac negenu engena anu yoac homac osoue. Ye iwaiac kichodung amma wiac homac mekpedzuc amma mekefudeac ammiude amma KEBU ngadehema yeac sowecyoac deude.⁴ Ngic Anutu ngadehema mangana meudeac ammiande, ye sebia meemma deude, “Anutu ye wiac imocac mi kpesinenude.” Amma yofi negensima kecde, “Anutu mong mi kecde, kpac.”⁵ Ngic mong ifi kecande, ye uaya nasosoc naric amma ngereeude. Ye ngabafora sasawa yeneac negenu wiac efeacnec andeac dzomoreyemmeude. Ye yoacga kpekefu geng wiac hengising amma foraya deannec, imoc yeac hereau fedeac imoc naric mi henude.⁶ Ye yengenaac yofi negenude, wiac mongngo menuu goroc goroc naric mi ambade. Ni nga esangabofocna kecma ebic mong naric mi meficgenide.⁷ Ye sowecyoac nga ikoc amma ogofoocngina ebicfu faiyunuuudeac yoac dekefude. Dekefu enara imocngo wakeu enacbribihau ngicngac tobangyunuudeac yoac nga ogofoocngina memanganeyunuudeac yoac mesufuude.⁸ Ye amabangec wegenacfu sufuma tomai tacande. Taru ngic mongngo mangana mi meande, ye hau ngic manganango ngic memanganeyunuudeac areng andae, kiwa yenearu fima sufu sufuu kpebucyunuude.

⁹ Raiong yangtoango icbisic botucnginau sufuma tacande, yeng ifi isoc sufuma kucmama yeni meyunuuudeac tomai taru ngicngac memeficngina kpac andae, yeni ufihau mendanggegec meyunuma kenude.¹⁰ Ebicfu mayunugecdeac areng yeni ngonduncnema bangecfu sufuma tacdae. Tacma memeficngina kpac kecma yeac mariu kpegec yeng kuhagoc meyunuuude. ¹¹ Ngic mangana ye ubeau yofi negensiude, “Anutu ye neac nigeckpeu kiwa semema naric mi nenude.”

¹² O KEBU, ge yacna. Anutu, ge mariga miacna enu. Ngic goa yeneng ngic ogofoocngina ebic meficgeyemmegec ebicgoc kecanda, ge yeneac mi nigeckubeso. ¹³ Ngic Anutu ngadehema mangana meudeac ammiande, ye nocac Anutu ngadehema yengenaac negemma yofi deude, “Ye kopocsinaac turunga mi kpounenude.” ¹⁴ Anutu, geng sifu ngicngac ebic nga kpenzenggoc kecdae, yenemma ebicngina negensima marigango meficyununadeac negennec. Memangac manganea kecde, ye kekeha gearu waande nga geng beging yeneac memeficngic. ¹⁵ Geng ngic Anutu ngadehema mangana meudeac ammiande nga yarengic, yeneac maringina hetackena. Hetackema fakangina mangana hengising amma meficgekecna sasawa kpac andacbeso.

¹⁶ KEBU ye ngictau kecde nga kecengkefude. Nga bangec monnunac ngicngac Anutu mi negemmidae, yeneng yeac bangecfunac meickema kpac anggecde.

¹⁷ O KEBU, ngicngac yumia yeneng heresongongina edegugec ge imoc negemma herengina meseriyemmenade. Yeni kpacgugec ge kedzacga yenearu faina.¹⁸ Nga ngicngac goa yeni ogofoocngina ebicfu faiyunugec. Faiyunugec ge ngicngac ubaebicgoc kecdae nga nambarac beging kecdae, yenenggareng ayemmemma faka dindingac modacma ayembebesena. Ge ifi anna bangecngic yeneng kengectoa monggoc mi meficgeyemmegecde.

11

Kebungo onggonnude

Yegecgareng yearu. Dawidingo yegec yofi heiec.

¹ Ni KEBUAC hoannu hama sufuma kecba ngeni dafi negemma yoac yofi edenudae, “Ge neng isoc kemma tikigau worana.”² Negenna, ngic Anutu ngadehema mangana megecdeac ayemmeande, yeni ngic goa herenginau ikoc nga hamangec mong mi fede, yenemma tebemedahango wedecyunugecdeac negemma kundunnu namma gurutu taima kpesaigecde. ³ Ngic yeneng dedeseriyoaraac titiseri kpetotieyunuma meickegecdeu ngicngac dindingac yeneng wiac imoc mengeregecdeac obohogecde.

⁴ KEBUNGO womonga kpetiacfu tacde. Ye ngictau tatahau kurumennu tacma kiwango ngicac nambaracfora yenemma kiwa yenearu fima fakangina hennegeng anude.

⁵ KEBUNGO ngic dindingac fakangina tobanggeude. Yeng ngic Anutu ngadehema mangana megecdeac ayemmeande, yeneac faka momoc tobanggeu ngic yarefakaac songo negengandae, yeni ubango wayunuude.⁶ Ngicngac Anutu ngadehema mangana

megecdeac ayemmeande, yeng yeneac witiu hoc gerec dzedzeagoc nga sarafa gerec borangagoc kpakeu yenereude. Yenereu firang gerea yenereu imocnggo pakenginai kpakegec yenanggac wiac anu yeni ebic imoc pakeunac isoc negecde.

⁷ KEBU ye dindingac amma ye faka dindingac songea negende. Nga ngicngac uba kongaha amma ikoc nga hamangecngina kpac kecdae, yeneng yeac kicmesu henggecde.

12

Kebuac yoacngo onggonnunuude

Yegecgareng yearu. Yegec yomoc sheminic uba modacma gitakurere witingina 8nggo kpema heibesonga. Dawidingo mitiyegec yofi heiec.

¹ Ngicngac yoac modac modacfaka angandae, yeni bic kpac andacma ngicngac botucninau monggoc mi kecgecde. Nga Anutuac enac tofoc tofohongic, yeni kpac amma monggoc mi kecgecde. O KEBU, imocac meficnunubesena. ² Ngic sasawa yeni ogofocnginagoc denengeng amma ikoc andacgec enacbibicnginaunac yoackerec ikoha ereu herenginai manganango tobangyunugecdeac yoac degecde. ³ Ngicngac yeni enacnginai yoackerec ikoha anggecde nga nedzarangngina yenanggac yoac engena homac osogec KEBUNGO imoc herecgema meickebeso. ⁴ Yeni yofi deandae, “Neni nedzaranninango kuc nemmeu seria nannide nga enacbibicninango meficnunu ngic mongngoo naric mi garennumuna dzegenunuude.”

⁵ Ifi degec KEBUNGO ine yoac yofi dede, “Yeni makpekpea memayunuma memanganeyunuandae. Nga ngicngac yeni ebic witiau kecma asoringa ayemmede, imocac yaguc yacma onggongyunubade. Yeni sufu sufuu ruaegoc tacgecdeac ayemmeu neng meyunuma hoannau faiyunubade.” ⁶ KEBUNGO yoac deserima deec, imoc sasawa yoac kongaha nga seuha kpac. Ngic yeni siriwa gerec gereagoc ohogec atac 7 anu bangecfu mama kongac koporarac anude. KEBUNGO yoac deserima deec, imoc ifi isoc ande.

⁷ O KEBU, geng onggonnunuma ngicngac yofinenggac kecdae, yenearunac nasosoc garennumuna. ⁸ Ngicac medacfora botucnginai yarefakaac negenggec engena ande. Nga ngic Anutu ngadehema mangana megecdeac ayemmeande, yeni noboc noboc oronnunuma kengha andae.

13

Ge kicmesuga mi mesufuna

Yegecgareng yearu. Dawidingo yegec yofi heiec.

¹ O KEBU, ebicna noc nasou wisickeude? Ge naso wisic wisickeea kpac kecma neac mi nigecgubeso. Ge kicmesuga nearu mesufukecne, ge faka imoc wanadeac tomai kecduae. ² Ni ubaebicgoc kecduae, imoc wisickeudeac tomai kecma ubahodung wenacsoc negengkecduae, imoc kpac anudeac tomai kecduae. Ngabafocna yeni firang anggec yeneac bageu kecduae, imoc wisickeudeac tomai kecduae.

³ O KEBU Anutuna, ge neac negensima turunga merennenna. Ni homecfu heima febaiac kicnau kperagiga faina kecbesare. ⁴ Nocac ngabangicnango yofi debacac, “Ni firang bic andua.” ifi deu ni goroc goroc amma manubeso anu ye imocac sogaibacac meficnuna. ⁵ Geng yoac dedzege amma imoc modackecnecac negenseriguma kecduae. Geng ebicfunac mesinunecac amma ni heregoc geac desogai angkecduae.

⁶ KEBUNGO gombunga anengandeac yegec heimibade.

14

Anutua kpac kekec

Yegecgareng yearu. Dawidingo yegec yofi heiec.

¹ Ngic negen negengngina kpac, yeni herenginai yofi negemma deandae, “Anutu mong mi kecde, kpac yombong.” Yeni fakangina manganeu faka mangana yombong anggecde. Ngic mongngonec faka gombunga mi angkecde, imoc kpac yombong.

² KEBUNGO kurumennu kecma ngicac nambarac yenemma kefude. Nga ngic mong ye

negen negentegehagoc kecma Anutu hofocande, Kebungo kic fiu mau ngic ifia yeac kicfifi angkecde.³ Nga yeni ine sasawango ngade ngadec kemedacma fakangina heimeremma manganedacgoc. Ngic mongnga mong faka gombunga mi angkecde, mocdong kpac yombong.

⁴ Yarengic yeni wiac negemma negegecnginagoc mi anggecde. Nga ngicngo yaka neandae, yeni ifi isoc ngicngacfocna neyunuma KEBU ine naric mi kpacgecde.

⁵ Anutungo ngicareng dindingac kecanda, yenigoc kefudeac manganameme yeneng kengectoa amma homac yombong kpidohogecde. ⁶ Yarengic ngeneng ngic makpekpea arengngina memanganbeso anganda, fora. Nga KEBU yennoc yeneac sufu sufuama.

⁷ O, Israe neneac mengec mengere, ye Siong tikiunac mama habeso, imocac yombong anemmede. KEBUNGO ngicngacfocna monggoc mengerenunu naric kecnide, naso imohai Yakoboac nambaracfora sogaigecde nga Israe neni ubangerec negennide.

15

Anutuac womannu
Dawidingo yegec yofi heiec.

¹ O KEBU, geac kporucwomongga kpetiacfu merang naric tarude? Nga merang tikiga kpetiacfu naric kefude?

² Ngic mong ye faka angammemeau kopocsic mong mi meficgeude nga mong ye faka gombunga angkecma hereaunac yoac fora ereu deude, yeng ihai naric kefude. ³ Ngic mong ye nedzarangango ngadeyoac mi deude nga ogea mi memanganeude nga mong ye ogofora yeac wegenac kecanda, yeni game kpekpeuu naric mi faiyunuude, yeng ihai naric kefude. ⁴ Ngic mong ye ngic mangana, yeneac modzea tiande nga ngicngac KEBU ewehiheigoc hoanggeandae, yeneac ewengina heiude. Nga mong ye dedeseriyoac modaru imocngo ebic homac meficgemideu imoc sifu modarude nga ye imoc negenu wiac engena mi anude, ngic imocngo Kebuac tiki kpetiacfu naric kefude. ⁵ Ngic goa yeneng ngic mong yearu turung angkecdae amma kpougecde, imohai yeng profit dema dzo monggoc torokpema mi meude. Amma ngicngac goa kopocsicngina kpac kecdae, yeng yeni yoacfui memayunuudeac moneng naric mi meude, ngic ifia yeng Kebuac tiki kpetiacfu naric kefude.

Ngic mong ye faka imoc angkecde, ye wiac mongngo meu goroc goroc naric mi anude.

16

Kingangfora garengyunuude
Yegec yomoc miktang uba modacma heibesonga. Dawidingo yegec yofi heiec.

¹ O Anutu, ni geac hoannu hama sufuma kecbadeac onggonnuna. ² Ni KEBU yofi ededuue, "Ge Kebuna, forangoc, gea kpac wiac mong gombunga naric mi mekecbai."

³ Bangecfu ngicngac kpetiac yeni ngicngac ewehiheinginagoc, yeneac negemba ngereede. ⁴ Ngicngac nemuonga meisngema hoanggeandae, yeni ine ubahodung kekecngina kpedzigec hama ebicngina monggoc nga monggoc anude. Ni yeneac sese dema sac naric mi hetinggebade nga kpacngina enacbibicnango naric mi kpacbade.

⁵ KEBU, geng wiac noboha nennec, imoc pakene isoc anu imoc mema nebade. Geng maridzominna garenggena imoc neac amma fekefude. ⁶ Wiac mederema nememegec, imohai neac maridzoming wiac gombungau heficgeu nenggec. Foracngoc, ni maridzominna imocac ubangerec negenduae. ⁷ KEBUNGO dederecge anemma sing edzacnuudeac kenehebade.* Herenango tofocnac ifingoc edekpou anengande.

⁸ Ni nasosoc kicna KEBUARU fikecduae. Yeng marifoinau kecdeac wiac mongngo menuu goroc goroc naric mi ambade. ⁹ Imocac herenango ubangerec negemma ongana sogaiu sebina ifingoc ruaegoc anude. ¹⁰ Geng ongana wana homec amau naric mi

* ^{16:7:} Anutungo meficnunu nenang bangecngicngac nec yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereede. (Fingec fingec 9:26, 14:20, 24:48, Mitiyegec, 26:12, 103:22 nga goa homac fede.)

kemeude. Amma ge enac tofoc tofohongicga onggonggena kicsere naric mi henude. ¹¹ Geng kekecac sing kpounennec. Geac kicfu sogac sogai hafoangoc fede nga marifoigau ubangerec feengkefude.

17

Kebu ge onggonnuna

Dawidingo yofi numuec.

¹ O KEBU, ni dindingac amma ebicfu kecma yoac deduae, imocac yoacna negenna. Ni arohma kpacguba ge yoacna negenna. Enacbobicna ikoha kpacngo numugemba ge kedzac kpema nunumuna negenna.

² Ge yoacfу neac yoac faka dindingac modacma forana debesena nga geac kicngо faka dindingac hembeso. ³ Foracngoc, ge tofonac yugucnuma tobangge herena hennegeng annadeu nearu mangana mong mi meficgenade. Enacnango yoac kopocsihagoc mong mi debadeac negenserai. ⁴ Ngic goa yeni faka angammemengina hania hania fede, fora. Nga ni sifu enacbibicgango yoac denec, imoc modacma garengemema yarengic yeneac sinnu mong mi kenai. ⁵ Ni serima geac sinnu tima kengha amma hanina mong mi tiposockeec.

⁶ O Anutu, geng nunumunaac turunga merennennadeac kpacguduаe. Ge kedzacija nearu faima yoacna negenna. ⁷ Geng yoac dedzege amma imoc modackecnec, wiаc imoc bibiagoc andeac imoc edzacnuyombonggena. Ngicngac nenи ngabafocnina yenearunac meickema sufunideac geac hoannu hani geng ebicfunac mesinununade. Nga ngaba yenearunac gearu hama marifoigau sufunide. ⁸ Ge geangga kicga garenggeannec, ge ifi isoc ni garennuma kpeganggaac debannu fainuma mesufununa.

⁹ Ngic goa yeni Anutu ngadehema mangana megecdeac ayemmeu kpetotienubeso andae. Nga ngaba yeni kpebucnugecdeac negemma oronnuma nandae, ge yenearunac mesufununa. ¹⁰ Yeni herengina dzegegec yenearu ubamangang mong mi feyemmeu enacnginango yoackpekpe kpegecde. ¹¹ Yeni hanina modacma kisannuma meficnuma yaguc oronnuma nandae. Yeni kicngina kucgoc nearu fima bangecfu kpefacnubeso andae. ¹² Raiong yangtoango wiаc kisamma sorienacngо sebia merecgeudeac ammiande nga raiong kuhagocngо sufу sufuu ngonducnema tomai feande, yeni ifi isoc andae.

¹³ O KEBU, ge yacma kemma ngabafocna kicngina hama yunuma bangecfu ukuyununa. Ngic Anutu ngadehema mangana megecdeac ayemmeande, yeni menugecak dzikacbeanggangо kekecna yeneac mariunac mesina. ¹⁴ O KEBU, ge geangga maringo bangecngic yenearunac mesinuna. Bangecngic yeni bangec yomohai kecma imocac wiаc mekpedzuc amma mekecdae, yeni imocac areng. Ge yeneac negemma wiаc faina fede, imocngо herengina mewakeude. Mewakeu medacfocngina yeneng wiаc imoc monggoc nga monggoc mekecma nambaracfocngina yeneac negemma noboha faigec tarude.

¹⁵ Anu ni dindingac kecma kicmesuga hemma gauunac gborima geac kicsiric hemba gunucnude.

18

Ngictaungo firang anec

Yegecgareng yearu. KEBUNGO kingang ngiha Dawidi ngabafora sasawa yeneac maringinaunac mesima Sauroac kuc memama yearunac meickeu Dawidingo KEBU yegec yofi heimiec.

¹ O KEBU, ge neac kucna, ni geac songo negenduae. ² KEBU ye neac hoc peperandzi seria, ye amana seria amma neac yungec yungecngic. Ye Anutuna nga neac hoc peperandzi seria anu ni yeac hoannu kemma sufuma kecbade. Ye kasona nga ye kuhagoc amma ebicfunac mesinuu yeac odaseriau kecbade. ³ KEBU eriendzong memini ngereeyombonggede. Ni ye kpacba yeng ngabafocna yeneac witicfunac mesinuude.

⁴ Homecac witicngo fusenuu doku tungbaungngo wegenac hama memanganubeso anu kucna kpac anec. ⁵ Nga homec amaac witicngo fusenuu homecac botacngo sinna hedzickegec.

⁶ Ni ebicfu kecma Anutunango meficnuudeac kpacobare yeng womongau tacma ubaudumenna negemma kedzac kpema kiacna negenec.

⁷ Yeng ngaba anecac bangecngo kockpac amma kpemindzaheu usoc meu tikiac titiseri yeni dendeng kpegec. ⁸ Ye samaha singausing hosuc mau gereknggo enarausing erema wiac dzerecgeu kpac andarec. Hoc gerecyohoagocngo enaraunac ereu singsararang kpema kenggoc. ⁹ Ye kurumenga kurumenga merarangyunuma hau kundungtoango hania bageau tarec. ¹⁰ Ye kerobing witiau taru imocngo kpegangagoc kpututuckeu haec. Ye firanggac kpeganga witiau heima sawakebangau haec. ¹¹ Ye kundung mema imocngo kperacemema kiahoeng dzadzungo bedzoya amma oronggeu imocac manau tarec. ¹² Kibikperagingo waraimima hoengmekperagiyunuu yeni yeac kicfu kenggoc kia nomanggbomea kuneng amma mau hoc gerecyohoagocngo ifingoc hoeng manaunac maec.

¹³ Nga nomanggbomeatoa nga hoc gerecyohoagocngo maec, imocac manaunac KEBUNGO kurumenga kurumenga, imohai tacma gbumparandang meficgeu haec. Kuctoa minginango yoac deu yeni enacudumenga negenggoc. ¹⁴ Ye tebe kperecgema tebemedac isoc kpesaiu ngabafora singsararang kpegec. Ye piratac kucnginagoc sing edzacyunuma faiu yeni sing imoc modacma kenggoc. ¹⁵ O KEBU, geng yoac ngabasiric edeyunuma samacgausing asu fifina kucgoc erema kondungtoa meu dzikeu kperemenga fingecte-geru henggoc. Nga bangectoa bangecac titiseri imoc didiu faina henggoc.

¹⁶ Ye sawau tacma maria sinema menuma doku dzohong kemeaunac kpedzinuec.

¹⁷ Neac ngabangic kuhagoc anu yeng yeac mariunac mesinuu ngic neac modzongina tiande, yeneac kucngo feracnuecac yeng yenearunac mesinuec. ¹⁸ Naso manganango ebihagoc neac wegenac hau ngabafocna yeneng kicnau hama namma nubeso anggec KEBUNGO meserinuma mefinuec. ¹⁹ Ye neac songo negenecac amma ebicfunac mesinuma sawea homac meficgenemma hesicnu kemma ihai fainuec.

²⁰ KEBUNGO neac faka dindingac henec, imocacsoc faka gombunga anenec. Nga marinango faka kongaha angkefaiac ye imocac turunga merennemmma wiac gombunga nenec. ²¹ Ni Anutu wama faka mangana mong mi amma KEBUAC sing gombunga modacanduaengoc. ²² Yeac dedesiyoac imoc sasawango kicnau feu ni nasosoc hemma yeac singyoac mong mi ngadehema wayai. ²³ Amma ni yeac hehennu kopocsic mong mi meficgeai, kpac. Ni kopocsic meficgebaiac fagung amma garengemekefai. ²⁴ Nga marinango faka kongaha angkefecac KEBUNGO neac faka angammeme dindingac hemma gombungaac turunga kpounenec.

²⁵ O Kebu, ngic mongno yoac modackefu ge yoacga modackecnec, imoc edzahanade. Nga mong ye kopocsic mong mi meficgeu geng kopocsic mong mi meficgeannec, imoc edzahana henude. ²⁶ Mong ye uba kongahagoc kefu geng ubaga kongaha, edzahenade. Nga mong ye fakaya heimeremmma mangana modackefu ge ifingoc fakaga gombunga heimeremmma mangana ammina henude. ²⁷ Geng ngicngac yumia ebicfunac mesiyununade. Nga ngic yenanggac negenggoc wiac engena ande nga gamea kpac kecma kicngina miacandae, geng ine yeni memayununade.

²⁸ KEBU Anutunango kundunna meickeu kperagia angkecde. Oc, gennoc kifana kpedzereckenade. ²⁹ O, ge sing meficgenenna ngabahabu memayunubade. Anutunango kuc nenu odatoangina membarackema ferahabade.

³⁰ Anutu ye faka angammemea dindingac nga KEBUNGO yoac deserima deu fora fingerudenoc. Ngicngac yeneng yeac hoannu hama sufudacgec yeng kasongina amma mesufuyunuude. ³¹ KEBU ye mocgungo Anutu fora amma Anutunina mocgungo hoc peperandzi seria. ³² Ngicngac wamba heigec kemeande, ifi isoc Anutungo kuc heinenu kemeu sing ebiha kpac meficgenenu gombunga kengkebade. ³³ Yeng hanina mengereu kate yanggac haniherec isoc anu bic yombong nedzibade. Nga ye tikiu nambadeac kuc

nenu naric mi manuude. ³⁴ Ye marina mengereu dzikacac negenggoc anduaeac tebe seria aiengngo memea, imoc naric taibade.

³⁵ Ge ebicfunac mesinuna imocngko kasona angkecde. Ge marifoigango nanggenuna serima namba geng meficnuna ngickuneng anai. ³⁶ Ni tiserima nambadeac geng tumiatoa meficgenenna haninango mong mi tiposockeec. ³⁷ Amma ni ngabafocna kisangyunuma meficyunuma memanganeyunuba kpac andacgec monggoc dzigeneai. ³⁸ Ni ngic yunuhomeai, yeni haninau makpema monggoc mi yacgec.

³⁹ Geng dzikac kpebadeac kuc heinemma ngabafocna neac bageau faiyununa mayunuufegec. ⁴⁰ Nga ge ngabafocna faka ayemmena yeni ngadengina nearu meremma wanuma kenggec. Nga ngic yeneng neac modzongina tiu neng kpetotieyunuba kpac anggec.

⁴¹ Yeni memeficac kiacgec nga ebicfunac mesiyunuudeac ngic mong ine mi tarec. Yeni KEBUNGO meficyunuudeac kiacgec yeng yoacngina mong mi merenec. ⁴² Ni kpedzameyunuba yeni sendung firangngko mefiranggeande, ifi isoc anggec. Ni sinnu goteng isoc meicyunuma ngadeau ukuyunuai.

⁴³ Ngiha ngiha yeneng ngaba anenggec geng imohacnac mesinunec. Mesinuma sing meficgenenna bangec monnunac ngicngac yeneac garengtoa anai. Ni ngicngac areng goa mi negengyunuba yeneng neac bageu kecma kingang kpenenggec. ⁴⁴ Ngic yeni siducna negemma yoacna bic tofogec kuricngic yeneng hama neac kicfu ngondu-nema ewena heigec. ⁴⁵ Yeni kucngina mau dzonongngina fedeu amangina seria wama imohacnac mama hagec.

⁴⁶ KEBU kecde. Neac hoc peperandzi seria, ye kenehebesonga.* Anutu ebicfunac mesinuec, ye kpac kuneng mibesonga. ⁴⁷ Anutungo ebicna negemma turunga kpouyemmema ngiha ngiha neac bageu kecgecdeac faiyunuec. ⁴⁸ Oc, ye ngabafocna yeneac mariunac mesinuma kicnginau miacnuma kpac kuneng nenec. Ge yarengic kucnginagoc, yeneac mariunac mesinunec. ⁴⁹ Imocac bangec monnunac ngicngac botucnginau namma afegubade. O KEBU, ni yegec heima geac kpac kuneng heiwayong memibade. ⁵⁰ Yeng ngictauya faka ammiu dzikatoau firang angkefude. Ye ngic meisingga kerec nadzicmiu yeng yeac ngictau anu yegoc kecma yoac dedzege anec, imoc modackefude. Yeng Dawidi meisingga nasoya nasoya ye nga esangaboforagoc kecde nga kecengkefude.

19

Anutuac marikibi

Yegecgareng yearu. Dawidingo yegec yofi heiec.

¹ Anutu ye kuc nga kibikperagiagoc, kurumenga kurumenga yeni siduc imoc dekperagikecdae nga sawango yeac marikibi deireckeude. ² Hadzing monggo hadzing ogea yoac imoc edeu tofocnac monggo tofocnac ogea imoc dedekperagi ammiude. ³ Yeni yoacngina ning kpeu yoac mong mi dedae, fora. Ngic monggo ubaudumengngina mi negenude. ⁴ Nga ubaudumengngina imoc sifu bangectoa bangec, imohai kengkecde. Yeni yoacnginango bangec noboc noboc wisic wisickeau kendarude. Anutungo kurumenga kurumenga, imohai wenacac kporucbedzo mong faiu fede. ⁵ Ye memeturang ngic monggo memeturang ama manaunac ubangerecgoc maande, ifi isoc haude. Wenac ye nedzi nedzi ngic kuhagocngko firang anudeac sogac sogaigoc nedziande, ifi isoc hama ⁶ kurumenga kurumenga tegia monnusing erema singa modacma kemebesonga tegia nobocsing kemeude. Ye gerea yombong anu wiac monggo yearu naric mi sufude.

⁷ KEBUAC dedeseri imoc gombunga amma ngicngac ubaonganina heigboriude. Amma KEBUNGO yoac dekperagi nemmeude, imoc fora yombong amma ngic negen negentegec obohoande, ye negen negentegec meficgemiude. ⁸ KEBUAC dederecgeyoac imoc dindingac amma sogac sogai hereninau meficgenemmeude. Amma KEBUAC

* ^{18:46:} Anutungo meficnunuu nenang bangecngicngacnece yuria kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereeude. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

nonoyoac imoc kongaha amma kicninamekperagiude. ⁹ KEBUAC eweheiheigoc kekec imoc kongaha amma feengkefude. Nga KEBUNGO dederecgeyoac modacnideac faiec, imoc seria amma dindingac. ¹⁰ Imoc gol ferahama gol tegeng momoc ferahaude. Amma imoc kukundzau songea ferahama songea yombong ande. Imoc kukundzau kpedzuc-neandimbe, imoc ferahayombonggeude. ¹¹ Dederecgeyoacgango kingang ngicga goroya kpeu ye imoc modackefu, imocngo ubangerec wiac engena miude.

¹² Ngic yengenaocngoc isingemema kopocsiha naric mi hentegerude, kpac. Kebu, ge kopocsicna sufu sufuya wana. ¹³ Ni, kingang ngicgango kopocsicfaka goa yofi negemma mekecbai, "Faka imoc songea andeac angkecbadenoc." Ni ifi amba geng sinna hedzickena kopocsicngo mi garennubeso. Ge ifi anna ni kopocsic mong mi meficgebade nga singyoac kpema faka mangana mi ambade. ¹⁴ Nga enacbibicnaunac yoac nga negen negeng herenau fede, imoc negenna ngereebeso.

O KEBU, gennoc neac hoc peperandzi seria nga ge bummenuma ebicfunac mesinunec.

20

Ngictau kerec nadzicmiec

Yegecgareng yearu. Dawidingo mitiyegec yofi heiec.

¹ KEBUNGO ebicnasou yoacgaac turunga merenggembeso. Yakoboac Anutu, yeac kpac kunengngo ge onggonggubeso. ² Yeng womongaunac memefic suegenu Siong tikiunac heimefic anggema mang anggembeso. ³ Ge sese mema faianne, yeng imoc sasawa negenu febeso nga sesegerecga ohoanne, imocac negenu ngereebeso. Selac

⁴ Ge wiac moggac heresongoga anu ye wiac imoc gembeso nga geng areng sasawa faina yeng imocac fora meficgegembeso. ⁵ Ge firang andanggac ubangerec acarohoma sogac sogai ambisina. Nenang Anutuninaac kpacf FIRANGGAC ma kpedzini embeso. KEBUNGO kpesi kpesiga sasawa negemma foraya meficgebeso.

⁶ KEBUNGO ngictau meisinggema kerec nadzicmiec, ye ebicfunac mesiude, imoc yaguc negenduae. Ye kpetiac kurumengaunac yeac nunumuac turunga meremmima marifoango faka kucgoc mema ye ebicfunac mesiu firang anude.

⁷ Ngic goa yeni dzikacac keretac negenggec wiac engena anu yoac homac osogecde. Nga goa yeni becosiac negenggec wiac engena anu yoac homac osogecde. Nga nenang KEBU Anutuninaac kpac kuneng negenserima negenni wiac engena ande. ⁸ Yeni kucngina kpac anu fafocnginango heima mayunuude. Nga nenang yacma hongngoc serima nannide.

⁹ O KEBU, ge ngictau meficgena firang ambeso. Neni kpacguni geng turunga merennemmena.

21

Ngictaungo firang ande

Yegecgareng yearu. Dawidingo mitiyegec yofi heiec.

¹ O KEBU, ge kucgagoc, imocac ngictau ye geac ubangerec negenude. Nga geng ye meficgekecnecac ye firang amma homac yombong sogaima kecde.

² Hereau songo feec, ge imoc meficgemidang nga enacbibihango wiacak kpesigenu ge imoc sasawa mima mong mi wadang. Selac

³ Geng ye heitaima kenecgaac finactoa mima ngictau ira gol tegengo memea oruhau fainec. ⁴ Ye kekecac kpesigenu geng kekec mina nasoya nasoya fekengkefude. ⁵ Nga ge mefickena ye firang amma feracyunuma kuc nga kibikperagitoagoc ande. Ge ngickunenggac kuc nga kibikperagi mina ye kunengngina fekefude. ⁶ O, kenecgango yegoc nasosoc feengkefude. Ge yegoc kecnecac ye ubangerec negemma sogaima kefude.

⁷ Ngictau ye KEBU negenserima kecde. Kebu Engenatoango yoac dedzege amma imoc modacma kecandeac wiac mongngc ngictau meu goroc goroc naric mi anude.

⁸ Ge marigango ngabafoga mendangyununade nga marifoango ngic geac mod-zongina tiande, yeni meyunuude. ⁹ Ge didiu fingectegecnade, naso imohai ngaba yeni ngic gerecfu manganeandae, ifi isoc kecgec gerecgango yonohoude. KEBUNGO

herebu amma gbokoyunuu gerecngo yonohou kpac anggecde. ¹⁰ Ge yeneac esafocngina kpetotieyunuma bangecfunac meicyununade. Amma ge yeneac gborifocngina ngic medacfoocngina botucnginaunac meicyununa kpac anggecde.

¹¹ Yeni mangana arenggema gubeso amma ge tobanggugecdeac sing mengeregecdeu uangina imoc naric mi fingerude. ¹² Ge tebega kicnginau kpesaina yeni dzigenema ngadeguma woragecde.

¹³ O KEBU kuctoagagoc, neni afeguma kuctoaga afehema yegec heinide.

22

Ge nocac wanudang

Yegecgareng yearu. Yegec yomoc yegec mong kpara Asoacac kebeseac, imocac uba modacma heibesonga. Dawidingo mitiyegec yofi heiec.

¹ Anutuna, Anutuna, ge ngadenuma wanudang, imoc naric mi ande. Ge neac hereau yombong kecma ebicfunac mi mesinunec, imoc mi ngereede. Ni asoring anenu kiacba ge nocac hereau namma yoacna mi negennec, ifi isoc ande. ² O Anutuna, ni hadzing tofocnac kiacba turunga mi merennennec, ni waickema mong mi kecbade.

³ Ge kpetiac, imoc fora. Israe neneng eriendzong megenni, imocngo ngictau tatacga anude.

⁴ Bangecfocrina yeni warac negenseriguma kecgec. O, yeneng negenserigugec geng ebicfunac mesiyununec. ⁵ Yeni kpacgugec geng ebicfunac mesiyununec. Yeni negenseriguma seria nanggec ubangina kuha mi maec.

⁶ Anu ni ngic kpac, ni gususac. Ngic yeneng desofoc anenggec ngicngac yeni neac modzongina tide. ⁷ Ngicngac sasawa yeni nemma detenic anemma nedzarang sinenemma orucngina kpatitickenemma yofi dedae, ⁸ “Ge ebicga KEBUAC mariu fainecac yeng ebicfunac mesigubeso. Ye geac songo negendeac ebicfunac mesigubeso.”

⁹ KEBU gennoc nonggo heremanaunac menuna fingecma sabacf u nenggacnaac namu nema febareng geng garennumana ruaegoc fekefai. ¹⁰ Ni fingeraiunacngoc geac hoannu fainugec geac anai. Ni nonggo heremanau tacbareng kecma yaguc ge Anutuna kecnec.

¹¹ Ebicng mewegenenuu mongno mi meficnuudeac geng neac hereau mi kecbesena.

¹² Burumaka ngiwa homacngo oronnuma nandae. Basanggac burumaka ngiwa kucnginagocngo oronnuma nandae. ¹³ Yeni mewegenenuma enacngina anggedae. Raiong yangtoa soringina nga enacnginango wiac mong merecgegecdeac kucgoc yombong arohoandae, yeni ifi isoc andae.

¹⁴ Ngicngac yeneng doku bokonnunac kpakeandae, yeni ifi isoc ni kpakenugec kerengaiba sicna dzuhura sasawa fotockedacd. Ni ubaherena kendokereha isoc amma herena manau sisingaima doku doku ande. ¹⁵ Enang dzame dzameaac noboha kerenga fede, ni ifi isoc gbanggema kucna dzikema kpac andac. Nedzarannango kerengaima dumbennau mendanggeu ge homecac sendunnu fainuna feduae.

¹⁶ Kasi yeneng oronnuma sinna tidzickecdae nga yarengic habunginagoc yeneng oronnuma nangkecdae. Yeni hanimarina nendanggedau. ¹⁷ Sicna sasawa fingectegeru ni imoc osobadeacsoc anduae. Nga ngicngac yeneng kic nearu fiyombonggema ni ifi nemma negenggec ngereede. ¹⁸ Yeni wambana botucnginau mederema ngakpina merang meudeac kpeing kpedae.

¹⁹ O KEBU, ge neac hereau mi kecna. O, neac memeficngic, ge bic hama meficnuna.

²⁰ Ge hama dzikacac beang, imohacnac mesinuna nga kekecna kasi yeneac kucfunac meickena. ²¹ Ge raiong yangtoaac enacfunac mesinuna. O, geng kpacna negemma ubaongana ubaebicgoc kecde, imoc kate burumakaac baicfunac onggonggenecac ²² ni munafocna geac kpac kuneng dekperagiyemmema kpebung botucnginau namma ge eriendzong megembade.

²³ Ngicngac KEBU ewea heiandae, ngeni ye eriendzong memibisia. Nga Yakoboac gboricfora sasawa, ngeni ye afehebisia. Nga Israeac gboricfora sasawa, ngeni hemma yeac negenggec engena andeac kicngina yearu firma afehema nambisia. ²⁴ Ye ngic

kpendzengagoc hemma kpendzengtoaac amma ye mi ngadeheec nga ubango mi waec. Ye kicmesuya yearunac mi mesufuec nga kiaru yeng kiara negenec. ²⁵ Geng oyang boyang ubanau faina ni habutoa yeneac botucfu namma ge eriendzong megembade. Nga ngic geac ewega heiandae, yeneac kicfu namma dedeserinaac turung kpoudacbade.

²⁶ Ngicngac makpekpea yeni nema gebecyunuude nga ngicngac KEBU hofocandae, yeneng ye dengeregecde. O, ngeni herengina nasoya nasoya fekecbeso. ²⁷ Bangec tegiaunac ngiha ngiha yeneng yeac negemma ubangina dzigeneu KEBUARU kenggecde. Nga ngiha ngiha yeni sasawango tosofocnginagoc hama yeac kicfu ngonducnema numumigecde. ²⁸ KEBU, kuc minginango bangec monnunac ngicngac garengyunuude.

²⁹ O, bangecac ngicngac yeni yenanggac ngenggac wiac engena ande, yeni sasawango yeac kicfu ngonducnegecde. Yeni sasawango yeac kicfu ngonducnema bangecfu sendunnu kenggecde. Ngic yeni kekecngina garenggegecdeacsoc mi amma homedacgecde, yeni yeac kicfu ngonducnegecde. ³⁰ Bangecfocngina ngade hagecde, yeneng kingang kpemigecde. Ngicareng ngade fingecgecde, yenemma Kebuac kpacsiduc dekperagiyemmegec negenggecde. ³¹ Yeneng yeac fakaya dindingac, imoc ngicngac areng ngade fingecgecde, yeni edeyunugecde. Ye uaya ifi mesiec, imoc edeyunugecde.

23

Ramagareng gombunga

Dawidingo mitiyegec yofi heiec.

¹ KEBU ye neac gareng. Ramagarengngo ramafora garengyunuande, ye ifi isoc neng-gareng anenu wiac monggac naric mi obohobade. ² Ye maneng kpindzing sabayagoc fede, ihai fainuu febade nga doku tegiau hesicnuu ruaegoc kecnegeng ambade. ³ Ye ubaongana mengerema kuc gboria monggoc nenude. Amma ye yengena kparaac amma sing dindingacfу hesicnuu imohai kengkebade.

⁴ Nga ni homecac kperemennu kemema kundung kundunnu kembadeu wiac mangana fingeru imocngo kengec naric mi meficgenenude, nocac Kebu gennoc nigoc kec nec. Geac dzikac nga yasungo meserinuecde.

⁵ Ge ngabafocna kicnginau yombong yakana mengerena neba kerecdokungo orucnau nadzicnenna sebinango ireckeude. Ge neac kpakenec mewakeyombonggena tosea ngadeau maude. ⁶ Ge faka gombunga anennade. Foracngoc, geng yoac dedzege amma imoc modackecnec nga fakaga imocngo hesicnuma kekecnaac uameme sasawau hesicnunadengoc.

Nga ni KEBUAC amau erema ihai nasoya kecengkebade.

24

Kuc nga kibikperagiaac ngictau

Dawidingo mitiyegec yofi heiec.

¹ Bangeha bangeha nga wiac sasawa bangecfu fede, imoc KEBUAC. Bangetoa bangec nga ngiha ngiha imocac witiau kecdae, yeni sasawa yeac. ² Yennoc bangec meficgema imoc kondungdoku nga dokutoa witinginai faiu seria fede.

³ Ngic merang KEBUAC tikiu naric enude nga merang yeac ama kpetiacfu naric nanude? ⁴ Mong ye maria nga herea kongaha kecande nga nemuonga mi afeheude amma ikoc mi amma yoac mong mi deserima deude, ⁵ ye ifi kecmunu KEBUNGO ye keneheu Anutu ebicfunac mesimesi minginango ye ngic dindingac demiude. ⁶ Ngicareng Anutu hofocandae, yeni siricngina ifi. Yeni Yakoboac Anutu, yeac kicfu nambeso ayemmede. Selac

⁷ Nagutoa ngeni hereema witigec. Nagu feengkecdae, ngeni kuc nga kibikperagiaac ngictau imoc merac? Ye KEBU kuctoa mingina amma KEBU yennoc dzikacfu firang angkecde.

⁹ Nagutoa ngeni hereema witigec. Nagu feengkecdae, ngeni kuc nga kibikperagiaac ngictaungo ereudeac hereema kunengngoc witigec. ¹⁰ Nga kuc nga kibikperagiaac ngictau imoc merac? Ye KEBU wasai habuya habuya yeneac kunengngina, yennoc kuc nga kibikperagiaac ngictau. Selac

25

Ge kopocsicna nigecgubeso

Dawidingo yegec yofi heiec.

¹ OKEBUNA, ubaongana miacma gearu faiba hade. ² O Anutuna, ni negenseriguma kecduae. Ngic yeneng game kpekpeu fainubauac geng kpaе heiyemmebesena. Ngabafocna yeneng ebicnaac sogaima dedzomoc anembauac kpaе heiyemmebesena. ³ Oc, ngic mong ye ge negensingguma tomai kefu yeneng desofoc ammibauac kpaе heiyemmebesena. Nga ngicngac goa ikoc ayemmegecdeac areng faiandae, yeni ine game kpekpeu faiyunubesena.

⁴ O KEBU, ge singga edzacnuma hanisingga kpounenna. ⁵ Anutu ge neac ebicfunac mesingic. Ge imocac yoacga forau hesicnuma faka fora edekpou anenna. Ni asoac kemma marai geac tomai kecduae.

⁶ O KEBU, ge wosoefacgagoc nga geng yoac dedzege amma imoc modackecnec, imocnoc hanac hanaheauacngoc feec amma fehakecde, imoc negensina. ⁷ O KEBU, ge gombunga. Amma yoac dedzege amma imoc modackecnec, imocac neac negenna febeso. Ni ngicmedac kecma singyoac kpekecma kopocsic meficgeai, ge imoc ine mi negenna febeso.

⁸ KEBU ye gombunga, ye dindingac yombong. Ye imocac ngicngac kopocsicgoc kecdae, yeni yengena sing edekpou ayemmeude. ⁹ Ye ngicngac yumia faka dindingac modacma hesicyunuma yengena sing edekpou ayemmeude.

¹⁰ Ngicngac KEBUAC dzadzahac nga dedekperagioyac modacandaе, yeni KEBU hemma yofi negenggecde, ye yoac modac modac Kebu. Amma ye yoac dedzege amma imoc modackefude. ¹¹ O KEBU, ni kopocsic ebira yombong meficgeaiac kpac kunenggaac amma imoc sifu wana. ¹² Ngic mong ye KEBUAC ewea heikecde, ngic ifia ye merac? KEBUNGO yenoc sing edekpou ammiu ngic ye sing imoc meisinggema modacbeso. ¹³ Amma ngic imoc ye kekeha ngereeu wiac monggac mi obohoude nga yeac esamedac-fora yeni maridzoming dema bangec mema mingina anggecde. ¹⁴ Nga ngic KEBUAC ewea heikecdae, yeneng yeac ogofora anggecde. Ye yengena dzadzahac dekperagiyemmeu yeni imoc negentegecgecde.

¹⁵ KEBUNGO hanina uficfunac mesiudeac meficnuudeac negeung amma kicna nasosoc yearu fikecbade. ¹⁶ KEBU, ni tembuclna amma ebicgoc kecduaeac neac nec wosoefac anemma dzigenema nearu monggoc hana. ¹⁷ Ni ebicna herenau fede, imoc monggoc yadide. Ge ubaebicfunac mesinuma ebicna sasawa meickena. ¹⁸ Ge kpendzenna nga hereebicna negensima kopocsicna wadacna. ¹⁹ Neac ngabangic yeni homac amma yeni ngabatoanginangoc amma ngadenuandae, imoc negensina.

²⁰ O, ni geac hoannu hama sufubadeac kekecna onggonggema ebicfunac mesinuna. Nga ngic yeneng desofoc anembauac ge kpaе heiyemmebesena. ²¹ Ni geac tomai kecduaeac dindingac kecma kopocsic mong mi meficgeanduae amma ikoc nga hamangecna kpac kecanduaeac faka imocngo onggonnubeso.

²² O Anutu, ge Israe ngicngac bummenumuna ebicfunac mesinunudacna.

26

Ge yoacfу neac yoac dena

Dawidingo yegec yofi heiec.

¹ O KEBU, ni dindingac kecma kopocsic mong mi meficgeaiac nanggenuna yoacfу firang ambesare. Ni seria namma KEBU negenserima kecanduae. ² O KEBU, geng faitobannu fainuma kekecna isinggema ubaherena ifingoc isinggema henna.

³ Ge yoac dedzege amma imoc modackecnec, imoc hemma geac yoac tofohoma kecbade. ⁴ Ni ikocngic yenigoc naric mi kecbade nga ngic manganangina gombunga bageau mesufuandae, yenigoc naric mi kecbade. ⁵ Ni yarengic yenigoc naric mi kecbade nga ngic Anutu ngadehema mangana megecdeac ayemmeande, yenigoc naric mi tacbade.

⁶ O KEBU, ni kopocsic mong mi meficgema marina dzuacba kongac kpeu arataga wegenacfu yerecgebade. ⁷ Ni ubana miacma ubangerec megemma kucfakaga wiac engena negemma dekperagiba negenggecde. ⁸ O KEBU, ge amagerecgau kuc nga kibikperagigagoc kecne, ama imocac songo negenduae.

⁹ Ge kopocsicmeme meicyununade, naso imohai ni yenigoc mi meicnuna. Nga ngic goa yeneng ngicngac ogofocngina yeneac sac hetinggegecdeac ayemmeande, ge meicyunuma neac kekec yenigoc mi meickebesena. ¹⁰ Ngic imoc yeni maringinai yarefaka anggecdeac wiac megecde nga marifoinginai hiedzo mema benukerere faka megec wakeude. ¹¹ Ni neannaoc dindingac kecma kopocsic mong mi meficgekefai. Ge imocac wosoefac anemma ebicfunac mesinuna.

¹² Haninango bangec sorongau tima nambade nga habutoa yeneac kicfu KEBU kenehebade.*

27

Kebu ye kperagi nga memefic
Dawidingo yegec yofi heiec.

¹ KEBU ye neac kperagi nga memengerec, ni wiac monggac kengec naric mi ambade. Ye sufu sufuamana amma ye kekecna onggonggema kecdeac monggac kengec mi ambade. ² Yarengic yeneng wegenac hama gbokocnubesonga andae amma ngabafocna ogofocnginagoc wegenac hama tifainggema mayunuude. ³ Wasai ngic habutoagoc hama nugecdeac bedzongina mema oronnugecdeu ni naric mi kengecnuude. Yeni nugecdeac dzikac kpegecdeu ni negengyohocna kpac kecma seria nambade.

⁴ Ni wiac mocgu imocac KEBU numumima dekpesi ammima imoc hofockecluae, imoc yofi, ni KEBUAC amau nasosoc tacyac amba kekecnasona wisickebeso. Ni yeac siriha gombunga yombong, imoc hemma yeac womonnu ye hembadeac anende. ⁵ Ye ebicnasou yengena oda manau onggonnude. Ye kporucbedzoyau mesufunuma wi hoc peperandzi seriau fainuu gombunga kecbade.

⁶ Ye orucna miaru ngabafocna oronnudae, yeni feracyunuma wi namma yenembade. Ni sogaima ubangerec negemma Anutu womongau sese faimima sogac sogaiac yegec heima KEBU yaiyo kpemibade.

⁷ O KEBU, ni kunengngoc kiaca ge negennemma neac ubaga manganeu turunga merennenna. ⁸ Geng yofi denec, “Ge neac kicmesu hennadeac anggembeso.” Ge ifi dena herenango meremma dede, “O KEBU, ni geac kicmesuga hembeso anende.” ⁹ O Anutu, ge ebicfunac mesinunade nga ni geac kingang ngicga. Ge kicmesuga nearunac mi mesufuna nga ngaba amma mi meicnuna. Ge meficnukecneac mi ukununa. Ge ni mi ngadenuma wanuna.

¹⁰ Nonggo manna yereng ngadenuma wanuec KEBUNGO ine heitainuma nenggareng anenude. ¹¹ O KEBU, ngabafocna memanubeso ayemmedeac singga kpounemma sing sorongau hesicnuma kenna. ¹² Ngic goa yeni enacnginaunac yareasu ereande, yeni yoacfу acma neac yoac ikoha degecde. Ge yeneac songo mi modacna nga yeneac mariu mi fainuna. ¹³ Ni ngicngac gbori kecdae, yeneac bangecfu KEBUAC kekec nga angammeme gombunga hembade, imoc negensinggeduae.

¹⁴ Ge KEBUAC tomai kecma seria nambesena. Heregango efaima kucgoc ambeso. Oc, ge KEBUAC tomai kecbesena.

* 26:12: Anutungo meficnunuu nenang bangecngicngacne yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereeude. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

28

Neac peperandzi seria

Dawidingo yegec yofi heiec.

¹ O KEBU, ge neac hoc peperandzi seria, ni kpacguduae. Ge kedzacga mi kpefonggena. Ge yoacga waickenadeu ni ngic homecamau kendae, yeni isoc ambade. ² Ni kpesi kpesi gearu hama kiacbga ge ubaudumenna negenna. Ni kicna kpetiac womonggaugeng fima marina miacba geng meficnunadeac numubade.

³ Ngic Anutu ngadehema mangana megecdeac ayemmeande nga yarengic amma ngic enacnginango ruae dema herenginango ine tobangyunugecdeac mangana arenggande, meicyununade, imohai ni yenigoc mi meicnuna.

⁴ Yeni fakangina mangana anggec nga megec, imocac turunga merengyemmena. Nga yeni mangana maringinango megec, ge imocac siricfu turunga yemmena. ⁵ KEBUNGO ua mekecde nga mariango wiac meficgekecde, yeni imoc hemma wama mi negensiandaec yang kpedzameyeyunu monggoc mi nanggeyeyunuude.

⁶ KEBUNGO neac kiac udumeng negendacac kenehebade.* ⁷ KEBU ye kucna nga kasona anu herenango ye negenserima kefude. Ye meficnuu herenango sogaiu ubangerecac yegec heimibade.

⁸ KEBU ye ngicngacfora yeneac kucngina. Ye ngiha meisnggema kerec nadzimima yeac sufu sufuamea amma ebicfunac mesiude. ⁹ O, ge ngicngacfocga ebicfunac mesiyununa amma maridzoming ngicngacfocga andae, yeni kenecyeyunu yenenggareng ayemmemma nasoya nasoya tofohoyunubesena.

29

Anutuac kpakpac didiu fingecde

Dawidingo yegec yofi heiec.

¹ O, anutu hania hania yeneac medacfocngina kucnginagoc kurumennu kecdae, ngeni KEBU eriendzong memibisia. Amma ngeni KEBUAC kuc kibikperagiagoc negensima eweheihei ammibisia. ² Ngeni KEBUAC kpara eweheiheigoc heiwayong memibisia. KEBU ye kpetiac, imocac ngeni ngonduncnema numumibisia.

³ KEBUAC ubaudumeng imoc doku witingina fingerude. Anutu kuc nga kibikperagi minginango kondungtoa witiau gbururung amma heiude. ⁴ KEBUAC ubaudumeng imoc kuhagoc yombong. KEBUAC ubaudumeng imoc ngictauac ubaudumeng ande. ⁵ KEBUAC ubaudumengng yomondzoc ic kpetackeude. KEBUNGO Rebanong bangecac yomondzoc ic kpedzameyeyunuude. ⁶ Yeng Rebanong bangec yoac edeu ye burumaka medaha isoc yuude nga Siriong bangec ye burumaka ngiwa isoc yuude.

⁷ KEBUAC ubaudumengng gereborang meficgema ukuyunu singsararang kpegecde.

⁸ KEBUAC ubaudumengng bangec kisiu fingeru imocnggo dzonoma fedeude. KEBUNGO Kadesi bangec kisi kpemindzaheude. ⁹ KEBUAC ubaudumengng kateburumaka yoac edeyunu medacfocngina fingecgecde. Yeng ic maria kpemoronggedarude. Yeac womonnu yofi dema arohodacgecde, “KEBU eweheiheigoc dengereni.”

¹⁰ KEBUNGO ngictau tatahau dokutunggbang witiau tacde. Ye ngictau tatacfu tacma ngictau nasosoc kecengkefude. ¹¹ KEBUNGO ngicngacfora kuc nemmema kenecnunu ruaegoc kecbisina.

30

Kebu ye gombunga

Dawidingo womong desi desinasoac mitiyegec yofi heiec.

* 28:6: Anutungo meficnunu nenang bangecngicngacnec yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereeude. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

¹ KEBU ge keme kemeaunac tainuna ereduac afegubade. Geng ngabafocna kpae heiymmena yeneng neac amma ubangerec mi meficgebisia.

² O KEBU, Anutuna, ni gearu memeficac kiacma numuba geng mengerenunec. ³ O KEBU, ge homec amaunac menunec. Nga tennu keme kemeac arennu tacbareng geng menuma kekecna homecfu kemegecde, yeneac arennumac mesinunec.

⁴ O, KEBUAC ngicngac kpetiac, ngeni ye dengerema yegec heibisia. Ngeni yeac kpara kpetiac heiwayong memibisia. ⁵ Ye ngabaya naso wegenanec mekefude nga fakaya gombunga imoc kekecninau sasawa fekefudengoc. Ge tofocnac kiacade nga asoac sogac sogai meficgenade. ⁶ Ni naric kecma wiac monggac mi obohoai, imohai yofi deai, “Ni seria nanduaeac wiac mongngo nuu goroc goroc naric mi ambade.” ⁷ Nga ge kicga nearu sufuna ine kengecngo memanuec. O KEBU, gennoc faka gombunga anemma tatacnau fainuna tiki seria isoc seria yombong nanai. ⁸ O KEBU, ni kpacguma kpesi kpesi amba negennennadeac yofi numugenai,

⁹ “KEBU, ni homema homecamau kemebadeu wiac mong naric mi gembac. Bangecac sendungngo ge naric mi dengereguude nga ge yoac modac modac Kebu, imoc naric mi dekperagiude. ¹⁰ O KEBU, geng negennemma ubamangang anenna, o KEBU, ge meficnuna.”

¹¹ Geng ubaebicnaheimerenna yegec fededuae nga songgonggac wamba heikefai, ge imoc meickema sogac sogaiac wamba heinenna kemeec. ¹² Ge ifi anna ni waicke monggoc mi kecbade. Herenango yegec heima eweheiheigoc afegubade, o KEBU, Anutuna, ni nasoya nasoya ge eriendzong megembade.

31

Ruae meficgenide

Yegecgareng yearu. Dawidingo yegec yofi heiec.

¹ O KEBU, ni gearu hama sufubeso anduae. Ngicngac yeneng game kpekpeu fainubauac kpae heiymmedacna. Ge dindingac, imoc ac ebicfunac mesinuna. ² Ge kedzacga nearu faima nearu bic hama ebicfunac mesinuna. Ge neac hoc peperandzi seria anna imohai hama sufubade. Ge amana seria amma ebicfunac mesinubesena.

³ Foranoc, ge neac hoc peperandzi nga amana seria. Ge kpac kunenggaac amma hesicnuma singga edzacnuna. ⁴ Ge neac sufu sufuama annecac ngic yeni ufc sufu sufu faigec mendannuu, geng imohacnac yungecnuna. ⁵ Ni asuna marigau faiduae. O KEBU, yoac modac modac Anutuna, geng bummenuma ebicfunac mesinunec.

⁶ Ngicngac yeneng nemuonga ikocnginagoc hoangyunuma eweheihei ayemmeandae, ni ine yeni ubango wayunuma KEBU negenserima kecbade. ⁷ Geng kpPENDZENNA hengkecne ng geng yoac dedzege amma imoc modackecnec, imoc ac ubangerec negemma soaibade. ⁸ Ge ngabafocna yeneac mariu mi fainuma sawea homac meficgenenna haninango naric tima nambade.

⁹ O KEBU, ni ubaebicgoc kecduaeac amma ge neac ubaga manganeu. Ni ubahodunnagoc kecba kicna ngopic ande nga ongasebinango undzang kpema kecduae.

¹⁰ Kekecna ubahodunggoc kefai nga asoringa anenu kifana kengkefec. Ni ngicngac memanganeyunu kefaiac amma kucna kpac anu sicnango kucmama amma kpac ambeso ande.

¹¹ Ngabafocna sasawa yeneng desofoc anenggecde. Nga ngicngac nigoc wegenac kecandae, yeni neac modzongina tiu wanugec ogofocna yeneng sinnu meficnuma nemma woragecde. ¹² Ngic ogofocngina homegec ngicngac yeneng yeneac nigecyunuande, yeni ifi isoc neac nigecyunuuec. Enang mong tohou ngic yeneng imoc ukuandae, ni ifi isoc anduae.

¹³ Ngicngac homacngo neac dengunuc kpengunuc anengkecdae imoc negenduae. Ni noboc noboc kemma kengectoa amma kpidohoba yeni nugecdeac yoac dedzege amma kpebucnugecdeac yoac dzegedae.

¹⁴ O KEBU, ni negenseriguma yoac yofi deba, “Ge Anutuna.” ¹⁵ Neac naso imoc geac mariu fede. Ge ngabafocna nukporac anendae, yeneac mariunac mesinuna. ¹⁶ Ni geac kingang ngicga, imocac kicmesugango nerarannuna. Geng yoac dedzege amma imoc modackecnecac ebicfunac mesinuna.

¹⁷ O KEBU, ni kpacguduaeac negennnenna. Ngaba yeneng game kpekpeu fainubauac ge kpae heiyemmena. Ngic Anutu ngadehema mangana megecdeac ayemmeande, yeni ine game kpekpeu faiyunubesonga nga yeni yoacngina kpac amma homecamau kemebisia.

¹⁸ Nga ngicngac enacbibicnginango ikoc angandae, ge yeneac enac medzickena. Ngic yeni yenanaggac negenggec engena anu ngic ogofocngina dindinga ngadeyunuma yeneac ubakpekpeyoac deandae, ge ngic imoc yeneac enac medzickena.

¹⁹ Ngicngac ge eweheihei anggandae, yeni gombungagango garengyunuanne. Nga ngicngac neneng geac hoannu hama sufuni geng ngicngac sasawa yeneac kicfu gombungaga meficnununade, fakaga gombunga imoc homac yombong kpac. ²⁰ Ge kasonina anna ngicngac yeneng memanganenunugedeac arenggegec geng mesufununuanne. Ge kasonina amma hoangnununa ngic mangana yeneac yoac manganango naric mi memanganenunuude.

²¹ KEBU kenehebesonga. Ngaba yeneng taongtoa hedzickeandae, yeni ifi isoc sinna hedzikegec imohai Kebu yoac dedzege amma imoc modackecde, yeng wiac engena mema garenuec. ²² Foracngoc, ni kengec amma yofi deai, “Yeni kicgaunac meicnuma hereau fainugec.” Nga ni kpesi kpesi amma meficnunadeac kiaca gennoc kiaca negennec.

²³ KEBUAC kpetiac ngicngac sasawa, ngeni ye songogoc hoanggebisia. Yeng ngicngac yeac yoac modacandae, yeni onggongyunuude.

Ngic yeni yenanaggac negenggec wiac engena anu angammeme hania hania angandae, imohai yeng turunga mangana efea kpac merengyemmeude.

²⁴ KEBUAC tomai kecandae, ngeni herengina meserima serima nandacbisia.

32

Kopocsic defic deficge

Yegec yomoc masiki uba modacma heibesonga. Dawidingo yegec yofi heiec.

¹ Ngic mong ye singyoac kpeu Kebungo ebiha wamima kopocsihaac ebic semeeec, ye kenehagoc. ² Ngic mong ye ngicngac ogofora memanganeyunu KEBUNGO kopocsiha wau kpac andac deande nga ngic mong ye asuyau ikoc mong mi fede, ngic imoc ye kenehagoc.

³ Ni kopocsicna mi deficgema waba feu asoacnac kemma marai asoringa anenu mi wisickemanu kecbare sebina kpac ambeso anec. Wenac nasou wiac kerenga amma moronggeande, ni kucna ifi isoc kpac anec. ⁴ Ge marigango hadzing toforec merandzinukecnecac wenacngo kpeu bangec gbanggeande, kucna ifi isoc gbanggema kpac ambeso anec. Selac

⁵ Anu ni kopocsicna gearu deficgeai. Ni kopocsicna mi semema yofi deai, “Ni singyoac kpekefai, imoc KEBUARU deficgebade.” ifi deba geng kopocsicna wama ubamanganna meickena kpac anec. Selac

⁶ Anutuac enac tofoc tofohongic yeni ebic fingecyemmu yeneng gearu numubisia. Numugec ebic kuneng me doku tungbaungngo naric mi kpesereyunuude. ⁷ Ge neac sufu sufuama. Ebicngko memanubeso anu geng onggonnuna ebicngko naric mi memanganenu geng sogac sogaiac aro kunengngo oronnunade. Selac

⁸ KEBUNGO deec, “Ge singga tinade, imoc edekpou anggembra, imoc modacbesena. Kicnango modacguma dederecgeyoac anggembade.

⁹ Becosic nga donggi yeni negengngina kpac kecdae. Ge yeni ifi ambesena. Yeni dumbengnginau witic kpena kemeu, imohai yoacga modacgecde nga witiha kpacngko geac wegenac naric mi hagecde.”

¹⁰ Ngicngac Anutu ngadehema mangana megecdeac ayemmeande, yeni ebic homac meficgema mayunuude. Nga ngicngac yeni KEBU negenserima kecgec KEBUNGO yoac dedzege amma imoc modarude. Nga yeac faka imocngo orongyuuude.

¹¹ O ngicngac dindingac, ngeni sasawango sogaima KEBU dengerebisia. Ngicwiac herenginau ikoc nga hamangec mong mi feder, ngeni sasawango sogaima dendzerenggema arohobisia.

33

Dedengerecac yegec gboria

¹ O ngicngac dindingac, ngeni KEBUAC amma sogaibisia. Ngicngac ngeni ikoc nga hamangecngina kpac kecdae, ngeni ye eriendzong memigec ngereede. ² Ngeni kurerengo KEBU dengerema gita witiha 10 kpema yeac musi gombunga kpebisia. ³ Ngeni yeac yegec gboria heimibisia. Ngeni gita mengerema kpegec musi gombunga fingeru dendzerenggema yegec heibisia.

⁴ KEBUAC yoacf uaya sasawa mekecma mesiude. ⁵ KEBUNGO dindingac kekec nga sing dindingac modac fakaac songo negenude. KEBUNGO yoac dedzege amma imoc modackeade, yeac faka imocngo bangec sokoma feder. ⁶ KEBUNGO yoac dema kurumenga kurumenga meficyunuec. Ye enacasuyango wenac nga afo amma asomeng habutoanginagoc meficyunuec. ⁷ Ngicngac yeni doku kirunnu faiandae, yeng ifi isoc kondunggac doku kpedzucyuu mocgu anggec amma kondung keme kemea dokungi-nagoc amangina mengerema tatacnginau faiyunuec.

⁸ Bangectoa bangecngo KEBU ewea heimibeso nga bangectoa bangecac ngicngac, ngeni sasawango hemma yeac negenggec engena ambeso. ⁹ Yeng yoac enacngo deu wiad imoc fingerec. Nga fingecgec deu imohaingoc wiad sasawa fingecdacma seria feec. ¹⁰ Bangec monnunac ngicngac Anutu mi negemmidae, yeneng negen negengngina arenggegec KEBUNGO imoc meu kemma kpac anude. Nga ngiha ngiha yeneng ua mong mebesonga arenggegec yeng singngina hedzickeu imoc naric mi megecde.

¹¹ Nga KEBUNGO wiad mong mebesonga negenude, wiad imocngo nasosoc fefeseri feengkefude. Yeac hereaac negen negeng, imongo fingecsahehina fekecdesoc, imohai feengkefude.

¹² Bangecareng mong yeni Anutungina KEBU yeni kenecnginagoc. Ye yengena areng meisingyuuue yeac maridzoming areng anggec.

¹³ KEBUNGO kurumennunac kiwa fiu mau bangecngicngac sasawa yenendarude. ¹⁴ Ye ngictau tatahau tacma kiwa bangecac ngicngac yenearu fima nenendacma ¹⁵ ngicngac neneac woubocninaac siriha dema meficgedaru faka angammemenina sasawa hen-negeng anude.

¹⁶ Ngictau ye yengena wasai ngichabu yeneac kucfu dzikacfu firang naric mi anude nga wasaingic ye yengena kucfu ngaba yeneac mariunac naric mi woraude. ¹⁷ Dzikacac becosicac kucfu dzikacfu firang angandae anu negen negeng imocngo fora mi ande. Nga becosic kuctoanginagocnggo ngaba yeneac mariunac naric mi mesiyunugecde.

¹⁸ Foracngoc, ngicngac yeneng KEBUAC ewea heiandae, Kebungo yeni kiwango yenenude. Yeng yoac dedzege amma imoc modackefude nga ngicngac yeneng imoc negensima fora fingerudeac tomai kecanda, ye kiwango yeninoc yenenude.

¹⁹ Yeng yenenggareng ayemmemma homecfunac mesiyunuude. Ye bodi nasou yakaac garengyuuue kecgecde.

²⁰ KEBU ye memefic nga kasonina nga wiad fingerudeac ubaonganinango yeac tomai kecde. ²¹ Neni yeac kpara kpetiac negenserima kecnideac hereninango yearu sogaima kecde.

²² O KEBU, geng yoac dedzege amma imoc modackecnecac hoannunubesena. Neni ge negensingguma tomai kecni fora fingecbeso.

34

Ebicfunac mesiec

Dawidingo Abimerecac kicfu fingecma ikoc amma uba sufu sufungic isoc anu Abimerecngo ye kporaru mama worama yegec yofi heiec.

¹ Ni nasosoc KEBU keneheba,* yeac dedengerecngo neac enacbibicfu nasosoc fekefude. ² Ubaonganango KEBUAC negenu wiac engena anu ye dengereba. Ngicngac makpekpea yeneng imoc negemma sogaibisia. ³ O, ngeni nigoc KEBU kpac kuneng mima nenahafoc yeac kpac kuneng heiwayong memini.

⁴ Ni KEBUNGO meficnuudeac ye hofocba yeng kenegecna meickema ebicfunac mesinuec. ⁵ Ngicngac neni kicnina yearu fini sogac sogaiac kperagingo kicmesuninamekperagiu kperagigoc annide nga kicmesunina gameagoc amma sacsac naric mi kpeude. ⁶ Ni ngic makpekpeango kiaca KEBUNGO neac kpakpac negemma ebicfunac mesinudarec.

⁷ Ngicngac neneng Anutuac eweheiheigoc kecni KEBUAC angerongo ebicfunac mesinuuudeac nenigoc kecma oronnunuude.

⁸ KEBU gombunga, ngeni imocnoc nehemma kicnginango hembisia. Ngic mong ye yeac hoannu kemma sufuma kecande, ye sogac sogaigoc kefude. ⁹ KEBU eweheihei ammiandae, yени wiac monggac naric mi obohogecde. Imocac ngicngacfora kpetiac kecdae, ngeni ye eweheimima kecbisia. ¹⁰ Raiong yang gboria yeni yaka hofocma herenginaac homegecde, fora. Anu ngicngac KEBU hofocandae, yeni wiac gombunga monggac naric mi obohogecde.

¹¹ O nambarac, ngeni yei hama yoacna negembisia. Ni KEBUAC eweheiheigoc kekec kpoungemmebade. ¹² Ge kecnadeac anggendeu nga nasoga mehereema kekec gombunga kecnadeac anggendeu ¹³ ge nedzaranggango yoac mangana mi debesena amma ge enacbibicgango ikocyao mong mi debesena. ¹⁴ Ge yarefaka wama gombunga angkebesena amma ruaekekec meficgenadeac anggenu imoc meficgenadeac uatoa mebesena.

¹⁵ KEBUNGO kiwa ngicngac dindingac yenearu fima kedzac kpema kiacngina negenude. ¹⁶ Ye yarengic yenemma meicyunuu bangecfu ngicngac ninigec meficgeyem-meu yeneng monggoc mi negensiyunugecde. ¹⁷ Ngicngac dindingac yeni KEBUNGO meficyunuudeac kiacgec yeng kiacngina negemma ebicfunac mesiyunudarude.

¹⁸ Ngicngac ubamanganggac wosongina toho tohoya kecgec KEBUNGO yeneac wegenac kefude nga ngicngac asuu kpungge kpunggea kecdae, yeni ebicfunac mesiyunuude.

¹⁹ Ngic dindingacngo kpenzeng kpekecde, imoc wiac homac yombong, nga KEBUNGO sifu ye ebicfunac mesidarude. ²⁰ Ye sira gombunga garenggeu sira monggo naric mi usuude.

²¹ Ngic Anutu ngadehema mangana meudeac ammiande, ye yarefakaac wiac manganango kpebucgeude. Nga ngicngac ngic dindingac ngaba ayemmeande, yeni yoacfukopocsicnginagoc deyemmegec makpegecde.

²² KEBUNGO kingang ngicfora kekecngina bummema ebicfunac mesiyunuude nga mong ye yeac hoannu hama sufuude, ye yoacf Naric mi makpeude.

35

Nukporac anenggec garennuna

Dawidingo yegec yofi heiec.

¹ O KEBU, ngic yoackpekpe anendae, yeni yoakpekpe ayemmebesena. Nga ngic nigoc eweandae, yenigoc ewema yunubesena. ² Kebu ge dzikacac kaso nga mariku mema yacma meficnuna. ³ Ge tebe nga dzikacac naka mema ni kisannuandae, yeni yununa. Ge ongana yofi edena, “Ni ebicfunac mesigubade.”

* 34:1: Anutungo meficnunuu nenang bangecngicngacne yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereeude. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

⁴ Ngic yeni kpebucnubeso anggec geng feracyunuma game kpekpeu faiyununa eweheiheia kpac ambisia nga kpetotienubeso anggec geng kpae heiyemmena yeni dzi-genema oboc kpoboc ambisia. ⁵ KEBU, firanggo padihakoya fifiranggema kisangande, ifi isoc fingecbeso. Geac angerongo ifi kisangyunuu kembisia. ⁶ Ge negemmana yeni singngina kundung kpema pososoc anu KEBUAC angerongo kisangyunubeso. ⁷ Yeni hania kpacfu eng memanganenubeso dema ufc mong mesufuma faigec nga kekecna eng megecdeac dema teng mong usugec. ⁸ Nga geng negemmana yeneng wiac mong mi negemmagec wiac manganango hama kpetotieyunubeso. Yeni ufc faigec, imohai imocngo yenang mendangyunubeso amma teng usugec, imohai yenaoc kemegec kpetotieyunuu kpac andacbisia.

⁹ Ifi anu onganango KEBUAC amma sogac sogai maficgeude amma yeng ebicfunac mesinudacac ubangerec negembade. ¹⁰ Sicna sasawango degecde, “O KEBU, ge isoc mong mi kecde. Ngic kucnginagoc yeni kucmama feracyunugec geng yeneac mariunac mesiyununade. Ge ngic kucmama nga makpekpea godzungic maringinaunac mesiyunuannec.”

¹¹ Ngic yeni mangana arenggema yacma yoacfу nearu hama faka goa mi negenduae, imocac dekpesi anendae. ¹² Ni yeneac faka gombunga amba yeneng ine turunga mangana merennendae, imocac ongana ebiride.

¹³ Anu yeneng hafei amma kecgec, imohai ni sifu ubamanganggac wamba torungo memea heima yakasege kpendzenggoc kecma ngonducnema yeneac amma numuai.

¹⁴ Faka anai, imoc neanna sactosona monggac me dacnaac angang isoc ubamangang negengkefai. Amma nonggonango homeu ambai isoc songgonggac wamba heima ngonduc ngonduc kengha kefai.

¹⁵ Anu ni tifainggeai, imohai yeneng ine ubangerec negemma adzoroma namma nubeso anggec. Yeneng memanugecdeac kpedzucnegec nga godzungic goa mi negengyunuduae, yeneng memanganenugec, imoc wisic wisickea kpac. ¹⁶ Ngic Anutu ngadehema mangana angkecdae, yeneng yeni isoc monggoc nga monggoc enac kisaranggedae.

¹⁷ O KEBU, ge naso dafiguc wiac imoc kicga fima hennade? Yeni memanganenudaeac yeneac mariunac meicnuna. Ge kekecna raiong yangtoa yenearunac meicnuna. ¹⁸ Geng ifi anna ni kpebung habutoa yeneac kicfu geac ubangerec megembade amma ngicngac habutoagoc nanggec ni yenigoc namma eriendzong megembade.

¹⁹ Anu ngabafocna yeneng hania kpacfu ngaba anemma dedzomoc anembauac kpae heiyemmebesena. Yeni hania kpacfu neac modzongina tiu ebic imocac ubangerec negemma kicparac kpounembauac kpae heiyemmebesena. ²⁰ Yeni ruaeac yoac mong mi deandae nga ngic bangecfu yumia kecdae, yeneac ikocyac dema memanganeyunugecdeac negensidae. ²¹ Yeni enacngina anggema udumengtoa maficgema neac yofi deandae, “Yahec, imoc gennoc andang, neni gending.”

²² O KEBU, ge wiac sasawa bic hennec. Ge imocac yoacga mi waickena. O KEBU, ge neac hereau mi kecbesena. ²³ O Anutu, ge neac Kebu. Ge yacma kockpac amma yoacna nanggema meseribesena. ²⁴ O KEBU Anutuna, ngabafocna yeneng dedzomoc anembauac fakaga dindingac modacma nanggenuna yoacfу firang ambesare.

²⁵ Yeni ge negemmana yofi mi deemebisia, “Naric yombong, ifi yombonnoc fingergecdeac negening.” nga yeni monggoc mi debisia, “Yagucnoc ye kpetotieni kpac andarude.”

²⁶ Yeni neac ebicac amma ubangerec negendaе, imocac ge negemmana yeni oboc kpoboc anggec game kpekpeu faiyunubesonga. Ngicngac goa yeneng memanuma feracnuma ubangerec negendaе, yeni gamengo wamba isoc semeyunuу eweheiheia kpac kecbisia.

²⁷ Nga ngicngac yeni neac yoacac fora dindingac fingerudeac ayemmeande, yeni ge negemmana ubangerec negemma sogaima dendzerenggema arohobisia. Yeni nasosoc yofi dekecbisia, “KEBU ye engena yombong, ye kingang ngihango gombunga kefudeac songo negenude.” ²⁸ Ifi anu neac nedzarangngo fakaga dindingac dekperagima asoacnac kemma marai dedengerecga deude.

36

Manganaac faitobang

Yegecgareng yearu. KEBUAC kingangngic Dawidingo yegec yofi heiec.

¹ Ngic mong ye Anutu ngadehema mangana meudeac ammiu singyoackpekpengo yeac herea keme kemeau yombong kehema yoac edeude. Ye kiwango wiac hendacma Aunutuac kengec mong mi negenude. ² Ye yoackerc ngi ikoc angemema ubeau yofi negenude, “Ngicngac ogofocna memanganeyunudua, imoc ngic mongngo naric mi hennegeng anude nga fakana imoc modzongina mi tiude.” ³ Ngic imoc ye enacngog ofocnngina tobangyunuudeac yoac nga ikocyao arenggema deude. Ye bicngoc negentegecma wiac gombunga angkefec, imoc bic wama eng kefude. ⁴ Nga ye fefeaufema ogofora tobangyunuudeac mangana arenggema sing manganasac modackefudeac negenude. Ye faka angammeme mangana mong mi ngadehema waude.

Anutu ye memeficnina

⁵ O KEBU, geng yoac dedzege amma imoc modackecnec, fakaga imocnggo emma kurumenga kurumenga kpreseryunuude. Nga yoac modac modac fakagango wi emma hoeng kpreseryunuude. ⁶ Tikitoa nangkendae, ifi isoc geac dindingac kekecga ande. Ge yoacf sing dindingac modacma yoacngina desiyemmeannec, imocnggo kondung keme kemeia isoc ande. O KEBU, ge ngicngac nga yang hania hania momoc onggongyununade. ⁷ O Anutu, geng yoac dedzege amma imoc modackecnec, fakaga imoc wiac engena yombong. Neni, ngicngac yeneac nambarafocnnginango, geac hoannu hadacma kpe-gangga marabeau sufuma kecnide. ⁸ Geac amau yaka gombunga gombunga homac feu ubangerecga doku isoc hanemmeu nekecdimbe.

⁹ Kekecac haniaac dokudzohong, imoc gearu fekefude nga nenii geac kperagi kperagi hengkecdimbe.

¹⁰ O Kebu, geng yoac dedzege amma imoc modackecnec fakaga imocac ngicngac negenggukecdimbe, nenearu fekecbeso. Ngicngac herenginau ikoc nga hamangec mong mi fede, geng yeni ebicfunac mesiyununa. ¹¹ Ubakpekpe ngic ye haniango ni tifacnubaac kpae heimibesena. Amma ngic Anutu ngadehema mangana megecdeac ayemmeande, ge yeneac kpae heina yeneng ni mi kporacnubisia. ¹² Yarengic yeni bangecfu mayunuufedae, yeni mayunuu monggoc mi yacgecde.

37

Bangec medacgecde

Dawidingo yegec yofi heiec.

¹ Ngic Anutu ngadehema mangana megecdeac ayemmeande, ge yeneac modzoga mi tibeso. Nga faka mangana angandae, ge yeneac keracmangang mi ambesena. ² Yeni naso wegenacnecsac kecma kpindzingo dzanggeande, ifi isoc dzanggegecde. Wiac mong maria tengging tenggingngoo homeande, yeni ifi isoc homegecde.

³ Ge KEBU negenserima kecma faka gombunga angkecbesena. Ge ifi amma bangecfu naso herea kecma bangec imocac hoannu sufuma ruaegec kecnade. ⁴ Ge KEBUAC songo negembesena. Ge ifi anna yeng heregaac songo modacma wiac genude. ⁵ Ge kekecgaac sing KEBUAC mariu faima ye negenserima kecna yeng uaya mekefude. ⁶ Nga yeng nanggeguu ge firang anna imocnggo wenac kperagia isoc mekperagiyunuude. Amma nanggeguu dindingac annade, fakaga imoc wenac nasou wenac kperagiande, ifi isoc kperagiude.

⁷ Ge KEBUAC kicfu waickema tomai kecma kucga mi mabeso. Ngic mongngo yarefaka arenggema iuai sasawa meficgema naric kefude, imoc fingeru ge yeac modzoga mi tibeso. ⁸ Ge ngaba mi ambesena nga herebufaka imoc ngadehema monggoc mi negembesena. Modzotitingo mangana wangecguudeac ngicngac ubango mi ukuyunubesena.

⁹ Ngic Anutu ngadehema mangana megecdeac ayemmeande, ye meicyunuu kpac anggecde. Nga ngicngac KEBUAC tomai kecndae, yeni maridzominggac arennu

bangec mema mingina anggecde. ¹⁰ Ngic Anutu ngadehema mangana megecdeac ayemmeande, yeni naso mi hereemanu monggoc mi kecgecde. Ge tatahau kemma ye hofocyombonggema naric mi meficutende.

¹¹ Anu ngicngac yumia yeneac maridzoming arenna bangec mingina anggecde. Yeni finac hania hania efea kpac mekecma ubangerecgo kecgecde.

¹² Ngic Anutu ngadehema mangana megecdeac ayemmeande, yeni ngic dindingac yunugecdeac areng faima enac kisaranggedae. ¹³ Nga KEBUNGO ine yenemma dzomoreude, nocac nasongina wegena haude, imoc bic negende.

¹⁴ Ngic Anutu ngadehema mangana megecdeac ayemmeande, yeni soe taima tebengina kpedzigecde. Yeni ngicngac makpekpea amma ngicngac iwaic obohoma kecdae, yenemma ngicngac ikoc nga hamangecngina kpac kecanda, yeni yenemma yunugecdeac ayemmeude. Yeni ngicngac herengina dindingac kpebucyunguecdeac ayemmeande.

¹⁵ Soenginango yenang herengina nendanggeu tebengina usuude. ¹⁶ Nga ngic didingacngo wiac kapiianec mekecde, imoc wiac gombunga. Anu ngic Anutu ngadehema mangana megecdeac ayemmeande, yeni wiac efea kpac feyemmeude, imocngo ngic dindingac yeac finabasic, ifi isoc mi ngereeude.

¹⁷ Ngic Anutu ngadehema mangana megecdeac ayemmeande, yeni ebicfu enggec maringina kpetackeude. Anu KEBUNGO ngicngac dindingac nanggeyuuu seria nanggecde.

¹⁸ KEBUNGO ngic kopocsic mong mi meficutende, yeneac nasongina negendacde. Nga yeni maridzoming negemma wiac megecde, imoc wisic wisickea kpac anu ¹⁹ naso ebihagoc hau yeni seria nanggecde. Monggo game kpekpeu naric mi faiyunuuude nga bodinaso hau wiac monggac naric mi obohogecde.

²⁰ Ngic Anutu ngadehema mangana megecdeac ayemmeande, yeneng ine kpac anggecde. Dzaring dzuria moronggema kpac anganda, ifi isoc KEBUAC ngabafora kpac anggecde. Yeni hosuc engande, ifi isoc emma kpac anggecde.

²¹ Ngic Anutu ngadehema mangana meudeac ammiude, ye wiac turung amma mema turunga imoc mi kpouande. Ngic dindinga, yeng ubangerec negemma wiac naric eng yemmeude. ²² Ngicngac KEBUAC kenecgoc kecdae, yeneng maridzominggac arenna bangec mema mingina anggecde. Nga ngicngac Kebuac sowec bageau kecgec Kebungo meicyunuu kpac anggecde.

²³ KEBUNGO ngic monggac singgac negenu ngereeudeu ye yeac kenghaya meseriu sing titia seria anude. ²⁴ Ye todinggebac, fora. Nga Kebungo mariau medeac naric mi makpeude.

²⁵ Ni medacnaungoc kecerekecma yaguc ngickpengeng anduae, imohai hemba Anutungo ngic dindingac naric mi wau eng kecande, kpac. Nga yeac nambaracfora yenyakaac mong mi derecgegecde. ²⁶ Yeng nasosoc iwaic eng yemmekecde nga nambaracfora yenyogiogefic amma ngicngac ogofocngina kenec meficutende.

²⁷ Ge faka angammeme mangana ngadehema wama faka gombunga amma bangecfu wisic wisickea kpac kecnade.

²⁸ KEBUNGO ngicngac sing dindingac modacgecdeac ammiu yeac kpetiac areng, yeni naric mi ngadeyunuma wayunuude. Ye onggongyunuude, imoc wisic wisickea kpac. Ngic Anutu ngadehema mangana megecdeac ayemmeande, yeng yeac nambaracfora ine meicyunuu kpac anggecde. ²⁹ Ngicngac dindingac yeneng maridzominggac arenna bangec mema mingina amma naso wisic wisickea kpac imohai kecgecde.

³⁰ Ngic dindingac ye enarango yoac negen negentegecgo deude nga nedzarangango sing dindingac modacnideac yoac deude. ³¹ Ye KEBUAC dedeseriyoac ubahereau feu hania naric mi tiposockeude. ³² Ngic Anutu ngadehema mangana megecdeac ayemmeande, yeni ngic dindingac yeneac kicfifi kecma kpebucyungubeso anggec ³³ KEBUNGO ngic dindingac naric mi wayunuude nga ngaba yeneac kucnginango naric mi feracyunuma memayunuude. Ngaba yeneng yeneac yoac mekemma yoacfu faiyunugec KEBUNGO kpae heiyemmeu kopocsicac areng naric mi deyemmegecde.

³⁴ Ge KEBUAC tomai kecma yeac sing modacbesena. Ge ifi anna yeng miacguma maridzominggac arennu bangec genu mingina annade. Nga yeni geac kicfu ngic Anutu ngadehema mangana megecdeac ayemmeande, meicyunugec kpac anggecde. ³⁵ Ni ngic mong henai, ye Anutu ngadehema mangana meudeac ammiu ngicngac ogofora ebicfu faiyunukefec. Nga yeneng ubaebigoc kecmagec yeng Rebanong bangecac yomondzoc ic herea isoc feracyunuma nangkecfec. ³⁶ Nga ni monggoc ihai kemma nanangasac hemba yengena mi nanu hemba dema hofocba imohai mi nanec.

³⁷ Ngic kopocsic mong mi maficgeande, ngeni ye hentegecbisia. Ngic mong ye ikoc nga hamangeha kpac kecande, ye hembisia. Ngic ruaegoc kecande, yeng arengfora yenigoc naso herea kefude. ³⁸ Nga singyoackpekpe ine kpetotieyunugec kpac andagecde nga ngic Anutu ngadehema mangana megecdeac ayemmeande, yeni wiacngina ngereema feec, imoc meickegec kpac anude. ³⁹ KEBUNGO ngic dindingac ebicfunac mesiyunuma ebicasou yeneac sufu sufumangina anu ihai sufuma kecgecde. ⁴⁰ KEBUNGO maficyunuma ebicfunac mesiyunuude. Yeni yeac hoannu hama sufuma kecdaec amma yeng ngic Anutu ngadehema mangana megecdeac ayemmeande, yeneac mariunac mesiyunuude.

38

Kpendzenggoc nunumu

Dawidingo sese fai faiac nunumuyegec yofi heiec.

¹ O KEBU, ge ngaba amma yoac ngabasiric mi antenna nga herega buu kopocsicac amma numeting mi antenna. ² Ge tebegango wedecnunc nga marigango witinai faima ferandzinunc. ³ Ge neac modzoga tikecdeac sebina sasawa manganeu hafei ande nga kopocsicnaac amma sicna yeni sasawango hafeinginagoc andae.

⁴ Ni kopocsic maficgekecba imocngo feracnuma semenukecde. Nga finactoa ebirango ngicngac yiniande isoc niu imoc naric mi tofobobade. ⁵ Ni kopocsicnagoc kecma kapafaka angkecdua ac amma kubecna sasawa hoaema homuna fiu ⁶ patickema ngonducnema asoacnac kemma marai ubahodungtoa negengkecdua.

⁷ Sebina gerea nohou hafeingo sokodaru gombunga mong mi ande. ⁸ Amma ni kucna kpac andaru manganema perekema panggeduae. Amma herenau negengyohocgoc kpeborongtoa amma asoringa anenu kpacma arohoduae.

⁹ Kebu, ni wiac sasawaac anende, imoc negendacnec. Nga ni asoringa anenu imocngo gearu mi sufuude.

¹⁰ Ni wosona tantang anu kucna kpac andaru kicnaac kperagi bic pisickedac.

¹¹ Ni kpendzennagoc, imocac tosofocna nga amaaengfocna wanuma wegenac naric mi hagecde nga nonggo mang dacmunafocna yeni hereau nandae. ¹² Ngic kpebucnubesayemmede, yeneng botac faima kpetotienugecdeac yoac dedae. Yeni asoacnac kemma marai ikocfu faitobang anenggecdeac arenga faikecdae. ¹³ Ngic kedzacfongngo yoac mi negengande, ni ifi isoc anduae. Amma enacmedzicngyoara kpac kecde, ni ifi isoc enac anggema yoac mong mi deduae.

¹⁴ Oc, ni neannaoc ngic mong yoac mi negengande, ifi isoc amma kecduae. Ngic mong ye enacngo demetingyoac naric mi merengyemmeande, ni ifi isoc anduae.

¹⁵ O KEBU, ni geac tomai kecduae. O KEBU Anutuna, gennoc yoacnaac turunga merennennade. ¹⁶ Ni numuma yofi deduae, “Ngaba yeneng feracnuma ubangerec negembauac nga tiposockeba yeneng negenggec wiac engena anu yoac homac osobauac kpae heiyembebesena.”

¹⁷ Ni manubeso anu kpendzenggoc kecbare imocngo mong mi wanuude. ¹⁸ Ni ngic memanganefaka angkefai, imoc deficgema kopocsicnaac amma ubahodung negemma kecduae.

¹⁹ Ngabafocna yeni ine ngaba eng anendae amma yeni kucngina monggoc. Nga ngic endzirango hania kpacfu ubango ukunudae. ²⁰ Ni faka gombunga amba yeneng ine imo-
cac turunga yarefakango merennengecde. Ni faka gombunga modacma angkecduaeca
yeni ngabafocna andae.

²¹ O KEBU, ge mi ngadenuma wanuna. O Anutuna ge neac hereau mi kecna. ²² O Kebu,
memeficna, ge bic hama meficnuna.

39

Kekecnina kpac anude

Yegecgareng yearu. Yehudutung siriha modacma heibesonga. Dawidingo yegec yofi
heiec.

¹ Ni negen nengengua mema deai, “Nedzarannango kopocsic meficgebaiac nedzaranna nga fakana garenggebade. Ngic Anutu wama magana megecdeac ayemmeande, yeneng nigoc wegenac kecmagec enacbobicna kpaе heimiba yoac mong mi debeso.”

² Ni udumenga kpac waickema kecma wiа mong mi deba imoc memefihagoc mi anec, kpac. Kpendzenna imoc monggoc yombong yadie. ³ Herena gerea anu negeng ua meba herena gerek dzeu nedzarannango yoac deai.

⁴ Yoac yofi deai, “O KEBU, ni nasona wisickebeso ande, negen negeng imoc dekper-
aginembesena. Ge uameme nasona kpeteagoc bic nennec kecduae, imoc edzacnuna negentegecbesare. ⁵ Negenna, ge uameme nasona faina neneng imoc maringo naric edzacyununi, imoc wegenac yombong ande. Kekecna imoc geac kicfu wiа wegenacnec ande. Ngic tembusc tembusc neneac kekec imoc wiа engena kpac, geng asu naso mocgu heianneс, ifi isoc ande.” *Selac*

⁶ “Nga wenac nasou ic ongea fingecande, ngicngi ifi isoc kengha anu wisickeude. Ye uatoa homac mekecde nga imoc eng fingeru foraya mong mi fingecde. Ngicngi wiа mekpedzuc angkecde nga wiа imoc merang ngade meude, imoc ine mi negenude.”

⁷ “Kebu, ifi anu ni wiа mong fingecnenudeac tomai mi kecbade. Geng meficnunadeac tomai kecba negen negenna gearu fede. ⁸ Ni singyoac kpema mangana angkefai. Nga ngic negen negengngina kpac yeni desofoc anembauac kpaе heiyemmebesena.

⁹ Nga gennoc faka yomoc meficgena fingecnendacac amma ni waicke kecma enacna mong mi anggebade, kpac. ¹⁰ Geng ni kpendzeng nennec, imoc nearunac meickena. Ge marigaac kucngi nuu kpac ambeso anduae.

¹¹ Geng bangecngic kopocsicninaac amma yoac ngabasiric dema turunga merengnem-
mema kpemeting anemmeanne.

Gisicngi wamba neande, ge ifi isoc songowiacnina nedacna kpac andarude. Foracngoc,
ngicngac sasawa neni wiа engena kpac, geng asu naso mocgu heianneс, ifi isoc andimbe.” *Selac*

¹² “O KEBU, ge nunumuna negenna memeficac kiaca ge kedzac faima negenna. Ni kickumana madeac ihoc bahoc mi anna. Ni kuricngic amma hama naso wegenacnecsac kecbade. Ni esangabofocna isoc kuricngicsac anduae.”

¹³ “Ge wanuma kicga nearu mi fina. Geng ifi anna ni sogac sogai monggoc
meficgemaguc yomoc wama kendacma kpac ambade.”

40

Ni Kebu kpacba

Yegecgareng yearu. Dawidingo yegec yofi heiec.

¹ Ni modzotitia kpac kecma KEBUAC tomai kecbare yeng kiwa nearu faima kpakpacna negenec.

² Ye kpetotiekekecac tennunac kpeditzina goteng yohoctaunac tainuma hoc peperandzi seria witiau fainuu namba hanina meseriу tiseriduae. ³ Ye yegec gboria enacnau faiu heianduae, imoc Anutuninaac dedengerec yegec. Ngicngac homacngi imoc hemma KEBU eweheihei ammima ye negenserima kecgecde.

⁴ Ngic mong ye KEBU negensiende, ye kenehagoc. Yeng ngic yenanggac negenggec wiac engena angkecde, yeneac hoannu mi kemma yenigoc naric mi kefude. Ye sing mi segeude, nga ye ngic nemu ikoha modacandae, yenearu naric mi kenunde.

⁵ O KEBU Anutuna, ge isoc mong mi kecde. Ge neneac negemma kufaka wiac engena homac mean nec, imoc monggoc nga monggoc mekec nec. Ni imoc dekperagima ngicngac edeyunubade dema kpetengina homac amma imoc memeac siriha kpac.

⁶ Ge sesegerec nga kopocsicac sese hania haniaac mi anggengande. Ge sese dema yang nga burumaka hafoa oho oho me kopocsic meic meickeac sese, imocac mi kpesian nec. Geng kedzacna mesarinec, imocac ni geac kingang ngic amma kecbade. ⁷ Ifiac amma yoac yofi deai, “Kibi kpou kpouya manau neac siduc bic ohogec fede nga ni bic hadua. ⁸ O Anutuna, ni geac songo sogac sogaigoc modacbade nga geac dedeseryoac imoc herenau fede.”

⁹ O KEBU, ni siduc gombung bic edeyunuai. Geng ebicfunac mesinunukec nec, ni habutoa yeneac kicfu namma siduc imoc dekperagiyemmemma enacbibicna mong mi kidzickeai, ge imoc negennec. ¹⁰ Amma geac faka dindingac imoc herenau mi mesufuai. Ge yoac modac modac Kebu amma ge ngicngac ebicfunac mesinunukec nec, ni habutoa yeneac kicfu namma imoc dekperagiyemmeai. Geng yoac dedzege amma imoc modackec nec amma ge yoac modac modac Kebu, imoc mi mesufuma habu sasawa edeyunudacba negendacgec.

¹¹ O KEBU, ge ubamangangga mi dzegenenna. Geng yoac dedzege amma imoc modackec nec amma ge yoac modac modac Kebu. Geac fakaga imocngo hoannuma nasosoc onggonnubeso.

¹² Yarefakanaac kpetea osobadeacsoc mi amba yeni oronnukecdae. Ni ngicngac ogofocna memanganeyunu kefai, faka imocngo feracnumanu wiac mong naric mi hembade. Nga imoc homac yombong amma orucna dzoea ferahau herena kuha kpac ande.

¹³ O KEBU, ge neac negenna ngeree onggonnuna. O KEBU, ge bicbic hama meficnuna.

¹⁴ Ngic yeni kekecna hamangec mebeso andae, imocac ge yenemma game kpekpeu faiyununa oboc kpoboc ambisia. Ngic yeni ni memanganenubeso ayemmeande, ge negemmana ngic imoc dzigenegedeac ayemmena yeni worama ewehiheingina kpac ambisia.

¹⁵ Ngic yeneng neac deendema yoac yofi deandae, “Yahec, yahec!” Yeni yenaoc gameyunuudeac amma manganema nambisia.

¹⁶ Ngicngac ge hofogukecdae, yenennoc sogaima geac ubangerec negembisia. Ngicngac geac memengerec song negenda, yeni yofi dekecbisia, “KEBU dengereni.”

¹⁷ Neng ine makpekpea amma iwaia obohoma kecma naric mi meficemeba Kebungo sifu ebicna henu wiac monggac mi obohobade. O Anutuna, ge memeficna nga ebicfunac yungec yungecngicna, ge naso mi ukuma nearu bic hana.

41

Hafeigoc yeac nunumu

Yegecgareng yearu. Dawidingo yegec yofi heiec.

¹ Ngic mong ye ngicngac makpekpea yenenggareng ayemmeande, ye kenehagoc. Ebicasou KEBUNGO ye ebicfunac mesima ² onggonggema kekeha garenggeu ye bangehau sogac sogaigoc kefude. Ngabafora yeneng megecdeac ayemmeu KEBUNGO yeneac mariu naric mi faiude. ³ Ye hafei ammiu femanu KEBUNGO meserima hafeia meickema monggoc mengereeude.

⁴ Neng yoac yofi deai, “O KEBU, ni gearu kopocsic meficgeai. Ge imocac neac ubaga manganeu mengerenuna.” ⁵ Ngabafora yeneng neac yoac mangana dema yofi deandae, “Ye homeu kpara kpac ambeso.”

⁶ Ngic monggo yugucnubeso hama ni tobannuudeac negeng ubahereau arenggeude. Ye yoac fora mong mi dema monggoc mama kemma imoc deyadiude. ⁷ Ngic neac modzongina tiande, yeni sasawango neac yoac sangic sangic denengeng amma

wiac mangana yombong fingechnudeac negemma⁸ yofi deandae, “Ye hafei mangana yombong ammiu fefeunac monggoc naric mi yarude.”

⁹ Nga tosona nigoc wegenac kecande, ye negenserima kefai. Ye warac yaka nigoc nekefec nga yeng ifingoc gofoc gofohanggo tifacnuma docfu fainuec.

¹⁰ O KEBU, ge ubaga sifu neac manganeu miacnuna ngereema namma turunga merengyemmebade.

¹¹ Ngabafocna yeni firang amma mi memanugec, imocac yofi negenduae, ge neac negenna ngereede. ¹² Ni dindingac kecma kopocsic mong mi meficgeaiac geng nanggenuma geac hoannu fainuna ni imohai nasosoc kecbade.

¹³ KEBU Israeac Anutu, ye nasoya nasoya kenehema keneengkebesonga. Imoc fora nga fora yombong.

MITIYEGEC KIBI 2

42

Mitiyegec 42-72

Ubaonganango Anutuac ammide

Yegecgareng yearu. Yegec yomoc masiki uba modacma heibesonga. Kora medacfora yeneng yegec yofi heigec.

¹ Kate burumakabisicngo dokuac ammiu doku hofocande, ubaonganango ifi isoc Anutu ge hofocgude.

² Ni dokuac homeanduae, ifi isocngoc ubaonganango Anutu kekehagoc yeac ammide. Ni kemma Anutuac kicfu namma ye hembade, naso imocac homac yombong tomai kecduae.

³ Ni hadzing toforec kickumanango yakana angkefu ngicngac yeni nasosoc kpelinendae, “Geac Anutu mong mi hendirbe, kpac yombong.”

⁴ Ni onganaac negeng hafoangoc widicma edzacguma wiac yomoc negemba fede, ni warac ngicngac arengginagoc kenggec waraiyemmeba Anutuac womonnu kening. Neni ngicngac habutoango hombang nasoninau sogac sogaiac arohoma ubangerecac yegec heikefing.

⁵ O ubaongana, ge kucmama mi kecbesena amma ge herena manau dewaidzoc mi ambesena. Ni monggoc Anutu eriendzong memibade. Ge imocac ye negensima tomai kecna fora fingeckeso. Ye memeficna nga Anutuna.

⁶ Ni Yodang bangecfu nga Hermong amma Midza tikiu kecduae. Amma ubaherenaac kuha madeac Anutuna ni geac negemba fede.

⁷ Ni ubana ebirima yofi isoc ande, geac dokudundung yeni kpeborongtoa kpemagec dzohong mongngo dzohong ogea kparu geac kondungsiri yeni kucgoc hama semenudau.

⁸ KEBUNGO yoac dedzege amma modacke, ye imoc hadzinnu sing edzahau nigoc kefude. Nga tofocnac yeac yegec nigoc feu heikecfa Anutu kekecna sasawangoc garennukecde, numumibade. ⁹ Anutu ye neac hoc peperandzi seria anu yeac deba, “Ge neac nigecgudac, ifi isoc ande. Ngabafocna yeneng ebicfu fainugec ubaebicgoc kecduae, imoc nocac fingechnende, imoc mi negentegeduae.”

¹⁰ Ngabafocna yeni deendema anemma deandae, “Ge Anutuga mong mi hendirbe, kpac yombong.” ifi degec kubec manganaac kpandzeng kpeandimbe, kpandzeng ifi isoc sebinau kpeduae.

¹¹ O ubaongana, ge kucmama mi ambesena, herena ge dewaidzoc mi ambesena. Ni monggoc Anutu eriendzong memibade, imocac ge ye negensima tomai kecna fora fingeckeso.

Ye memeficna nga Anutuna.

43

Ge nocac ngadenuma wanunec

Yegec 42ac tosea

¹ O Anutu, ngic Anutu wama kecandae, yeneng memanubauac geng nanggenuna firang ambesare. Ge ngic ikocnginagoc nga ngic faka dindingac mi modacandae, yeneac mariunac mesinuna. ² Anutu, ni geac hoannu hama sufuma kecba ge nocac ngadenuma wanunec. Ngabafocna yeni ebicfu fainugec ubaebicgoc kecduae, imoc fingecnendeac titiha mi negentegeduae. ³ O Kebu, ge kperagiga nga yoacga fora faina maec yereng sinnu hesicnuma kenec geng kpetiac tikigau kecnec, imohai habesare.

⁴ Ifi anu ni Anutuac aratau kembade. O, sogac sogaitoac Anutuna, ni gearu kemma gita kpema dengeregubade. O Anutu, ge Anutuna.

⁵ O ubaongana, ge kucmama mi kecbesena amma ge herena manau dewaidzoc mi ambesena. Ni monggoc Anutu eriendzong memibade. Ge imocac ye negensima tomai kecna fora fingecbeso.

Ye memeficna nga Anutuna.

44

Ebicnasoac nunumu

Yegecgareng yearu. Yegec yomoc masiki uba modacma heibesonga. Kora medafora yeneng yegec yofi heigec.

¹ O Anutu, ge bicngoc esangabofocnina yeneac nasou kucfaka meannec, imoc edenunugec kedzacninanego negening. ² Ge marigango bangec monnunac ngicngac kporacyunuma neneac bangecfocnina semeng uau isoc homecyununa ihai kecgec. Ge bangecareng tosea ebicfu faiyununec, fora. Nga ge bangecfocnina witicfunac yungecyununa witicngina kpac kecgec.

³ Yeni yenang dzikacac beangngo firang amma bangec mi megec, kpac. Amma yenang maringinaac kucngo firang mi anggec, kpac. Geng yeneac songo negennec amma marifoigango kucfaka menec, yeni imocac firang amma bangec megec. Geng marigaac kuc nga kicmesugaac kperagingo maficyununec.

⁴ O Anutu, ge ngictauna nga Anutuna. Geng yoac dena, Yakoboac arengngo, firang annide. ⁵ Ngabafocnina yeneng wegenac hagec neni geac kucfu igocyununi worama kenggec geac kpacf u ngabafocnina tidzicyunuma memayununide. ⁶ Ni tebena mong mi negenserima kecanduae nga dzikacac beannango ebicfunac naric mi mesinuude. ⁷ Geng warac ngabafocnina yenearunac mesinununec. Ngicngac yeneng ubango ukununugec geng faka ayemmena oboc kpoboc anggec.

⁸ Neni Anutuac negenni engena angkecde. Geac kpac kuneng heiwayong memima nasoya nasoya ifi angkecnde. Selac

⁹ Ge yaguc ine ngadenunuma neneac wasai areng yenigoc mi hama kecnec game kpekpeu fainununec.

¹⁰ Ge ngabafocnina kpae mi heiymmena neni yenearunac worama hani yeneng finacnina medacgec. ¹¹ Rama yeni memeficngina kpac kecmagec ngic yeni meyunuma kpehou angkecdae, neni ifi isoc aning nga geng ngic imoc kpae mong mi heiymmenec, kpac. Ge meicnununa singsararang kpema bangec monnunac ngicngac botucnginau fainununec.

¹² Ge ngicngacfocga fainunuma bung efeanecsac dena menunugec. Ge neneac bung kuneng mong mi denec. Imoc hemba mi ngereede.

¹³ Ge ngicngac wegenac kecdae sing maficgeyemmenec yeni deendema anemmeandae nga ngicngac oronnunuandae, yeni detenic anemmemma desofoc anemmegecde. ¹⁴ Nga ge bangec monnunac ngicngac sing maficgeyemmena yeneng neneac yoac dekecgec yeneac dzomoc tirea andimbe. Ngicngac areng hania hania yeni dedzomoc anemmemma orucngina kpatitickenemmegecde.

¹⁵ Ni asoacnac kemma marai eweheiheia kpac kecba gamengo kicmesuna semeu kecduae. ¹⁶ Nocac yeni deendema anemmemma demanganenugec yoacngina negenganduae. Ngabafocna nga ngic yeni turung kpougecdeac ayemmeande.

¹⁷ Imoc sasawa fingecnemmeec, fora. Nga neneng sifu geac mong mi nigecnunuec, kpac. Ge nenigoc dzadzahac menec, imoc wama ikoc mong mi anggening. ¹⁸ Neni

hereninango geac hereau mong mi kefing nga geac sing modackecma faka imoc mi wanide.¹⁹ Geng ine eng kate yang yeneac kekecfu fainununa kecmina kpedzamenunuma kundungtoango semenununec.

²⁰ Neni Anutuninaac kpac kuneng nigecnunu marinina miacma nemu furia afehebinnu

²¹ Anutungo imoc meficgema negendacbac. Ye hereninau wiac sufu sufu fede, imoc negendacde.²² Geac areng andimbeac amma yeni asoacnac kemma marai homecfu fainunukecdae. Yeneng nenemma yofi negendae, neni rama kpebucyunuandae isoc andimbe.

²³ O Kebu, ge gauunac yacma negengborina. Ge naso wisic wisickea kpac mi wanunuma kecbesena.²⁴ Ge kicmesuga mesufuma neneac kpendzeng nigecguec, imoc naric mi ande. Ngic yeneng ebicfu fainunugec neni ubaebicgoc kecdimbe. O, Kebu, imoc mi nigecgubeso.²⁵ Ubaonganina bangecfu sendunnu ngonduscneu sebininango bangecfu mendanggema fede.²⁶ O Kebu, ge gborima yacma ebicfunac yungecnununa. Ge yoac dedzege amma imoc modacanecac amma meficnunuma bummenunuma ebicfunac yungecnununa.

45

Ngictau nga enembingeja

Yegecgareng yearu. Yegec yomoc masiki yegec kpara Lili dzaring, imocac uba modacma heibesonga. Kora medacfora memeturangyegec yofi heigec.

¹ Yoac gombunga gombungango herena wakeu ni ngictauac yegec yofi heibade. Nedzarannango kibi oho ohongic gombunga yeac pen isoc ande.

² Ngictau, ge siricga gombunga yombong, ge isoc bangecngic mong ifia mi kecde. Nga geac enacbibicgaunac yoac songea ereude. Anutungo kenecguma monggoc wisic wisickeac kpac kenecgubeso.

³ O Firangngic kucgagoc, ge ngictauac kuc nga kibikperagigagoc kec nec. Ge dzikacac soega kebanggau dzegema dzikacac efaina.⁴ Ge ngictau kucgagoc kecma dzikacac becosicfu tacma yoac fora nga yumiakekec amma dindingac kekec meseriyununadeac kucgoc kemma firang ambesena. Ge marifoigango kucfaka wiac engena yombong kpougembeso.⁵ Ge tebemedaha enaragocngo ngictauac ngabaftora yeneac woubocfu wedecna kemebeso. Ngiha ngiha yeni geac bageu kemema kecbisia.

⁶ O Anutu, geac ngictau tatacga imoc wisic wisickeac kpac amma feengkecfu ge ngicngacfocga ngictauyasugango garengyununade amma yoacga imoc monde mondea kpac.⁷ Ge dindingac kekecac anggenu ngicngac Anutu ngadehema mangana megecdeac ayemmeande, yeneac faka imocac modzoga tiande. Imocac Anutu, geac Anutungonoc tosofocga yeneac botucfunac meisngguma feracyunuma sogac sogaiac kerec nadzic-genu sebigango ireckeude.

⁸ Ngicngac yeni wambagau mira nga aroe amma kassia heigec homuna gombunga gombunga fiande. Yeni erefang yanggac baihangi wiac gombunga gombunga mema ngictauamagau faigec sirinha gombunga anude. Yeni imohai gitakurere kpegec udumeng gombunga meficgegenggec ubangerec negenganne.

⁹ Ngictau yeneac naroangfocngina yeni ngac yenigoc amagau kecma geac kingang kpema oronggudae. Enembingecka ye Ofiri bangecfunac gol heima foigaugeng tacde.

¹⁰ O naroang, negenna, ge kedzac kpema yoacna negemma negensina. Ge arengfocga nga manggaac ama imoc nigecgubeso.¹¹ Ngictau ye geac siricga gombunga imoc hem-bokoma kecde. Ye geac kebu, imocac ge yeac kicfu ngonducnema eweheihei ammina.

¹² Ge yeneac negenna ngereudeac negemma ngicngac Tiro taonnunac yeneng geac ubangerecac wiacngina mehama genggecde. Yeni dzofinactoanginagoc amma ngicngac sasawa feracyunudae.¹³ Nga ngictauac naroang ye ngackereng yombong yengena manau tacde. Ye ngakpia imoc gol mucngo memea nga¹⁴ wamba kibiagoc kpebimigec, imoc yearu heigec kemeu ye hesickema ngictau yearu mehagec ngacnaroang tosofora

yeneng ye hesickegec yenahafoc gearu hagecde. ¹⁵ Yeni ubangerec nga sogac sogaigoc hesicyunuma kemma ngictauac ama manau endae.

¹⁶ O ngictau, ge medacfocga fingecma mangfocga yeneac tatac megec geng areng faina yeneng bangectoa bangec garenggegecde. ¹⁷ Fingecsahechina fekecdesoc, yeneac kicfu geac kpac kuneng miacba yeneng afegugecde. Ngicngac areng sasawa yeneng wisic wisickea kpac eriendzong megenggecde.

46

Amanina seria

Yegecgareng yearu. Yegec yomoc aramoc uba modacma heibesonga. Kora medafora yeni yegec yofi heigec.

¹ Anutu ye sufu sufuamanina nga kucnina. Ye ebicnasou nenigoc nasosoc kecma meficnunuude. ² Imocac kengec naric mi annide. Bangec kpemindzaheudeu me tiki kondung keme kemeau turic turic anggecdeu ³ nga doku tunggbuangtoango udumeng kunengngoc meficgema kporoc tima tiki yunuu dendeng kpegecde, fora. Nga neneng sifu kengec mi annide. *Selac*

⁴ Doku mong mahama Anutuac taonnu sogac sogai meficgede. Anutu Engenatoango kpetiac ama imohai kecde. ⁵ Anutungo taong imocac botuhau yombong kecdeac wiac mongngo meu imoc goroc goroha kpac kecma naric mi makpeude. Anutungo ama werec wereckenggac ye meficgeude. ⁶ Bangec monnunac ngicngac Anutu mi negemmidae, yeneng dzomugerec mekecdae nga bangecac eucerereng yeni goroc goroc amma mayunuude. Ye ubia miacma kparu bangectoa bangecngo sisingaima kpac andarude. ⁷ KEBU kurumenggac wasaiareng kunengnginango nenanggoc kecde. Yakoboac Anutu ye sufu sufuamanina. *Selac*

⁸ Ngeni hama KEBUAC ua hembisia. Ye bangecfu faka bibiagoc meec, ngeni imoc hembisia. ⁹ Yeng bangec tegia noboc noboc dzikac menomanema tebe pokong sasawa kpetackedacma dzikacac kasongina gerecfu faiu dzeude.

¹⁰ Anutungo yofi dede, “Ni Anutungina, ngeni waicke tacma imoc negembisia. Bangec monnunac ngicngac yeneng yaiyo kpenenggecde nga bangectoa bangec yeni afenugecde.” ¹¹ KEBU kurumenggac wasaiareng kunengnginango nenanggoc kecde, Yakoboac Anutu ye sufu sufuamanina. *Selac*

47

Ngictaungo tatahu matacde

Yegecgareng yearu. Kora medafora yeni mitiyegec yofi heigec.

¹ Ngiha ngiha sasawa, ngeni mari kpema Anutuac yegec sogac sogaigoc dendzerenggema heimibisia. ² KEBU Engenatoa ye bibiagoc, ye bangectoa bangec imoc ngictautoa. ³ Ye ngiha ngiha memayunuma nenang bageu faiyunuec. Ye bangec monnunac ngicngac hanininaac bageau faiyunuec.

⁴ Yeng Yakoboac songo negendeac amma bangec imoc meisnggeu Yakobongo imoc negenu wiac engena anec. Kebungo bangec imoc maridzominggac arennu nemmeec. *Selac*

⁵ Anutungo sogac sogaiac arogoc kurumennu enec. KEBUNGO trampet udumengtoagoc kurumennu enec. ⁶ Ngeni Anutuac oheha mema yegec heima eriendzong memima yegec heimibisia. Ngeni ngictaunina yaiyo kpemima yegec heimima dedengerec yegec heimibisia.

⁷ Anutu ye bangectoa bangec imoc ngictau. Ngeni yeac yegec heimima ye dengerebisia. ⁸ Anutu ye ngictau amma bangec monnunac ngicngac areng kucgoc garengyunuma kecde. Ye ngictau tataha kpetiacfu tacde.

⁹ Ngiha ngiha yeneac ngictauac medacfocngina yeni Abarahanggac Anutu yeac ngicngacfora. Nga yeni hama kpedzucnema tacgecde. Ngicngac bangectoa bangec imocac kaso amma kecandae, yeni Anutuac ngic. Imocac ye afehema afehekebesonga.

48

Anutuac taong

Kora medacfora yeni mitiyegec yofi heigec.

¹ KEBU ye engena, ye oyang boyang memibesonga. Yeac tiki kpetiacfu, Anutuninaac amatoau, ye dengerebesonga. ² Tiki imoc herea nga gombunga yombong amma banectoa bangec sogac sogai meficgeyemmeude. Imoc Siong tiki, imoc not bigeng yombong tacde amma imoc ngictau Engenatoa, yeac taong. ³ Anutungo ngictau amatoau tacma amea onggonggema gombunga henggareng ammiude, imoc hengkecdimbe. ⁴ Negenggec, ngictau yeneng kpedzucnema yenahafoc dzikac kpegecdeac hama ⁵ taongtoa imoc hemma kpidohoma kengec homac yombong yunuworagec. ⁶ Yeni hemma kengecyuu dzonongngina fedeec. Ngacngo ngadze kiu kpendzeng kpeande, yeni ifi isoc kpendzeng kpegec. ⁷ Geng wenac ere ereaunac firang dena imocngog hama Tarsisi taonggac wage kpedzameyunuande, ge ifi isoc memanganeyununa yeni kengectoa anggec.

⁸ Neni warac siduha negening, imocac fora hening. Nga kicninango KEBU kurumenggac wasaiareng kunengngina Anutuninaac taonnu hening. Anutungo amatoa imoc tatahau faiu nasoya nasoya seria feengkefude. *Selac*

⁹ O Anutu, geng yoac dedzege amma imoc modackecnec, imoc geac womonnu namma negensiandimbe. ¹⁰ O Anutu, geac kpac kuneng nga geac eriendzong imoc bangec tegia fekendaemoc kpesereyunuu negendacgecde. Ge marifoigango firang angkecnecac mariga imocngog wakede. ¹¹ Siong tiki ye ubangerec negembeso nga ge wiac foraya deannecac Yudaac amafora yeni sogaibisia.

¹² Ngeni Siong yerecgema yeac odaac ama herec herec osoma kpetengina mebisia.

¹³ Ngeni Siong tikiac oda dafia, imoc mengere hemma ngictauac amaseria hembisia. Hemma fingecsahehina fekefude, imocac siduc yofi meyemmebisia.

¹⁴ Anutu yomoc nenang Anutu, ye nasoya kpac kecengkefude. Yeng sing edzacnunuke-fungoc kekecnina wisickeude.

49

Yeni sasawango homegecde

Yegecgareng yearu. Kora medacfora yeni mitiyegec yofi heigec.

¹ Ngiha ngiha ngeni yoac yomoc negembisia nga ngicngac banectoa bangecfu kecdae, ngeni kedzac kpema yoac yomoc negembisia. ² Ngicngac kpactoanginagoc nga kpacngina kpac, dzofinactoanginagoc nga makpekpea, ngeni yoac yomoc negembisia.

³ Enacnango negen negentegecak yoac debade nga herenango negen negengua mema wiac hania hania negentegecma kecbade. ⁴ Ngic yeni yoac heima degec ni kedzac kpema imoc negembade. Ni gita kpema udumeng gombunga negemma yoac heiheiac hania deireckeade.

⁵ Naso manganango hau ngic yeni nukporac anenggec ngabafakanginango oronnuu kengec naric mi ambade. ⁶ Ngicngac imoc yeni hiedzongina negenserima kecanda, yeni dzofinactoanginaac negenggec wiac engena anu imocac yoac homac osogecde.

⁷ Foracngoc, ngic mongngo munia monggac kekec dzofinacngobung naric mi meude, kpac. Ye buma imoc naric mi meficgeude nga yeac bung Anutu naric mi miude.

⁸ Ngickekecac bung imoc engena yombong nga imocac hiedzo homac yombong faigecdeu imoc sifu naric mi kpoudarude. ⁹ Imocac ngic mongngo naso herea wisic wisickeac kpac mi kefude. Ngicngac sasawa yeneng kicsereu kemema imoc hendacgecde. ¹⁰ Oc, ngic negen negentegecnginagoc yeni ifingoc homeandae, imoc hengandimbe. Ngic negen negengngina kpac nga oboc kpoboc yeneng ifi isocngoc homegecde. Yeni hiedzongina wagec goa yeneng imoc megecde. ¹¹ Yeni amangina fefeseri feudeac negemma bangec goa ifingoc yenaoc wase meandae, fora. Nga kicserengo sifu yeneac amabangecngina feengkefude. Yeni fingecsahehina fekefudesoc kicserenginau kemema kecgecde.

¹² Ngic mong wiac kibiagoc gombunga gombunga mekecmahieui wiac ifiango ye

kefudeac naric mi meficgeude, kpac. Ye ine yang hania hania yeni homeandae, ifi isoc homema kpac anude.

¹³ Ngicngac yeneng ubafong amma yenanggac negensima kecandae, yeneac kekec imoc ifinoc. Nga ogofocngina goa yeneac yoacnginaac songo negemma modacyunuan-dae, yeneng sing ifiangoc kenggecde. *Selac*

¹⁴ Ngic yeni rama meisinyunuma homec amaac arennu faiyunuandae, yeni ifi isoc andae. Homecngo rama garengngina amma hesicyunu yeni kemema kicsereu fegec sebingina hoaeu homec amango amangina anude. Anu ama wereckenu ngic ikoc nga hamangecngina kpac kecandae, yeneng kunengngina amma garengyunugede.

¹⁵ Anutungo sifu ni hoannuma menuudeac ubaongana homec amaac kucfunac bum-mema mesiude. *Selac*

¹⁶ Ngic mong ye dzofinaha homac nga amagereha nga finatoaya monggoc anu ge imoc hemma imocac negenna wiac engena mi ambeso.

¹⁷ Ye homeude, imohai wiac imohacnac mong mi tofoma kenu iwaiya sasawa imocngo ye modacma homec amau naric mi kenude. ¹⁸ Foracngoc, ye gbori kecma yengenaac yofi negengande, ni kenecnagogc. Ngic ye kekeha sasawa ngereeu ngicngac yeneng imoc hemma ye dengerekcgecde ¹⁹ nga ye sifu homeude. Ye bangecfora bic kemma kperagi monggoc mi hengandae, yenearu kemeude. ²⁰ Ngic mong ye kecma wiac kibiagoc gombunga gombunga mekecma heiu wiac ifiango ye fekefudeac naric mi meficgeude, kpac.

Ye ine yang hania hania homeandae, ifi isoc homema kpac anude.

50

Sese gombunga

Asafango mitiyegec yofi heiec.

¹ Anutu Kuctoa mingina, KEBU yeng yoac dema bangec kparu wenac ere ereaunac kengkecma wenac keme kemeau wisickeude. ² Siong ye siriha gombunga yombong ande nga Anutungo imohacnac fingectegecma kperagiango nerarannunude. ³ Anutuninango hama naric mi waickeude. Yeac kicfu gerecngo dzema waraimiude nga kiafirang kuhagocng ye yerecgeude.

⁴ Ye ngicngacfona yoacngina isinggema forangina deudeac kurumenga kurumenga wi fekendae amma bangec momoc kpacyunuude. ⁵ Kpacyunuma yofi deude, “Ngicngacfocna yoac tofohoma kecandae, ngeni yeni kpedzucyunuma sueyunugec nearu hadacisia. Yeneng neac hosuc heima sese ohoma nigoc dzadzahac megecac kpacyunud-uae.”

⁶ Anutungo yoacngina isinggema deudeac amma kurumenga kurumenga yeni yoac yofi dekperagikecdae, “Anutu ye dindinga.” *Selac*

⁷ “Ni neannaoc Anutu, ngeneac Anutu. Ngicngacfocna, ni yoac deba negembisia. Israe habu, yoacfу faingunuma yoacngina debade. ⁸ Ngeni ubangerec sese meandae nga neac sese ohogec imoc hengkecduae. Ni ine wiac monggac negemma gorongina kpeduae, imoc yofi, ngeni Anutu Engenatoaac kpacfu wiac deserima dema imocac fora mi meficgegec. ⁹ Ngeni burumaka ngiwa me noning ngiwa odangina manaunac mema nenggec, imoc sifu mi ngereeude, kpac.

¹⁰ Imoc yofiac, kateu yang sasawa yeni neac nga rama burumaka sasawa bangec buma taosennu kecdae, imoc yeni ifingoc neac. ¹¹ Sawakebangau neng sasawa kecdae, yeni negengyunudiae. Nga wiac sasawa kekecnginagogc manennu kenghaandae, yeni ifingoc neac. ¹² Banectoa bangec nga wiac sasawa imohai fedacde, imoc neac andeac herenaac homebadeu imoc ngeni mi edengunubai, kpac.

¹³ Ni burumakaac busia mi neanduae nga noninggac sawa ifingoc mi neanduae, kpac.

¹⁴ Ngeni Anutu ubangerec ammigec imocngo sesengina ambeso. Ngeni Anutu Engenatoaac kpacfu wiac deserima dema imocac fora meficgegec ¹⁵ ebicnaso hau ngeni ni kpacnugec neng ebicfunac mesingunuba ngeneng ni afenubisia.”

¹⁶ Ngic Anutu ngadehema mangana megecdeac ayemmeande, yeneac ine Anutungo yofi deande, "Ngeni neac enac mema singyoacna degec, imocac kpae heingemmeba imoc naric mi debisia. Nga dzadzahac meai, imoc kpacma yoac mong mi debisia, imoc kpaeagoc.

¹⁷ Ngeni neac dederecgeyoacac modzungina tiu yoacna ngadehema waandae. ¹⁸ Ngeni hamangecngic hemma yegoc torokpema yeac ogofora anggecde. Nga ngeni kaisero ngic yenemma yenigoc tacyac angandae. ¹⁹ Ngeni enacbibicngina mi dzegema imocngo ngicngac ogofocngina memanganeyunugecdeac yoac mangana deandae nga nedzarangngi-nango ikocyao degecdeac sing arengggeandae."

²⁰ "Ngeni ngenang dacmunafocngina yoacnginango memanganeyunuandae nga nenggacyombongnginaac medaha enacfu faifai ammiandae. ²¹ Ngeni faka ifi anggec ni waickema kecba ngeneng negenggec, 'Ni kecduaengoc, ye nenii isoc, ye siriha mong mi ande.' Nga imoc kpac, ni yaguc ine ngeni demeting angemmema mesungina kpebade.

²² Ngeni Anutu nigeengnuande, ngeni wiac imoc negensibisia. Ifi mi negensigecdeu neng ine kpedzamengunuba mongngo naric mi onggongngunuude.

²³ Nga ngic mong ye neac ewena heima ubangerecac sese Heinemma sing dindingac modackecde, ye ebicfunac mesiba yeng Anutuac faka henude."

51

Anutu ge kopocsicna wana

Yegecgareng yearu. Dawidingo Batsebagoc serofaka anu profetengic Natangngo yearu kemma dzigeneu Dawidingo yegec yofi heiec.

¹ O Anutu, geng yoac dedzege amma imoc modackecnecac neac ubaga manganeu. Geac wosoefac imoc efea kpac, imocac neng singyoac kpema kopocsic meficegai, imoc dzuacdacna kpac ambeso. ² Ni ngicngac ogofocna faka mangana ayemmeai. Ge dzuacnuna kongaha ambesare. Ge kopocsicna medzuacna kongac kpebesare.

³ Ni singyoac kpeai, imoc negengkecduae nga kopocsicna imoc nasosoc hensiduae.

⁴ Gearusac kopocsic meficegema kicgau faka mangana yombong anai. Ifi anu geng yoac denec imoc fora fingectegerude ge ngic hania isingga yoacngina desinec, imoc dindingac.

⁵ Foracngoc, nengganango kopocsicgoc kecma ni kpenannuma menuu kopocsicnagog fingerai. ⁶ Nga herenau yoac forasac febesso, ge imocac negenna ngereeude. Ge imocac here sufu sufunau negen negentegec kpounenna.

⁷ Ge babacmeac mema dzuacnuna kongac kpeba dzuacnuna hoeng kongaha fera-cyunuma kongac ambesare. ⁸ Ge negemmana ni sogac sogai nga ubangerec negembesare. Geng sicna kpedzamenec nga ge negemmana yeni monggoc sogaibisia. ⁹ Ge kopocsicna imohacnac kicga mesufubesena amma ni ngic ogofocna memanganeyunudarai, imoc dzuacdacna kpac ambeso.

¹⁰ O Anutu, ge herena kongaha gboria meficgenemna asu gboria nga dindingac meficgema herena manau fainenna. ¹¹ Geac hoannunac mi ukununa amma kpetiac Asuga nearunac mi meickena. ¹² Ge ebicfunac mesinunecac sogac sogai monggoc mengere nemma enactofoc tofoho nga ogomeficac asu nemma nanggenuna. ¹³ Ge ifi anna ni singyoackpekpengic geac sing kpouyemmeba kopocsicgoc yeneng ubangina dzigeneu gearu monggoc hagecde.

¹⁴ O Anutu, memengerecnaac Anutu, ni ngic kopocsiha kpacfeng kpehomebaiac imohacnac mesinuna. Ge ifi anna ni nedzarannango imocac sogac sogai yegec kunengngoc heigemma geng ebicfunac mesinunec, imoc edeyunubade. ¹⁵ O Kebu, ni enacnango dengeregubadeac enacbibicna mesina.

¹⁶ Ni sesegerec megemba ge imocac songo mi negennade nga sese dema hosuc ohogemba ge imocac negenna ifingoc mi ngereebac. ¹⁷ O Anutu, ni ine asuna ebicngo kipac kipactanggea gembia imocngo sesena anude. O Anutu, ubamangangngc ngichereu ebic meficgema kipatanggeu ge imoc hemma naric mi wanade.

¹⁸ Ge Sionggac songo negemma gombunga ammima Yerusarenggac hocodatao mong-goc heimengere anna. ¹⁹ Ge ifi anna sese gombunga nga dindingac megenni imocac negenna ngereeu sese ohogemma seseyang hafoangoc ohogennide. Neni sese dema burumaka ngiwa aratagau faiyunuma ohogennide.

52

Yarefaka fingerec

Yegecgareng yearu. Yegec yomoc masiki uba modacma heibesonga. Edomingic mong kpara Doege ye Sauroaru kemma yofi edeec, “Dawidi ye Ahimerecac amau kemma kecde.” imohai Dawidingo yegec yofi heiec.

¹ O ngic kuctoagagoc, ge Anutuac enac tofoc tofohongic tobanggema kpenec. Ge imocac defefec amma yoac homac osokecnec. Ge ngic kpetotieyununa kpac anggecde, ifi negemma asoacnac kemma marai negeng areng angkecnec. ² Ge nedzarangga imoc resa enaragoc, ifi isoc anu ikoc ayemmemma kpetotieyunuannec. ³ Ge manganaac songo homac negemma gombungaac songo mong mi negemma ikocyao debesonga anggenu yoac fora deneadeac mong mi anggengande, kpac. *Selac*

⁴ Is, nedzarang ikohagoc, yoac manganango ngicngac memanganeyunuande, ge imocac songo negengannec.

⁵ Anutungo ine kpedzameguu nasoga kpac ambeso. Ye kporucbedzogau hama imohacnac kucgoc meicguma ukuguu kekecnginagoc yeneac bangecfunac meicgudaru imohai monggoc mi kecnade. *Selac*

⁶ Ngic dindingac yeni imoc hemma kpidohoma kengec amma yarengic hemma dzomoremima yofi degecde, ⁷ “Henggec, ngic imoc ye Anutuac hoannu kemma mi sufuec. Ye ine ngicngac ogofora memanganeyunuma yengena dzofinactoaya negenserima kefu wiac imocngo sufuamea anec.” ⁸ Anu oriwa icngo sabayagoc nangande, ni ifi isoc Anutuac amau namba Anutungo yoac dedzege amma imoc modackecde, ni nasoya nasoya wiac imoc negenserikecduae.

⁹ Anutu, geng ua menec, ni nasoya nasoya imocac ubangerec megebade. Geac kpac kuneng, imoc gombunga nga ni imocac negensima fora fingerudeac negemma kecbade. Amma geac enac tofoc tofohongicngacfocga yeneac kicfu geac kpac kuneng heiwayong memibade.

53

Yeni negen negengngina kpac

Yegecgareng yearu. Yegec yomoc maharatac sing masiki uba modacma heibesonga. Dawidingo yegec yofi heiec.

¹ Ngicngac negen ngentegecngina kpac, yeni herenginau yofi negemma deandae, “Anutu mong mi kecde, kpac yombong.” Yeni fakangina manganeu faka mangana yombong hania hania angkecma yenearunac monggo faka gombunga mi anude.

² Anutungo kurumennunac kic fiu mau ngicngac yenengkecde. Ye ngicngac negen negentegecgoc kecma Anutu hofocandae, ngic ifia hofocyunuma kecde. ³ Yeni sasawango ine faka gombunga ngadehedacma fakangina manganedaru yenearunac monggo mong faka gombunga mi angande, mocdong kpac.

⁴ Ngicngko yaka dzegoc neandae, yarengic yeni ifi isoc ngicngacfocna neyunuandae, yeni memeficac Anutu mi kpacgecde. Yeni negen negengtegecngina kpac. ⁵ Ngic ge gugecdeac kpedzucnegec yeni Antungo sicngina kpedzameude. Imocac wiac mong kengehagoc mi fingeru yeni ine kengectoa amma kpidohogecde. Anutungo wayunuecac gameyuuu nanggecde.

⁶ O, ebicfunac mesi mesi, imocngo Siong, imohacnac habeso, imocac yombong anemmede. Anutungo ngicngacfora mengereyuuu kekecngina ngereeude, imohai Yakoboac areng yeni sogaijecde nga Israeac areng yeni ubangerec negenggecde.

54

Memeficac nunumu

Yegecgareng yearu. Gitakurere kpema heibesonga. Sifingic yeneng Sauroaru kemma yofi egegec, "Dawidi ye nenanggoc sufuma kecde." Ifi anggec Dawidingo masikiyegec yofi heiec.

¹ O Anutu, ge kpac kunenggaac amma ebicfunac mesinuma kucgango onggonnuna ngic yeneac yoacfufirang ambesare. ² O Anutu, ge nunumuna negemma yoacnaac kedzac kpena.

³ Kuricngic yeni yacma nubeso andae nga ubakpekpke ngicngoo Anutuac negenggencengena mi angkecde, yeni ngaba anemma kpebucnubeso andae. *Selac*

⁴ Foracngoc, Anutu ye memeficngicna. Kebungo kekecna garenggekecdae, yenigoc kecma nanggeyunuu seria nanggecde. ⁵ Ngic neac ngabayoac degec yeng ngadedyoacngina merenu yeni imocac ebic meficgegecde. Kebu, ge yoac modac modac Anutu, imocac memanganeyununa kpac ambisia.

⁶ O Kebu, ni ubaefac amma geac sese megembade. Ge kpacga gombunga, imocac geac kpac kuneng heiwayong memibade. ⁷ Geng ebicfunac mesinudacma ngabafocna memanganeyununa ni firang amma kicnango yenennai.

55

Tosofocna yeni wanugec

Yegecgareng yearu. Gitakurere nga noc kpema heibesonga. Dawidingo masikiyegec yofi heiec.

¹ O Anutu, ge neac nunumunaac kedzac faina wiac monggac kpesigemba ge imoc negemma ihoc bahaoc mi ambesena.

² Ubaebicnango feracnuu negen negennango sicsauc andeac ge negennemna yoacna turunga merennenna. ³ Ngabafocna yeni kpeborong kpekecdae nga ngic Anutu ngadephema mangana megecdeac ayemmeande, yeni kicngina nearu firma ngaba anemma ebicfu fainugec ubaebicgoc kecduae. Yeni ngaba amma nubeso andae. ⁴ Herenau ubaebic mema homecac kengectoa amma kpidohoma manganebeso anduae. ⁵ Ni kpidohoma kengecnuu dzononna fedede. Ni kpidohoba kengectoango feracnuu ubaebicgoc kecduae.

⁶ Ni yofi deduae, "Ni kebesac neng isoc kpegannagoc ambai dede kpututuckema bangec monnu kemma ruae meficgebesare, imocac yombong anende. ⁷ Foracngoc, ni kpututuckema bangec ngiha kpacfu kemma amagerecna ihai mema kecbai. *Selac*

⁸ Kia firangtoa kpeu ni sufu sufuamana mong meficgema ihai bicbic kpututucke kemma sufubai."

⁹ O Kebu, ni taonnu ngic yenemba yeni ngaba angemema yarefaka angandae. Ge imocac negengngina kpetotieno yoacngina tohoemebisia.

¹⁰ Yeni hadzing tofocnac taonggac odatao witiau kengha amma yerecgema nangandae nga taong manau tosongo ngicngac tosofocngina memanganeyunugec ebic homac fede.

¹¹ Yeni wiac kpetotiegecdeac negen negeng mekecgec, imocngoo taong botuhau wiac kuneng ande. Ngic yeni ngicngac ogofocngina ebicfu faiyunugec ubaebicgoc kecdae nga goa yeni ikoc amma hiedzo kiregecandae. Faka imocngoo emenechengina fekecmi kpac anude.

¹² Neac ngabangicngoo yoac deendema anembac ni naric serima imoc negengkecbai nga ngaba monggo ubakpekpke anenu yearunac naric sufubai. ¹³ Faka ifia ine gennoc ogona angkecne. Nerang arenira mogu amma ge ngic ni isoc amma wegenac kecandipe, ge tosotyombonna, gennoc faka ifia anengkecneboc ubahodung negenduae.

¹⁴ Neri nerahafoc kecma desogai angkecma habutoagoc Anutuac womonnu nerahafoc kengkefic.

¹⁵ Homecngoo ngabafocna meyunubeso. Yarefakango amangina nga herengina mewakeudeac yeni sebingina gbori femanu homec amau kemebisia.

¹⁶ Anu ni sifu Anutu kpacba KEBUNGO ebicfunac mesinuude. ¹⁷ Ebicngo memanuu asoringa anenu ni asoac nga marai amma tofocnac imocac kiacma ebicyoacna edeba yeng ubaudumenna negenude. ¹⁸ Foracngoc, ngic homac yeni ngaba anemma nubeso andae nga Kebungo dzikacf u garennuma bummenuma onggonnuude.

¹⁹ Anutungo ngictau tatahau bicngoc tarec amma nasosoc tarude. Ngic imoc, yeni ine ubangina naric mi dzigeneude. Yeni Anutu kengec nga eweheiheigoc naric mi hoanggegecde. Imocac ye neac kiac negemma kpendzennu faiyunuude. *Selac*

²⁰ Tosonango yeac dzadzahac kpema maria sinema ngic ogea kpebeso anec. ²¹ Yeac yoac yumia hosonec kerec isoc deu herea manau ine dzikacng feu yoac deec, imoc ine ruaegoc yombong kerecdokuya isoc amma soengo yenereande, ifi isoc yenereec.

²² Ge ebic sasawa tofohonec, imoc KEBU wamina yeng ebic imoc tofohodacma meserigubes. Ye ngic dindingac garenggema kpae heimiu wiac mongng ye meu goroc goroc naric mi anude. ²³ Ngic yeni ngic ogofocnginaac sac hetinggebeso ayemmeande nga ikocngic, yeni kekecngina kebangau homegecde. O Anutu, geng kpefacyununa yeni teng keme kemeau kemeyombonggegecde.

Anu ni negenseriguukebade.

56

Ge kickumuna mi nigecgubeso

Yegecgareng yearu. Yegec mong kpara Kebesac neng aga saruc icfu tacde, imocac uba modacma miktangyegec yomoc heibesonga. Fristiareng yeneng Dawidi Gata amau meficgema mendanggegec yeng yegec yofi heiec.

¹ O Anutu, ngicngac yeneng ni mematiti anendae nga ngabafocna yeneng asoacnac kemma marai ebicfu fainugec ubaebicgoc kecduae. Ge imocac neac ubaga manganeu. ² O Kebu Engenatoa, ngabafocna yeni asoacnac kemma marai enacfu faifai amma sebingina meemma mematiti anemma ngaba anengkecdae.

³ Ni kengecnuu negenseriguanduae. ⁴ Ni Anutuac yoac dengerema ye negenserikecma kengec mi ambade. Ngic yeneng wiac mong naric mi anenggecde.

⁵ Yeneng asoacnac kemma marai enacfu faifai anemma memangenenukecdae. Yeni ebic hania hania fingecnenudeac negen negengua ebirangoc mekecdae. ⁶ Yeni memanganenugecdeac denegeng amma neac tomai sufuma namma kpebucnugecdeac ayemmeu ni kengha ambadesoc garenヌukecdae.

⁷ O Anutu, ge ngicngac areng sasawa yarefakanginaac turunga kpouyemmema herebugaac ebic witicnginaukuna mau. ⁸ Yeni nukporac anenggec wenac dafiguc ama heidac kefai imocac kpetea osoma medacnec. Amma kickumana bic osoma kibigau ohonec fede, imocac kpetea negensibesena. ⁹ Anutungo nigoc kecde, imoc negenduae. Yeng ni meficnuudeac kpacba imohai ngabafocna dzigenema woragecde.

¹⁰ Ni Anutuac yoac dengerema Kebuac yoac dengerema ¹¹ ye negenserikecma kengec mi anganduae. Ifi amba bangecngic yeneng wiac mong anenggecdeacsoc mi ande.

¹² O Anutu, ni yoac deserima ge edeguai, imoc tofobobesare. Ni ubangerecnaac sese megembade. ¹³ Ge ubaongana homecfunac mesima hanina meserina mong mi tifainggeai. Ge ifi anna ni Anutuac kicfu kekecac kperagiau kecbade.

57

Ngiha ngiha botucnginau afegubade

Yegecgareng yearu. Yegec kpara: Ge mi kpetotiebesena, imocac uba modacma miktangyegec yomoc heibesonga. Dawidingo Sauro yearunac worama hocsingau sufuma yegec yofi heiec.

¹ O Anutu, ge neac ubaga manganeu. Ubaonganagoc geac hoannu sufuduaeac amma ge neac ubamangang negenna. Ni geac kpeganggaac debannu sufuma kecbare kiafirang mangana kpac andacbeso.

² Ni Anutu Engenatoango meficnuudeac kpacduae. Anutu yennoc neac kekecareng uayagoc faima uaya nearu mesidaru. ³ Ye memefiha kurumennunac sueu imocngo ebicfunac mesinuude amma ngic mematiti anenggec imoc yenemma game kpekpeu faiyunude. Anutungo yoac dedzege amma imoc modackecde nga ye yoac modac modac Kebu amma faka imoc faiu hanemmeude. *Selac*

⁴ Raiong yangtoa yeni yang siricfu herenginaac homema bangecngic medacfocngina neyunuandae, ni botucnginau feduaenoc. Ngic yeneac enacngina imoc pokong nga tebemedaha isoc amma nedzarangngina imoc dzikacac soe isoc enara monggoc. ⁵ O Anutu, afegugec imocngo kurumenga kurumenga ferahema embeso. Ge kucga nga kibikperagiaga bangecfu faina mau bangectoa bangec sokoma fedacbeso.

⁶ Yeneng neac ufc faigecac ni ebic kuneng meficgeba neac sinnu teng mong usuma yenaoc teng imohai kemegec. *Selac*

⁷ O Anutu, herenango ge seria meguma kecbade, oc, herenango seria meguma kecbade. Ni yegec heima music mema afegubade. ⁸ Ubaongana ge negengboribesena. Gitakurere ngeni gboribisia. Ni ama negemma yegec heima amabangecac kperagi midibade.

⁹ O Kebu, ni ngiha ngiha botucnginau ge ubangerec megemma bangec monnunac ngicngac botucnginau namma geac yegec heima dengeregubade. ¹⁰ Geng yoac dedzege amma imoc modackecnec nga imocngo wiac herea amma kurumenga kurumenga manau naric enude nga ge yoac modac modac Kebu. Geac faka imocngo wiac herea amma sawau emma hoeng kpesereyuuude. ¹¹ O Anutu, ngicngac afegugec, imocngo kurumenga kurumenga ferahama embeso nga ge kucga nga kibikperagiga faina bangecfu mau bangectoa bangec sokoma fedacbeso.

58

Anutu wadae

Yegecgareng yearu. Yegec kpara: Ge mi kpetotiebesena, imocac uba modacma mik-tangyegec yomoc heibesonga. Dawidingo yegec yofi heiec.

¹ Nemu hania hania, ngeni yoara kpac kecma desi desi ua dindingac mi megecde. Ngeni yoacfu ngicngac yeneac yoac isingising ikohau meandae. ² Ngeni herenginango negen negeng mangana arenggekecma maringinanango bangecfu yarefaka fingerudeac ua mederema yemmeandae.

³ Ngicngac Anutu ngadehema mangana megecdeac ayemmeande, yeni nonggo here-manaunacngoc sing segema fingecma kecdae. Yeni fingecgecfunacngoc sing segema ikocyao deandae. ⁴ Yeni marasingngina mangana imoc boidzocac marasing mangana isoc ande nga kpate kedzafonggo kedzaha mefonggeande, yeni ifi isoc andae. ⁵ Boidzoc ifiango dzinacngic ubaudumengngina naric mi negenude nga dzinacngicn go ye tobanggema uatoa mema udumeng gombunga meficgeu kpatengo imoc naric mi negenude.

⁶ O Anutu, geng enacsicngina dumbengnginaunac kpedzamena. O KEBU, geng raiong gboria baicngina kpetackema meickena. ⁷ Geng sueyununa yeni dokungo worama kengande, ifi isoc kembisia. Nga ngicngac yeneng kpindzing tidzamegec moronggeande, yeneng ifi isoc ge negemmana ngic Anutu ngadehema mangana megecdeac ayemmede, yeni tidzameyuniubisia. ⁸ Geng negemmana yeni gowohahacngi homema hoaeande, ifi isoc hoaebisia. Nga geng negemmana yeni sabacngo yadiseri mi amma nonggo heremanaunac homemea fingecma wenackiwa naric mi henude, ye isoc ambisia. ⁹ Ngic Anutu ngadehema mangana megecdeac ayemmeande, yeni sabanginagoc me dzangge dzanggea kecgec yeng meicyunuu kpac ambisia. Enang bebedaha gerecngo dzeu fitickema yacande, Anutuac herebungo dzefiticyunuu yeni ifi isoc yacbisia.

¹⁰ Yeni kopocsicnginaac turunga ifi fingecyemmeu ngic dindingac yeni imoc hemma sogaijegede. Yeni ngic Anutu wama kopocsic meficgegecdeac ayemmeande, yeneac sacngina tima haningina duacgec ¹¹ ngicngac yeneng degecde, "Foracngoc, ngicngac

dindingac yeni angammemenginaac foraya gombunga fingecyemmeude. Foracngoc, Anutu kecde, ye bangecfu desi desi ua mekecde.”

59

Ge mesinuna

Yegecgareng yearu. Yegec kpara Ge mi kpetotiebesena, imocac uba modacma mik-tangyegec yomoc heibesonga. Saurongo ngicfora Dawidi kpebugecdeac sueyunuu Dawidiac ama garenggema nanggec yeng yegec yofi heiec.

¹ O Anutuna, ge ngabafocna yeneac mariunac mesinuna. Ngic nubesonga andae, geng yenearunac onggonnuna. ² Yarengic nga ngic sacna hetinggebeso ayemmede, ge yeneac mariunac mesinuna.

³ O Kebu, ni singyoac kpema kopocsic mong mi meficgeai nga yeni ine yagungoc kekecnia meickegecdeac nembima ngonducnema tomai kecdae nga yarengic ngabatoanginagoc yeni nugecdeac negemma yoac dzegedae. ⁴ Ni faka mangana mong mi anai nga yeneng ine efaima hama nubeso andae. Ge kic fima ebicna hemma yacma meficnuna. ⁵ O KEBU, Anutu kurumenggac wasaiareng kunengngina, ge Israe neneac Anutu. Ge gauunac yacma bangec monnunac ngicngac mi negenggudae, yeni sasawa kopocsicnginaac amma turunga kpouyemmena. Ngic ikocngina mesufuma yarefaka arengandae, yeni mi onggongyunubesena. *Selac*

⁶ Yeni wenasoc ama marai anu dzigenema hama kasi isoc taua kpema taonnu hofoc hofoc kengha angandae. ⁷ Yeni enacnginausing wiac urunggec maude, imoc hembesena. Yeni enacbobicnginaunac wiac urunggec maude, imoc dzikacac beang isoc. Imoc enara monggoc anu deandae, “Mongngo yoacnina naric mi negenude.”

⁸ O KEBU, geng ine dzomoreyemmema bangec monnunac ngicngac ge mi negenggudae, yeni tenicfu faiyununade. ⁹ O Anutu, ge neac memeserina nga amana seria, imocac ni kic gearu fibade. ¹⁰ Anutuna yeng yoac dedzege amma imoc modarude. Ye warainemma kemma sinnu meficnuude. Anutunango sing meficgeu ni firang amma ngabafocna memayunuma yenembade.

¹¹ O KEBU, ngicngacfocna yeneng wiac imoc nigecyunubaac ngabafocna mi kpebucyunnuna. Ge ngic ifia kucgango memayununa kucmama nga goroc goroc amma kecbisia. O Kebu, ge kasonina. ¹² Yeni enacnginaunac yoac mangana mau kopocsicgoc amma sowec nga ikocyao degecede. Yeni wiac imoc negenggec engena anu imocngo botacngina amma meyunubeso. ¹³ Ge herebugango gbokoyunubesena. Oc, ge gbokoyununa kpac andacbisia. Ifi anna bangetoa bangec tegia fekendaeu ngicngac yeneng yofi negenggecde, “Anutungo Yakoboac areng garengyunukecde.” *Selac*

¹⁴ Yeni wenaccsoc ama marai anu dzigenema hama kasi isoc taua kpema taonnu hofoc hofoc kengha angandae. ¹⁵ Yeni yaka meficgegecdeac hofocma kengha amma mi gebecyunuudeu ngaba yombong amma arohogecde.

¹⁶ Ni ine kucgaac amma yegec heigembade. Geng neac amana seria nga ebiunasou geac hoannu haba geng sufu sufuamana angkecnec. Ge yoac dedzege amma imoc modack-ecnec, imocac asoacngoc ubana miacma fakaga imocac ubangerec yegec heibade. ¹⁷ O Anutu, ge memeserina nga amana seria, imocac geac dedengerec yegec heibade. Anutu ge yoac nigoc dedzege amma imoc modacnade.

60

Anutu, ge wanununec me?

Yegecgareng yearu. Yegec kpara: Dzadzahaac lili dzaring, imocac uba modacma miktangyegec yomoc heima ubau faibesonga. Dawidingo yegec yofi heiec.

¹ O Anutu, ge nagdenunuma kpetotienunuma neneac ngaba annec. O Kebu, ge monggoc mengerenununa. ² Ge bangec kpemindzahena usoc meu titing kuneng fingeru goroc goroc andeac geng titinga monggoc mengerena.

³ Ge ngicngacfocga kpenzengtoau fainunuma waing seria gumecnununa neingga hanititinina goroc goroc anu sicsaufu kengha aning. ⁴ Ngicngac ge eweheiheigoc hoanggugec yeni ine tebemedahaac sinnunac hesicyununadeac firac mong miacna yeni imoc hemma ihai kpedzucnema nanggecde. Selac ⁵ Ge ngicngacfocga neneac songo negennec, nga ebicfunac mesiyununadeac neni marifoigango dzikacfu meficnununa firang ambisina. Ge nunumuninaac turunga merennemmena.

⁶ Anutu ye womongau tacma yoac deserima yofi deec, “Ni firang amma sogaima Sikeng ama mederema Sukoc bangec tume imoc medereba noboha noboha anu ngicngacfocna yemmebade. ⁷ Gireade nga Manasse yeri neac. Efaraing imoc wasai opocna nga Yuda ye ngictau yasuna. ⁸ Moabi imoc dzuac dzuac sokocna nga ni Edonggaru hanitabena ukuba yunuude amma ni firang amma Fristia bangec arohomiba negenggecde.”

⁹ Monggo nigoc kemma taong odya seria imohai menuma Edong bangecfu hesicnuma kembeso. ¹⁰ O Anutu, gennoc wanunuma ukununudacnec. Ge wasaingicnina yenigoc dzikacfu monggoc mi kengannec.

¹¹ Ngicngo meficnunuude, imoc memefihagoc kpac. Imoc gennoc meficnununa ngabafocnina yunubesena. ¹² Neni Anutugoc namma kuctoaninagoc amma firang annide. Yennoc ngabafocnina mematiti ayemmeude.

61

Kpegangga bageu

Yegecgareng yearu. Gitakurere nga noc kpema yegec yomoc heibesonga. Dawidingo mitiyegec yofi heiec.

¹ O Anutu, ge kpakpacna negemma nunumunaac kedzac kpema negenna. ² Ni bangectoa bangec tegiau namba woubocna kucmama anu kpacguduae. Ge hesicnuna hoc peperandzi herea mong feracnude, imohai kemma nambisira. ³ Ge neac sufu sufuama. Ngabafocna yeneng nubeso anggec geng amana herea nga seria annec.

⁴ Ge kporucbedzogau fainuna ni nasoya nasoya ihai kecbade. Ni geac kpegangga bageu sufuma kecbadeac anende. Selac

⁵ O Anutu, ni yoac deserima deai, imohai ge imoc negemma ngicngac eweheiheigoc hoangguandae, ge maridzoming desiyemmenec, imoc ni ifingoc desinennec. ⁶ Ge ngictauac kekeha mehereena kifa homac kecbeso amma apangabofora yenembeso.

⁷ Anutu, ye geac kicfu nasoya nasoya ngictau tatahau takecbeso. Ge yoac modac modac Kebu amma yoac dedzege amma yoacga imoc modackecnecac amma fakaga imocngo ge negemmana ngictau henggareng ammibeso.

⁸ Geng ifi anna ni dedeserina imoc wenacsoc modackecma geac kpac kuneng nasoya nasoya heiwayong memibade.

62

Anutuac kicfu ruae

Yegecgareng yearu. Yegec kpara: Yehudutung, imocac uba modacma yegec yomoc heibesonga. Dawidingo mitiyegec yofi heiec.

¹ Anutungo ebicfunac mesinuu ubaonganango yeac hoannu ruae meficgeude. ² Ye neac hoc peperandzi seria amma ebicfunac mesinuude. Ye amana seria anu monggo menuu goroc goroc naric mi amba yeng naric mi meicnuude.

³ Ngeni ngic kuha kpac ngabaac siricfu kpekecdae, imoc wisickebeso. Ngeni sasawango ye kpema bangecfu ukuyombonggeboso andae. Ye oda kuha kpac nga odabisic dzame dzamea isoc nanu ngeni ye memanganegec todinggema makpeudeac negemma kpekecdae.

⁴ Ye ngickuneng tatahau taru yeni negen negengina arenggema yofi negengandae, “Ye tatahaunac meickebesonga.” Yeni ikocyao negenggec ngeree enacnginaunac kenecyoac maande nga herenginango ine sowecyunugecde. Selac

⁵ Ni Anutu negensima tomai kecba foraya fingerudeac ubaonganango yeac hoannu ruae meficgeude. ⁶ Yennoc neac hoc peperandzi seria amma ni ebicfunac mesinuude. Ye amana seria, imocac wiac mongngu menuu goroc goroc naric mi ambade. ⁷ Neac memengerec nga eweheihei imoc Anutuarunac haude. Yennoc neac hoc peperandzitoa seria nga ni Anutuac hoannu kemma sufubade.

⁸ O ngicngac, ngeni nasoya nasoya Anutu negenserima kecbisia. Yeac hoannu kemma sufuma kecnide. Ngeni herenginai wiac sasawa fedacde, imoc ye edebisia. *Selac*

⁹ Ngic mamea yeni ngicngo asu naso mocgu heiandae, imoc wiac ifi. Ngic engena kecdae, yeni firang onga ikoha fifiu kpac angande, ifi isoc andae. Sigeriu faiyunugec yeni ebicngina kpac. Yeni efea yombong nga enacasuac ebic sigeriu yeneac ebic ferahede.

¹⁰ Ngeni hodzinnu wiac mema finacgoc anggecdeac mi negensibisia nga yarefaka amma finacnginagoc anggecdeac mi negensima sicsauc amma imocac tomai kecbisia. Ngeni dzofinacngina monggoc nga mongoc anu mekecgecdeu negen negengngina imohai mi faigec febeso.

¹¹ Anutungo naso mocgu yoac yofi deec, imoc atac yohockang anu negenai, “Ni Anutu kuc mingina nga ¹² ni yoac dedzege amma imoc modacbade.” Kebu ge ngicngac tembuc tembuc angammemengina hennegeng amma turunga kpouyemmenade.

63

Wosofacga

Dawidingo Yuda bangec kisiu sufuma kecma mitiyegec yofi heiec.

¹ O Anutu, neac Anutuna, ni ge hofogukecduae, imoc bangec gbangge gbanggeango dokuac ammiande, ni geac ifi isoc anende. ² Ni kuc nga eweheiheiga hembadeac kicna aratagau fima genai.

³ Geng yoac dedzege amma imoc modackecnec, fakaga imocngu kekec ferahadeac amma dengeregubade.

⁴ Ifi anu ni kecbadesoc kenecgubade* amma geac kpacfum numuma marina miacba enu.

⁵ Geng ubaongana yakaac kuc nga kerehagoc megume ammina wakeu enacbibicnango sogac sogaiac yegec heiu enacnango ge dengereguude.

⁶ Ni kecnegeng naso amma tofocnacsoc fefenau fema ge negensiguma geac negensikecma feanduae. ⁷ Gennoc neac memeficngic, imocac geac kpegangga bageu sogaima kecma yegec heigembade. ⁸ Ubaongana gearu kpeketaheu marifoigango nanggenunade.

⁹ Ngicngac kekecna kpetotiebeso andae, yeni ine homec amau kemegecde. ¹⁰ Yeni dzikacfu kenggec beangngu feracyunuma kpebucyuuu katekasi yeneng sebingina negecde.

¹¹ Ngictaungo Anutuac sogaiu ngicngac sasawa yeac kpacfum dedeseri deandae, yeneng yeac negenggec engena angande. Ikocngic yeneac enac ine fitec kpegecde.

64

Sufu sufuu mi tarude

Yegegcareng yearu. Dawidingo mitiyegec yofi heiec.

¹ Anutu, ni ebicyoacna edeguba ge ubaudumenna negenna. Ngaba yeneng nubeso andaeac kengecnude. Ge imocac onggonnuna. ² Ngic yeneng Anutu ngadephema mangana megecdeac ayemmeu sufuu sufuu yoac dedzege angandae. Geng yeneearunac mesufununa yeni mi meficnubisia. Yarengic yeni memanganenugecdeac areng faigec ge mesufununa yeni mi meficnubisia.

³ Ngic yeni soe dzumuandae, yeni ifi isoc nedzarangngina dzumugecde. Ngic yeni tebemedaha kpesaima ukuandae, ifi isoc kpesaima yoacngina hodungagoc ukugecde.

⁴ Yeni sufuma fema ngic kopocsic mong mi meficgeec, ye wedecandae. Yeni kengecngina

* 63:4: Anutungo meficnunu nenang bangecngicngacnece yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereeude. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

kpac kecma bic yombong wedecgecde. ⁵ Yeni yarefaka megecdeac negen negeng seria mekecma ning kpema sufuu subangina idegecdeac yoac denegeng angandae. Yeni yofi negemma deandae, "Mongngo naric mi nenenude, kpac." ⁶ Yeni mangana dedzege amma deandae, "Neni wiac imoc gombunga yombong arenggedinggac naric annide." Foracngoc, ngic ubaherenginaac negen negeng, imoc keme kemea yombong, i.

⁷ Ifi ammagec Anutungo tebea yenearu kpesaima wedecyuuu yeni bic yombong kubecnginagoc amma mayunuude. ⁸ Ye nedzarangngina mangana imocngko kpetotieyunuu kpac anggec ngicngac ogofocngina yenenganda, yeni faka imoc hemma hata gigigecde.

⁹ Ngicngac sasawa yeneng Anutungo faka meec, imoc negensima deyadigec ngicngac sasawa kengec anggecde.

¹⁰ Anu ngic dindingac yeni KEBUNGO faka meecac sogaima yeac hoannu hama sufuma kecbisia. Ngicngac uba kongaha kecanda amma herengina ikoc nga hamangec mong mi fede, yeni Kebuac negenggec wiac engena ambeso.

65

Wiac gombunga nemmeude

Yegecgareng yearu. Dawidingo yegec nga mitiyegec yofi heiec.

¹ O Anutu, Siong taonnu ge eriendzong megembesonga nga geac kicfu namma dedzegeninaac fora modacbisina. ² O Kebu, ge nunumuac turunga merenganne. Bangecngicngac sasawa yeni gearu hakecdae. ³ Neni ngicngac ogofocnina memanganeyunuinggac ebic imocngko memanunu geng singyoac kpeinggac kopocsicnina wanec.

⁴ Geng ngic mong meisnggema hoanggema wangecna womonggau kefudeac haude, ngic imoc ye kenehagoc. Neni geac amaac nga womong kpetiacac gombungagoc kecni gebecnunu kecnde. ⁵ O Anutu, memengerecnina, ge nunumunina negemma fakaga mi hehena amma turunga merennemmema ebicfunac mesinununade. Bangec tegia fekende, imocac ngicngacfora nga ngicngac kondung ferahemma tegiau kecdae, yeni sasawango kekecningina wiac fora fingerudeac ge negensiguma tomaiga kecgecde. ⁶ Ge kucga heina kemeu kucgango tiki maficyunuma tatacningina faiyununec. ⁷ Kondung yeni kunengngoc arohogec ge arongina menomanena ning kpegecde nga kondunggac siri udumengtoagoc kpeande, imoc menomanena ning kpema feude. Ge ngiha ngiha yeneac dzomugerec ifingoc menomanenade.

⁸ Ge ngicngac negensinggugecdeac kucfaka meanne, imohai ngicngac bangec feracyunudacma tegiau kecdae, yeni imocac kerectegec anggecde. Geng ama werec wereckengaunac hanahema kemma bangec wenac keme kemeau wisickeude, imohai ubangerec ayemmena ubangerec negemma kunengngoc arohogecde.

⁹ Ge bangec yugucke kia mina bangec kerehagoc yombong anudeac amminade nga Anutuac doku, imohai doku efea kpac fede. Ge bangec ifi mengerema ngicngac semengngina maficgeyemmenade. ¹⁰ Ge kia dena kpema semeng sereau kia kehema semeng homac nadzicmiude. Ge bangec buriric mesorongaina kia kpema bangec meyumeu bangecac semeng sasawa kenehena fora gombunga fingerude. ¹¹ Ge kifaacsoc semeng homac maficgena imocngko kifaac iraya isoc anude. Geac hanititigaac bangec imoc kerehagoc nga semengtoayagoc. ¹² Bangec kisiu ramaburumakaac bangec imoc kpindzingngko wakedarude. Bangec buma yeni ubangerec heigec kemeu sogac sogai anggecde. ¹³ Ramaburumakaac bangec yeni ramaburumaka habu homac wamba isoc heigec kemeu sokodacgecde nga bangec tumia emai imoc semengngo mewakeyunude. Wiac sasawa imoc yeni kpeturanggema arohoma yaiyo kpema yegec heigecde.

66

Dendzerenggec

Yegecgareng yearu. Yegec nga mitiyegec.

¹ Bangecfu wiac sasawa, ngeni Anutu dendzerenggema yaiyo kpema ² yegec heima yeac kpac kuneng heiwayong memima ye oyang boyang memima ³ yofi debisia, "Geng wiac angannec, imoc wiac engena yombong, imocac kerectegec andimbe. Ge kucga monggoc, imocac ngabafocga geac bageu kecma ngonducnegecde.

⁴ Bangec sasawango geac kicfu ngocducnema numugemma yaiyo kpema yegec heigendae. Yeni geac kpac kuneng heiwayong memima yegec heidae." *Selac*

⁵ Ngeni hama Anutungo ua meec, imoc hembisia. Ye bangecngicngac nenanggoc kecma ua bibiagoc meude. ⁶ Yeng kondungheimerenu bangec kerenga anu ngicngac yeni haningo doku imoc ferecgegec. Ye faka imoc meecac amma nenang sogac soagaigoc kefing. ⁷ Ye nasoya nasoya kuhagocngo wiac sasawa garenggema kiwango bangec monnunac ngicngac sasawa yenemma kefude. Yoackpekpe yeni sebingina mi meembisia. *Selac*

⁸ Ngiha nigha ngeni Anutunina kenehema* enac udumengnginango ye oyang boyang ammigec ngicngac yeni negendacbisia. ⁹ Yeng garenunuu gbori kecdae, yenigoc kecni ye haninina garenggeu mong mi tiposockenide.

¹⁰ O Anutu, imoc yofiac, ngic yeni siriwa isingeandae, geng ifi isoc faitobannu fainunuma isinnununec. ¹¹ Ge ufcu fainununa kemeni ge ebic kuneng witininau faina imoc tofohokefing. ¹² Geng negemmana ngic yeneng orucninau tima kenggec. Neni gerec manau kehema dokuu kemema kening, fora. Nga geng yaguc menunuma amabangec tumiatoau fainununa wiac monggac mi obohonide.

¹³ Ni womoggau hama sese ohogemma wiac ambadeac dedeseri deai, imoc ambade.

¹⁴ Ni ebicfu kecma wiac ambadeac enacbibicnango yoac deserima deai nga yoac enacnango deai, imocac ¹⁵ ramaburumaka krehagoc sese negemma gembade. Nga rama ngiwa sese dema ohoma hosuc heima burumaka nga noning ngiwa gembra sese ambeso. *Selac*

¹⁶ Ngicngac Anutu eweheiheigoc hoanggeandae, ngeni hama yoacna negembisia. Yeng nearu ua meec, imoc edengunuba. ¹⁷ Enacbibicnango ye kunengngoc kpacba nedzarannango ye bic afeheec.

¹⁸ Ni ngicngac ogofocna memanganeyunubadeac negen negeng herenau arenggebai dede Kebungo neac kedzac mi kpebac. ¹⁹ Amma forangoc, Anutungo negennemna nunumunaac yoac negensima kefec. ²⁰ Ye nunumuna mi ngadehema yoac nigoc dzegeec, imoc mi waec, imocac Anutu kenehebesonga.

67

Yaiyo kpegembisia

Yegecgareng yearu. Yegec nga mitiyegec, gitakurere nga noc kpema heibesonga.

¹ Anutungo wosoefac anemmemma kenecnunuma kicmesuyango nerarannunubes. *Selac* ² Ifi anna ngicngac bangecfu kecdae, yeni geac haniaga negembisia nga ge ebicfunac mesiyununadeac kuc fegende, bangec monnunac ngicngac botucnginau kecdae, yeni imoc negembisia.

³ O Anutu, nigha nigha yeneng afegubisia, yeni sasawango ge yaiyo kpegembisia.

⁴ Ge monde mondega kpac kecma nigha nigha siric mocguu isingyununade nga bangec monnunac ngicngac sing edzacyununa imoc modacgecdeac yeni ubangerec negemma sogac sogai yegec heigembisia. *Selac*

⁵ O Anutu, nigha nigha yeneng afegubisia, yeni sasawango ohecga megembisia.

⁶ Anutu ye nenang Anutu. Yeng kenecnunuu bangecngo semeng gombunga meficgen-emmeude.

⁷ Anutungo kenecnunubeso nga ngicngac bangec tegia fekendaesoc, yeni sasawango ye eweheimima hoanggebisia.

* 66:8: Anutungo meficnunuu nenang bangecngicngac nec yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereeude. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

Anutungo firang ande

Yegecgareng yearau. Dawidingo yegec nga mityegec yofi heiec.

¹ Anutungo yacma ngabafora yunuu singsararang kpema kecbisia nga yeac modzongina tiande, yeni yearunac worama kendacbisia. ² Firangngó hosuc mefiranggeu kengkecde, geng ifi isoc kporacyununa worama kendacbisia. Ngicngac Anutu ngade-hema mangana megecdeac ayemmeande, yeni ge negemmana kerecngo gerek wegenau tacma sisingaiande, yeni ifi isoc Anutuac kicfu sisingaima kpac ambisia.

³ Anu ngicngac dindingac, ngeni ubangerec negemma Anutuac kicfu sogaima kecbisia. Ngeni ubangerec homac yombong negemma sogaibisia.

⁴ Ngeni Anutuac yegec heibisia, ngeni yeac kpac kuneng heiwayong memima deden-gerec yegec heibisia. KEBU hoennu tacma kengande, ngeni yeac kicfu sogaima yegec heima oeha memibisia.

⁵ Anutungo kpetiac womongau tacde. Ye beging mang ayemmema hodzec yenenggareng ayemmema onggongyunuude. ⁶ Anutungo ngicngac dzengong amagerec meficgeyem-meu tosofocnginagoc kecgecde. Ye witicngic witicamaunac mesiyunuu yeneng mama kecma wiac monggac mi obohogecde. Yoackpekpe ngic yeni ine bangec dzangge dzanggeau kecgecde.

⁷ O Anutu, geng warac ngicngacfocga waraiyemmemma bangeckisiusing wangecyununa kenggec. Selac ⁸ Imohai bangecfu usoc meu Anutu, Sinai bangec gbangge gbanggeac Anutu amma Anutu, Israeac Anutu, kurumenga kurumenga yeneng geac kicfu kia faigec maec.

⁹ O Anutu, geng kia faina bangecfu mau dokuac mi obohoing. Ge bangec gbangge gbanggea soc kpema nemmemma kuha mina icngo monggoc kpedzienu bangec imoc kerehagoc anec. ¹⁰ Ifi anu kpebunggango bangec imohai kemma tacngisigec. O Anutu, ge wiacga homac fedeac ubangerecgaac imoc mema makpekpea yemmena wiac monggac mi obohogec.

¹¹ Kebungo yoac deu ngicngac homacngó siduc imoc tofohoma dekperagima ¹² degec, “Ngictau yeni wasaingicfoenginagoc bic kemma woradacgec ngicngó dzikacfu firang amma iwai megec ngac yeneng amanginai kecma imoc hedzicma megecde. ¹³ Amma dzikacac hepuc amau tacgec yeni neng dzongina siriwa nga gol tengging tengging isoc ifiango sebingina soko sokoa feec.” ¹⁴ Anutu kpudamuyagocngó ngictau yunuu singsararang kpegec imohai nomang kia isoc mama Dzarimong tiki semeec.

¹⁵ O Basang tikitoa tiki, ge bumaga homac nga herea herec, o Basang tiki. ¹⁶ Tiki bumaga homac nga herea herec, geng nocac kichodung amma Anutuac tiki kic finec? Anutu yengenaoc tiki yomoc yeac anudeac segerema ye ihai ngictau kecma nasoya nasoya tacyac anude, ge nocac imoc kihodung amma hengkecne?

¹⁷ Anutungo dzikacac keretahe tausenga tausenga mehadac. Ye Sinai bangec wama kpetiac womongau emma kecde. ¹⁸ Geng wi sawau yombong emma witicareng witicyunuma wangecyununa arenggau kenggec. Ngic yeneng ubangerecac wiac genggec. O KEBU Anutu, geng ihai kecneac nga ngic yeni geac modzongina tiu yoacga kpeandae, yeni ifingoc ubangerecac wiac genggecde.

¹⁹ Kebungo nasosoc sesehenunuma nanggenunukecde, ye kenehebesonga. Anutu ye memengerecnina. Selac ²⁰ Anutunina ye memengerec mingina nga KEBU Israeac Anutu, ye homecfunac mesinunuudeac mingina.

²¹ Ye ngabafora yeneac oruc kpedzameu ngic mangana mekecma nasosoc kopocsicng-inagoc kecandae, yeneac orucsicngina dzoeagoc hetackeude.

²² Kebungo yofi deec, “Ni ngic imoc Basang bangecfunac merengyunubade nga kondung buya keme kemeunac meyunuma erebade. ²³ Ifi amba ngeni haningina yeneac sacngó nadzicgecde nga kasifocngina tosea ifingoc yemmegec sacngina aberegecde.”

²⁴ O Anutu, hombanggac habuga arenggoc hagec ngicngac yeneng gengecde. Neac Anutu ngictauna habuya arennu hama kpetiac womongau enu ye henggecde. ²⁵ Yegec

heihei areng yeneng waraima wiac kpegec music fingecande, yeneac wisic wisickeau hagec ngacnaroang yeneac tambaringngina kpema botucngina hadae.

²⁶ “Kpebung habutoa manau Anutu kenehebesonga.* O, Israeac fingecsahe, ngeni sasawango KEBU kenehebisia.”

²⁷ Benyaming areng yeneac areng kapiango enara meyemmeu kendae. Yuda arennunac ngictau kekecac areng habutoango kecmagec Dzeburung arenggac ngictauac areng nga Naftari arenggac ngictauac areng yeneac ifingoc modacyunude.

²⁸ Anutu ge kucga kpedzuncnema efaina. O Anutu, ge kucgaac hania warac mekper-agima edzacnununec, imoc monggoc edzacnununa. ²⁹ Womongga Yerusarennu tacdeac ngictau yeneng ubangerecac wiac mehama gendae.

³⁰ Yang hania hania dokuac haseng manau kecandae, ge yeneac yoac ngabasiric dena kate burumaka ngiwa yeneac habunginagoc kenggec ngic yeneac burumaka medaha kapia botucngina kecgec ge gorongina kpebesena.† Geng yeneac memayununa siriwa toseatoa mehama gembisia. Ngic sasawa dzikacac songea negengandae, yeneac yununa singsararang kpebisia. ³¹ Ngic kuneng yeneac Aigita bangecfunac hagec ngic Etiopia bangecfunac yeneac maringina bic miacma Anutuaru hagecde.

³² Bangec areng ngictaunginagoc kecdae, ngeni Anutu yegec heimima Kebu yegecfu yaiyo kpemibisia. Selac

³³ Negenggec, yeng kurumenga kurumenga hanahema fingecgec, yeneac witinginai tacma kende. Ye ubaudumenga miacma kunengngoc yombong kpacde.

³⁴ Anutu ye kuhagoc, imoc deyadibesonga. Yeng ngictauac kucgoc amma Israe ngicngacfora garengyunude. Yeac kuc imoc sawau fedengoc. ³⁵ O Anutu, ge damu damugagoc amma ge kpetiac womonggau kecnec. Israeac Anutu ye ngicngacfora gareng anggecdeac kuc nga sebinginaac kuc yemmeude.

Anutu kenehebesonga, hallelu Yac.

69

Ebic witiau kecduae
Yegecgareng yearu. Yegec kpara Lili dzaring, imocac uba modacma yegec yomoc heibesonga. Dawidingo mitiyegec yofi heiec.

¹ O Anutu, dokungo ubanau erema feracnubeso andeac ebicfunac mesinuna. ² Ni goteng dzohonnu kemebeso anduae, imohai titiseriac wiac mong mi fede. Ni doku dzohong kunennu kemeba doku tunggbauunggo semenuu ³ memeficac kiackecba kucna kpac anu ngorucbonna gbanggede. Ni Anutungo meficnuudeac kicfifi kecbla kicna kundung kpebeso ande.

⁴ Ngic yeneac hania kpacfu ubango ukunudae, yeneac kpete imoc orucdazonaak kpete ferahade. Ngabafocna yeneac homac nga ngic kucnginagoc ikoc amma neac ngadeyoac dema memanganenubeso anggecde. Ni wiac mong hamangec mi meai nga yeneng ine turunga yemmebadeac dekecdae.

⁵ O Anutu, ni kapa ua mekefai, imoc geng negennec nga manganana hania hania, imoc geac kicfu naric mi sufuude. ⁶ O KEBU Anutu, kurumenggac wasaiareng kunengngina, ge negensigugec fora fingerudeac tomai kecdae, yeneac amma ngic yeneng game kpekpeu faiyunubauac kpae heiymmebesena. O Israeac Anutu, ngicngac ge hofocgadae, yeneac amma eweheiheia kpac kecblauac faka imoc kpetaribesena.

⁷ Yeneac ammanoc deendema anenggoc gamenuu imocngko kicmesuna semeu kicmesuna sufukecduae. ⁸ Ngic ogofocna yeneac negennenggec ni monnunac isoc anduae nga dacmunafofocna yeneac negennenggec kuric isoc anduae.

* 68:26: Anutungo meficnuuu nenang bangecngacnec yumia kecbla Anutua kenecyoac debisina, yoac imoc mitikibiu homac fede nga yeng faka imocac negenu ngereeude. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.) † 68:30: Dawidi ye Israe yeneac ngabafocngina Aigita ngic yeneac negensima yoac heima deec.

⁹ Ni amawomonggaac amma herena gerec dzema dzendandannuude nga ge dedenggbaring anggenggec imocngonoc neac witiu enude. ¹⁰ Ni kiacma yaka waba yeni detenic anenggec ¹¹ ubamanganggac wamba heiba desusuic anenggec.

¹² Ngicngac yeni taonggac sobennu tacma ni dedzomoc anenggec ngic doku seria neandae, yeni neac kiki kpema yegec heiandae.

¹³ O KEBU, ni sifu gearu numuduae. O Anutu, geng yoac dedzege amma imoc modackecnec, imocngo mi kpac anudeac amma nasoya hau geng turunga merennembesena. Yoac modac modac Anutu, ge meficnubesena.

¹⁴ Ni goteng dzohonnu kemebaiac meicnuna. Geng negemmana yeni ngabafocna yeneac mariunac mesinuma doku dzohonnunac onggonnubisia. ¹⁵ Doku tunggbauungngo semenubaac kpae heimina. Doku dzohongngo gbokonubaac me tengngo menuma naguya heibaac geng kpae heiyemmena imoc wabisia.

¹⁶ O KEBU, geng yoac dedzege amma imoc modackecnec, imoc gombunga yombong nga ge wosofacga efea kpac, imocac kicmesuga nearu monggoc merenna. ¹⁷ Ge kicmesuga kingang ngicga nearu mi sufubesena. Ebic witiu yombong kecduaeac ge bic yombong turunga merennenna. ¹⁸ Ge neac wegenac hama bummenuma ebicfunac mesinuma ngabafocna yeneac amma witicfunac mesinubesena.

¹⁹ Ngic dedenggbaring anemma game kpekpeu fainugec goiheiheia kpac kecduae, ge imoc negemmana ngabafocna sasawa negengyunudacne. ²⁰ Yeni dedenggbaring anemma herena kpedzamegecak ubaebictoa meficgema kecduae. Ni negemba goa yeneng neac ubangina manganeudeac kic fima mong mi meficyunuma memeseringic hofocyunuma mong mi meficyunuai. ²¹ Yeni wiac marasing manganagoc nebadeac gumecknuma doku aengagoc nebadeac nenggec.

²² Yeneac tatac nasoac nenedoku, imoc geng negemmana botac isoc amma mendangyunubeso nga ogofocnginagoc sesegerec yang negec, imocngo suba isoc amma meyunubeso. ²³ Yeni ge negemmana kicngina kundung kpeu wiac mong naric mi hemma tinicngina nasosoc dendeng kpekecbeso. ²⁴ Ge herebuga yenearu kpakena imoc gerec isoc dzema feracyunuma yeneac witiu feu ²⁵ yeni amabangecngina kisi fingeru ngic monggo yeneac kporucbedzongina mi tacbeso.

²⁶ Geng ngic hanahema yununa yeneng torokpema yunukporac ayemmedae. Geng ngic dzoboya yununa yeneng kpenzengngina monggoc meyadianda. ²⁷ Geng yoacf torokpe torokpe faiyunubesena, yeni geac memengerecfu mi torokpebisia. ²⁸ Geng negemmana yeni kpacngina kekecac kibiunac dzuacbesonga amma ngic dindingac kecandae, yeneac kpacarennu mi kpeturanggebessong. ²⁹ Ni ine ubaebicgoc kecma kpenzeng kpema kecduae. O Anutu, ge memengerecgango ni onggonnubeso.

³⁰ Ni Anutuac kpac kuneng yegecfu yaiyo kpemima ubangerec memima afeheba

³¹ KEBUNGO imocac negenu ngereede. Imocngo burumaka ngiwaac sese ferahama burumaka baiha nga gbongagoc, imocac sese ferahadde.

³² Ngic yeni ogofocngina ebicfu faiyunugec yeneng ubaebicgoc andae, yeninoc imoc hemma ubangerec negembisia. Ngicngac Anutu hofocandae, ngeni herengina kekec-goc monggoc anude. ³³ KEBUNGO ngicngac iwaiac obohokecandae, yeneac nunumu negengkecde, ye ngicngacfora witicamau kecdae, yeni naric mi wayunuude.

³⁴ Kurumeng nga bangec ngeri ye dengereec kondung nga kondung manau wiac sasawa kenghaandae, ngeni ye dengerebisia.

³⁵ Imoc yofiac, Anutungo Siong ebicfunac mesima Yudaac taong fekendaemoc monggoc heigboriyunuma amangina meyemmeude. Yeac kingang ngicngacforango tacngisima bangec imoc mema mingina anggecde. ³⁶ Kingang ngicfora yeneac nambarafocngina yeneng maridzoming dema bangec imoc megec ngicngac yeac kpac kuneng songogoc hoanggeandae, yeni ihai kecgecde.

Ge bic hama mefecnuna

Yegecgareng yearu. Dawidingo nunumuac mitiyegec yofi heiec.

¹ O Anutu, ge hama ebicfunac mesinubesena. O KEBU, ge bic hama mefecnuna. ² Ngic kpebucnubeso andae, yeni geng negemmana game kpekpeu faiyunugec oboc kpoboc ambisia. Nga memanganenubeso ayemmeande, geng yeni memayununa eweheiheia kpac kecma dzigenebisia. ³ Ngic yofi denengandae, “Naric yombong, naric yombong.” yeni yenang gameyunuu dzigenebisia.

⁴ Anu ngicngac ge hofocgudae, yeni geac amma sogaima ubangerec negenggec ngicngac geac memengerecga songogoc hoanggeandae, yeni monggoc nga monggoc yofi debisia, “Anutu ye engenatoa.”

⁵ Ni ine makpekpea amma iwaiac obohoma kecduae. O Anutu, ge nearu bic hana. Ge memeficna nga ebicfunac yungec yungecngicna. O KEBU, ge naso mi ukuma nearu bic hana.

Yada yeneac nunumu

¹ O KEBU, ni geac hoannu hama sufuma kecbade. Ngic yeneng desofoc anembauac nasosoc kpae heiyemmekcma ² fakaga dindingac modacma ebicfunac yungecnuna. Ge kedzacga nearu faima ebicfunac mesinuna. ³ Geng neac hoc peperandzi seria nga sufu sufuamana amma ama seria anembesena. Ge neac hoc peperandzi seria nga amana seria annecac yoac edeyununa ebicfunac mesinubisia. ⁴ O Anutuna, ge yarengic yeneac mariunac mesinuna. Ngic singkpekpe nga godzungic menugec geng maringinaunac mesinuna.

⁵ Kebu, ni negen negensinna gearu faiba fora fingerudeac tomai kecduae. Ni hana-hema sebigbori kefai kecma yaguc, imoc KEBU negenseriguma kecduae. ⁶ Ni nonggo heremanaunac mi fingecmangoc, imohacnac geng naggenuna kefai nga gennoc nonggo heremanaunac mefecnunc. Ni nasosoc ge yaiyo kpegembade. ⁷ Neac kekecna imoc ngic homac yeneac kicfu wiac kengehagoc yombong nga gombunga kpac, ifi isoc angande, fora. Nga ge sufu sufuamana seria. ⁸ Enacnau geac dedengerecngo wakeu asoacnac kemma marai ge eweheihei anggembade.

⁹ Ni ngickpengeng ambade, nassio imohai ge mi ukunubesena nga kucna kpac anu ge ngadenuma mi wanubesena.

¹⁰ Ngabafocna yeni neac yoac dema kpebucnubeso amma kpedzucnema denengeng amma ¹¹ yofi deandae, “Anutungo ngic imoc ngadehema wamanu mongngo naric mi onggonggeudeac nenang ngic imoc kisamma kemma meni.”

¹² O Anutu, neac hereau yombong mi kecbesena. O Anutuna, ge bic hama mefecnuna.

¹³ Mesunau nuandae, yeni geng negemmana game kpekpeu faiyunugec kpac ambisia. Ngic memanganenubeso andae, yeni desofoc ayemmegec goiheiheia kpac kecbisia.

¹⁴ Ni sifu nasosoc ge negensiguma fora fingerudeac tomai kecma monggoc nga monggoc dengeregubadeac anende. ¹⁵ Enacnango fakaga dindingac edeyunuba geac memengerec uagaac kpetengo engena anu imoc naric mi osobade. Ni asoacnac kemma marai imoc dekperagibade.

¹⁶ O KEBU, Israeac Anutu, geng ua kuhagoc mekecnec, ni hama imoc dekperagibade. Ge faka dindingac mingina, imocac ohec megembade.

¹⁷ O Anutu, ni sebigborinaungoc kecba geng wiac edekpou anennec nga ni nassio yofinenggac kucfakaga wiac engena hemma dekperagima kecduaengoc. ¹⁸ O Anutu, ni kpengeng yegbonnagoc ambade, ge imohai ifingoc mi ngadenuna amma mi wanuna. Ge nigoc kecmana fingecsahe hakecgecdesoc, yenearu ifingoc geac kucfaka engena dekperagiyemmebade.

¹⁹ O Anutu, geac fakaga dindingac imocng wi engkecma kurumenga kurumenga kpesereyunuude. Geng wiac engena mema kecne. O Anutu, ge isoc mong mi kecde.

²⁰ Geng negemmana ebic nga wiac mangana homac fingecnenu henai nga gennoc megborinuma kekec monggoc nennade. Ge bangec keme kemeaunac monggoc hes-icnuna erebade. ²¹ Ge kpacna meyadina imoc eweheiheigoc monggoc anude nga ge monggoc meserinuna herena nomaneude.

²² O Anutuna, ge yoac modac modac Anutu. Ni gitana kpema udumeng gombunga megembade. O, ge Israeac kpetiac ngic, ni gita kpema afeguma ²³ dedengerec yegec heigemma enacbibicnango sogaima arohobade. Ge ubaongana ebicfunac mesinec, imocac dengeregubade. ²⁴ Ge faka dindingac amma meficnunecac nedzarannango asoacnac kemma marai imoc dekperagibade. Nocac ngic memanganenubeso anggec, ngicngac yeneng yelinoc game kpekpeu faiyunuma wayunugec yeni goiheiheingina kpac anggec.

72

Ngictauac amma numubesonga

Ngictau Saromongngo yofi numuec.

¹ O Anutu, ngictau ye geac desi desifikaga dindingacgoc kefudeac derecgemina. Ge ni, ngictauac medac, fakaga dindingacgoc ambadeac derecgenenna. ² Ge ifi anna yeng faka dindingacfou ngicngacfocga yoacngina desibeso nga sing dindingac modacma makpekpea yoacngina desibeso. ³ Tiki yeneng ngicngac ruae meficgeyemmebisia nga fagang yeneng dindingac kekecac fora meficgeyemmebisia.

⁴ Ngictauac ngicngacfora tosea makpekpea kecdae, yeni yoacfou nanggeyunuma yoacngina deu firang ambisia. Nga ngicngac iwaiac obohoma eng kecdae, yeni meficyunuma wiac yemmebeso. Ngic monggo ngicngac ogofora ebicfu faiyunuu ubaebicgoc kecgec ngictaungo hemma kpedzameu kuha kpac ambeso. ⁵ Wenacngo feengkefude, ye imoc isoc kekec herea kecbeso. Nga afo fekefude, ye ifi isoc fekecma ngicngac fingecsahengina fekefudesoc kecbeso.

⁶ Neni semeng uanina mengereni kiango imohai heiande, ye semeng ua ifia isoc amma kiango bangecfu heiu dokuyagoc angkecde, ye bangec ifia isoc ambeso. ⁷ Afo imoc nasosoc fekefude, ifi isocngoc ngictauac nasou faka dindingac sabayagoc amma ruae kunengtoa fefeseri fekecbeso.

⁸ Ngictau ye kondunga kondunga tegiau nga Eufrate dokutoa hanahema bangec tegiau wisickede, bangec imocac mingina amma imoc garenggebeso. ⁹ Ngabafora bangec kisiu kecandae, yeni yeac kicfu ngonducnema sendung nedzarangnginango aberebisia.

¹⁰ Tarasis bangec nga nuha nuha bangecnina fekendae, imocac ngictau yeneng yeac ubangerec wiac mehama ye mibisia. Arabiaac Saba bangec nga Etiopiaac Seba bangecac ngictau yeneng ifingoc ubangerec wiac mehama ye mibisia.

¹¹ Ngictau sasawa yeneng yeac kicfu ngonducnegec bangec monnunac ngicngac yeni sasawango yeac kingang kpemibisia. ¹² Imoc yofiac, ngicngac iwaiac obohoma kecandae, yeneng ye kpacgec yeng ebicfunac mesiyunuude nga ngicngac makpekpea nga memeficngina kpac kecdae, yeneng kpacgec yeng ebicfunac mesiyunuude. ¹³ Ye ngicngac kucmama nga iwaiac obohokecdae, yeneac uba mangang negemma iwaiac obohokecdae, yeneac kekec onggonggeude. ¹⁴ Ye yeneac sacngina negenu engena angkecdeac amma ngic yeneng yarefaka amma ogofocngina ebicfu faiyunugec ubaebicgoc kecgec yeng ebicgoc yeneac kekecngina bummemba ebicfunac mesiyunuude.

¹⁵ Ngictau ye naso hereangoc kecbeso. Arabiaac Seba bangecfunac ngicngac yeneng gol mema ye mibisia. Yeac tatahoc numuma asoacnac kemma marai ye kenehebesonga.

¹⁶ Bangecfu semeng homac fingeru ngicngac yeneng monggoc yakaac mi obohobisia. Semeng imoc tiki buma bumau mekemmeha amma Rebanong bangec isoc ambeso. Taong sasawa fekendae, ngicngac yeneng imohai kecdae, yeni kpindzingngo manennu sabayagoc yombong angande, ifi isoc ambisia.

¹⁷ Ngictauac kpac kuneng imoc nasoya nasoya feengkecbeso. Wenacngo tatacseri takecde, ifi isoc yeac kpac kuneng deyadigec nasoya fekecbeso. Yeng bangec

monnunac ngicngac sing meficgeyemmeu yeni kenecnginagoc amma yofi debisia, “Ye kenehagoc.”

¹⁸ KEBU kenehebesonga.* Israeac Anutu yengsac kucfaka engena mekefu neneng imoc negenni wiac engena ande. ¹⁹ Yeac kpac kuneng imoc kuc nga kibikperagiagoc, imocac nasoya nasoya ye kenehebesonga. Yeac kuc nga kibikperagiango bangeha bangeha sokodabeso. Imoc fora nga fora yombong.

²⁰ Isaiac medac Dawidi, yeac nunumu yofi wisickede.

MITIYEGEREC KIBI 3

73

Mitiyegec 73-89

Anutuac hoannu kekec

Asafango mitiyegec yofi heiec.

¹ Foracngoc, Anutungo Israe areng faka gombunga ayemmeude. Ngicngac uba konghaha amma ikoc nga hamangecngina kpac kecandae, yeni faka gombunga ayemmeude.

² Ni ine hanina pososoc anu tifainggema manubeso anec. ³ Ngic yoackpekpe angandae nga ngic Anutu ngadephema mangana mebeso ayemmeande, yenemba yeni naric kecma wiac monggac mi obohogec, imohai keracmangang anai. ⁴ Yeni kpendzengngina kpac eng kecma sebingina kuhagoc anu kucmamea kpac kecgecde. ⁵ Ngicngac goa yeni ebicgoc kecandae nga ngic imoc yeneng ine ifi isoc mi kecgecde, kpac. Ngicngac goa yeni kpendzeng kpema kecandae nga ngic imoc yeneng kpendzenga kpac kecgecde.

⁶ Imocac amma yeni yenanggac negenggoc wiac engena angkecde, faka imoc kubu isoc ubahema godzufaka ngakpingina isoc heigecde. ⁷ Yeni herenginau negen negeng sicsauc hania hania dzacgoc fema ereu kichabungina ngopic amma yadiande. ⁸ Yeni deendema ayemmemma yoac mangac manganea dema ngicngac ebicfu faiyunugecdeac ngabasiricfu yoac degecde. ⁹ Yeni enacbibicnginango kurumeng demanganema nedzarangnginaunac yoacngo bangec ferecgema kenude.

¹⁰ Imocac ngicngac yeni yeneac hoannu kemma yoacngina imoc doku neandae, ifi isoc efea kpac negebec amma ¹¹ yofi deandae, “Autungo wiac imoc naric mi negenude. Anutu Engenatoa ye wiac ifia naric mi negenude.” ¹² Negenggoc, ngic mangana yeni ifia. Yeni nasosoc wiac monggac negengyohoha kpac kecma hiedzongina meyadigecde.

¹³ Foracngoc, herena garenggeba kongaha feec, fakana imoc uaya kpac yombong anec. Ni kopocsicna kpac kecma marina duacba wononga kpac anec, fakana imoc uaya kpac yombong. ¹⁴ Kebungo numengere anengkefu ni asoacnac kemma marai kpendzeng kpekecma asoacsoc kopocsicac amma numengere anenggoc. ¹⁵ “Ni yoac ifia dekecbade.” Ni ine ifi debai dede nambaracfocgaac areng tobangyunuma ikoc ayemmemma wayunubai. ¹⁶ Nga manganango kuhagoc fekecde, ni wiac imocac hania negentegecbadeac uaya mema negemba osiec. ¹⁷ Amma ni ngade Anutuac womonnu emma noc wiacngo wisickeau fingecyemmeude, ni imohainoc negentegerai.

¹⁸ Foracngoc, ge ngic ifia bangec gbfiringau faiyunuma kpetotieyununa kpac andacgecde. ¹⁹ Yeni bic yombong manganema kpac anggecde. Yeni kengectoa amma kpidohogec wiac imocnggo meicyunudarude. ²⁰ O Kebu, ngicngac gau hemma yacma imoc nigecyunuande, yeni ifi isoc. Geng yacma yeni gauac siric andae dema wayununade.

²¹ Ubaonganango negenghodungaiba imocnggo herena biring isoc nendanggeu ²² ni ubafong amma negen negenna kpac kecma yang yeneng memanganeyunuandae, ni ifi isoc geac kicfu ubakpekpe anggenai, fora.

²³ Amma ni sifu gegoc kecba geng marifoinau menunade. ²⁴ Ge dederecgeyoac nemma garenneukecna wisic wisickeau goheihei anemma heitainuma hoannunade.

²⁵ Kurumennu geng neac areng angkecnec, mongngo kpac. Ni bangecfu ge

* 72:18: Anutungo meficnunu nenang bangecngicngac nec yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereeude. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

meficgubadeac anende, wiac monggac mi anende. ²⁶ Sebina nga woubocna yeri kucngira kpac ambeso angandapeu dede Anutu geng neac woubocnaac kuc amma ge nasoya nasoya neac Anutu kecnec.

²⁷ Foracngoc, geac hereau kecanda, yeni kpac anggecdé nga ngicngac geac kicfu faka forau mi kecanda, ge yeneac kekec herecgena kpac anude. ²⁸ Nga ni Anutuac wegenac kecba ngereede. Ni KEBU Israeac Anutuac hoannu kemba yeng neac sufu sufuamana amma onggonuma kecde. Ni geng wiac sasawa annec, imoc desahebade.

74

Hadzing nga toforec yeri geac

Yegec yomoc masiki uba modacma heibesonga. Asafango yegec yofi heiec.

¹ O Anutu, ge nocac wanunuma ukunudacnec? Rama habufocga geac bangecfu kecdimbe, ge nocac herebugango nunuma hosuc isoc kporacnununc? ² Ge kpebung habufocga warac yombong menununc, imoc negenna febeso. Neni geangga maridzoming ngicngac areng annideac geng bummenunuma ebicfunac mesinununc. Geng Siong tikiu tacannec, imoc negenna febeso.

³ Ngabafocnina yeneng kpetiac womongga kpetotiedacgec amabangec sesuhasac amma ifi feengkefude, ge hama imoc hembesena. ⁴ Ngabafocga yeni amabangecga kpetiacfu hama kunengngoc arohoma yenang onga hania hania ihai faigec tacde.

⁵ Yeni nagu wi tacde, imocacsing hama wiac icngo memea imoc nakango heima hembarackedacma ⁶ onga marikibi gombunga icngo memea, imoc naka nga hamango hedzamedacgec. ⁷ Yeni womongga faigec dzema bangecfu maec amma geac kpac kunenggac amagerec, yeni imoc heidzadzu kpema kpedzamegec bangecfu mau ⁸ negemma degec, "Memayunuyombonggenide." yeni ifi negemma bangecninau Anutuac kpekpeturangama fekenda, imoc sasawa faigec dzedarec.

⁹ Anu geac faka bibiagoc hengandimbe, imoc monggoc mi hengandimbe nga profete mongngo mi kecde. Ebic imoc noc nasoac kpac anude, imoc nenearunac mongngo mi negende. ¹⁰ O Anutu, ngabafocnina yeneng naso dafiguc detenic anggenggecde? Ngabangic yeni nasoya nasoya geac kpac kuneng ngadeheanda, imoc mi ngereede.

¹¹ Ge onggongyunuma marigango mi meyununc amma marifoiga segerekcne, imoc mi ngereede.

Ge mariga monggoc mi mesufuma mariga sinema memanganeyununa kpac ambisia.

¹² O Anutu ngictauna, gennoc waracngoc kecma kecnecngoc amma ge bangecfu yagucngoc memengerec ua mekecne. ¹³ Anutu ge kucgango kondung kperecgina yohockang anec nga ge doku dzohonggac wasaiyang orucngina kpedzameyunc.

¹⁴ Rewiatang ye wasaiyang oruha homac nga gennoc yeac oruha sasawa kpedzamedacma sebia imoc bangeckisiac yang yeni gumeyununc. ¹⁵ Geng doku kiwa nga doku tunggbuang singngina kpendzicna yeni fingecma hakecdae. Ge doku fefeseri hakecgec yeni singngina hedzickena gbanggedacgec.

¹⁶ Hadzing nga toforec yeri geac. Geng kperagia amma wenac tatacngirau warac faiyuruna seria nandape. ¹⁷ Ge bangecac ma faima meseriyunc. Geng wenac nga kia naso meficyurunc.

¹⁸ O KEBU, ngabafocga yeni ngadeguma deendema anggenggec ngic negengngina kpac, yeni geac kpac kuneng demanganeanda, imoc negenna febeso. ¹⁹ Ni geac kebesac neng isoc anduae, ge kebesacgaac ubaonga onggonggena wasai yang yeneng mi menubisia. Ge ngicngacfocga makpekpea kecda, yeneac kekec nasoya nasoya mi nigecgubeso.

²⁰ Bangec noboc noboc kundung kundung imoc godzufakango mewakeu homac fede. Ge dzadzahac menec, imocac negensikebesena. ²¹ Ngicngac yeni ngicngac ogofocngina meenti memati ayemmemma game kpekpeu faiyunubauac kpae heiymenna ngicngac makpekpea nga iwaiac obohoma kecanda, yeneng geac kpac kuneng heiwayong memibisia. ²² O KEBU, ge yacma geangga yoac nanggebesena. Ngic mangana yeneng

asoacnac kemma marai geac dedzomoc angandae, imoc negenna febeso. ²³ Ngabafogca yeneng kunengngoc arohogec, imoc mi nigecguu yeneng nasosoc yoackpekpe kunengngoc kpekecdae, ge imoc mi nigecgubeso.

75

Ni monde mondene kpac

Yegecgareng yearu. Yegec kpara Mi kpetotiebesena, imocac uba modacma yegec yomoc heibesonga. Asafango mitiyegec yofi heiec.

¹ Anutu, geac kpac kuneng wegenac fedecac amma ge ohec megendimbe. Ngicngac yeni kucfakaga negenggec wiac engena angkecdeac imocac yoacsiduc deandae.

² Ge yofi denec, “Ni monde mondene kpac nga kecma naso mong faiba hau faka angammemengina isinggema desibade. ³ Bangec nga bangecfu ngicngac kecdae, yeni imohai goroc goroc amma kockpac anggecde. Ni neannaoc bangecac wotungtoa meseriyunuma nanggeyunuma kecduae.” Selac

⁴ Ngic yeni yenanggac negenggec wiac engena anu yoac homac osoandae, yeneac yofi debade, “Ngeni ngenanggac negenggec wiac engena angkecde, yoacngina imoc wadacbisia.” Nga ngicngac Anutu ngadehema mangana megecdeac ayemmeande, yeni yoac yofi edeyunubade, “Ngeni kucngina mi miacbisia. ⁵ Ngeni kucngina wi kurumen-nugeng miacma ubangina meemma yoackpekpe kpeandae, faka imoc wadacbisia.”

⁶ Imoc yofiac, ngic mong ye wenac ere eraunac me wenac keme kemeauanac bangec kisiunac haude, ye ngic ogea miarudeacsoc mi ande, kpac. ⁷ Anutungo desi desi ua mekecma ngic mong memama ngic ogea miarude.

⁸ KEBUNGO mariau kpakenec mong menande, imocac manau Anutuac ngabaac waing faifaia, imoc wiac homunagoc yerec yerecgea kporoc tima wake wakea fede. Ye imoc bangecfu kpakedaru ngic Anutu ngadehema mangana megecdeac ayemmeande, yeneng doku mangana imoc hafoangoc nedacgecde.

⁹ Ni nasosoc sogac sogaigoc kecma Yakoboac Anutu yegec heimima dengerebade.

¹⁰ Ngic Anutu ngadehema mangana megecdeac ayemmeande, minginango yeneac kucngina meickeu kpac anu ngic dindingac yeneac kucngina monggoc meenude.

76

Geac kengectoa negembesonga

Yegecgareng yearu. Gitakurere nga noc kpema yegec yomoc heibesonga. Asafango mitiyegec yofi heiec.

¹ Yuda bangecfu Anutu negengkecdae nga Israe bangecfu yeac kpac kuneng heiwayong memigecde. ² Yeac bedzo tatahau faigec Sareng bangecfu tacde nga amagereha Sionnu faigec ³ ye imohai kecma tebemedaha piratac isoc hagec, imoc kpetackema dzikacac kasu nga beang nga noc, imoc sasawa kpetackedarec. Selac

⁴ Anutu, geac kuc nga kibikperagi, imoc wiac engena. Tiki yeni wiac engena amma herea herec yeneng nasoya nasoya fekecdae, ge ngictau kucgagoc engena yombong, imocng yeni feracyunuude. ⁵ Ngic ubaherengina kuhagoc kecanda, yeni serima kecma iuai dzikacfu megec goa yeneng firang amma yenang wiacngina wangecyunugec. Ngic kucnginagoc yeni todinggema mama homema fegec nga wasaingic yeni maringina miacgecdeacsoc mi anggec.

⁶ O Yakoboac Anutu, ge yoac seria ngabasiricfu edeyununa becosi nga ngic witiau tacma kisangyunuandae, yeni mayunu homema fegec. ⁷ Geac kengectoa negembesonga. Ge herebu negemmana ngic mongngo geac kicfu nanudeacsoc mi ande, imoc kpac yombong. ⁸ Anutu, ge kurumenga kurumenga fekendae, imohai tacma imohacnac desi desyoacga dena bangecngo kengec amma waickeec. ⁹ Ge foraya dede nasoya fainadeac yacnec, imohai ifi fingerec. Ngic yeni ngic ogofocngina ebic maficgeyemmegec yeneng ubaebicgoc kecgec geng ebicfunac mesiyunudacnadeac hanec. Selac

¹⁰ Bangecngic yeneac herebu, imocng ge dengereguude. Ge herebuac tosea kebanggau dzegena dzikacac wiacga ande.

¹¹ Ngeni KEBU Anutunginaac kicfu yoacngina deserima imoc modacbsia. Bangec monnunac ngicngac yerecgema kecdae, ngeni Anutuac kengec amma ubangerec wiac mehama mibisia. ¹² Nocac yeng ngictau medacfocngina yeneac onganginaac kuc meickema bangecac ngictau kengectoa meficgeyemmeude.

77

Ebic nasou Anutu numumini

Yegecgareng yearu. Yegec kpara Yehudutung modacma heibesonga. Asafango mitiyegec yofi heiec.

¹ Ni Anutuaru kunengngoc kpacduae, Anutungo negennudeac seriangoc kpacba. ² Ni ebicasou Kebu meficgebadeac uatoa mekecma tofocnac kucmamea kpac kecma marina Kebuaru miackeba ubaonganango memeseriac memefic naric mi meude.

³ Ni Anutu negensiba asoringa anenu ye hennegeng amma negensikeba ongana ebiriude. *Selac*

⁴ Geng kicna tapea miacna gauya kpac kecba herenango ebic meficgedeac enacnaunac yoac mong naric mi ereude. ⁵ Ni naso bicngoc feec, imoc negensima kecba kifa bic wisickeec, imoc negemba fede. ⁶ Ni yegecna negemba fede, imoc tofocnac negensiba asunango negengising anu herenango imoc hennegeng amma negensiude.

⁷ “Kebu ye nasoya nasoya wanuma gombunga monggoc mi anenude.” ni negengyohoc amma ifi negemma kecduae. ⁸ “Yeng yoac dedzege amma imoc modacke, fakaya imoc yaguc kpac amma nasoya nasoya kpac andarude. Nga ye yoac deserima deec, imoc yaguc kpac anu nasoya nasoya kpac andarude.” ifi isoc ande.

⁹ “Anutungo wosoefac anemmeande, imocac nigeckpeec nga ubamangang anemmeande, fakaya imoc ngaba amma kpaе heimie, ifi isoc ande.” *Selac*

¹⁰ Ifi negemma yofi deai, “O Kebu Engenatoa, ge mariga warac angkefec, ifi isoc monggoc mi amma siriha merennecac ubahodunggoc kecduae.”

¹¹ KEBUNGO faka warac meec, imoc negensibade. Oc, geng warac kucfaka bibiagoc menec, imoc negen negennau faiba fekefude. ¹² Geng ua sasawa medacnec, imoc hennegeng amma negensikeba geac kucfakaga engena, imoc ubangerecgoc negensima kecbade.

¹³ O Anutu, geac sing imoc kpetiac. Nemu monggo Anutunina mi feraheude, kpac.

¹⁴ Anutu ge mocgungo kucfaka bibiagoc mekecnec. Ge kukuaga ngicngac areng botucnginau mena yeneng imoc bic henggoc. ¹⁵ Ge mariga kuhagocngo ngicngacfogca Yakobo nga Yosefeac gboricfora bummeyunuma ebicfunac yungecyununec. *Selac*

¹⁶ O Anutu, doku nga dzohong yeneng warac gemma kengec anggec. Bangec manau keme kemeango gemma dendeng kpeec. ¹⁷ Hoeng yeneng doku kpakegec sawango gbururung heiu tebemedahango piratac heima noboc noboc kpesaie. ¹⁸ Firang kunengng amabangecheimerenu imocac manau geac gbururunggac udumengtoa fingerec. Geac piratacngo bangeha bangeha mekperagiyunuu bangecngo kengec amma dendeng kpekecfec. ¹⁹ Geac sing imoc kondungtoa dzongiau kenu singbisicga imoc kondungtoa manau tima kenganne, fora. Nga haniga ongea sifu mi hening.

²⁰ Ge ngicngacfogca Mose nga Arong yereac mariu faiyununa yereng rama isoc heitaiyunuma wangecyuuo.

78

Ngicngacfogca waraiyemmekecfec

Yegec yomoc masiki uba modacma heibesonga. Asafango yegec yofi heiec.

¹ Ngicngacfogca, ngeni neac kpoukpouac kedzac faigec enacnaunac yoac mau kedzac faima negembisia. ² Ni yoac heima deba, imoc enacnaunac maudeac ande nga wiac warac kundunnu sufuya feec nga wiad ngade fingebebesande, imocac yoac debade.

³ Esangabofocnina yeni warac yoac degec, imoc kedzacngo negening nga imoc negen negenninai fede.

⁴ Neni nambaracfocninango imoc negenggecdeac wiac mong naric mi mesufunide nga fingecsahenina ngade feengkefude, yeni edeyununide. KEBUNGO kuc nga kibikperagiagoc kecma uatoa meec, imoc edeyununide. Nga yeng kucfaka bibiagoc mekefec, imocac siduc ayemmenide.

⁵ Kebungo Yakoboac areng dederecgeyoac yemmema edeyunuma kpouyemmeec nga Israe habu dedeseriyoac yemmema edeyunuma kpouyemmeec. Ye esangabofocnina yeneng nambaracfocngina edekpou ayemmegecdeac edeyunuec. ⁶ Fingecsahe ngade feengkefude, yeneng imoc negenggecdeac negenec. Nga nambaracfocngina mi fingecgecngo ngade fingecgecde, yeni imoc negenggecdeac edeyunugecde.

⁷ Ifi anggec yeneng Anutu negensima fora fingerudeac tomai kecma yoacngina negemma Anutuac kucfaka bibiagoc mi nigecyunubeso. Yeni yeac nonoyoac tofohoma kecbisia.

⁸ Yeni mangesafocngina yeni isoc ambauac ifi anec. Mangesafocngina yeni serima kecma yoackpekpe areng amma herenginango ye seria mi modacgec nga asunginango Anutu wama kecgec.

⁹ Efaraingga areng tebe mema kecma dzikac nasou dzigenema woragec. ¹⁰ Yeni Anutungo dzadzahac meec nga yeac dedeseriyoac mi modacma wadacgec. ¹¹ Yeng wiac bic meec nga kucfakaya bibiagoc edzacyunu kicnginango imoc henggec, yeni wiac imoc nigecyunudarec.

¹² Ye Aigita bangecac Dzoang yeneac bangec nobohau esangabo yeneac kicfu kucfakaya bibiagoc meec. ¹³ Ye kondung kperecgeu doku tegecma yohockang amma noboc noboc emma serima nanu yeng sing faiyemmeu yeni botuhau ferecgema kenggec. ¹⁴ Yeni wenacfu hoengngo waraiyemmemma hesicyunuec nga tofocnac gerecak kperagingo mekperagiyunudarec.

¹⁵ Ye bangec kisiu hoc kpendziru keme kemeunac doku efea kpac ereu imoc gumecyunuu nekecgec. ¹⁶ Ye doku hocfunac kpeu dokungo dokuuzuamagoc maande, ifi isoc mama feec.

¹⁷ Ngicngac yeneng imoc henggec, fora. Nga yeni ine yeac uba kpema kopocsic mong-goc meficgema bangec kisiu Kebu Engenatoaac yoac kpekecgec. ¹⁸ Yeni songongina yaka siriha monggac ayemmeu imocac serima dekecma Anutu igockema ¹⁹ yoara kpema degec, "Anutungo bangec gbangge gbanggea yomohai yaka meficgenemmeudeacsoc mi ande, kpac. ²⁰ Foracngoc, ye hoc kpendziru dokutoa nga doku tungbaung endzirango mama feec. Nga yaka ine naric mi nemmeude, kpac. Ye ngicngacfora yang naric mi meficgenemmeude."

²¹ Imocac amma KEBUNGO yoacngina negemma herebu kuneng yombong negemma Yakoboac areng yenereudeac gerec mong fiu dzeu ngabayango Israe yenearu fingecma feec. ²² Yeni Anutu mi negensinggema ye ebicfunac mesiyunuudeac kuctoa femide, imoc mi negenserigec, fora.

²³ Nga ye sifu hoeng wi sawau edeyunuma kurumenggac nagu witiu ²⁴ uaya meu manna yakango kia isoc witinginai mau ngicngac yeneng negecdeac yemmeec. Ye kurumenggac yaka yemmeu nekecgec ²⁵ yaka efea kpac faiu mau nema kecgec. Bangecngicng angero yeneac yaka nekecgec.

²⁶ Nga yeng kurumenga kurumenga imohai wenac ere ereaunac firang mong sing meficgemima sueu haec. Ye kuhagocng saot bigeng imocac firang mong ameaunac hesickema hau ngadeau haec. ²⁷ Hau sendung homac angande, ye ifi isoc yang homac ukoo kia isoc maec. Neng kpegangnginagoc yeni kpetengina kondunggac sangi isoc anec, yeni kia isoc magec. ²⁸ Yeng negemmanu neng yeni ngicngac bedzongina mema nandacgec, imohai mama tacgec. ²⁹ Ngicngac yeni songonginango noc wiac anu derecgeg, imoc yemmeecac ngicngac yeneng neng imoc nema negebec anggec.

³⁰ Songongina imoc mi wisickemanu yaka enacnginai femanungoc ³¹ Anutungo ine ngaba ayemmemma ngicfoocngina kucnginagoc kecgec, yeni kpebucyunuec. Israeac

arengfora yeneng semeng sabayagoc isoc kecgec, yenemma memayunuma kekecngina herecgeu kpac anec.

³² Ye wiac sasawa ifi anu yeneng ine kopocsic maficgemangoc kecgec. Yeng kucfakaya bibiagoc mekefec, imoc fora. Nga yeneng ine imoc wama mi negensinggegoc. ³³ Ifi anu ye kekecac wenacnaso faiyemmeec. Imoc naso mocgu asu taigec kpac angande, naso ifi faiyemmeu kpac anec. Yeni kengectoa amma kpidohoma ubaebicgoc kecmagec kifangina kpac anec.

³⁴ Nga Anutungo yunukpebuc anec, yeni naso imohaingoc ubamereng amma hereng-inango hofocma ye modacgec. ³⁵ Anutu ye yeneac hoc peperandzi seria nga Anutu Engenatoango bummeyunuma ebicfunac mesiyunuec, yeni imoc negenggec feec. ³⁶ Nga yeni enacnginango ine kerecyoac ammima nedzarangnginango ikocyao ammigec.

³⁷ Yeni herengina yearu seria mi feu yeac dzadzahac imoc faka forau mi modacgec.

³⁸ Yeni kopocsicnginagoc kecgec, forangoc, nga yeng sifu yeneac ubea manganeu manganangina wama mi kpetotieyunuec. Ye naso homac ngabaya dzegema herebuya erebacac imoc kpetarimie.

³⁹ Yeni bangecngicngacsac, ye imoc negenu feec. Yeni ngicngo asu taiu erema kemma monggoc mi dzigeneande, yeni ifiasac.

⁴⁰ Yeni bangec kisiu kecma naso homac yombong yeac kpema bangec gbangge gbanggeau ubaebic fingecmiudeac ammigec. ⁴¹ Ifi ammima Anutu monggoc nga monggoc faitobannu faima Israeac Kpetiac Ngic heremiac miac ammikecgec.

⁴² Ye kuc mingina, imoc mi negensigec nga yeng ngaba yeneac mariunac bummeyunuma mesiyunuec, wenac imocac mong mi negensigec. ⁴³ Ye Aigita bangecfu ngic yeneng negensinggegocdeac kucfaka mi hengena maficgema Soang manennu kucfakaya bibiagoc hania hania mekefec, yeni naso imoc mong mi negensima kecgec. ⁴⁴ Yeng dokutoangina merenu sac andacgec yeni doku imohai negecdeac osigec. ⁴⁵ Mogoc enaragoc areng kuneng yombong sueyunuu botucnginau hama neyunudacgec nga sepeng homac sueyunuu kpetotieyunugec. ⁴⁶ Ye semengngina kpembong gumecyunuu nedacgec uanginaac semeng imoc ipua gumecyunuu nedacgec. ⁴⁷ Ye nomanggbomea kia isoc faiu waing uanginau mama imoc kpetotieu kpac andaru nomang sueu nomangngó figi icnginaac gbomea dzedarec. ⁴⁸ Yeng negemmanu nomanggbomea kia isoc burumakanginaac witiu mama memanganeyunudaru gbumparandang kiafirangagocngó rama nga noning memanganeyunudarec.

⁴⁹ Yeac ngaba imoc gerec dzeande, ifi isoc dzeu ye witiha mesiu yenereec. Ye herea buu mangananginaac amma ubea hodungaiu ubaebic kuneng mema kpetotie uaac angero habunginagoc sueyunuu hagec. ⁵⁰ Ye herea buu imocac singa maficgema homefunac mi onggongyunuec. Ye kekecngina homeac kpa mi faima hafei manganaac enarau faiyunudarec. ⁵¹ Ye Aigita yeneac warac nambaracfocngina kpebucyunudarec. Ye Hanggac esangabo kporucamanginau kecgec, yeneac kucnginaac waracmedacfocngina sasawa kpebucyunudarec.

⁵² Imoc wisickeu Anutungo ngicngacfora meyunuma rama wangecyunuma waraiyemeandae, ifi isoc waraiyemmemma kenec. Ngic yeneng bangec kisi dokuya kpacf u rama-habu hesicyunuandae, ifi isoc wangecyunuu kenggec. ⁵³ Ye yenenggareng ayemmemma onggongyunuma hesicyunu yeni kengeha kpac kecmagec kondungngó ngabafocngina semeyunuec.

⁵⁴ Ye meyunuma yengena bangec kpetiacfu kenec. Ye firang amma ngabafora fera-cyunuma yengena marifoiaac kuhango tiki imoc warac firang amma meecac ngicngacfora imohai meyunuu kenggec. ⁵⁵ Yeng yeni hagecdeac amma bangec monnunac ngicngac Anutu mi negemmidae, yeni kporacyunuu kenggec bangec imoc Israe habu medereyemmeu yeni amagerecngina ihai feudeac kporucbedzocnginau faiyunuu tacgec.

⁵⁶ Ye ifi anec, fora. Nga yeneng ine Anutu Engenatoa tobanggekecma yeac yoac kpekecma dederecgeyoac mi modacma eng kecgec. ⁵⁷ Yeni mangesafocngina warac angkecgec, ifi isoc Anutu wama ye mi negensinggegoc. Ngic yeni tebe gbaring

gbaring kpesaigec dindingac mi kengande, yeni ifi isoc ihai nga ihai kenggec. ⁵⁸ Yeni nemu yeneac arata hania hania tiki bumau meyunuma Anutu woseau mema ngaba maficgemima nemunginagoc kecma yeac keracmangang maficgemigec.

⁵⁹ Anutungo imoc negemima herebu kuneng fingecmiu Israe habu wayunudarec. ⁶⁰ Ye amagereha Siro fekefec, imoc wama kporucbedzoya ngicngac yeneac botucfu tarec, imoc ifingoc wama ⁶¹ kuhaac katapa wama ngaba yeneac mariu faiu yeneac witicamau feec. Yeng kuc nga kibikperagia wama ngaba yeneac mariu faiu feec. ⁶² Ye maridzomingfora herebu negengyemmemma ngicngacfora wayunu ngic yeneng dzikacac beangngo kpebucyungec.

⁶³ Gerecngo sebigbori medacfocngina yonohou homegec naroangfocngina nigha kpac kecma memeturanggac yegecngina mong mi heigec. ⁶⁴ Ngic yeneng womong garengfocngina dzikacac beangngo yunuma kpebucyunu enengfocngina yeni kiac ubamangang anggecdeacsoc mi anggec.

⁶⁵ Anu ngicngo gauunac yacandae, Kebungo ifi isoc amma yarec. Ngic seria mongngo waing dokuac kucfu arohoande, ye ifi isoc arohoec. ⁶⁶ Ye ngabafora yunuma firang amma game kpekpeu faiyunu nasoya nasoya ifi kecgecde.

⁶⁷ Ye Yosefeac kporucbedzo ngadehema Efarainggac areng mi meisngema ⁶⁸ Yuda areng meisnggeec. Ye Siong tikiac songo negendeac imoc meisngema ⁶⁹ womong kpetiac meec imoc kurumenga kurumenga wi fekendae, yeni isoc anec. Ye bangec maficgema faiu feengkefude, womonga kpetia ifi isoc meec.

⁷⁰ Ye kingang nigha Dawidi meisngema rama odaunac meu haec. ⁷¹ Ye Yakoboac areng garengyunuma yeng waraiyemmeudeac faima Israe habu garengyunuuudeac ye faiec. Meisinggeu yeng rama nonggo medac yenenggareng ayemmekefec, ua imoc wama Anutuac maridzomingfora garengyunuec. ⁷² Dawidiac hereu ikoc nga hamangec mong mi feu yenenggareng ayemmema negen negenggoc uaya mema mariango garengyunuma wangecyunu kecgec.

79

Yerusareng kpedzamedacgec
Asafango mitiyegec yofi heiec.

¹ O Anutu, bangec monnunac ngicngac mi negenggudae, yeneng maridzoming bangecgau eredau. Yeni eweheihei faka mi amma womongga kpetiacfu eregec imoc gotengagoc anu Yerusareng ama kpedzamedacgec amabangec sesuhasac ande. ² Yeni geac kingang ngicngacfocga kpebucyunuma farengngina koec koec nga huntoc yem-megec imocngo yeneac yaka anu neyunugec. Yeni geac ngicngac kpetiac kpebucyunuma sebingina imoc bangecfu yang kecdae, imoc yemmegec negec.

³ Yeni sacngina hetinggegec imocngo Yerusareng fekendeu doku isoc nedzima feu farengngina tonggoudeac areng mong mi kefec. ⁴ Ngicngac nenigoc wegenac kecandae nga oronnunuma kecdae, yeneng deendema anemmema dzomorenenmedae.

⁵ O KEBU, faka imoc wisickeudeac tomai kecdimbe. Ge herebu negennemmena imocngo wisic wisickea kpac fekefude, ifi isoc ande. Nga ge keracmangang anemmema imocngo gerec isoc dzeu mi wisickede, ifi isoc ande.

⁶ Bangec monnunac ngicngac yeneac witinginau herebuga hetinggena mau nga bangec areng goa yeni geac kpac kuneng mi kpacandae, ge herebuga yenearu kpakena mau.

⁷ Yeni Yakoboac areng yaka isoc gbokoyunuma amabangecnina kpetotiegec kisi fede.

⁸ Mang esafochninango kopocsic maficgegec, geng imocac mi negenna feu nga ge imocac turunga mi kpounemmena. Yeni memanunugec wiac sasawa obohoyombonggedimbeac neneac ubaga manganeu bic yombong hama sinnu maficnununa.

⁹ O Anutu memengerecnina, kpacga imoc kuc nga kibikperagiagoc, imocac maficnununa. Ge kpac kunenggaac amma ebicfunac mesinunuma kopocsicnina wana.

¹⁰ Bangec monnunac ngicngac Anutu mi negemmidae, yeneng yofi debau, “Ngeni Anutungina mong mi hendimbe, kpac.” yeni ifi degec negemba naric mi ande. Ngic

yeneng kingang ngicngacfocga sacngina kpakegec, imocac turunga bangec monnunac ngicngac yenearu kpouyemmena neni kicninango hemma nambisina. ¹¹ Witicngic asoringa ayemmede, yeneac ebicnginango gearu hasikeu imoc negembesena. Ngic yeneng ngic ogofocngina homegecdeac bic desiyunugec geng hama kuctoagango onggongyununa. ¹² O Kebu, ngicngac nenigoc wegenac kecdae, yeni ge deendema anggenggecac kopocsicnginaac turunga naso seweng kekecnginau kpouyemmena. ¹³ Ifi anna neneng ngicngacfocga nga rama habufocga anni geng garennunukecna, neni nasoya nasoya ge eriendzong megennide. Nga fingecsahenina ngade feengkefude, yeneng fingecma nenigoc torokpema ge ifingoc dedengerec anggenggecde.

80

Ge neneac mi nigecgubeso

Yegecgareng yearu. Yegec kpara Dzadzahaac lili dzaring, imocac uba modacma heibesonga. Asafango mitiyegec yofi heiec.

¹ O Israec rama gareng, ge kedzac fama yoacnina negenna. Geng Yosefeac areng rama habu isoc wangecyununade. Kerobing yeneng miacguma ngictautatacga anggec geng yeneac witiu tacannec, gennoc hama kperagigango nerarannunesena. ² Ge Efaraing areng nga Bengyaming amma Manasse areng, yeneac kicfu kucga hafoangoc heina kemedaru hama ebicfunac mesinununa. ³ O Anutu, geng monggoc mengerenununa komoc kpenideac kicmesugangomekperaginununa.

⁴ O KEBU Anutu, kurumenggac wasaiareng kunengngina, ge ngicngacfocga neneac nunumuac ngaba negengkecne, imoc wisickeudeac tomai kecdimbe. ⁵ Geng kickumanina gumecnununa imocngo yaka nga dokunina ande. ⁶ Geng sing meficgena ngicngac wegenac kecdae, yeneng desofoc anemmeandae nga ngabangic yeneng detenic anemmeandae.

⁷ O Anutu, kurumenggac wasaiareng kunengngina, ge monggoc mengerenunuma kicmesugango nerarannununa komoc kpebisina.

⁸ Gennoc neni waingkomoha isoc Aigita bangecfunac menunuma hanec. Ge bangec monnunac ngicngac mi negenggudae, yeni kporacyununa woragec neni bangec imohai waing isoc homecnununa kecdimbe. ⁹ Ge waing ic imocac bangec memengere amma homecna ye bangec imohai godea mema kemema fingesahe amma bangec sokodarec. ¹⁰ Sokodaru fawango tiki fekendae, imoc semeyunuma nokumuc meficgeyemmemma yomondzoc ic fawatoanginagoc ifingoc kperacyunu yeni imocac bageau nanggec. ¹¹ Ye fawa sinema imocngo kemma kondungtoanina meficgeu sera sinema Eufarata dokutoa kpeseregec.

¹² Anu ge odaya hembarackenec, imoc negenni naric mi ande. Ge ifi anna titinga fingeru ngicngac yeneng imohai feregedacma ic imocac fora sicsauc mesinec anggecde.

¹³ Nga kateberec ngiwa yeneng godea suruhegec manennu yang yeneng seraac kiwa kirecgenec angandae.

¹⁴ O Anutu, kurumenggac wasaiareng kunengngina, ge monggoc nenearu dzigenema nenenna. Ge kurumennunac kicga fina mau nenemma waing ic yomocnec henggareng ambesena. ¹⁵ Gennoc ic komoha imoc marifoigango homecne. Gennoc medacga imoc gegoc kefudeac garenggena yadiseri anec. ¹⁶ Ngic yeneng waing icga imoc kperecgeba gerecfu faigec dzeu geng fingecyemmemma yoac ngabasiricfu edeyununa yeni manganema kpac ambisia.

¹⁷ Gennoc ngicga meisinggena kuhalogoc anudeac amminec, yeng marifoigau tacmanu marigango nanggesena. ¹⁸ Ge ifi anna neneng monggoc mi ngadegunide, kpac. Geng megborinununa geac kpac kuneng kpacma afegunide. ¹⁹ O Anutu, kurumenggac wasaiareng kunengngina, ge monggoc mengerenunuma kicmesugango nerarannununa komoc kpebisina.

Israe ge sogaibesena

Yegecgareng yearu. Gatingic yeneac musiwiac kpema heibesonga. Asafango yegec yofi heiec.

¹ Anutu ye kucnina. Ngeni dendzerenggema yegec heimima Yakoboac Anutu sogac sogaigoc arohma oheha memibisia. ² Ngeni tambaring nga gita amma kurere kpema udumeng gombunga meficgema yegec heibisia. ³ Afo gboria mau nga nasotoanina afo dzongiau trampet fifigec arohobeso.

⁴ Anutungo Israeac singyoac ngemmeec. Yakoboac Anutungo yoac ifi deseringemmeeec.

⁵ Anutu yengenaoc Aigita bangecfu kemma dzikac kpema firang anec, imohai dederecgeyoac imoc Yosefeac areng yemmeec.

Ni ubaudumeng nga yoac warac mi negengkefai, imoc naso imohai negenai.

⁶ Negemba yofi deec, “Ni fuanginaunac ebic mesima maringinaunac uaac sakac ebira meickeba ⁷ ngeni ebicnginagoc kecma kpacnugec ebicfunac mesinguai. Ni hoennu gbururunggac manau sufuma yoacnginaac turunga merengngemmema Meriba doku imohai faitobannu faingunuyai.” Selac

⁸ “O ngicngacfocna, ngeni kedzac faigec goroyoac edengunuba. O Israe habu, ngeni neac yoac negembisia. ⁹ Ngeni anutu furia mong mi mekecbisia nga bangecareng goa yeneac anutufafoc mi heimibisia.

¹⁰ Ni ngeneac KEBU nga Anutungina. Nennoc Aigita bangecfunac mengunuma hayai. Ngeni enacngina anggegec mewakengunubade.”

¹¹ “Ngicngacfocna ngeneng ine ubaudumennaac kedzac mong mi kpegec, kpac yombong. Israe areng ngeni wanuma neac yoac mi tofogec. ¹² Imocac wangunuba ngeni ubaseringinagoc kecma ngenang negeng modacgec.

¹³ O ngicngacfocna, ngeni neac yoac modacma kedzac kpebau, imocac yombong anende. Nga Israe ngeneng neac sing modacbau, imocac homac anende. ¹⁴ Ngeni ifi ambau neng ngabafocngina bic memayunuma marinango singngina hedzickebai.”

¹⁵ “Ifi amba ngicngac KEBU ubango ukudae, yeneng yeac kicfu hama fafoc heimibau. Yeni kopocsicnginaac turunga ebicgoc kecdae, imoc nasoya nasoya feengkecbac. ¹⁶ Ifi kefu Israe areng, ni wit yaka gombunga ngemmeba nebau nga ni hoc peperandziac kukundzau meficgema ngemmeba nebau.”

Anutu tosea yoacngina desiude

Asafango mitiyegec yofi heiec.

¹ Anutungo anutu hania hania yeneac adzoc adzorotoau enara amma tatahau anutu hania hania botucnginau tacma isingyunuma yaocngina desima ² yofi dede, “Fakangina yomoc mi ngereede, ngeni sing dindingac wama ngic yoacngina desiandae. Ngeni monde monde angandae nga ngic Anutu ngadehema mangana megecdeac ayemmeude, ngeni yeni meficyunukedae nga fakangina imoc mi wisickede, kpac.” Selac

³ “Ngeni ngic kucmama nga beging kecdae, yeneac yoac sing dindingac modacma desibisia. Ngicngac ogofocngina ebic witiau kecma wiac sasawa obohokecdae, ngeni yenenggareng ayemmemma yeneac yoac sing dindingacfus desibisia.

⁴ Ngic Anutu ngadehema mangana megecdeac ayemmeande, yeneng ngicngac kucmama nga iwaiac obohoma kecanda, yeni meyunugec ngeneng meficyunuma yeneac mariunac mesiyunubisia. ⁵ Yeni ine wiac mong mi negemma wiac naric mi negentegecma kundung manau kengkecdae. Ifi anu bangecac titiseri sasawango goroc goroc andae.”

⁶ Ni yofi deai, “Ngeni sasawango anutuareng nga Anutu Engenatoa neac medacfocna.”

⁷ “Foracngoc, ngeni bangecngic homeandae, ifi isoc homegecde. Ngictauac medacfoc, ngeni ngictau yeneac nambaracfocngina sasawa mayunuande, ngeni ifi isoc mangunuude.”

⁸ O Anutu, bangeha bangeha ngicngac areng sasawa yeni geac. Imocac ge yacma bangecfu desi desi uaga mebesena.

83

Israe yunubeso andae
Asafango mitiyegec yofi heiec.

¹ O Anutu, ge mi waickena amma kedzacga mi kpefonggena, o Anutu, ge eng mi tacna. ² Henna, ngabafogca yeni kpeborongtoa kpedae nga ngic ubango ukugudae, yeni orucngina miacma nandae. ³ Yeni geac ngicngacfocga tobangyunugecdeac negemma areng faima yoac dedzege andae. Geng ngicngacfocga nenenggareng amma ong-gongnunuannec, yeni neninoc memanganenunubeso amma ⁴ dedae, “Hagec, nenang Israe bangec areng meicyununi kpac andacbisia nga ngicngac yeneng Israe kpacngina monggoc mi negenggec febeso.”

⁵ Yeni uba mocgu amma yoac dedzege amma Israe memanganegedeac dzadzahac mekecdae. ⁶ Ngic imoc Edonggac areng kporucbedzonginai kecanda. Yeni Ismaeac areng nga Moabi areng amma Hagiri, yeac areng. ⁷ Yeni Gebare nga Among amma Amareke ngic. Yeni Firisti bangecac ngicngac areng nga Tiro taonnunac hagec ⁸ Asiria habu ifingoc yenigoc torokpeyunudau. Yeni kucnginagoc amma Rotiac gboricfora yeni nonggo tacyemmedae. Selac

⁹ Geng warac Midiangbangec kpemeting amminec, ifi isoc yeni ayemmemma Kisong doku tegiau ngictau Sisera nga Yabing faka ayecmenec, ge ifi isoc kpemeting ayemmebesena.

¹⁰ Geng warac Eng Doro amau ngic kpetotieyununa farengnginango bangecfu kerac isoc hoaema kpac anggec. ¹¹ Ge ngickunengngina meyununa Orebe nga Dzebe yeri manganeec, ifi isoc ayemmemma ngictau yeneac medacfocngina kucnginagoc sasawa meyununa yeni Dzeba nga Dzarinuna ayecmenec, yeni ifi isoc ayemmebesena. ¹² Nocac yeni degec, “Neni Anutuac manengbangec meni imocngo nenang ambeso.”

¹³ O Anutuna, geng ngic ifia meyununa sendungngo firannu yerecgeande, ifi isoc yerecgebisia. Ngic yeneng padi seuha firangngo mefiranggeande, ifi isoc mefirangyununa. ¹⁴ Nga gerecngo ickate dzeande nga gerecborangngo tikiu fekengkecma bangec faiu dzeande, ge ifi isoc amma ¹⁵ kiafiranggango kisangyunuma firangngo kuneng kpeu kengectoa meficgeyemmebesena.

¹⁶ O KEBU, geng kicmesungina game kpekpeu faiyunudacna yeneng geac kpac kuneng hofobisia. ¹⁷ Yeni geng negemmana gameyunuu nasoya nasoya negeng manganggoc kecma imocngo nasosoc mebucyunuu ngicngac yeneng wayunugec kpac ambisia.

¹⁸ Geac kpac kuneng imoc KEBU. Ge mocgungo bangetoa bangec fekendacde, imocac Engenatoa kecnec, yeni imoc negembisia.

84

Anutuac amawomonnu kengandae
Yegecgareng yearu. Gatingic yeneac musiwiac kpema heibesonga. Kora medacfora yeneng mitiyegec yofi heigec.

¹ O KEBU, kurumenggac wasaiareng kunengngina, geac ama womong imoc songogoc nga sogac sogaigoc wakema fede. ² KEBU, ni ongaasunango geac womong sobenggaac ammiu imohai kebadeac homema kecde. Ni heresbinango Anutu kekehagoc, yeac sogac sogai yegec heide.

³ Dzinuc nengbisic ye ifingoc amea meficgeande nga dzibirarec ye medacfora fin-gecgecdeac negemma faeha geac aratagau heide. O KEBU, kurumenggac wasaiareng kunengngina, ge neac ngictau nga Anutu. ⁴ Ngicngac geac amau kecdae, yeni kenec-ningagoc amma yeni nasoya nasoya dengereguma yegec heigenggecde. Selac

⁵ Ngicngac yeni kucngina gearu fede, yeni kenecnginagoc amma yeneac herenginai Sionggac singtoa modacma Sionnu kengecdeac ayemmeude. ⁶ Yeni Bakaac kickuma

kperemennu ferecgema kengkecmagec dokukiwa homac imohai fingecgecde. Nga semeng homec homecnasoac kia kpema doku dzohongngo bangec imoc mewakeude.
⁷ Yeni kuc meficgema kuc monggoc nga monggoc torokpema mema kengkecma anutu hania hania yeneac Anutu Sionnu henggecde.

⁸ O KEBU Anutu, kurumenggac wasaiareng kunengngina, ge nunumuna negenna. Yakoboac Anutu ge kedzac faina. *Selac*

⁹ O Anutu, ge kasonina henna. Ge ngic kerecngo nadzicminec, yeac kicmesuya henna.

¹⁰ Imoc yofiac, ni geac sobenggau uameme mocgu kecbade, imocngo ama goau uameme tausengngoc kecbai, imoc ferahade. Ni Anutunaac nagugareng nambeso anende nga ngic Anutu ngadehema mangana megecdeac ayemmeande, yeneac kporuc amanginai naric mi kecbade.

¹¹ Nocac KEBU Anutu ye wenac nga kas. Ye wosoefac nga eweheihei anemmemma ngicngac dindingac kecanda, yeni faka gombunga ayemmemma wiac gombunga mong naric mi segereyemmeude.

¹² O KEBU, kurumenggac wasaiareng kunengngina, ngic mongngo negenseriguma kecande, yennoc kenehagoc.

85

Ngicngafora ruae yemmeude

Yegecgareng yearu. Kora medacfora yeneng yegec yofi heigec.

¹ KEBU ge bangecga gombunga yombong ammima Yakoboac areng monggoc men gereyununa naric kecgec.

² Ngicngacfogca yeneng ngicngac ofogcngina memanganeyunugec, fora. Nga geng imoc wama kopocsicngina sasawa wayemmenec. *Selac*

³ Ge herebuga wama ngaba gereagoc angkecnec, imoc wadacnec. ⁴ O Anutu memengerecnina, ge monggoc mengerenununa. Nga neni wosogau meing, imoc monggoc mi negensina.

⁵ Ge neni nasoya nasoya ngaba anemmekcma fingecsahechina fekefudesoc, ge yeneac herebu ifingoc negengkecnade, imoc henni mi ngereede. ⁶ Ngicngacfogca neneng desogai anggenni ngereede. Ge imocac sifu kekecnina monggoc heigborinemmebesena.

⁷ O KEBU, geng yoac dedzege amma imoc modackecnec, imoc edzacnunuma ebicfunac mesinununadeac deserinemmena.

⁸ KEBU Anutungo yoac deude, imoc negembeso anende. Ngicngac ubaherengina meremma yearu haandae, yeni yeac kpetiac ngicngacfura nga yeng ngicngacfura imoc ruae yaoac edeyunuude. ⁹ Foracngoc, yeac kuc kibikperagiagoc bangecninau fekefudeac amma yeng ngicngac yeac eweheianda, yenemma ebicfunac mesiyunuude.

¹⁰ Anutungo yoac dedzege amma imoc modackecde, faka imoc nga yoac modac modacfaka yereng meficemee dindingac kekec amma ruae kekec yereng titikokoc angemeece. ¹¹ Yoac modac modac faka, imocnggo bangecfunac nemonggema ereu dindingac kekecngko kurumennunac fiu maude.

¹² Fora, KEBUNGO wiac gombunga nemmeu bangecninaac semeng uango semeng monggoc meficgeude. ¹³ Dindingac kekecngko waraimima yeac haniaac sing mengeremiude.

86

Ge singga edzacnuna

Dawidingo yofi numuec.

¹ O KEBU, ni ngic makpekpeango iwaiac obohoma kecduaeac kedzaga faima yoacnaac turunga merennenna. ² Ni geac enac tofoc tofohoga nga ge neac Anutuna. Ge imocac kekecna onggonggena. Ni geac kingang ngicnggo negenseriguma kecduaeac ebicfunac mesinuna. ³ O Kebu, ni asoacnac kemma marai gearu kiackecduaeac ge neac ubaga manganeu. ⁴ O Kebu, ubaongana memiacma gearu faiduaeac ubaonganaac ubangerec meficgenenna.

⁵ Ge gombunga anemmemma kopocsic wanemmenade. O Kebu, geng yoac dedzege amma imoc modackecnec. Nga ngic yeneng hofocgugec geng faka imoc modacma wiac gombunga efea kpac ayemmenade. ⁶ O KEBU, ge kedzac faima nunumuna negenna. Ni kpesi kpesi amma kiacba ge kedzac kpema negenna. ⁷ Geng turunga merennennadeac ebicnasonau kpacgubade.

⁸ O Kebu, anutu hania hania kecdae, yeneac botucfu mongngo ge isoc mi kecde. Anu geng ua mekecnec, ua ifi isoc mongngo mi mekecde, kpac. ⁹ O Kebu, ge bangeha bangeha ngicngac areng meficyununec, yeneng gearu hadacma kicgaufafoc heigemma hama geac kpac kuneng heiwayong memigecde. ¹⁰ Ge mocgungo Engenatoa kecma faka bibiagoc mekecnec amma geng Anutu.

¹¹ O KEBU, ni yoacga fora modackebadeac singga kpounenna. Ge herenau ubayohoc meickena geac kpac kuneng eweheiheigoc hoanggebesare. ¹² O Kebu Anutuna, ni heregoc ge ubangerec megemma geac kpac kuneng nasoya nasoya heiwayong memibade. ¹³ Geng yoac dedzege amma imoc modackecnec, ge imoc anenna wiac engena ande. Kekecnango emu homec amau feu gennoc kekecna imohacnac mesina ereec.

¹⁴ O Anutu, ubakpekpe ngic yeneng yacma nubeso anggenc yarengic yeni habutoagoc hama kpebucnubeso andae. ¹⁵ O Kebu, ge Anutu ubamangang nga wosoefac mingina. Ge ngaba bic mi annade nga geng yoac dedzege amma imoc modackecnec, fakaga imoc wiac engena. Ge yoac modac modacac Kebu nga faka imocngo wake wakea fegende.

¹⁶ Ge nearu dzigenema neac ubaga manganeu. Ge kingang ngicga kuc nemma kingang ngacgaac medac, imoc ni, ebicfunac mesinuna. ¹⁷ KEBU, geng meficnuma meserinunade. Ge imocac ngic ubango ukunudau, yeneng geac fakaga hemma gameyuuudeac geng neac negenna ngereeande, imocac ma mong edzacnubesena.

87

Siong taonnu fingerec

Kora medacfora yeneng mitiyegec yofi heigec.

¹ KEBUNGO tiki kpetiacfu taong mong faiu fede. ² KEBUNGO Sionggac nagutoaac songotoa negemma Yakoboac ama noboha yeneac songo ifi mi negenude. ³ O Anutuac taong, geac yoacsiduc imoc damuyagoc. *Selac*

⁴ “Bangec areng goa ni negennudae, imoc kpacyunubade, Aigita nga Babirong amma Firisti yeneac bangec nga Tiro amma Etiopia, yeneng deandae, ‘Ngic yomoc ye ihai fingerec.’” ⁵ Engenatoango ye tatahau Sionnu faiu seria tarudeac amma Siong man-aungoc degecde, “Ngic yomoc amma ngic imoc, yeni imohai fingegec.” ⁶ KEBUNGO bangec areng yeneac kpacngina kpedzucnema arengyunuma yofi ohoude, “Yomocngo ihai fingerec.” *Selac*

⁷ Yegec fede fedeac ngicngac sasawa yeneng yegec yofi dema heiandae, “Neac dokudzohong sasawa yeni Sionnu tacdae.”

88

Ubaebic meficgeec

Kora medacfora yeni yegec yofi heigec. Yegecgareng yearu. Esrangic Hemang amaunac, yeng masiki yegec heiec, ifi isoc yegec yomoc Maharac rennoc, imocac uba modacma heibesonga.

¹ O KEBU, Anutuna, ge neac ebicfu mesi mesingic. Ni hadzing tofocnac geac arohomaa kiackecba ² geng nunumunaac kedzac kpema nga kiacnango gearu hau negenna.

³ Ubaonganango ebic wakeyombonggeu kekecnango homec ama bic mewegenede.

⁴ Yeni neac yofi negendae, “Ye ngic bic homegec, yeni isoc ande.” Ni ngic kucngina kpac, yeni isoc anduae. ⁵ Ngic wayunuma homec yeneac botucfu faiyunuandae, yeni isoc feduae. Yeni ngic kpebucyunuma kicsereu faiyunugec fedae, ifi isoc anduae. Ge ninigec meficgema neac monggoc naric mi negenna fede, ni ifi isoc anduae. Ge ngic marigaunac meicyunuma monggoc mi garengyununa kpac angandae, ni ifi isoc anduae.

⁶ Ge teng mana kemeau kicsere menuma kundung dzic manau fainunec. ⁷ Geac herebungo neac witiu emma mepetannuma kondungsiri isoc semenuna kucna kpac anec. *Selac*

⁸ Geng ifi anenna ogofocna yeni imoc hemma ngadenuma neac ebic hemma kengectoa amma kpidohoma nandae. Ni witifu ifi kecduaeac naric mi worabade. ⁹ Ni ubahodung-goc kecba kicna kundung kpebeso ande. O KEBU, ni wenacsoc kpacguma marina gearu sinekecduae. ¹⁰ Ni homebeso anduae nga ge ngic homemea yenearu kucfaka bibiagoc mi menade, kpac. Homegec yeneng onga amma naric mi yacgecde nga yeni eriendzong naric mi megenggecde. *Selac*

¹¹ Geng yoac dedzege amma imoc modackecnec, ngic kicsereu yeneng yoac imoc mi dekperagiandaе nga ge yoac modac modac Anutu, imoc homec amau naric mi deyadigecde. ¹² Kundung manau geac kucfaka bibiagoc naric mi negenggecde. Nga geng meficyunuma ebicfunac mesiyunuannec, imocnggo ninigec amau naric mi fingectegerude.

¹³ O KEBU, ni sifu asoac anu memeficac kiacgemma arohoma gearu nunumuna faiba haude. ¹⁴ O KEBU, ge ni wanuma kicmesuga nearu mesufunec, imocac hania mi negentegecduae.

¹⁵ Ni sebigborinaungoc kpendzenggoc kecma homecfu heima kefai. Ge kengec efea kpac meficgenenna kpidohoma ubaebicgoc amma memeficna kpac kecduae. ¹⁶ Geac herebungo semenuu kengec efea kpac gearunac meficia kengecnuu manganema kpac anai. ¹⁷ Geac kengectoa imoc asoacnac kemma marai doku tunggbuang isoc yadima oronnuma noboc nobocnac hama semenukefu ¹⁸ geng negemmana songo ogona nga arengfocna yeni sasawango wanuma ngadenugec kundungngo tosayombonna ande.

89

Kebu, ge dahai?

Esrangic Etangnggo masikiyegec yofi heiec.

¹ O KEBU, geng yoac dedzege amma imoc modackecnecac nasoya nasoya yegec heigembade. Ge yoac modac modac Kebu, imoc enacbobicnango dekperagiba fingecsahe fekefudesoc, yeneng imoc negendacgecde. ² Ni yofi deba, “Geng yoac dedzege amma imoc modackecnec, fakaga imoc nasoya nasoya faina fekefude. Ge yoac modac modac Anutu. Kurumenga kurumenga nasosoc fefeseri fekecdae, ifi isoc geac fakaga ifingoc fekefude.”

³ Geng yofi denec, “Ni ngicna Dawidi meisingga yegoc dzadzahac mema ye kingangngicna anu yofi deserima edeai, ⁴ ‘Ni geac gborifocga tatacnginau faiyunuba yeneng nasoya nasoya seria tacgecde. Yeni fingecsaengina fekefudesoc ngictau tatacflu tacma ua imoc torokpeu torokpe medacgecde.’” *Selac*

⁵ O KEBU, ge kurumenga kurumenga sing faiyemmena yeni geac kucfaka bibiagoc oyang boyang mebisia. Ge yoac modac modac Kebu, fakaga imoc kpetiac areng yeneac adzoc adzorou dengrebesonga.

⁶ KEBU, wi sawakebangau ge isoc mong mi kecde. Nga anutu hania hania yeneac medacfocngina kecdae, botucnginau ge isoc mong mi kecde. ⁷ Kpetiac areng yeneac adzoc adzorou tacandae, yeneng yofi negengandae, Anutu ye damu damuyagoc. Ye engenatoa amma yeng kurumenggac areng ye yerecgema nandae, yeni feracyunuу yeneng yeac kengec homac angandae.

⁸ O Anutu, kurumenggac wasaiareng kunengngina, KEBU, mongnggo ge isoc kuhagoc mi kecde. O KEBU, ge yoac modac modac Kebu nga fakaga imocnggo orongguma fede.

⁹ Kondungngo kpeborong kuhagoc kpeu geng mingina amma kuha memana siri kuneng kpeu mengisiyununade. ¹⁰ Ngic yeneng ngic goa yunuma memanganeyunugec, geng Aigita bangec medzamena ifi isoc feec. Ge mariga kuhagocnggo ngabafocga kisangyununa yeni singsararang kpegec.

¹¹ Ge kurumenga kurumenga yeneac mingingngina nga bangec imoc ifingoc geac. Geng bangectoa bangec nga wiac sasawa ihai fedae faiyununa seria kecgecde. ¹² Geng bangec noboc noboc not nga saut maficyununec. Taboro nga Herimong tiki yereng sogaima geac kpac kuneng oyang boyang memiecde. ¹³ Fuakpegangga imoc kuhagoc nga mariga imoc kuhagoc, ge marifoiga sawau miacnec. ¹⁴ Ge fakaga dindingac nga ge sing dindingac modacma yoac desianne, wiac imocngo ngictau tatacgaac sering ande. Geng yoac dedzege amma imoc modackecnec amma ge yoac modac modac Kebu, fakaga imocngo waraigendape.

¹⁵ O KEBU, ngicngac geac kicmesugaac kperagiau kecandae, yeneng afegugecdeac sing negemma sogaima kpacma afeguanda, yenennoc kenecnginagoc. ¹⁶ Yeni geac kpac kunenggac amma asoacnac kemma marai sogaima kecma fakaga dindinga afehegecde.

¹⁷ Ge ngicngac imoc yeneac kibikperagi nga kucngina. Amma ge wosoefac anemmena kucninagoc amma firang annide.

¹⁸ Ngictau ye kasonina nga KEBU ye kasonina mingina. Ye Israeac kpetiac ngic amma yeng neneac ngictau, yeac mingina.

¹⁹ Ge warac onga nga kpefingyoacfus singyoacga dena ngicngacfocga geac yoac modac modac kecgec, yeni yofi edeyununec,

“Ni ngic mong kuhagoc meficgema ye ngictauac ira heimai. Ni ngicngac yeneac botucfunac sebigbori medac mong meisnggema gununggeai. ²⁰ Ni kingang ngicna Dawidi meisnggema kerecna kpetiacngo nadzicmiae. ²¹ Ifi anu marinango ye nasoya nasoya nanggema marinaac kucngo meseribade.

²² Ngabangic mongngo ye tobanggema naric mi feraheude nga ngic Anutu ngadehema mangana megecdeac ayemmede, yeni ye mi memagecde. ²³ Ni ngabafora yeac kicfu kpedzameyunubade nga ngic ye ubango ukudae, yeni kpefacyunuba mayunuude.

²⁴ Ni yoacna modacma yoac dedzege amma imoc modacbade, fakana imocngo ye garenggekefude. Ni neannaac kpacfu nanggeba yeng kuhagoc amma firang anude.

²⁵ Ni kondung yeac mariu faiba yeng imoc garenggema marifoiang doku haandae, yeni garengyunuude. ²⁶ Yeng kpacnuma yofi deude, ‘Ge Manna nga Anutuna amma memengerecnaac hoc peperandzi seria.’

²⁷ Ni ye meisnggeba yeng neac morocmedac anu bangecfu ngictau yeneac kunengngina anudeac faiba kefude. ²⁸ Ni yoac yegoc dedzege amma imoc nasoya nasoya modacma dzadzahacna yegoc mebade, imocngo yegoc fefeseri feude. ²⁹ Ni Dawidiac nambarac nga esamedac fingeckecgecdesoc tatacnginau faiyunuba nasoya nasoya seria tacgecde. Yeac ngictau tatac nanggeba nasoya nasoya fekefu kurumenga kurumenga yeneac wenac dafiguc fede, kpetea ifi isoc anude.”

³⁰ “Esangaboforango neac dedeseri wama ngadehema dederecgeyoacna kpema imoc mi modacgecdeu ³¹ me yeni kpema nonoyoac edeyunuai, imoc mi modacgecdeu ³² ni yeneng singyoac kpegecac amma turunga kpouyemmem gbarucngo yunubade. Yeni ngicngac ogofocngina memanganeyunugecac dzikacngo yunuba kpenzeng kpegecde.

³³ Ni Dawidigoc yoac dedzege amma imoc modacduae, fakana imoc naric mi wangecbade. Ni ikoc mi ambade nga yoac modac fakana naric mi wabade. ³⁴ Ni dzadzahac meai, imoc mi kpebade nga enacnaunac yoac maec, imoc mengerema siriha mong mi debade. ³⁵ Ni naso mocgu kpetiac kekecnau namma dedeseri seria deai, imoc nasosoc fora angkefude, ‘Ni Dawidi ikoc mi ammibade.’ ³⁶ Yeac bangecfora yeni kpac angana kpac torokpeu torokpe kecengkecgecde. Wenac kiwango nasoya nasoya neac kicfu fekefude, ngictau yeac ngictau tatacngi ifi isoc fekefude. ³⁷ Sawakebanggac hepuc, imoc afo, ye tataha mi wama takecde. Nga ni ngictau tatahau faiba ye ifi isoc nasoya nasoya seria tackefude.” Selac

³⁸ Geng kingang ngicga Dawidi kerecdokungo nadzicminec, fora. Nga geng ine yeac herebu negemma ye ngadehema wanec. ³⁹ Ge kingang ngicgagoc dzadzahac menec, imoc wana wisickeu ngictau iraya bangecfu sendunnu ukuna gotengagoc andarec. ⁴⁰ Ge yeac taonggac hocoda kpembarackedacma amea seria kpedzamedacna sesuhasac andae.

⁴¹ Nga ngicngac yeneng imohai ferecge kengha angandae, yeni iwaiya mema woraandae. Ngicngac yeac wegenac kecandae, yeneng desofoc ammidae. ⁴² Ge ngabafora marifoing-inia memiacna dzikacfу serigec ngabafora sasawa sogaigecdeac sing meficgeyemmenec. ⁴³ Fora, ge ngictau dzikacfу mi nanggenec nga yeac dzikacac beang, imocac enara merenna ngadeaubigeng kenec. ⁴⁴ Ge ngictau yasuya mariaunac wangecma ngictau tataha bangecfu ukuna maec. ⁴⁵ Ye sebigbori kecmanu ge wenahaac kpete mewegenena homac mi anec. Ye game kpekpeu faina imocngo ye semeu kecde. *Selac*

⁴⁶ O KEBU, ge mesufuemema monggoc kicninau fingecnadeac tomai kecduae. Ge nasoya nasoya ifi sufuma kecnade, ifi isoc ande. Geac herebu gerek isoc dzekede, imoc wisickeudeac tomai kecduae.

⁴⁷ O Kebu, kekecna imoc wegenacnecsac ande, imoc negenna febeso. Ge ngicac medacfora fainununa eng fingecma kpac annide. ⁴⁸ Ngic mong ye keengkecma mi homeude, ifia mong mi kecde, kpac. Homec amau ngic kucgoc meyunugec ngic mongngo imohacnac naric mi mesiude. *Selac*

⁴⁹ O Kebu, geng yoac dedzege amma imoc modackecnec nga yoacga modackecnec, imoc warac Dawidi deserima desiminec, imocac fora hofocduae. ⁵⁰ O Kebu, yeni ni, kingang ngicga deendema anengandae, imoc negenna febeso. Ngicngac yeneng deendema anenggec ebic imoc herenau tofohokecduae. ⁵¹ O KEBU, ge ngictau meisin-numa kerec nadzicnennec nga ngabafocna yeneng ine deendema anengandae. Ni sing tikengkecba yeneng hanititina hemmodacma desusuic anemma yoac mangana denenggecde.

⁵² KEBU nasoya nasoya kenehebesonga. Imoc fora nga fora yombong.

MITIYEGEC KIBI 4

90

Mitiyegec 90-106

Naso wegenanec kefude

Anutuac ngic Mosengo yofi numuec.

¹ O Kebu, neni fingecsahechina bic fekefec, geng yeneac sufu sufuamangina angkecne.

² Ge Anutu, tiki mi fingecmagec geng marigango bangec nga banectoa bangec mi meficgemangoc imohai bic kecne. Ge nasoya nasoya kecne nga kecbesanne.

³ Geng yoac dena ngic yeni monggoc sendung anggecde. Ge yofi deannec, “Ngicac nambarac, ngeni monggoc bangecfu dzigenema sendung ambisia.”

⁴ Imoc yofiac, kifa tauseng imocngo geac kicfu uameme mocgu kemma bic kpac andac, ifi isoc ande. Imoc tofocnac monggac noboha isoc ande.

⁵ Ge ngic wanggenununa seuc isoc kengandimbe nga kekecnina imoc gau negen-gandimbe, ifi isoc ande. Kpindzingngasoac gborima monggoc ereande, ifi isoc.

⁶ Imocngo asoac gboria nga sabayagoc anu marai anu sokuema ururueude.

⁷ Geac herebungo neni memanganenunuu kpac andimbe. Geac heregerecngo ebicfu fainunuu kecdimbe. ⁸ Neni ngicngac ogofocnina memanganeyununi geng wiac imoc kicgau areenggema hengkecne. Nga kopocsic sufu sufuu meficgeing, ge imoc kicgaac kperagi faina feu hengkecne. ⁹ Anu kekecninaac uameme sasawa geac herebugaac bageau kecni nasonina kpac anude. Ngicng asoringa ammiu kpac angande, neni kifanina ifi isoc kecni kpac andarude.

¹⁰ Kekecninaac kpete imoc kifa 70 me kucnina feudeu kifa 80 kecnide. Kifa imocac manau kekecnina gombunga yombong kecandimbe, imohai ine ebic nga ubahodunggoc ifingoc kecandimbe. Kifanina bic meickegec kpac andaru neni kpututukema kendacnide. ¹¹ Ngic mongngo geac ngabagaac kuc mi negensiude, kpac. Kengecgoc geac eweheihei kuneng anggembesonga nga heregerecga kuneng imoc ifingoc imocacsoc ande.

¹² Kekecnina uameme dafigucacsoc fede, imoc negensinideac wiac imoc kpounemmena. Ge ifi anna neni hereninango negentegecgo anude.

¹³ O KEBU, ge monggoc dzigenena. Naso dafiguc monggoc geac tomai tacbesonga? Ge kingang ngicfocga neneac ubaga manganeu. ¹⁴ Neni uameme kecnidesoc sogac sogaigoc kecma ubangerec negennideac amma geng yoac dedzege amma imoc modackecnec, imoc asoacngoc mewakenunubesena. ¹⁵ Ge wenac homac ebicfu fainununec, uameme ifi isocngoc ubangerec nemmena. Neni kifa homac yarefaka hengkefing, imocacsoc ifingoc kifa ubangerecgor meficgenemmena. ¹⁶ Geng ua mekec nec, imoc kingangngicfocga nenearu diidi edzacnunuma kucga damu damuyagoc imoc esamedacfocninango hem-bisia. ¹⁷ Kebu Anutuninaac ubangerecng semennunubeso. Ge marininaac ua tataha meficgena seria febeso. Fora, ge marininango ua meandimbe, imoc tataha meficgena seria febeso.

91

Engenatoango garen-nunukecde

¹ Anutu Engenatoango ngic mong garenggema mesufuu yeng Kuctoa minginaac debannu kecnegeng kecande, ² ye KEBU edeude, “Ge sufu sufua-mana nga amana seria, ge Anutuna nga ni negenserigma kecduae.”

³ Ye nengmeme ngic yeac botacfunac mesiguude nga homecac hafei manganango memanganegubaac yeng onggongguude. ⁴ Ye kpegang dzoeango kperacguu geng yeac kpeganga bageau sufuma kecnade. Ye yoac modac modac Kebu nga fakaya imocngog geac kasoga amma odaga seria ande.

⁵ Ge tofocnac wiac mong manganaac kengec mi annade nga wenacfu tebemedahaac kengectoa amma naric mi kpidohonade. ⁶ Hafeitoa kundung manau haande, imocac kengec naric mi amma homecac hafei mangana wenacfu fingecma yunuande, imocac kengec mi annade.

⁷ Ngic tauseng yeneng hoanggau namma homegec ten tauseng yeneng foigaugeng namma homegecdeu wiac mangana monggo gearu naric mi fingerude. ⁸ Ge kicgango yenemmana ngic Anutu ngadehema mangana megecdeac ayemmeande, yeni angam-memenginaac amma turunga megecde.

⁹ Geng yofi denec, “Ni KEBUAC hoannu sufuma kecduae nga Kebu Engenatoa ye kecnegeng amana.” ¹⁰ Yarefakaac ebicngog gearu naric mi hau ebic mangana monggo geac kporuc amagaac wegenac naric mi haude. ¹¹ Ye angerofora uayoac yemmeu yeneng sing sasawa kengkec nec, imohai garenggugecde. ¹² Ge haniga hocng heibacac yeneng maringina witiau faiguma sesehegugecde. ¹³ Ge raiong yangtoa witiau nga kpate witin-girau eng tikemma raiong sebigbori nga boidzocac witingirau tima tidzameyununade.

¹⁴ Kebungo yofi dede, “Ye neac songo negemma nigoc kpeketahemec kecdeac ebicfunac mesibade. Ye neac kpac kuneng negendeac neng henggareng amma ongonggebade.

¹⁵ Ye kpacnuu ni turunga meremmibade. Ye ebic witiau kefu ni yegoc kecma ebicfunac mesima eweheihei ammibade.

¹⁶ Ni kekeha mehereeba kecma gebeckpeu memengerecna edzahabade.”

92

Ge marigango ua menec

Sondaac mitiyegec.

¹ O KEBU, ge Engenatoa. Ni ubangerec negemma geac kpac kuneng heiwayong memima yegec heigemba, faka imocngog ngereede. ² Geng yoac dedzege amma imoc modacnade, imoc asoac dekperagibade. Nga ge yoac modac modac Kebu, imoc tofocnac dekperagima ³ gita witihā tengngō kpema udumeng mema kurere hania hania kpema udumeng yumiango geac kpac kuneng heiwayong memibade, imocngog wiac ubangerehagoc ande. ⁴ O KEBU, geng ua mekec nec, imocngog ubangerec meficgenenu marigango ua menec, imoc hentegecma sogac sogaiacl yegec heibade.

⁵ O KEBU, geng ua meannec, imoc bibiagoc nga geac negen negeng imoc engena nga kemea kemea yombong. ⁶ Ngic kapayango imoc naric mi negenude nga ngic negen negenga kpac, ye wiac yomoc naric mi negentegerude. ⁷ Imoc ine yofi, ngic yeneng Anutu ngadehema mangana megecdeac ayemmeande, yeni kpindzing isoc erema sabanginagoc anggecde nga yarengic yeni faka mangana angkecma yadiseri anggecde. Nga yeneng yoacngina bic desigec fede, yeni manganaac areng deyec deyecmea.

⁸ O KEBU, gennoc engenatoa nga ge nasoya nasoya ifi kechereema kecbesannec.

⁹ Foracngoc, KEBU, geac ngabafocga yeni homecac areng andae nga yarengic sasawa yeni singsararang kpegecde.

¹⁰ Kateburumakango kuhagoc kecande, ge sifu kuc ifia nemma nanggenuna kucgoc amma firang ambade. Ge kerec gombunga kpakema nadzicnennec. ¹¹ Ni kic fima ngabafocna mayunuu yenennai. Nga yarengic yeneng wegenac hama nubeso anggec, yeni kopocsicnginaac turunga ebira megec, imoc kedzacnango negenai.

¹² Ngic dindingac yeneng pam ic gombunga sabayagoc, ifi isoc andae. Yeni Rebanong bangecac yomondzoc ic herea yadiseri angande, ifi isoc yadiseri anggecde. ¹³ Yeni ic isoc KEBUAC amau homehomera, yeni Anutuac amasobennu sabanginagoc anggecde.

¹⁴ Yeni esea anggecde, fora. Nga yeni sifu fora meficgema maringina besaima fora homac gbarigoc angkecma ¹⁵ yofi degecde, “KEBU ye faka angammemea dindingac. Yeng neac hoc peperandzi seria yombong nga yearu faka mangana mong mi fede.”

93

KEBU ye ngictau

¹ KEBUNGO ngictauac kuc, imoc ngakpi isoc heiul kemeu ngicngac garengyunuude. Ye ngictauac kuc heiul ngakpia ande. Ye kuha bic heima kebangau dzeggeec.

O, yeng bangectoa bangec tatahau faiu seria tacdeac wiac mongngo meu goroc goroc naric mi anude. ² O KEBU, geng ngictau tatacga bicngoc tatahau faina seria feu ge nasoya nasoya kecnec nga kecbesannec. ³ O KEBU, dokutoa yeneng ubaudumeng miacgec, dokutoa yeneng ubaudumengngina miacgec, dokutoa yeneng kucgoc arohoma ubaudumengngina miacgec. ⁴ KEBU wi kecde, ye damu damuyagoc. Ye doku dundung yeneac udumeng ferahama kondung siri yeneac kuc ifingoc ferahade.

⁵ O KEBU, geac singyoac imoc sasawa seria nga fora. Geac amau nasoya nasoya kpetiac feengkebeso.

94

Ge yoacfufaiyununa

¹ O KEBU, ge turung kpoukpou Anutu. Turung kpoukpouac Anutu, ge kperagigagoc fingectegecna. ² O bangecac desi desi ngic, ge yacna. Ngic goa yenanggac negenggec engena angkecde, geng ngic imoc angammemenginaac turunga merengyemmebesena.

³ O KEBU, ngic Anutu ngadehema mangana megecdeac ayemmeande, yeni nasoherec bic kecgecac nasongina kpac anudeac tomai kecduae. Yeni naso herea bic kecma ngicngac yeneac ebicac amma sogaima kecandaec nasona herecgena kpac ambeso.

⁴ Yeni enacnginaunac ubakpekpe yoac makecde nga yarengic sasawa yeni sebingina meemma yoac homac osokecdae.

⁵ O KEBU yeni geac ngicngacfocga kpedzameyunuma maridzomingfocga kpendzennu faiyunuma ⁶ ngac hodzec nga kuricngic yunuma beging kpebucyunuma ⁷ yofi deandae, “KEBU ye naric mi nenenunde nga Yakoboac Anutungo imoc naric mi negensiude.”

⁸ Ngicngac ubafong, ngeni kedzac faima yoacna negembisia. Oboc kpobocngic, ngeni negenggoc anggecdeac yoac edengunubade. ⁹ Anutungo kedzac ngicfu faiu fede amma ye wiac imoc naric negenude. Nga kic imoc Anutuac marikibi. Imocac ye wiac imoc henudengoc. ¹⁰ Yennoc bangeha bangeha ngicngac areng kpemeting ayemmemma yunuude. Ye negeng minginango ngicngac kpouyemmeu yeneng negeng arenggegecde.

¹¹ KEBUNGO ngicngac negen negennina negendacde. Ye ngicngac negen negengngina hennegeng amma negenu imoc uaya kpac. Nenang asu mocgu taiandimbe, ifi isoc.

¹² O KEBU, ge ngic mong kopocsicac kpemeting amma dedeseriyoacga edekpou ammiannec, ngic imoc ye kenehagoc. ¹³ Geng ruae mina ebicaso mong mi henude. Nga ngic goa Anutu ngadehema mangana megecdeac ayemmeande, yeneng ine kecma kemegecdeac amma teng usuyemmegecde.

¹⁴ KEBUNGO ngicngacfora mi ngadeyunuma wayunuude. Ye maridzomingfora naric mi wayunuude. ¹⁵ Ngic mong ye sing dindingac modarude, imohai desi desingic yeneng yeac yoac sing dindingacfu desima monggoc degecde. Ngicngac herenginai ikoc nga hamangec mong mi fede, yeneng desi desi yoac dindingac imoc modacgecde.

¹⁶ Ngic goa yeni Anutu ngadehema mangana megecdeac ayemmeande. Nga merang ni meficnuude nga merang yacma kicnginai nanude? Ni imocac tomai kecduae. Ngic mongngo meficnuma yarengic yeneac kicfu nanudeac tomai kecduae.

¹⁷ KEBUNGO hama ni mi meficnubacf ubaonganango bic kemema ngicac ubaudumenga kpacf uga kicsereu febac. ¹⁸ Ni yofi deai, “Hanina pososoc anu manubeso ande.” O KEBU, ni ifi debareng fakaga modacma yoac dedzege amma imoc modacma nanggnunec, imohai mi manuec. ¹⁹ Herenau negengyohoc homac mekecba geng meserinuma ubaonganaac ubangerec meficgenennec.

²⁰ Ngicenara goa yeni Anutu ngadehema mangana megecdeac ayemmeande, yeneng geac ogofocga naric mi anggecde. Yeni singyoac hania hania ohoandae, imocnggo ngicngac ogofocngina faitobang ayemmemma memanganeyunugecde. ²¹ Yeni ngic dindingac kpehomegecdeac yoac dedzege angkecma ngic kopocsiha kpac homecac arennnu desigecde.

²² Anu KEBU ye neac ama seria nga Anutuna. Ye neac hoc peperandzi seria amma sufusufuamana. ²³ Ngicngac yeneng ogofocngina memanganeyunugec yeng imocac turunga kpouyemmeude. Yeni Anutu wama faka mangana meandaeac yeng meicyunuukpac anggecde. KEBU Anutuninango meicyunuude.

95

Yeac enac tofobesonga

¹ Hagec, KEBUAC yegec heima oeha memini. Ye hoc peperandzi serinina nga memengerecnina. Nenang sogaima yeac yegec dendzerenggema heima ² yeac hoannu kemma ye ubangerec memibisina. Neni yeac afe afeheyegec sogaima dendzerenggema heibisina.

³ KEBU ye Anutu engena yombong, ye anutu sasawa yeneac ngictau engenatoa. ⁴ Yeng bangectoa bangec manau keme kemea fede, imoc mariau mema garenggeude. Bangec kperec kperemenga nga tiki sasawa imoc yeac. ⁵ Yennoc kondung meec, imocac amma kondung imoc yeacngoc. Amma yeng bangec kerenga meu imocnggo yeac marikibi ande.

⁶ Hagec ngonducnema numumini. KEBUNGO meficnunuec, nenang yeac kicfufafoc heimini. ⁷ Ye Anutunina nga nenang yeac ngicngacfora. Ye yengena odayau fainunuma nenenggareng angkefu ramafora anni yeng mariango menunuukcedimbe.

O, ngeni yaguc kedzac kpema yeac enacudumeng negembau, imocac yombong anende. ⁸ Mang esafoengina yeni Meriba dokuu ubaseri amma Massa bangecfukecgec, naso imohai bangec kisiu faka anggec, ngeni ifi isoc mi ambisia. ⁹ Ni faka kuahagoc meba yeni imoc hengkecgec, imoc fora. Nga yeni sifu tobannuma faitobannu fainugec.

¹⁰ Ifi anggec ni kifa 40 ngicngac areng yeneac modzona tiu yofi deai, “Ngicngac imoc yeni ubaherenginai sing segema neac sing ngadehema kecdae.” ¹¹ Imocac ni yeneac ngaba amma yofi deserima deai, “Yeni neac kecnegeng kekecfu naric mi enggecde.”

96

Yegec gboria heimini

¹ KEBUAC yegec gboria heimbesonga. Bangectoa bangec, ge KEBU yegec gboria heimbesena. ² KEBU oeha mema yegec heimima yeac kpac kuneng kenehebesonga.* Ngeni wenaha wenaha memengerec uayaac yoac edeyunu kecbisia. ³ Kebu ye kuc nga kibikperagiagoc, imoc bangeha bangeha ngicngac areng botucnginau dekperagima edeyunugec yeng kucfaka bibiagoc meec, imoc ngiha ngiha botucnginau edeyunubisia.

⁴ KEBU ye engenatoa nga ye oyang boyang memibesonga. Ye tatahau wi yombong tacma anutu hania hania feracyunudacdeac ye kengec nga eweheiheigoc hoanggebesonga. ⁵ KEBUNGO kurumenga kurumenga meficyunuec. Nga bangec monnunac ngicngac, yeneac anutufocngina hania hania, yeni ine nemuongasac andacdae. ⁶ Eweheihei nga ngictauac kuctoa kibikperagiagoc imoc KEBUARU fede. Yeac kpetiac amau kuc nga kibikperagia fede.

⁷ Ngiha ngiha arengnginagoc kecdae, ngeni KEBU dengerema yeac kuc nga kibikperagia afehebisia. ⁸ KEBUAC kpac kuneng imoc kuhagoc nga kibikperagiagoc. Imoc eweheiheigoc hoanggebesonga. Ngeni sese mema yeac amawomongau hama meembisia. ⁹ Ngeni kpetiac kekec heigec kemeu siricngina gombunga anu KEBU numumibisia. Bangectoa bangecac ngicngac areng, ngeni yeac kicfu kengec amma dzonong fede fedegoc nambisia.

¹⁰ Ngeni bangec monnunac ngicngac Anutu mi negemmidae, yeneac botucfu yoac yofi dekperagiyemmebisia, "KEBU ye ngictau. Ye kuc imoc mekecma garengyununuma kecde. Foracngoc, ye bangectoa bangec tatahau faiec, imoc nasoya nasoya seria feu wiac mongno meu goroc goroc naric mi anude. Ye monde mondea kpac kecma ngiha ngiha faka angammemengina yoacfу isinggema desiude."

¹¹ Kurumenga kurumenga ngeni ubangerec negenggec bangecngo sogaibeso. Kon-dung nga wiac sasawa imohai wakema fedacdae, ngeni udumeng kuneng meficgebisia.

¹² Maneng nga semeng ua nga wiac sasawa imohai fedacdae, ngeni sogaibisia. Nga kateu ic sasawa, ngeni sogac sogaiac yegec heibisia.

¹³ KEBUNGO hadeac amma yeac kicfu sogaibisia. Ye bangecfu desi desi ua meudeac hama bangec sasawa faka dindingacfу isingyunuma ngiha faka forau yoacngina desiude.

97

Anutu ye ngictau

¹ KEBU ye ngictauac kuc minginango bangectoa bangec garenggema kecde. Imocac bangecngo sogaibeso nga kondung tegiau bangec fekendae, yeni ubangerecgo kecbisia.

² Hoeng nga kundung kunenggo ye oronggema fedape. Faka dindingac nga sing dindingac, imocngo yeac ngictautatahaac sering seria. ³ Gerecngo waraimiu ngabafora noboc noboc ye oronggeandae, yeni yonohodarude. ⁴ Yeac piratacngo bangectoa bangecmekperagi bangec ye imoc hemma dendeng kpeude. ⁵ Bangec sasawaac KEBU hau tiki yeni KEBUAC kicfu perekema kendo kereha sisingaiande, ifi isoc sisingaigecde. ⁶ Kurumenga kurumenga yeni yeac faka dindingac dekperagigec ngiha ngiha yeneng yeac kuc nga kibikperagia henggecde.

⁷ Ngic yeni nemuongaac kicfu ngonducnema numuyemmeandae nga imocac negenggec wiac engena yombong anu yoac homac osoandae. Nga nemuongangina yeni wiac fora mi meficgeyemmegecde, kpac. Yeni game kpekpeu faiyunugec eng nanggecde. Nga anutu hania hania yeni Kebuac kicfu ngonducnemigecde.

⁸ Ge anutu hania hania isingyunuma yoacngina desinadeac Siong ye imoc negemma ubangerec meficgeu Yudaac ngacnaroang yeni sogaigecde. ⁹ O KEBU, ge Anutu engenatoa yombong nga bangec sasawaac ngic kunenga. Ge anutu hania hania feracyunudacnecac afeguyombonggeni.

* 96:2: Anutungo meficnunu nenang bangecngicngacne yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereeude. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

¹⁰ KEBUNGO kpetiac ngicngacfora kekecngina onggonggeude. Ngic yeni yarefaka henggec imocac modzongina tiande, KEBUNGO yeni songogoc hoangyunuude. Ngic goa Anutu ngadehema mangana megecdeac ayemmeande, yeng ngicfora yeneac mariunac mesiyunuude. ¹¹ Ngicngac dindingac kecanda, yenearu ama wereckenude. Nga ngicngac uba kongahagoc kecdae amma herenginai ikoc nga hamangec mong mi fede, yeni sogac sogai meficgegecde. ¹² Ngicngac dindingac ngeni KEBUAC sogac sogaigoc kecma yeac kpara kpetiac yaiyo kpemibisia.

98

Bangec sasawaac ngictau
Mitiyegec.

¹ KEBUNGO faka kuhagoc nga bibiagoc meu yegec gboria heimibesonga. Ye marifoia nga fuaya kpetiac sinema ngabafora feracyunuma firang anec. ² KEBUNGO firang bic anec, imoc dekperagiyemmeec. Ye faka dindingac modacma ngicngac yoacngina dema nanggeyunei, imoc bangec monnunac ngicngac ye mi negemmidae, yeni imoc didiu edzacyunu yeni imoc kicnginango henggec. ³ Ye Israe habu yenigoc yoac dedzege amma imoc modackecde, ye imoc negenu fekecde nga ye yoara modarudeac faka mong mi nigeckpeec. Anutuninango firang anec, imoc ngicngac bangec tegiau fekenda, yeneng henggec.

⁴ Bangecfu ngicngac sasawa, ngeni sogaima KEBU dendzerenggema yegec heimibisia. Ngeni dendzerenggema oeha memima yegec heimima kpara heiwayong memibisia.

⁵ Ngeni gita kpema KEBUAC yegec heibisia. Ngeni gita kpegec yegec udumenga gombunga fingecbeso. ⁶ Ngeni trumpet nga tomengtoa ffigec musi udumeng gombunga fingecbeso. Ngeni KEBU ngictauninaac kicfu kecma yegec dendzerenggema sogac sogaigoc heimibisia.

⁷ Kondung, ge nga geac manau wiac sasawa fedae, ngeni udumengtoa meficgebisia. Bangectoa bangec nga imocac manau kecdae, ngeni ifingoc udumeng kuneng meficgebisia. ⁸ Doku ngeni mari kpegec tiki ngeni sogaima yegec ngenahafoc heibisia.

⁹ KEBUNGO desi desi ua meudeac bangecfu hade. Imocac yeac kicfu yegec heibisia. Ye faka dindingacfus bangectoa bangecac ngicngac areng isingyunuma yoacngina desima monde mondea kpac kecma nigha faka angammemengina isingga yoacfu desiude.

99

Anutu ye kpetiac

¹ KEBU ye ngictau amma ye nigha nigha garengyuu yeni dzonong fede fedegoc kecbisia. Ye kerobing botucnginau ngictau tatahau taru usocngu bangecfu mebeso.

² KEBU ye Siong manau kunennina kecde. Ye engena amma nigha nigha sasawa feracyunuude. ³ Geac kpacga imoc damu damuyagoc. Yeneng imoc dengerebisia. Kebu ye kpetiac.

⁴ Ngictau ye kuctoayagoc. Ye faka dindingac fingerudeac ammide. Geng faka mongang mongangga kpac, imoc faina seria fede. Ge Yakoboac areng yeneac botucfu faka angammemengina isingga yoacfu desima sing dindingac modacma yoacngina desinec.

⁵ KEBU Anutunina ye kpetiac. Ngeni afehema yeac haniaac tatacfu ngonducnema numumbisia.

⁶ Mose nga Arong yereng yeac womong gareng habugoc kefoc nga Samue ye yeac kpac kuneng kpacma nunumu ua mekefec. Yeni desambic ammigec yeng negengyemmem turunga merengyemmemefec.

⁷ KEBUNGO hoeng mong hereatoaac manau tacma yoac edeyunuu yeni yeac dedekperagiyoac nga singyoac tofohoma kecgec. ⁸ O KEBU Anutunina, geng ngicngac nunumungi-naac turunga merengyemmenec. Ge kopocsic wawa Anutungina amma kopocsicnginaac turunga ifingoc merengyemmenec.

⁹ KEBU Anutunina ye kpetiac. Ngeni imocac amma afehema tiki kpetiacfu emmafafoc heimima numumibisia.

100

Kebuac womonnu kenni
Ubangerecseseac mitiyegec.

¹ Bangec sasawa, ngeni KEBU dendzerenggema sogac sogai yegec heimibisia. ² Ngeni KEBU ubangerecgoc kingang kpemima sogac sogaiac yegecgoc yeac kicfu habisia. ³ KEBU ye Anutu, ngeni imoc negembisia. Yennoc meficnunuma menunuunenang yeac ngicngac areng andimbe. Nga yeac ngicngac areng amma yeac rama habufora amma yeac oda manau kecdimbe. ⁴ Ye ubangerec ammima yeac nagutoau embesonga amma ama sobengau dedengerecac yegec heibesonga. Yeac ubangerec dema yeac kpac kuneng kenehebesonga.*

⁵ KEBU ye gombunga. Yeng yoac dedzege amma imoc modackecde, fakaya imoc nasoya nasoya feengkefude. Ye yoara modackecde, imocngo fingecsahengina fekefudesoc, yenearu feengkefude.

101

Yoac deserima deec
Dawidingo mitiyegec yofi heiec.

¹ O KEBU, gearu yoac modac modac faka fede. Nga sing dindingac modacma yoacngina desinade, imocac yegec heigembade. ² Ni kopocsiha kpac kecma sing imohai kengkebadeac negensima kecduae. O, ge dafinenggac nearu hanade? Ni ngic ogofocna mong mi memanganeyunuma herenau dindingac nga kopocsicna kpac kecma amanau kecbade. ³ Wiac mongngo sinna gombunga memanganenuudeacsoc anu ni kic imohai naric mi fibade. Ngicngac sing segema negen negensingngina kpac kecanda, yeneac uaac modzona tiu wiac imocngo nigoc mi kpeketaheude.

⁴ Herenau sing gombunga modacma imoc naric mi wabade nga kekec mangana imoc nigoc kpac. Yare faka hania hania, imocac negen negeng nearu mi febeso. ⁵ Mong ye ogea wegenac kecma yeac ngadeyoac sufufu deude, ni ngic ifia memanganeba kpac ambeso. Ngic mong ye yengenaac negenu wiac engena anu ngic ogofora yenemma yeneac negenu mamea angande nga hereau ubakpekpe faka meande, yeac modzona tiude.

⁶ Bangecnau yoac modac modac ngic nigoc kecgecdeac kicna yenearu fima negembangereeuude. Mong ye kopocsiha kpac kecande, yeng neac kingang ngic amma uana mebeso. ⁷ Ngic mong ye faitobang amma ngicngac ikocfu faiyunuande, yeng neac amau mi kecbeso. Nga ngic mong ikocyao deande, yeng neac hoannu naric mi kefude.

⁸ Ngic Anutu ngadephema mangana megecdeac ayemmeande, yeni asoacsoc bangecfu memanganeyunudacba kpac anggecde. Ni yarengic sasawa meicyunuba kpac anggecde. Yeni KEBUAC taonnu mi kecbisia.

102

Ge ngictau tatacgau tacna
Kucmamango KEBUAC kicfu hama desambic amma yoac yofi edede.

* 100:4: Anutungo meficnunuu nenang bangecngicngacnece yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereeuude. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

¹ O KEBU, ge nunumuna negenna memeficac kiacba imocngo gearu habeso. ² Ge neac ebicasou kicga nearu mi sufuma kedzacga nearu faina. Ni kpacguba turunga bic merennenna.

³ Uamemena imoc hosuc ereande, ifi isoc erema kpac anggec sicnango gerea yombong amma gerec isoc dzekede. ⁴ Kpindzing herecgegec dzanggema homeande, herenango ifi isoc dzanggede. Kucna kpac yombong anu yaka nenenanigecnude. ⁵ Ni kpendzeng kpema kunengngoc arohoduaeac amma sebi fusinango kemma sicnau kpeketahade. ⁶ Ni bangec gbangge gbanggeau kpendzo neng isoc anduae nga kpabekuruc mong amabangec sesuhau kecde, ifi isoc kecduae. ⁷ Ni gaugbori kecba neng mongngo ama witiau tembuha tacande, imoc isoc anduae.

⁸ Ngabafocna yeneng asoacnac kemma marai game kpekpeu fainuma deendema anemma kpacna soweckegecde. ⁹ Ni ic sogong nebadeac anenu hamango yakana angkecde nga kickumanango sokocfu kemema dokuna anu nekecdue. ¹⁰ Ge ubaga manganeu ngaba anennec, imocac menu emma ukununa mayai. ¹¹ Uamemena sasawa maraiac organinango hereeande, ifi isoc ande nga ni kpindzing isoc homema dzanggedue.

¹² O KEBU, ge nasoya nasoya ngictau tatacgau tacna geac kpac kuneng imoc ngicngac fingecsahefina fekefudesoc, nenearu feengkefude. ¹³ Ge monggoc yacma Sionggac ubaga manganeu. Yagucnoc ubamangang amminadeac naso memea hade. ¹⁴ Kingang ngicngacfocga yeneng Sionggac hoc songea negemma yeac sendunggac ubamangang negendae.

¹⁵ Bangeha bangeha ngicngac yeneng KEBUAC kpac kunenggac kengec amma eweheimigec bangecfu ngictau sasawa yeneng geac kuc nga kibikperagigaac ewea heibisia. ¹⁶ KEBUNGO Siong ama monggoc mema heigboriu kuc kibikperagiagoc fingectegeru henggecde. ¹⁷ Ye ngicngac makpekpea neneac nunumuac kedzac faiu wicac desambic ammini imoc naric mi waude.

¹⁸ Ngicngac fingecsahe ngade anggecde, yeneac amma yoac yomoc kibiu ohogec ngicngac yeneng ngade fingecma KEBU eriendzong memibisia.

¹⁹ “Ye yengena kpetiac tikiau wi tacma kiwa fiu maec. KEBUNGO kurumennunac kiwa fima bangec henec. ²⁰ Ngic witicamau kecdae, yeng kiacngina negemma kiwa bangecfu fima homecac areng yungecyunuudeac kiwa fiu maec.” ²¹ Ifi anu KEBUAC kpac kuneng Siong taonnu dekperagibesonga nga Yerusarennu eriendzong memibesonga. ²² Ngiha ngiha yeni ngictau areng yenigoc kpeturanggema KEBUAC kicfu ngonducnema numumigecde.

²³ Ye kucna dzongiau memama uameme nasona mewegeneu ²⁴ deai, “O Anutuna, ge kifaga nasoya nasoya ngicngac fingecsahefina fekefudesoc, imoc feracyunuma feengkefude. Ge uameme nasona dzongiau herecgeba mi meicnuna.” ²⁵ Ge hanac hanaheaunacngoc kecma bangecac titiseri fainec seria fede. Kurumenga kurumenga yeni geangga marikibinoc. ²⁶ Wiac imoc sasawa yeni kpac anggec, fora. Nga ge sifu kecengkecnade. Yeni ngakpi isoc esea anggecde nga wamba hesikpe amma ukuandimbe, ge ifi isoc wayunuma gboria fainade.

²⁷ Geng nasoya nasoya siric ifiangoc kecengkecnade nga geac kifaga imoc wisic wisickea kpac. ²⁸ Geac kingang ngicfocga yeneac nambaracfocngina, yeneng geac hoannu kecgec geng esamedacfocngina hoanggau faiyununa yeneng gegoc serima kecgecde.

¹ O ubaongana, ge KEBU kenehena.* Wiac sasawa neac manau fede, imocngyo ac kpara kpetiac kenehebeso. ² O ubaongana, ge KEBU kenehena. Yeng faka gombunga anggenec, imoc mi nigecgubeso.

³ Geng ngicngac ogofocga memanganeyununa yennoc kopocsicga imoc waude. Ye hafeidzoicga sasawa mengerema ⁴ kekecga bummema homecfunac mesiude. Yeng yoac dedzege amma imoc modacma wosoefac anggenu imocngko kekecgau iraga isoc anude. ⁵ Ge wiac monggac anggenu yeng wiac kereng kereng genu soha anu naric yombong kecnade. Huncoc neng ye dzoea heigboriu sebigbori isoc angande, imoc isoc sebiga monggoc gboriude.

⁶ KEBUNGO ngic garengyunuu goango ngic ogofocngina ebicfu faiyunugec ubaebicgoc kecgec yeng sing dindingac modacma yoacngina faka dindingacfuisinggema desiude.

⁷ Ye singa Mose edzahama uaya mema Israe habu imoc edzacyunuec.

⁸ KEBUNGO wosoefac anemmemma neneac ubamangang negemma ngaba bic mi anude. Ye yoac dedzege amma imoc modacke, faka imocngko yearu wiac engena. ⁹ Ye nasosoc mesuninau mi nunukefude nga ye ngaba nasoya nasoya mi mekefude. ¹⁰ Nenang kopocsic meficgeing, ye imocacsoc faka mi anemmeude nga fakanina manganaac siricfu turunga mi kpounemmeude.

¹¹ Ngicngac yeneng eweheimigec yeng yoac yenigoc dedzege amma imoc modarude. Yeac faka siriha yofi, kurumenga kurumenga yeni bangec ferahama wi enggec fedae, ye ifi isoc ngicngacfora yeneac songo efea kpac negenude. ¹² Wenac ere erea imocngko keme kemeagoc wegenac naric mi tacde, imoc herea yombong. Nenang singyoac kpema mangana meficgeing, ifi isoc imoc meickeu nenanggac hereau kenude.

¹³ Manggac mongngo nambaracfora yeneac ubea manganeu hoangyunuande, ye ifi isoc ngicngac KEBU eweheimiandae, yeneac ubamangang negemma hoangyunuude. ¹⁴ Nga dafiu fingering, imoc yeng negende. Nenang sendungsac, ye imoc negennu fede.

¹⁵ Kpindzingngko manennu kpafuya kpeande, imoc uameme nasoya wegenacsac ande. Nga bangecfu ngic ye uameme nasoya ifi isoc ande. Dzaring dzuria sabayagoc anu

¹⁶ firanggo mefiranggeu morongge mama kpac anu wiac imoc tacande, tatahanggo imoc monggoc mi negenude. Ngic ye kekeha bangecfu ifi isoc ande, fora.

¹⁷ Nga KEBUNGO sifu yoac dedzege amma imoc modarude. Ngicngac yeneng eweheihei ammigec yeng nasoya nasoya hoangyunuma kecengkefude, fakaya dindingac imocngko nambarac nga esamedacfocngina fingecgecdesoc, yenearu fekefude. ¹⁸ Nga ngicngac yeneng yeac dzadzahac seria modacgec yeng ifi ayemmeude. Nga ngicngac yeac nonoyoac negenggec fede, yeni ifingoc ifi ayemmeude.

¹⁹ KEBUNGO ngictau tataha kurumenga kurumenga fekendaeu tatahau faiu seria nande. Ye ngictau amma eucererenga wiac sasawa feracyunuma mingina ande. ²⁰ O KEBUAC angelo, ngeni ye kenehebisia. Yeac areng kucnginagocngko yeac yoac negengkecma yoara tofohoma ua mekecdae nga yeac ubaudumeng negenggecdeac kedzac kpeandae, ngeni ye kenehebisia.

²¹ Kurumenggac wasai arengfora nga kingang ngicngacfora yeac songo modacandae, ngeni KEBU kenehebisia. ²² KEBUAC marikibifora sasawa bangecfu yeac bageau kecdae, ngeni sasawango KEBU kenehebisia.

O ubaongana, ge KEBU kenehena.†

* 103:1: Anutungo meficnunu nenang bangecngicngacnece yuria kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereude. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.) † 103:22: Anutungo meficnunu nenang bangecngicngacnece yuria kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereude. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

¹ O ubaongana, ge KEBU kenehena. O KEBU, Anutuna, ge engenatoa yombong amma eweheihei nga ngictauac kuc kibikperagiagoc heima kecannec. ² Ngicngac yeneng wamba heiandae, ge ifi isoc kperagiango kperacemema kecnec. Geng kurumenga kurumenga meficyunuma kporucbedzo isoc kpedziyununa fekendae. ³ Ge ama managaac kpete doku witiau mena hoeng imoc geac keretac anu geng firanggac kpegang mema witiau tacma kisanna firanggo meguma kenude. ⁴ Geng firang sueyununa yeneng yoacga mema kenggec gerekborang uayoac edeyununa yeneng kingang kpegenggecde.

⁵ Geng bangec mena imocngo goroc goroc amma kengha ambacac ge imoc titiseria tatahau fainecac wiac mongngo meu goroc goroc naric mi anude. ⁶ Geng dzohongtoa mema imocngo bangec kperahana kporuc isoc heiu kemeu dokungo tiki feracyunuma feu ⁷ geng doku yoac ngabasiric edeyununa yeni kengec amma woradacgec. Ge parandanggac mingina nga doku yeneng geac parandang udumeng negemma kengcyunuworagec. ⁸ Ge tiki kperemeng tatacngina deseriyemmena tiki yeni yacgec kperemeng yeni kemema ihai fegecde. ⁹ Geng kpetengina faina feu bangec monggoc sembauac ferahegecdeac kpae heiyemmenec.

¹⁰ Ge bangec keme kemeau doku kiwa faina doku kucgoc hakecma tiki botucngina mama feec. ¹¹ Fema manennu yang sasawa doku gumcyunu nekecgec kateu donggi yeneng dokuac homema doku imoc nekecgecde. ¹² Kateu neng yeneng faecngina doku tegiau mema ihai fema ic fawau tacma arohogecde.

¹³ Ge wi amagau tacma tiku doku kpema uaga mema kecna foragoc anu bangecngo foranegebec anude. ¹⁴ Geng kpindzing dena fingeru ramaburumakango imoc negebecde. Geng dzaring nga semeng meficgena fingeru ngicngac neneng semeng ua meni bangecfu yaka fingerudeac edena neandimbe. ¹⁵ Ngichereu ubangerec fingerudeac waing meficgenec nga ngicngac kicsiricnina pirac pirac anudeac geng kerec meficgenec. Amma ngicngac herengina kucgoc anudeac yaka meficgema yemmenec.

¹⁶ KEBUNGO Rebanong bangecac yomondzoc ic homecyunuma doku efea kpac kpeyemmeu nekecgec ¹⁷ neng yeneng faecngina ihai megec kpendzo neng ye faeha yomondzoc icfu mema ihai fegecde. ¹⁸ Tiki kuneng herea yeneng kate noning yeneac amabangec nga mandzang yeneng hoc peperandzi singau sufuma kecgecde.

¹⁹ Geng aflo faina imocngo kifasoc kecnideac kpete angkefu wenac yengenaocngok keme keme nasoya negenude. ²⁰ Geng kundung faina ama toforeu kateu yang yeneng kenghaanggecde. ²¹ Raiong yang sebigbori yeni Anutungo yakangina meficgeudeac negemma yang yunuma negecdeac kucgoc arohogecde. ²² Wenac eru yeni monggoc meickema faecngina kemma fegecde.

²³ Imohai ngicngoma uayau kemma ua mema kefu ama marai anude.

²⁴ O KEBU, ge wiac hania hania medacnec, imocac kpetea engena yombong. Ge negen negentegecgango imoc sasawa mena wiac sasawa kekecnginagoc yeneng geac marikibiga amma bangec mewakedae. ²⁵ Kondung ye kuneng kpererema edi feu kondungyang nga yang kuneng kapia hania hania homac yombong imocac manau fedae, yeneac kpete naric mi osodacnide. ²⁶ Wage yeni imohai kengha angkecdae. Nga geng kondunggac kondungyang kuneng ifingoc meficyununa yeneng kondunn yuengyuma anggecde.

²⁷ Wiac imoc sasawa yeni kicngina gearu figec geng nasoya hau yaka yemmenadeac negeung kecgec ²⁸ geng wiac yemmena imoc mekecgecde. Geng mariga mederena yeni wiac gombunga homac negebec angkecdae.

²⁹ Ge kicga yenearu sufuna yeni kpidohoma kengcyunuude. Ge asungina wangcyununa yeni homema bangecngina monggoc dzigenegede. ³⁰ Geng meficyunuma Asuga monggoc fifina yeneng monggoc gborigecde. Ge bangecac siriha heigborikecna monggoc gboria fingerude.

³¹ KEBUAC kuc nga kibikperagi imoc nasoya nasoya feengkebeso. KEBUNGO maribia hemma ubangerec negembeso. ³² Yeng kiwa bangecfu fiu bangecngo dendeng kpeu mariango tiki kpesereyuu tikingo hosuc kpegecde.

³³ Ni kekecna kecbadesoc KEBU yegec heimbade. Ni kekecna kecma Anutu den gerekebadengoc. ³⁴ Ni KEBUARU sogac sogai meficgekecma yeac wiac hennegeng angkecba yeng imocac negenu ngereebeso. ³⁵ Ngic kopocsicgoc bangecfunac meicyunubesonga nga ngic Anutu ngadehema mangana megecdeac ayemmeande, yeni kpac ambisia.

O ubaongana, ge KEBU kenehena.* KEBU eriendzong memini, hallelu Yac.

105

Fora meficgeude

¹ O ngicngac, KEBU ubangerec memima yeac kpac kuneng hofocbesonga. Yeng ua sasawa meande, imoc ngiha ngiha dekperagiyemmemma edeyunugec yeneng imoc negendacisia. ² Ngeni yeac yegec heimibisia. Ngeni dedengerec yegec heimima yeng ua bibiagoc meande, imoc ngicngac edeyunubisia. ³ Yeac kpara kpetiac. Ngeni imocac negenggec wiac engena ambeso. Ngicngac KEBU hofocandae, ngeni sogaibisia. ⁴ Ngeni KEBU hofocma yeac kuhaac kic fima yeac hoannu kemma kecgecdeac nasosoc angemmebeso. ⁵ Yeng ua bibiagoc amma kucfaka bibiagoc mekecma desi desiyaoac enarango dekefec, ngeni imoc negenggec febeso. ⁶ O, yeng ngeni meisingngunuec. Ye kingang ngiha Abarahanggac gboricfora nga Yakoboac medacfora meisingngunuec.

⁷ Yennoc KEBU Anutunina nga yeng ngicngac yoacngina isinggema desiude, faka imoc bangecfu sokoma fede. ⁸ Ye dzadzahac meec, imoc nasosoc negensima dedeseriyoac edengunuec, imoc ngicngac fingecsahengina fekefude, imoc andenga tauseng feenude, imocacsoc negensima kefude. ⁹ Ye Abarahanggoc dzadzahac imoc mema Isakaac yoac deserimima edema ¹⁰ Yakoboaru dedeseriyoac imocnoc meserima Israegoc dzadzahac imoc fefeseri feudeac dema ¹¹ yofi deec, “Ni maridzoming arenna Kanaang bangec ge gembade, imocnoc geac bangec noboha anude.”

¹² Ngicngac imoc yeni kpetengina kuneng kpac. Yeni ngicngac efeanecsac amma bangec imohai kemma kuric kecgec. ¹³ Bangecareng yeneac bangecngina fekende, yeni imohai yerecgema ngictau monggac bangec yerecgema ngictau monggac bangecfu kengkecma ngicngacareng mong yenigoc kecma wayunuma monggaru kengkecgec.

¹⁴ Kebungo ngic kpae heiymmeu mongngo mong ebicfu mi faiyunuec. Ye yeneac amma ngictau yoac ngabasiricfu ayemmemma ¹⁵ yofi edeyunukefec, “Ni ngic meisinggema keredokungo nadzicyemmeai, ngeneng mi kpeseryunubisia nga profetefocna mangana mong mi ayemmebisia.”

¹⁶ Yeng bangec imohai boditoa fingerudeac edeec, imohai nenesemengngina sasawa kpetotieu kpac anudeac negemma ¹⁷ ngic mong bic sueu waraiyemmeec, imoc Yosefe. Yeneng ye wanac ngic anudeac dema suema dzo megec. ¹⁸ Yeni hania ic gigidangau faima ubiau becsac aiengngo memea dzegergec.

¹⁹ Yeng ifi kefu yeac kpefing yoac dedea, imoc erema heiu KEBUAC yoacngo Yosefeac hania tobanggeu seriec. ²⁰ Seriu Aigita yeneac ngictaungo ngicfora sueyunuu kemma Yosefe yungecgec. Ngiha ngiha yeneac ngictaungo Yosefe witicfunac yungerec.

²¹ Ngictaungo ye amea manaac enara faiu yeng iwaiya sasawa garenggeudeac uayoac demiec. ²² Demiu Yosefengo songeaac arenna ngictauac medacfora dederecge ayemmemma ngic enarafora negen negentegec edekpou ayemmekefec.

²³ Ifi anu Israe yeneng Aigita bangecfu hagec. Yakobongo Hanggac bangecfu kuric kefu

²⁴ KEBUNGO ngicngacfora meficyunuu fingecsahe kuneng nga kucgoc amma ngabafocngina yeneac kuc ferahagec. ²⁵ Ferahegec yeng Aigita ngic yeneac negen negeng merenu yeneng ngicngacfora ubango ukuyunugec. Yeni yenahafof yoac denegeng amma Kebuac kingang ngicfora faitobannu faiyunugec.

* 104:35: Anutungo mefincnunuu nenang bangecngicngac nec yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereeude. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

²⁶ If anggec Kebungo kingang ngiha Mose suema Arong ifingoc meisnggeu ²⁷ yereng yeneac botucfu faka kuhagoc meoc. Yeri Hanggac bangecfu kucfaka mi hehena mekefoc.

²⁸ Anutungo kundung sueu bangec mekundungkpeu yeneng ine yeac yoac kpema wagec. ²⁹ Ye dokungina sasawa heimerenu sac andaru kondungyang kpebucyuuu homedacgec.

³⁰ Sepeng yeneng hama bangecngina sokodacma ngickunengfocngina yeneac fefemanninaungoc engkecgec. ³¹ Yeng yoac deu dawec nga dokuac mogobisic habutoangi-nagoc hama ama bangecngina sasawa sokodarec.

³² Yeni kia kpeudeac negenggec yeng nomanggbomea yemmeu piratacngo amabangecngina sokoma heidarec. ³³ Yeng waing icngina kpezamema fig ic amma icngina goa bangecnginau kpetackedarec.

³⁴ Ye ipua yoac edeyuuu yeneng hagec. Ipu gboria kucnginagoc hagec, yeneac kpetengina naric mi mebesonga. ³⁵ Yeneng hama bangecfu wiac maria tengging tengging sasawa nedacma bangecnginaac semeng nedacgec kpac anec.

³⁶ Yeng bangecnginau warac medacfocngina sasawa kpebucyunudacma kucnginaac fora warac fingegec, yeni kpebucyuuu homedacgec.

³⁷ Imoc sasawa fingeru wisickeu ye Israe habu meyunuu Aigita bangec wama kenggec. Yeni siriwa nga gol momoc mema kenggec yeac ngicngac arengfora yenearunac mongngo mi tifainggema makpeec. ³⁸ Aigita ngicngac yeneng Israe ngicngac yeneac homac kengcyunuecac amma yeneng wayunuma kenggec, imocac ubangerec negenggec.

³⁹ Anutungo hoeng tiameu imocngo kperacngina amma witinginau feu tofocnac gerec yemmeu imocngomekperagiyunuec. ⁴⁰ Yeni kpesimigec yeng neng negecdeac yemmemma kurumenggac yaka efea kpac yemmeu negebec anggec. ⁴¹ Ye hoc kpendziru doku dundungngo mama bangec dokuya kpac, imohai dzuamagoc mekeng feec.

⁴² Nocac ye dedeseri kpetiac deserima bic deec. Nga ye kingang ngiha Abarahang, yeac ifingoc negenu feu ⁴³ ngicngacfora sogac sogaigoc wangcyunuec. Ye meisngfora hesicyuuu yeni yegec heima arohoma sogaima kenggec. ⁴⁴ Yeng bangec monnunac ngicngac yeneac bangec wangcyunuma meisngngicngacfora imoc yemmeu ngicngac yeneac semeng uaac mingina amma fora mema nekecgec. ⁴⁵ Yeneng yeac singyoac mekecma dedeseri yoara seria modacgecdeac ifi anec.

KEBU eriendzong memini, hallelu Yac.

106

KEBU eriendzong memini

¹ KEBU eriendzong memini, hallelu Yac. KEBUNGO yoac dedzege amma imoc modarude nga wosoefaha imoc nasoya nasoya feengkefude amma ye gombunga, imocac ubangerec membesonga. ² KEBUNGO faka kuhagoc mekecde, ngicmongngo kucfaka ifia naric mi deude nga ye kucfaka imoc dengereudeacsoc kpac.

³ Ngicngac sing dindingac nasosoc modacbeso ayemmeande nga faka dindingac angandae, yeni kenecnginagoc. ⁴ O KEBU, ge ngicngacfocga gombunga ayemmema neac ifingoc negenna febeso. Ge ngicngac ebicfunac mesiyunuma ni ifingoc meficnubesena.

⁵ Geng ngicngacfocga meisngyununa yeni naric kecma wiac monggac mi obohogecde, imoc hembeso anende. Ngicngac arengfocga yeneng ubangerec negengandae, imoc hemma sogaibadeac anende. Geac maridzoming ngicngacfocga yeni sogaima ge dengeregugecde, imohai ni yenigoc sogaibadeac anende.

⁶ Warac mangesafocnina yeni kopocsic meficegec nenang meficyunuma Anutu ngadehema mangana menideac anemmemu ngicngac ogofocnina memanganeyunuma faka mangana ayemmeing. ⁷ Esangabofocnina yeni Aigita bangecfu kecma geac kuc fakaga bibiagoc hengwa anggec. Geng yoac dedzege amma imoc modacnade, imoc wiac engena. Yeneng ine imoc nigecyuuu kondung sacsac tegiau kecma Anutu

Engenatoaac yoac kpegec ⁸ ye yengena kparaac amma ebicfunac mesiyunuma kuhaac haniamekperagiyemmeec.

⁹ Yeng kondung sacsac yoac ngabasiric ammiu gbanggeec. Nga yeng dzohong keme kemeausing bangec gbangge gbanggeau kengandae, ifi isoc wangecyunuma nobocgeng enec.

¹⁰ Ye ifi amma ngic ngadeyunugec, yeneac mariunac mesiyunuma ngabafocngina yeneac kucfunac mesiyunuec. ¹¹ Doku imocngo ngabafocngina semeyunudaru kpac anggec yenearunac mongngo mi kefec. ¹² Ifi anu yeneng yeac yoac negensinggema dedengerec yegec heimigec. ¹³ Nga yeni ine bic yombong ye uaya mekefec, imoc nigecyuu yoac dederecge ayemmeudeac tomai mong mi anggec. ¹⁴ Yeni bangec kisiu yakaac songo kuneng negemma imoc mi garenggema bangec gbangge gbanggeau Anutu faitobannu faigec. ¹⁵ Nga ye wiac mong yemmeudeac derecgegec, imohai yeng imoc yemmema hafei kuneng mong botucnginau sueu yenearu haec.

¹⁶ Anu ngic yeneng kporucbedzongina nangkenec, ihai kecma Moseac keracmangang amma Arong, KEBUAC kpetiacngic, yeac keracmangang ifingoc anggec ¹⁷ bangecngo anggema Datang gbokoma Abirang arengforagoc semeyunuec. ¹⁸ Gerecngo mama ngicngac yeni modacyunu kecgec, yeni sasawa yonohoec. Gerecborangngoyarengic yonohodarec.

¹⁹ Anu yeni Horebe tikiu kecma burumaka medahaac ongea mong mema nemuonga aiengngomo, imoc eweheimima numumigec. ²⁰ Yeni Anutuac kuc nga kibikperagia wama imoc merenggec burumaka kpindzing neande, onga imocngo yeac tataha meudeac negemma faigec. Faimafafoc heimima numumigec.

²¹ Anutu memengerecnginango Aigita bangecfu faka kuneng mekefec, yeac nigecyuuuec. ²² Yeng Hanggac bangecfu kucfaka bibiagoc mema kondung sacsacfufaka kicfuria meu kerectegec anggec. ²³ Yeneng ifi anggec yeng kpetotieyunudeac deu Mose meising ngihango Anutuac kicfu namma yeac herebu menomaneec. Ye ifi mi nambac dede Anutungo kpetotieyunuu kpac ambau.

²⁴ Anutungo yoac deserima deu yeneng imoc mi negensinggema bangec gombunga yemmeu megecdeac dedea, imoc ngadehegec. ²⁵ Yeni kporucbedzonginau Anutuac pandzeng kpouma tacma KEBUAC ubaudumeng negemma imoc mi tofoghogec. ²⁶ Imocac yeng maria miacma yoac yofi deserima deec, "Ni bangec kisiu yunuba homema fedacbrisnia nga ²⁷ esamedacfocngina medereyunuba bangeha bangeha ngicngac areng yeneac botucfu kecgecde. Yeni ifi kecgec ngicngac yeneng yunukpebuc ayemmegec neng bangeha bangeha fekendae, imohai sueyunuba singsarang kpema kecbisia."

²⁸ Imocac witiau yeni Peore tiki Baari nemuac ongagoc kpekete hama kecma nemuonga homemea yeneac sesegerec oho ohoya, imoc nekecgec. ²⁹ Yeni ifi amma KEBUAC here miacgec yeng angammemenginaac amma ngaba ayemmeu hafei mangana mongngo yenearu fingerec.

³⁰ Anu Pinehasingo sifu yacma KEBUARU nunumu ua meu hafei mangana imocac kuha mau kpac anec. ³¹ Yeng ifi anecac amma fingecsahe feerekecgecde, yeni sasawango Pinehasiac fakaya dindingac, imoc negensikecgecde.

³² Anu yeni Meriba dokuu kecma KEBU ngaba ifingoc maficgemigec Mosengo yeneac ebicac amma ebicfu enec. ³³ Yeneng Moseac asu mehodungaigec yeng yoac mi negentegecma deec.

³⁴ KEBUNGO dederecgeyoac ayemmeec nga yeni ine ifi isoc habu goa mi kpetotieyunuma meicyunugec, kpac. ³⁵ Yeneng ine bangeha bangeha ngicngac areng yenigoc kengha amma yeneac faka arenggema imoc modacgec.

³⁶ Yeni yeneac nemuonga hania hania modacgec. Faka imocngo botacngina amma mendangyunuu ³⁷ yeni naroangmedacfocngina meyunuma kpebucyunugec. Faka imocngo asu manganaac hosuc heiyemmekecgec. ³⁸ Yeni nambaracfocngina yeneac sac kopocsihakpac kpakegec ac bangecngina seuhagoc anec. Yeni naroang medacfocngina sese dema

kpebucyunuma Kanaang bangecac nemuonga yeneac sesegerec ohogec bangecngo sacac kopocsicac seuhagoc anec.

³⁹ Ngicngac yeni angamemengina ifia angkecgecac amma uba seucnginagoc amma Anutuac kicfu yeni kaisero sirci anggoc.

⁴⁰ Imocac KEBUNGO ngicngacfora ngaba ayemmemma maridzoming ngicngacfora yenenu seucnginagoc anggoc negemma modzea tiu wayunuec. ⁴¹ Wayunuma bangec monnunac ngicngac ye mi negemmidae, yeneac mariu faiyunuu yeneng ubango ukuyunuma garengyunugec. ⁴² Ngabafocnginango ebicfu faiyunugec ubaebicgoc kecgec yeneng meyunuma memayunuma kucngina bageau faiyunugec. ⁴³ Kebungo naso homac ebicfunac mesiyunukefec nga yeneng ine yoackpekpengic amma faka imocsac negensima kecgec. Yeni ngicngac ogofocngina memanganeyunukecgecac yeng memayunuu memeficac obohoma ⁴⁴ kpendzeng kpekecma kiacgec, fora. Nga yeng sifu ebicngina negensima memeficac kiacngina negenec.

⁴⁵ Ye warac dzadzahac yenigoc meec, imoc yeneac amma negenu feec. Yeng yoac dedzege amma imoc modackecde, imocngo efea kpac femideac amma yeneac ubamangang negengkefec. ⁴⁶ Ngic witicfu faiyunuma meyunuma kecdacgec, yeng faka ayemmeu yeneng yeneac ubahodung negenggec.

⁴⁷ O KEBU, Anutunina, ge ebicfunac mesinunuma bangec monnunac ngicngac ge mi negenggudae, yeneac botucfunac menunuma kpedzucnununa. Geng ifi anna neni geac kpacga kpetiacac ubangerec negemma homac dengereguneide.

⁴⁸ KEBU Israeac Anutu, ye nasoya nasoya kenehebesonga. Imoc fehereema fekecbeso. Ngicngac sasawango yofi debisina, "Imoc Fora." KEBU eriendzong memini, hallelu Yac.

MITIYEGEC KIBI 5

107

Mitiyegec 107-150

Amabangec gombunga meficgeec

¹ KEBU ye gombunga. Ye yoac dedzege amma imoc modackecde, fakaya imocngo nasoya nasoya feengkefude. O, ngeni imocac ubangerec memibisia. ² KEBUNGO ngicngac bummenunuma ebicfunac mesinunuec, ngeneng ifi dekecbisia. ³ Ngeni bangeha bangeha kecgec yeng imohacnac mengunuec. Goa ngeni wenac ere ereau kecgec nga goa wenac kemeu kemeau kecgec. Goa ngeneng not bigeng kecgec nga goa saot bigeng kecgec nga yeng imohacnac mengunuma kpedzucngunuec.

⁴ Goa ngeni taong monnu kemma kecgecdeac sing hofocma bangec kisi gbangge gbangeau kengha angkecma ⁵ yakaac nga dokuac homema ubaongangina herenginai homeec. ⁶ Ngeni ebicfu ifi kecma KEBUARU kiacgec yeng kpendzeng imohacnac mesinunuma ⁷ sing wegenacf u wangecngunu kengkecma taong nga amabangec gombunga meficgengemmeu ihai kecgec.

⁸ KEBUNGO yoac dedzege amma imoc modackecde, ngeni imocac ubangerec memibisia. Yeng bangecngic medacfocngina meficngunuma faka bibiagoc mekecdeac ngeni ubangerec memibisia. ⁹ Mongngo dokuac ammiu yeng doku miu negebec anude nga mongngo yakaac homeu yeng wiac gombunga miu neu gebeckpeude.

¹⁰⁻¹¹ Goa yeni Anutu Engenatoa yeac yoac kpema dederecgeyoara ngadehekecgecac kundung manau kengkpung hakpung anggoc witicngi witicyunugec tacandae, ifi isoc tacma kpendzeng kpegec. ¹² Yeni uatoa mekecgec herenginango kuha kpac anu bangecfu mayunuu mongngo mi meficyunuec.

¹³ Yeni ebicfu ifi kecma KEBUARU kiacgec yeng kpendzeng imohacnac mesiyunuma ¹⁴ kundung dzic imohacnac meyunuu erema witicngina herecgeec.

¹⁵ KEBUNGO yoac dedzege amma imoc modarude nga yeneng imocac ubangerec memibisia. Yeng bangecngic medacfocngina meficyunuma faka bibiagoc mekecdeac ubangerec memibisia. ¹⁶ Yeng nagu seria aiengngo memea sasawa, imoc hembarackeu aiengngo kpahei heihea imoc kpetackeude.

¹⁷ Goa yeni kopocsicac fakagoc kecgecac hafei ayemmeec. Yeni ngicngac ogofocngina memanganeyunugecac amma kpenzeng kpekecma ¹⁸ yaka negecedeac mi ayemmeu yaka sasawa wama homecac naguu heima fegec. ¹⁹ Yeni ebicfu ifi kecma KEBUARU kiacgec yeng kpenzeng imohacnac mesiyunuma ²⁰ yoara sueu mama hafeingina mengereu wiac kpetotieyunuu kpac ambeso anggec, imohacnac mesiyunuec.

²¹ KEBUNGO yoac dedzege amma imoc modacke, yeneng imocac ubangerec memibisia. Yeng bangecngicac medacfocngina maficyunuma faka bibiagoc mekecdeac ye ubangerec memibisia. ²² Yeni ubangerec sese ohoma yeng uaya sasawa mekecde, imocac oyang boyang memima imoc ngicngac edeyunubisia.

²³ Goa ngeni kondunnu wageu emma kenggec nga goa ngeni dokutoau kengkecma finac mehama ngicngac yenearu suegec. ²⁴ Ngeni ihai kecma KEBUNGO ua kuneng sasawa mekefeci, imoc hengkecgec. Ngeni yeac ua bibiagoc kondunggac keme kemeau henggec. ²⁵ Yeng enacngo deu firang kucgoc kpema kondunggac siri miaru kucgoc kpeu ²⁶ wagenginango sawau yombong emma emu keme kemeau yombong kemegec ngic ngeni ebic imoc hemma ongangina worau kengcngunuec. ²⁷ Ngeni kicngina gigiu ngic doku seria neandae, ifi isoc goroc goroc amma kengha amma negen negengngina mi ireckeec. ²⁸ Ngeni ebicfu ifi kecma KEBUARU kiacgec yeng kpenzeng imohacnac mesingunuma ²⁹ firangnomang menomaneu kpac anec nga kondung siri menomaneu ning kpema feec. ³⁰ Kondung kuha mau ngeneng ruaegoc kecgecac ubangerec negenggec. Nga yeng wangecngunu ngeni ihai me ihai kembesonga negenggec, ihai kengsikegec. ³¹ KEBUNGO yoac dedzege amma imoc modacke, ngeneng imocac ubangerec memibisia. Yeng bangecngic medacfocngina maficngunuma faka bibiagoc mekecdeac ngeni dangge memibisia. ³² Ngeni habu yeneac kpekpeturannu Kebu oyang boyang memima enarafocngina yeneac botucfu namma ye eriendzong memibisia.

³³ Yeng dokutoa heimerenu bangec gbangge gbanggea anggec. Nga doku kiwagocngo kerengaima bangec gbangge gbanggea anggec. ³⁴ Ngicngac areng goa yeneng bangecnginai kecma Anutu ngadehema mangana megecdeac ayemmeec. Imocac yeng bangec kerehagoc imoc merenu bangec kisi kondungagoc anec. ³⁵ Ye bangec kisi gbangge gbanggea heimerenu doku dzohong homac fingecgec nga bangec dzangge dzanggea merenu doku duamagoc fingecgec. ³⁶ Ye ngicngac yakaac homegec, yeri ihai faiyunuu kecma taongngina ihai megec amagerecngina seria anec. ³⁷ Yeni semeng nga waing uanginai homegec fora homac anec.

³⁸ Yeng kenecyunu nambaracfocngina homac fingecgec. Amma ramaburumakangina keneheu yeneac kpetengina mi maec. ³⁹ Ngic yeneng ebicfu faiyunugec ubaebicgoc kecma memeficac obohoma ebicfu nga ubahodunggoc kecgec kpetengina mau habu kapianec anggec. ⁴⁰ Anutungo ine ngictauac medacfora yeneac modzea tiu ebic maficgeyemema bangec kisi singa kpac, ihai faiyunuu kengkpung hakpung ihai kengkecgec. ⁴¹ Nga ngicngac yeri iwaiac obohoma kpenzennu kecgec, yeng yeri ebicfunac mesiyunu nambaracfocngina yeneng fingecsahetoa amma rama habutoa angandae, ifi isoc anggec. ⁴² Ngicngac ikoc nga hamangecngina kpac kecandae, yeneng imoc hemma ubangerec negenggecde. Nga ngic Anutu ngadehema mangana megecdeac ayemmeande, yeneng ine yoacngina waickegecde.

⁴³ Mong ye negen negentegecgoc kecde, yeng wiac yomoc hensima negentegecbeso. KEBU ye yoac dedzege amma imoc modarude, bangecfu ngicngac yeneng imoc negenghomebisia.

Anutuac dangge

Dawidingo mitiyegec yofi heiec.

¹ O Anutu, herenango efaiu udumeng gombunga amma yegec heibade. Ubaongana, ge gaunac yacna. ² O, ni ama werec wereckenggac yombong midibade nga gitakurere ngeri negenggboribesera.

³ O KEBU, ni ngiha ngiha botucnginau ge ohec megemma bangec monnunac ngicngac yeneac botucfu yegec heima ge dengeregubade. ⁴ Geng yoac dedzege amma imoc modackecnec, imocngo wiac engena amma engkecma kurumenga kurumenga fera-cyunuma enude. Nga ge yoac modac modac angkecne, faka imocngo sawau emma hoeng kpesereyunuude.

⁵ O Anutu, ge oyang boyang megengandae, imocngo kurumenga kurumenga fera-hema erebeso. Ge kucga nga kibikperagiga bangecfu faina mama bangectoa bangec sokodabeso. ⁶ Geng ngicngacfocga neneac songo negennec, neni ebicfunac mesin-ununadeac marifoigango meficnunuma nunumuninaac turunga merennemmena.

⁷ Anutungo womonga kpetiacfu tacma yoac yofi deserima deec, “Ni firang amma sogac sogaigoc Sikeng ama nga Sukocac bangec tumia medereyemmebade. ⁸ Gireac nga Manasse imoc neac, Efaraing imoc wasaiopocna nga Yuda ye ngictauyasuna. ⁹ Moabi ye dokunadzic terana nga Edonggaru hanitabena ukuma Firistia bangecfu firang amma arohobade.”

¹⁰ Dawidingo monggoc yofi deec, “Taong odaya seria fede, mongngo imohai hesicnuu kendedeac negenduae. Mongngo naric hesicnuu Edong bangecfu kendedeac negenduae.” ¹¹ O Anutu, ge wanunuma ukununudacma neneac wasaingichabugoc monggoc mi kengannec.

¹² Ngicngo meficnunuande, imoc memefihagoc kpac. Imocac geng meficnununa ngabafocnina yunubisina. ¹³ Neni Anutugoc namma kuctoaninagoc amma firang annide. Gennoc ngabafocnina tidzicyununa bangecfu fegecede.

109

Ni kopocsicna kpac

Yegecgareng yearu. Dawidingo mitiyegec yofi heiec.

¹ O dedengerec Anutuna, ge yoacga mi waickena. ² Ngic goa ge waguma mangana megecdeac ayemmeande nga faitobang ngic ikocnginagoc, yeneng memanganenubeso enacngina anggema nedzarangngina ikohagoc neac yoac mangana dema ³ ngadenuma oronnuma memangac manganeyoac denemma hania kpacf hama nugecde. ⁴ Ni songogoc hoangyunuba yeneng mesunnau nuandae, fora. Nga ni sifu yeneac numubade. ⁵ Ni faka gombunga ayemmeba yeneng turunga mangana merennenggec. Ni songogoc hoangyunuba yeneng ubango ukunugecde.

⁶ Yeni yofi dedae, “Ngic mong Anutu ngadehema mangana meudeac ammiande, ye uayoac mina yeng ngic manganaac yoac kpebeso. Ngic mongngo yoacf marifoiau namma yeac mesuyau kpebeso. ⁷ Desi desingicng ye isingga yoac desima ngic imocac manganaya hembeso nga yeac nunumuya imoc Anutungo negenu kopocsihagoc angkecde, ifi desibeso. ⁸ Kekecnasoya imoc wegenanec anu ngic mongngo yeac ngicenaraac tatac mebeso.

⁹ Nambaracfora yeneng beging anggec enemango hodzec ambeso. ¹⁰ Nambaracfora yeneng amaheidac kecma yakaac derecgema kecbisia. Yeni amabangec sesuhau kecgec imohai meficyunuma imohacnac ifingoc kporacyunubesonga. ¹¹ Ngic mong ye faka sirihu mi amma hiedzo meande, yeng finaha segereu kuricngic yeneng uayaac fora mekecbisia.

¹² Mongngo ye ubangerec mi ammibeso nga begingfora yeneac ubamangang mi negengyemmeisia. ¹³ Yeac esamedacfora meicyunugec kpac ambisia. Ye esamedacfora yeneac arennu yeac kpac meickebesonga. ¹⁴ Mangesafora yeneng ngicngac ogofocngina memanganeyunugec, KEBUNGO kopocsicngina imoc negenu febeso. Nga nonggeaac kopocsic imoc naric mi wabesonga. ¹⁵ Yeneac kopocsic imoc nasosoc KEBUAC kicfu feu hengkebeso. Ngic imoc bangecfunac meickegec kpac anu yeac nigecyunudabeso.”

¹⁶ “Ye wiac gombunga anudeac nigeckpeu makpekpea nga iwaiac obohoma kecgec, yeni yunukporac ayemmema ubaebicgoc kisangyunuma homecfu faiyunuec. ¹⁷ Ye sowecyoac deudeac songo negengkefec, imocac yeneng soweckebsia. Ye kenecyoac mi

ammiecac kenec yeac hereau febeso. ¹⁸ Ye sowec ngakpi isoc heima kefecac sowecngō sebifusiau doku isoc kemema sirau kerec isoc kemebeso. ¹⁹ Sowecngō ngakpitoaya anu kperacemebeso nga kebangau fadeng isoc anu wenacsoc dzegebeso.”

²⁰ Ngabafocna yeneng yoacfū nukecgec KEBUNGO turunga imoc kpouyemmebeso. Yeni ngadeyoac denenggec yeng ifi ayemmebeso.

²¹ O KEBU Anutuna, ge kpac kunenggac amma yoacna dema nanggenuna. Geng yoac dedzege amma imoc modackecnec, imoc fedear ebicfunac mesinuna. ²² Ni ngic makpekpea amma iwaiacl obohoma kecduae. Nga yeni herena manau woubocna kpegec tohoec. ²³ Maraiac ongango hereema tofocnac kpac angkecde, ni ifi isoc kpac ambeso anduae. Firanggo ipua mefiranggeu kengandae, ifi isoc kenduae. ²⁴ Ni yakasege kecmafafocna kuha kpac anu sicasac anduae. ²⁵ Ngic mesunau nuda, yeneng desofoc anemma orucngina kpatitickenendae.

²⁶ O KEBU, Anutuna, ge meficnuna. Geng yoac dedzege amma imoc modackecnec ebicfunac mesinuna. ²⁷ O KEBU, ge marigango wiāc imoc menec, yeni imoc negentegecbsia. O Kebu, geng ua imoc menec. ²⁸ Yeni sowecyoac dekecdae, naric, nga ge situ kenecyoac debesena. Ngicngac neac wegenac hama memanganenubeso angandae, yeni ge negemmana game kpekpeu faiyunubesong. Geac kingang ngicnggo ubangerec negemma kecbeso. ²⁹ Ngicngac mesunau nuandae, yeni eweheiheia kpac kecbsia. Imocnggo wamba isoc sangoyunubeso. Yeni gameyunuu kecdae, imocnggo ngakpitoa isoc witinginai embeso.

³⁰ Enacbobicnango KEBU oyang boyang ammima ngicngac habutoanginagoc kecdae, yeneac botucfu namma ye oyang boyang memibade. ³¹ Ngic mong ye wiāc sasawaac obohoma kefu yeng marifoiau nanude. Yeneng yeac degecde, “Ye manganaac areng amma homebeso.” Ifi degec Anutungo ye yeneac mariunac mesiude.

110

Ngictau uau faigec

Dawidingo mitiyegec yofi heiec.

¹ KEBUNGO neac Kebuna yofi edeec, “Ge marifoinau tacmaa ngabafocga hanigaac bageau faiyunuba yeni hanigaac tatac anggecde.”

² KEBUNGO Siong amau tacma ngictauyasuga faiu hau ge imoc mema ngabafocga yeneac botucfu ngictau amma ngic kunenggina kecbesena. ³ Ngicfocga yeni dzikac nasou gegoc kenggecdeac songo negemma hama edegugec geng hesicyununa tiki kpetiacfu enggecde. Sacgbori habunginagoc yeni ubaefac amma wamba kpetiac heima asoacac dzimbong heima feande, ifi isoc amma gearu hagecde.

⁴ KEBUNGO yoac yofi bic deseriec, imoc naric mi meickeude, “Geng Merikisedeac siricfu womonggareng wisic wisickea kpac kecengkecnade.”

⁵ Kebu foigaugeng nande, ye herebunasoja hau ngictau kpedzameyunuude. ⁶ Ye bangeha bangeha ngicngac areng botucnginau tacma isingyunuma yoacngina desiu homegec farengnginango bangecnginau feemeude. Ye bangeha bangeha fekendeu ngic enarafocngina kpetotieyunuude.

⁷ Ye sing tegiau doku mahama feu hemma neudeac oruha miacma kuhagoc nanude.

111

Anutuac ua feengkefude

¹ KEBU eriendzong memibesonga, hallelu Yac. Ngicngac uba kongaha amma ikoc nga hamangecngina kpac kecdae, yeneac kpebung habugoc namma heregoc yombong KEBU ubangerec ammibade.

² KEBUNGO uaya mekecde, imoc wiāc engena nga imocac songo negengandae, yeneng imoc negengising angkecdae. ³ Kebungo wiāc sasawa meec, imocnggo ngictauac kuhagoc nga damuyagoc wakema fede. Ye fakaya dindingacngō nasoya nasoya feengkefude.

⁴ Ye uaya bibiagoc meec, imoc yeng negemmanu negenggec fekefude. KEBUNGO neneac ubea manganeu ubangerec anemmeude. ⁵ Ngicngac eweheihei ammiandae, ye yeni yaka yemmeude nga dzadzahac meec, imoc nasoya nasoya negensikefude. ⁶ Kebu ye ngicngacfora uayaac kuc edzacyunuma maridzoming dema bangec monnunac ngicngac yeneac bangec imoc ngicngacfora yemmeec.

⁷ Yeng wiac mariango meande, imoc yoara modacma faka dindingacgoc. Nenang yeac dederecgeyoac sasawa negenserima mekecbisina. ⁸ Ye dederecgeyoac faiu imocngo nasoya nasoya seria fema fefeseri feengkefude. Imoc ikoc nga hamangeha kpac kecma modacma kecbesonga. ⁹ Yeng wiacfora sueyunuu yeneng ngicngacfora yungecyunugec. Ye dzadzaha feengkefudeac yoac seria edeyunuec. Yeac kpac imoc kpetiac nga bibiagoc.

¹⁰ KEBU eweheihei ammima ye hoanggebesonga. Faka imoc negen negentegecac hania ande. Ye eweheiheigoc hoanggeandae, yeni negen negengngina irec ireckea. Yeac eriendzong, imoc nasoya nasoya feengkefude.

112

Kperagingo neraranggeude

¹ KEBU eriendzong memibesonga, hallelu Yac. Ngic mong ye KEBU eweheihei ammiande nga yeac nonoyoac songotoagoc hoanggeande, ye kenehagoc.

² Yeac esamedacfora yeni bangecfu kucnginagoc kecgecde. Ngicngac areng ikoc nga hamangecngina kpac andae, yeni kenecnginagoc. ³ Yeac amau hiedzo finactoa endzi-rangoc feude amma yeac faka dindingacngo nasoya nasoya feengkefude.

⁴ Ngicngac uba kongaha amma ikoc nga hamangecngina kpac kecandae, yeni kundung manau kecmagec kperagi fingecyemmeude. Kebu ye ubangerec ayemmema ubaman-gang negengyemmema dindingac kefude. ⁵ Ngic mong ye sing dindingac modacma ngic wosoefac ayemmema yengena wiac turung dema maringinau faiu ua goa meandae, ngic ifia ye naric kecde.

⁶ Ngic dindingac ye seria nanu wiac monggo meu goroc goroc naric mi anude. Amma ngicngac yeneng yeac negenggec fekefude. ⁷ Ye yarefakaac yoacsiduc negemma kengec naric mi anude. Ye hereango KEBU negenserima kefude. ⁸ Yeac herea imoc seri seria. Ye kengeha kpac serima kecma firang amma ngabafora yenenuude. ⁹ Ye songea modacma wiac mederema ngicngac makpekpea yemmeude. Yeac faka dindingac, imoc nasoya nasoya feengkefude nga ye kuhagoc anu ngic yeneng eweheihei ammima nanggegecde.

¹⁰ Ngic Anutu ngadehema mangana meudeac ammiande, yeng ngic mong dindingac henu kekeha ngereeude, imohai enac kisaranggeu dzameude. Ye wiac mong meudeac negensiande, imoc fora naric mi fingerude, kpac yombong.

113

Engentoango wosoefac anemmeude

¹ KEBU eriendzong memibesonga, hallelu Yac. O, KEBUAC kingang ngicfora, ngeni KEBU oyang boyang memima KEBUAC kpac kuneng heiwayong memibisia.

² KEBUAC kpac kuneng, imoc yaguc kenehema nasoya nasoya kenehekecbesonga.

³ Wenac ere ereaunac kengkecma wenac keme kemeau wisickede, imohai KEBUAC kpac kuneng heiwayong memibesonga.

⁴ KEBUNGO bangeha bangeha ngicngac areng feracyunuma kecde. Yeac kuc kibikper-agigoc, imoc kurumenga kurumenga feracyunuma emma feude. ⁵ KEBU Anutuniina kecde, ye isoc monggo mi kecde, kpac yombong. Ye wi tatahau tacma ⁶ kiwa fiu mau kurumenga kurumenga nga bangec yenenuude. ⁷ Yeng ngic makpekpea sendunnunac memiacyunuude nga ngicngac iwaia obohoma kecandae, yeni hamaseufunac meyunuue eregecde. ⁸ Eregec yeng ngictauac medacfocngina yenigoc tatacfu faiyunuue tacgecde. Ye ngicngacfora yeneac ngictauac medacfocngina, yenigoc faiyunuude.

⁹ Ye ngac kufing amagerec miu ye sabac nonggea amma sogaima kefude.

KEBU eriendzong memibesonga.

114

Anutuac kicfu dzonoma fedebeso

¹ Israengo Aigita bangec wama erema kenec. O, Yakoboac areng yeni ngicngac kuricyoac dekecgec, yeni wayunuma kenggec. ² Yuda ye Anutuac womong kpetiac anec nga Israe imoc yeac eucererenga anec.

³ Kondung ye imoc hemma kpidohoma kenu Yodang doku dzigeneec. ⁴ Tiki yeneng rama ngiwango futuckeandae, ifi isoc futuckegec nga fagang yeneng ramamedaha yuma engemmama angandae, ifi isoc sogac sogaigoc yuma engemmama anggec.

⁵ Kondung ge kpidohoma woranec nga Yodang ge kpidohoma dzigenenec. ⁶ O tiki, ngeni kpidohoma rama ngiwa isoc futuckedae nga fagang ngeni kpidohoma ramamedaha isoc yuma engemmama andae.

⁷ O bangec, ge KEBUAC kicfu dendeng kpekebesena. Ge Yakoboac Anutu yeac kicfu gbigbihebesena. ⁸ Yennoc hoc peperandzi seria heimerenu doku dzohong angkecde nga harongang heimerenu doku kiwa anude.

115

Ge Kebu negensinggena

¹ O KEBU, ge neneac kpac mi miacbesena, kpac. Geng yoac dedzege amma imoc modackecnec nga ge yoac modac modac Kebu, imocac geac kpac kuneng imoc eweheiheigoc kpacbesonga. ² Bangec monnunac ngicngac Anutu mi negemmidae, yeneng deandae, "Yeni Anutungina mong mi hendifimbe, kpac." Yeni nocac ifi deandae? ³ Anutuninango kurumenga kurumenga, imohai kecma songoya modacma uaya mekecde.

⁴ Ngicngac Anutuac yoac ifi deandae, yeneac nemuongangina siriwa nga golngo memea, yeni bangecngic yeneac marikibisac. ⁵ Yeni enacobibicnginagoc nga yoac ine naric mi degecde. Yeni kicngina noboc noboc amma wiac naric mi henggecde. ⁶ Yeni kedzacngina noboc noboc amma wiac mong naric mi negenggecde. Yeni samacnginagoc amma wiac monggac homuna naric mi homunggegecde. ⁷ Yeni maringinagoc nga maringinango wiac mong naric mi menegenggecde. Yeni haninginagoc nga haninginango sing naric mi kenggecde amma ubanginango udumeng mong naric mi meficegegecde.

⁸ Ngicngac nemuonga meyunuandae, yeni nemuonga isoc angggec. Nga nemuonga negenserima kecandae, yeni sasawango nemuongangina isocngoc anggecde.

⁹ O Israe ngicngac, ngeni KEBU negenserima kecbisia, yennoc memeficngina nga kasongina. ¹⁰ O Aronggac ama areng, ngeni KEBU negenserima kecbisia, yennoc ngeneac memefic nga kasongina. ¹¹ Ngicngac KEBU eweheiheigoc hoanggeandae, ngeni KEBU negenserima kecbisia, yennoc ngeneac memefic nga kasongina.

¹² KEBUNGO neneac negenside. Yeng kenecnunuude, ye Israeac ama areng kenecyunuma Aronggac ama areng kenecyunuma ¹³ ngicngac KEBU eweheiheigoc hoanggeandae amma ngicngac kuneng nga kapia kenecyunuude. ¹⁴ KEBUNGO ngeni nga nambaracfocngina mesahengunubeso. ¹⁵ KEBU kurumeng nga bangec meficyuruec, yeng kenecngunubeso.

¹⁶ Kurumenga kurumenga yeni KEBU yengena ama nga bangec imoc ngicac medafocngina kecdimbeac nemmeu ihai kecdimbe. ¹⁷ Homemea yeni KEBU eriendzong naric mi memigecde, kpac. Ngicngac ningkpe fedae, yeneng ye naric mi dengeregecde, fora. ¹⁸ Nga KEBU dengerenide. Neni ye yofinenggac kenehema* kecma nasoya nasoya kenehenide.

KEBU eriendzong memibesonga, hallelu Yac.

* 115:18: Anutungo mefincnunu nenang bangecngicngac nec yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereeude. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

116

Kebu ye memeficnina

¹ Ni KEBUARU kpesi kpesi faiba yeng ubaudumenna negenecac ye songogoc hoanggabade. ² Ye kedzaha nearu faiecac amma ni kecbadesoc kpakpacna yearu kpacba kengkefude.

³ Homecac witicngo dedecnuu homec amaac kengec amma ubaebicngo mendannuu ni ubaebic nga kengecgoc kecma ⁴ KEBUAC kpac kuneng kpacma yofi deai, “O KEBU, ge kekecna ebicfunac mesina.”

⁵ KEBU ye wosoefac nga faka dindingacac KEBU. Anutuninango ubamangang anemmeude. ⁶ Ngicngac negen negengtoangina kpac kecgec KEBUNGO yeni ongongyunuude. Ni memeficac obohobare yeng ebicfunac mesinuec.

⁷ O ubaongana, KEBUNGO ubangerec homac anggenu naric kecnecac amma ge ruaegoc monggoc kecbesena. ⁸ Ge ubaongana homecfunac mesima kickumana mekerenggena tifainggema manubacac hanina onggonggenec. ⁹ KEBU, ni geac kicfu kekecnginagoc yeneac bangecfu kengkebadeac ifi annec.

¹⁰ Ni yofi deai, “Ni kpendzeng kuneng kpema kecduae.” Ni negen negensinggoc kefaiac ebicnasou ifingoc negensinggumangoc kefai. ¹¹ Nga ubaebicnagoc kecma deai, “Ngic sasawa yeni ikocnginagoc.” ¹² KEBUNGO ni gombunga anemma wiac sasawa nenu ni naric kecma imoc ac turunga noc wiac ammiba ngereeudeac obohoude. ¹³ Ni memengerecac kpakenec mema miacma KEBUAC kpac kuneng kpacbade. ¹⁴ Ni yoac KEBUAC kicfu deseriai, imoc ngicngacfora sasawa yeneac kicfu namma fora meficgebade.

¹⁵ KEBUAC ngicngac kpetiac homedae, imocngo yeac kicfu wiac buma kuneng ande.

¹⁶ O KEBU, ni geac kingang ngicga amma uangacgaac medac. Gennoc witicfunac mesinunec. ¹⁷ Ni ubangerecac sese faigemma KEBUAC kpac kuneng kpacbade. ¹⁸ Ni yoac KEBUAC kicfu deseriai, imoc ngicngacfora sasawa yeneac kicfu namma fora meficgebade.

¹⁹ Imoc Yerusareng, geac botuhau KEBUAC ama tacde, imoc ac amabangecfu ambade.

KEBU eriendzong memini, hallelu Yac.

117

Ngeni Kebu dengerebisia

¹ Bangec monnunac ngicngac, ngeni KEBU fendzonggema dengerebisia. Ngiha ngiha sasawa ngeni KEBU afehebisia. ² Yeng yoac dedzege amma imoc modackecde, faka imocngo hoannunuude, imoc wiac engena. KEBUNGO yoara modackecde, faka imocngo nasoya nasoya feengkefude.

KEBU eriendzong memini, hallelu Yac.

118

Kebu ge meficnununa

¹ O, KEBU ye gombunga, yeng yoac dedzege amma imoc modackecde, faka imoc nasoya nasoya feengkefude, imoc ac ubangerec memibesonga. ² Israe habu ngeneng yofi debisia, “Yeng yoac dedzege amma imoc modackecde, faka imoc nasoya nasoya feengkefude.” ³ Aronggac ama areng ngeneng yofi debisia, “Yeng yoac dedzege amma imoc modackecde, faka imoc nasoya nasoya feengkefude.” ⁴ Ngicngac KEBU eweheiheigoc hoanggeandae, ngeneng yofi debisia, “Yeng yoac dedzege amma imoc modackecde, faka imoc nasoya nasoya feengkefude.”

⁵ Ni ebic kuneng mema KEBU kpacba KEBUNGO kpakpacnaac turunga meremma ebicfunac yungecnuuec. ⁶ KEBU ye nigoc kefu ni naric mi kengecnuude. Ngic yeneng wiac mong naric mi anenggecde. ⁷ KEBU ye memeficna amma nigoc wegenac kecdeac ni firang amma ngic ubango ukunudae yenemma nambade.

⁸ Nenang KEBUAC hoannu kemma sufuma kecni ngereede. Ngic negensingyununi memefihagoc yombong mi ande. ⁹ KEBUAC hoannu kemma sufuma kecni ngereede. Ngictau medacfocngina negensingyununi memefihagoc mi ande.

¹⁰ Bangec monnunac ngicngac Kebu mi negendae, yeni sasawango oronnudacgec ni KEBUAC kpacfufirang amma kporacyunuba kpac anggec. ¹¹ Yeni noboc noboc oronnuma kecgec, fora. Nga ni sifu KEBUAC kpacfufirang amma kporacyunuba kpac anggec. ¹² Yeni sangobide isoc noboc noboc oronnugec kate dzema borang tima bic bokoande, ifi isoc anggec. Ni KEBUAC kpacfufirang amma kporacyunuba kpac anggec. ¹³ Yeneng kucgoc kpefacnugec manubesonga anec, fora. Nga KEBUNGO ine meficnuec.

¹⁴ KEBU ye neac kuc nga yegecna. Yennoc neac memengerecna.

¹⁵ Ngicngac dindingac yeneng firang amma kporucbedzonginau sogac sogaiac yegec heigec yegecngina negembisia. “KEBUAC marifoingo faka bibiagoc amma firang andac.

¹⁶ KEBUNGO marifoia miaru sawau yacde. KEBUAC marifoango faka bibiagoc amma firang andac.”

¹⁷ Ni naric mi homebade. Ni ine gbori kecma KEBUNGO uaya mekefec, imoc dekperagibade. ¹⁸ KEBUNGO kopocsicnaac amma kpemeting ebirangoc anenec, fora. Nga homecac mariu mong mi fainuec. ¹⁹ Ngeni dindingac kekec womongamaac nagutoa witinenggec ni imohai emma KEBU ubangerec memibade.

²⁰ KEBUAC nagu yomoc nga ngicngac dindingac yeneng imohai enggecde. ²¹ Ge yoacna turunga merennenna memengerecna amma meficnuec. Imocac geac ubangerec megembade. ²² Amameme ngic yeneng hoc mong mangana dema ukugec. Nga hoc imocngo amaac hoc wotung amma seria nanude. ²³ KEBUNGO faka meu imocngo nenang kicfu wiac bibiagoc ande. ²⁴ KEBUNGO uamemenaso yomocnoc meu nenang naso yofinenggac sogaima ubangerec negenni. ²⁵ O KEBU, neni kpacsambic amma yofi dedimbe, “Ge ebicfunac mesinununa. O KEBU, neni naric kecnideac gombunga anemmena.”

²⁶ Ngic KEBUAC kpacfufirang amma yomoc meficiyemmeu amma meficiyemmeu. Neni KEBUAC amau namma kenecngunukecdimbe.

²⁷ KEBU ye Anutu. Yeng kperagi nemmeu imocngo mekperaginunuec amma mekperaginunuude. Ngeni ic maria sabayagoc maringinau mema arennu hakecma hombanggac sese mehagec, imoc witicngo arata baihau dedeckebisia.

²⁸ Ge Anutuna. Ni eriendzong megembade. Ge Anutuna, imocac afegubade. ²⁹ KEBU ye gombunga, yeng yoac dedzege amma imoc modackecde, faka imoc nasoya nasoya feengkefude, imocac ubangerec memibesonga.

119

Kebuac dedeseriyoac

¹ Ngicngac yeni kopocsic mong mi meficgema kecma KEBUAC dedeseri modacanda, yeni kenecnginagoc. ² KEBUNGO yoac ngicngac dekperagiyemmeu yeneng imoc modacma heregoc ye hofocandae, yeni kenecnginagoc amma ³ kopocsic mong mi meficgema yeac hanising modacma kengkecgecde. ⁴ KEBU, geng dederecgeyoacga nemmena imoc serima modacnideac negennec.

⁵ Ni geac singyoac seria tofohoma sing imoc hafoangoc yombong modacma kecbadeac yombong anende. ⁶ Ni geac nonoyoac sasawa hengkecba ngic yeneng game kpekpeu naric mi fainugecde.

⁷ Ni geac dederecgeyoac dindingac negen negennau arenggeba herenau ikoc nga hamangec mong mi feu ge dengeregubade. ⁸ O, ni geac singyoac modacbade. Kebu ge ni mi ngadenuma wanudacna.

Kebuac dedeseriyoac tofohobesonga

⁹ Sebigbori medac ye singau garengemema uba kongaha kefude, sing imoc eng mi meficgeude, kpac. Ye geac yoac gombunga modacma garengemeude, imohai naric kefude,

¹⁰ Ni heregoc hofocguduue. Geac nonoyoac kpebaiac garennuma kpaheinenna. ¹¹ Ni yoacga kpema kopocsic meficgebaiac yoacga herena manau faiba feude.

¹² O KEBU, kenecgubisina.* Ge singyoacga kpounenna ni imoc negen negennau arenggema mekecbade. ¹³ Enacgaac dederecgeyoac sasawa, imoc enacbibicnango dekperagibade. ¹⁴ Ngicngac yeneng dzofinacnginaac sogaiandae, ni ifi isoc geac dedekperagijoac negemma sing imoc modacma sogaibade. ¹⁵ Ni geac dederecgeyoac hennegeng amma imoc negensikecma kicna fima geac sing hengkecbade.

¹⁶ Ni singyoacgaac ubangerec negemma geac yoac naric mi nigecluude, kpac.

Dedeseriyoacngo ubangerec meficgenende

¹⁷ Ni, kingang ngicgango gbori kecma yoacga tofobadeac gombunga anenna. ¹⁸ Wiac gombunga gombunga dedeseriyoacgau fede, imoc hembadeac kicna merecgena.

¹⁹ Ni bangecfu kuric kecduae. Ge nonoyoacga nearunac mi mesufuna. ²⁰ Ubaonganango nasosoc geac dederecgeyoac negembeso ammiu kuha kpac ambeso ande.

²¹ Anutu ge ubakpekpe ngic yoac ngabasiric ayemmeannec, yeni geac nonoyoac wama ngadephema kecgec ge sowecyununec.

²² Ni geac dedekperagijoac modackeduaeac amma yeni desofoc nga desusuic anendae. Ge faka imoc meickenenna kpac ambeso. ²³ Ngictau yeneac medacfocngina yeneng tacma ni memanganenugecdeac yoac denegeng angandae, fora. Nga ni, geac kingang ngicngo sifu geac singyoac hennegeng amma imoc negensikecbade. ²⁴ Geac dedekperagijoacngi ni ubangerec meficgenemma dederecge gombunga anenude.

Dedeseriyoac tofobade

²⁵ Ubaonganango sendunggoc kpeketahemma homebeso ande. Ge yoacga dema deserinec, imoc modacma kekecna monggoc megborina. ²⁶ Ni haniana edeguba geng imocac turunga merennemma singyoacga kpounenna. ²⁷ Geng meefainuna dederecgeyoacgaac sing negentegecma uaga bibiagoc hennegeng amma negensikecbade. ²⁸ Ubaebicngo ubaongana meebliru sisingaima kpac ambeso ande. Ge yoacga denec, imoc modacma monggoc meserinuna. ²⁹ Ge ikocfakaunac onggonuma ubangerec anemma dedeseriyoacga kpounenna.

³⁰ Ni yoac modac modac ngic ambeso negenduaeac sing imoc meisnggema kengkecduae. Ni dederecgeyoacga kicnau faiba fede. ³¹ O KEBU, ge dedekperagijoacga nennec imoc seria mekecduaeac goa yeneng desofoc anembauac kpaheiyemmebesena. ³² Ge negen negentegecna meyadikcna geac nonoyoacgaac sinnu nedzikecbade.

Negen negentegec nembesena

³³ O KEBU, ge singyoacga fainec, imocac sing kpounenna. Ni imoc negen negennau arenggema modacma kengkecba kekecna wisickebeso. ³⁴ Ni dedeseriyoacga modacma heregoc imoc tofobadeac negen negentegec nenna. ³⁵ Nonoyoacgaac ubangerec negenduaeac sing imohai hesicnuna. ³⁶ Ge herenaunac bangecac songo meickema geac dedekperagijoacngi seria febeso. ³⁷ Wiac hania hania uaya kpac fede, ni kicna imohai fibaiac kicna garenggena kekecna geac sinnu kengkecbeso.

³⁸ Ngicngac goi heigengandae, yeni wiac yemmebesonga deserima denec, imoc kingang ngicga nearu meserima edzacnuna. ³⁹ Geac dederecgeyoac sasawa imoc gombunga. Game kpekpeu fainugec kengecgoc kecbaiac ebic imoc meickenenna.

⁴⁰ Ge fakaga dindingac imocac amma kekecna megborima kekec monggoc nenna. Negenna, ni geac dederecgeyoac negembadeac anende.

Kebuac dedeseri negensima ruaegoc kecbade

⁴¹ O KEBU, geng yoac dedzege amma imoc modackecnec, geac faka imocngi nearu habeso. Ge ebicfunac mesinunadeac deserima denec, faka imocngi ifingoc nearu

* 119:12: Anutungo meficnunu nenang bangecngicngacnece yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereeude. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

habeso. ⁴² Ifi anu ngic goa deendema anengandae, yeni turunga naric merengyemme-bade. Ni geac yoac negenserima kecbade.

⁴³ Ni yoac forau kecma yoac fora dekecduae, imoc kpac ambacac ge imoc enacnaunac mi meickebesena. Ni geac dederecgeyoac negensikecba fora fingerudeac tomai kecduae.

⁴⁴ Ni geac dedeseriyoac nasoya nasoya modackecbade. ⁴⁵ Ni geac dederecgeyoac meficgebadeac ua mekefaiac witihakpac kengha ambade.

⁴⁶ Ni ngictau yeneac kicfu ifingoc geac dedekperagijoac ayemmeba game kpekpeu naric mi fainugecde. ⁴⁷ Ni geac dedeseriyoac songo negemma yoac imoc ubangerecgor debade. ⁴⁸ Ni nonoyoacgaac songo negemma marina miacma fendzonggema singyoacga hennegeng amma negensikecba.

Dedeseri hoanggema ruaegoc kecbade

⁴⁹ Ge ni, kingang ngicga yoac edenunec, imoc negenna febeso. Ge imoc denenna negensikecba fora fingerudeac tomai kecduae. ⁵⁰ Geac dedeserigango kekec meficgenenu kpendzeng kpekebare wiac imocngo meseriniude.

⁵¹ Ngic Anutu ngadehema kecdae, yeneng deendema anengandae, fora. Nga ni sifu geac dedeseriyoac mong mi ngadehema wabade. ⁵² O KEBU, ge dederecgeyoacga warac yombong denec, imoc negensikecba imocngo meseriniude.

⁵³ Ngic Anutu ngadehema mangana megecdeac ayemmeande, yeneng geac dederecgeyoac ngadehema wagec, imocac amma herebu negemba herena gerek dzeude.

⁵⁴ Ni yei kuricngic amma amanginau kecbare singyoacgango ubangerecyegeneva anu heibade. ⁵⁵ O KEBU, ni tofocnac geac kpac kuneng negemba feu geac dedeseriyoac modackecduae. ⁵⁶ Ni dederecgeyoacga modackecbade imoc fingecnenu neac kenec ande.

Uba hafoangoc

⁵⁷ O KEBU, ge neac areng nga yeneng bangec isoc mederema noboha nenggec, imoc ge. Ni yoacga modacbadeac geac kicfu deserima deduae. ⁵⁸ Ge neac negenna ngereeude, imoc meficgebadeac herenango hafoa uatoa meai. Ge yoac deserima denennec, imoc modacma wosoefac anenna.

⁵⁹ Ge faka modackecnec, imoc negensima geac dedekperagijoacga modacbadeac nananna mengereba geac yoacgau kenude. ⁶⁰ Ni naso mi ukuma geac nonoyoac bic yombong modacma uaya mebade.

⁶¹ Ngic Anutu ngadehema mangana megecdeac ayemmeande, yeneac witicngodedecnuande, fora. Nga ni geac dedeseriyoac sifu mong mi nigecnuude. ⁶² Ni tofocnac dzongiau yacma dedeseriga dindingac negemma imocac dengeregukecbade.

⁶³ Ngicngac geac ewehihei angandae nga dederecgeyoacga modacndae, yeneac ogongina. ⁶⁴ O KEBU, geng yoac dedzege amma imoc modacnade, fakaga imocngo bangec sokoma fede. Ge singyoacga kpounenna.

Dedeseri imoc wiac engena

⁶⁵ O KEBU, ge yoacga modacma ni, kingang ngicga, gombunga anengkecne. ⁶⁶ Ni geac nonoyoac negensinggeduaeac negen negentegec nga negengising faka gombunga kpounenna. ⁶⁷ Ni kpendzenga kpac kefai, imohai sing segema kengkefai. Nga yofineng-gac geac yoac modacbade.

⁶⁸ KEBU, ge gombunga amma faka gombunga anganne. Ge singyoacga kpounenna.

⁶⁹ Ngic Anutu ngadehema kecdae, yeneng ikoc amma ngadeyoac dema enacfu faifai anengkecdae, fora. Nga ni sifu geac dederecgeyoac heregoc modackecbade. ⁷⁰ Ngic Anutu wagec, yeni ubaseri amma tosofocngina yeneac ubamangang negenggecdeacsoc mi ande, fora.

Nga ni sifu geac dedeseriyoac ubangerec negengkebade.

⁷¹ Ge ebic meficgenennec, imoc negemba ngereede. Ge ifi anna geac singyoac haniaac negen negeng mema arenggekebade. ⁷² Geac enacgaac dedeseriyoac, imocngo wiac engena ande. Imocngo ngereenende nga imoc hoc gol nga siriwango memea taoseng nga taoseng feracyunuude.

Dedeseri imoc dindinga

⁷³ Geng meficnuma marigango menuma memengere anennec. Ni nonoyoacgaac negen negeng arenggema mekecbadeac anende. Ge imocac negen negentegec nenna. ⁷⁴ Ni geac yoac negensiba fora fingerudeac tomai kefaiac amma ngicngac goa eweheihei anggengandae, yeneng nemma sogaigecde.

⁷⁵ O KEBU, geac singyoac imoc dindingac nga gennoc yoac modac modac Kebu, imocac ebic meficgenennec, imoc negenduae. ⁷⁶ Ge ni, kingang ngicga, yoac deserinennec. Ge yoac imoc modacma faka anenna. Geng yoac dedzege amma imoc modackecnec, ge efaima fakaga imocngo ni, kingang ngicga, meserinuna. ⁷⁷ Ni dedeseriyoacgaac ubangerec negenduaeac ubamangang anenna gbori kecbade.

⁷⁸ Ngic Anutu ngadehema kecdae, yeneng hania kpacfu mangana anenggecac ge negemmana game kpekpeu faiyunubesonga. Ni geac dederecgeyoac hennegeng amma imoc negensikecbade. ⁷⁹ Ge eweheiheigoc hoangguma kecandae, yeneng naric nearu hama geac dedekperagijoac negembisia. ⁸⁰ Ngicngac goa yeneng gameu fainubauac herenango geac singyoacfus seria kpeketaheu kopocsic mong mi meficgebesare.

Naso dafiguc tomai kecbesare?

⁸¹ Ubaonganango geac memengerecac ammikefu yoacga negensiba fora fingerudeac tomai kecduae. ⁸² Kicnango dedeseriga fora fingeru hembadeac fikecba kuha kpac anu yofi deanduae, "Ge hama meserinunade, naso imocac tomai kecduae."

⁸³ Ni waing sebera hosucfu fekecma harandanggeande, ifi isoc anai, fora. Amma dedeseriyoacga sifu mi nigecnuec, kpac. ⁸⁴ Ni, kingang ngicgango naso dafiguc ebicfu kecma tomai kecbesare? Ngic nukporac anengandae, yeni turunga yemmenade, naso imocac tomai kecduae.

⁸⁵ Ngic Anutu ngadehema kecdae, yeneng menugecdeac teng keme kemea usugec. Ngic imoc yeni geac dedeseriyoac kpema kecdae.

⁸⁶ Ge nonoyoac sasawa dekecnec, imoc yoac fora. Ngic yeneng ine ikoc amma nukporac anengkecdaec meficnuna. ⁸⁷ Yeni bangefu kekecna kpetotiebeso anggec, fora. Nga ni sifu dederecgeyoacga mekecma imoc ngadehema mi wayai.

⁸⁸ Geng yoac dedzege amma imoc modackecnec. Ni enacgaac dedekperagijoac modacbadeac fakaga imocngo kekecna onggonggena.

Dedeseriyoac negensinggebesonga

⁸⁹ O KEBU, geac yoac imoc kekecseri. Imoc nasoya nasoya kurumenga kurumenga, imohai fefeseri fekefude. ⁹⁰ Ge yoacga modackecnec, imocngo fingecsahenina fekefudesoc, yenearu feengkefude. Geng bangec tatahau faina seria tarudengoc. ⁹¹ Geng yoac dema wiac sasawa faiyemmenec. Imocac amma imoc yofinenggac fedengoc. Wiac sasawa fedacde, yeni geac enac tofohogecde.

⁹² Geac dedeseriyoacng ubangerec mi meficgenembacfu kpendzennango mebucnuu kpac ambai. ⁹³ Ge dederecgeyoacga fama kekec nennecac amma dederecgeyoacga naric mi nigecnuae. ⁹⁴ Ni geac ngic nga dederecgeyoacga meficgebadeac ua mekefaiac ebicfunac mesinuna.

⁹⁵ Ngic Anutu ngadehema mangana megecdeac ayemmeande, yeneng memanganenuma meicnugecdeac tomai feandae, fora. Nga ni sifu dedekperagijoacga negensima kecbade.

⁹⁶ Wiac gombunga nga sirihau, imoc sasawa hemba wisic wisickea feu maya kpesereai. Nga geac dederecgeyoac imoc maya kpac feecngoc fede.

Dedeseriac songo negembesonga

⁹⁷ O, ni geac dedeseriyoacac songo homac yombong negemma asoacnac kemma marai imoc hennegeng amma negensima kecduae. ⁹⁸ Geac dedeseriyoac, imoc nasoya nasoya nearu fekecdeac imocngo ngabafocna feracyunuma negen negentegec homac meficgenenude. ⁹⁹ Ni dedekperagijoacga hennegeng amma negensikecduaeac negen negentegecgor amma kpoukpoufocna feracyunubade. ¹⁰⁰ Ni geac dederecgeyoac

modackecduaeac ngicngac kifangina homac kecgec feracyunuma monggoc negentegecbade.

¹⁰¹ Ni yoacga modacbadeac amma haninango yarengic yeneac sing mangana hania hania tibaiac hanina kpae heimima garenggekecbade. ¹⁰² Geng dederecgeyoacga kpounennecac amma imoc naric mi ngadehema wabade.

¹⁰³ Ni yoacga negemba songea yombong ande, enacnau imoc kukundzauac songea ferahade.

¹⁰⁴ Geac dederecgeyoacngo negen negentegec nenuudeac sing ikoha sasawa imocac modzona tiude.

Dedeseringo mekperaginunuude

¹⁰⁵ Geac yoac, imocngo haninaac kifa amma sinna mekperagiude.

¹⁰⁶ Ni dedeseriyoacga dindingac modacbadeac yoac deserima imoc meseriai.

¹⁰⁷ O KEBU, ni ebicnagoc yombong kecduae. Ge yoacga modacma kekec nenna. ¹⁰⁸ O KEBU, ni efaima enacnango dedengerec sese megenduae, imocac negenna ngereebeso. Ge dederecgeyoacga kpounendacna negen negeng imoc arenggema mekecbade.

¹⁰⁹ Ni kekecna marinau mekecduae, fora. Nga dederecgeyoacga sifu mong mi nigecnuude. ¹¹⁰ Ngic Anutu ngadehema mangana megecdeac ayemmeande, yeneng botac faima menubesonga angandae, fora. Nga ni dederecgeyoacga modackecma sing mi segebade, kpac.

¹¹¹ Geac dedekperagijoac, imoc nasoya nasoya maridzominna fefeseri fenenuude. O, herenango imoc negemma sogaima kecbade. ¹¹² Herenango geac singyoac nasoya nasoya angammemenango modacbadeac isinggeai, ni ifi kecba naso wisickeude.

Dedeseri modacma ruaegoc kecni

¹¹³ Ngic monde monde kecdae, yeneac modzona tiu geac dedeseriyoacac songo negengkecduae. ¹¹⁴ Ge sufu sufuamana nga kasona nga ni geac yoac negensiba fora fingerudeac tomai kecbade.

¹¹⁵ Ni Anutunaac nonoyoac modacbadeac negenduae. Yarengic ngeni imocac wanuma kembisia.

¹¹⁶ Ge yoac deserima denec, imoc modacma garennuna gbori kecbade. Ni negen negensina foragoc mi ambacac ngic yeni geng negemmana game kpekpeu mi fainubisia.

¹¹⁷ Ge marinau menuma nanggenuma onggonnuna. Ni geac singyoac negensima kecbade.

¹¹⁸ Ngicngac sing segema singyoacga kpeandae, yeni ikocnginagoc kecgec uatoang-inango fora mong mi meficgeude. Ge imocac ngadeyunudacnec. ¹¹⁹ Geng ngic Anutu ngadehema mangana megecdeac ayemmeande, yenenna seuc isoc angkecde, imocac amma ni dedekperagijoacgaac songo negengkecduae.

¹²⁰ Ni geac kengec amba sebinango gbigbihekecde nga geng yoacna isinggema desinade, imoc negemma negengfagunggoc kecduae.

Dedeseriyoac tofohobesonga

¹²¹ Ni singyoac mi kpema faka dindingac angkefai. Ngic yeneng ebicfu fainubauac ambauac onggonnuma yeneac mariu mi fainuna. ¹²² Ni, kingang ngicgango naric kecbadeac nenggareng anenna. Nga ngic Anutu wama kecdaea, yeneng ebicfu fainubauac geng onggonnuna.

¹²³ Ge faka dindingac modacma deserima ebicfunac mesinunadeac denec, imocac fora fingerudeac kicfifi kecba kicna kuha kpac ande.

¹²⁴ Geng yoac dedzege amma imoc modackecnec. Ge ni, kingang ngicga gombunga anemma singyoacga kpounenna. ¹²⁵ Ni geac kingang ngic amma dedekperagijoacga arenggema negembadeac negen negentegec nenna.

¹²⁶ Ngicngac yeneng dedeseriyoacga kpegecac KEBU, ge efaina, uaga menadeac naso bic hade.

¹²⁷ Ni imocac geac nonoyoacac songo negenduae. Nga imocngo golac songo ferahaude, imoc goltegeng pirac pirac, imocac songo ferahaude.

¹²⁸ Ni imocac geac dederecgeyoac sasawa modacma imocac sing tikecma sing ikoha hania hania tibeso modzona tiude.

Dedeseri modacbadeac anende

¹²⁹ Geac dedekperagiyooac imoc wiac engena, imocac ubaonganango imoc modackfude. ¹³⁰ Ge yoacgaac nagu witina imocngac ngicngac mekperagiyemmemma ngicngac negen negengngina efea, yeni negen negentegec yemmeude.

¹³¹ Ni nonoyoacgaac homac anenu enacna anggema asoringa anenu kecanduae. ¹³² Ngicngac geac kpac kunenggaac songo negengandae, ge neneac anggengandeac nearugeng dzigenema neac ubaga manganeu. ¹³³ Faka manganango kekecna garenggeu ngicngac ogofocna memanganeyunubaiac singtitina meserina. Ge yoac deserima denec, imoc modacbesare. ¹³⁴ Ge meficnuna dederecgeyoacga modackebade. Ngic yeneng ebicfu fainugec ubaebicgoc kecbaiac bummenuma yeneac witicfunac yungecnuna. ¹³⁵ Ge ni, kingang ngicga kicmesugango neraranumma singyoacga kpounemna.

¹³⁶ Ngicngac yeneng geac dedeseriyoac mi modacandaec kickumanango doku isoc made.

Dedeseriyoac monde mondea kpac

¹³⁷ O KEBU, ge dindingac nga yoac isinggema foraya desianne, imoc dindingac sasawa. ¹³⁸ Ge dedekperagiyooacgaac sing dindingac modacma yoacga imoc faima modackecma fainemmenec.

¹³⁹ Ngabafocna yeneng geac yoac nigecyunuandeac herena gerec dzeu kpac ambeso anduae.

¹⁴⁰ Geng yoac deserima denec, imoc ngicngac bic tobanggegec fora ande. Nga ni, kingang ngicgango imocac songo negenduae. ¹⁴¹ Ni ngictehec nga sure surea, fora. Nga geac dederecgeyoac imoc naric mi nigecnuude.

¹⁴² Geac dindingac kekec imocngac nasoya nasoya fefeseri feude nga geac dedeseriyoac, imocngco for. ¹⁴³ Ebic nga kpendzeng nearu fingecande, for. Nga geac nonoyoacngco ubangerec meficgenenude.

¹⁴⁴ Geac dedekperagiyooac sasawango nasoya nasoya dindingac feengkefude. Ge negen negentegec nenna gbori kecbesare.

Dedeseri negensikebade

¹⁴⁵ O KEBU, ni heregoc kpacguduuaeac negennenna. Ge ifi anna ni geac singyoac modacbade. ¹⁴⁶ Ni gearu yofi kpacba, "Ni dedekperagiyooacga gombunga modacbadeac, ge ebicfunac mesinuna."

¹⁴⁷ Negen negenna geac yoacfufa faima tomai kecba ama mi wereckemmanu geng meficnunadeac yacma kpacgubade. ¹⁴⁸ Ge yoac deserima denec, imoc tofocnacsoc hennegeng amma negensikebadeac naso herea gaugbori kecanduae.

¹⁴⁹ O KEBU, geng yoac dedzege amma imoc modacnade, imocac ubaudumenna negenna. Ge sing dindingac modacma ngic isinnunuma yoacnina desiannecac kekecna onggonggena.

¹⁵⁰ Ngic goa yeneng geac dedeseriyoacac hereau yombong kecma yarefaka megecdeac ayemmeu imoc arenggema neac wegenac hama nukporac anenggecde. ¹⁵¹ O KEBU, geng sifu neac wegenac kecnecngoc. Geac nonoyoac imoc sasawa fora ande. ¹⁵² Ni geac dedekperagiyooac bicngoc negemma yofi negengkefai, "Geng yoac imoc fainec nga imoc nasoya nasoya feengkefude."

O Kebu, meficnuna

¹⁵³ Ni geac dedeseriyoac imoc mi nigecnuude. Ge imocac kpendzenna hemma imohacnac mesinuna. ¹⁵⁴ Ge yoacfufa meficnuma nanggenuma bummenuma yungecnuna. Ge yoac deserima denec, imoc modacma kekec monggoc nenna.

¹⁵⁵ Ngic Anutu ngadehema mangana megecdeac ayemmeande, yeni geac singyoac meficgegecdeac ua mong mi mekecdae. Yeni imocac geac memengerec hereau kecdae.

¹⁵⁶ O KEBU, geac ubamangang imoc wiac engena. Ge sing dingdingac modacma isin-nunuma yoacnina desianne, imocacsoc anenna kekecgoc ambade. ¹⁵⁷ Ngic homacng nukporac anemma ngaba anengandae, fora. Nga ni geac dedekperagiyac sifu mong mi wabade. ¹⁵⁸ Ngicngac goa yeni negen negensingngina kpac kecanda, yeni geac dedeseriyoac mi modacandaec ni yenemma modzona tide. ¹⁵⁹ Kebu, ni geac dederecgeyoac songotoa negenduaeac geng imoc negensikecna. Geng yoac dedzege amma imoc modackecnec, imocac kekecna onggonggenna. ¹⁶⁰ Yoacga sasawa imoc fora nga geac dederecgeyoac dindingac imoc sasawa tembuc tembuc nasoya nasoya feengkefude.

Efaima dedeseri hoanggebisia

¹⁶¹ Ngictauac medacfora yeneng hania kpacf u nukporac anengandae, fora. Nga herenango sifu geac yoac bibiagoc, imoc hengkefude. ¹⁶² Ngic mongngo finac hania hania buma kuneng bummemma sogaiande, ni ifi isoc geac yoacac sogaibade. ¹⁶³ Ni ikofakaac negemba wiac mangana yombong anu imocac modzona tide. Nga geac dedeseriyoac, imocac songo negemma kecduae.

¹⁶⁴ Ni geac dederecgeyoac dindingacac amma uamemesoc naso seweng dengeregukebade. ¹⁶⁵ Ngicngac yeneng geac dedeseriyoac songo negengandae, yeni ruae kekec kuneng meficgekecma wiac monnu tifotockema naric mi mayunuude.

¹⁶⁶ O KEBU, ni geac memengerec negensikecba imoc fingerudeac tomai kecma nonoyoacgaac uaya mekecduae. ¹⁶⁷ Ubaonganango geac dedekperagiyac modacma imocac songo kuneng negengkecduae. ¹⁶⁸ Wiac sasawa angkecduae, imoc negennecac dederecgeyoacga nga dedekperagiyaoacga modacbade.

Kebu, ge mefincnuna

¹⁶⁹ O KEBU, kiacnango gearu hau ge negennenna. Yoacga modacma negen negengtegecgor ambadeac anenna. ¹⁷⁰ Ni kpesi kpesi gearu haba geng negemma yoac deserima denec, imoc modacma ebicfunac mesinuna.

¹⁷¹ Geng singyoacgaac negen negeng kpounengannecac enacbibicnango geac dedengerec yoac homac dekecbeso. ¹⁷² Geac nonoyoac imoc fora nga dindingac sasawa, imocac nedzarannango geac yoacac yegec gombunga heibeso. ¹⁷³ Ni geac dederecgeyoac segerema meaiac marigango meficnunadeac efaima kecbesena.

¹⁷⁴ O KEBU, geng ebicfunac mesinunadeac anende nga ni dedeseriyoacgaac songo negenduae. ¹⁷⁵ Ge onggonnuna kekecnagoc ambadeac anenna dengereguma kecbade. Geac dederecgeyoacng meficnubeso. ¹⁷⁶ Rama sufu sufuyango sing segema kengande, ni ifi isoc sing segema kenai. Ni, kingang ngicgango geac nonoyoac mi nigecnuudeac hama meficnuna.

120

Ruaengicac nunumu

Hombannu kekenggac yegec.

¹ Ni ebicgoc kecma KEBU kpacba yeng kiacna negemma turunga merennembeso.
² O KEBU, ngic goa enacbibicngina ikohagoc nga nedzarangnginaunac ngic ogofocngina tobangyunugecdeac yoac maande, ge yenearunac mesinuna. ³ Nedzarang ge ngicngac tobangyununadeac yoacgoc kecnec, ge yoacna negenna. Ge noc wiac anggembesonga? Amma geac turunga noc wiac gembesonga? ⁴ Wasaingic yeneac tebemedaha nga icngina gerecyohohagoc, imoc genggecde.

⁵ Ni nocac Meseke bangefu kuric kecduae nga Kedare yeneac kporucbedzoac botucfu kecduae.

⁶ Ngicngac ruaeac modzongina tiande, ngic ifia yenigoc naso hereangoc kefaiac modzona tide. ⁷ Ni ruaengic nga ruaeac deba yeneng ine dzikacac ngic andae.

121

KEBU ye kasonina

Hombannu kekenggac yegec.

¹ Ni kicna tikiu fiba ende. Ni memeficac obohoduae, imocngo dahacnac haude, ifi kpesiduae. ² KEBUNGO kurumeng nga bangec meficgeec nga memeficna yearunac haude.

³ Kebu genggareng anggengkecde, yeng gau mi feude, kpac. Ye haniga garenggeu seria nanu wiac mongngo meu goroc goroc naric mi anude. ⁴ Negenggec, Kebu Israe habu onggongyunuande, ye gaunec mong mi feande nga gau ebira mong mi feude. ⁵ KEBUNGO onggongguma marifoigau nanu ge yeac debannu kecna ⁶ wenacf u wenacngo mi guude nga tofocnac afongo mi memanganeguude.

⁷ KEBUNGO onggongguu yarefaka hania hania feder, imocngo naric mi memaguude. Kebu ye kekecga onggonggeude. ⁸ Ge amaunac manade me amau ennade dena KEBUNGO yofinenggac nga nasoya nasoya onggongguukefude.

122

Ge raeaegoc kecbesena

Hombannu kekenggac yegec. Dawidingo yegec yofi heiec.

¹ “Nenang KEBUAC amau enni.” Yeneng ifi edenugec ubangerec negenai.

² O Yerusareng, neni hanininango geac naguusing ekemma odaga manau tinandimbe.

³ Yerusareng imoc taongtoa isoc megec nande. Imoc meserima mocgutoa megec ama nga ama wegenacfu ifi tackendae. ⁴ Nga ngicngac neni areninasoc modacma imohai engandimbe. Imoc Israe areng neneac dema yoac deserigec feder. KEBUAC ngicngac areng neneng ihai emma KEBUAC kpac kuneng heiwayong meminide.

⁵ Ihainoc fora dedeac ngictau tatac faigec homac tacdae, imoc Dawidiac esangabo yeneac ngictau tatac sasawa.

⁶ Ngeni ruae Yerusarennu feudeac numubisia. “Geac songo negengandae, yeni naric kecma wiac monggac mi obohobisia. ⁷ Geac odaga manau ruae febeso. Nga amaherec amaga onggonggekecdae, imocac manau mangang kpangang mong mi febeso.”

⁸ Sactosofocna nga ogofocna yeneng naric kecgecdeac amma yofi debade, “Geac ama manau ruaengo kecbeso.”

⁹ KEBU Anutuninaac ama, imocac gombunggac amma ngeneng naric kecgecdeac nunumu uatoa mekecbade.

123

Ge neneac ubaga manganeu

Hombannu kekenggac yegec.

¹ KEBU ge kurumenga kurumenga imohai ngictau tatacgau tacna ni kicna gearu fiba erede.

² Kingang ngic yeneng ngic kunengnginaac negeung kecandaе nga kingang naroang yeni ngac kunengnginaac negeung kecma kic fiandae. Negenna, nenang ifi isocngoc kicniina KEBU Anutunina, yearu fikecmina yeng nenanggac ubea manganebeso.

³ O KEBU, ge ubamangang anemmena. Ngicngac yeneng homac deendema anemmegec imocac witiau kecdimbeac ubamangang anemmena.

⁴ Ngicngac goa yeneng ebiha kpac kecma desofoc anemmegec naso herea monggoc bic ande. Nga ngic goa yenanggac negenggec engena yombong angkecde, yeni ngade-nunuma desusuic anemmekecgec ubaonganinango ebic imoc mekecma gebeckpede.

124

KEBUNGO onggonnauude

Hombannu kekenggac yegec. Dawidingo yegec yofi heiec.

¹ Israe ngeni yofi debisia, “KEBUNGO nenanggoc mi kecbacfu neni dafi ambesonga obohobing.”

² Ngic yeneng yacma nunubeso anggec, imohai KEBUNGO nenanggoc mi kecbacfu ³ yeneng nenanggac herebu kuneng negemma gboringoc gbokonunubau.

⁴ Tunggbuangnggo meicnunubac me doku dundungnggo nebucnunubau. ⁵ Amma dokutoa kucnginagoc yeneng semenunudacbau.

⁶ KEBU keneheni.* Ye onggonnunuu yeneac enacfu mi ening. ⁷ Uficngic yeneng ufic faigec nga nengngo ufcfunac woraande, ifi isoc woraing. Ufic imoc barackeu ufcfunac woraing.

⁸ KEBUNGO kurumeng nga bangec meficegeec. Nga memeficnina imoc yeac kpacfufede.

125

Israe ye ruaegoc kecbeso

Hombannu kekenggac yegec.

¹ Ngicngac KEBU negenserima kecdimbe, nenang Siong tiki isoc. Wiac mongngo meu goroc goroc mi amma nasoya nasoya nangkefude. ² Tikingo Yerusareng yerecgema tackendae, ifi isocngoc KEBUNGO ngicngacfora yerecyunuma yofinenggac nga nasoya nasoya ifi kefude.

³ Ngicngac dindingac yeni maringina sinema angammeme mangana ambauac. Ngic Anutu ngadehemangana megecdeac ayemmeande, Anutungo yeni kpae heiyemmeu ngictau yasunginango ngic dindingac yeneac bangec naric mi garenggeude.

⁴ O KEBU, ngicngac gombunga nga herenginai ikoc nga hamangec mong mi fede, geng yeni faka gombunga ayemmena. ⁵ Ngicngac goa ine efaima sing mangana noboc noboc modacgec KEBUNGO yarengic meicyunuma yeni ifingoc yenigoc meicyunuu kenggckpemeting ayemmeude.

Ruaengo Israe areng yenearu febeso.

126

Sionggac kekec mengerena

Hombannu kekenggac yegec.

¹ KEBUNGO Siong monggoc mengereu ngicngacfora naric kecgec, nasa imohai nenang negenni imoc gau negendimbe isoc anec. ² Nenang enacbibicfu dzomocngo wakeu sogac sogaiac yegecngo nedzaranninau feu bangec monnunac ngicngac botucnginai degec, “KEBUNGO yeni wiac kuneng yombong ayemmeec.”

³ KEBUNGO wiac kuneng yombong anemmeecac nenang sogac sogaingo mewakenunuude.

⁴ O KEBU, ge Negewe bangec kisiu dokukperemeng gbangge gbangge, yeni men-

gereyununa doku monggoc haande, ge ifi isoc monggoc mengerenununa naric kecni.

⁵ Ngicngac kickumagoc wiac homecandae, ngeni sogac sogaigoc arohoma fora megecde.

⁶ Ngicngac ngeni kiac ubamanganggoc kemma wit komoha tofohoma ngade wit gbomea

bodangagoc tofohoma amanginai dzigene hama sogaima arohogecde.

127

Nambarac nemmeude

Hombannu kekenggac yegec, Soromongnggo yegec yofi heiec.

¹ KEBUNGO ama mi meudeu ngic yeneng uatoa mema ama mekecdae, imocngomoemifihagoc mong mi anude, kpac. KEBUNGO amabangec mi garenggeudeu ama gareng yeni gaugbori anggec uangina sifu memefihagoc mi anude. ² Ngeni neneyaka meficegegecdeac

* 124:6: Anutungo memeficnunuu nenang bangecngicngac nec yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereeude. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

asoac bic yacma uatoa mema kecma fefe nasongina ferahakecma uamemeac negengyohocgoc kecma yakangina nekecgecde, imoc ifingoc memefihagoc mi anude. KEBUNGO ngicngac songogoc hoangyunude, yeni gau femagec yaka maficgeyemmeude.

³ Negenggec, nambarac sasawa yeni KEBUARUNAC maridzoming nga ngac hereaunac fora fingecande, imoc uanginaac bung. ⁴ Wasaingicac mariu tebemedaha homac femide, ngic sebigboringo medacfocngina maficyunu kecdae, yeni medacfocnginagoc kecma wasaingic imoc isoc andae. ⁵ Ngic mong ye medacfora ifia homac kpedzucyunuma meyunukecde, ye kenehagoc.

Ngabafora taong nagui yoacfу nangandae, yeng imohai yenigoc nanu yeneng game kpekpeu naric mi faigecde.

128

Kebu eweheihei ammini
Hombannu kekenggac yegec.

¹ Ngicngac KEBUAC eweheiheigoc kecma yeac sing modacandae, yeni sasawango kenecnginagoc. ² Ge ua marigango mena fora fingeru menec amma sogac sogaigoc kecma naric kecnade. ³ Enenggango amaga manau kecde, ye waing ic fora homac amma nangande, ifi isoc anude. Nga nambaracfocga yeneng oriwa benama, ifi isoc tatacga yerecgema tackenggecde. ⁴ Negenggec, ngic mong KEBU eweheimima kefude, yearu kenec ifinoc feude.

⁵ KEBUNGO Sionnu kecma kenecguu. Yerusareng ye naric kecma wiac monggac mi obohoude, imoc hembesena. ⁶ Ge esafoсga fingecgec yenennade.

Ruaengo Israe areng yenearu febeso.

129

Ngicngacfora mefinunuude
Hombannu kekenggac yegec.

¹ Israengo yofi debeso, “Ni sebigborinaungoc kecbareng ngic yeneng ebic kunennu fainugec.” ² “Ni sebigborinaungoc kecbareng ngic yeneng ebic kunennu fainukecma firang mong mi anggec. ³ Bangec mendzic mendzic yeneng bangec mendzicgec areng fingecande, yeni ifi isoc ngadenau kpendzicgec areng herea fingecgec.”

⁴ KEBU ye dindingac. Ngic Anutu ngadephema mangana megecdeac ayemmeande, yeng yeneac witic herecgema yungecnunuec. ⁵ Ngicngac Siong ubanginango ukuandae, yeni merengyunugec yeni game kpekpeu faiyunugec monggoc dzigenema kembisia.

⁶ Yeni ama witiau kpindzingngo erema bic homeande, ifi isoc ambisia. ⁷ Mekpedzuc ngicnggo imoc meudeac maria mi sineude nga semeng dedeckeande, imoc mi abaranggema mekenude. ⁸ Ngicngac goa yeni kengha angandae, yeneng yofi naric mi degecde, “KEBUNGO kenecngunu. Neni KEBUAC kpacfu kenecngunudimbe.”

130

Kebu, ni kpacguduae
Hombannu kekenggac yegec.

¹ O KEBU, ni ubaebicnagoc emu keme kemeau isoc kecma kpacguduae. ² Kebu, ge enacudumenna negemma kedzac kpena. Kpesi kpesina gearu hade.

³ O KEBU, ge kopocsicnina kicgau arenggema negenna febacfu ngic mongngo serima naric mi kecbac. ⁴ Nga gearu sifu kopocsic wawa fedead eweheiheigoc hoanggubesong.

⁵ Ni KEBUAC tomai kecduae. Ubaonganango tomai kefu ni yeac yoac negensikecma fora fingerudeac tomai kecduae. ⁶ Tofocnacgareng yeneng asoac haudeac tomai kecandae, ni yeny feracyunuma ubaonganango KEBUAC tomai kecduae. Ni yeac tomai kecduae amma monggoc ferahamma tomai kecduae.

⁷ KEBUNGO yoac dedzege amma imoc modarude. O Israe, ge KEBU negensima fora fingerudeac tomai kecna. Yeng bummenunudacma ebicfunac mesinunuudeac

kuc engena femide. ⁸ Israe areng yeni ngicngac ogofocngina memanganeyunuma kopocsicnginagoc anggec. Nga yennoc bummeyunuma manganameme fakanginaunac mesiyunuude.

131

Wiac monggac mi ammide

Hombannu kekenggac yegec. Dawidingo yegec yofi heiec.

¹ O KEBU, herenau sebiengeng mi anganduae nga ubakpekpe arenna kicna wi mi meemma fibade. Wiac kuneng me bibiagoc amma ni feracnuma neacsoc mi ande. Ni imocac negen negeng ua mi mebade. ² Ubaongana menomaneba waicke fede. Sabac mongngo nonggeaac namu nema waicke feande, ubaonganango ifi isoc waickema fekecde.

³ O Israe, ge yofinenggac amma nasoya nasoya Kebu negensina flora fingerudeac tomai kecbesena.

132

Dawidi nga Siong meisingyuruec

Hombannu kekenggac yegec.

¹ O KEBU, Dawidingo ebicfu engkefec, imoc negenna feu yeac negenna ngereebeso. ² KEBU, Yakoboac Anutu Kuctoa mingina, ge yomoc negensibesena, yeng geac yoac deserima yofi deec, ³ “Ni amana manau mi embade me fefenau naric mi febade, ⁴ ni kicna gauac kpetarimima gau naric mi febade ⁵ kecma KEBU geac amatatac nga Kuctoa mingina Yakobogoc kecande, geac amagerec meficgebade.”

⁶ Negenggec, nenii Efrata bangecfu Anutuac dzadzahac katapaac siduc negemma Yara manennu imoc meficgeing. ⁷ “Hagec KEBUAC amau kenni, nenang yeac hanitatahaufafoc heimima numumini.

⁸ O KEBU, ge yacma kucgaac katapagoc tacnegeng amagau hana. ⁹ Womong garenga, ngeni dindingac kekec heigec kemebeso nga ngicngacfora kpetiac kecandae, ngeneng desogai amma arohobisia.”

¹⁰ Ge kingang ngicga Dawidiac gombunggac amma ngicga kerecngo nadzicminec, ye mi ngadehebesena. ¹¹ KEBUNGO yoac deserima Dawidi yoac edeec, imoc naric mi meickeude. Ye yofi deec, “Ni geac bangecyombongga yeneac arennumac medacga mong meisinggema ye ngictautatacgau faiba tacbeso. ¹² Neac dzadzahac nga dedekperagiyoacna kpouyemmeba geac medacfocga yeneng imoc modacgecdeu yeneac medacfocngina ifingoc geac ngictau tatacfu nasoya nasoya takecgecde.”

¹³ KEBUNGO Siong meisinggema ihai kefudeac ammide. ¹⁴ Ye yofi deec, “Ni ama yomocac negensongo negengkecba imocngo nasoya nasoya neac tacnegeng ama seria anu imohai tacyac ambade.

¹⁵ Nga imohai wiac sasawa fede, imoc homac yombong kenehebade. Yeac ngicngac makpekpea semeng gumecyunuba negebec anggecde. ¹⁶ Ni womong garengfora ebicfunac yungecyunubade, faka imoc ngakpi isoc heiymmeba kemeu kecgec ngicngacfora kpetiac kecandae, yeni sogac sogaiac yegec heigecde.

¹⁷ Ni imohai Dawidiac arennumunac ngic mong faima yeac kuc heigboriba besaiude. Ni ngicna kerecdokungo nadzicmiba kefu yeac kifa mong mengeremai. ¹⁸ Nga yeac ngabafora yeni ine game heiymmeba kemeude. Ni ngictauac ira pirac pirac heimiba kemeu imocngo ye mekperagiude.”

133

Kopocsic waemema kecbesonga

Hombannu kekenggac yegec. Dawidingo yegec yofi heiec.

¹ Negenggec, ngicngac daramuna ngeneng negengngina kpeturanggema ruagoc kecandae, imocngo wiac songea yombong. ² Faka imocngo kerec homuna gombunga

nga buma kuneng, imoc orucfu kpakegec mama ngebacdzo momoc nadzicmiande, ifi isoc. Imoc Aronggac ngebacdzu mama ferecgema ngakpia ubiau ifingoc nadzicmiude.

³ Imoc Herimong tikiac songoroc, ifi isoc. KEBUNGO Siong tikiu keneha nga kekeha wisic wisickea kpac kpakenemmeude, imocngo imohai mama kecde.

134

Maraiac dedengerec yegec

Hombannu kekenggac yegec.

¹ KEBUAC kingang ngic KEBUAC amau tofocnac nangandae, ngeni sasawango hadacma KEBU kenehebisia.* ² Ngeni maringina miacma amabangec kpetiac, imohaigeng maringina sinema KEBU kenehebisia.

³ KEBUNGO kurumeng nga bangec meficgeec, yeng Sionnu kecma kenecubeso.

135

Kebu ye damu damuyagoc

¹ KEBU yaiyo kpemini, hallelu Yac. KEBUAC kpac kuneng heiwayong memibesonga. O KEBUAC kingang ngic sasawa, ngeni ye dengerebisia. ² KEBUAC amau nga Anutuninaac womong sobengau nangandae, ³ ngeni KEBU ohec waec memibisia nocac KEBU ye gombunga. Ye wosoefac anemmeandeac yeac kpac kuneng heiwayong memima yegec heimibisia.

⁴ KEBUNGO Yakobo yengena areng segerema Israe yengena areng yombong anggecdeac meisingyunuec.

⁵ KEBU ye kuneng, imoc negenduae. Nenang Kebu yeng anutu hania hania sasawa feracyunudacde.

⁶ KEBUNGO wiac mong meudeac songo meficgema imoc naric kurumennu me bangecfu me kondunnu me keme kemea hania hania fekendae, imohai uaya meude. ⁷ Yennoc bangec tegiau hoeng uayoac yemmeu yacgecde. Nga yeng kia nga piratac meficyuruu heiandape nga firang tohongameaunac memau ngadeau mama fingecande.

⁸ Yennoc Aigita ngic yeneac warac medacfocngina nga rama burumakanginaac warac areng kpebucyundarec. ⁹ O Aigita bangec, ye gearu hama geac botucfu negens-inggegecdeac faka kuhagoc amma kucfaka bibiagoc sueyunuu fingecma Farao nga habufora memanganeyunuec. ¹⁰ Ye firang amma bangec monnunac ngicngac homac yunuma ngictau kucnginagoc kpebucyundarec.

¹¹ Ye Amori yeneac ngictau Sihong kpema Basang bangecac ngictau Ogie kpema Kanaanggac ngictau sasawa yunuma ¹² bangec maridzoming dema ngicngacfora Israe yemmeec. Ye maridzominga imoc yemmeec.

¹³ O KEBU, geac kpac kuneng imoc nasoya nasoya feengkefu ngicngac esamedacfocngina fingecsahe anggecde, yeneng geac kpac kuneng negenggec feude. ¹⁴ KEBUNGO yoacfu ngicngacfora nanggeyunuu yeni yoacfu firang ambisia. Ye kingang ngicfora yeneac ubea manganeude.

¹⁵ Bangec monnunac ngicngac yeni nemuongangina siriwa nga gol tegengngo memea. Yeni bangecngic yeneac marikibisac andae. ¹⁶ Yeni enacbibicnginagoc nga yoac ine naric mi degecde. Yeni kicnginagoc nga kicnginango ine wiac naric mi henggecde. ¹⁷ Yeni kedzacnginagoc nga kedzacnginango ine wiac mong mi negemma enacnginausing asu mong mi heigecde.

¹⁸ Ngic nemuonga meandae, yeneng nemuonga isoc anggecde. Ngicngac yeni nemuonga negensianda, ngicngac ifia yeni sasawango nemu ongangina isoc andacgecde.

* 134:1: Anutungo meficnunuu nenang bangecngicngac nec yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereeude. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

¹⁹ O Israeac areng, ngeni KEBU kenehebisia.* O Aronggac areng ngeni KEBU kenehebisia. ²⁰ O Rewiac areng, ngeni KEBU kenehebisia. Ngicngac ngeneng KEBU ewehiheigoc hoanggema kecanda, ngeni KEBU kenehebisia

²¹ Ngicngac Sionnu kecda, ngeni KEBU Yerusarennu kecande, ye kenehebisia. KEBU eriendzong memibesonga, hallelu Yac.

136

Kebuac wosoefac

¹ KEBU ye gombunga, imocac ubangerec memibesonga. Yeng yoac dedzege amma imoc modackecde, faka imocngo fefeseri feengkefude. ² Anutu hania hania yeneac Anutu ubangerec memibesonga. Yeng yoac dedzege amma imoc modackecde, faka imocngo fefeseri feengkefude. ³ Kebu yeneac Kebu ubangerec memibesonga. Yeng yoac dedzege amma imoc modackecde, faka imocngo fefeseri feengkefude.

⁴ Kebu kucfaka bibiagoc mekecde, ye ubangerecyoac memibesonga. Yeng yoac dedzege amma imoc modackecde, faka imocngo fefeseri feengkefude.

⁵ Kebu wiac sasawa negentegecmu kurumenga kurumenga maficyunuec, yeac marikibi gombunga yombong ande nga ye ubangerec memibesonga. Yeng yoac dedzege amma imoc modackecde, faka imoc fefeseri feengkefude.

⁶ Kebu doku witiau bangec faiec, ye ubangerec memibesonga. Yeng yoac dedzege amma imoc modackecde, faka imocngo fefeseri feengkefude. ⁷ Anutu kperagia kuneng faiyuruec, ye ubangerec memibesonga. Yeng yoac dedzege amma imoc modackecde, faka imocngo fefeseri feengkefude. ⁸ Ye wenacngo hadzing garenggeudeac faiec. Yeng yoac dedzege amma imoc modackecde faka imocngo fefeseri feengkefude. ⁹ Ye afo nga asomeng yeneng tofocnac garenggegecdeac faiyunuec. Yeng yoac dedzege amma imoc modackecde, faka imocngo fefeseri feengkefude.

¹⁰ Kebu Aigitu bangecfu waracmedacfocngina kpebucyunuec, ye ubangerec edebesonga. Yeng yoac dedzege amma imoc modackecde, faka imocngo fefeseri feengkefude.

¹¹ Ye Israe areng yeneac botucfunac hesicyunuu kenggec, ye ubangerec edebesonga. Yeng yoac dedzege amma imoc modackecde, faka imocngo fefeseri feengkefude. ¹² Ye mariseria nga kuctoayagoc amma maria sinema ua imoc meec. Yeng yoac dedzege amma imoc modackecde, faka imocngo fefeseri feengkefude. ¹³ Kebu kondung sacsac kpendziru yohockang anec, ye ubangerec edebesonga. Yeng yoac dedzege amma imoc modackecde, faka imocngo fefeseri feengkefude. ¹⁴ Ye Israe areng sing faiyemmeu yeneng imocac dzongiau ferecgegec. Ye ubangerec edebesonga. Yeng yoac dedzege amma imoc modackecde, faka imocngo fefeseri feengkefude. ¹⁵ Yeng firang amma Farao nga wasai arengfora heimerengyunuu kondung sacsacngo semeyunuec. Yeng yoac dedzege amma imoc modackecde, faka imocngo fefeseri feengkefude.

¹⁶ Ye ngicngacfora meyunuma bangec gbangge gbanggea feec, imohai wangecyunuma kenec, ye ubangerec edebesonga. Yeng yoac dedzege amma imoc modackecde, faka imocngo fefeseri feengkefude. ¹⁷ Kebu firang amma ngictau kucnginagoc yunuec, ye ubangerec edebesonga. Yeng yoac dedzege amma imoc modackecde, faka imocngo fefeseri feengkefude. ¹⁸ Ye firang amma ngictau kpac kunengnginagoc yunuec. Yeng yoac dedzege amma imoc modackecde faka imocngo fefeseri feengkefude.

¹⁹ Ye firang amma Amori ngic yeneac ngictau Sihong kpeec. Yeng yoac dedzege amma imoc modackecde faka imocngo fefeseri feengkefude. ²⁰ Ye firang amma Basang yeneac ngictau Oge kpeec. Yeng yoac dedzege amma imoc modackecde, faka imocngo fefeseri feengkefude.

* 135:19: Anutungo maficyunuu nenang bangecngicngac nec yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereeude. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

²¹ Ye yeneac bangecngina maridzoming dema ngicngac areng mong yemmeec. Yeng yoac dedzege amma imoc modackecde, faka imocngo fefeseri feengkefude. ²² Ye maridzoming dema bangec imoc kingang nigha Israe miec. Yeng yoac dedzege amma imoc modackecde, faka imocngo fefeseri feengkefude. ²³ Neni sure surea kecmina yennoc neneac negenu feec. Yeng yoac dedzege amma imoc modackecde, faka imocngo fefeseri feengkefude. ²⁴ Ye ngabafocnina yeneac mariunac mesinunuec. Yeng yoac dedzege amma imoc modackecde, faka imocngo fefeseri feengkefude.

²⁵ Yennoc wiac sasawa meficyunuma kekecnginagoc anggac semeng yemmeude. Yeng yoac dedzege amma imoc modarude, faka imocngo fefeseri feengkefude.

²⁶ O, kurumenggac Anutu ubangerec memibesonga. Yeng yoac dedzege amma imoc modackecde, faka imocngo fefeseri feengkefude.

137

Babirong doku tegiau

¹ Neni Babirong bangecac doku tegiau tacma Siong negensima kiacma ² gitanina ic fawau gbedickeing.

³ Ngic yeneng menunuma kemma ebic meficgenemmegec, yeneng ubangerec meficgegecdeac degec, "Ngeni Sionggac yegec heigec negenni."

⁴ Neni ine kuric bangecfu kecma KEBUAC yegec heinideac obohodimbe.

⁵ Yerusareng, ni geac nigecluudeu marifoinango dzanggema kuha kpac ambeso.

⁶ Yerusareng imoc neac sogac sogaiac enaratoa, ni ifi mi negemma geac nigecluudeu nedzarannango ngorucbonnau mendanggeboso.

⁷ O KEBU, ngic yeneng Yerusareng kpetotiegec, naso imohai Edonggac ngic yeneng degec, "Kpembarakegec, kpembarakegec mama seringau wisickeu." Kebu ge imoc negenna febeso.

⁸ O Babironggac naroang, ge kpetotiegugecdeac areng, imoc bic degenggec. Ge mangana anennecac ngic mong ye imocac turunga merenude, ye kenehagoc. ⁹ Mong ye geac sabac mema hoc peperandziu yunuma kpebucyunuude, ye kenehagoc.

138

Wi yombong kecde

Dawidingo mitiyegec yofi heiec.

¹ O KEBU, ni heregoc ubangerec megemma anutu hania hania kecdae, yeneac kicfu geac dedengerec yegec heigembade. ² Ni womongga kpetiacfubigeng ngonducebade. Geng yoac dedzege amma imoc modacnade amma ge yoac modac modac Kebu, imocac kpac kunenggaac ubangerec dekecbade. Ge kpac kunenggagoc nga geng yoacca deserima denec, ge wiac imoc miacna enu imocngo wiac sasawa feraheude. ³ Ni kpacguai naso imohai geng turunga merennenna kengeha kpac amma serima kecbadeac anennec.

⁴ O KEBU, bangecac ngictau sasawa yeneng geac enacgaunac yoac negenggec dengeregubisia. ⁵ KEBUAC kuc nga kibikperagitoa, imoc wiac engena. Yeni imocac KEBUAC sing fekende, imocac yegec heigecde.

⁶ KEBUNGO wi yombong kecde, fora, amma ye sifu ngictehec nenang nenenggareng anemmekufude. Ngicngac goa yenanggac nengenggec engena angande, yeng hereng-inau kecma fakangina negenude.

⁷ Ni ebic witiau kecduae, fora. Nga geng sifu kekecna onggonggekecne. Ngabafocna yeneng herebu anenggec geng mariga sinema marifoigango ebicfunac mesinunade.

⁸ KEBUNGO efaima neac kekecareng uayagoc faima imoc sasawa nearu mesidarude. O KEBU, geng yoac dedzege amma imoc modackecnade, fakaga imocngo nasoya nasoya feengkefude. Ge marikibiga mi ngadehema wana.

Kebu ge negennunec

Yegecgareng yearu. Dawidingo mitiyegec yofi heiec.

¹ O KEBU, ge neac herena hennegeng amma negennunec. ² Ni takecduae nga yacma nangkecdue, geng imoc sasawa negendacma hereaungoc tacma negen negenna hentegecdacnec. ³ Ni kengha anduae nga fefenau feduae, imoc hennegeng amma sing sasawa kenganduae, imoc negendacnec.

⁴ O KEBU, ni yoac debesonga enac mi anggebareng geng yoac imoc bic negendacnec. ⁵ Ge kicnau nga ngadenu oronnukecmarigau fainuma menunade.

⁶ Negen negeng ifia imoc keme kemea nga engenatoa amma kuneng andeac imocac ubangerec negenduae, fora. Nga imoc sifu naric mi negentegecebade.

⁷ Ni ihai me ihai kembadesoc geac Asuarunac agac naric mi kecbade. Nga geac kicfu kekec, imoc wama sufubadeacsoc mi anduae. ⁸ Ni kurumennu embadeu ge ihainoc kecnec. Nga homec amau kemema fefena faima fema naric mi sufubai nocac ge ihai ifingoc kecnec. ⁹ Ni asoac ama negenggac kpegang kpema kpututuckebade me kondung tegiau edi noboc kemma ihai tacbaiu ¹⁰ ge marigango ihai ifingoc hesicnuma marifoigango seria menunade.

¹¹ Ni yofi gedang debai, “Kundungng semenuu kperagia nearu feder imoc kundung kpebeso.” ¹² ifi deba kundung imoc ine geac kicfu kundung mi anude, kpac. Nga tofocnac imoc wenac isoc kperagiude. Nocac kundung imoc geac kicfu kperagi angkecde.

¹³ Geng ubaherena sasawa meficgema nonggo heremanau kecbare geanggaoc sebi-fusina nga ubaherena kpedzucnema meficnunec. ¹⁴ Ge meficnuma menunec imoc faka bibiagoc nga damuyagoc annecac dengeregubade. Geng uaga mekecnec, imoc wiac bibiagoc yombong, imoc negengyombonggeduae. ¹⁵ Geng sufu sufuu menunec, imohai ni forakebannagoc kicgango bic nennec. Sebina imoc emu bangec keme kemeau feu geng kpedzucnunec. ¹⁶ Sebinango mi torokpemanungoc kicgango sebinaac hanac hanahea hennec nga uamemena mong mi hamanungoc imoc sasawa tembuc tembuc geac kibiu oho ohoya fede.

¹⁷ O Anutu, geng wiac negensianne, imocac negemba wiac engenatoa ande. Imocac ni imoc kpeturanggeba kpetea engena yombong fingerude. ¹⁸ Imoc homac yombong sangi ferahadeac imoc osobesonga osiduae. Nga gborima yacbade, imoc gegocngoc kecbade.

¹⁹ O Anutu, ngic Anutu ngadehema mangana megecdeac ayemmeande nga ngic sac-nina hetinggegecdeac ayemmeande, yeni kpebucyununa wanubisia, imocac yombong anende.

²⁰ Yeni mangana negemma geac yoac deandae nga ikoc fingerudeac ngabafocga nanggeyunugecde. ²¹ O KEBU, ngic geac modzongina tiande, ni yeneac modzona homac tide. Ngicngac yeneng geac yoac kpeandae, yeni manganaac areng, ifi negemma wayunudacbade. ²² Foracngoc, ni yeneac modzona tiu ngicngac imoc yeni ngabafocna, ifi negemma ubango ukuyunubade.

²³ O KEBU, ge herena isinggema herenaac hania hennegeng amma faitobang anemma negen negenna henna. ²⁴ Ni manganaac sinnu kengkecdue me kpac, imoc hennegeng amma sing feengkefude, imohai hesicnuna.

Ngicngac memanganenubauac

Yegecgareng yearu. Dawidingo mitiyegec yofi heiec.

¹ O KEBU, ge yarengic yeneearunac yungecnuma ngic mangana herebunginagoc yeneearunac onggonnuna. ² Yeni herenginai yarefaka hania hania arenggema nasosoc dzikac kpegecdeac sing meficgekecdae. ³ Yeni nedzarangngina dzomugec boidzocac nedzarang enaragoc, ifi isoc anude. Yeni ngedzarangnginango ikoc ayemmeandae amma bibicnginai boidzocac marasing mekecdae. Selac

⁴ O KEBU, ngic Anutu ngadehema mangana megecdeac ayemmeande, yeneac mar-iunac onggonnuna. Yarengic yeneng hanina kpesigecdeac negensima areng faigec ge onggonnuna. ⁵ Ubakpekpe ngic yeneng botac mong mesufuma faima menubeso angkecdae. Yeni witic mema ufic faima suba sing tegiau faima menubeso angkecdae. *Selac*

⁶ KEBU yoac yofi ededuau, “Ge neac Anutu.” O KEBU, ge neac ubaga manganeudeac kpacguba ge kedzac kpema negembesena.

⁷ O KEBU Kuctoa mingina, ge neac yungec yungecna seria. Geng dzikac nasou orucna garenggema onggonnunec. ⁸ O KEBU, ngic Anutu ngadehema mangana mebeso ayemmeande, yeni yenanggac negenggac wiac engena ambaac songongina modacma wiac mong mi meficgeyemmebesena. Yeni yarefaka arenggekecdae, imoc fora mi fingecbeso. *Selac*

⁹ Ngic ni oronnudae, yeni enacbibicnginango yoac dema ngicngac ebicfu faiyunuan-dae. Ebic imocngo geng negemmana orucngina semeu ¹⁰ gerec seriango kia isoc witinginau mabeso. Yeni emu tengtoau ukuyunugec kemema monggoc mi erebisia.

¹¹ Ngic ngadeyoac deande, ye bangecfu titisera faibacac geng imoc kpetarimina. Faka mangana yengenaoc yarengic bic yombong kisamma firang amma ye meickebeso.

¹² Ngicngac ebic witiau kecgec KEBUNGO yeneac yoac henggareng amma nanggeyunuude. Ngicngac iwaia obohoma kecandae, yeni sing dindingac modacgac yeng isingyunuma yoacngina desiude, imoc negenduaue. ¹³ Foracngoc, ngic dindingac yeneng geac kpac kuneng heiwayong memima ubangerec degecde. Nga ngicngac ikoc nga hamangecngina kpac kecdae, yeneng geac kicfu kecgecde.

141

Ni manubeso ande
Dawidingo mitiyegec yofi heiec.

¹ O KEBU, ni kpacguduau. Ge nearu bic hana. Ni kpacguba ge kedzac nearu faima ubaudumenna negenna. ² Nunumunango geac kicfu hama hosuc homuna gombunga, ifi isoc ambeso nga marina gearu miacba imocngo maraiac sese gombunga, ifi isoc ambeso.

³ O KEBU, ge enacnau kpae mong mengerema bibicnaac naguya garenggekecbe-sena. ⁴ Herenango mangana hoanggebacac nga ngic ngicngac ogofocngina meman-ganeyunuandae, yenigoc kecma haifaka mangana angkecbaiac ge imocac kpae heinem-besena. Ni yenigoc tama wiac emenec mi ambesare.

⁵ Ngic gombungango yoac yumiau edenuma demengere naric anembeso. Imocngo kerec orucnau nadzicnenggec sebinango ireckeande, ifi isoc andeac orucnango imoc naric mi waude. Ni mangananemem yeneac negemma numuanduae, imocac turungaac nasoya hau fora fingecdarude. ⁶ Imohai ngic Anutu ngadehema mangana megecdeac ayemmeande, yeni wi nanggec enarafocngina ukuyunugec hofeu kemegecde. Nga yeni imohai yofi negenggecde, KEBUAC yoac imoc fora. ⁷ Ngicngko bangec mendzicgec hocngoc erema fingecande, yarengic yeneac sicngo ifi isoc homec amaac naguu singsrarang kpema feemeude.

⁸ O KEBU, Israeac Anutu, ni sifu kicna gearu fima geac hoannu hama sufubeso anduaeac onggonnuma mi wanubesena. ⁹ Ngic mangana yeneng menugecdeac botac faigec nga yarengic yeneng suba faigec ge imohacnac onggonnuna.

¹⁰ Ni gombunga kembare ngic goa Anutu ngadehema mangana megecdeac ayemmeande, yeni yenang botacngo meyunubeso.

142

Nukporac anenggac
Masiki uba modacma heibesonga. Dawidingo hoc singau tacma numuyegec yofi heiec.

¹ Ni ubana miacma KEBU kpacba yeng neac ueba manganeudeac ubana miacma numubade. ² Ni ebicyoacna hafoangoc yeac kicfu kpakema kpendzennaac yoacsiduc yeac kicfu deficgabade.

³ Asuna ukuba kpeu geng haniana bic negennade. Ni sing kenganduae, imohai ngic yeneng menugecdeac botac faima sufuma takecdae. ⁴ Ni kicna foinaugeng fima hemba mongngo ni mi nengsiude. Nga ni sufu sufuama hofocba kpac anu ngic mongngo nenggareng mi anenude.

⁵ O KEBU, ni kpacguma deba, “Ge sufu sufuamana nga ge gbori kekec bangecnginau neac wiac angkecne. ⁶ Ni memeficac obohoyombonggema kecma kiacduaeac kiacna negemma ngic nukporac anengandae, yeneearunac yungecnuna. Yeni serima feracnudae. ⁷ Ge yungecnuma ebicnaac witicamaunac wangecnubesena. Ge ifi anna ni geac kpac kuneng heiwayong memima ubangerecyoac debade. Ge gombunga anengannecac amma ngicngac dindingac yeneng hama oronnugede.”

143

Kopocsicnagoc andimbe

Dawidingo mitiyegec yofi heiec.

¹ O KEBU, ge nunumuna negenna. Ni kpacguma desambic anggembra ge kedzac faima yoacna negenna. Ge yoac modac modac Kebu nga ge dindingac kecnecac amma turunga merennenna. ² Ngic mong kekehagoc ye geac kicfu dindingac naric mi kecde. Nga ni kingang ngicga anduaeac yoacf mi fainubesena.

³ Ngabangicnango kporacnuma kekecna bangecfu kpefahau ni kundung manau homecngic bic homegec, yeni isoc tacbadeac fainuec. ⁴ Imocac asuna herena manau worau herenango ebic meficgema hoc isoc ande.

⁵ Ni warac naso, imoc negemba fede nga geng ua mekecne, imoc hennegeng amma negensikecduae. Ge marigango marikibi meficgenec, imocac ubangerec negemma hennegeng angkecduae. ⁶ Marina gearu miacduae. Bangec dzangge dzanggeango dokuac ammiande, ubaonganango ifi isoc geac ammide. *Selac*

⁷ O KEBU, asuna woradeac turunga bic merennenna. Ni kecma ngic homema bangecfu kemeandae, ifi isoc kemebaiac ge kicmesuga nearunac mi mesufuna. ⁸ Ni negenseriguma yofi deba, “Geng yoac dedzege amma imoc modackecne, ge asoacngoc imocac yoac edenubesena. Ubaonganana gearu miacba ereudeac sing kpounenna ni imoc modacma kengkebade.”

⁹ O KEBU, ni worama geac hoannu sufubadeac hadua. Ge ngabafocna yeneac mariunac yungecnuna. ¹⁰ Ge neac Anutu. Ge imocac songoga kpounenna arenggeba geac Asu gombunggango bangec sorongau hesicnubeso.

¹¹ O KEBU, ge kpac kunengga gombunggaac amma kekecna onggonggena. Nga fakaga dindingacac amma ebicfunac mesinuna. ¹² Ni geac kingang ngicga kecduaeac geng yoac dedzege amma imoc modackecne, fakaga imocngo ngabafocna nga ngic sasawa ubana kpeandae, meicyunudacna kpac ambisia.

144

Kebungo meficnunu firang annide

Dawidingo mitiyegec yofi heiec.

¹ KEBU ye neac hoc peperandzi seria, ye kenehebesonga.* Yeng marina dzikacac mengerekecma dzikac kpebadeac gbonna meefaiude. ² Neac Anutungo yoac dzegema imoc modarude. Ye neac hoc peperandzi seria nga amana seria amma ye ebicfunac mesinuude. Ye kasona anenu ni yeac hoannu kemma sufubade. Ye firang amma ngiha ngiha neac bageu faiyunuude.

* 144:1: Anutungo meficnunu nenang bangecngicngacne yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereeude. (Fingec fingec 9:26, 14:20, 24:48, Mitiyegec 16:7, 26:12, 103:22 nga goa homac fede.)

³ O KEBU, bangecngic ye gombungaya kpac kecde, fora. Nga geng ngicac medac sifu henggareng anemmemma negensinade. ⁴ Bangecfu ngic neni ine wiac engena kpac. Ngic neneng asu naso mocgu taiandimbe, ifisac. Nga kekecnina imoc wenacfu onganinango hereande, ifi isoc ande.

⁵ O KEBU, ge kurumenga kurumenga merarangyunuma yacma mama tiki kpeserey-nuna hosuc kpebisia. ⁶ Ge piratac sueyununa ngabafocga yunugec singsararang kpema kendacbsia. Ge tebemedaha kpesaima wedecyunubesena. ⁷ Ge wi tacma mariga sinema menuma doku tunggbuang kucnginagoc hakecdae, imohacnac mesinuna. Ge kuricngic yeneac mariunac mesinuna. ⁸ Yeni enacbobicngina ikocyao wakeu deandae nga marifoinginango tobannunuma ua meandae.

⁹ O Anutu, ni geac yegec gboria mong heibade. Ni gita witiha teng kpema imocngo udumeng gombunga meficgegembade. ¹⁰ Gennoc dzikacfu ngictau kuc yemmena firang anggecde. Dzikaac beangngo ni, kingang ngicga Dawidi kpebeso anu geng imohacnac onggonnunc.

¹¹ Ge dzikac beang mangana yombong, imohacnac onggonnuma kuricngic yeneac mariunac yungecnuna. Yeni enacbobicnginango ikocyao deandae nga marifoinginango tobanunudeac uatoa meandae.

¹² Medacfocnina yeni sebigbori kecma ic barama gombunga, ifi isoc ambisia nga naroangfocnina yeneng ngictauac ama mana tuturunggac sering marikibi gombunga heiandae, ifi isoc siricnginagoc ambisia. ¹³ Uaninaac tohonnu semeng hania haniango wakema febeso. Nga ramafocnina manennu yeneng fingecksahe kuneng ambisia, imoc taoseng nga taoseng naso teng ifi sahebisia. ¹⁴ Nga burumakafocnina yeneng medac heregoc kecma ebiria yombong amma medac megecde, imohai mongngo mi manganebeso me homebeso, kpac. Taongoaninaac sinnu ebicac nga kiacac udumeng mong mi fingeckbeso.

¹⁵ Ngicngac sasawa Kebuac kenecgoc ifi kecandae, yeni sogac sogainginagoc. KEBUNGO ngicngac ngeneac Anutungina ande, ngeni kenehagoc amma kecgecde.

145

Anutuac marikibi ye afehebisia

Dawidingo dedengerec yegec yofi heiec.

¹ Anutu nga KEBUNA, ni afeguma geac kpac kuneng nasoya nasoya kenehekecbade.

² Ni wenacsoc kenecguma* geac kpac kuneng nasoya nasoya heiwayong memibade.

³ KEBU ye engenatoa amma damu damuyagoc. Ngic mongngo yeac negen negeng nga siriha naric mi arenggema negentegerude, kpac. Kebu eriendzong memibesonga.

⁴ Ngicngac yofinenggac kecdae, yeneng angammemeagaac siduc nambaracfocngina edeyunugec yeni ngade fingeckgecde, yenearu deyadiyemmekecma kucfakaga damu damuyagoc dekperagiyemmegecde. ⁵ Ge kibikperagiagoc nga ngictauac kucgagoc amma ua bibiagoc mekec nec, yeni imocac yoac degec ni imoc hennegeng amma negensikecbade. ⁶ Ngic yeneng uaga damu damuyagoc nga kuhagoc mekec nec, imoc dekperagiyemmebisia. Nga ge engenatoa, imoc dekperagibade. ⁷ Geng gombunga anemmekec nec, imoc wiac efea kpac. Yeneng imocac siduc degec ni fakaga dindingacac desogai amma yegec heibade.

⁸ KEBUNGO ubangerec anemma neneac ubea manganeude. Ye ngaba bic mi anemmeude amma yeng yoac dedzege amma imoc modackecde, faka imocngi wiac engena ande. ⁹ KEBUNGO ngicngac sasawa gombunga anemmemma marikibifora neneac ubamanggang anemmeude. ¹⁰ O KEBU, ge wiac sasawa mefiyununec, yeni geac ubangerec megembisia. Nga ngicngacfocga kpetiac yeneng kenecguma ¹¹ eucererenggac kibikpera-giaac siduc dekperagima kucgaac yoacsiduc dekperagibisia. ¹² Ifi anggec ngic sasawango

* 145:2: Anutungo meficnunuu nenang bangecngicngacne yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereeude. (Fingeck 9:26, 14:20, 24:48, Mitiyegec 16:7, 26:12, 103:22 nga goa homac fede.)

uaga kuhagoc mekecnec, imoc negenggecde. Yeni eucererengaac kuc kibikperagiagoc, imocac siduha negenggecde.

¹³ Geac eucerereng imoc nasoya nasoya feengkefu geng ngictauac kucn go garengyunukecnec, imoc ngic fingecsahenina fekefude, imocacsoc feengkefude.

KEBUNGO yoara sasawa deec, imoc modarude nga faka angammemea imoc ubangerecgoc. ¹⁴ Ngicngac manunubeso anu KEBUNGO nenang sasawa nanggenunuude. Ye ngicngac tipetangyunuyunya miacyunuude. ¹⁵ Geng nasoya hau yaka yemmenadeac sasawango geac negeung amma kicngina gearu figecde. ¹⁶ Wiac kekecnginagoc sasawa yeni wiac monggac ayemmeu geng mariga mekpacgema yemmena soha megecde.

¹⁷ KEBUNGO fakaya dindingac modacma wiac sasawa meande, imoc ubangerecgoc anemmeude. ¹⁸ Ngicngac KEBU kpacgac yeng yeneac wegenac kefude. Nga ngicngac ikocngina kpac kecma ye kpacandae, ye yenigoc wegenac kefude. ¹⁹ Ngicngac eweheihei ammiandae, yeni wiac monggac me monggac ayemmeu yeng imoc yemmeu naric kecgecde. Yeng kpakpacngina negemma ebicfunac mesiyunuude. ²⁰ Ngicngac yeneng KEBU songogoc hoanggekecgec Kebungo onggongyunuude. Anu ngic Anutu ngadehema mangana megecdeac ayemmeande, yeni memanganeyunuuk pac andacgecde.

²¹ Enacbobicnango KEBUAC dedengerec yoac deude. Ngicngac bangecsebigoc kecdae, ngeni sasawango yeac kpara kpetiac nasoya nasoya kenehebisia.

146

Yoac modac modac Kebu

¹ KEBU yoyomo heimini, hallelu Yac. O ubaongana, ge KEBU dengerebesena. ² Ni kekecnau KEBU afehema kekec kecbadesoc Anutunaac dedengerec yegec heibade.

³ Ngeni ngictauac medacfoengina nga bangecngicac medac sasawa mi negenseriyunubisia, imoc negembisia. Yeneng naric mi meficngunugecde.

⁴ Asunginango wayunuma kenu yeneng homema emu bangecfu monggoc kemegecde. Nga yeni ua hania hania megecdeac arenggekecgec, imoc uameme imohaingoc kpac andarude.

⁵ Yakoboac Anutungo ngic monggac memeficngic anude, imohai ngic imocngo kenehagoc anude. Ngic mong ye KEBU Anutu negensima fora fingerudeac tomai kecande, ye kenehagoc. ⁶ Anutungo kurumeng nga bangec meficgema kondung nga kondung manau wiac sasawa fede, imoc meficgedarec. Ye yoac modac modac KEBU. Ye ifi kecde nga nasoya nasoya ifi kecengkefude. ⁷ Ngic goa yeneng ngic ogofoengina ebicfu faiyunugec ubaebicgoc kecgec Kebungo sing dindingac modacma isingyunuma yoacngina desiude. Ngicngac herenginaac homegec yeng yaka gumecyunuude. KEBUNGO ngicngac witi-camau tacandae, yeni witicngina yungerude. ⁸ KEBUNGO ngicngac kicpisic kicngina merecgeude nga ngadehokuc ngadengina mesorongaima miacyunuude. KEBUNGO ngicngac dindingac kecandae, yeni songogoc hoangyunuude. ⁹ Ngicngac kuric kecgec KEBUNGO yenenggareng ayemmemma ngac hodzec nga beginngangyunuude. Ngic Anutu ngadehema mangana megecdeac ayemmeande, yeneac singngina ine memanga-neude.

¹⁰ KEBU Sionggac Anutu, ye nasoya nasoya geac ngictau anggengkefude. Ye fingecsa-hega fekefudesoc geac ngictau anggengkefude.

KEBU eriendzong memini, hallelu Yac.

147

Wiac sasawa nemmekecde

¹ KEBU eriendzong memini, hallelu Yac. Anutunina yegec heimima dengereni, imoc wiac gombunga yombong. Ye ubangerec anemmeandeac amma ye sesehema yegec heimini, imoc ubangerehagoc nga faka imoc ngereede.

² Ngic yeneng Israe arenggac ngicngac bic ukuyunugec. Nga KEBUNGO Yerusareng taong ine monggoc mema megboriu yeni monggoc kpedzucyunuma hoangyunuude.

³ Ngicngac herenginau ebic mema manganeyombonggeu yeng mengereyunuma kubecngina sangohoude. ⁴ Yeng asomeng kpetengina meserima kpacngina tembu tembu kparude. ⁵ KEBUNINA ye damu damuyagoc nga ye kuha engena yombong. Ngic mongngo yeac negentegecac kpetea naric mi meude, kpac. ⁶ Ngic yeneng ngicngac ogofocngina memayunugec KEBUNGO monggoc miacyunuma nanggeyunuude. Nga ngic Anutu ngadehema mangana megecdeac ayemmeande, yeni ine meyunuma bangecfu ukuyunuude.

⁷ KEBU ubangerecac yegec heimima Anutuninaac gita kpema imocngo udumeng gombunga memini.

⁸ Yeng kurumenga kurumenga hoengngo kperacyunuma kia faiu bangecfu mama fagannu kpindzing meficgeu ereude. ⁹ Yeng yang hania hania yakangina meficgeyemeude. Neng yeneac medacngina yakaac derecgegec yeng yaka yemmeude. ¹⁰ Yeng becosi kuhagoc henu wiac engena mi ande nga ngic kuhagoc ye haningo sing herea tiu ye imoc henu wiac engena mi ande. ¹¹ Ngicngac ye eweheiheigoc hoangeandae, yeng yenemma nengenu ngereeude. Yeng yoac dedzege amma imoc modarude. Nga ngicngac yeneng imocac negensima fora fingerudeac tomai kecanda, ye yeneac negenu ngereeue sogaiude.

¹² O Yerusareng, ge KEBU yoyomo heimina. Siong, ge Anutuga yaiyo kpemibesena. ¹³ Ye taongga oda mengerema naguyaac aieng meseriu seria monggoc nanude. Yeng amaga manau medacfocga kenecyunuude. ¹⁴ Ye bangecgau ma faima ngicngacfocga ongongngunu ruaegoc kecgecde. Ye wit semeng gombunga yombong meficgengemmeeu negebec anggecde.

¹⁵ Ye dederecgeyoara bangecfu sueu imocngo bic yombong nedzima haude. ¹⁶ Ye nomang sueu imoc rama dzoea, ifi isoc amma bangecfu maude. Ye nomang bangecfu haudeac deu imocngo hama isoc bangec semeude. ¹⁷ Ye nomanggbomea minginango nomanggbomea imoc wiac kotaha isoc ukuu mau mongngo yeac nomang imohai serima naric mi nanude. ¹⁸ Ye nomanggbomea yoac edeyunu yeni sisingaima doku monggoc anggecde. Ye firang minginango firang sueu bangec fifiranggeu doku duamagoc hakecgecde.

¹⁹ Ye yoara Yakobo mekperagimi sing nga dederecgeyoara imoc Israe areng mekperagiyemmeec. ²⁰ Ye bangec areng goa yeni faka ifia mong mi ayemmeec. Yeneng yeac dederecgeyoac mi negendae, kpac.

KEBU eriendzong memini, hallelu Yac.

148

Bangec kurumeng Kebu dengerebisia

¹ KEBU heiwayong memini, hallelu Yac. Kurumenga kurumenga areng kecdae, ngeni KEBU ohec memibisia nga sawau kecdae, ngeni Kebu dengerebisia. ² Kebuac angero sasawa ngeni ye dengerebisia. Kurumennu yeac wasai areng, ngeni ye dengerebisia. ³ Wenac nga afo amma asomeng kperagiagoc, ngeni yoyomo heimibisia. ⁴ Kurumenga kurumenga wi yombong nga kurumenga kurumenga witinginau doku fedae, ngeni KEBU dengerebisia.

⁵ Yennoc yoac deu fingecgecac ngeni sasawango KEBUAC kpac kuneng heiwayong memibisia. ⁶ Yeng tatacnginau seria tacgecdeac faingunuma mangina faiec, imoc naric mi ferahagecde.

⁷ Ngicngac bangecfu kecdae, ngeni KEBU eriendzong memibisia. Kondunggac yangtoatoa amma kondung kunenggac dzohongtoa keme kemea, ngeni KEBU dengerebisia.

⁸ Piratac nga nomanggbomea amma nomang maande nga nomang bangecfu fingecande amma kia firang, ngeni sasawango yeac enac tofobobisia. ⁹ Tiki fagang nga ic foragoc amma yomondzoc ic sasawa, ¹⁰ kateu yang nga amaac yang sasawa, gisicgbiriring nga neng kpututuckegecde.

¹¹ Bangetoa bangecac ngictau nga ngiha ngiha nga ngictauac medacfocngina nga bangecac ngic enara kecdae, ¹² sebigbori medac nga naroang momoc, ngicngac kpengeng nga nambarac, ¹³ ngeni sasawango KEBUAC kpac kuneng heiwayong memibisia. Ye kpactoayagoc, imocac ye afehebesonga. Yeac kuc kibikperagiagoc kurumeng nga bangec feracyunuma wi fede. ¹⁴ Ye ngicngacfora yeneac amma ngictau mong nanggeu kuhagoc amma firang anude. Yeac ngicngacfora kpetiac kecandae, ngeni ye dengerebisia. Kebu ye Israe habufora yeac wegenacfu hama kecdae, ngeneac amma ngictau faiec.

KEBU eriendzong memibesonga, hallelu Yac.

149

Ngeni ubangerecgoc kecbisia

¹ KEBU eriendzong memini, hallelu Yac. KEBUAC yegec gboria heimibesonga. Ngicngacfora yeac yoac modackecdae, ngeni kpekpeturangnginau yeac yegec gboria heimibisia. ² Yeng Israe meficngunu ngeni yeac ubangerec negembisia. Sionggac medacfora, ngeni ngictaunginaac sogabisia. ³ Ngeni yegec fedema yeac kpac kuneng heiwayong memibisia. Ngeni tambaring nga gita kpema udumeng gombunga meficgema oeha memibisia.

⁴ KEBUNGO ubangerecgoc ngeneac negenu ngereeude. Yeng ngicngac yumia ebicfunac mesingunu imocngo wiacngina sirihau anu heingemmeu kemeude.

⁵ Yoac modac modac ngicngac ngeni sogaima fefenginau fema ubangerec negemma yegec heimibisia. ⁶ Ngeni enacnginango dendzerenggema Anutu dengerema maringinau soe mana ngadea enaragoc mema kecma ⁷ imocngo bangec monnunac ngicngac yenearu turungngina kpouyemmebisia. Ngeni ngiha ngiha kopocsicnginaac turunga kpouyem-mema ⁸ seng mema imocngo ngictaufocngina witicyunugec ngickunengfocngina aiennu mendanggyunubisia. ⁹ Yoac yofi bic oho ohoya fede, “Yeneac yoac imoc modacma yoacngina isingga desibesonga.” Nga imocngo Anutuac ngicngac yeac yoac modacma kecdae, yeneac kuc kibikperagiagoc anude.

KEBU eriendzong memini, hallelu Yac.

150

Kebu dengerebesonga

¹ KEBU eriendzong memini, hallelu Yac. Anutu womongau eriendzong memibesonga. Yeac kurumenga kurumenga seria fekendae, ngeni imohai yaiyo kpemibisia. ² Kebungo kucfaka damu damuyagoc mekecde amma ye engenatoa kpembibihagoc, imocac yoyomo heimibesonga.

³ Ngeni trumpet fifima udumeng meficgema ye dengerema yoming nga gita kpema udumeng meficgema heiwayong memibisia. ⁴ Ngeni tambaring kpema yegec fedema ye dengerema gitakurere kpema kungac fifima dengerebisia. ⁵ Ngeni kpeng kpema ye dengerema kpeng udumenga kunengngoc fifima dengerebisia.

⁶ Wiac sasawango asu heiandae, ngeni KEBU eriendzong memibisia.

KEBU eriendzong memini, hallelu Yac.

Mataio

Yeng Yesuac Siduc Gombung Ohoec

¹ Yesu Kristoarunac fingeysahe amma fingeyseregec, imocac yofi ohogec. Yesu ye Dawidiarunac nga Dawidi ye Abrahanggarunac. ² Abrahang ye Isakaac mama. Isaka ye Yakoboac mama. Yakoboarunac Yuda nga dacmunafora. ³ Yudaac medahora Perese nga Dzera fingeroc, yereac nonggongira Tama. Anu Perese ye Hesoronggac mama nga Hesorongngo Ranggac mama. ⁴ Rangngó Aminadaac mama, Aminadango Nasonggac mama nga Nasongngo Sarmonggac mama, ⁵ Boas ye Sarmong nga enema Rahabaarunac. Boasi ye Obedac mama nga nonggea, imoc Ruti. Nga Obedngó Isaiaac mama. ⁶ Isaingo ngictau Dawidiac mama, Dawidingo Saromoac mama yeac nonggea ye warac Uriaac enema kefec.

⁷ Saromo ye Rehoboanggac mama, Rehoboang ye Abiaac mama nga Abiaarunac Asafa. ⁸ Asafa ye Yosafataac mama, Yosafatango Yoranggac mama nga Yorang ye Usiaac mama. ⁹ Usiango Yotanggac mama, Yotang ye Ahasiac mama nga Ahasi yearunac Hesekia fingeroc. ¹⁰ Hesekiaarunac Manasse fingeroc, Manassearunac Among, Amonggarunac Yosia fingeroc. ¹¹ Yosia yearunac Yekonia nga munafora fingegec. Yeni Babirong bangecfu meyunu kenggec, naso imohai fingegec.

¹² Yeneac ngadeu Saratiere fingeroc, ye Yekoniarunac. Nga Saratiere yearunac Dzorobabe. ¹³ Dzorobabearunac Abiudu, Abiuduarunac Eriaking, Eriakinggarunac Asore fingeroc. ¹⁴ Asorearunac Sadoko, Sadokoarunac Aking nga Akinggarunac Eriudu fingeroc. ¹⁵ Eriuduarunac Ereasa, Ereasaarunac Matang nga Matanggarunac Yakobo fingeroc. ¹⁶ Yakoboarunac Yosefe Mariaac ewea fingeroc. Nga Maria yearunac Yesu, kpara Kristo degec, ye fingeroc.

¹⁷ Fingeysahengina Abrahanggarunac erekecma Dawidi fingeru andenga 14 ande. Nga Dawidiarunac fingeysahengina erekecma andenga 14 ammanu Babironnu meyunuma kenggec. Nga imohacnac namma erekecgec andenga 14nu Messia fingeroc.

¹⁸ Yomoc Yesu Kristoac fingeysahe siduc. Maria nga Yosefe yeri eweeneng anecdeac yoac dedzege bic anoc nga Maria yeng ine Yosefegoc feyc mi ammaec Tiri Asuarunac medac kpenanggeec. ¹⁹ Nga ewea Yosefengo ifi negemma ngic kpetiac kefecac ngicngac yeneac kicfu enembingeja gamekpekpe ammiudeac negenu naric mi anu negen negengua mema tembhau aikic waudeac negenec.

²⁰ Ye imocac negen negengua mema kecmanu Kebuac angelo mongngo ine gauu fingeysima yofi edeec, "Yosefe, Dawidiac kisicfunac, ge enembingecka Maria menadeac mi kengecgubeso. Sabac hereau tacde, ye imoc Tiri Asuarunac. ²¹ Mariango medac mong meude, yeng kecma ngicngacfora kopocsinginaunac mesiyunu komoc kpegecde. Imocac ge kpara Yesu mibesena." ²² Anu Kebungo yoac profete yenearu faiu degec, imocnoc fingeysdarudeac ifi fingeroc.

²³ "Negenggec, ngacnaroangngo medac mong kpenanggema meu yeac kpara Imanuere degecde." *(Yesaia 7:14)*

Imocac titiha yofi, Anutungo nenanggoc kecde.

²⁴ Anu Yosefengo gauunac yacma Kebuac angerongo yoac edeec, imoc modacma kemma Maria hesickema ameau enec. ²⁵ Enu yeri eweeneng kekec bic mi kecmaecngoc medac fingeru kpara Yesu kparoc.

¹ Yesu Betreheng amau Yudaia prowinsiu fingeroc, naso imohai Herodengo ngictau kefec. Kecmanu negen negengngic goa bangec wenac ere ereaunac Yerusarennu hama

² yofi degec, "Yudangic ngeneac ngictau fingeysdac, ye dahai? Neni wenac ere erea tacma yeac asomeng ereu hemma ye eweheiminideac hadimbe." ³ Ifi degec ngictau Herodengo imoc negemma ubaebic meec. Meu ngicngac Yerusareng taonnu kecgec,

yeneng ifingoc anggec. ⁴ Nga ye yudaareng yeneac womong gareng enara nga mitiac negengngicfocngina sasawa heitaiyunuma yofi dekpesi ayemmemec, “Messiango dahai fingerudeac dedea?” ⁵ Ifi kpesiyemmeu yofi degec,

“Imoc Betreheng taonnu Yudaia prowinsiu. Imocacnac profetengo yoac yofi ohoec fede, ⁶ ‘Yuda bangecfu Beterehennac enara mong fingeclma israengicngacfocna garengyunuudeac taong imoc yudaarenggac taong goa yeneac mamea kpac.’”
(Mika 5:2)

⁷ Ifi edegec Herodengo wenac ere ereaunac negen negengngic tembucfu heitaiyunuma asomeng noc nasoac fingerec, imocac naso dindingac negenudeac dekpesi ayemmemu edegec. ⁸ Edegec yeng yofi dema Betreheng amau sueyunuec, “Ngeni kemma sabac dahai fede, imoc hofocma meficgema hama edenugec neng mong ifingoc kemma eweheimibesare.”

⁹⁻¹⁰ Ngictaungo ifi deu yeni imoc negemma sinnu kenggec. Kemma asomeng wenac ere ereau henggec, imocngo monggoc fingeru hemma ubangerectoa negemma desogai homac anggec. Nga asomengngo waraiyemmeu kengkecma sabac feec, ama imocac witiau heiserima tarec. ¹¹ Taru yeni amau emma sabac nga nonggea Maria yerenggec. Yeremmafafoc heima ngonducnema ye afehegec. Amma finachienginaunac ubangerecac wiac yofi widicma mijec, gol nga hosuc homungkerengagoc amma icsopea homuna gombunga kpara mira. ¹² Nga Anutungo yeni Herodearu sing mi dzigenegedeac gauu goro dema dederecge ayemmemu yeni sing monnu sing bangecnginau dzigenegec.

¹³ Dzigenema kenggec Kebuac angero mongngo Yosefe gauu fingeclmima yofi edeec, “Ge yacma sabac nonggeagoc meyuruma worama Aigita bangecfu kemma kecgec. Kecmagec neng edengunubaguc monggoc habisia, nocac Herodengo sabac hofocma meficgema kpehomeudeac dede.” ¹⁴ Ifi deu Yosefengo tofocnac imohaingoc yacma sabac nonggeagoc meyuruu Aigita bangecfu kenggec. ¹⁵ Kemma ihai kecmagec Herode homeuguc dzigenegec. Nga Anutungo profeteac enacfu yoac faiu yofi deec,

“Ni Aigita bangecfunac medacna kpacba haec.”
 imoc fora anudeac ifi fingerec.

(Hosea 11:1)

¹⁶ Anu negen negengngic yeneng Herodeac yoac wagec, ye ifi hemma herebutoa negenec. Negemma Betreheng nga amabangec imocac wegenacfu tarec, imohai wasaingic sueyunuu yeni ngicngac imoc yeneac medacfocngina kifangina yohockang namma made, yeni sasawa yunuomedacgec. Imoc negen negengngic yenearunac naso negenec, imocac sirihau anec. ¹⁷ Ifi anu profete Yeremiaaru yoac yofi dedea, imoc fora fingerec.

¹⁸ “Raama taonnu kiacsonggong nga ubahodung kuneng fingeclde. Imoc Rahengo nambaracfora homegec, yeneac kiackecde. Ye nambaracfora homedacgec mong mi kecdaeac demeefai ammigecdeac mi negende.”
(Yeremia 31:15)

¹⁹ Anu Herode homemanuguc Anutuac angero mongngo Yosefe gauu fingeclmima yofi edeec, ²⁰ “Ge yacma medac nonggeagoc meyuruma Israe bangecfu kenna, medac kpehomebesonga degec, ngic imoc yeni bic homegec.” ²¹ Ifi deu Yosefengo efaima yacma medac nonggeagoc meyuruma Aigita bangec wama Israe bangecfu dzigenema kenggec.

²² Kemma Yosefengo yoacsiduc yomoc meficgeec, “Akeraongo mama Herodeac tatac mema Yudaia prowins, imocac ngictau anec.” Yosefengo imoc meficgema ihai kecbeso kengec kpeec. Nga ye gauu goroyoac negenecac Gariraia prowinsiu kenec. ²³ Kemma taong mong kpara Nadzarete, ihai emma kecgec. Profete yeneng yoac yofi degec, “Ye nadzaretengic, ifi degecde.” imoc fora anudeac ifi fingerec.

“Bangec kisiu kpakpac mong yofi fingeclde, ‘Ngeni KEBUAC sing wisima singa heitumeigec.’”
(Yesaia 40:3)

⁴ Nga ye wamba kamere dzoeango memea, imoc heima fadenga mong yangseberango memea, imocngko kebangau dzegeec. Amma ye ipua nga kateac kukundzau nekefec.*

⁵ Anu Yerusareng ngicngac nga Yudaia prowinsiunac amma Yodang doku wegenacf bangec tackenec, imohacnac yeni amanene yearu kenggesc. ⁶ Kemma kopocsicngina deficgemagec Yodannu doku nadzicyemmeec. ⁷ Farisaio nga sadukaio homacngo doku nadzicgecdeac hagec Yohanengo yenemma yofi edeyunuec, “Boidzocac gboricfora, ngeni Anutuarunac turunga haudeac ande, imohacnac woragecdeac merang goroyoac edengunuec? ⁸ Imocac ngeni doku nadzicma ubamerenggac siricfu fora meficgebisia.

⁹ Nga ge geanggaac yofi mi negengemebesena, ‘Abrahang ye bangeclna.’† Anutungo hoc yomoc naric deu Abrahanggac bangeclfora fingeclcedenoc, imoc edengunudiae.

¹⁰ Naka ic haniau bic faigec fede. Nga ic goa fora gombunga mi angandae, imoc sasawa heiu kpeu gerecfu ukugecde. ¹¹ Ni uba dzigec dzigeneac doku nadzicngemmabade. Nga ngic ngadenau hama kecde, yeng ine Tiri Asu nga gerec nadzicngemmabade. Nga yeac kucnco neac kuc ferahade. Ni ifiango yeac hanitabe hesimiba naric mi ngereeude. ¹² Ye meic meicke saraha mariau mehama wit seuhagoc meic meicke sobennu feu imoc fima seuha meickeude. Meickema fora mekpedzuc amma amea fima seuha wanggema gerec pisic pisickea kpac, imohai ukuu dzeude.”

¹³ Naso imohai Yesungo Gariraia bangeclfunac Yodang dokuu kemma Yohanengo mitidoku nadzicmiudeac edeec. ¹⁴ Edeu Yohanengo imoc negenu naric mi anu deec, “Geng ni naric nadzicnennade, imoc ngereeude, ammanu geng nearu hama nadzicgembadeac denec.” ¹⁵ Ifi deu Yesungo yofi deec, “Ge yoac imoc wana, faka dindingac sasawa fora fingerudeac yaguc edeguduae, ifi anna ngereeude.” Ifi deu naric dema yoara tofohoec. ¹⁶ Nga Yesungo doku nadzicma dokuunac eremanu kurumeng anggeec. Anggeu Anutuac Asungo kebesacac siric amma hau hemmanu yearu maec. ¹⁷ Mamanu kurumennunac ubaudumeng mongno yofi deec, “Yomoc songomedacna, ye hensongo ammiduae.”

4

¹ Naso imohai Asungo Yesu wangeclma mangana minginango ye tobanggeudeac bangec kisiu hesicke kenec. ² Kenu Yesungo imohai hadzingtoforec 40 yakasege kecma hereaac homeec. ³ Ifi anu faitobang ngicngko yearu hama deec, “Ge Anutuac Medac fora kecnecfu hoc yomoc dena meremma ic sogong anu.” ⁴ Ifi deu Yesungo yoac yofi meremmic, “Yoac yofi oho ohoya fede, ‘Ngicngko ic sogonggacsac mi kefude, kpac. Ye Anutuac enacfunac yoac ereandesoc, imoc sasawa mema kecbeso.’”
(Dedeseri 8:3)

⁵ Ifi deu mangana minginango Yesu hesickema taong kpetiacfu kemma Anutuac womong witiau wi yombong, ihai faiu nanu edeec, ⁶ “Ge Anutuac Medac fora kecnecfu geanggaoc yomohacnac yuma kemen. Yoac yofi oho ohoya fede, ‘Ye geac amma angerofora uayoac yemmeu yeneng maringina witiau tofoguguec hoc mongno haniga mi herecgeude.’”
(Mitiyegec 91:11-12)

⁷ Ifi deu Yesungo yofi edeec, “Nga monggoc yoac yofi oho ohoya fede, ‘Ge KEBU Anutuga faitobannu mi faibesena.’”
(Dedeseri 6:16)

⁸ Ifi deu mangana minginango Yesu monggoc hesickema tiki buma kuneng monnu emma bangectoa bangec gawamangnginagoc nga kuc kibikperagingina hania hania, imoc edzahema ⁹ edeec, “Negenna, gefafoc heima ngonduncnema eweheinennadeu yomoc sasawa gembade.” ¹⁰ Ifi deu Yesungo yofi edeec, “Satang ge meickena. Yoac yofi oho ohoya fede, ‘Ge KEBU Anutuga, ye mocgu eweheimima kingang kpemibesena.’”
(Dedeseri 6:13)

* 3:4: Ngakpia nga fadenga imoc Eriaac ngakpi nga fadeng isoc. 2 Ngictau 1:8 † 3:9: Abrahanggac bangeclfora sasawango kekecseni megecde ifi negensinggec.

¹¹ Ifi deu mangana minginango wama kenu angero yeneng hama Yesu henggareng ammigec.

¹² Ngic yeni yoac yomoc degec, “Yeni Yohane witicamau faigec tacde.” Yesungo imoc negemma Gariraia bangecfu Nadzarete taonnu dzigeneec. ¹³ Dzigenema Nadzarete wama Seburong nga Naftari yereac bangec Gariraia dzohong tegiau, Kafanaung taonnu tacyac anec. ¹⁴ Profete Yesaiango imocac kpefinnu yofi deec,

¹⁵ “Yodang noboc sing doku dzohonnu kende, Seburong nga Naftariac bangec ihai bangec monnunac ngicngac Anutu mi negemmidae, yeneng Gariraia bangecfu kecdae.

¹⁶ Ngicngac kundunnu kecgec, yeni kperagi kuneng henggec nga ngicngac homecac bageu bangecfu kecgec, yeneac botucfu kperagia fingerec.” (*Yesaya 9:1-2*)

Yoac imoc fora anudeac ye Kafanaung taonnu tacyac anec. ¹⁷ Naso imohai Yesungo ngicngac yoac yofi edekpou ayemmeec, “Kurumenggac eucererengngo bic mewegenengudeac ngeni ubangina merenggec.”

¹⁸ Yesungo ifi kpouyemmemma kemma Gariraia dzohong tegiau kensikema dacmunac yohockang uficngira dzohonnu ukuma nanec yerenec. Imoc Simong, kpara mong Petoro degec nga munea Anderea. Yeri kondungyang meme ngic kefoc. ¹⁹ Yeri yeremna yofi edeyuruec, “Ngeri hama modacnuec. Ngeri kondungyang meandape, ifi isocngoc ngic meyunuecdeac kpoungemechade.” ²⁰ Ifi deu yeri imohaingoc uficngira wama ye modaroc.

²¹ Anu imohacnac kemma monggoc dacmunac yohockang, Dzebedaoac medahora, Yohane nga munea Yakobo yerenec. Yerenu yeri mangngira Dzebedaiogoc gombau uficngina memengere amma kecmagec kpacyuruec. ²² Kpacyuruu yeri naso imohaingoc mangngira nga gomba wama ye modaroc.

²³ Yesungo Gariraia ihai bangecsoc yerecgema kpekpeturang amanginau kpoukpou ua mema eucererenggac siduc gombung dekperagiyemmekefec. Amma ye ngicngac hafei nga kucmamangina hania hania sasawa mengereyunudarec. ²⁴ Ifi anu yeac siducngo kemma Siria prowins sasawa sokodarec. Sokodaru ngicngac yeneng ngicngac hafei hania haniango memanganeyunuec nga kpenzengtoa kpegec amma hadehade nga yafinggoc amma goa afonasongina hau ubasufu angandae nga ngicngac hanimaringina homemea, yeni Yesuaru meyunu kendacgec yeng mengereyunuec. ²⁵ Nga Gariraia bangecfunac nga Dekaporisi, imohacnac amma Yerusareng taonnunac nga Yudaia prowins amma Yodang nobocgennac ngicngac habutoango yombong ye modackecgec.

5

¹⁻² Yesungo habutoa yenemna tikiu emma tarec. Tacmanu medacfora yeneng yearu kenggec yeng yoac yofi dema kpouyemmem. ³ “Ngicngac Asuac songou home homegoc kecanda, yeni kenecnginagoc, nocac kurumenggac eucerereng imoc yeneacnoc. ⁴ Ngicngac ubahodunggoc kecanda, yeni kenecnginagoc, Anutungo yeninoc meefaiyunuude. ⁵ Nga ngicngac memaemema kecanda, yeni kenecnginagoc, nocac bangec yomocngo yeneac maridzoming anude. ⁶ Ngicngac yaka nga dokuac homeandae, ifi isoc dindingac kekecac homeandae, yeni kenecnginagoc, Anutungo yeni imoc gume-cyuu gebecyunuude. ⁷ Ngicngac ogofocngina yeneac ubamangang negengandae, yeni kenecnginagoc, nocac Anutungo ifingoc yeneac ubamangang negenude. ⁸ Ngicngac ubangina kongaha kecanda, yeni kenecnginagoc, yeni Anutu henggecde. ⁹ Ngicngac yare menomaneandae, yeni kenecnginagoc, nocac yeni Anutuac nambaracfora deyem-mebesonga. ¹⁰ Ngicngac faka dindingac angkecdaeac yunumeme ayemmeandae, yeni kenecnginagoc, kurumenggac eucerereng imoc yeneac.

¹¹ Nga ngeni neac arennu kecdaea amma ngic yeneng desofoc nga ngunkporac angemmema ikoc amma ngeneac negemma yoac mangana hania hania angemmecede. Yeni ifi angemmecede, ngeni kenecnginagoc. ¹² Bungninga kunengngo kurumennu tomaingina fede. Ngeni imocac ubangerec negemma sogaibisia. Ngicngac yeneng warac profete yunukporac ayemmegec, yeni ifi isoc angemmecedenoc.

¹³ Ngeni bangecngicngac yeneac kondung. Kondungngo kiacma songea kpac anudeu songea monggoc naric mi meficeude. Kondung ifia, imoc uaya kpac. Imoc eng bangecfu ukuni ngic yeneng haningo tigecde. ¹⁴ Anu ngeni bangetoa bangec yomocac kperagi. Taong mong tikiu nande, imoc naric mi sufuude. ¹⁵ Nga ngic mongngo kifa kpedzereckema pake bageau naric mi faiu tarude. Imoc ine kifa tatahau faiu tacma ngicngac ama manau tacdae, yenimekperagiyunudarude. ¹⁶ Nga ngeneac kperagingo siriha imocngoc amma ngicngac mekperagiyunubeso. Mekperagiyunu yeni angam-memengina gombunga hemma Mangngina kurumennu kecde, ye dengeregecde.

¹⁷ Ngeni yofi mi negembisia, ye dedeseriyoac nga profete yeneac kpoukpouyoac kpeudeac maec. Negenggec, ni yoac kpebadeac mi mayai, kpac. Enacdedea imocngo fora fingerudeac mayai. ¹⁸ Foracngoc, bangec nga kurumeng yeri kpac anecde. Nga dedeseriyoacac dzikangabisic mongngo naric mi kpac anude. Dedeseri kibiu yoac oho ohoya feder, imoc sasawango foragoc ammanu bangec nga kurumeng wisickeude. ¹⁹ Imocac amma yofi ande, mong ye dedeseriyoac yomohacnac wiac kapiabisic mong meickeude amma ogofora ifingoc anggecdeac kpouyemmeude, yennoc kurumenggac areng yenearunac ngic mamea yombong demigecde. Nga ngic mong ye dedeseriyoac tofohoma ogofora modacgecdeac kpouyemmeude, ye kurumennu ngicngac yeneac engena demigecde. ²⁰ Ni edengunuba negenggec, ngeni fakangina dindingacngo mitiac negen negengngic nga farisaio yeneac angammeme mi feraheyombonggeudeu ngeni kurumenggac eucererennu naric mi enggecde.

²¹ Bangecfocnina nga esangabofocnina yeni yofinoc ede edeyunuya, ‘Ge ngicngac mi yunuhomebesena. *(Makekeng 20:13)*

Nga mong ye ngic kpehomeude, ye yoacac areng anude.’ ²² Neng ine yofi edengunuba, ngic mong ye ogeaac herebu angande, ye yoacf uambesena. Nga mong ye ogeaac yofi deude, ‘Ge ngic irec ireckea kpac.’ Ye yudangic yeneac tutumangtoangina faibesonga. Nga mong ye ogeaac yofi deude, ‘Ge negen negengga kpac.’ ye hofeac gerecfu ukugec kemeude. ²³⁻²⁴ Ge imocac amma ubangerecgaac wiac Anutuaru faibeso dema yofi ambesena. Aratau kemma ogoga geac ngaba mekecde, imoc negensinadeu ge sesega arata kiwau wana taru kemma ogogagoc yoac mengerena. Mengerena ruae fingeruguc hama ubangerecgaac wiac faibesena. ²⁵ Nga ngabagango yoacf faigubacac ngerahafoc sinnu kemma yegoc dedefic angemema ngaba wabesera. Ge ifi mi annadeu ngabagango desi desingic yearu faiguu yeng keracnatang yeneac mariu faiguu witicamau faigugecde. ²⁶ Ni fora yombong edeguduue, ge witicamau takecma ogogaac turung sasawa hafoangoc kpoumaguc manade.

²⁷ Anu yoac yofi bic edengunugec feder, ‘Ge kaisero mi ambesena.’ *(Makekeng 20:14)*

²⁸ Neng ine yofi edengunuba, ngic mongngo ngac mong hemma hensongo ammiude, ye hereango serofaka bic andac. ²⁹ Nga kicga foingo anggenu kopocsic meficgenadeu ge imoc tatahaunac meickema ukuna kembeso. Sebiga tosea kpac anu sebiga hafoangoc hofeu mi ukugecde, imocngo ngereeude. ³⁰ Nga marifoigango anggenu kopocsic meficgenadeu ge imoc hercgema ukuna kembeso. Sebiga tosea kpac anu sebiga hafoangoc hofeu mi ukugec kemeude, imocngo ngereeude.

³¹ Warac yofi dekecgec, ‘Ngic mongngo enema wade, ye wawakibi ohoma mibeso.’ *(Dedeseri 24:1-4)* ³² Neng ine yofi edengunuduae, enemango serofaka mi ammanu ngic mongngo ye waude, ye serongac anudeac ammiude. Nga ngicngo ifi anu enemango eweenenggac sing ferahemma kefude. Amma ngic ye ngac wawayu meude, ye eweeneng-gac sing ferahemma serofaka anude.

³³ Anu bangecfocnina nga esangabofocnina yeni ifingoc yofi bic edeyunuyunuya, ‘Ge dedzegegaac dzadzahac mi meickebesena. Nga yoacga Anutuac kicfu seria deserinec, imoc modacbesena.’ ³⁴ Neng ine yofi edengunuduae, ngeni yoacngina seriudeac wiac mong kpacma mi deseribisia. Kurumeng imoc Anutuac amatatac, imocac ngeni kurumeng kpacma yoacngina mi deseribisia. ³⁵ Nga bangec, imoc Anutuac fetec, imocac ngeni yoacngina deserigecdeac bangec mi kpacbisia. Nga ngeni Yerusareng imoc

ifingoc deserima mi kpacbisia nocac imoc Ngictautoa, yeac taong. ³⁶ Nga ge orucdzoga mocgubisic kongac kongac me dzadzu dzadzu menadeacsoc mi annecac orucga kpacma dedeseri dede, imoc ifingoc wabesena. ³⁷ Ngeni yoacngina sasawa yofisac debisia, ‘Fora imoc fora nga kpac imoc kpac. Yoacngina yomoc ferahema torokpema degecde, imoc mangana mingina yearunac hade.’

³⁸ Ngeni yoac mong yofi bic negenggec, ‘Ngic mongngo ogeaac kic memanganeudeu yeac kic ifingoc memanganebesonga. Nga mongngo ogeaac enac hetackeudeu yeac enac ifingoc hetackebesonga. Kicac turunga imoc kicngo kpoumibesonga nga enacac turunga imoc enacngo kpoumibesonga.’ *(Makekeng 21:24; Sesememe 24:20; Dedeseri 19:21)*

³⁹ Neng ine yofi edengunuduae, ngicngac mangana angemmegec ngeni turunga mong mi merengyemmebisia. Mongngo munggungga foiu kpeudeu geng munggungga kanau ifingoc sinemibesena. ⁴⁰ Nga mongngo yoacfufa faigubesonga ngakpiga mana meudeu ge ngakpiga witiau ifingoc wamibesena. ⁴¹ Nga mongngo igocguma sing kiromita mocgu yegoc kennadeac edeguudeu geng kiromita yohockang yegoc kembesena.* ⁴² Nga ngic mongngo wiac mong minadeac kpesigenu ge imoc mibesena. Nga mongngo gearunac wiac monggac turung ambesonga dema kpesigenu wiacga mi segerebesena.

⁴³ Yoac mong yofi feder, ngeni imoc warac bic negenggec, ‘Ngicngac gegoc wegener kecdae, yeni heresongogoc hoangyunubesena’ *(Sesememe 19:18)* amma ge ngabafocga ngadeyunubesena.’ ⁴⁴ Neng ine yofi edengunuduae, ngeni ngabafocngina heresongogoc hoangyunubisia amma ngicngac ngunukporac angemmeandae, yeneac numubisia. ⁴⁵ Ngeni ifi amma Mangngina kurumennu kecde, yeac nambaracfora kecgecde. Ye wenaha uayoac miu imocngko ngic gombunga mangana yeneac amma ereude. Nga ye ngic dindingac nga ngic faka dindingac mi angandae, yeni momocngoc kia yemmeude. ⁴⁶ Nga ngicngac yeneng ngeni heresongogoc hoangngunugec ngeneng yeni heresongogoc hoangyunugecdeu faka imocac buma mong mi fingerude, kpac. Takesimeme ngic yeneng imoc ifingoc angandae. ⁴⁷ Ngeni dacmunafocngina yeneac edoc bedoc ayemmegecdeu imoc faka engena kpac. Bangec monnunac ngicngac Anutu mi negemmidae, yeni ifingoc imoc angandae. ⁴⁸ Imocac amma ngeni yofi ambisia, kurumeng Mangngina ye dindingac kecde nga ngeni ifingoc ye isoc dindingac kecbisia.”

6

¹ “Ngeni ngicngac yeneng ngenemma dengerengunugecdeac yeneac kicfu faka gombunga mi angkecbisia, kpac. Ngeni ifi anggecdeu kurumeng Mangngina yearunac faka gombunggaac buma mong mi megecde. Ifi fingebacac henghomema kecbisia. ² Imocac ngicngac makpekpea ubangerecac wiac yemmenec, imohai ngicngac yeneng trumpet udumengtoayagoc geac amma fifigecdeac mi edeyunubesena. Ngic ikoha goa yeni kpekpeturang amau me singtoau ngicngac yeneng dengereyunugecdeac ifi angandae. Ni fora edengunuduae, ngic ifia yeni bungngina hafoangoc bic megec. ³ Ge ngicngac makpekpea ubangerecac wiac mong yemmenade, imohai ine marifoigango wiac anu kanagango imoc mi negembeso. ⁴ Ge ifi amma ubangerecac wiac mong yemmenade, imocngko sufuu femanu Manggac wiac sufuu hengande, yennoc buma genude.

⁵ Anu ngeni numubesonga dema ngic ikoha yeneng angandae, ngeni ifi isoc mi ambisia. Yeni kpekpeturang amau nga singtuturunnu numuma nanggec ngic yeneng yenneema dengereyunugecdeac songo negengandae. Foracngoc, yeni bungngina hafoangoc bic megec, imoc edengunuduae. ⁶ Ge numubesonga dema, imohai ine amaga mana kapiau emma naguga heima Manggac sufuu sufuu kecde, ye numumibesena. Ifi anna Manggac faka sufuu sufuu hennegeng angande, yeng buma genude. ⁷ Nga ngeneng numubesoso dema, bangec monnunac ngicngac Anutu mi negemmidae, yeneng numuanndae, ngeneng ifi isoc mi numubisia, kpac. Yeni nunumu herea negengisinga kpac eng numuandae. Amma yoacngina homac osokecdaeac amma negenggec nunumunginango

* 5:41: Yesungo mail deec. Roma yeneac mail imoc kiromita mocgu nga noboha isoc.

foragoc anude. ⁸ Imocac ngeni yeni isoc mi ambisia. Ngeni mi numumimagec Mangngina yeng ngeni noc wicac kpedadanggeandae, imoc bic negenude.

⁹ Ifi anu ngeni yofi numubisia, ‘Kurumeng Mannina, geac kpac kpetaic febeso. ¹⁰ Nga eucererengga hanemmebeso. Kurumennu geac songo nga negen negeng modacgec fede, siriha imocngoc bangecfu nenearu fingegeben. ¹¹ Ge yaguc yaka socnina nemmena. ¹² Nga neni ngic yeneac kopocsic waandimbe, siriha ifingoc kopocsicninaac turunga wanemmena. ¹³ Ge faitobannu mi fainununa nga manganaunac mesinunubesena.’

¹⁴ Ngeni ngicngac mangana angemmegec ngeni yeneac kopocsic wagecdeu kurumeng Mangnginango ngeneac kopocsic ifingoc waude. ¹⁵ Amma ngeni ngic yeneac kopocsic mi wagecdeu ine Kurumeng Mangnginango ngeneac kopocsic ifingoc mi waude.

¹⁶ Anu ngeni yaka segekecma ikocngic yeneng angandae, ifi isoc mi ambisia. Yeni yakasege kecdae, naso imohai ngicngo yenenggecdeac kicnangengngina huringaiande. Foracngoc, ngic ifia yeni bungngina hafoangoc bic megec, imoc edengunudiae. ¹⁷ Ge yakasege kecma orucga kerec nadzicmima kicmesuga dzuacbesena. ¹⁸ Ifi anna ngic yeneng ge yakasege kecnec, imoc mi negentegecimagec Manggac mi hengena kecde, yengsac negenude. Amma Manggac angammemega sufu sufuu hengkecde, yengsac buma genude.

¹⁹ Bangecfu dzaukpadzadzangng dzofinacngina kirecgeande nga hufengng wiacngina meande amma hamangecngic yeneng ama hetackema wiacngina meandae. Imocac ngeni bangecfu dzofinacnginamekpedzuc mi ambisia. ²⁰ Ngeni dzofinacngina kuru-mennu mekpedzuc ambisia. Imohai dzaukpadzadzangng wiacngina mi kirecgeude nga wiacngina hufengng mi meude amma hamangecngic yeneng imohai naric mi hetackema wiac megecde. ²¹ Ge dzofinacga fede, imohai songoga ifingoc feude.

²² Kicga imoc sebigaac kifa nga kicgango gombunga feudeu sebiga sasawa mekperagi-darude. ²³ Nga ge kickerec me kicmangang me kicgango manganeudeu ine sebiga sasawa kundung kpeude. Nga kperagi gearu fede, imocngko kundung kpeudeu kundungtoa yombong fingegebenude.

²⁴ Ngic mongngi ngic kuneng yohockang yereac kingang naric mi kpekefude, kpac. Ye monggac songo negemma mong ngadeheude me monggaru kpeketahemong waude. Ngeni naso socfungoc Anutu nga dzofinac yereac kingang naric mi kpegecde.

²⁵ Imocac amma yofi edengunudiae, ngeni nenedokuac dema kekecnginaac defagung amma yofi mi debisia, ‘Neni noc yaka nema kecnide?’ me sebinginaac negemma, ‘Noc wamba heima kecnide?’ Negenggec, kekecngko yaka feraheude nga sebingo ine ngakpikporuc feraheude. ²⁶ Ngeni sawau neng yenenggec. Yeni heikpenec me netohong mong mi angkecgec Mangngina kurumennu kecde, yeng yaka eng yemmeude. Nga ngeni isingga negembisia, ngeneng Anutuac kicfu neng yeneac engena andae. ²⁷ Nga ngenearunac mongngi dewaidzoc amma kefu imocngko kekecnasoya kapianec monggoc naric mi mehereeude, kpac. ²⁸ Anu ngeni nocac negengyohoc amma yofi deandae, ‘Neni noc wamba mema mekechi?’ Ngeni dzaring amasobennu eng tohoandae yenembisia. Yeni witic mi yumuma uatoa mi mema sifu yadiandae. ²⁹ Nga ngictau Saromo ye warac wamba kibia gombunga gombunga heikefec, yeac kibikperagitoayango ine dzaring yeneac kibi kereng kereng mi feraheec, imoc edengunudiae. ³⁰ Nga dzaring amasobennu eng tohoande, imoc yagucacsac fingeru wereckengau herecgema gerecfu ukugecde. Nga Anutungo dzaringtehec ifia wamba heiymmeudeu ye ifingoc ngicngac ngeni negen negensingngina kapia fede, ngeni ngakpi kporucngina torokpeu torokpe ngemmeude.

³¹ Imocac amma ngeni dewaidzoc amma yofi mi debisia, ‘Neni noc nenedoku nenide me noc wamba heinide?’ ³² Bangec monnunac ngicngac Anutu mi negemmidae, yeneng imoc sasawa megecdeac negen negengngina imohai fajegc fekecde. Nga Kurumeng Mangnginango ngeni wiac sasawa kpedadanggeandae, imoc bic negenude.

³³ Imocac ngeni warac warac yombong Anutuac eucerereng nga yeac faka dindingac maficgegecdeac uatoa mebisia. Ngeni ifi anggec yeng wiac sasawa imocnoc ifingoc torokpeu torokpe ngemmeude. ³⁴ Ifi anu ngeni wereckenuac dema negengyohoc mong

mi ambisia. Wereckenu ye yengenaoc negengyohoc angemeude. Uameme tembuc tembuc ye yengenaoc ebihaac siriha mebeso, imoc soha ande.”

7

¹ “Ngic yeneng ngeneac faka isinggema desingunubauac ngeni ngic yeneac faka isinggema mi desiyunubisia. ² Imoc yofiac, ngeni ngic isingyunuma yoacngina desian-dae, siriha ifiangoc yeneng isingngunuma ngeneac yoacngina desigegecde. Nga ngeni wiac kpetea isinggema imocacsoc ngicngac wiac yemmeandae, yeni siriha ifiangoc kpetea isinggema turung kpoungemmegecde. ³ Ge ogogaac kicfu goebisic tacde, imoc hengannec amma geangga kicfu ine ic kebanga feder, imoc mi hentegecnec, faka ifia imocngo mi ngereede. ⁴ Geangga kicfu ic kebanga femanu ogogaac deannec, ‘Naric negemmana kicgau goc tacde, imoc meickeba.’ ⁵ Ikocngic, ge geangga kicfu ic kebanga feder, imoc meickemaguc ogogaac kicfu goebisic tacde, imoc naric hentegecm meickenade.

⁶ Ngeni wiac mong kpetiac dedea, imoc kasi mi yemmebisia nga kubungina imoc berec yenearu mi ukubisia. Kasi yeneng dzigenema nginibauac nga berec yeni imoc haninginango tidzamebauac.

⁷ Ngeni turunga fingegecdeac numuma kecbisia nga wiac meficegecdeac hofocma kecbisia. Amma nagu witingemmeudeac naguu heima kecbisia. ⁸ Ngic mong ye numukecde, yeng wiac meude nga hofockedengo wiac meficeude amma naguu heikecde, yeac nagu witimigecde. ⁹ Ngenearunac ngic mong medahango yakaac kpesimi yeng hoc naric mi miude. ¹⁰ Me kondungyanggac kpesimi boidzoc mangana naric mi miude. ¹¹ Ngeni ngic fakangina manganagocngo sifu nambaracfocngina ubangerecac wiac gombunga yemmegecdeac negentegecde. Imocac ngeni yofi negembisia, Kurumeng Mangnginango ngeneac faka gombunga imoc homac ferahaude. Ngeni yearu wiac monggac kpesigec yeng wiac gombunga torokpeu torokpe ngemmeude.

¹² Nga ngic yeneng noc faka angemmegecdeac negensiandae, ngeni faka siriha imocngoc ayemmebisia. Imocnoc dedeseriyoac nga profeteyoac hania.

¹³ Ngeni nagu kapiau emma kengkecbisia. Imoc yofiac, manganaac sing imocac naguya kuneng nga sing imoc singtoa amma ngicngac homacngo sing imoc modacma kengkecgec kecma kpetotieyunugecde. ¹⁴ Nga kekecac sing imocac naguya kapia nga sing imoc fofonga anu ngicngac efeaneengosac imohai kengkecma kekec fora meficegecde.

¹⁵ Profete ikoha yeneng memanganengunubauac ngeni yeneac henghomema kecbisia. Yeni sebinginango rama sebi nga ubanginango ine katekasi anu yeni godzuac arennu iwaingina wangecngunugecdeac ngenearu hagecde. ¹⁶ Nga forangina fingegecde, ngeni imoc hemma negengyemmegecde. Ngic yeni kemma witic waeyagoc, imohacnac waing fora naric mi mesigecde. Amma fareng nga gberafecfunac fig fora naric mi megecde, imoc negendae. ¹⁷ Nga ic gombunga sasawa, yenearunac fora gombunga fingerude nga ic manganaunac ine fora mangana fingerude. ¹⁸ Nga ic gombunga imohacnac fora mangana fingec fingec mi feder. Nga ic manganaunac fora gombunga naric mi fingerude. ¹⁹ Ic mong foraya gombunga mi fingerudeu imoc kperecgema gerecfu ukugecde. ²⁰ Ifi anu ngeni profete ikoha yeneac forangina hemma naric negentegecyunugecde.

²¹ ‘Ngicngac Kebuna, Kebuna.’ ifi denengandae, yenearunac sasawango kurumenggac eucererennu naric mi enggecde. Manna kurumennu kecde nga ngicngac yeac songo nga negeeng modacma kecdae, yeneng ihai enggecde. ²² Nga naso imohai ngicngac homacngo edenugecde, ‘Kebu, Kebu, neni geac kpacfu profeteyoac deing amma hadehade nga yafing kporacyunuing amma faka kuhagoc homac meing, ge imoc sifu negennec.’ ²³ Ifi degec yofi yombong edeyunubade, ‘Ni ngeni mi negengngunudiae. Dedeseriyoac kpekpengic, ngeni neac kicfunac meickegec.’

²⁴ Ngic mong ye yoacna yomoc negemma tofohoande, yeng ngic irec ireckea nga ngic amea peperandzi witiau meec, ye isoc. ²⁵ Ye ameaac hania peperandzi witiau nanecac serima taru kiafirangtoa kpeu tungbaungngo hama ama imoc naric mi kpembarackeude. ²⁶ Nga mong ye yoacna yomoc negemma mi tofohoude, yeng ine ngic negen negenga kpac nga ngic amea sangiu meec, ye isoc. ²⁷ Kia kpeu tungbaung nga firangtoa kpema ama imoc kpembarackema medidinggeu makpeude.”

²⁸ Yesungo yoac yomoc deu wisickeu ngicngac habutoa yeneng kpoukpouyaac amma kerectegec anggec. ²⁹ Nocac yeng mitiac negen negengngic yeneac dede isoc mi deec, kpac. Ye ngic uakibi mekecde, yeac siricfu kpoukpou ua kuhagoc meec.

8

¹ Yesungo tikiunac mamanu habutoa kuneng yombongngo ye modacgec. ² Modacmagec ngic mong kukuseriagocingo hamafafoc heimima deec, “Kebu, ge negenna naric anu medzuacnubang.”*

³ Ifi deu Yesungo maria sinema ngic kpreserema yofi edeec, “Ge ngereenadeac songona fede.” Deu imohaingoc sebia ngeree hafeia kpac anec. ⁴ Nga Yesungo yofi edema deraheec, “Ge sebigau faka fingecdac, imocac ngic mong mi edebesena. Ge womong gareng yearu kemma sebiga edzahena. Edzahema Mosengo seseac deec, imoc modacma imocac sirihau faina yeneng sesega imoc hemma negentegecgecde.”

⁵ Anu Yesungo Kafanaung taonnu emmanu wasaigareng mongngo hama maficgeudeac desambic amma deec,† ⁶ “Kunenna, enac tofoc tofoho medacna ye hanimaria homemea amma ye amau kpenzengtoa kpema fema kecde.” ⁷ Ifi deu Yesungo yofi edeec, “Ni naric hama mengerebade.” ⁸ Ifi deu wasai garengngo yoac yofi meremmiec, “Kunenna, ni noc gombunnaac amawarocnau erenade. Ge yoacgangosac dena enac tofoc tofoho medacna ngereeude. ⁹ Imoc yofi, ni ngic kucnginagoc yeneac bageu kecduae. Nga neac bageu wasaifocna kecdae. Yenearunac monggac kenna deba ye kenude. Ni yenearunac monggac hana deba haude. Nga wanacngicnaac ua yomoc mena deba ye imoc meude.”

¹⁰ Ifi deu Yesungo imoc negemma kerectegec amma ngicngac modacgec, yeni yofi edeyunuec, “Foracngoc, Israe bangefu ngicngac negen negensingngina seria yofia mong mi henai, imoc yeac henduae. ¹¹ Imocac yofi edengunudiae, ngic homacng wenac ere eraunac nga wenac keme kemeauac hama Abrahang nga Isaka amma Yakobo yenigoc kurumenggac eucererennu yenaha foc tacma neneyaka negecde. ¹² Nga Anutungo warac warac yengena eucererenggac areng deec, yeni ine ngadeau kundunnu ukuyunugec kemegecde. Kemema ihai kiacma enacngina kisaranggema kecgecde.”

¹³ Ifi dema wasaigareng yofi edeec, “Ge kenna, negensinggenecmoc, imoc fora fingecgenude.” Anu wenac naso imohaingoc enac tofoc tofoho medaha ngeree.

¹⁴ Anu Yesungo Petoroac amau emma Petoro sefenango sebigerec ammiu feu henec.

¹⁵ Hemma mariau mema kpesereu sefena hafeia kpac anu yacma yenenggareng ayem-meeec.

¹⁶ Marai anu imohaingoc ngicngac yeneng ngicngac hadehade nga yafinggoc homac Yesuaru meyunu hagec. Hagec, yeng yoac dema asu mangana kporacyunuma hafeing-inagoc sasawa mengereyunuec. ¹⁷ Profete Yesaiango warac yofi deec, “Yeng nenang kucmamanina meickema hafeinina atickeec.” (*Yesaia 53:4*) imoc imohai fora fingerec.

¹⁸ Ngicngac habutoango Yesu oronggegec ye ifi yenemma medacfora edeyunuec, “Nenang dzohong noboc kenni.” ¹⁹ Ifi demanu mitiac negen negengngic mongngo hama edeec, “Kpoukpou, ge ihai me ihai kennadesoc ni modacguma gegoc kembadeac negenduae.” ²⁰ Ifi deu Yesungo yofi deec, “Katekasi yeni bangec manau fefenginagoc nga sawau neng yeni faecnginagoc nga ngicac Medacnggo ine kparicganga kpac, ifi kecde.”

* ^{8:2:} Monggo kukuserigoc sebia wonongagoc dekecgec. Ngic homacng hafei ifia mi megecdeac kukuseriagoc yeni ama ngadeau kecisia. Imoc Moseac dedeseriyoacf oho ohoya feec. † ^{8:5:} Wasaigareng yomoc yeac bageau wasaingic 100 isoc kecgec. Wasaingic garengnginagoc yeni bangec monnunac.

²¹ Deu medacfora yenearunac mongngo deec, “Kebu, negennemmana kemma manna tonggomaguc modacgubade.” ²² Ifi deu Yesungo ine yofi edeec, “Ge homemea wayununa yeni yenaocngoc tonggoemegec. Nga geng ine ni modacnuna.”

²³ Yesungo gombau enu medacfora yenahafoc gombau emma kenggec. ²⁴ Kemmagec firang kucgoc kpeu siritembongng gomba feraheu kemebesonga anec nga Yesungo ine gau feec. ²⁵ Feu medac yeneng Yesuaru kemma midima degec, “Kebu ge onggonnununa, nenikemebeso andimbe.” ²⁶ Ifi degec yeng yofi edeyunuec, “Ngeni negen negensingngina kapianecsac fede, ngeni kengec mi ambisia.” Ifi dema firang nga dzohong kpetariyemeru firang kpac anu dzohong ye ning kpema eng feec. ²⁷ Feu ngic yeni kerectegec amma kpesiemegec, “Ye noc ngic? Firang nga dzohongtoa yereng yeac enara tofohodape.”

²⁸ Anu yeni dzohong noboc gadarangic, yeneac bangecfu kensikemagec ngic yohockang hadehadengiragocng kicsereunac haoc. Yeri wasai yombong, imocac ngicngac yeni imohacsing susuferecge mi angkecgec. ²⁹ Nga yeri ihai namma kpacma deoc, “Anutuac Medac, neneac wiac imoc geac mi ande. Nasonina mi hamanu ge kpendzeng monnu mi fainunubesena.”

³⁰ Anu edibigeng berechabu mong kuneng yeni surukpema kecmagec ³¹ hadehade yeneng yofi dema Yesu desambic ammigec, “Ge kporacnununade isoc, berechabu yenearu suenununa kemebisina.” ³² Ifi degec yeng yofi edeyunuec, “Ngeni meickegec.” Deu yeni meickema erema berechabu yenearu kemegec berec yeni hafoangoc fagannunac nedzima dzohonnu kemema doku nema homedacgec. ³³ Homegec berecgareng yeneng kengec worama taonnu kemma faka imocac siduc sasawa ayemmegec. Ayemmedacma ngic hadehadengiragoc yerearufaka fingerec, imocac ifingoc edeyunugec. ³⁴ Edeyunugec taong imocac ngicngac sasawango Yesu maficgegecdeac kemma hemma amabangecngina waudeac egec.

9

¹ Yesungo gombau emma dzohong ferecema yengena taonnu kensikec. ² Kensikeu yeni ngic mong hanimaria homemea dzakeu faima tofohoma hagec. Hagec Yesungo negen negensingngina hemma ngic puringa yofi edeec, “Medacna, ge ubaga ngeree, kopocsicga imoc bic wawaya.” ³ Ifi deu mitiac negen negengngic goa yenaocngoc negensigec, “Ngic yomoc ye Anutu emmide.” ⁴ Ifi negenggec Yesungo negen negengngina hemma yofi deec, “Ngeni ubanginau negen negeng mangana mi negensigec. ⁵ Yoac damocng efea ande, ‘Kopocsicga bic kpac ande.’ ifi debesonga me ‘Ge yacma kenna.’ ⁶ Ngicac Medac ye bangecfu kopocsic wawaac uayoac nga kuc femide. Nga ngeni imoc negenggecdeac amma yoac yomoc deduae.” Ifi dema ngicpuring yofi edeec, “Ge yacma dzakega mema amagau kenna.” ⁷ Ifi deu ngic ye yacma ameau kenec. ⁸ Kenu ngicngac habutoa nanggec, yeneng imoc hemma kerectegec amma kengecyuec. Anutungo uayoac kuhagoc ifia ngicngac yemmeec, yeni imoc hemma Anutu dengeregec.

⁹ Yesungo imohacnac ferecge kemma takesimemengic mong kpara Mataio, ye takesimeme amau taru hemma yofi edeec, “Ge hama modacnuna.” Ifi deu yacma modarec.

¹⁰ Anu Yesungo Mataioac amau emma yaka netacmanu takesimeme nga manganameme ngic homacng hama Yesu nga medacfora yenigoc tacma yaka yenahafoc negec. ¹¹ Nema tacgec farisaio yeneng imoc hemma Yesuac medacfora kpesiyemmegec, “Kpoukpoungina ye nocac manganameme ngic nga takesimeme yenigoc tacma yaka nede?” ¹² Ifi degec Yesungo imoc negemma yofi edeyunuec, “Ngicngac kuchafeingina kpac kecdae, yeni dotaac mi ayemmeande. Hafeinginagoc, yeneng ine dotaac ayemmeude. ¹³ Ngeni kemma yoac yofi fede, imocac negen negeng megec,

‘Ni sesegerec meandae, imocac mi anende. Ngicngac wosoefac angemeandae, imocac anende.’

(Hosea 6:6)

Imoc yofiac, ni ngic dindingac kpacyunubadeac mi mayai, kpac. Ni ine ngicngac kopocsicnginagoc kpacyunubadeac mayai.’

¹⁴ Naso imohai Yohaneac medacfora yeneng hama kpesimigec, “Neni nga farisaio naso homac yakasege angandimbe amma geac medacfocga yeni nocac yaka sege mi angandae?” ¹⁵ Ifi degec Yesungo yofi edeyunuec, “Memeturanggac ngicngogofora yenigoc kecmanu yeni ubahodung naric mi anggecde, kpac. Nga kecma naso monnu memeturanggac ngic ynearunac meickegecde, naso imohai ine yakasege anggecde. ¹⁶ Ngac mong ye ngakpi eseau kporucususuc gboria mong faima mi kpebiude, kpac. Ye gboria ifi faiudeu gboriango esea taiu dzamema titingo fingerude. ¹⁷ Nga ngic mongnggo waing gboria bokong yangseberango memea eseau mi kpeu kemeude, kpac. Ifi anudeu waing gboriango bokong esea imoc tindziru manganeu dokuya maude. Imocac waing gboriango bokong gboriau kpegec yerahafoc naric tarecde.”

¹⁸ Yesungo yoac imoc edeyunuma tacmanu gareng mongnggo yearu hamafafoc heima eweheiheigoc edeec, “Ni naroanna yaguc homedac. Geng hama mariga witiau faina gboriude.” ¹⁹ Ifi deu Yesungo yacma kenu medacfora ifingoc yenahafoc modacma kenggec. ²⁰⁻²¹ Kemmagec ngac mongnggo ngadenginau modacyunuma kenec. Ye kifa 12 sacherec kefecac amma hama negenec, “Ni Yesuac ngakpiasac kpeserebadeu ngerec ngeree maficgebade.” ifi negemma ngakpihereha susiaac witiha kpesereec. ²² Kpesereu Yesungo dzigene hemma yofi edeec, “Ngac, ge ubaga ngeree. Negen negensinggango mengeregudac.” Ifi demanu ngac ye imohaingoc ngeree.

²³ Anu Yesungo kemma garenggac amau kensikema emma kungac fifi fifi areng amma ngicngac habutoa kpeborongngina negemma yofi ²⁴ edeyunuec, “Ngeni yomohacnac meickegec. Naroang ye mi homedac, ye gau fede.” Ifi deu yeni deendema ammima dzomoremigec. ²⁵ Dzomoremima meickema mamagec, Yesungo naroang feec, ihai emma naroanggac mariau mema miaru gborima yarec. ²⁶ Yaru siduc imocnggo bangec imoc sokodarec.

²⁷ Yesungo bangec imoc wama kemmanu ngic yohockang kicngira pisic pisickeango Yesu modacma arohoma kpacsambic ammima deoc, “Dawidiac bangeha, ge nereacnec ubaga manganeu.”* ²⁸ Ye amau emmanu kicpisic yohockang yereng yearu kenec yeng yofi kpesiyemerec, “Neng faka ifia mebadeacsoc anduae, ngeri imoc negensinggedape me?” Ifi deu yereng deoc, “Oc Kebu, imoc negensinggedipe.” ²⁹ Ifi deec kicngira kpeserema yofi deec, “Negen negensingngiraac fora fingeengemeru.” ³⁰ Ifi deu kicngira tegerec. Tegeru wiac fingecyemerec, imoc ngic mong mi edeecddeac dederac ayecmeec.

³¹ Nga yereng ine kemma siduha imoc deyadiem amasoc negendacgec.

³² Anu yeri kemmaec ngicngac yeni ngic mong yoara kpac nga hadehadeagoc Yesuaru mehagec. ³³ Mehagec yeng hadehade kporacmiu ngic ye yoac deec. Deu ngicngac habutoango imoc hemma kerectegec amma degec, “Israe bangefu faka ifia warac mong mi fingeru hening.” ³⁴ Ifi degec ine farisaio yeneng degec, “Ye hadehade yeneac ngictaunginaac kucfu hadehade kporacyunuma kecde.”

³⁵ Yesungo taong nga amabisic sasawau yerecgema kpekpeturang amanginau emma edekpou ayemmemma eucererenggac siduc gombung dekperagima hafei hania hania nga ngicngac kucmamanginagoc sasawa mengereyunudarec. ³⁶ Nga habutoa yeni demadzac nga kucmama amma rama garengngina kpac, ifi isoc kecgec. Imocac amma Yesungo yenemma ubea manganeu ³⁷ medacfora yofi edeyunuec, “Semeng fora homacngoc kpauedac fede nga uangic ine efeanecsac kecdae.” ³⁸ Imocac amma ngeni Kebu, semeng mingina numumima yofi edebisia, ‘Ge ua ngic sueyununa yeneng kemma foraga mekpedzuc ambisia.’”

10

¹ Yesungo medacfora 12 kpacyunu hagec ngicngac ynearunac asu seuhagoc kporacyemmegedeac uayoac yemmemec nga hafei hania hania amma ngicngac kucmamanginagoc sasawa mengereyunugedeac uayoac kuhagoc yemmemec. ² Aposoro 12, yeneac

* ^{9:27:} 2 Samue 7:12-16 Anutungo Dawidigoc yoac dedzege yofi anec. Ngic mongnggo geac arenunac naso wisickea kpac geac tatacfu tarude. Imocac yeni Yesuac Dawidiac bangeha degec.

kpacngina yofi, Simong kpara mong Petoro nga munea Anderea amma Sebedaioac medahora Yakobo nga munea Yohane. ³ Firipo nga Batoromaio nga Toma amma takesimemengic Mataio, Yakobo Arifaioac medac nga Tadaio ⁴ Amma Simong Kananaio amma Yuda Kariotonac. Ngic yeng kecma Yesu kerereu megec.*

⁵ Yesungo medacfora 12 imocnoc sueyunuma yoac yofi dema edeyunuec, “Ngeni bangec monnunac ngicngac Anutu mi negemmidae, yeneac bangecfu nga samariangic yeneac taonnu mi kembisia, kpac. ⁶ Israehabuu ngicngac rama sufufuya, ifi isoc kecdaes, ngeni yenearu kembisia. ⁷ Ngeni kemma yofi dekperagiyemmebisia, kurumenggac eucerereng imoc bic mewegenengunude. ⁸ Ifi dekperagiyemmemma ngicngac hafeigoc mengereyunuma homemea megboriyunubisia nga kukuserigoc sebingina ngereeudeac mengereyunuma hadehade nga yafing kporacyunubisia. Ni kuc imoc ubangerecac nga buma kpac ngemmedua, imocac amma ngeni ubangerecac nga buma kpac memefic imoc yemmebisia.

⁹ Ngeni dzo gol nga siriwa nga kopango[†] memea, imoc mi meficgebisia nga wiac ifia fadeng nabehau mi faima mekecbisia. ¹⁰ Ngicngac yeneng ua mekecmagec ua imocngo yakangina meficgebeso, faka imoc ngereeude. Imocac ngeni singgac hie me ngakpi yohockang me hanitabe me yasu mong mi mekembisia. ¹¹ Amma taong me amabangec monnu kenggecde, ngeni imohai ngic mong yegoc tacgecdeac siric ande, ye meficgebisia. Meficgema yegoc tacyac anggec wisickeu faima kembisia. ¹² Ngeni ama imohai emma wenacngerec ruaeyoacgoc debisia. ¹³ Ifi degec ama imoc ruae naric meudeac siriha anudeu, ruaengo ama imohai hama feude. Nga ama imoc ye ruaea naric mi meudeac siriha anudeu ruae imocngo ngenanggaru monggoc dzigenengemmeude. ¹⁴ Nga monggo mi hoangngunuma yoacngina mi negenudeu ngeneng ama me taong imoc wama haninginaunac yube kpegec mau kembisia. ¹⁵ Foracngoc, kecma ising ising nasotoau taong imocac ngicngac yeneac ebicngo Sodong nga Gomora taong, yereac ebic feraheude, imoc edengunuduae.

¹⁶ Negendae, rama yeneng katekasi yeneac botucfu kecdae, ni siriha imocacsoc suen-gunuduae. Imocac ngeni boidzoc isoc nege negentegecnginagoc kecbisia nga kebesac neng, yeni isoc manganangina kpac kecbisia. ¹⁷ Ngeni ngic yeneac negentegecma kecbisia. Yeni yoacfufaingunugecde nga kpekpeturang amanginau dzikacngo ebiria ngunugecde. ¹⁸ Nga ngicngac yeni neac amma mengunuma kemma gawana nga ngictau yeneac kicfu faingunugecde. Ifi anggec ngeneng yeni nga bangec monnunac ngicngac Anutu mi negendae, ngic imoc momoc siduc gombung dekperagiyemmebisia. ¹⁹ Nga ngicngac yeneac kicfu faingunugec yoacfufaingunugecde, imohai ngeni noc yoac degecde me dafi degecde, imocac negengyohoc mong mi ambisia. Kebungo naso imohainoc yoac ngemmeu ngeni imoc debisia. ²⁰ Ngeni naso imohai ngenaoc yoac mi degecde, kpac. Mangnginaac Asungo yoac enacnginau faiu imoc degecde.

²¹ Imohai dara monggo munea enara yeneac mariu faiu yeneng ye homecfu faigecde nga manggac monggo faka imocngoc medahaac anude. Nga nambarac yeneng nonggo mangfocngina deengdema ayemmemma homecfu faiyunugecde. ²² Nga neac kpacac amma ngicngac sasawa yeneng ubango ukungunugecde. Nga ngic mong ye seserigoc kecmanu nasotoa haude, yeng komoc kpeude. ²³ Ngeni taong monnu kecgec ngicngac yeneng ngunukporac angemmegec ngeni taong imoc wama worama monnu kembisia. Foracngoc, ngeni Israe bangecfu taong sasawa fekende, ihai uana mi mesimagec Ngicac Medacngo haude.

²⁴ Negen negeng medac monggo kpoukpouya yeac engena mi anude nga wanacngic mong ye mingina yeac engena mi anude, kpac. ²⁵ Negen negeng medac ye kpoukpouyaac siric isoc ambeso nga wanacngic ye minginaac siric isoc ambeso, imocngo naric anude. Nga amaac enara yeac Bedzeburu demigec isoc amafora ngenearu kpac ifia mangana monggoc kpacngunugecde.

* 10:4: Simonggac kpara mong Dzerote. Ruka 6:15. † 10:9: kopa imoc aieng siriha mong karaya sacsac 1 nga 2 toea isoc.

²⁶ Wiac mong sangoyagoc fede, imoc kecma nonongkac fingegegerude nga wiac sufufya fede, imoc negendacgecde. Imocac ngeni yeneac mi kengecngunubeso. ²⁷ Ni tofocnac nasou yoac edengunuduae, ngeni imoc kperagiau debisia. Nga sangicfu kedza-cnginai dedea, ngeni ama witiau namma imoc deyadigec negendacbisia. ²⁸ Ngicngac yeni sebingina kpehomema ubaongangina naric mi kpehomegecde, ngeni yeneac mi kengecngunubeso. Anutungo sebi nga ubaonga yerahafoc hofeu memanganeude, ngeni yeac ine damungunubeso. ²⁹ Ngicngac yeni nengbisic yohockang faigec toea mocgu sac-sacngo bummeandae. Nga neng yenearunac mongngo bangecfu makpeu Mangnginango imoc bic negenude. ³⁰ Nga ngeneac orucdzonginaac kpete, imoc ifingoc osoosodara. ³¹ Ngeneng nengbisic homac feracyunudae, imocac amma ngeni mi damungunubeso. ³² Mong ye ngic yeneac kicfu neac deande, ‘Ni yeac areng.’ Neng yeac ifingoc Manna kurumennu kecde, yeac kicfu yofi debade, ‘Ye neac ngic.’ ³³ Nga mong ye ngic yeneac kicfu neac kpacna busickpeu neng Manna kurumennu kecde, yeac kicfu yeac kpac ifingoc busic kpebade.

³⁴ ‘Ye bangecfu ruae meficgeudeac maec.’ ngeni neac ifi mi negembisia, kpac. Ni ruae meficgebadeac mi mayai, ni ine yare meficgebadeac mayai.

³⁵ ‘Medac ye mamagoc tohoemeeecde nga naroang ye nonggeagoc tohoemeeecde. Nga ngac ye erangiagoc tohoemeeecde, ifi fingerudeac mayai. ³⁶ Ngicngac ngic monggac amean yombong arengfora kecdae, yenennoc ngabafora anggecde.’
(Mika 7:6)

³⁷ Ngic mong ye nonggo manghora heresongogoc hoangyuruma neac songo mamea negengande, ye neac areng anudeac siric mi anude. Nga mong ye medaha me naroanga heresongogoc hoanggema neac songo mamea negenude, yeng neac areng kefudeac siric mi anude. ³⁸ Ngic mong ye mariponga tofohoma ni mi modacnuude, yeng neac areng kefudeac siric mi anude. ³⁹ Mong ye yengena kekeha meficgema segerede, ye kekeha sufumiude. Nga mong ye neac amma kekeha wade, ye kekeha meficgeude.

⁴⁰ Ngic mongngo ngeni heitaingunuude, yeng ni heitainuude. Amma ni heitainuude, yeng Anutu suenuec, ye heitaiude. ⁴¹ Nga ngic mong ye profete mong hemma ngic imoc ye profete kecde, ifi negemma ye heitaiude, yeng profeteac bung meude. Amma mongngo ngic ye dindingac kecdeac amma ngic imoc heitaiude, ye ngicngac dindingac yeneac bung meude. ⁴² Mongngo medac kapia mong hemma neac medac andeac negemma doku nomang kpakenecfu kpemiu neudeu yeng kecma bumaac mi obohoude, imoc fora yombong.”

11

¹ Yesungo medacfora 12 dederecge ayemmedaru wisickeu amabangec imoc waec. Wama taonnginau siduc gombung edekpou ayemmeudeac kenec.

² Anu Yohanengo witicamau tacma Kristongo ua meec, siduc imoc negemma medac-fora yearu sueyunuu kemma ³ kpesimigec, “Ngic hanemmeudeac dedea, imoc ge me nenii monggac tomai kecbisina?” ⁴ Ifi degec yeng yofi deec, “Ngeni kemma wiac hennegeng andae, imocac siduc Yohane ammibisia. ⁵ Ngicngac kicpisic yeni kicfifi andae nga hanimangang yeni sing kengkecdae amma ngicngac kukuseringinagoc yeni sebingina ngereeuk kecdae. Kedzacfong yeneng yoac negemma kecdae nga homemea yeneng gborima kecdae amma ngic makpekpea yeneng siduc gombung negengkecdae. ⁶ Nga ngic mong ye neac negemma herea mi buude, ye kenehagoc.”

⁷ Anu Yohaneac medacfora yeni kemmagec Yesungo yeac haniaya dekperagima habutoa yofi edeyunuec, “Ngeni bangec kisiu noc wiac henggecdeac kenggec? Komba mong firangngo kpeu kockpac ande, ngeni imoc henggecdeac kenggec me? ⁸ Imoc kpac. Imocac noc wiac hembesonga kenggec? Ngic mong wambaya kibiagoc me? Negenggec, ngic wambangina kibia gombunga heiandae, yeni ngictau yeneac amau kecandae. ⁹ Ngeni profete mong hembesonga kenggec me? Yennoc profete goa sasawa feracyunude, ifi deduae. ¹⁰ Yeacnoc yofi oho ohoya fede,

'Negenna, ni enacdedena sueba yeng waraigemma singga mengeregenude.' (Marekai 3:1)

¹¹ Foracngoc, ngic ngacfunac fingecgec, yenearunac mongngo Yohane dokunadzic naric mi ferahaec, kpac. Nga kurumeng eucererenggac manau mamea kecde,* yang Yohaneac engena. ¹² Nga Yohane dokunadzicngo uaya hanaheecfunac erekecma yaguc ande, ngicngac yeni kurumenggac eucerereng mebesonga ua serima meandae. ¹³ Profete sasawa nga Moseac dedeseriyoac, imoc yeni kpefingyoac deerekcmagec Yohanearu hasikede. ¹⁴ Nga ngeni yoac yomoc hoanggbeso negengandaes isoc yofi deduae, Eriango haudeac degec, imoc yenoc. (Marekai 4:5) ¹⁵ Kedzahagoc yeng yoac yomoc negembeso.

¹⁶ Nga areng yofinenggac kecdae, yeni fakangina yofi. Nambarac yeni sobennu tacma ofogofocngina yeneac kpacandae, ¹⁷ 'Neni kungac fifini ngeni ine yegec mi fededau nga ubahodung yegec heini ngeni mong mi kiacdau.' ¹⁸ Yohanengo hama nenedoku mi neu yeni hemma degec, 'Ye yafingagoc.' ¹⁹ Nga Ngicac Medacnggo hama nenedoku neu hemma deandae, 'Henggec, ye nenedoku efea mi nekecde nga ye takesimeme ngic nga manganameme ngic yeneac ogongina.' Anutuac negen negentegec, imoc gombunga ande, imoc uayango dede.'

²⁰ Yesungo guruama goau faka kuhagoc homac meu ngicngac homacnggo hemma ubamereng mi anggecac ye dehou ayemmemma yofi edeyunuec, ²¹ 'Koradzing nga Besaida ngicngac, ngeni sowecnginagoc. Ngenaru kucfaka homac bic fingerec, kucfaka ifia Tiro nga Sidong taonnu fingebac dede ngicngac yeni kopocsicnginaac amma ubamanganggac wamba bic heima hama nadzicma ubamereng ambau. ²² Ni edengunuba, ising ising nasotoau Anutungo Tiro nga Sidong areng yeneac ubamangang negemma turunga efeanec yemmeude amma ngeni ine turunga ebiriangoc ngemmeude. ²³ Nga Kafanaung taong, geng kurumennu ennadeac ifi negengannec, imoc kpac yombong. Yeni homecac amau megu keme kemeac siric annec. Faka kuhagoc gearu fingerec, imocnggo Sodong taonnu fingebac dede Sodong ye naso yofinenggac febacngoc. ²⁴ Nga edengunuba negenggec, turung kpoukpou nasou Sodonggac areng yeni turunga efeanec ayemmegecde nga ge ine turunga meebirima anggenggecde.'

²⁵ Naso imohai Yesungo yofi deec, "Manggac, kurumeng nga bangec mingina, ngicngacareng negentegengecnginagoc nga fitira andae, geng yeni wiacga sasawa yomoc mesufuyemmenec. Amma nambaracbisic bisic, yeni ine wiac yomoc mekperagiyemmenec, imocac dengereguduae. ²⁶ Oc Manggac, ge imoc hemma ubaga ngereede. ²⁷ Mannango wiac sasawa nenu neng imoc mekecduae. Nga ngic mongngo Medac naric mi negemmide, Manggacngosac negemmide. Ifi isocngoc mongngo Manggac naric mi negemmide, Medacngosac ine ye negemmide. Amma Medacnggo ngicngac meisingyunuma edzacyunuande, yeneng ifingoc Manggac negemmigecde."

²⁸ Ngicngac uatoa mema kucmama kecandae nga ebic homac tofohoandae, ngeni nearu hadacgec neng kecnegeng ngemmebade. ²⁹ Ngeni hama tofona miacma tofohoma negeng nearunac megec. Ni wosonomang nga memaemema kecduae. Ifi anu ubaonganginango kecnegeng meficgeude. ³⁰ Neac tofona imoc yumea nga tofo witiau wiac dzegerandiae imoc efea."

12

¹ Naso imohai Yesungo sabata nasou wit uausing kemmanu medacfora yeni herenginaac homema wit fora goa menec anggec. ² Ifi anggec farisaio yeneng imoc hemma edegec, "Henna, medacfocga yeni sabata nasou faka mi angana, imoc andae." ³ Ifi degec Yesungo yofi edeyunuec, "Dawidi nga uamedacfora yeni herenginaac homema faka anggec, ngeni imoc osonegeng mi angandae gedang. ⁴ Ye Anutuac womonnu emma ic sogong Anutuac sese faifaia, imoc mema uamedacfora yenigoc negec. Faka imoc mi angana nga Dawidi yengena nga uamedacfora yeneng imoc anggec. Womong gareng

* 11:11: Yesungo yengenaac negemma yofi deec, "Kurumeng eucererenggac manau mamea kecde" Anutungo ye ferahegedae ifi deec.

yeneng imoc naric negecede nga ngictehec yeneng imoc mi nebisia. (1)

Samue 21:1-6 5 Womong gareng yeni ifingoc sabata nasou ua mema sabata tatac faka wama sifu kopocsic mi meficgegecede. Dedeseriyoac mitikibiu fede, ngeni imoc osoma mi negengandae. 6 Ni yoac yofi edengunuba, wiac yomocngo* Anutuac womong ferahade.

7 Nga yoac yofi oho ohoya fede,

‘Ngeni wosoefac ayemmedae, imocac anende nga sesegerecac ine mi anende.’ (*Hosea 6:6*)

Ngeni yoac imoc negentegecbau dede ngeni ngic kopocsiha kpac, ye mangana mi demibau. 8 Ngicac Medac yennoc sabataac Kebu.”

9 Anu ye wama imohacnac kemma kpekpeturang amanginau enec. 10 Enu ngic mong maria mong homemeango ihaingoc tarec. Taru ngic yeni Yesungo dafi deu negemma yoacfу faigecdeac kpesimigec, “Sabata nasou ngic mengec mengere ua naric mebesonga me kpac?” 11 Ifi degec yeng yofi edeyunuec, “Ngenearunac mongngo ramaya mong sabata nasou teng monnu kemedac isoc, ye ine bic kemma ramaya taiu ereude. 12 Nga ngic ngeneng ine wiac engena amma rama feraheyombonggedae. Imocac sabata nasou mengec mengere uaac kpaea mong mi fede.” 13 Ifi dema ngicac yofi deec, “Ge mariga sinena.” Ifi deu ye maria sineu imohaingoc sorongaima ngereeu maria noboha isoc anec.

14 Nga farisaio yeni mama kemma adzoroma tacma Yesu kpegecdeac dekirc anggec.

15 Ifi anggec Yesungo negengyemmemma imohacnac wama kenec. Kenu ngicngac homacngo modacgec yeng ngicngac hafeinginagoc sasawa mengereyunuec.

16 Mengereyunuma ngicngac yeni siduha mi deyadigecdeac goroyoac edeyunuec.

17 Profete Yesaiango kpefinnu yoac bic deec, imoc fora ambeso,

18 “Negenggec, ni ua ngicna meisnggeai nga heregoc yeac songo negemba ubaonganango yeac sogaide. Nga Asuna yeac witiu faiba yeng neac desi desifaka dindingac bangec monnunac ngicngac, yenearu dekperagiyemmeude. 19 Amma ye ngaba mi anude nga ye kucgoc mi arohoude. Ngicngac yeni amasobennu namma yeac yoac udumenga naric mi negenggecde. 20 Nga yeng komba mong bic manganedac, imoc mi tueude nga kifa mong witiha hosuhagoc, imoc mi mepisickeude. Ifi anu kecma ye desi desi faka dindingac garenggekefу faka imocngo faka mangana feraheude. 21 Nga bangec monnunac ngicngac Anutu mi negendae, yeneng negen negensingngina yeac kpacfу gbedickegecde.” (*Yesaia 41:1-2*)

22 Yeni ngic mong hadehadeagoc nga kiwa pisic pisickeamma yoara kpac, ye Yesuaru mema kenggec. Kenggec yeng ngic mengereu yoac dede nga kicfifi anec. 23 Ifi anu kpebung nandacgec, yeneng imoc hemma kerectegec amma degec, “Ngic imoc ye Dawidiac kisicfunac gedang.” 24 Ifi degec Farisaio yeneng ine imoc negemma degec, “Hadehade nga yafing kporacde, imoc hadehade nga yafing yeneac ngictau Bedzeburu, yeac kucfu mede.”

25 Ifi degec Yesungo negen negengngina negemma yofi deec, “Bangec monggac ngicngac yeni ngaba angemema tohogecdeu bangec imoc kisi fingerude. Nga taong me amaareng mong yenaocngoc ngaba angemegecdeu taong me amaareng imoc naric mi fekefude. 26 Nga Satang yengenaocngoc kporacemeudeu ye tohou habu yohockang anu yeac amabangeha seria naric mi feude. 27 Neng Bedzeburu yeac kucfu hadehade nga yafing kporacyunubai dede ngeneac medacfocngina yeni ifingoc yeac kucfu hadehade nga yafing kporacyunubai. Ifi anu ngeneac medacfocnginango yoacngina isingga desigecke. 28 Nga neng Anutuac Asugoc hadehade nga yafing kporacyunudaeu imohai Anutuac eucererengngi ngenearu bic hadac kecde.”

29 “Ngic monggo ngic kuhagoc mong yeac amau naric mi enude nga ye iwaiya sasawa naric mi wangerude, kpac. Ye ngic kuhagoc witickemaguc amea manau emma iwaiya tacde, imoc naric wangerude.”

* 12:6: Yesu ye yengenaac negemma “wiac yomocngo” deec.

³⁰ “Ifi anu yofi edengunuba negenggec, ngic mong ye mi nanggenude ye ngadenuude. Nga mongngo nigoc mekpedzuc ua mi meude, yeng neac wiac megigi anu sinsasarang kpeudeac ua meude. ³¹ Imocac edengunuba negenggec, ngic mong ye kopocsic hania hania meande amma Anutu demanganeande, yeac kopocsic wawaac sing fede. Nga mongngo Asu demanganeude, yeac kopocsic wawaac sing ine mi fede, kpac. ³² Anu ngic mong ye Ngicac Medac emmima yoac deude, yeac kopocsic wawaya fede. Nga mong ye Tiri Asu emmima yoac deude, yeac kopocsic wawaac sing mong mi fede, kpac. Imoc naso yofinenggac kecdimbe me naso ngade haude, imohai ifi fekeng kecbesande.”

³³ “Ic mong gombunga degec, imohai fora gombunga fingerude nga ic mangana degec, imohai fora mangana fingerude. Forango icac siriha edzacnunuude. ³⁴ Ngeni boid-zocac fingecsaheunac. Nga wiac ubaherenginau wakema fede, imocnoc enacnginango dekperagiude. Ngeni ngic manganango yoac gombunga degecdeacsoc mi ande. ³⁵ Ngic gombungango ye tohonga gombunga femide, imohacnac wiac gombunga meu maande. Nga ngic manganango tohonga manganaunac wiac mangana meu maande. ³⁶ Neng yofi edengunuba, ngeni yoacngina sicsauha sasawa deandae, yoac imoc ising ising nasou isingga foraya degecde. ³⁷ Yoacgaac siricfu yoacga gombunga desigecde nga yoacgaac siricfu desima mangana degenggecde.”

³⁸ Ifi deu mitiac negen negengngic nga farisaio goa yeneng degec, “Kpoukpou, ge faka kuhagoc mong edzacnununadeac anemmede.” ³⁹ Ifi degec yeng ine yofi edeyunuec, “Naso yomocac ngicngac ngeni mangana nga seroareng amma kucfaka mong henggecdeac kpesiandae. Nga ngeni ine faka kuhagoc mong mi ngemmengemea, kpac. Profete Yona, yearu kucfaka fingerec, ngeni imocsac henggecde. ⁴⁰ Yona ye hadzing nga tofocnac harebec kondungyangtoaac heremanau feec, ifi isocngoc Ngicac Medacngo bangecac heremanau hadzing nga tofocnac harebec feude, ngeni imocsac henggecde. ⁴¹ Anu Niniwe taongtoaac ngic yeni Yonaac dedekperagiyoac negemma ubamereng anggec. Imocac ngicngac yomoc ngeneng ising ising nasou Niniwe ngicngac yenigoc yacma nammagec fakangina isingga ngeneac mangana dengemmegecde. Anu negenggec, yomocngo[†] Yonaac faka ferahade. ⁴² Nga Seba bangecac ngactaungo Saromoac negen negentegec meudeac bangec tegiau sautfunac haec. Yeng ising ising nasou ngicngac yomoc ngenigoc yacma nammagec fakangina isingga ngeneac mangana dengemmeude. Anu negenggec, yomocngo[‡] Saromo ferahede. (1 Ngictau 10:1-13)

⁴³ Asu seuhagoc ye ngicfunac erema bangec dokuya kpac, ihai kemma tacnegenudeac tatac hofocma yerecgema kecande. Kecma tatac mong mi meficgema ⁴⁴ yengenaocngoc yofi deude, ‘Amana warac tacma wayai, imohai monggoc dzigenema kembadeac negenduae.’ Ifi dema kemma ama imoc henude. Nga imoc bic wangge wanggea nga mengec mengerea amma mingina kpac eng tacde. Taru asu seuhagocngo imoc hemma ⁴⁵ monggoc kemma arengfora 7 wangecyunuu hagecde. Arengfora imoc yeneng ye ferahemma mangana yombong andae, yeni meyunuma kemma ama imohai enarangina anu kecgecde. Ifi anu ngic ye warac mangana kefec, ye imoc ferahemma imocac mangana yombong kefude. Nga ngicngac yofinenggac mangana andae, ngenearu faka ifiangoc fingerude.”

⁴⁶ Yesungo ngicngac yoac edeyunumanu nonggo munafora yeneng hama ngadeau namma yegoc yoac denegeng anggecdeac degec enec.

⁴⁷ Enu ngic mongngo imoc negemma edeec, “Nonggo munafocga yeni gegoc yoac yoac anggecdeac ngadeau nandae.” ⁴⁸ Ifi deu Yesungo ye edeec, “Damoc yeneng neac nonggo munafocna?” ⁴⁹ Ifi dema medacfora nanggec, yenearu maria sinema yofi deec, “Ngicngac yomoc yeneng nonggo munafocna. ⁵⁰ Imoc yofiac, ngicngac Manna kurumennu kecde, yeac songo nga negen negeng modacma uaya meandae, yenennoc neac nonggoaing nga dacmunafocna.”

[†] 12:41: Yesu ye yengenaac negemma “Yomocngo Yonaac faka ferahade.” deec. [‡] 12:42: Yesu ye yengenaac negemma “Yomocngo Saromo ferahade.” deec.

13

¹ Uameme imohaingoc Yesungo amaunac mama dzohong tegiau kemma tarec.
² Tacmanu habutoa kunengngo yombong yearu kenggec ye gombau emma tacmanu ngicngac habutoango dzohong tegiau nanggec. ³ Nanggec yeng yoac heima yoac homac edeyunuma yofi deec,

"Gbome kpegi kpegingic mongngo gbome kpegiudeac uau kenec. ⁴ Kemma gbome kpegiu gbome goango mama sinnu heiu neng yeneng hama nedacgec. ⁵ Nga goango harongannu heiu ihai bangec efeanec feecac imoc bic nemonggema ereec. ⁶ Amma gbome godea homac mi faiecac wenacngo erema kpeu ururuema homeec. ⁷ Nga goango haseng manau heima nemonggeu hasengngo yadima gbome heihomeec. ⁸ Nga gbome goango bangec gombungau heima fora fingerec. Imohanac goau 100 fingerec nga goau 60 amma goau 30 fingerec. ⁹ Kedzahagoc yeng yoac yomoc negembeso."

¹⁰ Anu medac yeneng yearu kemma kpesimigec, "Ge dafiac yoac heima edeyunuuan-nec?" ¹¹ Ifi kpesimigec Yesungo yofi merengyem mee, "Kurumeng eucererenggac negen negeng sufu sufuya, imoc ngeneng negenggecdeac ngemmengemmea. Nga imoc ine yeni mi yemmeyemmea. ¹² Ngic mong wiac goa femide, ye wiac homac monggoc migec mekefude. Nga mong ye wiac mong mi mekecde, yearunac wiacbisis mekecde, imoc ifingoc wangecgecde. ¹³ Ngicngac yeni kic fima mi hendae nga kedzac kpema sifu wiac mong mi negentegecgecde. Imoc ac amma yoac heima edeyunuanduae. ¹⁴ Nga profete Yesaiango yoac deec, imoc yenearu fora fingecde,

'Ngicngac kedzacngo negen negeng, yeni imoc negemma naric mi negentegecgecde.
Amma kicngo heheng yeni imoc hemma naric mi hentegecgecde.
¹⁵ Ngicngacareng yomoc yeni herengina tondzera nga kedzacnginango yoac
negenggecdeac ebiridae amma kicnginango wiac henggecdeac mepisickegec.
Yeni kicnginango wiac mong hembauac nga kedzacnginango negembauac amma
negen negengnginango wiac mong negentegecbauac, imoc yeni ubangina dafiu
dzigeneu mengereyunubade.' (Yesaia 6:9-10)

¹⁶ Nga ngicngac kicpisic nga kedzacfong kpac, ngeneac kickedzacngina kenehagoc.
¹⁷ Foracngoc, profete nga ngic fakangina dindingac homacngo warac kecgec, yeni wiac ngeni hengandae, imoc hembeso songo negemma sifu mi henggec. Nga ngeni wiac kedzacnginango negengandae, yeni imoc kedzacngo negembeso ayemmeu ifingoc mi negenggec.”

¹⁸ “Imocac ngic gbome kpegiac, imocac yoac heiheiac hania deba ngeni negenggac.
¹⁹ Ngic mongngo eucererenggac yoac kedzahango negemma mi negentegeru mangana minginango hama gbome hereau homec homera, imoc bic meickeude. Imoc wit gbomea sinnu heiec, siriha imocacsoc ande. ²⁰ Nga gbomea harongannu heiec, imoc ngic mongngo eucererenggac yoac negemma songogoc bic hoanggeude, ye isoc. ²¹ Hoanggeu imocngo ubeau godo mi mema naso wegenanecsac feude. Nga Anutuac yoacac amma kpendzeng me yunukporacfaka yearu fingeru ye makpeude. ²² Nga gbomea hasennu heiec, imoc ngic mong ye eucererenggac yoac negemma kefude, ye isoc. Ye yoac negenu kekecac negengyohoc nga dzofinacac faitobangfaka imocngo yadima yoac imoc heihomeu fora mong mi fingerude. ²³ Nga gbomea bangec kerehagocfu heiec, imoc ngic mong ye eucererenggac yoac negemma negentegerude, ye isoc. Ngic ifia yearunac goango fora 100 nga goango 60 amma goango 30, ifi fingerude.”

²⁴ Yesungo yoac mong heima yofi edeyunuec, "Kurumenggac eucerereng imoc ngic mongngo uayau kemma witgbomea gombunga kpegiec, siriha imocacsoc ande. ²⁵ Ngic ye kpegima kenu amaareng yeni tofocnac gau fedacmagec ngabango ine hama kpindzing mangana ifingoc wit botuhau kpegima kenec. ²⁶ Nga wit imoc nemonggema erema fora fingecmanu kpindzing manganango ifingoc nesarima ereec. ²⁷ Ifi anu wanacngic yeneng hama mingingngina edegec, 'Kunennina, ge uau gbome gombunga kpeginiec anu kpindzing mangana imoc ine damohacnac erede?' ²⁸ Ifi degec yofi edeyunuec, 'Ngabangic mongngo imoc andac.' Ifi deu degec, 'Neni kemma kpindzing mangana

imoc taima ukunide, ge ifi negennec, me?” ²⁹ Ifi degec yeng yofi edeyunuec, ‘Kpac, ngeni kpindzing taidimbe dema wit ifingoc taibauac amma wagec.’ ³⁰ Wit nga kpindzing yerahafocngoc yadimaec kpememe naso hau kpememengic yofi edeyunubade, ‘Ngeni hanahema kpindzing taima dedeckema gerecfu ukugec dzebeso. Nga wit ine mekpedzuc amma semengamanau faigec tacbeso.’ ”

³¹ Yesungo yoac mong heima yofi edeyunuec, “Kurumenggac eucerereng imoc mastet gbomea isoc, ngic mongngo imocmekemma uayau homerec. ³² Mastet gbomea, imoc gbome sasawa yeneac kapiangina. Amma ye yadima semeng uaac mondzang feracyunuma ic wegena anu sawau neng yeneng hama fawau faec heiandae.”

³³ Anu Yesungo yoac mong heima yofi edeyunuec, “Kurumenggac eucerereng imoc yis isoc. Ngac mongngo farawa 20 kg mema uuha yisgoc yerecgema meu hafoangoc yisagoc anude.” ³⁴ Yesungo yoac deec, imoc yoacfusasawa heima ngicngac habutoa edeyunukefec, ye eng mong mi edeyunuec. ³⁵ Profete mongngo yoac yofi deec, “Ni yoac heima deba, imoc enacnaunac maudeac ande nga wiac warac kundunnu sufufuya feec nga wiac ngade fingecbesande, imocac yoac debade.” (*Mitiyegec 78:2*) Yoac imoc fora fingerudeac Yesungo yoac heimasac yoac edeyunukefec.

³⁶ Anu ye habutoa faiyunuma amau enu medacfora yeneng yearu emma degec, “Ge yoac heima kpindzing mangana uau erede dedang, imocac hania dekperaginemmena negenni.” ³⁷ Ifi degec yeng yofi merengyemmeec, “Ngicac Medacngo gbome gombunga kpegima kecde. ³⁸ Semeng uaya imoc bangectoa bangec amma gbomea gombunga imoc eucererenggac nambaracfora. Nga kpindzing mangana imocngomangana minginaac nambaracfora. ³⁹ Nga ngabangicngogbome uau kpegiac, imoc mangana mingina. Nga fora kpememe naso, imoc naso wisickea, imocac nasotoa. Uangic imoc angero. ⁴⁰ Yeneng kpindzing mangana taima gerecfu ukugec dzeude, nasotoau ifi isoc fingerude. ⁴¹ Imohai Ngicac Medacngo angerofora sueyunuu yeneng yeac amabangehaunac wiac kopocsic maficgeande amma ngicngakopocsic mekecdae, imoc sasawa kpezucyunudacma ⁴² gerecyadaukuyunuu kemegecde. Ihai ngicngakiacma enacngina kisaranggema kecgecde. ⁴³ Nga ngicngakpetiac yeni Mangnginaac eucererennu wenackiwa isoc kperagima kecgecde. Kedzahagoc yeng yoac yomoc negembeso.”

⁴⁴ Yesungo monggoc yofi deec, “Kurumenggac eucerereng imoc ngic yeneng dzofinac ua monnu sufugec, ifi isoc. Ngic mongngo ihai kemema imoc maficgema monggoc mesufuec. Mesufuma ubangerec kuneng negemma kemema wiara sasawa suema dzo mema kemema ua imoc bummeec. ⁴⁵ Anu monggoc yofi, kurumenggac eucerereng imoc kubugombunga buma kuneng kubu faifaingic mongngo hofocma kefec, ifi isoc. ⁴⁶ Hofok kecma kubu mong buma kuneng yombong maficgeec. Maficgema kemema iwaiya sasawa sueu dzo kirecgeec. Kirecgeu hama imocngokubu imoc bummeec.

⁴⁷ Ni monggoc deba negenggec, kurumenggac eucerereng imoc ufc mong isoc. Ngic yeni ufc dzohonnu ukugec kemema kondung yang hania hania meande. ⁴⁸ Ukugec dzohonggac yangngoufcu wakeu tegiau kpedzigec ereec. Ereu ngic yeni kondungyang nenea isinggaotoufaigec nga mi nenea, imoc ukugec. ⁴⁹ Naso wisickea imohai faka ifi isoc fingerude. Angero yeneng kemema ngicngac manganameme areng kecdae, yeni ngicngac dindingac yeneac botufunac meicyunuma ⁵⁰ gerectoau ukuyunugec kemegecde. Kemema yeni ihai kiacma enacngina kisaranggema kecgecde.” ⁵¹ Yesungo ifi dema kpesiyemmeec, “Ngeni yoac imoc sasawa negentegecdae me?” Ifi deu degec, “Oc.” ⁵² Ifi degec yofi edeyunuec, “Imocac mitiac negen negengngic kurumeng eucererenggac negen negeng mema kecanda, yeninoc ama monggac mingina, ye isoc andae. Yeng tohongaunac wiac esea nga gboria memaude.”

⁵³ Yesungo yoac heima imoc dedacma amabangec imoc wama ⁵⁴ yengena amabangehau kenec. Kemema kpekpeturang amanginau emma edekpou ayemmeu ngicngac yeneng imoc negemma kpidohoma degec, “Ngic yomoc ye negen negentegec nga kucfaka imoc dahacnac mema mekecde? ⁵⁵ Ye amamemengic yeac medacnoc. Nga nonggea kpara Maria amma ye Yakobo nga Yosec nga Simong amma Yuda yeneac

dacngina. ⁵⁶ Nga naingfora sasawa yeni nenanggoc kecdae. Yeng negen negeng imoc dahacnac meec?" ⁵⁷ Yeni ifi dema Yesuac yoac nga uayaac dehesi amma wagec. Ifi anggec Yesungo edeyunuec, "Profete yeni yenang amanginaiu nga amabangecnginaiu, imohaisac kpacngina kpac kecdae." ⁵⁸ Anu ngicngac yeni mi negensinggegecac amma yeng imohai kucfaka efeanecsac meec.

14

¹ Naso imohai Yesuac siducngo gawanatoa Herode yeac kedzacf uamecadfora edeyunuec, "Imoc Yohane dokunadzic. Ye homecfunac gborima yarecac amma faka kuhagoc meudeac kuc femide."

³⁻⁴ Imoc yofiac, Herodengo warac munea Firipoac enema Herodia hamangec meec. Meu Yohanengo yofi edeec, "Ge ngac imoc mema yegoc kecnade, imoc singngo mi dede." Ifi deecac Herodengo Yohane mema hanimaria kpema witicamau faima ⁵ kpehomebeso negensiec. Nga ngicngac yeneng ye profete, ifi negenggecac amma kengec anec.

⁶ Anu Herodeac fingec fingecnaso hau yeni adzoroma tacmagec Herodiaac naroangngo yeneac botucfu yegec fedeu Herodengo hensongo ammima ⁷ naroangngo wiac monggac ammiu imoc naric miudeac nemuya monggac kpacfu deseriec. ⁸ Deseriu naroang ye nonggeango negeng miu Herode edeec, "Ge Yohane dokunadzicac oruha terau faima mehama nenna." ⁹ Ifi deu negemma ngictau ye ubaebic meec. Amma ye ine dedeseriyoac ngicngac tacgec yeneac kicfu deec, imoc negensima naroangngo deec, imoc migecdeac deserima ¹⁰ wasaingic sueu Yohane witicamau tarec, ye ubea herecgebesonga kenec. ¹¹ Kemma Yohaneac ubea kperecgema hatea terau faima mehama naroang miu nonggeaaru mekenec. ¹² Anu Yohane medacfora yeni kemma farenga mehama tonggoma kemma Yesu siduc imoc ammigec.

¹³ Ammagec Yesungo siduc imoc negemma amabangec imoc wama gombau emma medacfora yenigoc amabangec mong ngiha kpacfu, ihai ye tembuha tarudeac kenggec. Ammanu ngicngac habutoa yeneng imoc bic negemma taongngina wama hanising ye modacma kenggec. ¹⁴ Kenggec Yesungo gombaunac mama ngicngac habutoa ifi yenemma ubea manganeu ngicngac hafeinginagoc mengereyunuec. ¹⁵ Mengereyunuma kecmanu ama marai anu medacfora yeneng yearu hama degec, "Bangec yomoc ngiha kpac anu naso bic kendacdeac ngicngac habutoa sueyununa amabangec goau kenggec. Yeni kemma yenaoc yaka bummene anggec." ¹⁶ Ifi degec yeng yofi edeyunuec, "Yeni kenggecdeacsoc mi ande, ngeni ngenaoc yaka gumecyunugec." ¹⁷ Ifi deu degec, "Neni ic sogong marimong nga kondungyang yohockang yoc mekecdimbe." ¹⁸ Ifi degec yeng yofi deec, "Ngeni yaka imoc nearu mehagec." ¹⁹ Yesungo ifi dema ngicngac habutoa kpindzinnu matacgecdeac edeyunuec. Edeyunuma ic sogong marimong nga kondungyang yohockang, imoc mema kiwa fiu kurumennu enu yaka keneheec. Kenehemia ic sogong imoc tuema medacfora yemmeu yeneng imoc mema ngicngac habutoa yemmegec negec. ²⁰ Nga yeni sasawango negebec amma yaka tosea neti anggec tarec, imoc kpedzucnegec kemema sakac 12 wakeec. ²¹ Ngicngac yaka negec, ngic yeneac kpete imoc 5 tauseng isoc. Nga ngacnambarac yeneac kpetengina imoc mong mi megec.

²² Yesungo medacfora sueyunuu yeni gombau emma dzohong nobocgeng waraigece deac kenggec. Kemmagec ye yengenaoc kecma ngicngac habutoa faiyunuu ²³ kendacgec. Kendacgec ye numuudeac tikiu enu ama toforeu tembuha tarec. ²⁴ Taru gombango dzohong dzongiau kensikemanu firanggo kenggecfusing hama siri kpema gombamekemeha anec. ²⁵ Ifi anu ama wereckembesonga ammanu Yesungo dzohong witiau titi medacfora yenearu kenec. ²⁶ Ye dzohong witiau titikenu medacfora yeneng hemma yofi degec, "Wosongango hade." Ifi dema kengec amma arohogec. ²⁷ Arohogec Yesungo negemma imohaingoc yofi edeyunuec, "Ngeni wosongina makiu, imoc ni, ngeni mi kengecngunu."*

* ^{14:27:} Grik yoacf uye "Ego eimi." deec. Imoc titiha yohockang, "Imoc ni." me "Ni kecduaengoc." Imoc Anutuac kpara mong Anutuac angerongo Mose edeec.

²⁸ Ifi deu Petorongo meremma deec, “Kebu, ge geanggaoc hanec isoc, ni doku witiau tima tima gearu habadeac edenuna.” ²⁹ Ifi deu Yesungo deec, “Ge hana.” Ifi deu Petoro ye gombaunac mama doku witiau tima Yesuaru kenec. ³⁰ Kemmanu firangtoa kpeu hemma kengec amma ine dokuu kemema kpacma deec, “Kebu, ge meficnuna.” ³¹ Ifi deu Yesungo maria bic sinema Petoroac mari mema miacma yofi edeec, “Ngic negen negensingga kapia, ge nocac negengyohoc andang?” ³² Ifi deu gombau emmaec imohaingoc firang kpac anec. ³³ Anu gombau tacgec, yeneng Yesu dengerema yofi degec, “Foracngoc, ge Anutuac Medac.”

³⁴ Anu yeni dzohong ferecgema Genesarente bangecfu kensikegec. ³⁵ Kensi magec bangec imocac ngic yeneng Yesu bic hensima yoac imoc faigec bangec imohai yerecgeu yeni ngicngac hafeinginagoc yearu meyunudacma hagec. ³⁶ Hama hafeinginagoc yeni ngakpia susiaac witihasac kpeseregecdeac derecgegesc. Amma kpeseregec, yeni sasawango ngereedacgec.

15

¹ Mitiac negen negengngic nga farisaio yeneng Yerusarennac Yesuaru hama degec, ² “Medacfocga yeni nocac bangecfocnina nga esangabofocnina yeneac singyoac kpema maringina mi dzuacma yaka menec angandae?” ³ Ifi degec yeng yofi deec, “Ngeni nocac Anutuac dedeseriyoac kpema ngenang singyoac waraima modacandae.” ⁴ Anutungo yofi dede,

“Ge nonggo manghocga seseheyurubesena.” Nga “Ngic mong nonggea me mamaac sowecyoac deude, ye homebeso.” (*Makekeng 20:12; 21:17; Sesememe 20:9; Dedeseri 5:16*)

⁵ Ngeni ine yofi deandae, “Mongngo nonggea me mama edema yofi deude, ‘Neng wiac goa gemma nanggegubai dede imoc bic Anutuac sese dedua.’ ⁶ Ye ifi dema nonggo manghora mi seseheyuruude. Ifi amma ngeni singyoacngina kpabanggema Anutuac yoac semegecde. ⁷ Ikochnic, ngeneacnoc profete Yesaiango kpefing dema fora yombong yofi deec,

⁸ ‘Ngichabu yomoc yeni enacbibicngo sesehenuandae nga herenginango ine neac hereau kecdae. ⁹ Nga yeni kpoukpou ngicngac kpouyemmeandae imoc ngicac singyoacsac edekpou ayemmeandae amma eng dengerenugec hemba fora kpac angkecde.’” (*Yesaia 29:13*)

¹⁰ Anu Yesungo ngicngac kpacyunu hagec yoac yofi dema edeyunuec, “Ngeni kedzac kpema negentegecbisia. ¹¹ Enacfusing wiac kemedi, imocngo ngic ubahere mi heidzadzu kpeude. Nga wiac hereninaunac nga enacfu ereande, imocngo ine ngic ubahere heidzadzu kpeude.” ¹² Anu medacfora yeneng yearu hama egegec, “Farisaio yeneng yoac imoc negemma negemmang meficgegesc, ge imoc negennec me?” ¹³ Ifi kpesimigec yeng yofi deec, “Kurumeng Mannango iwai mong mi homerec, imoc godeagoc kpedzigece. ¹⁴ Ngeni imocac wayunugec. Yeni yenaoc kicpisic amma kicpisic yeneac enara kecdae. Amma kicpisic mongngo kicpisic ogea wangerudeu, yeri yerahafoc tennu kemeyuruude.”

¹⁵ Deu Petorongo kpesimie, “Yoac heidang, imocac hania dena negenni.” ¹⁶ Ifi deu yeng yofi edeyunuec, “Ngeni negen negentegecngina kpac isoc kecdaengoc. ¹⁷ Wiac enacfusing kemeande, imoc sasawango herenginai kemema isinggeu keractennu kemeude. Ngeni imoc mi negentegecdae me? ¹⁸ Nga wiac enacfusing ereande, imocngo ine ubahereunac erema ngic ubahere heidzadzu kpeude. ¹⁹ Ubahereunac wiac yofia ereande, negen negeng magana nga ewekpekpe amma kaisero faka nga eweeneng mewa amma hamangec faka nga ikoc yoacfufaifaiyunu amma desureyoac. ²⁰ Faka imocngo ngic ubahere heidzadzu kpeude. Nga ngeni maringina mi dzuacma yaka eng negecde, faka imocngo ine ngic ubahere naric mi heidzadzu kpeude.”

²¹ Yesungo Genesarete bangec wama Tiro nga Sidong bangec, imohai kenec. ²² Kemmanu imohacnac Kanaang yeneac arenunac ngac mongngo hama Yesu kpacsambic ammima deec, “Kebu, Dawidiac bangeha, ge neac ubaga manganeu, hadehadengo naroanna memanganeande.” ²³ Deu Yesungo yoac turunga mong mi merenu medacfora yeneng hama igockema degec, “Ngac ye ngadeninau homac kpacleac suena kenu.” ²⁴ Ifi degec, yeng yoac yofi merenec, “Ni Israe amaarenggac rama sufufya kecdae, yeneac amma mayai.” ²⁵ Anu ngacngo ine hama Yesuacfafoc heimima deec, “Kebu, ge meficnuna.” ²⁶ Ifi deu yofi edeec, “Nambarac yeneac yaka wangcyunuma kasi yenearu ukuyemmeyemme, imoc faka gombunga mi ande.” ²⁷ Ifi deu ngac ye serima deec, “Kunenna, imoc naric denec. Nga kasi yeni ine minginfocnginango yaka kisisickegec tebo bageau mau imocsac neandae.” ²⁸ Ifi deu Yesungo meremmma ngac yofi edeec, “Ngac, negen negensingga imoc engena yombong. Negen negenggau negendang, ifi fingecgende.” Ifi demanu naso imohaingoc naroanga ngereec.

²⁹ Anu Yesungo amabangec, imoc wama Gariraia dzohong tegiau kemma tikiu emma ihai tarec. ³⁰ Tacmanu ngicngac habutoa kuneng yombong hama ngicngac hanimangang nga puring amma kicpisic nga yoacngina kpac amma ngicngac homac ifia meyunuma hagec. Hama Yesuac hoanuu faiyunugec yeng mengereyunei. ³¹ Mengereyuni ngicngac yoacngina kpac, yeni yoac degec nga puring yeni ngereegec amma hanimangang yeni sing tigec nga kicpisic yeni kic figec. Ifi anggec ngicngac yeneng imoc hemma kerectegec amma Israeac Anutu dengeregec.

³² Anu Yesungo medacfora kpacyunu hagec yofi edeyunuec, “Ngicngac habutoa yomoc yeni yakangina kpac uameme harebec bic nigoc kecdauac yeneac ubana man-ganede. Yeni sinnu kemma kicgigi ayemmebacac herenginaac homemagec naric mi sueyunubade.” ³³ Ifi deu medacfora yeneng meremmiigec, “Nenang yei bangec kisiu kecma yaka dahacnac meni ngicngac habutoa kuneng yomocac kpetenginasoc anude?” ³⁴ Ifi degec Yesungo yofi kpesiyemmeec, “Ngeni ic sogong dafiguc mekecdae?” Kpesiyemmeu degec, “Ic sogong seweng nga kondungyangbisic bisic goa.” ³⁵ Degec Yesungo ngicngac habutoa bangecfu matagcdeac edeyunuec. ³⁶ Edeyuni tacgec, yeng ic sogong nga kondungyang mema ubangerec dema tuema medacfora yemmeu yeneng mederema ngicngac habutoa yemmegec negec. ³⁷ Yeni sokoma nema negebek andacgec yaka tosea neti anggec tarec, imoc kpedzucnegec kemema sakac 7 wakeec. ³⁸ Nga yaka negec, ngic imoc yeneac kpetengina 4 tauseng nga ngac nambarac yeneac kpete imoc mi memea. ³⁹ Yesungo ngicngac habutoa sueyunu kengha anggec ye gombau emma Magadang bangecfu kenec.

16

¹ Farisaio nga sadukaio yeni Yesuaru kemma yeac kuha isinggegecdeac negenggec. Ifi negemma ye faka furia mong kurumennunac meu fingeru edzacyunuudeac kpesimigec. ² Kpesimigec Yesungo meremmma yofi edeyunuec, “Ama marai anu ngeni deandae, ‘Amabangec sacsac andeac wereckenu naso gombunga anude.’ ³ Nga asoac yacma deandae, ‘Amabangec sacsac amma kundung kpedeac kiafirang kpeude.’ Ngeni sawau faka fingecande, imoc gombunganoc isinggeandae nga nasoac soi fingecande ngeni imoc ifingoc isinggegec ngereebe. ⁴ Ngicngac areng yomoc ngeni manganameme nga seroareng amma ngeni kucfaka mong henggecdeac kpesiandae. Imocac ngeni faka kuhagoc mong mi ngemmengemmea. Yonaaru kucfaka fingerec, ngeni faka imocfiasac henggecede.” Ifi dema wayunuma kenec.

⁵ Yesuac medacfora yeni yegoc dzohong noboc kenggec. Kembeso ic sogong nige-cyunuu engsac kenggec. ⁶ Kensikema Yesungo yofi edeyunuec, “Ngeni farisaio nga sadukaio yeneac yis henghomema kecbisia.” ⁷ Deu medac yeni yenaocngoc denegeng amma degec, “Nenang ic sogong mi mema hading, imocacnoc ifi dede.” ⁸ Ifi degec yeng bic negengyemmem deec, “Ngeni ngic negen negensingngina kapianec, ngeni ngenaoocngoc ic sogong mi mehadauac denegeng andae, yoac imoc wagec. ⁹ Ngeni

negen negentegecngina kpac. Ic sogong 5ngo ngic 5 tauseng sokoyunudaru sakac dafiguc mewakegec, imoc mi nigecngunubeso. ¹⁰ Amma ic sogong 7ngo ngic 4 tauseng sokoyunudaru sakac imoc dafiguc mewakegec, imoc ifingoc negensibisia. ¹¹ Ni ic sogonggac mi dedua. Ngeni farisaio nga sadukaio yeneac yis, imocac henghomema kecgecdeac dedua nga ngeni imoc mi negentegecda.” ¹² Ifi edeyunuma yeni ic sogonggac yis garengeme kecgecdeac mi deec, imoc negentegecgec. Yeni farisaio nga sadukaio yeneac kpoukpouyoac, imocac garengemema kecgecdeac ine deec.

¹³ Yesungo Firipi bangecac Kaisarea taong mewegenema medacfora yofi kpesiyemmeec, “Ngicngac yeni Ngicac Medac yeac merac deandae?” ¹⁴ Ifi deu degec, “Ngic goango Yohane dokunadzic deandae nga goango Eria amma goa yeneng ine Yeremia me profete mong deandae.” ¹⁵ Ifi degec yofi deec, “Nga ngeni ngenaoc ine neac merac deandae?”

¹⁶ Kpesiyemmeu Simong Petorongo deec, “Ge Messia, Anutu kekehagoc yeac Medac.”

¹⁷ Ifi deu Yesungo yofi edeec, “Simong, Yonaac medac, yoac imoc ngic dedeunac mi dedang, imocac ge kenecgagoc. Manna kurumennu kecde, yennoc imocmekperagima edeguu dedang. ¹⁸ Neng ifingoc edeguba negenna, ge Petoro,* anu hoc yomocac witiau† kpebungtoana faibade. Nga imocng serima nanu homec amaac nagungo naric mi hepatanggeude.

¹⁹ Ni kurumeng eucererenggac ki gemba geng bangecfu iwi sasawa dzegenade, imoc kurumennu ifingoc dzege dzegea fingerude. Nga ge wiac bangecfu yungecdacnade, imocng kurumennu ifingoc yungec yungec fingerude.” ²⁰ Ifi dema medacfora yeneng Yesu ye Messia, imoc ngic mong mi edeyunugecdeac deracyunuec.

²¹ Naso imohai hanahema Yesungo medacfora yofi edeyunuec, “Ni Yerusarenヌ komba yudangic enarafocngina nga womong gareng enara amma mitiac ngen negengngic yeneng kpendzengtoau fainuma nuhomegecde. Anu uameme harebec ammanu monggoc gborima yacbesare.” Faka imoc fingerudeac deec. ²² Ifi edeyunu Petorongo Yesu ngadeau wangec kemma tembucfu namma dekpetari ammima deec, “Anutungo meficgumanu faka imocng gearu naric mi fingecgembeso.” ²³ Ifi deu Yesungo dzigenema Petoro yofi edeec, “Satang, ngadenau hakenna, ni memanunadeac negennec. Ge wiac negennec, imoc Anutuarunac kpac, imocng ine ngicac ngen negeng ande.”

²⁴ Ifi dema medacfora yofi edeyunuec, “Mong ye ni modacnubesos negendeu ye yenena ubasebiaac songo memama mariponga miacma tofohoma modacnubesos. ²⁵ Ngic mong ye kekeha segereudeac negemma uaya mekecde, ye kekeha sufumiude. Nga mong ye neac amma kekeha waude, ye kekeha fingecmiude. ²⁶ Imocac amma ngic mong ye bangectoa bangec yomocac finac sasawa meficgema yengena kekeha ukuu sufuude, wiac imocng memefihagoc naric mi anude. Amma mong ye kekeha monggoc meudeac negenside, ye imoc bummemec osiude. ²⁷ Nga Ngicac Medacng Mamaarunac kuc nga kibikperagiagoc angerofora yenigoc hama ngicngac sasawa angammemengina angandae, imocac sirihau turunga kpouyemmeude.

²⁸ Foracngoc, ngic yomoc nandae, ngeneearunac goa mi homemagec Ngicac Medacng eucererengagoc hau kicnginango henggecde.”

17

¹ Uameme 6 wisickemanu Yesungo Petoro nga Yakobo amma munea Yohane hesicyunu tikitoa herea monnu emma tembucngina kecgec. ² Ihai kecmagec Yesuac sebia kicnginau heimerenec. Heimerenu kicmesuya imoc wenac isoc anec nga ngakpikporuha imoc kongac kpema ama meaiu kperagia fingecande, ifi isoc anec. ³ Ifi ammanu Mose nga Eria yereng imohaingoc fingecyemmemma yegoc denegeng anoc. ⁴ Nga Petorongo Yesuac deec, “Kebu, nenang yei kecni songea andeac ge negenna naric anu bedzo bedzo harebec meba. Geac mong nga Moseac mong amma Eriaac mong.” ⁵ Anu Petorongo ifi

* 16:18: Petoro imocac titiha, hocbisic. † 16:18: Yesu ye yengenaac negemma “hoc yomocac witiau kpebungtoana faiba.” ifi deec.

denammanungoc hoeng mong kperagiagocngo mama semeyunumanu hoeng manaunac yoacudumeng mong yofi kpacma deec, “Yomoc neac Songomedacna, ye hensongo ammiduae. Ngeni yeac yoac negembisia.” ⁶ Nga medac yeni imoc negemma kengec ebiria amma bangecfu makpema kicmesungina sufugec. ⁷ Ifi anggec Yesungo yenearu kemma midiyunuma yofi edeyunuec, “Ngeni yacgec, kengec mi anggec.” ⁸ ifi deu yeni kicngina fima ngic mong mi henggec, yeni Yesu yengenasac nanu henggec.

⁹ Anu tikiunac mama Yesungo deracyunuma yofi deec, “Ngeni onga hendau, imocac ngic mong mi edeyunubisia. Kecma Ngicac Medacngo homecfunac gborima yaruguc ine edeyunubisia.” ¹⁰ ifi deu medacfora yeneng kpesimigec, “Mitiac negen negengngic yeni dafiac Eriango waraima haudeac deandae?” ¹¹ ifi degec yeng yofi edeyunuec, “Eriango warai hama wiac sasawa memengere anudenoc.” ¹² Ni yofi edengunuba negenggec, “Eria ye bic hau yeni mi hensima yenang songo modacma faka hania hania ammigec. Nga yeni Ngicac Medac ifingoc kpendzennu faigec kpendzeng kpeude.” ¹³ Ifi deu medac yeni Yohane dokunadzicac deec, imoc bic irickegec.

¹⁴ Anu yeni tikiunac mama habutoa yenearu kensikemagec ngic mongno Yesuaru hamafafoc heimima deec, ¹⁵ “Kebu, ge medacnaac ubaga manganeu. Ye afonasoya hau kpendzeng ebiria kpema naso homac gerecfu nga dokuu kemeande. ¹⁶ Nga medacna geac medacfocga yenearumekemba yeneng ye mengeregecdeac obohoma wadau.” ¹⁷ Ifi deu Yesungo yofi deec, “Ngicngac areng yomoc ngeni negen negensingngina kpac yombong amma ngeni fakangina sicsauha. Ni naso herea ngenigoc monggoc tacbadeac modzona tide. Ngeni medac nearu mehagec.” ¹⁸ Deu mehagec Yesungo hadehade ngabayoac seria edeu ye medac imoc wama kenec. Kenu naso imohaingoc medac imoc ngereec.

¹⁹ Ifi anu medacfora yeneng Yesuaru hama tembuclngina tacma kpesimigec, “Neni dafiac hadehade imoc kporacbibieding?” ²⁰ Kpesimigec Yesungo yofi merengyemmeec, “Foracngoc, ngeni negen negensingngina kapianecsac fedeac obohoma wadau. Ngeni negen negensingngina mastet gbomea* isoc fengemmeu debac ngeni tiki yomoc naric edegecde, ‘Tiki, ge yomohacnac yacma edimoc kenna.’ Ifi edegec ye kenude. Nga ngeni wiac monggac naric mi obohogecde. ²¹ Hadehade ifia yakasege kecma nunumungosac kporacbesonga.”

²² Yesu nga medacfora yeni yenahafoc Gariraia bangecfu kpeditzcnema kecmagec yeng yofi edeyunuec, “Ngic yeneng Ngicac Medac kererema ngicngac yeneac mariu faigecde, imocac naso wegenede. ²³ Faigec yeneng ye mema kpegec homeude. Homema uameme harebec ammanu homecfunac monggoc gborima yarude.” ifi deu yeni ubaebic kuneng megec.

²⁴ Anu Kafanaung taonnu kensikemagec Anutuac womonggac takesimemengic yeneng Petoroaru hama kpesimigec, “Ngeneac kpoukpou ye womonggac takesi faiande me kpac?” ²⁵ ifi degec Petorongo deec, “Oc, faiande.” Ifi dema amau emma yoac mi demanu Yesungo kpesimie, “Simong, ge dafi negennec, bangeha bangeha ngictaungina, yeni takesi meracarunac meandae? Yeni yenang medacfocngina, yenearunac me ngicngac goa yenearunac meandae?” ²⁶ Kpesimi deec, “Yeni ngicngac goa yenearunac meandae.” ifi deu Yesungo yofi deec, “Ifiac amma medacfora yeni takesi mi faifai eng kecgecde. ²⁷ Nga yeni neranggac negemmangang mi anggecdeac amma geng ine dzohong tegiau kemma kondungyang memeac hawic mong ukuna. Ukuma kondungyang waraima menade, imocac enara mekpacgema siriwadzo mong maficgenade. Maficgema dzo imoc mema neac nga geangga kpacfu takesimemengic yemmebesena.”

18

¹ Naso imohai medac yeneng Yesuaru hama kpesimigec, “Kurumenggac eucerereng, imocac arenna merang kuneng kecde?” ² Ifi kpesimigec Yesungo nambarac yenearunac mong kparec. Kparu kenu ye botucnginau faiu nanu yofi deec, ³ “Foracngoc, ngeni ubangina mi merenggecde amma nambarac yeni isoc mi anggecdeu kurumenggac

* ^{17:20:} Mastet gbomea imoc homong gbomea isoc kapia yombong.

eucererennu naric mi enggecde. ⁴ Imocac ngic mong ye memaemema medac yofia, yeac siricfu kefude, yeng kurumenggac eucererennu kuneng kefude. ⁵ Nga mong ye nambarac yenearunac mong yofia neac kpacfу hoanggeude, yeng ni hoannuude.

⁶ Nga nambarac kapia yenearunac mong ni negensinnude, ye mongngo ngombonggeu sing segeudeu faka yomocngо yearu ngereebac. Ye yagucnog dzamandzingtoa ubiau ubahemima kondung kemeau ukugec kemebac. ⁷ Bangetoa bangec yomocac ngic manganaac ngombonggema ogofoocngina kopocsicfu faiyunuandae, yeni soweecninagoc. Nga faka imoc fingerude, amma ngic mong ye faka imoc fingerudeac ngombonggeude, ye ebihagoc. ⁸ Ge haniga me mariga mongngo anggenu kopocsic meficgenadeu geng imoc herecgema ukuna kembeso. Hanimariga hafoangoc kecma gerek wisic wisickea kpac, imohai ukugugec kemebanggac, hani mangang me hanimariga tegec tegera kecma kekecseriu ennade, imoc ine ngereeude. ⁹ Me kicga mongngo anggenu kopocsic meficgenadeu geng kicga meickema ukuna kembeso. Ge kicga yohockanggoc kecma hofeac gerefci ukugugec kemebanggac kicga nobohagocsac kecma kekecseriu ennade, imoc naric anude. ¹⁰ Ngeni nambarac kapia, yenearunac mong ubango mi ukubisia. Ni edengunuba negenggec, nambarac yeneac angerofocngina kurumennu kecdae, yeni nasosoc Manna kurumennu kecde, yeac kicmesuya hengkecdae. ¹¹ Nga Ngicac Medacngо ngicngac sufu sufuya, yeni ebicfunac kpedzucyunuma meyunuudeac maec.

¹² Ngic mong ye ramafora 100 mekecde, imohacnac mong kemma sufuу yofi anude. Ye ramafora 99 tikiu wayunuу nanggec kemma sufudacmoc, imocnog hoforude.

¹³ Hofockecma meficgema yeac ubangerec kuneng negenude. Nga 99 mi sufugec, yeneac ubangerec negengande, imoc ferahema sufuec, yeac ubangerec kuneng negenude, imoc fora yombong. ¹⁴ Nga Mangngina kurumennu kecde, yeng ifi isocngoc areng kapia yomoc, yenearunac mongngo mi sufuudeac negemma kecde.

¹⁵ Ogoga mongngo gearu kopocsic meficgeudeu ge kenna yegoc tembucngira tacma imoc deficgmina. Nga yeng yoacga negenudeu ge firang anna ye geac ogoga monggoc anude. ¹⁶ Nga ye yoacga mi negenudeu geng ine ngic mocgu me yohockang meyuruna ngenahafoe ebic imoc mengeregecdeac tacbisia. Ifi amma ngic yohockang me harebec dede sasawa demeseri ambisia. (*Dedeseri 19:15*) ¹⁷ Nga ye yoacngina mi negenudeu ngeni ine kemma kpebung edeyunubisia. Edeyunugec yeng kpebung yeneac yoac ifingoc waudeu ine ngic imoc henggec ye ngic Anutu mi negemmidae nga takesimemengic, yeni isoc ambeso. ¹⁸ Foracngoc, ngeni bangecfu wiа sasawa dzegegecde, imoc kurumennu ifingoc dzege dzegea feude. Nga ngeni bangecfu wiа yungecadgecde, imoc kurumennu ifingoc yungec yungera feude. ¹⁹⁻²⁰ Imoc yofiac, yei bangecfu ngicngac yohockang me harebecingo neac kpacfу kpeturanggema tacgecdeu ni botucnginaу kecbade. Imocac yngeneearunac yohockangngо uba mocgu amma wiа monggac me monggac kpesiecdeu Manna kurumennu kecde, yeng negengngemema imoc ngemerude.”

²¹ Anu Petorongo Yesuaru hama kpesimie, “Kebu, ogonango nearu kopocsic meficgeudeu naso dafiguc kopocsiha wabadeac negennec? Atac 7 soha ande me?”

²² ifi deu Yesungo yofi meremmiec, “Atac 7 kpac, atac 70 namma ende imocac deduae.

²³ Imocac kurumenggac eucerereng imoc ngictau mong ngic homac mingingngina kefec, ye isoc. Nga yeng wanacngic yeni yearu turungngina kpougecdeac nasoya faiec. ²⁴ Faiu hagec turungnginaac ising ising ua hanaheu ngic mong ye turunga kifa 150 tausenggac uabung, imocacsoc feec, ngic imoc yearu mehagec.*

²⁵ Nga ye turunga imoc kpouudeac obohoma minginango edeu yengena nga enemmedacfora minging monggaru sueyunuma wiara sasawa suedacma, imocnog dzo kirecgeu turung imoc kpac anudeac deec. ²⁶ Ifi deu wanacngic ye imoc negemma minginaac kicfu makpema deec, ‘Kunenna, ge neac ubaga manganeu tomaina kecmana

* ^{18:24:} Yesu ye 10 tauseng tarantong deec. Tarantong imoc dzotoangina anec. Nga 10 tauseng imoc kpetetoangina anec. Imocac witiau mi osogec.

turunna kpoudacbade.’ ²⁷ Ifi deu minginango yeac ubea manganeu yoara nga turunga momoc waec.

²⁸ Anu wanacngic ye ngadeau kemee. Kemema ine wanacngic ogea mong yearu turunga uameme 100ac uabung[†] feec, ye meficgeec. Meficgema ye mendanggema ubea mendzicma deec, ‘Neac turunna gearu fede, imoc bic kpounendacna.’ ²⁹ Ifi deu wanacngic ogeango imoc negemma yeac kicfu makpema desambic ammima deec, ‘Ge neacnec ubaga manganeu tomai kecmana turungga imoc ngade kpoubade.’ ³⁰ ifi deu ogeango yeac yoac wama turunga kpoudacmaguc maudeac mekemma witicamau faiu tarec. ³¹ Taru wanacngic ogofocngira yeneng faka imoc hemma ubangina homac manganeu negenggec naric mi anec. Nga yeni kemma faka fingerec, imoc sasawa mingingngina edegec. ³² Edegec mingingnginango wanacngic imoc deu hau edeec, ‘Ge wanacngic mangac manganea. Geng desambic anenna turungga sasawa wadua. ³³ Nga neng geac ubana manganeu turungga wadua, ge ifi isoc wanacngic ogogaac ubaga ifingoc manganeu turunga wabanggacsoc.’ ³⁴ Ifi dema minginango herebu negemma ngaba ammima witicamagareng yeneac mariu faiec. Faiu wanacngic ye turung imoc sasawa kpoudacmaguc maudeac deec.

³⁵ Anu ngeni sasawango ogofocngina tembac tembac yeneac kopocsic ubahereng-inango yombong mi wagecdeu Manna kurumennu kecde, yeng siriha ifingoc ngeni angemmeude.”

19

¹ Yesungo yoac imoc dedaru wisickeu Gariraia bangec wama Yudaia bangecfu Yodang nobocgengau kenec. ² Kenu ngicngac habutoa kuneng yombong ye modacgec yeng ngicngac hafeinginagoc mengereyunuec.

³ Anu farisaio yeneng yearu hama faitobannu faigecdeac kpesimigec, “Ngic ye enema wiac hania haniaac amma waude, singngo imoc dede me?” ⁴ Ifi degec Yesungo meremma yofi edeyunuec, “Fingec fingec minginango hanahema deu ngic nga ngac anecde, ifi meficyuruec. Ngeni imocnoc osonegeng angandae.” *(Fingec fingec 1:27; 5:2)*

⁵ Ye meficyuruma yofi deec, ‘Imocac amma ngic ye nonggomama wayuruma enemaaru kpeketaheu yegoc sebi mocgu anecde.’ *(Fingec fingec 2:24)*

⁶ Ifi anecdeac yeri yohockang monggoc mi andape, kpac. Yeri sebi mocgu anecdeac yofi ande, Anutungo wiac dzeggec, imoc ngicngo naric mi herecgeboso.”

⁷ Deu degec, “Nga dafiac Mosengo dedeseri yofi nemmeec, ngic mongngo ngac wawa kibi ohoma ngac miu ngac ye wau kembeso?” ⁸ Ifi degec Yesungo yofi deec, “Ngeni ngic ubaseri nga herengina dzegge dzegge, imocac Mosengo enengfocngina wayunugecdeac kpae mi heiec. Nga hanac hanahaunac ereec sing ifia mong mi feec. ⁹ Ni ine yofi edengunuba, ngic mongngo enema serofaka mi ammanu ye eng wama ngac mong meude, ngic imocngo serofaka anude.”

¹⁰ Ifi deu negemma medacfora yeneng degec, “Eweeneng yereac botucfu faka ifia fedeu eweeneng kekec kecnide, imoc gombunga yombong kpac.” ¹¹ Ifi degec Yesungo yofi edeyunuec, “Yoac yomoc goa yenearu mi heiude. Yoac imoc ngic yemmeyemmea yenearusac heiude.” ¹² Ngic goa yeni nonggo heremanaunac kufing fingecgec. Nga goa yeni ngicngo faka ayemmegec kufing anggec amma ngic goa yeni kurumeng eucererenggac amma kufing isoc kecandae. Ngic mong ye yoac imoc yearu heide, yeng imoc mebeso.”

¹³ Anu ngicngac yeneng nambaracfocngina kapiabisic Yesuaru meyunu kemma negenggec, “Yeng mariango nambarac witinginai faima numuyemmeude.” ifi anggec medacfora yeneng kpetariyemmegec. ¹⁴ Yesungo ine yofi deec, “Nambaracbisic bisic yeni nearu naric hagec. Ngeni kpae mi heiymmegec. Kurumenggac eucerereng imoc nambaracbisic bisic yofia yeneac.” ¹⁵ Ifi dema maria witinginai faima kenecyunuus wisickeu ye amabangec imoc wama monnu kenec.

[†] 18:28: Ye 100 denari deec.

¹⁶ Negenggec, ngic mongngo Yesuaru hama deec, “Kpoukpou, ni noc faka gombunga angkecma kekecseni mebai?” ¹⁷ Ifi deu yeng yofi deec, “Ge wiac gombungaac ni mi kpesinenna. Mocgungo gombunga kecde. Nga ge kekecseniu embesonga dema dedeseriyoacnina tofohobesena.” ¹⁸ Ifi deu deec, “Dedeseriyoac damoc tofohobadeac denec?” ifi deu Yesungo yofi deec, “Ge ngicngac mi yunuhomebesena nga kaisero mi ambesena nga hamangec mi mebesena amma enacfu faifai mi ambesena. ¹⁹ Ge nonggo manghocga seseyurubesena amma geangga anggengande, siriha imocngoc ogofocga heresongogoc hoangyunubesena.” (*Makekeng 20:12-16; Dedeseri 5:16-20; Sesememe 19:18*)

²⁰ Ifi deu sebigboringic yeng deec, “Ni imoc sasawa modacanduae. Nga noc wiacac monggoc kpedadanggebade?” ²¹ Deu Yesungo yofi edeec, “Ge ngic dindingac hafoangoc kecbesonga negennec isoc, yofi anna. Kemma wiacga sasawa suedacma hiedzoga mema ngicngac makpekpea yemmebesena. Ifi anna kurumenggac dzofinac fingecgenu hama modacnubesena.” ²² Ifi deu sebigboringic ye dzofinaha homac femiecac yoac imoc negemma ubaebic mema kenec.

²³ Kenu Yesungo medacfora yofi edeyunuec, “Foracngoc, ngic mong dzofinactoagoc, ye kurumenggac eucererennu enudeac ambibieude. ²⁴ Amma monggoc deba negenggec, kamerengo bungic singau engeng, imoc ua efea nga ngic dzofinacgoc yeng Anutuac eucererennu engeng, imocngko ine uatoayagoc.” ²⁵ Ifi deu medac yeneng yoac imoc negemma kpidohoma kerectegec yombong amma degec, “Ifi anu merang naric komoc kpeude?” ²⁶ Ifi degec Yesungo yenemma yofi deec, “Ngic ngeni imoc obohoma wagecde nga Anutungo wiac sasawa naric meude.” ²⁷ Ifi deu Petorongo deec, “Negenna, neni wiacnina sasawa wadacma modacguma kecdimbe. Imocac neni noc wiac menide?”

²⁸ Ifi deu Yesungo yofi edeec, “Foracngoc, kecma wiac sasawa gboria fingerude, naso imohai Ngicac Medacngo kurumenggac kuc nga kibikperagiaac ngictautatahau tarude. Nga ngic modacnuandae, ngeni ifingoc ngictautatac 12 imohai tacma Israeac kisic 12, yeneac fakangina isinggema desigecde. ²⁹ Nga ngicngac kpacnaac amma amafocngina me dacmunafocngina me nonggo mangfocngina me nambaracfocngina me bangecngina wagec, ngeni sasawango wiac imocac naso 100 monggoc megecde nga kekecseringo maridzomingngina ambesande. ³⁰ Ngic warac warac kecandaе, yeneearunac ine homacngko ngadea anggecde nga ngadea kecdae, yeneearunac homacngko warac warac anggecde.”

20

¹ “Kurumenggac eucerereng imoc ngic mong amabangehagoc, siriha imocacsoc. Ye asoacngoc kemma ngic waing uayau ua megecdeac ngic yagura meyunuec. ² Meyunuma ua ngic yagura yeni uameme mocguac dzo ifiasoc megecdeac denegeng amma uba mocgu amma sueyunu uau kenggoc.*

³ Nga 9 kiroc ammanu waing ua minginango ngic goa kpedzaroc sobennu eng nanggec yenemma ⁴ yofi edeyunuec, ‘Ngeni ifingoc waing uanau kemma ua megec, imocac sirihau dzo ngemmebade.’ ⁵ Ifi deu yeni waing uayau kenggoc. Nga ye 12 kiroc nga 3 kirocfu faka imocngoc anec. ⁶ Nga 5 kiroc anu ye monggoc kemma ngic goa ifingoc eng nanggec maficyunuma yofi edeyunuec, ‘Ngeni nocac eng nanggec ama marai ande?’ ⁷ Ifi deu degec, ‘Ngic mongngo uayoac mong mi denemmedac.’ Ifi degec yofi edeyunuec, ‘Ngeni ifingoc kemma neac waing uau ua mebisia.’

⁸ Ama marai anu ua minginango ua gareng yofi edeec, ‘Ge yagurangic kpacyununa hagec uaac bung yemmena. Amma ngic wisic wisickea hagec, yeneearunac hanahema yemmekengkecna waraima hadau, yeneearu wisickebeso.’ ⁹ Ifi deu ua garengngko ngic 5 kiroc hagec, yeni hanahema ua meme mocguac bung, ifi yemmeec. ¹⁰ Yemmeu ngic

* ^{20:2:} Yeni denari mocgu degec. Denari imoc Roma yeneac dzo monggac kpara. Yesuac nasou denari mocgu uameme mocguac bung anec.

waraima hagec yeneng negenggec, ‘Ye dzo meemma nemmeude.’ Nga ua garengngó dzo kpetea imocngoc yemmeec.¹¹ Yemmeu yeni dzo kpetea imoc hemma negenggec naric mi anu waing ua mingina¹² edegec, ‘Ngic yomoc yeni ngade yombong hama aua mocgusac ua megec. Nga neni ine asoacngoc hama uaac ebic hemma wenacfu namma meerekecni ama marai ande. Nga geng yenigoc siriha mocgungoc anemmedang.’¹³ Ifi degec yeng yenearunac mong yofi edeec, ‘Ogona, ni kopocsic mong mi meficeggedua. Negenna, nerang waraima uameme mocguac dzo ifiasoc deserima uba mocgu andic.¹⁴ Ge imocac dzoga mema kenna. Nga neng ine yagurangic ngade hadau yeni bung socfungoc yemmebadeac songona ande.¹⁵ Ni neanna hiedzongo ifi me ifi ambesonga negemma imoc naric ambai. Amma fakana gombunga anu imocac negen negengga mi manganebeso.’¹⁶ Ifi isoc ngadea yeneng warac warac anggecde nga warac warac yeneng ine ngadea anggecde.”

¹⁷ Yesungo medacforagoc Yerusarennu kembeso kemma sinnu tembucnginau yofi edeyunuec,¹⁸ “Negendae, nenang Yerusarennu endimbe. Enni ngic yeneng Ngicac Medac womong gareng enara nga mitiac negen negengngic, yeneac mariu faigecde. Faigec yeneng ye homeudeac desigece. ¹⁹ Desima ye bangec monnunac ngic Anutu mi negemmidae, yeneac mariu faigecde. Faigec yeneng deendema ammima dzikacngó kpema sebia kpekpercge amma mariponnu kpegec homeude. Amma uameme harebec kemmanu homecfunac monggoc yarude.”

²⁰ Anu Dzebedaoac medahora nonggongirango meyuruu Yesuaru hagec. Hama Yesufafoc heimima deec, “Ni wiac monggac naric kpesigembai me?”²¹ Ifi deu deec, “Ge noc wiacak anggende?” Deu edeec, “Medachocna yomoc yereng eucererenggau mongngo foigau nga monggo kanagau tarecde, imoc deserinenna.”²² Ifi deu Yesungo yofi deec, “Ngeni wiac kpesidae, imocac hania mi negenghomeda. Nga neng kpenzenggac kpakenecfu nebeso anduae, ngeri imoc neecdeac dedape me?” deu deoc, “Oc, naric nedede.”²³ Yeri ifi deec Yesungo yofi edeyuruec, “Ni kpenzenggac kpakenecfu nebade, ngeri imocngoc neecde. Nga ngic merang foinau me kananau tarude, imocac fora ine neng naric mi desibade. Mannango ngic tatac imohai tarecdeac bic mengereec, yereng ihai naric tarecde.”

²⁴ Anu medacfora 10 yeneng imoc negemma dacmunac yereac negenggec manganeec.²⁵ Manganeu Yesungo kpacyunu kenggec yofi edeyunuec, “Bangec monnunac ngicngac, yeneac ngictaufocngina ngicngac yeneac ngickuneng siricfu garengyunuandae. Nga ngicngac kunengfocngina yeni ngicngacfocngina yeneng yoacngina modacgecdeac kuc feyemmede, ifinoc negengandae.”²⁶⁻²⁸ Nga faka ifia ngeneac botucfu mong mi febeso, kpac. Ngicac Medacngó ngicngac yeneng yeac kingang kpegecdeac mi maec, kpac. Yeng yeneac kingang kpema ngicngac homac ebicfunac yungecyunuma kekeha wau yeneac doudeac maec. Ifi isoc ngenearunac ngic monggo engena kecbeso ammide, yeng botucnginau kingang kpekpengina kecbeso. Nga ngeneac botucfunac warac warac ambeso ammide, yeng botucnginau wanacngicngina kecbeso.”

²⁹ Yesu nga medacfora yeni Yeriko taong wama kemmagec ngicngac habutoa kuneng yombong modacyunugec.³⁰ Nga sing tegiau kicpisic ngic yohockang taroc. Tarec ngicngac yeneng degec, “Yesungo hama kende.” ifi degec yeri imoc negemma kpacma deoc, “Kebu, Dawidiac bangeha, ge nereacneb ubaga manganeu.”³¹ Ifi kparec ngicngac habutoa yeneng waickema tarecdeac kpetariyecmegec. Nga yeri ine monggoc seriangoc kpacma deoc, “Kebu, Dawidiac bangeha, ge nereacneb ubaga manganeu.”³² Kparec Yesungo namma kpacyuruma yofi deec, “Ngeri noc wiac angecmebadeac negendape?”³³ deu deoc, “Kebu, neri kicnira tegerudeac negendipe.”³⁴ Deec Yesungo ueba manganeu mariango kicngira kpesereu yeri imohaingoc kicngira firma ye modaroc.

dindingac kemma guruama sing enarau tacde, imohai donggi mong bic meficeggee. Ye medahagoc witickegec nande. Ngeri donggi imoc yungecyuruma nearu mehaec.
³ Nga ngeri ifi anec ngic mongngo ngeremema kpesingemerude isoc ngeri yofi edebesera, ‘Kebungo yerigoc ua meudeac dede.’ Ifi deec yeng donggi nonggomedac bic ngerigoc sueyuruude.”

⁴ Profete yoac mong yofi deec, imoc fora anudeac ifi fingerec.
⁵ “Ge Sionggac naroang yofi edebesena, ‘Henna, ngictauga hagende. Ye donggiu hade, ye donggi medahaac witiau tacde nga ye fakaya memaemeemea.’ ” (*Dzekaraia 9:9*)
⁶ Nga medac yeri kemma Yesungo edeyuruec, ifi isoc anoc. ⁷ Ifi amma donggi medahagoc meyuruma hama ngakpingira herea hesima donggi nonggomedac yereac witingirau tiameoc. Tiameec Yesungo imocac witiau tarec. ⁸ Taru ngicngac habutoa nanggec, yeneng ngakpingina hesima sinnu tiamegec nga goa yenyi ic fawa icfunac herecgema sinnu tiamegec. ⁹ Nga ngicngac habutoa kiwau kenggec nga ngadeau modacgec, yeneng kpacma yofi degec,
 “Ohec waec, Dawidiac kisicfunac, ohec. Ngic Kebuac kpacfuhade, ye kenehagoc. Wi kurumennu kpara dengeregec, ohec waec, hosanna.” (*Mitiyegec 118:26*)
¹⁰ Yesungo Yerusarennu enu taoggac ngicngac sasawa yenyi kpidohoma kengha amma degec, “Imoc merac?” ¹¹ Ifi degec ngicngac habutoa yeneng edeyunugec, “Imoc Yesu, profetenio Gariraia bangecfunac Nadzarete taonnunac.”
¹² Anu Yesungo Anutuac womonggac oda manau emma ngicngac wiac emekpesi anggec, yenyi imohacnac kporacyunuec. Ye ngic hiedzo emekpesi anggec, yeneac tebo heimeremema kebesac emegec, yeneac tatac ifingoc heimeremema ¹³ yofi edeyunuec, “Yoac yofi oho ohoya fede, ‘Neac ama imoc nunumuama, kpara ifi kpacbesonga.’ (*Yesaia 56:7*)

Nga ngeneng ine imoc merenggec,
 hamangec ngic yeneac sufu sufuama ande.” (*Yeremaia 7:11*)

¹⁴ Anu womonggac odataaac manau ngic kicpisic amma hanimangang yeneng yearu hagec yeng mengereyunuec. ¹⁵ Ye faka kuhagoc ifi meec nga nambarac yeneng womong manau kpacma yofi degec, “Dawidiac bangeha, ohec, hosanna.” Kpacgec womong gareng enara nga mitiac negengngic yeneng imoc hemma herebu negemma
¹⁶ Yesuaru kemma degec, “Yeni yoac dedaemoc, imoc negennec me?” Ifi degec yeng yofi deec, “Negenduae amma ngeni yoac yomocnoc osonegeng mi angandae gedang, ‘Ge nambarac kapia nga sabac namuu kecdae uayoac yemmena yeneng geac kpac kuneng heiwayong memigecde.’” (*Mitiyegec 8:2*)

¹⁷ Ifi dema wayunuma taong wama Betania amabangefu kemma tofocnac ihai kefec.
¹⁸ Amma Yesungo asoac taonnu dzigene kemma hereaac homema ¹⁹ sing tegiau kic fima fig ic mong henec. Hemma negenu foragoc isoc anu haniau kemma mariasac hemma ic yofi edeec, “Ic, gearunac fora monggoc mi fingerkecbeso.” Ifi deu fig ic imoc imohaingoc ururuec. ²⁰ Ururueu medacfora yeneng imoc hemma kpidohoma kpesimigec, “Fig ic imoc dafi bic yombong ururuede?” ²¹ Ifi dema kpesimigec Yesungo yofi edeyunuec, “Foracngoc, ngeni negengsingnginagoc kecma negengyohoc mi anggecdeu icfu faka medua, faka imoc naric megecde, imoc edengunuduae. Nga imocsac kpac, ngeni ifingoc tiki yomocac yofi naric degecde, ‘Tiki ge miacemema kondunnu ukuemema kemena.’ Ngeni ifi edegec, ifinoc anude. ²² Nga ngeni wiac monggac me monggac negensinggema nunumunginau kpesigecdeu ngeni imoc sasawa megecde.”

²³ Yesungo ifi dema taonnu hama womonnu emma kpoukpou ua meu womong gareng enara nga yudangic enarafocngina, yeneng hama kpesimigec, “Ge noc kucfu ua yomoc menec amma merang uayoac imoc genec?” ²⁴ Ifi kpesimigec yeng yofi merengyemmee, “Neng ngeni wiac monggac ifingoc kpesingemmeha ngeni turunga edenugecdeu ni uakibinaac hania imoc edengunubade. ²⁵ Yohanengo dokunadzic ua mekefec, imoc dahacnac, kurumennunac me ngicfunac?” Deu yeni yenaocngoc denegeng amma degec, “‘Imoc kurumennunac.’ ifi denideu yeng yofi kpesinemmeude, ‘Ifi negemma ngeni

nocac ye mi negensinggegec?" ²⁶ Me 'Imoc ngicfunac.' ifi denideu ngicngac sasawa yeni Yohaneac ye profete negendae, imocac debesonga yeneac kengecnunude." ²⁷ Yeni ifi denegeng amma Yesu edegec, "Imoc mi negendimbe." Ifi degec Yesungo yofi deec, "Ifi degec, ni ifingoc noc uayoacac kucfu ua mekecduae, imoc mi edengunubade."

²⁸ Negenggec, "Ngic mong ye medahora yohockang nga ye waracmedahaaru kemma edeec, 'Medacna, ge yaguc waing uau kemma ua mebesena.' ²⁹ Ifi edeu medahango merenec, 'Ni imoc waduae.' Ifi dema ine ngade ubea dzigeneu uau kenec. ³⁰ Nga manggac ye kemma ngademedaha, yeac ifingoc edeu ngademedahango deec, 'Manggac, ni naric kembade.' Ifi dema kemma ihoc bahoc amma uau mong mi kenec." ³¹ Ngeni dafi negendae, "Medac yerearunac merang mamaac songo modacma uaya meec?" Ifi kpesiyemmeu degec, "Waracmedaha yeng." degec Yesungo yofi edeyunuec, "Foracn-goc, takesimeme ngic nga singtoangac yeneng waraingemmema Anutuac eucererennu enggecde. ³² Yohanengo sing dindingac modacma ngenearu hau ngeni ine mi negensinggegec. Nga takesimeme ngic nga singtoangac yeneng ye negensinggegec. Ngeni ine imoc henggec amma sifu ubangina mi merenggec nga mi negensinggegec."

³³ Ni yoac mong heiba negenggec, "Ngic mong amabangehagoc ye waing ua mong homecma oda dzegeec. Dzegema waing tidzoc tidzohoac teng usuma gareng yeneac kicfifiac amaherec meec. Ifi meu wisickeu waing ua garenggegecdeac ngic maficyunuma yenigoc yoac dedzege anggec. Nga yengenaoc ine bangec hereau kenec. ³⁴ Kenu fora kpememe naso hau ye wanacngicfora sueyunuu uagareng yenearu waing fora megecdeac kenggec. ³⁵ Kenggec ua gareng yeneng ine minginaac wanacngicfora meyunuma mong kpema mong kpehomema mong hocng heigec. ³⁶ Ifi anggec ua minginango wanacngic goa homac monggoc sueyunuu kenggec gareng yeneng faka imocngoc ayemmegec. ³⁷ Nga ngade ua minginango yofi negemma yengena medaha sueec, 'Yeni medacnaac ewea sifu heigecde.' ³⁸ Ifi dema sueu kenu ua gareng yeneng medaha hemma yofi denegeng anggec, 'Yeng kecma ua yomoc tiu enude, imocac ye kpehomema bangha nga maridzominga sasawa meni nenang ambeso.' ³⁹ Ifi dema miacukugec oda ngadeau kemeu mema kpehomegec.

⁴⁰ Nga ua minginago monggoc hama uagareng dafi ayemmeude?" ⁴¹ Ifi deu degec, "Ua minginango hama uagareng mangana memanganeyunuma yunuuhomema waing uaya imoc uagareng goa yeneac mariu faiude. Faiu yeneng imoc garenggema foranasou mingina fora migecde." ⁴² Ifi degec Yesungo yofi deec, "Mitikibiu yoac yofi oho ohoya fede,

'Amameme ngic yeneng hoc mong mangana dema ukugec. Nga hoc imocngo amaac hoc wotung amma seria nanude. Kebu yengenaoc faka imoc meu ngicngo hensongo ammidimbe.'

(*Mitiyegec 118:22-23*)

Ngeni kibi imoc osonegeng mi angandae gedang. ⁴³ Imocac amma edengunuba negenggec, Anutungo eucerereng ngenearunac meickema areng mong yemmeude. Nga yeneng eucererenggac uaya mema foraya maficgegecde. ⁴⁴ Nga ngic mong ye hoc imocac witiau maude, ye sebia tegerude. Nga hoc imocngo yeac witiu makpema hedzameu kapuc kpeude."

⁴⁵ Anu Yesungo yoac heiec, imoc womong gareng enara nga farisaio yeneac deec, imoc bic negentegegecgec. ⁴⁶ Yeni ifi negenggec nga habu yeneng yeac profete degecac yeni ine Yesu mendanggegecdeac kengecyunuu osima wagec.

22

¹ Yesungo yoac mong heima torokpema yofi edeyunuec, ² "Kurumenggac eucerereng imoc ngictau mong isoc, ye medahaac memeturang nasoac yakatoa ohoma memengere anec. ³ Amma ngictaungo wanacngicfora sueyunuu yeni ngicngac memeturanggac amma bic heitaiyinuec, yeni wangecyunugecdeac kenggec. Kenggec ngicngac yeneng ine modzongina tiu wagec. ⁴ Wagec ngictaungo wanacngicfora goa monggoc sueyunuma

yofi deec, ‘Ngeni kemma ngic bic heitaiyunuai, yeni edeyunugec, “Negendae, burumakana ngiwa nga yang kerectoayagoc imoc bic kpeoho amma yakatoa mengeredacdua. Ni wiac sasawa bic memockedua, imocac ngeni hagec.”’

⁵ Ifi deu kemma edeyunugec, yeneng ine yoac monggoc hau imoc negemma mod-zongina tiu eng wama kengha anggec. Mong ye uayau kenec nga monggo kpounec uayau kenec. ⁶ Nga ngicngac tosea yeneng ngictauac wanacngicfora ngaba ayem-mema yunuhomegec. ⁷ Ifi anggec ngictau ye imoc negemma herebu amma wasaifora sueyunu kemma ngickpekpengic imoc yunuma taongngina faigec dzee. ⁸ Amma wanacngicfora yofi edeyunuec, ‘Memeturanggac yaka imoc bic mengec mengerea nga ngic heitaiyunudua, yeni areng mangana ifiango nearu hagecdeacsoc mi ande. ⁹ Imocac ngeni sing sosocfu kemma namma ngic maficyunugecdesoc, yeni edeyunugec memeturanggac amau habisia.’ ¹⁰ Ifi deu wanacngic yeni sinnu kemma ngic maficyunugecsoc gombunga nga mangana momoc hesicyunudacma hama memeturanggac yakaama imoc mewakegec.

¹¹ Anu ngicngac yeni hadacma tacgec ngictaungo yenenudeac hama ngic mong memeturanggac ngakpi mi heima tarec, ¹² ye hemma yofi edeec, ‘Tosona, ge dafi memeturanggac ngakpi mi heima erema tacnec?’ Ifi deu ngic ye yoara kpac waickema taru ¹³ ngictaungo kingangngicfora yeneac yofi deec, ‘Ngeni hanimaria kpema ngadeau kundunnu ukugec kemeu. Ihai kiacma enara kisaranggema kecbeso.’ ¹⁴ Ngicngac kpacyunuyunuya, yeni homac nga meisingyunuyunuya, yeneng ine efeanec.”

¹⁵ Anu farisaio yeneng kemma yoac dafi dema Yesu tobanggeni yoac goa segeu meni dema imocac denegeng anggec. ¹⁶ Ifi amma medacfocngina nga Herodeac areng goa Yesuaru sueyunugec kemma degec, ‘Kpoukpou, ge yoac fora dekecnec, imoc negendimbe. Nga Anutuac sing dindingac ngicngac edekpou anemmekecnec amma ngic monggac me monggac songo mi negemma engena mamea socfungoc anemmeannec. ¹⁷ Imocac dafi negennec, damocngo naric ande, neni takesi ngictau Sisa naric minide me kpac?’ ¹⁸ Ifi degec Yesungo ngabasiricfu degec, imoc negemma yofi edeyunuec, ‘Ikocngic, ngeni nocac suba idenendae? ¹⁹ Ngeni takesi faiandae, imohacnac dzo mong mehagec hemba.’ Ifi deu yeni denarihoc mongmekemma edzahegec ²⁰ yeng imoc hemma yofi kpesiyemmeec, ‘Onga nga kibi yoc, imoc meracac?’ ²¹ Deu degec, ‘Imoc Sisaac.’ Ifi degec yeng yofi edeyunuec, ‘Imocac ngeni Sisaac wiac Sisa mibisia nga Anutuac wiac Anutu mibisia.’ ²² Ifi deu yeni imocac negenggec engena anu wama kenggec.

²³ Sadukaio areng yeni homecfunac yacyac mi fede, ifi dekecdae, yeneearunac ngic goango wenac imohaingoc Yesuaru hama kpesimigec, ²⁴ ‘Kpoukpou, Mosengo yofi deec, ‘Ngic monggo ngac meec nga ye gboriha kpac kecma homeu muneango daraac hodzec mema gboric kpficgema daraac kpac miacma kecbeso.’ *(Dedeseri 25:5-10)*

²⁵ Dacmunac seweng nenigoc kecgec, yeneearunac waracdacnginango ngacfu kemma gboriha kpac kecma homeu muneango hodzeha meec. ²⁶ Meu munea nga yeac ngadeau munafora 5 kecgec, yenearu faka ifiangoc fingeru yeni sasawango homedacgec. ²⁷ Homedacgec ngac ye ifingoc kecma homeec. ²⁸ Ngic seweng yeni sasawango ngac yeac ewea anggec. Nga yacyac nasou ngac imoc meracac enema anude?’

²⁹ Ifi degec Yesungo meremma yofi edeyunuec, ‘Ngeni mitikibi nga Anutuac kuc mi negentegecdaec yoac desufudae. ³⁰ Yacyac nasou ngicngac yeni monggoc mi meemegecde amma manggac monggo yofi mi deude, ‘Ni naroanna ngic mibade.’ Imohai ngicngac yeni ine kurumenggac angero, yeni isoc anggecde. ³¹ Nga homecfunac yacyac dema Anutungo yofi bic edengunuec,

³² ‘Ni Abrahang nga Isaka amma Yakobo, yeneac Anutu.’ *(Makekeng 3:6)*
Ngeni imoc osonegeng mi angandae gedang. Nga ye ine ngic homemea, yeneac Anutu kpac. Ye gbori kecdimbe, neneac Anutu.’ ³³ Nga ngicngac habutoa yeni kpoukpouya imoc negenggec engena anec.

³⁴ Anu farisaio yeneng yoac yomoc negenggec, “Yesungo sadukaio yeneac yoac merenu yoacngina dugung kpeu engsac nanggec.” Yeni imoc negemma kpedzucnema ³⁵ yeneac botucfunac dedeseriyoacac negen negengngic mongngo Yesu faitobannu faima kpesimie, ³⁶ “Kpoukpou, dedeseriyoacac manau dedeseriyoac damocngo engena yombong ande?” ³⁷ Ifi kpesimi yofi edeec,

“Ge ubaherega nga ubaongaga amma negen negengga hafoangoc Kebu Anutugaac songo negemma kecbesena.” *(Dedeseri 6:4-5)*

³⁸ Imocngo dedeseriyoacac warac warac nga kuneng ande. ³⁹ Nga imocac ngadeau ogea yofi,

‘Ge geangga anggengande, siriha imocngoc gegoc wegena kecdae, yeni heresongogoc hoangyunubesena.’ *(Sesememe 19:18)*

⁴⁰ Dedeseriyoac nga profeteyoac sasawango dedeseriyoac yohockang yomocac witiau tima nandae.”

⁴¹ Anu farisaio yeni kpedzucnema tacmagec Yesungo yofi kpesiyemmeec, ⁴² “Ngeni Messiaac hania dafi negendae, ye meracac kisicfunac?” Kpesiu meremmigec, “Ye Dawidiac bangeha.” ⁴³ Ifi degec Yesungo yofi deec, “Ifi anu Tiri Asungo dafiac Dawidiac enac meefaiu yeac ‘Neac Kebu.’ dema yofi deec,”

⁴⁴ “KEBUNGO neac Kebu edeec, ‘Ge foinaugeng tacmana ngabafocga hanigaac bageau faiyunuba yeni hanititiga anggecde.’” *(Mitiyegec 110:1)*

Ifi deec. ⁴⁵ Nga Dawidi yengenaoc kpara yofi kparec, “Neac Kebu. Nga Messiango dafiu Dawidiac bangeha ande?” ⁴⁶ Ifi deu yeni Yesuac yoac turunga merembesonga obohogec. Obohoma naso imohacnac erema yeac kengec amma mongngo dekpesi monggoc mi ammigec.

23

¹ Yesungo ngicngac habutoa nga medacfora yofi edeyunuec, ² “Mitiac negen negengngic nga farisaio yeni Moseac tatacfu tacdaec ³ yeni yoac edengunudae, ngeni imoc sasawa tofohoma modacbisia. Nga yeni faka angandae, ngeni siric ifi mi ambisia. Yeni yoac edengunuandae, imoc ine yenaoc mi modacandae. ⁴ Yeni singyoacac dede ebiria yombong dedeckema ngic ngeneac fuau faigec ebiriude. Nga yenaoc ine dede imoc meefaima meficngunugecdeac gbongnginango miacgecdeac mi ayemmeude. ⁵ Yeni ngicngo fakangina henggecdeac mitigbomea kandacbiscic bisicngina meyadiandae.* Amma ngakpingina herea heiandae, imohai witic kibi kibi kpatainggema nangande, imoc kuneng yombong meandae.†

⁶ Yeni yakatoa nasou nga kpekpeturang amau warac warac tatacfu tacbesonga ayemmeude. ⁷ Nga kpedzaroc sobennu ngicngac yeneng ‘Wenacngerec.’ nga ‘Gareng,’ ifi dema kpacyunugecdeac homac ayemmeude.

⁸ Anu ngeni garengngina mocgungo kecde nga ngeni sasawa dacmunac andae. Imoc ngeneac negemma mongngo ‘Gareng,’ ifi mi kpacngunubes. ⁹ Mangngina mocgungo kurumennu kecdeac amma ngeni bangecfu ngic monggac ‘Mannina,’ ifi mi debisia. ¹⁰ Nga kunengngina Messi mocgungo kecdeac amma ngic mongngo ‘Kunenna,’ ifi mi kpacngunubes. ¹¹ Nga kunengngina kecde, yeng ine ngeneac kingangkpekpe kecbeso. ¹² Ngic mong ye yengenaac negenu engena angkecde, ye mamea anudeac memagecde. Nga mong ye yengenaac negenu mamea angkecde, ye meenggecde.

¹³ Mitiac negen negengngic nga farisaio, ngeni kurumeng eucererenggac nagu kpebung yeneac kicnginau heiandae. Ngeneng imohai enggecdeac segeandae nga kpebung yeneng embesonga ammagec kpaе ifingoc heiyemmekedae. Ngeni ikocfakangina ifia mekecdaec ngeni sowecnginagoc. ¹⁴ Mitiac negen negengngic nga farisaio ngeni sowecnginagoc. Ngeni ngachodzec amangina wangecyunugec engsac kecgecde. Amma

* 23:5: Yudangic yeneac kandacbiscic bisic yang seberango meme mitigbomea oho ohoya ihai barima mesunginai me fuanginau orohokecgec. Faka imocac hania Dedeseri 6:1-10 oho ohoya fede. † 23:5: Faka imocac hania Bangec kisiu 15:38-41, imohai oho ohoya fede.

ngicngac yeneng negengngeree ngemmegecdeac ngeni nunumu hereangoc numuandae. Ngeni ikocfaka ifia angandaec turunga ebiriangoc megecde.

¹⁵ Mitiac negen negengngic nga farisaio, ngeni ngic mocgu dekerectyoac ammigecdeac bangeha bangeha nga kondung ferecgema kengandae. Nga yeng ngenearu torokpeu mefahegec, ye ngenang isoc hofeac nambarac amma feracngunuma kemeude. Ikocfakangina ifia mekecdaeac ngeni sowecnginagoc.

¹⁶ Sing edzac edzac ngic, ngeninoc kicpisic andae. Ngeni yoac yofi deandae, ‘Ngic mongno Anutuac womong kpacma yoara deseriudeu, imoc yoac kapia. Nga mongno womong manau gol tacde, imoc kpacma yoara deseriudeu ye yoara imoc naric mi waude.’ Ifi deandaeac ngeni sowecnginagoc. ¹⁷ Womongno gol kpanggeu kpetiac anude, imoc wiac engena nga gol yengenaoc imoc wiac mamea. Ngeni kicpisic nga negen negengngina mi irec ireckea. ¹⁸ Amma ngeni deandae, ‘Mong ye arata kpacma yoara deseriudeu, imoc yoac kapia. Nga mongno sese arata witiau bic faifaia, imoc kpacma yoara deseriudeu yoara imoc naric mi waude.’ ¹⁹ Aratango sese kpanggeu kpetiac anudenoc, imocngo wiac engena nga sese yengenaoc imoc wiac mamea. Ngeni kicpisic areng.

²⁰ Ngic mong ye arata kpacma yoara deseriudeu ye arata nga sese arata witiau fedacde, imoc momocngoc kpacma medarude. ²¹ Nga mong ye womong kpacma yoara deseriudeu womong yengena amma Anutu imohai kecde, ye momocngoc kpacma medarude. ²² Nga mong ye kurumeng kpacma yoara deseriudeu, ye Anutuac tatac nga yeng ihai mingina amma tarude, ye momocngoc medarude.

²³ Mitiac negen negengngic nga farisaio, ngeni sowecnginagoc. Ngeni singyoac kapiabisic modacma dedeseriyoac engena, imoc ine wagecde. Ngeni ikocfakangina ifia meandae. Ngeni wiac homuna gombunga nga yakaac nga ic sogonggac homuna gombunga fingerude, imocac gbomea kapiabisic 10, imohacnac mocgu hendzicma Anutu miandae. Amma faka dindingac nga ubamangang amma negen negensingngina hafoangoc mekekec, imoc ine ihoc bahoc amma wagecde. Ngeni faka gombungngina imoc naric modacbisia amma tosea deduae, imoc ifingoc mi wabisia. ²⁴ Ngeni ngicngac sing edzacyunugecdeac ua, imoc kicpisic siricfu angkecdae. Nga kurungnginai picpic hemma imoc meickema kamere ine mi hemma gbokoandae. (*Sesememe 11:1-2,4,20*)

²⁵ Mitiac negen negengngic nga farisaio, ngeni ikocfakangina yofia mekecdaeac ngeni sowecnginagoc. Ngeni tera tasengina ngadeasac dzuacandae amma ngenang ubaherengina manau ine kickerec homac fede, imoc ngenaoc mi garengemeandae. ²⁶ Ge tase teraac mana dzuacnaguc ngadea ifingoc kongac kpeude. Farisaio ngeni kicpisic.

²⁷ Mitiac negen negengngic nga farisaio ngeni yofi negenggec, kicsere imoc homemea seucnginagoc nga sicngo wake wakea fede, imoc kibiagoc anudeac ngeni kicsereac simeng weroc nadzicandae. Nga ngeni ubaherengina nga sebinginai siriha ifia amma kecdae. ²⁸ Ngeni sebinginango ngickicfu dindingac isoc ande. Nga ubaherengina ine ikocnko wake wakea amma ngeni ngenaoc dedeseriyoac kpema kecdae. Ngeni ikocfakangina ifia mekecdaeac ngeni sowecnginagoc.

²⁹ Mitiac negen negengngic nga farisaio, ngeni sebiengeneng amma ikocfakangina mekecdaeac sowecnginagoc andae. Ngeni profete yeneac kicsereu simengngina meyemmema ngic dindingac simengngina kibiagoc anudeac monggoc heigborima mengereandae. ³⁰ Mengerema yofi deandae, ‘Neni bangecfocnina yeneac nasou kecbing debac profete naric mi yunuhomebing nga sacngina maudeac faka yenigoc mi ambing.’

³¹ Ngeni ifi mekecma yofi dekperagiemedae, ‘Nenang ngic profete yunuhomegec, yeneac medacfocngina.’ ³² Ngeni ifi dema bangecfocngina yeneac faka mewakema mekecgecde.

³³ Ngeni ngenaoc boidzoc amma boidzocac medac, ngeni yoacf turunga mema hofeu kemebauac ³⁴ neng profete nga negen negengngic amma mitiac negen negengngic sueyunuba hangemmegecde. Nga ngeneng kecma yenearunac goa yunuhomegecde nga goa mariponnu yunuugecde amma goa kpekpeturang amanginai dzikacnko yunuma ngaba ayemmema taong monnunac monnu kporacyunugecde. ³⁵ Ngeni ifi mekecma

ngic dindingac yunudacgec sacngina bangecfu madarec, imoc ac turunga hafoangoc nge-nearu feude. Imoc Abeac sacfunac hanahema erekecm Barakiaac medac Dzekaraia, yeac sacfu erede. Ngeni ye kpetiac ama nga arata botucngirau kpehomegoc.^{‡ 36} Foracngoc, faka sasawa imoc ac turunga, imoc areng yomoc ngenearu fingecdarude, imoc eden-gunuduae.

³⁷ O, Yerusareng, Yerusareng, ge profete yunuhomeannec nga ngic gearu sueyunuyunuya, yeni hocngo yenereannec. Kokorec nonggeango nambaracfora kpeganga bageau foforacyunuande, ni naso homac ifi isoc nambaracfogca kpedzucyunubadeac negembare ngeneng ine imoc songo mi negenggoc. ³⁸ Negenggoc, ngeneac amagerec imoc nigha kpac anu kisi fingerude. ³⁹ Ni edengunuba negenggoc, yofinenggac hanahema ngeni monggoc mi nengecde. Nga nang enggecdeu yofi degecde, ‘Kebuac kpacfu ngic hade, ye kenehagoc.’ (*Mitiyegec 118:26*) ifi degecde, naso imohai ngeneng monggoc nengecde.”

24

¹ Yesungo womonnunac mamanu medacfora yeneng yearu hama womonggac mana kuneng hania hania edzahegec ² yeng yofi edeyunuec, “Wiac imoc yaguc hendacdae, imoc ine ngade yofi fingerude. Foracngoc, areng mong yeneng hama imoc sasawa hembarackedacgec kendarude. Kendaru hoc mongngo monggac witiu mi wagec tarude.” Ifi dema ³ Yesungo Oriwa tikiu kemma taru medacfora tembuengina yearu kemma kpesimigec, “Ge yoac dedang imoc noc nasou fingerude? Nga naso wisic wisickea amma geangga hahanasogau noc soi fingerude, imoc edenununa.”

⁴ Ifi degec Yesungo meremma yofi deec, “Ngic mongngo ikocfu wangecngunubacac ngeni henghomema kecbisia. ⁵ Imoc yofiac, ngic homac yeneng hama neac kpac kpacma degecde, ‘Ni Messiah.’ ifi dema ngicngac homac uba mesufu ayemmegecde.

⁶ Nga ewekpekpetoaac siduc bangec wegeunaac nga bangec hereaunac hau ngeni imoc negemma mi kpidohobisia. Wiac ifia fingecbeso nga nasongo imohaingoc bic mi wisickeude. ⁷ Bangec goa yeneng bangec ogofocngina yenigoc ewekpekpe anggecde. Nga ngictau monggac arengngo ngictau monggac areng yenigoc ngaba angemegecde. Nga boditoa bangec goau fingerude nga goau usoctoa meude. ⁸ Wiac gboria hanahema fingerudeac gadze kiande, ifi isoc ande.

⁹ Ifi fingeru ngicngac yeneng ngeni ngabafocnginaac mariu faingunugecde. Faingunugec ngaba yeneng ngunuma homecfu faingunugecde. Nga bangeha bangehaac ngicngac sasawa yeni neac kpacnaac amma ubango ukungunugecde. ¹⁰ Nga ngicngac homac yeni negemmanggang amma wanuma yenaocngoc ogofocngina ngaba yeneac mariu faiemegecde nga ubango ukumegecde. ¹¹ Nga profete ikoha homacngoc fingecma ngicngac homac ikocfu wangecnyunugecde. ¹² Singyoac wawa faka imoc yadiude imoc ngicngac homac yeneac heresongogoc negengemeeme nga hoangemefaka nomaneude. ¹³ Nga ngic mongngo serima kecmanu naso wisickeude, yeng komoc kpeude. ¹⁴ Nga ngicngac yeneng eucererenggac siduc gombung yomoc edeyunugec dedekperagi imoc bangec sasawa sokodaru ngicngac yeni imoc negendacmagec naso wisickeude.

¹⁵ Profete Danierengo wiac mangac manganea imocac yoac warac deec, imocnggo ama kpetiacfu nanu henggecde. Ngic mong ye yoac yomoc osoude, yeng imoc negentegecbeso. ^(Danie 9:27; 11:31; 12:11-13) ¹⁶ Faka imoc fingeru ngicngac Yudaia bangecfu kecdae, ngeni worama tikiu embisia. ¹⁷ Nga mong ye ama witiau nande, ye wiac mong meudeac ama manau mi embeso. ¹⁸ Nga mong ye semeng uau nande, ye ngakpi hereha meudeac mi dzigenebeso. ¹⁹ Ngac heregoc kecdae nga nenggac sabac namuu meyunukedae, yeni naso imohai ebicnginagoc anggecde. ²⁰ Nga ngeni woragecdeac naso haude, imoc nomannasou me sabatanasou mi fingerudeac numubisia.

^{‡ 23:35:} Kaing ye hanac hanaheau munea Abe kpehomeec. Fingec fingec 4:1-10. Ngictau Yoasi ye profete Dzekaria kpehomeec. 2 Ngictau siduc 24:17-27. 2 Ngictau siduc imoc Yuda yeneac mitikibiu wisic wisickea nande. Imoc Yesungo yofi deec, “Abeac sacfunac erekecm Barakiaac medac Dzekaraia sac imohai erede.”

²¹ Naso imohai kpenzeng kuneng yombong fingerude. Kpenzeng ifia bangec hanac hanaheaunacngoc erekcma yofinenggac mong mi fingerec amma ngade ifingoc mi fingecbesande. ²² Nga uameme imoc mi mewegenegecde isoc ngic mongngo komoc naric mi kpeude. Amma ngicngac isingyunuyunu, ngeneac amma naso mewegenegecde.

²³ Naso imohai yoac mong yofi fingerude, ‘Henggec, Messia yei fingecde.’ me ‘Messia ye edi fingecde.’ Ifi degecde isoc ngeni mi negensingyunubisia. ²⁴ Imoc yofiac, Messia ikoha nga profete ikoha yeneng fingecma ngicngac uba mesufu ayem-megecdeac tobangyunuma faka morora nga faka kuhagoc engena megecde. Amma yeni sing meficgegecdeu ngicngac isingyunuyunu ifingoc ikocfu wangecyunugecde. ²⁵ Negenggec, ni faka imoc fingerudeac bic edengunuba negendae. ²⁶ Ngicngac goa yeneng yofi degecde, ‘Henggec, ye bangec kisiu kecde.’ Ifi degecdeu ngeni ihai mi kembisia. Me yofi degecde, ‘Ye yei ama manabisicfu tacde.’ Ifi degecdeu ngeni imoc mi negensingebisia. ²⁷ Piratacngo wenac ere ereaunac heima wenac keme kemeau kpesiande. Nga Ngicac Medac haude, naso imohai siriha imocacsoc fingerude. ²⁸ Koec koec neng yeni fareng fede, imohai eacanda.

²⁹ Anu kpenzengtoa nasoya wisickeuguc wenackiwa kundung kpeu afokperagia mi fingerude. Asomeng yeni kurumennunac fo-tockema magec kurumenga kurumenga yeneac kuc sasawa kpemindzahegecde. (*Yesaia 13:10; 34:4*)

³⁰ Imohai Ngicac Medacac soi sawakebangau fingeru bangeha bangeha ngicngac sasawa yeni imoc hemma kiacsonggong anggecde. Ifi ammagec Ngicac Medacngo kurumenggac hoennu kuc nga kibikperagitoagoc hau henggecde. ³¹ Nga trampet udumengtoa kuneng fingecmanu ye angerofora sueyunuu yeneng kurumenga kurumenga noboc noboc amma bangec tegia noboc noboc 4 imohai kemma Kebu yengenaoc ngicngac meisingyunuec, yeni kpedzucyuniugecde.

³² Fig icngo hania edekpou angemmeu ngeni imoc negembisia. Fawa firitickema besaiu ngicngac yofi negengandae, wenac naso ande. ³³ Nga wiac sasawa dedua, imoc fingeru ngeni imoc hemma ifingoc negembisia, Ngicac Medacac naso imoc bic wegenema hade amma ye nagu ngadeau nande.

³⁴ Foracngoc, areng yomoc ngeni mi homemagec wiac yomoc fingecdarude. ³⁵ Fingeru bangec nga kurumeng kpac anecde nga neac yoac, imoc ine mi kpac anude. ³⁶ Faka imoc noc uamemeu amma auanofu fingerude, imoc mongngo mi negenude. Kurumenggac angero yeni imoc mi negendae nga Medacngo ifingoc mi negende. Manggacngosac naso imoc negende.

³⁷ Noaac nasou faka fingerec, Ngicac Medacngo hau faka siriha imocngoc fingerude. ³⁸ Kiatungbaung mi hamantu ngicngac yeneng nenedoku nema ngic yeni ngacf u kenggec nga manggac yeneng yofi degec, ‘Ni naroanna ngic mibade.’ ifi angkecmagec Noango wageu enec. ³⁹ Enu yeni mi negemma kecmagec kiatungbaungtoango hama merucyuniudarec. Ngicac Medacac hahanasou faka ifiangoc fingerude. ⁴⁰ Naso imohai ngic yohockang semeng uau kecmaec yerearunac mong mema mong ine wagec uau kefude. ⁴¹ Ngac yohockang yeri flawa amau namma flawa medzamema kecmaec yerearunac mong mema mong ine wagec nanude.

⁴² Kebunginango noc uamemeac haude, ngeni imoc mi negendaeac amma ubagbori kecbisia. ⁴³ Hamangecngic ye ama hetackema engande. Nga ama mingina mong ye hamangecngic noc nasou haude negendeu ye gaugbori kecma amea garenggekecma hamangecngic imoc kpae heimiude. ⁴⁴ Imocac ngeni ifingoc efaima kecbisia. Ngicac Medacac aua ngeni mi negemmagec haude.

⁴⁵ Wanacngic mongngo negen negentegehagoc kefec. Nga minginango ye wanacngic ogofora yeneac gareng amma yakangina nasoyau modacma yemmeudeac demiec. ⁴⁶ Ye ua demi demia imoc medaru minginango hama henu naric anude, ye kenehagoc.

⁴⁷ Foracngoc, yeac minginango wiara sasawa garenggeudeac demiude. Ngeni siriha imocacsoc kecbisia.

⁴⁸ Nga wanacngic mangana, ye ine yengenaoc negensiude, ‘Ni minginna naso herea kecmaguc haude.’ ⁴⁹ Ifi dema wanacngic ye ogofora yunuma minggong ngic, yenigoc doku seria neude. ⁵⁰ Ifi amma tomai mi kecma wanacngic yeng minginaac uamemenaso nga auaya mi negemmanu minginango haude. ⁵¹ Hama wanacngic imoc kpema herec kperecge heima ngic ikoha yenigoc faiude. Nga yeni ihai kiacma enacngina kisaranggema kecgecde.”

25

¹ “Kurumenggac eucerereng imoc yofi isoc anude. Naroang 10 yeni kifangina memeturang ngic yegoc meficiemegecdeac sinnu kengjec. ² Yenearunac naroang 5 yeni mi irec ireckea nga 5 yeni negen negengnginagoc. ³ Naroang mi ireckegec, yeni kifangina memeturang ngicnko bic mi hau naroang sasawango kicngina gau anu gau fegec. ⁶ Femagec tofocnac dzongiau kpakpac mong yofi fingerec, ‘Negenggec, memeturang ngic hade, ngeni kemma yegoc eacgec.’ ⁷ Ifi fingeru naroang 10 yeni gauunac gborima yacma kifangina memengere amma ⁸ naroang negen negengngina mi irec ireckea, yeneng negen negenggoc yeneac degec, ‘Kifanina bokobeso andeac ngeni doku mong kisinemmec.’ ⁹ Ifi degec naroang negen negenggoc, yeneng merengyemmemma yofi edeyunuguec, ‘Doku yomocnko nenanggacsoc kpac. Imocac ngeni ine kifadokuya faiandae, yenearu kemma bummegec.’ ¹⁰ Ifi degec, yeni kifadoku bummebesonga kemmagec memeturang ngicnko haec. Hau naroang efaigecmoc, yeni yegoc memeturanggac amau enggec. Emma nagu ukugec kpeu imohai nenesemeng nesogai amma tacgec. ¹¹ Tacmagec ngade ngac tosea yeneng hasikema degec, ‘Kebu, Kebu, nagu witinemmena ereni.’ ¹² Ifi degec, yeng edeyunuec, ‘Foracngoc, ni kicrurungngunudiae.’ ¹³ Ngeni wenac nga aua mi negendae, imocac amma ngeni ubagbori kecbisia.

¹⁴ Imohai faka siriha yofi fingerude. Ngic mongngo bangec monnu kenudeac wanacngicfora kpacyunuma dzofinaha yeneac mariu faima kenudeac negenec. ¹⁵ Ye dzo garenggegecdeac kucnginaac siriha yofi hendzicma yemmeec. Ye ngic mong tarantong dzo 5 nga mong tarantong dzo yohockang amma mong tarantong dzo mocgu,* dzo ifi yemmemma kenec. ¹⁶ Kenu ngic tarantong dzo 5 meec, ye imohaingoc kemma emekpesi uaya mema tarantong dzo 5 torokpema meficeg. ¹⁷ Nga ngic tarantong dzo yohockang meec, ye ifingoc kemma emekpesi uaya mema yohockang torokpema meficeg. ¹⁸ Nga ngic tarantong dzo mocgu meec, yeng ine kemma mingina dzo miec, imoc mema bangec usuma tonggoma mesufuec.

¹⁹ Anu minginnginango naso herea kecma monggoc dzigene hama dzo yemmeec, imocac turunga kpoumigecdeac kpacyunuec. ²⁰ Kpacyunu ngic tarantong dzo 5 meec, yeng tarantong dzo 5 mong momoc mekemma deec, ‘Kunenna, ge tarantong dzo 5 nenna ni emekpesi uaya mema 5 monggoc torokpema meficegedua.’ Ifi deu ²¹ minginango yofi edeec, ‘Wanacngic gombunga yombong. Ge fakaga dindingac amma yoac modac modacfakaga soronga. Nga geng yoac modacma wiac kapia kpacgoc garenggedanggac wiac ebiriangoc garenggenadeac faigubade. Hana kunenggaac sogac sogaiu nerahafoc kecde.’ ²² Nga ngic tarantong dzo yohockang meec, yeng ifingoc hama deec, ‘Kunenna, ge tarantong dzo yohockang nenna ni emekpesi uaya mema tarantong dzo yohockang monggoc torokpema meficegedua.’ Ifi deu ²³ minginango yofi edeec, ‘Wanacngic gombunga yombong. Ge fakaga dindingac amma yoac modac modacfakaga soronga. Nga geng yoac modacma wiac kapia kpacgoc garenggedanggac wiac ebiriangoc garenggenadeac faigubade. Hana kunenggaac sogac sogaiu nerahafoc kecde.’

²⁴ Nga ngic tarantong dzo mocgu meec, yeng ifingoc hama deec, ‘Kunenna, ge ngic gerea, imoc negendiae. Amma uau wiac heihomec mi amma foraya kpedzianne.

* 25:15: Tarantong dzo mocgu imoc kifa 15gac uabung.

amma gbomea mong mi kpegima sifu foraya mesianne. ²⁵ Imocac kenegecnuu kemma tarantong dzoga bangecfu tonggoba feec wiacga imoc monggoc merenggenduae.' ²⁶ Ifi deu minginango yoara turunga yofi meremmiec, 'Ge wanacngic mangana amma oyonga. Ni uau heihomec mi amma foraya kpedzianduae amma gbomea mi kpegima sifu foraya mesianduae, geng imoc bic negennec. ²⁷ Ge imoc negemma dzona dzo tohonnu faina heikpegumekcgec saheu neng dzigenema dzona imoc nobohagoc mebai. ²⁸ Imocac ngeni tarantong dzo yearunac wangecma ngic tarantong dzo teng mekecde, ye migec. ²⁹ Ngic mong ye wiac mekecde, ye monggoc migec homac ebiriangoc anude. Nga mong ye wiac mi mekecde, yearunac wiac mekecdemoc, imoc ifingoc wangecgecde. ³⁰ Wanacngic uaya gombunga mi medac, ngeni ine ye mema ngadeau kundunnu ukugec kemebeso. Ihai kecdae, yeni kiacma enacngina kisaranggema kecgecde.'

³¹ Kecma Ngicac Medacngo kuc nga kibikperagiagoc nga angero sasawa yenigoc hasikegecde, naso imohai ye ngictau tataha kibikperagiagoc ihai emma tacbesande. ³² Amma ye bangeha bangehaac ngicngac sasawa deu hama yeac kicfu kpedzucnedacgecde. Kpedzucnegec garengngo rama nga noning medereyunuande, yeng naso imohai ifi isocngoc medereyunuma ³³ rama foiugeng nga noning ine kanaugeng faiyunuude. ³⁴ Ifi amma ngictaungo ngicngac foiugeng yofi edeyunuude, 'Ngicngac Man-naac kenecgoc, ngeni yei hagec. Ngeni maridzoming nga amabangecngina megec, imoc bicngoc bangec hanahema fingerecfunac ngeneac negemma faifaia. ³⁵ Ni yakaac homeba ngeni yaka nenggoc nga dokuac anenu doku nenggoc neai. Nga kuriha kecbare ngeneng nenggareng anenggoc. ³⁶ Ni wambaac obohoba ngeneng wamba heinenggoc. Amma hafei febare ngeni hama wirinugec. Nga witicamau kecbare ngeneng yugucnugec.' ³⁷ Ifi deu ngicngac dindingac yeneng yoac yofi meremmigecde, 'Kebu, ge noc nasou yakaac anggenu gemma gumecguing me noc nasou dokuac anggenu gumecguing?' ³⁸ Amma noc nasou kuric hana enggareng anggening me wambaac obohona gening?' ³⁹ Amma noc nasaoc hafei me witicamau tacmana gemma yugucguing?' ⁴⁰ Ifi degec ngictaungo yofi edeyunuude, 'Foracngoc, ngeni munafocna kapiabisic yenearunac mocgunec ubangerec ammigec, imocacsoc ninoc anenggoc.' imoc edengunuduae.

⁴¹ Ifi dema kanaugeng nanggecde, yeneac yoac yofi edeyunuude, 'Ngicngac sowecnungununya, ngeni wanuma gerec wisic wisickeu kpac, imohai kemma kecbisia. Imoc mangana mingina nga angerofora, yeneac amma dzema fede. ⁴² Ni yakaac homeba ngeni yaka mong mi nenggoc nga dokuac anenu ngeni doku mong mi nenggoc neai. ⁴³ Nga ni kuric hama kecbare ngeni nenggareng mong mi anenggoc nga wambana kpac kecbare mong mi heinenggoc. Ni hafei anenec nga witicamau febare ngeni mi yugucnugec.' ⁴⁴ Ifi edeyunuuyeneng degecde, 'Kebu, ge noc nasou nenedokuga kpac me wambaga kpac amma kuric kecmanna neni gemma ihoc bahoc aning? Me dahai hafeiamau me witicamau femana gemma ihoc bahoc anggening?' ⁴⁵ Ifi degec yeng yofi edeyunuude, 'Foracngoc, ngeni munafocna kapiabisic yenearunac mocgunec ubangerec mi ammigec, imoc ifingoc ni mi anenggoc, imoc edengunuduae.' ⁴⁶ Nga yeneng kopocsic turunga kpendzeng nasoya kpac kpekecbesandaec kenggecde. Nga areng dindingac yeneng kekecseriu enggecde."

26

¹ Yesungo yoac imoc sasawa dedaru wisickeu medacfora yofi edeyunuec, ² "Uameme yohockang femanu makekeng nassimocac hombang ammanu imohaingoc ngic yeneng Ngicac Medac mariponnu kpegecdeac demeseri amma suegecde."

³ Anu womong gareng enara nga yudangic yeneac enarafocngina, yeneng womong garengtoa kpara Kaifa, yeac amaodayagocfu endacma ⁴ Yesu akikic mema kpegecdeac dekirie amma ⁵ yofi degec, "Ngicngac botucnginai dzikac sicsauc fingecbacac ye hombang nasou mi mebesonga."

⁶ Anu Yesungo Betania amau Simong kukuseriagoc, yeac amau yaka netarec. ⁷ Netacmanu ngac mongngo yearu kemma, kirung mong arabastro hocngomea, imocac kerecdokuya homung kerengagocngoyeac orucfu kpakema nadzicmiec. ⁸ Nadzicmiu medac yeneng imoc hemma kerecdoku buma yada anecac dehesi ammigec, “Ye nocac wiac buma engena imoc kpedzonggede?” ⁹ Imocngodozohomakirecgeungicmakpekpeayemmeni ngereebac.” ¹⁰ Ifidegec Yesungo imoc negemma yofi edeyunuec, “Ngeninocac ngacac ifi dema ubaebic meficgemidae. Ye faka gombunga nearumu ngereede. ¹¹ Ngicmakpekpea yeni nasosoc ngenigoc kecgecde nga neng ine ngenigoc nasosoc mi kecbade. ¹² Ni homeba tonggonugede, ye imocac sebina mengerema bic nadzicnende. ¹³ Foracngoc, ngic yenisiduc gombung yomoc bangehabangeha kemma dekperagigecde, imohai yeng ifi anec, imoc ifingoc degec negenggoc feude.”

¹⁴ Anu medacfora 12 yeneearunac mong Yuda Karioto amaunac degec, yeng womong gareng enara yeneearu kemma ¹⁵ kpesiyemmeec, “Neng Yesu maringinau faibadeu dzo dafiguc nenggecdeac negendae?” Kpesiyemmeu yeneeng siriwa dzo 30 osoma migec. ¹⁶ Migec, yeng Yesu naso damohai doc meu megecdedahemmodacma kefec.

¹⁷ Kecma ic sogong yis kpac, hombang imocac hanac hanaheau medac yeni Yesuarukemmapkesimigec, “Neniama dahai kemma makekenggac ramamedaha mengerema ohonenideac negennec?” (*Makekeng 12; Dedeseri 16:1-8*) * ¹⁸ Ifidegec Yesungo yofi deec, “Ngenitaonnu emma ngic imoc hemma yofi edebisia, ‘Kpoukpouninango geac yofi dede, nasonawegeneugearuhama ninga medacfocna neni gegoc makekenggac ramamedaha nenideac negenduae.’” ¹⁹ Nga Yesungo medacforayoac edeyunuec, imoc tofohodacma makekenggac ramamedaha ohomengere anggoc.

²⁰ Ama toforeu Yesungo medacfora 12 yeneigoc yaka netacma ²¹ yofi edeyunuec, “Foracngoc, ngeneearunac mongngo ngaba yeneac mariufainuude.” ²² Ifideu medacyeni ubangina homac manganeuyeneearunacmocgu mocgungokpesimigec, “Kebu imocsifuneng mi anduae, me?” ²³ Kpesimigec yeng yofi deec, “Ngicnigoc kurungterauic sogong nemuruckedic, yennoc doc faiumenugede. ²⁴ Ngic ye Ngicac Medac docmeude, ye sowehagoc. Ye nonggeaac here manaunac mi fingecbac dedeefaimibac. Nga Ngicac Medac neac negemma mitikibiu yoac yofi ohoohoya fede, yeng wangunumakenudenoc.” ²⁵ Ifideu Yudango Yesu docfufaiudeac negenecmoc, yeng ifingokpesimie, “Kpoukpou, ge neac denec me?” Deu Yesungo yofi edeec, “Ge geanggaoc imocnockedenec.”

²⁶ Anu yeni yaka nemagec Yesungo ic sogong mong mema Anutuac ubangerecdema mendzicma medacforayofi dema yemmeec, “Ngenimema negec, yomoc fusina.” ²⁷⁻²⁸ Ifidemakakenecmongmemaanutuacubangerecammima numumimayofi dema yemmeec, “Yomocngodzadzahac gboriaacsacna, imoc ngicngachomacyeneakkopocsikkpac anudeak kpetinggea, imocac yeneasasawango imoc negec. ²⁹ Ni edengunuba negenggoc, wainggbomeaac dokuya monggoc minenekecbarengoc Mannaac eucererennuenenahafoc sing gboriaac arenunnenide.” ³⁰ Nga yeni ubangerecyegcheimaamaunac mamaedibigeng Oriwatieng.

³¹ Sinnukemmapkesimigec Yesungo yofi edeyunuec, “Tofocnac yomohaingenisasawango neac negemma makpema wanudacgecde. Faka imocac yofi ohoohoya fede,

‘Ni gareng kpeba ramahabu yenisinsararang kpegecde.’ (*Dzekaraia 13:7*)

³² Nga homecfunacyacmaguc waraingemmema Gariraia bangecfu kembangenihabisia.” ³³ Ifideu Petorongo edeec, “Goya yenisasawa geac ifidemawagugecde nga nengine naric mi wagubade.” ³⁴ Ifideu yofi edeec, “Ni forangoc edeguba, tofocnacyomohai kokorecmi arohomanugeng sebiheinenna atac harebec anude.” ³⁵ Deu deec, “Geguma nubesodegecsebinaric mi heibade.” Petorongo ifideu medacforameficgema imocngoc dedacgec.

* ^{26:17:} Naso imohai yis mi feec. Yeni flawa esea dokuyagoc homunagoc bic anec imoc flawa gborigoc yerecgegefawa yadie. Imocngoyisac ua meec.

³⁶ Anu Yesungo kengkecma ua bangec mong kpara Gedzemane, ihai kensikema medacfora yofi edeyunuec, “Ngeni yei tacmagec ni edi kemma numubade.” ³⁷ Ifi dema Petoro nga Dzebedaio medahora meyunuu kenggec. Kemma Yesungo ubaebictoa yombong memanu dzonoma fedeu ³⁸ yofi edeyunuec, “Ubaongana ebiriyombonggeu homebeso anende, imocac ngeni yei nigoc ubagbori tacmina.” ³⁹ Ifi dema kpesima kemma kicmesuya bangecfu hetutuckema yofi numuec, “Manna, negenna angana andeu ge kpakenec yomoc meickena feracnuu. Amma neac songo kpac, geac songo nga negen negeng imocngo seribeso.”

⁴⁰ Ye ifi numuma medac yenearu dzigene kemma yenenu gau fegec. Gau fegec yenemma Petoro yofi edeec, “Ngeni sifu aua mocguacsoc nigoc gaugbori kecgec. ⁴¹ Ngeni faitobannu embauac ubagbori kecma numugec. Foracngoc, ongaasungo efaiande nga sebingo ine ebiriude.” ⁴² Nga ye monggoc kemma yofi numuec, “Manggacna, kpakenec yomocngo feracnuudeac negenna mi ngereeu imoc nebare geac yoac seribeso.” ⁴³ Ifi numuma hama henu medacfora yeni kicngina gaungoc anu fegec. Femagec yenemma ⁴⁴ monggoc wayunu kemma numuu atac harebec anu yoac warac deec, imocngoc dema numuec. ⁴⁵ Numudacma medac yenearu dzigene hama yofi edeyunuec, “Ngeni gaungoc fema kecdae, imoc naric kpac. Naso wegenede, ngic yeni Ngicac Medac kererema kopocsicmeme yeneac mariu faigecde. ⁴⁶ Benukererec ngicngo hadeac amma yacgec kenni.”

⁴⁷ Ye ifi dema nammanu medac 12 yenearunac ogongina Yuda, yeng ngichabutoa kuneng yombong enara waraiyemmeu hagec. Womong gareng enara nga yudangic enarafocngina yeneng sueyunugec wasaibeang nga gbarucnginagoc hasikegec.

⁴⁸ Sikegec benukererec ngic yeng waraima faka anudeac derec derecgeyoac yofi bic edeyunuec, “Ngic titikokoc ammibade, ngeni ngic imocnog mendanggema mebisia.”

⁴⁹ Ifi dema yeng imohaingoc Yesuaru kemma, “Ohec, kpoukpou.” ifi dema titikokoc ammiec. ⁵⁰ Ifi ammiu Yesungo yofi edeec, “Ogo, ge noc ua menadeac yei hadang?” Deu yeni hama Yesu maria noboc noboc mema mendanggegec.

⁵¹ Anu ngic Yesugoc kecgec, yenearunac mongngo wasaibeanga kpedzima womong garengtoa yeac wanacngic kpema kedzaha noboc herecgeec. ⁵² Herecgeu mau Yesungo yofi edeec, “Ngic mong ye dzikac kpeude turunga dzikacngoc kiude, imoc fingecgembacac wasaibeangga ameau monggoc faina kemeu. ⁵³ Neac memeficsing mong mi feder, imoc negemma ifi annec. Nga Manna yagucnoc numumibai dede yeng angero kpetengina 6 tauseng arenga 12, angero habutoa ifia naric sueyunuu mama meficnubau. ⁵⁴ Nga meficnubau dede mitikibiu faka yomoc fingerudeac oho ohoya feder, imoc fora mi fingecbac.”

⁵⁵ Ifi dema ngichabu yofi edeyunuec, “Ngeni mendannuma godzungic meandae, ifi isoc wasaibeang nga gbarucnginagoc hadae. Nga ni wenaha wenaha Anutuac womonnu edekpou angemmema kecanduae, imohai ine naric menubau. ⁵⁶ Amma yoc ine profete yeni mitikibiu yoac ohogec feder, imoc fora fingerudeac imoc sasawa fingecdacde.”

Ifi deu medacfora sasawango Yesu wama woradacgec.

⁵⁷ Anu mitiac negengngic nga yudangic enarafocngina yeni womong garengtoa Kaifa yeac amau bic kpedzuncnema tacgec, ihai Yesu wangecma kenggec. ⁵⁸ Yeni Yesu mendanggema ifi mekemmagec Petorongo ngadenginau hereaungoc Yesu modacma kenec. Kensikema, Yesuac yoac desigecde, imoc negenudeac womong garengtoaac ammocac oda manau kemema uamedac yeneac botucfu matarec.

⁵⁹ Anu womong gareng enara nga yudangic tutumangtoaac memba yeni hafoangoc tacma Yesu homecfu faigecde nga ye enacfufaifai ammima boi anggecdeac negengising anggec. ⁶⁰ Ifi anggec ngic homacngi hama enacfufaifaiyoac degec, imocngi Yesu homecfu faigecdeacsoc mi anu hofocmangoc kecma ngic yohockang yereng fingecma boi amma deoc, ⁶¹ “Yesungo yofi deec, ‘Ni Anutuac womong hembarackema uameme harebec ammanu monggoc mebade, ni kucna imocacsoc feder.’” ⁶² Ifi deec womong garengtoango yacma Yesu kpесimie, “Geac yoac dedae, imocac noboha mong mi

denade me?”⁶³ Ifi deu Yesungo ine waickema nanec. Nanu womong garengtoango edeec, “Anutu kekec mingina, yeac kicfu kpesigemba ge deserina, geng Messia Anutuac medac me kpac, imoc edenununa.”⁶⁴ Ifi deu yeng meremma yofi edeec, “Imoc gennoc denec. Nga edengunuba negenggec, yaguc nga namma enude Ngicac Medacngo Kuctoa Minginaac foiaugeng tarude. Amma ye kurumenggac hoeng witiau hau ngeni imoc henggecede.”⁶⁵

(Mityegec 110:1;

Danie 7:13-14)⁶⁶ Ifi deu womong garengtoango yoac imoc negemmanganema wambaya membarackema yofi deec, “Ye Anutu bic emmidacac yoacninaac boingicac monggoc mi obohonide.⁶⁶ Ngeneng yoac imoc negemma dafi dedae?” Deu yeneng meremmigec, “Ye homeudeac arenoc.”

⁶⁷ Ifi dema yeni Yesu kicmesuya sofohoma mari tuema kpekpefac ammigec nga goa yeneng dzikacngo kpema⁶⁸ degec, “Messia, merang gudac, imocac kpefingyoac edenununa.”

⁶⁹ Ifi amma kecmagec Petorongo oda manau ama sobennu tarec. Tacmanu wanac naroang mongngo yearu kemma deec, “Ge gariraiangicnoc Yesugoc kecannec.”⁷⁰ Deu ye ngic sasawa tacgec, yeneac kicfu sebi heima deec, “Ge yoac denec, imoc obohoduae.”⁷¹

Ifi dema naguu kemmanu wanac naroang mongngo hemma ngicngac ihai nanggec, yeni edeyunuec, “Ngic imoc ye Yesu Nadzarenac, yegoc kecandenoc.”⁷² Edeyunu Petorongo Anutuac kicfu serima monggoc busickpema deec, “Ni ngic imoc mi negenduae.”⁷³ Ifi dema nammanu ngic yeneng Petoroaru kemma degec, “Neni ubadzidziga negendimbe, ge foracngoc yeneac arenunac.”⁷⁴ Edegec ye yengenaoc sowecemema sopecemema deec, “Ni ngic imoc mi negemmiduae.” Deu imohaingoc kokorecngo arohoec.⁷⁵ Nga Yesungo yoac yofi bic edeec, “Kokorecngo mi arohomanu geng ni mi negennunec dema sebiheina atac harebec anude.” Petorongo yoac imoc negensima kemema ubahodung kuneng negemma kiac hodung kiarec.

27

¹ Ama wereckenu womong gareng enara nga yudangic enarafocngina yeni uba mocgu amma Yesu homeudeac deserigec. ² Deserima Yesu maria dedeckema Yudaia bangecac gawana Pirato, yearumekemma yeac mariu faigec.

³ Anu Yesu homeudeac deserigec, Yuda benukererec ngicngo imoc hemma deec, “Ni nocac ifi andua?” Ifi dema ubea manganeu siriwa dzo 30 migec, imoc mekemma womong gareng enara nga yudangic enarafocngina yeni monggoc merengyemmem⁴ edeyunuec, “Negenggec, ni kererema ngic kopocsiha kpac, ye sac nadzicmai.”* Ifi deu yeneng degec, “Imoc neneac ebic kpac, imoc geac ebic.”⁵ Yeni ifi dema dzo wagec, yeng imoc mekemma womannu ukuu enu wama kemma ubasac neec.⁶ Nga womong gareng enara yeneng siriwa dzo imoc kpedzucnema degec, “Dzo imocngoc sac bummeec. Imocac amma dzo imoc sesekatapau faifai, imoc singngo mi dede.”⁷ Dema yeni yoac dedzege amma dzo imocngko kuric yeneac kicsere fingerudeac enang kudzimemengic yeac ua bangec bummegec.⁸ Bummegec bangec imocac kpara Sacbangec hanahema degec nga imoc yaguc fedengoc.⁹⁻¹⁰ Profete Yeremiango yoac yofi deec, imoc imohai foragoc anec, “Faka yofi fingerudeac Kebungo edenuec, Israe medacfora yeni ngic imocac buma kpetea faima, “Ye siriwa dzo 30 imocacsoc.” ifi degec. Nga yeni dzo imoc mema imocngco enang kudzimemengic yeac ua bangec bummegec.’”†

¹¹ Anu yeni Yesu mekemma gawanaac kicfu faigec nammanu yeng kpesimiec, “Ge yudangic yeneac ngictau me?” Ifi deu Yesungo yofi meremmiel, “Imocnog geanggaoc denec.”¹² Anu womong gareng enara nga yudangic enarafocngina yeneng namma haniaya degec Yesungo yoac turunga mong mi merengyemmu¹³ Piratongo kpesimiec, “Yeni yoacf faiguma yoac homac yombong dedae, ge imoc mi negennec me?”¹⁴ Deu yeng yoac monnec mong mi merenu gawanango kerectegec yombong anec.

* 27:4: Dedeseri 27:25 yofi dede, ngic mong ye dzo mema mong kpehomeu sac kpetinggeude, ye sowehagoc anude.

† 27:9-10: Mataio ye Yeremia 32:6-9 nga Dzekaria 11:12-13 kpeturanggema deec.

¹⁵ Anu gawanango hombannu yofi angkefec, yuda ngichabu yeni witicngic monggac kpara kpacgec, yeng ngic imoc yungeru witicamaunac maande. ¹⁶ Naso imohai godzungic kpara kekena mong witicamau kefec, kpara Baraba. ¹⁷ Nga ngicngac kpedzucnedacma nammagec Piratongo yofi kpesiyemmeec, “Merac yungecngemmabadeac negendae, Baraba me Yesu, kpara mong Kristo deandae?” ¹⁸ Yudangic yeni Yesu eng keracmangang ammima yearu faigec, imoc negemmanoc ifi deec.

¹⁹ Nga Pirato ye desi desi tatahau tacmanu enemango yearu yoac yofi faiu kenec, “Ge ngic kpetiac yomocac yoac mi kpreserena, imoc wana. Ni tofocnac fema gaukpefing hemma yeac amma ubaebic homac medua.” ²⁰ Nga womong gareng enara nga yudangic enarafocngina yeneng habu fenggeyemmegec yeneng Baraba yungecyemmeudeac degec nga Yesu ine kpehomegecdeac degec. ²¹ Nga gawanango kpesiyemmeec, “Ngic yohockang nandape yerearunac merac yungecngemmabadeac negendae?” ifi deu yeni imohaingoc degec, “Baraba.” ²² Ifi degec kpesiyemmeec, “Ifi anu Yesu, kpara mong Kristo deandae, yeac dafi ambade?” Kpesiyemmeu yeni sasawango degec, “Ye mariponnu kpena homeu.” ²³ Ifi degec, yeng kpesiyemmeec, “Imoc dafiac nga noc kopocsicac?” Ifi deu yeni arohomumunggema degec, “Ye mariponnu kpebesonga.”

²⁴ Ifi dema nanggec hemma Piratongo yoac dindingac deudeac obohoec. Nga yeni ine serima kpacma nanggec kpeborongtoa hanahema fingeru yeng doku mema ngicngac habutoa kicnginai namma maria dzuacma yofi deec, “Ngic yomocac sacac kopocsic, imocngo nearu mi tacbeso, imoc ngenearu febeso.” ²⁵ Ifi deu ngicngac yeni sasawango yoara meremma degec, “Yeac sacac kopocsicngo nenii nga nambaracfocnina nenearu febeso.” ²⁶ Nga Pirato ye Baraba yungecyemmem Yesu ine dzikacngko kpema mariponnu kpegecdeac wasaingic maringinai wayemmeec.

²⁷ Anu gawanaac wasaingicfora yeneng Yesu ama manaunac memama ama tegiau wasaingic oda manau kecanda, imohai meemma wasaiareng sasawa hafoangoc kpedzucnegec. ²⁸ Kpedzucnedacma Yesu yengena wamba hesimima ngakpi mong kpauc kpauc heimigec kemeu ²⁹ somang batihema oruhau heimigec kemee. Kemeu yasu mong memigec marifoango mema nanec. Ifi amma kiwaufafoc heima defagoc ammigec, “Ohec, yudangic yeneac ngictau.” ³⁰ Amma yeni sofohoma yasu wangeclma imocngo oruhau kpegec. ³¹ Defagoc ammikecgec wisickeu yenang ngakpi hesimima yengena wamba monggoc heimigec kemeu mariponnu kpegecdeac hesicke kenggec.

³² Mekemma sinnu ngic mong meficegec, kpara Simong, Kirene taonnunac, yeng Yesuac maripong tofohoudeac ngombonggegec tofohou kenggec. ³³ Kengkecma bangec buma mong kpara Gorigata, kpara mong Hasic degec, ihai kensikegec. ³⁴ Kensikema waing doku wiac hodungagocngo yerec yerecgea, imoc gumegec ye imoc nene gemma waec. ³⁵ Nga yeni ye mariponnu kpegec nammanu wambaya kpeing kpema mederegec. (*Mitiyegec 22:18*) ³⁶ Ifi amma garenga tacgec. ³⁷ Nga ye nanu oruha witiau maripongau kopocsicac haniaya yofi ohogec, “Yomoc Yesu, yudangic yeneac ngictau.”

³⁸ Anu yeni godzungic yohockang yegoc momoc mariponnu yuruma mong foiugeng nga mong kanaugeng, ifi faiyurugec. ³⁹ Nga ngic ihai kengha anggec, yeni Yesu deengdema ammima orucngina kpatitickema ⁴⁰ degec, “Ge Anutuac womong hembarackema wenac harebec ammanu medacbesonga denec, ge geangga onggongemena. Nga Anutuac medac kecnece isoc mariponnunac mesiemema mana.” ⁴¹ Nga womong gareng enara nga mitiac nejen negengngic amma yudangic enarafocngina yeneng ifingoc desusuc ammigec, ⁴² “Ye ngic goa onggongyunukefec nga yengena ine naric mi onggongemeude. Ye israengic nenang ngictau kecdeu mariponnunac mesiemema mau ye negensinggenide. ⁴³ Ye yofi dema nejen negensinga Anutuaru faiec, ‘Ni Anutuac medac.’ ifi deu Anutungo yeac ammikecdeu mesibeso.” ⁴⁴ Nga godzungic yegoc momoc yurugec, yeri yoac siriha ifiangoc deendema ammio.

⁴⁵ Anu wenac dzongiau 12 kiroc ammanu imohai ama kundung kpema kundungngko bangec sokoma fekemmanu 3 kiroc marai anec. ⁴⁶ Nga 3 kiroc imohai Yesungo

ubaudumeng kunengngoc kpacma yofi deec, "Eri, Eri rema sabaktani." Imocac titiha yofi, Anutuna Anutuna, ge nocac wanudang? (Mitiyegec 22:1)

⁴⁷ Anu ngic nanggec, ynearunac goango negemma degec, "Ye Eria kpacsambic ammide." ⁴⁸ Ifi kparu ngic mongngo negemma gereagoc nedzima kemma kondung sobing mong mema waingdoku aengagocfu nemuruckema kpinnu faima Yesu gumeec. ⁴⁹ Nga goango ine degec, "Ngeni imoc wagec, Eria foracngoc hama meficgeu henni."

⁵⁰ Nga Yesungo monggoc ubaudumeng kunengngoc kparu asuya ereec. ⁵¹ Ereu homeec, imohaingoc Anutuac womonnu kpoructoa womongmana kpetiac yombong naguyau nanec, imocngo wihaenac botuhuangoc tohoma mama yohockang anec. Amma usoctoa meu fagannu hoctoa toa tohogec. ⁵² Nga kicsere fekenec, imoc anggeu ngic kpetiac warac homegec, ynearunac homacngo sebigoc gborigec. ⁵³ Yesungo kicsereunac gborima yaru yeni ngade kicserenginaunac erema taong kpetiac, imohai hama ngic homac fingecyemmegec. ⁵⁴ Nga wasaigareng nga ngicfora Yesuac gareng nanggec, yeni usoc nga wiac fingerec, imoc hemma damuyunuu wareckema degec, "Foracngoc, ngic yomoc ye Anutuac medacnoc."

⁵⁵ Nga Yesu kpegec, imohai ngac homacngo araing namma wiac hennegeng anggec. Yeni Gariraia bangefunac hanahema Yesu modacma hama kingang kpemigec, ⁵⁶ ynearunac ngac goa kpacngina yofi, Maria kpara mong Madara amma Maria mong, Yakobo nga Yosefe, yereac nongongira amma ngac mong Dzebedaioac medahora, yereac nongongira, yeneng ngachabu yenigoc nanggec.

⁵⁷ Anu Arimataia taonnunac ngic mong finactoayagoc, kpara Yosefe, yeng Yesuac yoac negemma yeac arenru ifingoc kefec. Ye ama toforebeso ammanu ⁵⁸ Piratoaru kemma Yesuac fareng meudeac kpesimie. Kpesimi Piratongo migecdeac deu wamigec. ⁵⁹ Wamigec Yosefengo Yesuac farenga mema linengkporuc mong kongaha, imoc mema imocngo tembonggema mekenec.‡ ⁶⁰ Mekemma yengena kicsere gboria dema hocsirau singa usu usuya feec, Yesuac fareng imohai faima hocyada mong kpedidinggeu kicsere naguya imocngo hedzickeu taru kenec. ⁶¹ Anu Maria Madara nga Maria ogea yereng kicsere naguya nonongkac ihaigeng fier kenu taroc.

⁶² Wereckengau sabata asoac anu womong gareng enara nga farisaio yeni kpeturanggema Piratoaru kemma ⁶³ degec, "Kunennina, ikocngic imocngo gbori kecmangoc, yoac mong deec, neni imoc negensidimbe, imoc edeguni negenna, 'Ni homema wenac harebec ammanu Anutungo homecfunac megborinuu monggoc yacobade.' ⁶⁴ Nga medacfora yeneng kemma farenga hamangec meworagec, ifi debauac, 'Ye homecfunac yacdac.' imocac ge kicsere garenggegecdeac edeyununa uameme harebec garenggebisia. Warac ikoc mong anec, imoc femanu ngadeac ikocngo witiau enu yadibacac imoc edegudimbe." ⁶⁵ Ifi degec Piratongo yofi edeyunuec, "Naric, wasaingic ngemmeba ngeni wangecyunu kemma kicsere garenggegecdeac kuc mekecdae, imocac siriha garenggebisia." ⁶⁶ Ifi deu yeni kemma kicsereac hocnagu mi kpedidinggegecdeac witiau kpae faigec. Faima wasaingic yeneng gareng nanggecdeac edeyunugec.

28

¹ Sabata naso wisikeu sonda gboria hanac hanaheau ama werec wereckengac Maria Madara amma Maria ogea, yeri kicsere hembesonga kenoc. ² Kemmaec Kebuac angelo mongngo kurumennunac mau usoctoa kucbiricngoc meu yeng kicsereac hoc kpedidinggeu kenu witiau emma tarec. ³ Tarec, ye siriha pirac pirac siric nga wambaya kongac kongac hoeng isoc. ⁴ Nga gareng yeneng ye hemma kengecyunu dzonongngina fedeu homebesonga amma fekenggec. ⁵ Nga ngac yeri kensikemaec angerongo yofi edeyuruec, "Ngeri mi kengecnguruu, ngeri Yesu mariponnu kpekpea, ye hembeso hadape, imoc negenduae. ⁶ Nga ye ine yei mi fede. Ye edengunuecmoc, ifi yacdac. Ngeri yoc hama fefea henec. ⁷ Ngereng imoc hemma bic kemma medacfora yofi edeyunuec,

‡ 27:59: Lineng imoc kpindzing mong ambiac ogea, imocngo wamba megec.

‘Yesungo homecfunac bic yacdac. Ye waraingemmema Gariraia bangecfu kenu ngeni ihai kemma meficegecde.’ Yoac imoc yagucnoc edenguruba negendape.”

⁸ Ifi anu yeri kicsere wama damu nga sogac sogaitoagoc medacfora siduc edeyunugecdeac nedzima bic kenoc. ⁹ Nedzi kemma Yesugoc ewacgec yeng yofi deec, “Wenacngerec.” ifi deu yeri hoangau ngonducnema haniau mema afeheoc. ¹⁰ Nga Yesungo yofi edeyuruec, “Ngeri mi kengecnguruu. Ngeri kemma tosofocna Gariraia bangecfu kenggecdeac edeyunuec, yeni ihai kemma nenggecde.”

¹¹ Anu ngahoc yeri kemmaec wasai ngichabu kicsere garenggeg yeneearunac goango taonnu emma wiac fingerec, imocac siduc womong gareng enara edeyunudacgec.

¹² Edeyunugec yeni yudangic enarafocngina yenigoc adzorogec. Adzoroma yoac deserima wasaingic kicsere garenggeg, yeni yoac degecdeac dzo imocacsoc yemmemma

¹³ yofi dema deracyunugec, “ ‘Neni tofocnac gau femina yeac medacfora yeneng hama farenga hamangec medau.’ ngeni ifi debisia. ¹⁴ Nga gawanango yoac imoc negemma wiac mong angemmebacac mi kengecngunubeso. Neneng demekiri naric amminide.” ¹⁵ Ifi dema edeyunugec wasaingic yeni dzo imoc mema yoac ede edeyunuya, imoc deyadigec. Ikocyaoacngina imocngo yudangic yenearu sokoma feecngo fedengoc.

¹⁶ Anu medac 11 yeni Gariraia bangecfu tiki mong Yesungo bic derecgeyemmeec, ihai enggec. ¹⁷ Emma yengena hemma afehegec nga ngic mocgu mocgungo ine ubayohoc anggec. ¹⁸ Nga Yesungo kicnginai hama yofi edeyunuec, “Negenggec, bangec nga kurumenggac kuc sasawa ni bic nendac nendara. ¹⁹ Imocac ngeni kemma ngicngacareng sasawa neac sing negemma yoac modac modacareng anggec ngeneng meyunuma yenenggareng ayemmebisia. Amma ngeneng Manggac nga Medac amma Tiri Asu yeac kpacf u doku nadzicyemmebisia. ²⁰ Nga neng yoac sasawa dederecge angemmekefai, ngeni imoc hafoangoc modacdacgecdeac kpouyemmebisia. Amma negendae, ni wenaha wenaha ngenigoc kecbare naso wisickebesande.”

Mareko Yeng Yesuac Siduc Gombung Ohoec

- ¹ Yomoc Yesu Kristo Anutuac Medac, yeac siduc gombung hanahema fingerec,
² imocac siduc. Profete Yesaiango yofi ohoec,
 “Negenna, ni siducededenasueba yeng waraigemma singga mengeregenude. (*Marekai 3:1*)
³ Nga bangec kisiu kpakpac mong yofi fingerude, ‘Ngeni KEBUAC sing wisima singa heitumeigec.’” (*Yesaia 40:3*)
⁴ Yoac imocac sirihau Yohanengo haec. Hama bangec kisiu kecma ngicngac ubangina dzigeneu kopocsicngina kpac anudeac mitidoku nadzicgecdeac edekpou ayemmeec.
⁵ Nga ngicngac yeni Yudaia prowins nga Yerusareng taonnunac amanene yearu kenggec. Kemma kopocsicngina deficgemagec yeng Yodang dokuu namma doku nadzicyemmeec.
⁶ Yohane ye ngakpia kamere dzoeango memea, imoc heima fadenga mong yangse-berango memea, imocngo kebangau dzegieec. Amma ye ipua nga kateac kukundzau nekefec. ⁷ Ye ngicngac yoac yofi edekpou ayemmeec, “Ngic neac ngadeu haude, yeac kucngo neac kuc ferahade. Ni ifiango ngonducnema yeac hanitabea witiha yungecba naric mi ngereeude. ⁸ Ni doku nadzicngemmeduae nga yeng hama Tiri Asungo nadzicngemmeude.”
⁹ Naso imohai Yesungo Nadzarete taong Gariraia bangec wama Yodang dokuu hasikeec. Hasikeu Yohanengo doku nadzicmiec. ¹⁰ Nadzicmiu Yesungo dokuunac eremanu imohaingoc kurumeng anggeu Asungo kebesacac sircic amma yearu mau henec. ¹¹ Hemmanu kurumennunac enacudumeng mong yofi fingeru negenec, “Ge neac songomedacna, ni gengsongo anggenduae.”
¹² Nga imohaingoc Asungo Yesu sueu bangec kisiu kenec. ¹³ Kemma uameme 40 kecmamu Satanggo ye tobanggeec. Tobanggeu imohai kateyang yenigoc kecmamu angero yeneng henggareng ammigec.
¹⁴ Ngic yeneng Yohane witicamau faigec tacmanu Yesungo Gariraia bangecfu kemma Anutuac siduc gombung edekpou ayemmemec ¹⁵ yofi deec, “Naso bic hau Anutuac eucererengng mewegenengunudeac ngeni ubangina dzigeneu siduc gombung negens-inggegec.”
¹⁶ Anu Yesungo Gariraia dzohong tegiau kengkecma Simong nga munea Anderea yerenu yeri ufcngira ukuma nanoc. Nocac yeri kondungyang meme ngic. ¹⁷ Yeremma Yesungo yofi edeyuruec, “Ngeri hama modacnuec ngic yeneng kondungyang meandae, ngeri ifi isoc ngicmeme ua meeceac kpoungemecbade.” ¹⁸ Ifi deu yeri imohaingoc ufcngira wama Yesu modaroc.
¹⁹ Nga yeni kapianec kemma Yesungo Dzebedaioac medahora Yakobo nga munea Yohane yerenec. Yeri gombau ufcngira memengere amma taroc. ²⁰ Tarec yeng yeremma kpacyuruu yeri negenoc. Negemma imohaingoc mangngira Dzebedaio nga ua ngicfora gombau tacmagec wayunuma Yesu modaroc.
²¹ Anu yeni Kafanaung taonnu kensikegec. Kensikemagec sabata naso anu Yesungo kpekpeturang amau emma Anutuac yoac kpouyemmeec. ²² Kpouyemmeu ngicngac yeneng kpoukpouyoara negemma imoc negenggec engena anec. Ye kpouyemmeec, imoc ngic uakibi mekedae, yeneac sircfu kuhagoc amma mitiac negengngic yeneac dede isoc mi deec.
²³ Anu naso imohaingoc kpekpeturang amau ngic mongasu seuhagocngo tacma arohoec. ²⁴ “Yesu Nadzarete mingina, neneac wiac imoc geac mi ande. Ge memangane-nununadeac hanec me? Ni gensiduaenoc, ge Anutuac kpetiac ngic.” ²⁵ Ifi deu Yesungo asu seuhagoc ngaba ammima yofi edeec, “Ge waickema ngicfunac erema kenna!”

²⁶ Ifi deu asu seuhagocngo ngicmekpefac ammima kucgoc arohma erema kenec. ²⁷ Kenu ngicngac sasawango kerectegec amma yenaocngoc kpesiemegec, “Imoc noc wiac? Imoc kpoukpou gboria nga yeng ua minginaac kuhagoc kpounemmeu asu seuhagoc ifingoc yoac edeyunuu yeni yoara negemma tofogec.” ²⁸ Nga siduhango Gariraia prowinsiu bic kemma sokodarec.

²⁹ Anu yeni kpekpeturang amaunac mama Yakobo nga Yohane yerigoc Simong nga Anderea yereac amau kenggec. ³⁰ Kemma enggec, imohai Simong sefena sebigerec ammiu feec, imoc Yesu egegec. ³¹ Edegec Yesungo yearu kemma mariau mema miarу imohaingoc hafeia kpac anu yenenggareng ayemmeec.

³² Ifi anu wenac kiwa kemeu ama tofore hamanu ngicngac yeneng hafeigoc nga hadehade amma yafinggoc sasawa Yesuaru meyunu kenggec. ³³ Nga taonggac ngicngac sasawa yeni ama naguyau kpedzucnegec. ³⁴ Kpedzucnemagec Yesungo ngicngac hafeingina hania haniagoc mengereyunuma hadehade nga yafingngina homac kporarec. Nga hadehade nga yafing kporacyunuec, yeni haniaya negenggecac yoac degecdeac dederac ayemmeec.

³⁵ Anu ama mi wereckemmanu Yesungo kundunnungoc yacma ama wama bangec botuc mong ngiha kpacfу kemma numuec. ³⁶⁻³⁷ Numuu Simong nga tosofora yeni ye hofockemna meficgema egegec, “Ngicngac sasawango ge hofogudae.” ³⁸ Ifi degec yofi edeyunuec, “Nenang taong goa wegenac tackende, imohai ifingoc kemma yoac edekpou ayemmebade. Nocac ua imocnoc mebadeac hadua.” ³⁹ Ifi deu yeni Gariraia bangec yerecge kenggec. Kemma kpekpeturang amasoc yeng yoac edekpou ayemmemna hadehade nga yafing kporacyunuec.

⁴⁰ Anu ngic kubecserigoc mongngo yearu hamafafoc heima desambic ammima deec, “Geng negenna naric anu naric medzuacnubang.” ⁴¹ Ifi deu Yesungo ubea manganeu maria sinema ngic kpreserema yofi deec, “Ngereenadeac songona fede.” ⁴² Demanu imohaingoc kubeha mosiu sebia ngereec. ⁴³ Ngereeu Yesungo ngic derahema suema yofi deec, ⁴⁴ “Negenna, sebigau faka fingecdac, imocac ngic mong mi edebesena. Ge womong gareng yearu kemma sebiga edzahema Mosengo seseac deec, imocac sirihau modacma faibesena! Ge ifi faina yeneng sesega hemma negentegecgecde.” ⁴⁵ Ifi deu yeng ine kemma siduc imoc sifu deyadie. Imocac amma Yesungo taonnu fingec fingec monggoc mi enec. Ye ine ngadeau bangec kisiu kecmanu ngicngac noboc nobocnacng yearu hakecgec.

2

¹⁻² Uameme goa wisickemanu Yesungo monggoc Kafanaung taonnu kenec. Kenu ngicngac homacngi imoc negemma amma wakema naguya hedzickemagec yeng Anutuac yoac edekpou ayemmeec. ³ Ammanu ngic 4 yeneng ngic mong hanimaria homemea tofohoma yearu mekenggec. ⁴ Mekenggec ngic homacngi nanggecac hoangau faigecdeac obohoma ama witiau enggec. Emma ama bubuya meickegec titinga fingerec. Fingeru yeni Yesu nanecfu imohai ngicpuring dzakeagoc faigec kemee. ⁵ Kemeu Yesungo negen negensingngina hemma ngicpuring yofi edeec, “Medacna, kopocsicga bic waway.”

⁶ Ifi deu mitiac negen negengngic goa ihai tacgec, yeneng ubanginau yofi negenggec. ⁷ “Ngic imoc ye nocac yoac ifi dema Anutu emmide! Anutu mocgungo kopocsic naric waude.”

⁸ Yeni ifi negenggec Yesungo ongaasuyau negengyemmemna yofi edeyunuec, “Ngeni nocac negen negeng ifia ubanginango negensidae?” ⁹ Damocngi efea ande? Ngic puring yeac debesonga, ‘Kopocsicga kpac ande’, me ‘Ge yacma tofoga mema kenna.’ ¹⁰ Nga Ngicac Medac, yeng bangecfu kopocsic wawaac uayoac nga kuc femide, ngeni imoc negenggecdeac amma yofi deba.” Ye ifi dema ngicpuring yofi edeec, ¹¹ “Ni edeguduau, ge yacma dzakega mema amagau kenna.” ¹² Ifi deu imohaingoc ngic ye yacma dzakea mema ngicngac kicnginai kenec. Kenu ngicngac sasawango imoc hemma kpidohoma

kerectegec amma Anutu dengerema degec, "Wiac yomoc mi hehennina yaguc fingeru hendimbe."

¹³ Anu Yesungo ama imohanac mama dzohong tegiau kenec. Kenu ngicngac homacngo yearu kenggoc kpoukpou ua meec. ¹⁴ Nga kemma Rewi Arifaioac medac takesimeme amean taru hemma yofi edeec, "Ge hama ni modacnuna!" Ifi deu yeng yacma modarec.

¹⁵ Kecma Yesungo Rewiac amau yaka nema tacmanu takesimeme ngic nga manganameme ngic homacngo Yesu nga medacfora yenigoc yaka momoc negec. Ngic ifia homacngo yeni modacyunuma kenggoc. ¹⁶ Ifi anu Yesungo takesimeme nga manganameme yenigoc tacma yaka neu farisaio yeneearunac mitiac negengngic goa, yeneng imoc hemma medacfora kpesiyemmegec, "Ye nocac takesimeme nga manganameme yenigoc yaka nede?" ¹⁷ Ifi degec Yesungo negemma yofi edeyunuec, "Ngicngac hafeingina kpac kecdae, yeni dotaac mi ayemmeude. Nga hafeinginagoc, yeneng ine dotaac ayemmeude. Nga ni ngicngac dindingac kpacyunubadeac mi mayai, kpac. Ni ine manganameme ngic kpacyunubadeac mayai."

¹⁸ Yohaneac medacfora nga farisaio yakasege kecanda, yeneearunac goango hama Yesu kpesimigec, "Yohane nga farisaio medacfocngina yeni yakasege angandae. Nga geac medacfocga yeneng nocac yaka sege mi angandae?" ¹⁹ Ifi kpesigec Yesungo yofi edeyunuec, "Memeturang ngicngo tosfora yenigoc taru yeneng yakasege naric mi kecgecde. Monggoc deba, yeng yenigoc tacmanungoc yakasege naric mi kecgecde.

²⁰ Kecma naso monnu ngic yeneng memeturanggac ngic yeneearunac meickegecde, naso imohai yakasege anggecde.

²¹ Ngac mongngo ngakpi eseau kporucususuc gboria mong mi kpebiude. Kporucususuc gboriango eseau taiu dzamema titingtoa fingecbac. ²² Nga ngic mongngo waing gboria bokong yang seberango memea eseau naric mi kpeu kemeude, kpac. Waing gboriango bokong eseau tindziru yerahafoc manganebaoc. Imocac waing gboria imoc bokong gboriau kpeu kemeude."

²³ Naso monnu sabata nasou Yesungo wit ua dzongiau sing modac kemmanu medacfora yeneng wit fora mocgu mocgu merecgema megec. ²⁴ Merecgegec farisaio yeneng degec, "Henna, yeni nocac sabata nasou faka mi angana andae?"

²⁵ Ifi degec Yesungo yofi merengyemmeec, "Dawidi nga uamedacfora yeni yakaac obohoma herenginaac homema faka anggec, ngeni imoc osonegeng mi angandae gedang.

²⁶ Abiatango womong garengtoa kefec, naso imohai Dawidingo Anutuac womanonnu enec. Emma ic sogong Anutuac sese faifaia, imoc menema uamedacfora ifingoc gumecyunuec. Nga ic sogong imoc womong gareng yenengsac naric negecde, ngictehec yeneng kpac."

(1 Samuel 21:1-6)

²⁷ Ifi dema yofi edeyunuec, "Ngicngo sabataac amma mi fingerec, sabatango ine ngicngac ngeneac amma fingerec. ²⁸ Ngicac Medac ye sabataac Kebu kecdengoc."

3

¹ Yesungo naso monnu kpekpeturang amau enu ngic mong maria noboc homemea, ye ihai tarec. ² Nga ngic goa yeni Yesu yoacfu faigecdeac negensigec amma ngic imoc sabata nasou mengereude me kpac, imocac hembikecgec. ³ Hembikecgec Yesungo ngic marimangang yofi edeec, "Ge yacma botucninau nanna." ⁴ ifi dema yofi kpesiyemmeec, "Sabata nasou noc faka naric ambesonga, faka gombunga me mangana? Amma homebeso andae, yeni agengngina tinide me yunuhamenide?" Ifi deu yeneng engsac ning kpegec. ⁵ Ning kpegec yeng ubasinginaac negenghodungaima herea buu kic fikengfiha amma ngic yofi edeec, "Ge mariga sinena!" deu ngic ye maria sineu ngereec.

⁶ Ngeree farisaio yeneng naso imohaingoc Herodeac arengfora yenearu ioha kemma dafiu mema kpegecdeac yoac dedzege anggec.

⁷ Anu Yesu nga medacfora yeni amabangec wama Gariraia dzohonnu kemmagec Gariraia bangecfunac habu kunengngo modacyunugec. ⁸ Ngicngac Yudaia bangecfunac nga Yerusaleng taonnunac amma Idumaia bangecfunac nga Yodang edibigeng amma

Tiro nga Sidong bangecfunac, habutoa imoc yeni Yesungo faka sasawa meec, imocac siduc negemma yearu hagec.

⁹ Nga Ngicngac homacngo hasikema Yesu igockebauac medacfora yeneng wage wegenac faigecdeac edeyunuec. ¹⁰ Nga ye ngic homac mengereyunuu hafeigoc yeneng kemma kpeseregecdeac hefacemegec. ¹¹ Nga asu seuhagoc yeneng Yesu hemma ngonducnema yofi dema kpacma degec, “Genoc Anutuac medac.” ¹² Ifi degec hania dekperagibauac Yesungo dederac ayemmeec.

¹³ Anu ye tikiu emma medac goa ubango negenggosi ayemmeecmoc, deu yearu kenggoc. ¹⁴⁻¹⁵ Kenggoc medac 12 meisingyunuma aposoro kpac yemmeec. Yemmeu yeni yegoc kecmagec yoac edekpou ayemmegecde nga hadehade nga yafing kporacyemegecdeac uayoac nga kuc yemmeec.

¹⁶ Ngic 12 meisingyunuec, yeneac kpacngina yofi, Simong, kpara mong Petoro miec, ye ¹⁷ amma Dzebedaoac medahora Yakobo nga munea Yohane, yereac kpacngira Boanerges yemerec. Imocac titiha, parandanggac medac. ¹⁸⁻¹⁹ Nga Anderea amma Firipo nga Batoromaio amma Mataio nga Toma amma Yakobo, imoc Arifaioac medac nga Tadaio amma Simong Kananaio nga Yuda Karioto amaunac, yeng kecma Yesu kerereu megec.

²⁰ Anu Yesungo amau kensikeu habutoango hama kpedzucnegec medacforagoc yakaneneac titing mong mi fingerec. ²¹ Wiacfora yeneng yofi negenggoc, “Ye ueba sufude.” ifi dema megecdeac kenggoc.

²² Nga mitiac negen negengngic Yerusarennac hagec, yeneng degec, “Ye hadehade nga yafing yeneac ngictaungina Bedzeburu, yeac kucfu hadehade nga yafing ngicngac yenearunac kporacande.” ²³ Ifi degec Yesungo kpacyunuma yoac heima yofi edeyunuec, “Satang yengenaocngoc dafi kporacemeude? ²⁴ Bangec monggac ngicngac yeni ngaba angemema tohogecdeu bangec imocngo naric mi fekefude, kpac. ²⁵ Nga amamana moc-gungo tohoma ngaba angemeudeu amamana imocngo kpac anude. ²⁶ Nga Satangngto tohoma yengenaocngoc kporacemeudeu ye ifingoc kpac anude.

²⁷ Ngic mongngo ngic kuhagoc, yeac amau emma iwaiya naric mi wangerude, kpac. Ye ngic kuhagoc imoc witickemaguc amea manau emma iwaiya tacde, imoc naric wangerude.

²⁸ Foracngoc, ngicngac yeni kopocsic hania hania angandae nga wiac hania haniaac deendema nga dedengbaring angandae, kopocsic ifia sasawa, imocac wawa fede, imoc edengunuduae. ²⁹ Nga ngic mongngo Tiri Asu denggbaringgeude, yeac kopocsic ine waway mi fede. Kopocsihaac turunga imoc fekengkecbesande.” ³⁰ Yeneng degec, “Ye asu seuhagoc.” imocac amma yeng ifi edeyunuec.

³¹ Anu Yesuac nonggo munafora yeneng sobennu kensikema ngic mong suema degec, “Yesu ye mabeso.” ge ifi edena. ³² Ifi degec Yesungo habu yeneac botucfu tacmanu ngicngac yeneng egegec, “Nonggo munafocga ngadeau namma ge hofogudae.” ³³ Ifi degec yeng merengyemmeec, “Damoc yeneng neac nonggo munafocna?” ³⁴ Ifi dema yegoc momoc tacgec, kiwa yenearu firma yofi deec, “Nonggo munafocna imoc ngicngac ngeni yomoc tacdae. ³⁵ Nga ngic Anutuac songo nga negen negeng modacma yeac ua mekecdae, yeneng neac nonggo naing nga dacmunafocna.”

4

¹ Yesungo dzohong tegiau monggoc kemma ngicngac edekpou ayemmeu homacngo yearu kpedzucnema hagec. Imocac yeng gomba monnu emma ihai tacma edekpou ayemmeec. ² Amma ye yoac heima yoac homac kpouyemmem yofi deec,

³ “Negenggoc, gbome kpegi kpegingic mongngo gbomea kpegiudeac uau kenec.

⁴ Kemma kpegiu gbome goa mama sinnu heiu neng yeneng hama nedacgec. ⁵ Nga goa harongannu heiu ihai bangec efeanec feecac gbome imoc bic nemonggema ereec.

⁶ Erema godea ine homac mi faiecac wenacngo erema kpeu gbome imoc ururuema homeec. ⁷ Nga gbome goa haseng manau heiu hasengngo yadima heihomeu fora kpac anec.

⁸ Nga gbome goango bangec gombungau heima kpea nemonggema fora gombunga anec. Monggac imoc gbomea 30 nga monggac 60 amma monggac 100, ifi fingerec.”

⁹ Yesungo ifi dema yofi edeyunuec, “Kedzahagoc yeng yoac yomoc negembeso.”

¹⁰ Anu ngicngac habutoa kenggec medacfora 12 nga ngicngac goa yegoc kecgec, yeneng yoac heihei imocac hania Yesu kpesimigec ¹¹ yeng yofi edeyunuec, “Anutuac eucererenggac negen negeng sufufa, imoc ngeni bic ngemmengemmea. Nga ngicngac ngadeau kecdae, yeni ine yoac heiheiusingsac yoac sasawa negenggecde. ¹² Ifi anu

‘Yeni kicnginango hemma wiac mong ine mi henggecde nga kedzacnginango negemma wiac mong sifu mi negentegecgecde. Imocac yeni ubangina mi dzigeneu kopocsicngina kpac ambacac kopocsic wawa mi anggecde.’” (*Yesaia 6:9-10*)

¹³ Anu Yesungo yofi edeyunuec, “Ni yoac heima deduae, ngeni imocac hania mi negendaeu yoac heiheiac hania goa monggoc deba imoc ifingoc dafi negentegecgecde.

¹⁴ Gbome kpegi kpegi ngicngo Anutuac yoac kpegi. ¹⁵ Gbome sinnu heiec, imoc ngic goa yeni yoara negenggec nga Satang ye ine bic hama gbome ubanginau kpegi kpegia meickeude.

¹⁶ Nga gbome harongannu heiec, imoc ngic goa Anutuac yoac negemma heresongogoc bic hoanggegecde. ¹⁷ Amma yoac ubanginau godea mi meecac naso wegenanecsac taru Anutuac yoacac amma kpendzeng me yunukporac faka fingeru yeni makpegecde.

¹⁸ Nga gbome hasennu heiec, imoc goa yeni Anutuac yoac negenggec. ¹⁹ Negemma banectoa bangec yomocac kekecac fagung nga dzofinacac faitobang nga wiac goaac hensongo angandae, imoc sasawango ubanginau kemema yoac heihomeu fora mong mi fingerude.

²⁰ Nga gbome goa bangec kerehagocfu heiec, imoc ngic goango Anutuac yoac negemma mekecgec fora fingerude. Goango 30 nga goango 60 amma goango 100 maficgeude.”

²¹ Yesungo monggoc yofi edeyunuec, “Ngic mongngo kifa kpiacma pake bageau faima mi kperahaude me tatac bageu faiu tarude, imoc kpac. Kifa imoc tatahau faini tacande.

²² Wiac sufufu fede, imoc kecma didiu fingectegeerde nga wiac semea semea, imoc kecma kperagiau fingectegeerde. ²³ Mong ye kedzahagocngyoac yomoc negembeso.”

²⁴ Amma Yesungo yofi edeyunuec, “Ngeni yoac yomoc negentegecbsia. Ngeni wiac kpetea isinggaia ngicngac yemmeandae, ngic yeneng kpete siriha ifiangoc isinggaia turung kpoungemmecde. Yeni kpoungemmema imocac siriha meemma monggoc ngemmecde. ²⁵ Imoc yofiac, mong ye wiac goa femide, ye wiac monggoc migece. Nga mong ye wiac mong mi femide, yearunac wiacbiscic femide, imoc ifingoc wangecgecde.”

²⁶⁻²⁷ Amma monggoc yofi deec, “Anutuac eucererenggac siriha, imoc ngic mongngo gbome kpegi, ifi isoc. Kpegi hadzing toforec feyac ammanu gbome imoc nesarima ereude. Nga imoc dafiac erede, imoc ngicngo mi negentegecde. ²⁸ Nga bangec yengenaoc wiac meyadiu erema tebang angkecde. Amma fora amma wadzima kpaueude. ²⁹ Kpaueu fora kpememe naso anu ye semeng bic kperecgeude.”

³⁰ Yesungo monggoc yofi deec, “Nenang Anutuac eucererenggac siriha yofi heima deni naric anude. ³¹⁻³² Anutuac eucerereng imoc mastet gbomea isoc. Mastet gbomea imoc gbome sasawa yeneac kapiangina. Nga imoc bangecfu faini erema yadima semeng uaac mondhang feracyunuma fawa kuneng angande. Nga sawau neng yeneng imocac nokumucfu hama faec heima tacgecde.”

³³ Yesungo yoac heima yoac ifia homac dema ngicngac negen negengnginaac siriha Kebuac yoac edeyunuec. ³⁴ Amma yoac deec, imoc ine yoac heimasac edeyunukefec. Edeyunuma medacfora meyunuma tembucfu kemema hania dekperagima edeyunukefec.

³⁵ Anu ama marai anu Yesungo medacfora yofi edeyunuec, “Nenang dzohong noboc kenni.” ³⁶ Ifi deu yeni ngicngac habutoa wayunuma Yesu gombau bic tacmanu yeni ye wangecma kenggec. Kemmagec gomba goango ifingoc modacyunugec. ³⁷ Nga imohai firang engena kpeu tembong kucgoc kpeu dokungo gomba manau erema gomba

mewakebeso anec. ³⁸ Anu Yesungo gomba ngadeau kparicgang heima gau femanu medacfora yeneng midima degec, “Kpoukpou, kemebesonga andimbe, ge imocac fagung mong mi annec me?” ³⁹ Ifi degec ye gauunac yacma firang kpetarimima dzohong yofi edeec, “Ge waickema fena!” ifi deu firang kpac anu dzohong imoc ning kpema eng feec.

⁴⁰ Feu Yesungo medac yeneac yofi deec, “Ngeni nocac kengec andae, negen negensingngina mong mi fede me?” ⁴¹ Ifi deu yeni kengec nga damutoa yombong amma kpesiemegec, “Ye noc ngic, firang nga dzohongtoa yereng yeac enac tofohodape.”

5

¹ Anu dzohong ferecgema Gerasene bangecfu edigeng kenggec. ² Kensikema Yesungo gombaunac mamanu ngic mong asu seuhagocngo kicsereunac hama Yesu meficgeec.

³ Ngic imoc ye kicsereu Feyac angkefu ngic mongngo ye witickeudeacsoc mi anec. Nga yeni sengngo witickebeso ifingoc obohogec. ⁴ Ngic yeni naso homac hanimaria sengngo witickegec yeng seng kperegedarec nga hania aiengngo witickegec, imoc ifingoc kperegedarec. Nga ngic sasawa yeni ye mendangegecdeac obohogec.

⁵ Ngic imoc ye hadzing toforec kicsereu nga fagannu arohma yengenaoc sebia hocfu heiherecge angemekefec. ⁶ Amma ye hereaungoc Yesu hemma nedzikemma haniau makpeec. ⁷ Makpema seriangoc arohma deec, “Yesu Anutu engenatoaac Medac, neac wiac imoc geac mi ande. Ni Anutuac kicfu edeguduae, ge kpendzennu mi fainuna.” ⁸ Yesungo asu seuhagoc kporaru yearunac erema kenudeac edeec, imocac amma ngicngo ifi deec. ⁹ Ifi deu Yesungo yofi kpесimie, “Ge kpacga merac?” kpесimiu deec, “Ni kpacna habutoa, nocac neni homac.”* ¹⁰ Ifi deu ye kporacyunuu bangec imoc mi wagecdedac seriombonggema derecgeec.

¹¹ Anu bangec botuc imohai berechabutoa mong fagang wegenacfu surukpema kecgec.

¹² Kecgec asu seuhagoc yeneng yofi dema desambic ammigec, “Ge suenununa berecfu kemeni.” ¹³ Ifi degec Yesungo negengyemmeu yeni ngicfunac erema berechabu yenearu kemegec. Kemegec berec yeni fagannunac nedzima dzohonnu kemema doku nema homedacgec. Nga berec homegec, yeneac kpetengina imoc 2 tauseng isoc.

¹⁴ Anu berecgareng yeneng kengec worama taonnu nga amabisicfu ngic kecgec, yenearu kemma faka fingerec, imocac siduc edeyunugec yeneng imoc hengecdeac hagec. ¹⁵ Nga yeni Yesuaru hasikema henggec ngic hadehadehabugoc warac kefec, yeng negentegecma wamba heima taru yeni ye hemma kengcyunuec. ¹⁶ Nga ngic kicnginango faka imoc henggec, yeneng ngic hadehadegoc, yearu faka fingerec nga berec yeneac siduc momoc ngicngac ayemmegec.

¹⁷ Nga yeni yoac imoc negendacma Yesungo amabangecngina waudeac eedgec. ¹⁸ Ifi edegec ye gombau emmanu ngic hadehadegoc ngereec, yeng yegoc kenudeac derecgeec.

¹⁹ Derecgeu Yesungo ine kpetarimima yofi deec, “Ge amagau kemma Kebungo geac ubea manganeu wiac sasawa anggendac, imocac siduc tosofocga ayemmebesena.” ²⁰ Ifi deu ye kemma Yesungo faka sasawa yearu meec, imocac siduc Dekaporisi bangecfu ngicngac yoac dekperagiyemmeu yeni imoc negemma kerectegec anggec.

²¹ Anu Yesungo gombau emma monggoc dzohong ferecgema hasike nammanu ngicngac homacngi yearu heockema kemma kpedzucnegec. ²² Kpedzucnemagec kpekpeturang amaac gareng mong kpara Yairo, yeng hama Yesuac haniau makpema desambic amma deec, ²³ “Naroanna homebeso ande. Ge hama marigango witiau faina ngereeude.”

²⁴ Edeu negemma kemmaec ngicngac habutoango hefacemema yearu hagec.

²⁵ Anu ngac mong ihaingoc nanec, ye sacherec amma kecmanu kifa 12 bic anec.

²⁶ Amma ye kpendzeng kpema dota homac yenearu kemma hiedzoya eng kpedzonggeu sebiau ngerec ngeree mong ine mi fingecmiu eng monggoc manganeec. ²⁷⁻²⁸ Amma ngac imoc ye Yesuac siduc negemma ngicngac ngadenginausing kemma yofi negenec, “Ni ngakpia kpreserema ngereebadenoc.” ifi negemma Yesuac ngakpihereha kpresereec.

* ^{5:9:} “Kpacna Region” deec. Region imoc ami areng mong kpetea 5 tauseng me 6 tauseng.

²⁹ Kpesereu imohaingoc sawa gbanggeu sebia nomaneu kpendzenga kpac anu negenge-meeec.

³⁰ Nga Yesungo yofi negenec, kucna tosea ferecgedac, imocac amma habutoa yenearu dzigenema yofi kpesiyemmeec, “Merang ngakpina kpeseredac?” ³¹ Ifi deu medacfora yeneng degec, “Ngicngac homac yeneng hefacgumagec geng merang kpeserenude dema kpesinec, imoc mi heide.” ³² Nga Yesu ye ine ngacngo kpesereec, ye hentegerudeac fikengfiha anec. ³³ Ammanu ngac ye kengec kpeu dzonoma fedeu Yesuac haniau makpema haniaya hafoangoc deficgedarec, nocac sebiau faka fingerec, imoc negenec. ³⁴ Deficgeu Yesungo yofi edeec, “Naroang, negen negensinggango mengeregudac. Ge sebiga ngereeua ruaegoc kenna!”

³⁵ Anu Yesungo yoac denammanungoc ngic goa yeneng kpebung garenggac amaunac hama Yairo egec, “Naroangga bic homedac, kpoukpou monggoc ebic mi mina!” ³⁶ Ifi degec Yesungo yoacngina wama gareng yofi edeec, “Ge mi kengecguu, eng negensinggena.” ³⁷ Ifi dema habu kpetariyemmem Petoro nga Yakobo amma munea Yohane, yeni meyunuu kenggec. ³⁸ Kemma garenggac amau kensikema henu ngicngac habu yeni ubahodung amma kpeborongtoa kpema kiacsonggong anggec.

³⁹ Nga Yesungo ine ama manau emma ngicngac yofi edeyunuec, “Ngeni nocac kpeborong kpema kiacdae? Naroang ye mi homedac, ye gau fede.” ⁴⁰ ifi deu yeni dzomoremigec. Yeng ine ngicngac sasawa kporacyunu ngadeau madacgec. Magec naroanggac nonggomama nga medacfora harebec meyunuu naroang feec, ihai enggec. ⁴¹ Emma mariau mema yofi edeec, “Tarita koumi!” imocac titiha yofi, “Ngacbisis, ni edeguduae, ge yacna.” ⁴² Ifi deu naroang ye imohaingoc yacma kengha anu yeneng hemma kpidohoma negenggec imoc wiac engena anec. Naroang imoc ye kifaya 12 anec. ⁴³ Nga Yesungo faka fingerec, imoc mi deficgegecdeac seria deracyunuma naroang yaka migec neudeac edeyunuec.

6

¹ Yesungo bangec imoc wama yengena amabangehau kenu medacfora yeneng modacgec. ² Nga sabata naso anu ye kpekpeturang amau emma ngic edekpou ayemmeu ngicngac negemma tacgec yeneng kerectegec amma degec, “Negen negeng imoc merang kpoumiec nga uayoac merang miecac mariango faka kuhagoc ifia mekecde? ³ Ye Mariaac medac nga amamemengic. Ye Yakobo nga Yosec amma Yuda nga Simong yeneac dacngina nga naingfora yeni nenanggoc kecdae.” Yeni ifi dema dehesi amma wagec.

⁴ Nga Yesungo yofi edeyunuec, “Profeteac amafora nga sactosofora amma arengfora, yenengsac yeac ewea mi heiandae.” ⁵ Nga ye faka kuhagoc mong yenearu meudeacsoc mi anec. Ye ngic hafeigoc mocgu mocgusac mariango kpeseryunu ngereegec. ⁶ Nga yeni mi negensinggegec negenu naric mi anec. Amma ye guruama tackenec, imohai yerecgema edekpou ayemmeec.

⁷ Yesungo medacfora 12 kpacyunuma yohockang yohockang hendzicyunuma asu seuhagoc kporacgecdeac uayoac nga kuc yemmemma sueyunuec. ⁸ Amma yeng yofi dema dederecge ayemmeec, “Ngeni singgac mefic mong mi mema yasusac mebisia. Ngeni yaka me hie mi mebisia amma dzo mong fadeng nabehau mi baribisia. ⁹ Ngeni hanitabe faima ngakpi yohockang ine mi mekembisia.” ¹⁰ Ifi dema yofi edeyunuec, “Ngeni kemma ama monnu kensikegec ngic yeneng ama heingemmec ngeni ama imohai tacyac angkecgec wisickeu wama amabangec monnu kembisia.

¹¹ Nga amabangec monnu kenggec ngic yeni mi hoangngunugede amma yoacngina mi negenggecdeu ngeni haninginaunac yube kpegec mau amabangec imoc wabisia. Nga ngic yeni imoc hemma haniangina negentegecbrisia.” ¹² Yesungo ifi deu yeni kemma ngicngac ubangina merenggecdeac Anutuac yoac edekpou ayemmegec. ¹³ Amma yeni hadehade nga yafing homac kporacyunugec nga ngicngac hafeigoc kerecnego nadzicyemmemma mengereyunugec.

¹⁴ Yesuac siduc imoc bangeha bangeha sokoma kenu ngictau Herodengo yoac imoc negemma yofi negenec, "Yohane dokunadzicngo homecfunac gborima yarecac amma faka kuhagoc meudeac kuc femide." ¹⁵ Ifi degec ngic goa yeneng degec, "Imoc Eria." nga goango degec, "Ye profete. Profete warac kecgec, yeni isoc." ¹⁶ Anu Herodengo ine yoac imoc negemma deec, "Yohane ubea kperecgeai, yennoc gboriec kecde."

¹⁷⁻¹⁸ Nga Herodengo munea Firipoac enema kpara Herodia, ye hamangec mema mekefec. Faka imocac amma Yohanengo Herode yofi edeec, "Ge munagaac enema menec, imoc singngo mi dede." Ifi deu Herodengo ngicfora edeyunu Yohane mema witickema witicamau faigec. ¹⁹ Anu Herodiango Yohaneac herebu negenec. Negenu Herode ye ine Yohaneac kengec kpeu garenggeecac amma Herodiango kpeudeac sing obohoec. ²⁰ Imoc yofiac, Yohane ye ngic dindingac nga kpetiac, Herodengo imoc negentegecma henggareng ammikefec. Amma ye yeac yoac negemma naso homac negengyohoc meficgema sifu yoara negenudeac ammiec.

²¹ Kecma Herodiaac naso gombunga mong yofi fingerec. Herodengo fingec fingec nasoyau ngickuneng yeac bageau kecgec nga wasaingicforaac enara amma Gariraia bangecfunac ngicenara, yeni heitaiyunuma neneyaka ohoyemmegec. ²² Ohoyemmemma tacmagec Herodiaac naroangnggo hama kicnginau yegec fedee. Fedeu Herode nga ngic yegoc yaka negec, yeneng imoc hemma songo negenggec. Imocac amma ngictaungo naroanggac deec, "Ge wiac monggac negemma derecgenenna imoc naric gembade." ²³ Dema nemuya monggac kpacf yofi deseriec, "Ge wiac sasawa derecgenenna gengyombonggebade nga bangecna nobohaac dena mendzicma gembade."

²⁴ Ifi deu naroang ye kemma nonggea kpesimie, "Ni noc wicac debade?" deu nonggeango deec, "Ge Yohane dokunadzicac oruha dena." ²⁵ Ifi deu naroang ye imohaingoc ngictau yearu kemma deec, "Yohane dokunadzicac oruha yagucngoc terau faima nennadeac anende." ²⁶ Ifi deu ngictaungo ubaebic meec. Amma ngic tacgec, yeneac kicfu yoac bic deseriecac amma ine imoc wabesonga negenu naric mi anec. ²⁷ Nga ye imohaingoc wasaingic mong sueu Yohaneac hatea mehaudeac witicamau kenec. Kemma Yohaneac ubia kperecgema ²⁸ hatea imoc terau faima mehama naroang miu naroangnggo imoc mekemma nonggea miec. ²⁹ Anu Yohaneac medacfora yeneng siduc imoc negemma kemma farenga mehama tonggogec.

³⁰ Aposoro yeni monggoc Yesuaru kpeturangge hama wiac sasawa anggec megec nga edekpou ayemmegec, imocac siduc ammigec. ³¹ Nga ngicngac homac yeneng kengha anggecac tacnegeng nga yakaneneac titing mong mi fingerec. Imocac Yesungo medacfora yofi edeyunuec, "Ngeni hagec tembucnina kecnideac nigoc bangec kisiu kemma kecnegembisia." ³² Ifi deu yeni tembucngina gombau emma bangec mong nigha kpacf kenggec.

³³ Kemmagec ngicngac homacnggo ine yenemma yenentegecma taong tackenec, imohacnac nedzima warac warac ihai kensikegec. ³⁴ Kensiema Yesungo gombaunac mama ngicngac habutoa ifi yenemma yeneac ubahodung negenec. Nocac yeni rama garengngina kpac kecdae, ifi isoc kecgec. Ifi negemma wiac homac edekpou ayemmeec.

³⁵ Ayemmemma kefu marai anu medacfora yeneng yearu hama degec, "Bangec yomoc nigha kpac anu naso bic kendacde." ³⁶ Imocac ge ngicngac sueyununa ama tackende, imohai kemma yaka bummenec ambisia." ³⁷ ifi degec yeng yofi deec, "Ngeneng yaka yemmegec negec." Ifi deu merenggec, "Neni kemma 200 denaringo* yaka bummehama yemmeni negecdeac denec me?" ³⁸ Ifi degec Yesungo yofi kpesiyemmeec, "Ngenearu ic sogong dafiguc fede, ngeni kemma henggec." Ifi deu kenghemma egegec, "Ic sogong marimong nga kondungyang yohockang metacdimbe."

³⁹⁻⁴⁰ Ifi degec yeng ngicngac kpindzinnu matacgecdeac edeyunuec. Edeyunu yeni mama goa 100 nga goa 50 ifi habu mema kpindzinnu tackenggec. ⁴¹ Tacmagec Yesungo ic sogong marimong nga kondungyang yohockang imoc meec. Mema kiwa

* 6:37: 200 denari imoc burumaka 6ac bungngina isoc ande.

kurumennu fiu enu kenehema ic sogong tuema medacfora ngicngac gumecyunugecdeac yemmeec. Yemmema kondungyang ifingoc mederema yemmeu medacgec. ⁴² Mema ngicngac sasawango negebec amma ⁴³ ic sogong nga kondungyang tosea neti anggec feu kpedzucnegec kemema sakac 12 wakeec. ⁴⁴ Ngic yaka negec, imoc yeneac kpetengina 5 tauseng.

⁴⁵ Nedacgec wisickeu Yesungo ngicngac faiyunuudeac namma medacfora sueyunuu yeni waraima gombau emma Besaida taonnu kenggec. ⁴⁶ Kemmagec ye ngicngac faiyunuma numuudeac tikiu enec. ⁴⁷ Nga ama toforeyemmeu gombango dzohong dzongiau kemmanu Yesungo tembuha yeigeng kefec. ⁴⁸ Kefu medacfora kemmagec ama werec wereckenggac firangngo kenggecfusing haecac puri kpebibiegec. Ifi anggec Yesungo yenemma yenearugeng dzohong witiau titi kemma feracyunubeso anec.

⁴⁹ Ye dzohong witiau titi kenecac yeni hemma ine wosongango hade, ifi negemma kengec amma arohogec ⁵⁰ yeng yofi bic edeyunuec, “Ngeni wosongina makiu, imoc ni, ngeni mi kengecngunu.” ⁵¹ ifi dema gombau emma yenigoc taru firang kpac anec. Nga yeni ongangina worau kerectegec anggec. ⁵² Amma yeni herengina dzege dzegea feecac amma yakau faka fingerec, imoc mi negentegecgec.

⁵³ Anu yeni dzohong ferecgema Genesarete bangecfu kensikema gombangina dzegegec tarec. ⁵⁴ Taru gombaunac mamagec ngicngac yeneng Yesu bic hensigec. ⁵⁵ Hensima amea amea nedzikemma ngicngac hafeigoc tofou faiyunuma, “Ye ihai me ihai kecde.” imoc negemma ihai meyunu hakecgec. ⁵⁶ Yesungo taonnu nga amabisicfu endaru ngicngac yeneng ngicngac hafeigoc meyunuma didiu faiyunugec ngakpia susiaac witihakpeseregecdeac derecgegec. Amma kpeseregec, yeni sasawango ngereegec.

7

¹ Farisaio nga Yerusarennac mitiac negen negengngic goa yeneng Yesuaru hama kpeturanggema kecgec, ² imohai Yesuac medacfora goa yeni maringina mi dzuac dzuac yaka menec anggec yenenggec. ³ Imoc yofiac, farisaio nga yudangic sasawango bangecfocnginaac singyoac modacma maringina dzuacmaguc yaka neandae.*

⁴ Amma yeni emenecfunac hama doku nadzic nadziha kpac yaka eng mi menec amma faka goa ifia momoc kpabanggema angandae. Yeni kpakenec nga sokoc amma birikeng ifingoc dzuacmaguc neandae. ⁵ Ifi anu farisaio nga mitiac negen negengngic yeneng Yesu kpesimigec, “Medacfocga yeni nocac bangecfocnina nga esangabofocnina yeneac singyoac mi modacma maringina mi dzuac dzuac yaka eng menec angandae?” ⁶ ifi degec yeng yofi edeyunuec, “Profete Yesaiango ngic ikoha ngeneacnoc kpefing fora yombong yofi ohoeec,

‘Ngichabu yomoc yeni enacobibicngo sesehenuandae nga herenginango ine neac hereau kecdae. ⁷ Yeni ngicngac wiac kpouyemmeandae, imoc ngicac singyoac edekpou ayemmeandae amma ni eng dengerenugec hemba fora kpac angkecde.’ (*Yesaya 29:13*)

⁸ Ngeni Anutuac dedeseriyoac meickema ngic yeneac singyoac hoanggeandae.”

⁹ Amma monggoc yofi edeyunuec, “Ngeni ngenang singyoac hoanggeandaeac Anutuac dedeseriyoac meickeyombonggegecde. ¹⁰ Mosengo yoac mong yofi deec, ‘Ge nonggo manghocga seseheyurubesena.’ nga ‘Ngic mong ye nonggea me mamaac sowecyoac deude, ye homebeso.’” (*Makekeng 20:12; 21:17; Sesememe 20:9; Dedeseri 5:16*)

¹¹ Ngeneng ine yofi deandae, “Ngic monggo nonggea me mama yofi edema deude, ‘Wiac gemba nanggegudeac dedua, imoc bic Anutuac sese[†] dedua.’ ¹² Ifi deu ngeni ngic nonggea me mama maficgeudeac dekpetari ammigecde. ¹³ Amma ngeni singyoacngina kpabanggema Anutuac yoac semema faka goa ifia homac angandae.”

* ^{7:3:} Ge imocac hania “Yoac goaac dedekperagi” imohai hennade. Hafac 1130 † ^{7:11:} Sese imoc Hebraio yoacfusing Korban

¹⁴ Yesungo ifi dema ngichabu monggoc kpacyunuu hagec yofi edeyunuec, “Ngeni kedzac kpema negentegecdacgec. ¹⁵ Wiac mongngo ngadeaunac kemeande, imocngo ngic ubahere naric mi heidzadzu kpeude, kpac. Nga ngic heremanauac wiac ereande, imocngo ine ngic heidzadzu kpeude. ¹⁶ Ngic kedzahagoc kecde, yeng yoac yomoc negembeso.”

¹⁷ Ye ifi dema ngicngac wayunuma amau enu medacfora yeneng yoac heima deec, imocac kpесimigec yofi edeyunuec, ¹⁸ “Ngeni negen negentegecngina kpac, ifi isoc kecdaengoc. Ngadeaunac wiac mong heremanau kemeande, imocngo naric mi heidzadzu kpeude, ngeni imoc mi negentegecdae me? ¹⁹ Wiac imocngo ubanginai mi kemeandead hereu kemema isinggeu keractennu kemeude.” Yesungo ifi dema yaka sasawa nenideac desorongaiiec. ²⁰ Amma torokpema yofi deec, “Wiac mong ngic ubahereunac ereande, imocngo ine heidzadzu kpeude.

²¹⁻²² Nga ngic ubahereunac wiac yofia ereande, negen negeng mangana nga Kaisero-faka amma hamangecfaka nga ngickpekpe amma eweeneng mewa nga kic hodung amma manganaac areng meme nga ikoc faka amma faka sicsauha nga keracmangang amma desureyoac nga sebiengeng amma ubafong, ²³ imoc sasawango ubahereunac erema ngic heidzadzu kpeude.”

²⁴ Anu Yesungo yacma imohacnac kenec. Kemma Tiro nga Sidong amabangecfu kensikema ama monnu enec. Enu ngicngac yeni taong imohai siduha mi negenggecdeac, ifi negenec amma ye ine sufuma tarudeac obohoec. ²⁵⁻²⁶ Ammanu imohaingoc Sirofoinikia bangecfunac grikngac mongngo haec. Hama Yesuac haniu makpema naroanga asu seuhagoc kporaciudeac derecgemic. ²⁷ Derecgemiu Yesungo yofi edeec, “Nambarac yeni yaka warac warac nema gebecyunubeso. Nambarac yeneac yaka wangecyunuma kasi yenearu ukunide, imocngo faka gombunga kpac.”

²⁸ Ifi deu ngacngo meremmiec, “Kebu, imoc negenduae, amma kasi yeni sifu nambarac yeneng yaka kisisickegec tebo bageau maande, imocsac neandae.” ²⁹ ifi deu Yesungo yofi edeec, “Ge yoac ifi denecac kenna, hadehade ye naroangga bic wadac.” ³⁰ Ifi deu ngac ye ameanu kemma henu hadehadengo naroanga bic wau naroang ye fefea waickema feec.

³¹ Yesungo Tiro bangecfunac dzigenema Sidong taong ferecgema Dekaporisi‡ bangecfu sing kemma Gariraia dzohonnu kensikeec. ³² Kensikemanu ngicngac yeneng ngic mong kedzacfong nga yoac dedeac enara ebiria, ye mehama Yesu mariango kpe-sereudeac desambic ammigec. ³³ Ifi degec negemma ye ngichabu yenearunac meickema ngic ngadeau faiu nanu gbongango kedzahau faima mariau sofohoma nedzaranga kpesereec. ³⁴ Kpeserema kurumennu fiu enu asu heima deec, “Effata!” Imocac titiha yofi, “Ge sarina!” ³⁵ Ifi deu ngic kedzaha bic sariu nedzaranga monggoc merenu yoac tongganang deec.

³⁶ Ifi deu Yesungo faka fingerecmoc, imoc ngicngac yeneng mi deyadigecdeac seria yombong deracyunu yeni ine imoc monggoc deyadiyombonggema degec. ³⁷ Ifi degec ngicngac yeni homac wareckema kerectegec amma degec, “Ye wiac sasawa mema kecde, imoc ngereeyombonggedacde. Ye ngicngac kedzacfong yeneac kedzac mesariude nga yoacngina kpac, yeni yoac meficgeyemmeude.”

8

¹ Naso imohai ngicngac habutoa yeni monggoc Yesuaru hama kpeturanggegec. Nga yakangina kpac anu Yesungo medacfora kpacyunuma yofi edeyunuec, ² “Ngicngac yomoc yeni yakangina kpac uameme harebec bic nigoc kecdauac ubana manganede.

³ Goa yeni amabangec hereaunac hagecac yakaya kpacfу sueyunuba amanginai kengkecma kicgigi ayemmebacac.” ⁴ Ifi deu medacfora yeneng degec, “Nenang bangec kisi yofiau yaka dafiu meficgema habutoa yemmeni gebecyunuude?” ⁵ ifi degec Yesungo kpesiyemmeec, “Ngeni ic sogong dafiguc mekecdae?” deu yeni “Seweng” degec.

‡ 7:31: Dekaporisi imoc titiha taong 10.

⁶ Ifi degec negemma Yesungo habu bangecfu matacgecdeac edeyunuec. Edeyunuma ic sogong seweng mema Anutuac ubangerec dema tuema medacfora yemmeu yeneng mederema ngicngac arennu yemmegec. ⁷ Amma ye kondungyangbisic bisic goa metacgecmoc, imoc ifingoc Anutu ubangerec edema faiyemmegecdeac edeyunuec. ⁸ Faiyemmegec yeni negec gebecyunuu yaka tosea tarec, imoc mema kpedzucnegec sakac 7 anec. ⁹ Nga ngic 4 tauseng ihai tacgec, yeni negec wisickeu sueyunuu kengha anggec. ¹⁰ Nga Yesu ye imohaingoc medacforagoc gombau emma Darimanuta bangecfu kenggec.

¹¹ Farisaio yeneng hama Yesugoc yoacngina engemmama anec. Yeni kuha isinggegecdeac faka kuhagoc mong kurumennunac meu henggecdeac derecgemigec. ¹² Ifi degec yeng ongaasuyau ebic meficgema yofi deec, “Naso yomocac ngicngac ngeni nocac faka kuhagoc henggecdeac derecgeandae? Foracngoc, ngicngacareng yomoc ngenearu faka kuhagoc mong naric mi fingecngemmeude, imoc edengunuduae.” ¹³ Ifi dema ngic imoc wayunuma gombau monggoc emma dzohong nobocgeng kenggec.

¹⁴ Naso imohai medac yeni ic sogong nigecyunuu mocgusac gombau taru mekenggec. ¹⁵ Nga Yesungo gorongina kpema yofi edeyunuec, “Ngeni farisaio nga Herode yeneac yis, imocac henghomema kecbisia.” ¹⁶ ifi deu yenaocngoc denegeng amma degec, “Nenang ic sogonnina kpac, imocac amma ifi dede.” ¹⁷ Ifi denegeng anggec ye imoc negemma edeyunuec, “Ngeni ic sogong mi mehadauac denegeng andae nga ngeni yoac imoc wagec. Ngeni herenegen negengngina dzege dzegeaac amma wiac mong mi negentegecdae. ¹⁸ Ngeni kicnginagocngo wiac mi hengandae nga kedzacnginagoc ammanu wiac mi negengandae.”

¹⁹ Ni ic sogong 5 tuema ngic 5 tauseng gumecyunuba tosea taru sakac dafiguc kpedzucnegec wakeec, imoc bic nigecngunuec me?” Kpesiyemmeu yeni 12 degec. ²⁰ “Anu monggoc ic sogong 7 tuema ngic 4 tauseng gumecyunuba tosea taru sakac dafiguc kpedzucnegec wakeec?” kpesiu yeni 7 degec. ²¹ Ifi degec yeng yofi edeyunuec, “Ngeni yaguc ifingoc negengngina mi ireckedengoc.”

²² Anu yeni Betsaida amabangecfu kensikemagec ngicngac yeneng ngic kicpisic mong Yesuaru mehama mariango kpesereudeac desambic ammigec. ²³ Ifi anggec ye kicpisic mariau mema guruama ngadeau hesicke kemma kiwau sofohoma mariango witiau faima kpesimiec, “Ge wiac mong hennec me?” ²⁴ Kpesimi kicpisic yeng kic fima deec, “Ngic yeni sircngina ic isoc yenemba kengha andae.” ²⁵ Ifi deu Yesungo kiwau maria monggoc faiu ngereema wiac sasawa gombunga nga dindingac henec. ²⁶ Henu suema yofi edeec, “Ge amagau kemma taonnusing mi embesena.”

²⁷ Amma Yesungo medacfora yenigoc Kaisarea Firipo taonnu kenggec. Sinnu kemagec yeng medacfora yofi kpesiyemmeec, “Ngicngac yeni neac merac deandae?” ²⁸ Ifi deu degec, “Ngic goango Yohane dokunadzic deandae nga goango Eria amma goa yeneng ine profete mong esea deandae.” ²⁹ Ifi degec yofi kpesiyemmeec, “Anu ngeni ngenaoe ine neac merac deandae?” deu Petorongo deec, “Ge Messiah.” ³⁰ Ifi deu yeng yoac imoc ngic mong mi edeyunugecdeac deracyunuec.

³¹ Anu Yesungo yofi edekpou ayemmeec, “Ngicac Medac ye kpendzeng homac kpebeso. Yudangic enarafocngina nga womong gareng enara amma mitiac negengngic yeneng ye ubango wama kpegec homebeso. Homeu uameme harebec ammanu monggoc gborima yacbeso.” ³² Yoac imocac didiu yombong edeyunuu Petorongo ngadeau wangec kemma tembucfu namma kpetarimiyombonggeec. ³³ Kpetarimiu Yesungo dzigenema kiwa medac yenearu fima Petoro kpetarimima edeec, “Satang, ge ngadenau hakenna. Ge wiac negennec, imoc Anutuarunac kpac, imocngko ine ngicac negeng ande.”

³⁴ Yesungo habu nga medacfora kpacyunuma yofi edeyunuec, “Ngic mong ye ni modacnubeso negendeu ye yengena ubasebiaac songo memama mariponga miacma tofohoma modacnubeso. ³⁵ Imoc yofiac, ngic mong ye kekeha segereudeac negemma uaya mede, ye kekeha sufumiude. Nga ngic mong ye neac amma nga siduc gombunggac amma kekeha waude, ye ine kekeha fingecmiude. ³⁶ Imocac ngic monggo bangetoa

bangec yomocac wiac sasawa meficgeecac kekeha ukuu sufuude, imocngc ngic naric mi meficgeude. ³⁷ Ngickekec monggoc memeaac sing mong mi fede. ³⁸ Imoc yofiac, ngic mongngc neac negenu gameagoc anude amma neac yoacnaac negenu gameagoc ande, yearu yofi fingerude, Ngicac Medacngc Mamaac kuc nga kibikperagiau angero kpetiac yenigoc haude, yeng ngic imoc yeac ifingoc negenu gameagoc anude.”

9

¹ Yesungo torokpema yofi edeyunuec, “Foracngoc, ngic yomoc nandae, ngeneearunac goa mi homemagec Anutuac eucerereng kuhagoc fingectegeru henggecde, imoc eden-gunuduae.”

² Anu uameme 6 wisickemanu Yesungo Petoro nga Yakobo amma Yohane meyunuu tikitoa herea monnu tembuungina kecgecdeac enggec. Emma sebia kicnginai heimeremma sirinha mong yombong anec. ³ Ngakpia hereha kperagima kongac kopolarac yombong anec. Bangecfu ngic mongngc wamba kongac kongac ifia naric mi meficgeude. ⁴ Anu imohaingoc Mose nga Eria fingecyemmema Yesugoc yoac denegeng anoc. ⁵ Ifi anggec Petorongo Yesu edeec, “Kpoukpou, yei kecni songea andeac bedzo bedzo harebec meni. Geac mong nga Moseac mong amma Eriaac mong.” ⁶ Yeni homac kengecyunuecac ye noc wiac debeso, imoc obohoec. ⁷ Ifi nammagec hoeng mongngc hama semeyunumanu hoeng manaunac yoacudumeng mong yofi fingerec, “Yomoc neac Songomedacna, ngeni yeac yoac negembisia!” ⁸ Yoac wisickeu imohaingoc yeni fikengfiha amma Yesungosac yenigoc nanu henggec nga ngic mong mi henggec.

⁹ Nga yeni tikiunac mamagec Yesungo deracyunuma yofi deec, “Ngeni wiac hendau-moc, imocac siduc ngic mi edeyunubisia. Kecma Ngicac Medac homecfunac gborima yaruguc ine debisia.” ¹⁰ Edeyunuu medac yenaocngoc kpesiemegec, “Homecfunac gborima yacyac, imocac hania dafi?”

¹¹ Yeni yofi dema kpesimigec, “Mitiac negen negengngic yeni dafiac Eriango waraima haudeac deandae?” ¹² Ifi degec yofi edeyunuec, “Eriangonoc hama wiac sasawa memengere anude. Nga mitikibiu yofi oho ohoya fede, ‘Ngicac Medac ye kpendzeng homac kpeu desure ammigecde.’ imoc dafiac negensidae?” ¹³ Amma yofi edengunuba, “Eria ye bic haec nga ngic yeni songonginaac arennu faka hania hania ammigec, imoc yeacnoc oho ohoya fede.”

¹⁴ Yeni tikiunac mama medacfura goa yeneng yenearu hama henggec ngicngac homac yeneac botucfu mitiac negen negengngic yenigoc yoacngina engemmama anec. ¹⁵ Nga ngicngac nanggec, yeneng Yesu hemma kpidohoma bic nedzikemma wenacngerec demigec. ¹⁶ Ifi anggec Yesungo kpesiyemmeec, “Ngeni nocac yoacngina engemmama ande?” ¹⁷ Ifi deu habu yenearuac ngic mongngc deec, “Kpoukpou, hadehade mong yoara kpacngc medacnaac enac mema medzickeu gearu mehaduae.

¹⁸ Nga hadehadengo naso homac ye mema kpekpefac ammiande. Ammuu ye hanimaria goriu enaraunac nambang sofororoc ereu enara kirandziande. Imocac medacfocga yeneng asu mangana kporacmigecdeac deba yeni kporacbibiema wadau.” ¹⁹ Ifi deu Yesungo yofi merenec, “Areng yomoc ngeni negen negensingngina kpac yombong. Ni ngenigoc naso herea monggoc tacbadeac modzona tide. Ngeni medac imoc megec hau.” ²⁰ Ifi deu mekenggec hadehadengo Yesu hemma medac kpefahau bangecfu makpeec. Makpeu enaraunac nambang nga sofororoc ereec.

²¹ Ereu Yesungo mama kpesimie, “Hafei yomoc noc nasoac hanahema fingecmiec?” deu mamango deec, “Imoc sabahaungoc fingecmiec. ²² Fингемиу hadehadengo naso homacngoc medac kpehomeudeac gerecfu me dokuu kpefahau kemeande. Nga ge meficnurunadeacsoc andeu sifu ubaga manganeu meficnuruna.” ²³ Ifi deu Yesungo yofi edeec, “Imoc ambadeacsoc, denec. Ngic mong ye negensinggede, yearu wiac sasawa naric fingerude.” ²⁴ Ifi deu imohaingoc medac mamango arohoma deec, “Ni negensinguba negen negensinna wegenedeac geng meficnuna.”

²⁵ Ifi deu ngicngac homacngo Yesuaru nedzima kenggec yeng yenemma asu seuhagoc yoac seria ammima yofi edeec, “Asu kedzacfong amma yoacga kpac, ni edeguduae, ge medac imoc wama erema kemma monggoc dzigenema yearu mi kembesena.” ²⁶ Ifi deu hadehadengo kucgoc yombong arohoma tima erema kenu medac ye homemea isoc feec. Feu ngic yeneng imoc hemma bic homedac degec. ²⁷ Ifi degec Yesungo ine mariau mema miaru yarec.

²⁸ Yaru Yesungo amau enu medacfora yeneng tembucfu yegoc tacma kpesimigec, “Neni dafiac hadehade imoc kporacnideac obohoding?” ²⁹ Ifi degec yeng yofi edeyunuec, “Hadehade ifia yakasege kecma nunumungo kporacbesonga.”

³⁰ Yesu nga medacfora yeni ama imoc wama yofi negemma Gariraia bangec ferecgema kenggec, “Ngicngac yeneng imoc mi negembisia.” ³¹ Nga ye imohai kemma medacfora yofi edekpou ayemmeec, “Ngicngac yeni Ngicac Medac kererema ngic yeneac mariu faigecde. Faigec yeneng ye kpegec homeude. Homeu uameme harebec ammanu gborima monggoc yarude.” ³² Ifi deu yeni ine imoc mi negentegecma kpesigecdeac kengecyunuec.

³³ Anu Yesungo Kafanaung taonnu kensikema amau emma medacfora yofi kpeiyemmeec, “Ngeni sinnu noc wicac denegeng andau?” ³⁴ Kpesiyemmeu waickema tacgec nocac yeni sinnu yenanggarunac merang engena kecde, imocac denegeng anggec. ³⁵ Tacgec Yesungo medacfora 12 kpacyunuma yofi edeyunuec, “Ngic mong ye enara kecbeso negende, yeng ngic tosofora sasawa, ngeneac ngadeu kecma ngeneac kingangkpekpe ambeso.” ³⁶ Ifi dema nambarac yenearunac mong mema botucnginau faima hoanggema yofi edeyunuec, ³⁷ “Ngic mong ye nambarac yenearunac mong yofia neac kpacfу hoanggeude, ye ni hoannude. Nga ngic mong ni hoannude, yeng nisac mi hoannude, kpac. Yeng Anutu suenuec, ye ifingoc hoanggeude.”

³⁸ Anu Yohanengo Yesu yofi edeec, “Kpoukpou, ngic mong ye geac kpacfу hadehade nga yafing kporacyemmeu hending. Amma ye nenanggoc mi kecdeac kpetarimiding.”

³⁹ Ifi deu Yesungo yofi deec, “Ngeni mi kpetarimibisia. Ngic mong ye neac kpacfу ua mong kuhagoc meude, yeng kpacna bic mi demanganeude. ⁴⁰ Ngic mong ye neneac ngaba mi ande, yeng ogonina anude. ⁴¹ Nga ngic mong ye ngeni Kristoac medac dema doku kpakenecfu kpengemmeeu negecde, foracngoc, yeng wiac imocac buma mi obohoude, imoc edengunudae.”

⁴² “Amma nambarac kapia monggo ni negensinnukecde, ngic monggo nambarac ifia faka mangana kpoumibacac amma ye yagucnog dzamandzingtoa ubeau ubahemima kondungtoau ukugec kemeu, imocnggo ngic yearu ngereebac. ⁴³ Nga mariga monggo anggenu kopocsic meficgenadeu ge imoc herecgema ukubesena. Mariga yohockanggoc kecma hofeu gerec pisickepa kpac, imohai kemebanggac maritegec kecma kekecsériu enna ngereeude.

⁴⁴ ‘Hofeu kamangina mi homeude nga gerecngo mi pisickeude.’ (Yesaia 66:24)

⁴⁵ Amma haniga monggo anggenu kopocsic meficgenadeu imoc herecge ukubesena. Haniga yohockanggoc kecma hofeu kemebanggac hanitegec kecma kekecsériu enna ngereeude.

⁴⁶ ‘Hofeu kamangina mi homeude nga gerecngo mi pisickeude.’

⁴⁷ Me kicga monggo anggenu kopocsic meficgenadeu imoc mesiukubesena. Kicga yohockanggoc kecma hofeu kemebanggac kicga mocgusacgoc kecma Anutuac eucerereng manau enna ngereeude.

⁴⁸ ‘Hofeu kamangina mi homeude nga gerecngo mi pisickeude.’

⁴⁹ Ngicngac kondung hosoandae, ifi isoc ngicngac sasawa gerecngo hosoyunubesonga.

⁵⁰ Kondung imoc wiac gombunga nga imocnggo ine kiacma songea kpac anudeu geng songea monggoc naric mi meficgenade. Ngeni kondung songea ubaherenginai mekecma ruaefaka angemmebisia.”

10

¹ Yesungo bangec imoc wama Yudaia bangecfu Yodang nobocgengau kenec. Kensikeu ngicngac habutoango yearu monggoc kemma kpeturanggegec. Kpeturanggegec ye fakaya modacma edekpou ayemmeec. ² Nga farisaio goa yeni ye tobanggegecdeac negemma kpesimigec, “Ngic mong ye enema naric waude, imoc singngo dede me kpac?” ³ ifi degec yofi merengyemmeec, “Mosengo imocac dedeseriyoac dafi ngemmeec?” ⁴ ifi deu yeneng degec,

“Mosengo yofi naric annideac deec, ‘Mong ye ngac wabeso dema yeng wawakibi mima wau kembeso.’” (*Dedeseri 24:1-4*)

⁵ Ifi degec Yesungo yofi edeyunuec, “Ngeni ngic ubaseri nga herengina dzege dzegea, imocac Mosengo dedeseriyoac imoc ohongemmeeec. ⁶ Nga hanac hanaheau Anutungo siricngira ngic nga ngac anecdeac, ifi meficyuruec.” (*Fingec fingec 1:27; 5:2*)

⁷ Imocac amma ngicngo nonggomama wayuruma enemaaru kpeketauhau ⁸ yegoc sebi mocgu anecde. Ifi anecdeac yohockang monggoc mi andape, yeri sebi mocgu anecde.” (*Fingec fingec 2:24*)

⁹ Anutungo wiac dzegeec, imoc ngicngo naric mi herecgeboso.”

¹⁰ Nga yeni amau monggoc emma medacfora yeneng imocac kpesimigec ¹¹ Yesungo yofi edeyunuec, “Ngic mongngo enema wama ngac mong meude, ye serofaka enema esea ammiude. ¹² Nga ngac mongngo ewea wama ngic mong meude, ye serofaka ammiude.”

¹³ Ngicngac goa yeni Yesungo nambaracfocnina mariango kpesereyunuudeac meyunu hagec. Hagec medacfora yeneng ine kpetariyemmegec. ¹⁴ Ifi anggec Yesungo imoc hemma negenu homac manganeu yofi edeyunuec, “Nambaracbistic yeni nearu naric hagec, ngeni kpa mi heiyemmegec. Kurumenggac eucerereng imoc nambaracbistic yofia yeneac. ¹⁵ Foracngoc, ngic mong ye nambarac kapia yeni isoc mi anudeu ye Anutuac eucererennu naric mi enude, imoc edengunuduae.” ¹⁶ Ifi dema nambarac tabucyunuma maria witinginai faima kenecyunuec.

¹⁷ Yesungo kembesonga kemmanu ngic mongngo yearu nedzikemma yeac kicfufafoc heima kpesimie, “Kpoukpou gombunga, ni dafi amma kekecseriac maridzoming mebade?” ¹⁸ ifi deu Yesungo yofi edeec, “Ge nocac gombunga denennec? Anutu mocgungo gombunga kecde.

¹⁹ Ge dedeseriyoac bic negennec,

‘Ge ngicngac mi yunuhomebesena, kaisero mi ambesena, hamangec mi mebesena, enacfu faifai mi ambesena, ngic yeneac wiac mong mi wangecyunubesena, nonggo manghocga seseheyurubesena.’” (*Makekeng 20:12-16; Dedeseri 5:16-20*)

²⁰ Ifi deu yeng meremma edeec, “Kpoukpou, ge denec, imoc sasawa sebigborinaungoc angereai.” ²¹ Ifi deu Yesungo yearu kic fima yeac songo negemma yofi edeec, “Ge wiac mocguac kpedadanggenec. Ge kemma finacga sasawa fegende, imoc suena dzo kirecgeu imoc ngicngac makpekpea yemmebesena. Ifi anna kurumenggac dzofinac fingecgenu hama modacnubesena!” ²² Ifi deu ngic ye ueba manganeu negengebirima kenec nocac ye dzofinaha homac femiec.

²³ Kenu Yesungo fikengfiha amma medacfora yofi edeyunuec, “Ngic dzofinactoangi-nagoc yeneng Anutuac eucerereng manau enggecdeac ambibieyombonggegecde.” ²⁴ Ifi deu medac yeneng yoac imoc negemma kerectegec anggec monggoc yofi edeyunuec, “Nambaracfocna negenggec, ngic finactoayagocnng Anutuac eucerereng manau engeng, imoc uatoayagoc. ²⁵ Kamerengo bungic singau engeng, imoc ua efea nga dzofinactoagoc yeng Anutuac eucererennu engeng, imocngi ine uatoayagoc.” ²⁶ Ifi deu yeni kerectegec yombong amma degec, “Ifi anu merang naric komoc kpeude?”

²⁷ Ifi degec Yesungo kiwa yenearu fima yofi deec, “Ngicngac yeni imoc ambibiema wagecde nga Anutungo wiac sasawa naric mema wiac monggac mi obohoude.” ²⁸ Ifi deu Petorongo deec, “Negennec, neni wiacnina sasawa wadacma ge modacguma kecdimbe.”

²⁹ Ifi deu Yesungo yofi deec, “Ni fora yombong edengunuba, ngic mong ye amabangeha me daramunea me nonggomama me nambaracfora me amauaya, imoc neac nga siduc

gombunggac amma waude, ³⁰ yeng turunga mi obohoude. Amma ye wiac wadac, imocac turunga naso 100 monggoc meude. Ngicngac yeni naso yomohai ama nga daramuna amma nonggonasia nga nambaracfora amma amaua migeccde, imoc sisic ammima kpekporac ammimagec mekefude. Nga ngade bangec siriha mong haude, imohai Kebungo kekecseri ifingoc miude. ³¹ Anu ngic warac warac kecdae, yenearunac homacngo ngadea anggecde nga ngadea kecdae, yenearunac homacngo warac warac anggecde.”

³² Anu yeni sing modacma Yerusarennu kengkecmagec Yesungo waraiu medacfora yeni ye modacma negenggec wiac kuneng anec nga goa ye modacgec, yeneng kengec anggec. Nga Yesungo medacfora 12 ngadeau meyunuma wiac fingecmiude, imocac yoac edeyunuec. ³³ “Negenggec, nenang Yerusarennu endimbe. Enni ngic yeneng Ngicac Medac womong gareng enara nga mitiac negen negengngic yeneac mariu faigec, yeneng ye homeudeac desigecde. Desima ye bangec monnunac ngic Anutu mi negemmidae, yeneac mariu faigecde. ³⁴ Faigec, yeneng faifagoc ammima sofohoma dzikacngo kpema kpehomegecde. Nga uameme harebec ammanu ye monggoc gborima yarude.”

³⁵ Anu Dzebedaoac medahora, Yakobo nga Yohane, yereng Yesuaru kemma deoc, “Kpoukpou, neri wiac monggac derecgede anecmenadeac negendipe?” ³⁶ Ifi deec kpesiyemerec, “Ni noc wiac angecmebadeac negendape?” ³⁷ Kpesiyemeru deoc, “Kecma kibikperagigau nerearunac mongngo foigau nga mongngo kanagau tacdede, imoc deserinemecna.”

³⁸ Ifi deec Yesungo yofi edeyuruec, “Ngeri wiac kpesimalde, imocac hania mi negenghomede. Neng kpenzenggac kpakenecfu nebade, ngeri imoc ifingoc neecdeac dedape nga doku nadzicbade, ngeri imohai nadzirecde me?” ³⁹ Ifi deu yereng deoc, “Oc, naric andede.” ifi deec Yesungo yofi edeyuruec, “Ni kpakenecfu nebade, imoc ngeri ifingoc neecde nga doku nadzicbade, imoc ngeri ifingoc nadzirecde. ⁴⁰ Nga merang foinau me kananau tarude, imocac fora ine neng naric mi desibade. Tatac imoc ngic damoc yeneac mengec mengerea fede, yeneng ihai tacgecde.”

⁴¹ Anu medacfora 10 yeneng imoc negemma Yohane nga Yakobo yereac negenggec manganeec. ⁴² Manganeu Yesungo kpacyunu kenggec yofi edeyunuec, “Bangec monnunac ngicngac enarafocngina deyecdeyemmea, yeni ngicngac yeneac ngickuneng siricfu yenigoc kecandaec kuc feyemmede. Nga kunengfocngina yeni kuc feyemmeu ngicngacfocngina yeneng yoacngina modacgecde, ngeni imocnoc negenda. ⁴³ Nga ngenearu faka ifia ine mi fingecbeso, kpac. Ngenearunac ngic mongngo engena kecbeso ammide, yeng ine botucnginau kingang kpekpengina kecbeso. ⁴⁴ Amma ngeneac botucfunac mongngo warac warac ambeso ammide, yeng tosotora sasawa, yeneac wanacngic kecbeso. ⁴⁵ Imoc yofiac, ngicngac yeneng Ngicac Medac kingang kpemigecdeac mi maec, kpac. Yeng ine yeneac kingang kpema ngicngac homac yungecyunuma kekeha wau yeneac doudeac maec.”

⁴⁶ Yesu nga medacfora yeni Yeriko taonnu kensikegec. Ihai kecma ngicngac habutoa yenahafoc Yeriko monggoc wagec. Wamagec ngic kicpisic mong kpara Batimaio, imocac titiha Timaoac medac, yeng sing tegiau tacma iwaiac derecgekefec. ⁴⁷ Derecgekefu Yesu Nadzarete taonnunac, yeng hama kende, yeni yoac ifi degec ye imoc negemma kucgoc kpacma deec, “Yesu, Dawidiac bangec, ge neacnec ubaga manganeu.” ⁴⁸ Ye serima ifi kparu ngicngac homacngo waicke tarudeac egegec. Edegec yeng ine seria monggoc kparec, “Dawidiac bangec, ge neacnec ubaga manganeu.”

⁴⁹ Kparu Yesungo namma yofi deec, “Ngeni kpacgec ye nearu hau.” deu ngic yeneng ngic kicpisicac kpacma degec, “Ye kpacgude, ge ubaga ngereeu yacma kenna.” ⁵⁰ Ifi degec ngic ye ngakpihereha ukuma futucke yacma Yesuaru kenec. ⁵¹ Kenu Yesungo kpesimiec, “Ni noc wiac anggembadeac negennec?” deu ngic kickundungngo deec, “Kpoukpou, kicfifi ambadeac negenduae.” ⁵² Ifi deu Yesungo yofi edeec, “Negen negensinggango mengeregudac imocac naric kenna!” Ifi deu ye imohaingoc kicfifi amma Yesu sinnu modacma kenec.

11

¹ Anu yeni kengkecma Yerusareng taong mewegenebeso amma Oriwa tikiu Betefage nga Betani amabangec tarocfu kensikegoc. Kensikemagec Yesungo medacfora yenearunac ngic yohockang sueyuruma yofi deec, ² “Ngeri dindingac kemma guruama sing enarau tacde, imohai emma donggi medaha mong ngicngo witiau mi tatara, imoc witickegoc nande, ngeri imoc meficgema witic yungecma mema haec. ³ Yungerec ngic mongngo kpesingemecma deude, ‘Ngeri dafi anecdeac andape?’ ifi deu yofi edebesera, ‘Kebungo imogcok ua meudeac dede.’ ifi deec minginango donggi bic faiu haude.”

⁴ Ifi deu yeri kemma donggi medaha sinnu ama naguyau witic witickea nanec, imoc hemma yungeroc. ⁵ Yungerec ngic goa ihai nanggec, yeneng yeremma degec, “Ngeri dafi negemma donggi medaha yungecdape?” ⁶ Ifi degec yeri Yesungo yoac edeyuruec, imoc edeyunuec yeni negemma wayurugec kenoc. ⁷ Kemma donggi Yesuaru mekemma ngakpingira herea hesima donggi medaha witiau tiameec Yesungo imocac witiau tarec. ⁸ Taru ngicngac homacngo ngakpingina herea hesima sinnu tiamegoc goango ua tegiaunac ic fawa herecgema sinnu faikenggec.

⁹ Nga ngicngac kiwau kenggec nga ngadeau modacgoc, yeneng kpacma yofi degec, “Ohec, ngic Kebuac kpacfu hade, ye kenehagoc, hosanna. *(Mitiyegec 118:26)*

¹⁰ Mannina Dawidiac eucerereng hade, imoc kenehagoc. Wi kurumennu kpara den geregoc, ohec waec, hosanna.”

¹¹ Yesungo ifi Yerusarennu emma Anutuac womonnu enec. Emma hennegeng andacma ama marai anecac medacfora 12 meyunuu Betania amau kenggec.

¹² Wereckengau yeni Betania wama mama Yesungo hereaac homeec. ¹³ Homema hereau fima fig ic mong maria tengging tengging henec. Hemma negenu foragoc isoc anu ic haniau kensikema maria meficgeec. Fig nasoya mi anecac ifi anec. ¹⁴ Nga ye fora hofocma ic yofi edeec, “Gearunac ngic mongngo fora monggoc mi nebeso.” ifi deu medacfora yeneng yoac imoc negenggec.

¹⁵ Yesungo Yerusarennu kensikema Anutuac womonggac oda manau enec. Emma ngic wiac emekpesi anggec, yeni imohacnac kporacyunuec. Ye ngic hiedzo emekpesi anggec, yeneac tebo heimerenec nga kebesac emegec, yeneac tatac heimeremma ¹⁶ Anutuac womong manau wiac ifia meenggecdeac kpetariyemmee. ¹⁷ Kpetariyemmee yofi edekpou ayemmeec, “Yoac yofi oho ohoya fede,

‘Amana imoc bangeha bangeha ngicngac sasawa yeneac nunumuama, kpara ifi kpacbesonga.’ *(Yesaia 56:7)*

Nga ngeneng merenggec imoc ine hamangecngic yeneac sufu sufuama ande.” *(Yeremaia 7:11)*

¹⁸ Ifi deu womong gareng enara nga mitiac negengngic yeneng imoc negemma ye kpegecdeac sing hofocgec. Nga habu sasawango yeac kpoukpouyaac negenggec engena anec nga yeni ine yeac kengcyunuec. ¹⁹ Nga ama marai anu Yesu nga medacfora yeni taong wama kenggec.

²⁰ Wereckengau yeni sinnu kemma henggec fig ic imoc godeaunacngoc sokuema nanec. ²¹ Nanu Petorongo imoc hemma negensima Yesu edeec, “Kpoukpou ge henna, ge fig ic soweckedang, imoc bic ururuema nande.” ²² ifi deu Yesungo yofi merennec, “Ngeni Anutu negensinggebisia. ²³ Foracngoc, ngic mong ye ubeau negengyohoha kpac kecma wiac mong me mong dema imocac fora fingerudeac negensiudeu yeng tiki edimoc yacma kondunnu kemeu deu imoc foranoc fingerude, imoc edengunuduae. ²⁴ Ni imocac amma yofi edengunuduae, ngeni wiac imocac me imocac negensima menide, ifi negemma negensinggema numugec wiac imoc fingeengemmude.

²⁵ Anu ngeni namma numuandae, imohai ngic monggac wiac me monggac ngaba mekecdaeu kopocsiha wabisia. Ifi anggec kurumeng Mangginango ngeneac kopocsic ifingoc waude. ²⁶ Nga ngeni ngic yeneac kopocsic mi wagecdeu ine Kurumeng Mangnginango ngeneac kopocsic ifingoc mi waude.”

²⁷ Yesu medacforagoc yeni Yerusarennu dzigene enggec. Emma Yesungo Anutuac womong manau yerecgemanu womong gareng enara nga mitiac negen negengngic amma enarafocngina, yeneng yearu hama kpesimigec, ²⁸ “Ge noc kucfu ua yomoc menec nga merang ua imoc menadeac uayoac genec?” ²⁹ Ifi degec Yesungo yofi merengyemmeec, “Ni yoac mong kpesingemmeba turunga edenugecguc ni ifingoc uakibinaac hania imoc edengunubade.

³⁰ Yohanengo dokunadzic ua mekefec, ua imoc kurumennunac me ngicfunac, ngeni imoc edenugec negemba.” ³¹ Ifi deu yeni yenaocngoc denegeng amma degec, “‘Imoc kurumennunac.’ ifi denideu yeng yofi kpesinemmeude, ‘Ifi negemmaguc ngeni nocac ye mi negensinggegoc?’” ³² Nga ngicfunac, imoc debesonga ngic yeneac amma kengencyunuec. Nocac ngic yeni sasawango Yohane ye profete fora, ifi negenggec. ³³ Imocac yeni Yesu meremmigec, “Imoc mi negendimbe.” degec Yesungo yofi merengyemmeec, “Ifi degec, ni ifingoc noc uayoacac kucfu ua mekecduae, imoc mi edengunubade.”

12

¹ Yesungo monggoc yoac heima yofi edeyunuec, “Ngic mongngo waing ua gboria mong homecma oda dzegeec. Dzegema waing tidzac tidzameac teng usuma gareng yeneac kicfifiac amaherec meec. Meu wisickeu waing ua garenggegcedeac ngic maficyunuma yenigoc yoac dedzege anggec nga yengenaoc ine bangec hereau kenec. ² Kemma kecmanu fora kpememe naso hau wanacngiha mong sueu waingngic yenearunac waing uaac fora noboha yeac anec, imoc meudeac kenec. ³ Kensikemanu waingngic yeni wanacngic mema dzoboya kpema entegeng suegec kenec. ⁴ Kenu minginango wanacngic mong yenearu sueu kenu yeneng ye kpefuhama desofoc ammigec.

⁵ Ifi ammigec ua minginango serima wanacngic monggoc mong sueu yenearu kenu ye kpehomegec. Kpehomegec ua minginango wanacngic homac sueyunuu kenggec ua ngic yeneng medac goa dzoboyunugec nga goa ine yunuhomegec. ⁶ Wisic wisickeau ua minginango songomedacyombonga mocgu kefec, ye yofi negemma sueec, ‘Yeni sifu medacyombonna eweheimigecde.’ ⁷ Ifi negemma sueu ua ngic yeneng ine medacyombonga hemma denegeng amma edeemegec, ‘Yeng kecma ua yomoc tiu enude, imocac ngeni hagec kpeni bangeha nga maridzominga imoc nenang ambeso.’ ⁸ Yeni ifi dema ua minginaac medacyombonga mema kpehomema farenga waing ua ngadeau ukugec kemema feec. ⁹ Anu ua minginango dafi anude? Ye hama waing ua ngic yunuhomema waing uaya imoc ua ngic areng mong yemmeude.

¹⁰ Mitikibiu yoac yofi oho ohoya fede,
‘Amameme ngic yeneng hoc mong mangana dema ukugec. Nga hoc imocngo amaac
hoc wotung amma seria nanude. ¹¹ Nga faka imoc Kebu yengenaoc meu ngicng
hensongo ammidimbe.’ Ngeni yoac imoc osonegeng angandae.” *(Mitiyegec
118:22-23)*

¹² Nga Yesungo enara yeneac negemma yoac imoc heima deec, yeni imoc bic negenggec. Nga yeneng ye mendanggegecdeac sing ine hofogec. Nocac yeni ngicngac yeneac kengencyunuu wama kenggec.

¹³ Ngicenara yeneng Yesu tobanggegec yoacdedeau makpeu yoacfу faigecdeac negemma yofi anggec. Yeni farisaio nga Herodeac arennunac ngic goa yearu sueyunugec ¹⁴ yeneng Yesuaru hama degec, “Kpoukpou, yoac fora dema ngic engena me mamea yeneac mi negensian nec. Ge ngicngac areng socfungoc ayemmekc nec, imoc negendimbe. Nga ge Anutuac sing dindingac edekpou anemmekc nec. Ifi anu ngictau Sisa takesi mibesonga me mi mibesonga, singngo dafi dede? Nenang ngictau Sisa takesi naric minide me kpac?”

¹⁵ Ifi degec Yesungo ikocfakangina negentegecma yofi edeyunuec, “Ngeni nocac faitobannu fainudae? Ngeni dzo mong maficgema edzacnugec hemba.” ¹⁶ Ifi deu yeni dzo mong migec yeng imoc hemma yofi kpesiyemmeec, “Onga nga kibi yoc, imoc meracac?” kpesiyemmeu degec, “Imoc Sisaac.” ¹⁷ Ifi degec Yesungo yofi edeyunuec,

“Imocac ngeni Sisaac wiac, imoc Sisa mibisia nga Anutuac wiac, imoc Anutu mibisia!” Ifi edeyunuu negemma kpidohogec.

¹⁸ Sadukaio areng yeni homecfunac yacyac mi fede, ifi dekecdae. Nga yeneearunac ngic goa Yesuaru hama kpesimigec, ¹⁹ “Kpoukpou, Mosengo dedeseriyoac yofi ohonemmeec, ‘Ngic mong ye ngac mema gboriha mong mi kpeficge kecma homeudeu ngac ye kefu muneango daraac hodzec mema gboric kpeficgema daraac kpac miacbeso.’ *(Dedeseri 25:5-10)*

²⁰ Naso monnu daramuna seweng yeni kecgec. Nga waracdacnginango ngac mong mema gboriha kpac kecma homeec. ²¹ Homeu muneango ngac imoc mema ye ifingoc gboriha kpac kecma homeec. Homeu munea mongngo faka imocngoc anec. ²² Nga daramuna seweng yeni ngac imocngoc mema gboricfocngina kpac kecma homedacgec. Homedacgec hodzecngina kecma ngade homeec. ²³ Homeu ngic seweng yeneng ngac imocngoc megecac kecma yacyac nasou homecfunac yacgecde, imohai ngac imoc meracac enema anude?”

²⁴ Ifi degec Yesungo meremma yofi edeyunuec, “Ngeni mitikibi nga Anutuac kuc, imoc mi negentegecdae, imocac amma yoac desufudae. ²⁵ Kecma homegec yeneng homecfunac yacgecde, imohai ngicngac yeni mi meemegecde. Nga manggac mongngo ‘Ni naroanna ngic mibade.’ imoc naric mi deude. Yeni imohai kurumenggac angero, yeni isoc anggecde. ²⁶ Nga homecfunac yacyac deba, ngeni yoac yomoc Moseac kibiu imoc osoandae, Mosengo icfu gerecborang fingeru hemma ihai kenu Anutungo yofi edeec, ‘Ni Abrahang nga Isaka amma Yakobo, yeneac Anutu.’ *(Makekeng 3:6)*

²⁷ Nga ye ngic homemea yeneac Anutu kpac. Ye ngic gbori kecdae, yeneac Anutu. Ngeni sing homac yombong segera kecdae.”

²⁸ Anu Yesugoc demereng anggec, yeng turunga gombunga merengyemmeu mitiac negen negengngic yeneearunac mongngo imoc hemma Yesuaru hama kpesimie, “Dedeseriyoac damocngo engena yombong ande?” ²⁹ Ifi kpesimi Yesungo yofi deec, “Dedeseriyoac engenangina yofi fede, ‘Israengic ngeni negenggec, Kebu Anutunina ye mocgu nga ³⁰ ge ubaherega nga ongaga amma negen negengga nga kucga sasawa, imoc hafoangoc Kebu Anutugaac heresongo negemma kecbesena.’ *(Dedeseri 6:4-5)*

³¹ Nga mong yofi,

‘Ge geangga anggengande, siriha imocngoc ngicngac gegoc wegna kecdae, yeni heresongogoc hoangyunubesena.’ *(Sesememe 19:18)*

Dedeseriyoac imoc yereac engena mong mi fede.”

³² Ifi deu mitiac negen negengngicgo meremmiiec, “Gombunga kpoukpou, ge fora yombong denec. Anutu ye mocgu, mongngo ye isoc mi kecde.* ³³ Nga ubaherega hafoangoc nga negen negengga hafoangoc amma kucga hafoangoc yeac songo heregoc negemma kecbesena amma geangga anggengande, siriha imocngoc ngicngac gegoc wegna kecdae, yeni heresongogoc hoangyunubesena, wiac imocngonoc Anutuac hosuc heihei amma sese hania hania ferahade.”

³⁴ Ngic ye gombunga yombong merenu Yesungo negemma yofi edeec, “Ge Anutuac eucererenggac hereau mi kecne.” Ifi deu yeni Yesu monggoc kpesimigecdeac kengecyunu wagec.

³⁵ Yesungo Anutuac womonnu edekpou ayemmemma yofi kpesiyemmeec, “Mitiac negen negengngic yeneng Messia ye Dawidiac kisicfunac nocac deandae?” ³⁶ Dawidi ye Asungo meefaiu yengenaoc yofi deec,

“KEBUNGO neac Kebu edeec, ‘Ge foinaugeng tacmana ngabafocga yeni hanigaac bageu faiyunubade.’ *(Mitiyegec 110:1)*

³⁷ Dawidi yengenaoc ‘Neac Kebu’, kparec. Nga Messia ye dafiu Dawidiac bangeha ande?” Ifi deu ngicngac habutoa yeneng negendzidziegoc.

* 12:32: Yesaia 45:21

³⁸ Ifi anggec Yesungo edekpou ayemmemma yoac yofi torokpema edeyunuec, “Ngeni mitiac negen negengngic yeneac henghomema kecbisia. Yeni songonginaac amma ngakpi herea heima kecgec ngicngac yeneng wenacngerec deyemmegecdeac emenecfu kenghaandae.” ³⁹ Amma kpekpeturang amau nga yakatoa nasou warac warac tatacfu tacbesonga songongina angkecde. ⁴⁰ Amma yeni ine ngachodzec yeneac ama wange-cyunuandae. Amma negen ngereengunugecdeac nunumu herea here numuandae. Yeni ikocfaka ifia angandaeac turunga ebiriangoc megecde.”

⁴¹ Anu Yesungo womonggac sesekatapa nobohau tacma henu ngicngac homacngo dzo imohai faigec kemeu ngic finactoagoc homacngo hama dzo ebiriangoc faigec kemee. ⁴² Anu ngac hodzec mongngo ifingoc hama peni saccac yohockang faiu kemee, imoc toea mong kapianecsac. ⁴³ Faiu Yesungo medacfora deu hagec yofi edeyunuec, “Foracngoc, ngac hodzec hiedzoya kpac yombong dzo faidacmoc, yeng ngicngac sasawa sese faidau, yeni feracyunude, imoc edengunuduae. ⁴⁴ Ngicngac tosea sasawa, yeneng finactoangina wakema made, imohacnac sesengina faidau. Nga ngac ye ine wiac femidac, imocnoc hafoangoc faidacma entegeng kecde.”

13

¹ Anu Yesungo Anutuac womonnunac mama kemmanu medacfora yenearunac mongngo edeec, “Kpoukpou, hoc gombunga gombunga nga ama kuneng kuneng tackende, imoc henna.” ² Ifi deu Yesungo yofi edeec, “Ama kuneng kuneng tackenu hennec, imoc kecma naso mong haude, imohai wasaingic yeneng imoc sasawa hembarackegecde. Hembarackegec hoc mongngo monggac witiau wagec mi tarude.”

³ Yesungo Oriwa tikiu Anutuac womong kiwa dindingacfus tacmanu Petoro nga Yakobo amma Yohane nga Anderea, yeneng yegoc tembucfu kecma kpесimigec, ⁴ “Ge yoac dedang, imoc noc nasoac fingerude nga naso imohai noc soi fingecmanu yoac sasawa imoc seriude?”

⁵ Ifi degec Yesungo yofi edeyunuec, “Ngic mongngo ikocfu wangeckngunubacac ngeni henghomema kecbisia. ⁶ Ngic homac yeneng hama neac kpac kpacma degecde, ‘Ni Messia.’ ifi dema ngicngac homac uba mesufu ayemmegecde.

⁷ Dzikactoaac siduc bangec wegenaunac nga bangec hereaunac hau ngeni imoc negemma mi kpidohobisia. Foracngoc, faka ifia fingecbeso. Nga naso wisic wisickea ine imohai bic mi haude. ⁸ Bangecareng goa yeneng bangecareng ogofocknginagoc dzikac kpema kecgecde. Nga ngictau monggac arengngo ngictau monggac areng yenigoc ngaba angemegecde. Bangec monnu nga monnu usoc meude amma bodinaso fingekenude. Nga faka yomoc, imoc wiac gboria fingecbeso andeac ngac gadze kiude ifi isoc ande. ⁹ Imocac ngeni ngenaocngoc garengemema kecbisia. Ngic yeni yoacfu faingunugecde amma kpekpeturang amau dzikacngoc ngunugecde. Amma yeni neac amma ngictau nga gawana yenearu yoacfu faingunugec ngeneng ihai namma ni dekperaginubisia.

¹⁰ Ngeni bangeha bangeha ngicngac siduc gombung edekpou ayemmegec negendacgecguc ¹¹ ngic mengunuma ngic goa yeneac mariu faingunugecde, ngeni naso imohai, ‘Dafi denide?’ dema mi negengebiribisia. Tiri Asungo naso imohai yoac enacnginai faiude, ngeni imoc debisia. Ngeni yoac imohai degecde, imoc Tiri Asuarunac ambeso. ¹² Anu dac mongngo munea enara yeneac mariu faiu yeneng homecfu faigecde nga manggac mongngo medahaac imocngoc anude. Nga nambarac yeneng nonggo mangfocngina deendema ayemmemma homecfu faiyunugecde. ¹³ Nga ngicngac sasawa yeneng neac kpacnaac amma ngeni ubango ukungunugecde. Nga ngic mong ye seserigoc kecmanu nasotoa haude, yeng komoc kpeude.

¹⁴ Anu ngic mong ye yoac yomoc osoude, yeng imoc negentegecbeso. Wiac mangac manganea wiac sasawa kpetotieude, imocngoc amma kpaeagocfu emma nanu henggecde,* faka imoc fingeru ngicngac Yudaia bangecfu kecdae, ngeni worama tikiu embisia. ¹⁵ Nga mong ye ama witiau tacde, ye kemema ama manau emma wiac mong mi mebeso. ¹⁶ Nga

* 13:14: Imoc ama kpetiac. (Danie 9:27; 11:31; 12:11-13)

mong ye semeng uau nande, ye ngakpi hereha meudeac mi dzigenebeso. ¹⁷ Amma ngac heregoc kecdae nga nenggac sabac namuu meyunukecdae, yeni naso imohai ebictoanginagoc anggecde.

¹⁸⁻¹⁹ Naso imohai kpendzeng kuneng siriha mong yombong figerude. Anutungo hanac hanaheaunac bangec sasawa maficgeecfunacngoc erema yaguc kecdimbe, naso imocac manau kpendzeng ifia mong mi fingerec amma ngade naric mi fingeccbesande. Imocac amma ngeni wiac imoc nomannasou mi fingerudeac numubisia. ²⁰ Kebungo naso imoc mi mewegenebac dede ngic mongngo komoc naric mi kpebac. Ngic meisingsyunuyunuuya, yeneac amma naso imoc bic herecgea fede.

²¹ Naso imohai yoac yofi fingerude, ‘Henggec, Messia yei fingeccde.’ me, ‘Ye edi fingeccde.’ Ngicngac ifi degecdeu ngeni mi negensingyunubisia. ²² Imoc yofiac, ngicngac fingeccma ikoc amma degecde, ‘Ni Messia.’ yeni nga profete ikoha yeneng fingeccma ngicngac uba mesufu ayemmegecdeac ngicngac tobangyunuma faka kuhagoc nga morora megecde. Amma yeni sing maficgegecdeu ngicngac meisingsyunuyunuuya ifingoc ikocfu wangecyunugecde. ²³ Faka sasawa imoc mi fingeccmanu imoc bic edengunuduae. Ngeni imocac negemma henghomebisia.

²⁴ Anu kpendzeng imoc wisickemanu imohai ‘wenackiwa kundung kpeu afokperagia mi fingerude. ²⁵ Nga asomeng yeni kurumen-nunac fotockema magec kurumenga kurumenga yeneac kuc sasawa kpemindza-hegecde.’ (*Yesaia 13:10; 34:4*)

²⁶ Naso imohai ngeni Ngicac Medac henggec yeng kuctoaya nga kibikperagitoayagoc-ngo hoennu haude.† ²⁷ Hama angerofora sueyunuu bangec nga kurumeng tegia noboc noboc wisickede, imohai kenggec yengenaoc ngicngac meisingsyunuec, yeni kpedzucyungecde.

²⁸ Fig icngo hania edekpou angemmeu ngeni imoc negenghomebisia. Fawaya doku doku amma besaiu ngic ngeni yofi negengandae, wenac naso ande. ²⁹ Nga ngeni wiac dedua, imoc fingeru hemma ifingoc yofi negembisia, Ngicac Medac nasoya bic wegenema hama nagu ngadeau nandenoc. ³⁰ Foracngoc, areng yomoc ngeni mi homemagec wiac yomoc fingeccdarude, imoc edengunuduae. ³¹ Foracngoc, bangec nga kurumeng yeri kecma kpac anecde nga neac yoac ine mi kpac anude.

³² Nga faka imoc noc uamemeu amma auanofu fingerude, imoc mongngo naric mi negenude. Kurumenggac angero yeni imoc mi negenggecde nga Medacnggo ifingoc mi negenude. Manggacngosac naso imoc negende. ³³ Ngeni garengngina mema ubagbori kecbisia. Nocac ngeni naso mi negenda.

³⁴ Imohai faka yofi isoc fingerude, ngic mongngo amea wama bangec monnu kenudeac negenec. Ifi amma ye amagareng wanacngicfora amaac wiac uanginaacsoc garenggegecdeac uayoac deyemmemma nagugareng naguu kicfifi nanudeac edeec. ³⁵ Imocac ngeni ubagbori kecbisia. Minginango ama toforemanu me tofocnac dzongiau me ama werec wereckenggac me asoac nasou dzigeneude, ngeni imoc mi negendae. ³⁶⁻³⁷ Ngeni gaufemagec hama ngenembacac yoac yomoc ngeni nga ngicngac goa sasawa edengunuduae. Ngeni imoc negemma ubagbori kecbisia.”

14

¹ Makekenggac naso nga ic sogong yisya kpac nene, imocac hombanggac uameme yohockang feec. Femanu womong gareng enara nga mitiac negen negengngic yeni Yesu nofusing kic mesufu ammima mema kpegec homeudeac sing hofocma ² yofi degec, “Ngicngac yenearu dzikac sicsauc fingeccbacac amma ye hombang nasou mi mebesonga.”

³ Anu Yesungo Betania amau ngic mong kpara Simong kubecserigoc, yeac amau yaka netarec. Netacmanu ngac mongngo alabastros kirung* mong kerecdoku homung

† *13:26:* Danie 7:13 * *14:3:* Alabastros kirung imoc hocngo memea nga ubahereagoc amma tapea kpac.

kerengagoc metarec, imoc mehaec. Doku imoc narda foraunac memea amma buma engena yombong. Ngacngo imocnac mehama kirung ubea kpetackema Yesuac oruhau kpakema nadzicmiec. ⁴ Nadzicmiu ngic goa ihai tacgec, yeneng imoc hemma dehesi amma degec, “Ye nocac wiac buma engena ifi kpedzonggdede?

⁵ Doku homuna gombunga ifiango kifa mocguac uabung[†] ferahemakirecgeu yeni imoc ngicngac makpekpea yemmegec ngereebac.” Ifi dema ngac yoac gereagoc ammigec.

⁶ Ifi ammigec Yesungo yoacngina negemma yofi edeyunuec, “Ngeni nocac ngacac ifi degec ubaebic maficgeude? Ngeni faka imoc wagec. Ye faka gombunga yombong anende. ⁷ Ngic makpekpea yeni nasosoc ngenigoc kecgec ngeni maficyunubeso angemeu naric maficyunukecgecde. Nga neng ine ngenigoc nasosoc mi kecbade.

⁸ Ngac yomocngo sebina doku homunagocnog nadzicmiu ngeni farennatonggogecde, imocacnac yeng hanahema meefainude. Meefainuma yeac uaareng fede, imoc bic mesiude. ⁹ Foracngoc, ngicngac yeneng siduc gombung bangectoa bangec, imohai kemma ngicngac edekpou ayemmegecde, imohai ngac yomocngo faka anec, imoc ifingoc degec negenggec feude, imoc edengunuduae.”

¹⁰ Anu medacfora 12 yeanearunac mong kpara Yuda Karioto amaunac, yeng Yesu meyemmeudeac dema womong gareng enara yeanearu kenec. ¹¹ Kenu yeni ubangerec negemma dzo migecdeac degec. Ifi degec Yudango naso gombung damohai Yesu doc mema yereac mariu faiude, imocac kicfifi kefec.

¹² Ic sogong yis kpac, hombang imocac hanac hanaheau makekenggac ramamedaha kpeherecge angandae, naso imohai Yesuac medacfora yeneng Yesu kpesimigec, “Neni dahai kemma makekenggac ramamedaha nenideac memengere annideac negennec?”

¹³ Ifi kpesimigec yeng medac yohockang yofi dema sueyuruec, “Ngeri taonnu emma ngic mong dokuenanga tofohoma hau yegoc ewacma ye modacbesera. ¹⁴ Modarec kemma amau enude, ama imohai ama mingina yofi edebesera, ‘Kpoukpouno yofi kpesigende, “Ama mana damohai mengerenenna ni medacfocnagoc makekenggac ramamedaha nenide?”’ ¹⁵ Ifi deec yeng ama witiau amamana mong kuneng ihai wiac bic mengec mengerea tacdacde, imoc edzacnguruu ngeri imohai iwainina mengerebesera.”

¹⁶ Ifi deu medac yeri ama wama taonnu enoc. Emma Yesungo edeyuruec, imocac sirihau wiac maficgedacma makekenggac ramamedaha ohomengere anoc.

¹⁷ Anu ama toforemanu Yesu nga medacfora 12 yeningoc kensikegec. ¹⁸ Kensikema yaka netacma Yesungo yofi deec, “Foracngoc, ngeneearunac mongngo ni ngaba yeneac mariu fainuude, yennoc nigoc yaka nede, imoc edengunuduae.” ¹⁹ Ifi deu medac yeni negengebirima tembus tembus kpesimigec, “Ge imoc neac denec me?” ²⁰ Ifi degec, yeng yofi merengyemmeec, “Imoc medac 12 ngeneearunac mong anu yeng nigoc ic sogong terau nemuruckede.

²¹ Ngicac Medac ye wangunuma kenude, imoc neac negemma oho ohoya bic fede. Nga ngic ye Ngicac Medac doc meude, ye ine sowehegoc. Ye nonggeaac here manaunac mi fingecbacfu efaibac.”

²² Anu netacmagec Yesungo ic sogong mong mema Anutu ubangerec edema ic sogong imoc mendzicma medacfora yemmem yofi deec, “Ngeni yomoc megec, imoc fusina.”

²³ Ifi dema kpakenec mong mema Anutuac ubangerec dema sasawa yemmeu negec.

²⁴ Negec yofi edeyunuec, “Yomoc neac sac, imocngo dzadzahac amma imoc ngicngac homac yeneac amma kpetic kpetinggea. ²⁵ Foracngoc, ni waing gbomeaac dokuya monggoc mi nene kecbarengoc Anutuac eucerereng manau waing gboria nebade, imoc edengunuduae.” ²⁶ Anu yeni Anutuac yegec heigec,[‡] Heima taong wama Oriwa tikiu enggec.

²⁷ Emma Yesungo yofi edeyunuec, “Ngeni sasawango neac negemmanggang amma wanugecde, imoc yofi bic oho ohoya fede.

‘Ni ramagareng kpeba yeni sasawango sinsararang kpegecde.’

(Dzekaraia 13:7)

[†] 14:5: Ye 300 denari deec. [‡] 14:26: Yegec, imoc Mitiyegec 115-118.

²⁸ Anu neng ine gborima yacma waraingemmema Gariraia bangecfu kembade.” ²⁹ Ifi deu Petorongo deec, “Ngicngac sasawango negemmangang amma wagugecdeu neng ine imoc naric mi ambade.” ³⁰ Ifi deu Yesungo yofi edeec, “Foracngoc, yaguc tofocnac kokorecngo arohou atac yohockang mi ammanu geng neac busickpena harebec bic anude, imoc edeguduae.” ³¹ Ifi deu Petorongo serimangoc deec, “Ni gegoc homebade isoc sebi ine naric mi heibade.” Ifi deu ogofora yeni sasawango imocngoc degec.

³² Yesu nga medacfora yeni ua bangec mong kpara Gedzemane, imohai kenggec. Kensikema yeng medacfora yofi edeyunuec, “Ngeni yei tacmagec ni numubade.” ³³ Ifi dema Petoro nga Yohane amma Yakobo meyunuu kenggec. Kemma negen negenga fonggou negengebirima ³⁴ yofi edeyunuec, “Ubaonganango ebiriyombonggeu homebeso anende, imocac ngeni yei garengngina meemema tacgec.” ³⁵ ifi dema kpesima kemma bangecfu makpefema yofi numuec, “Imoc naric anu naso imocnggo feracnubeso.” ifi ³⁶ numuma yofi deec, “O Manggac manna, gearu wiac sasawa imoc efea. Ge kpakenec yomoc wangecnuna. Anu neac songo ine mi seribeso, kpac. Geac songo nga negen negeng imoc seribeso.”

³⁷ Ifi numuu wisickeu dzigenema medacfora yenearu hama yenenu yeni gau fegec Petoro yofi edeec, “Simong, ge gau fenec, ge naric aua mocguac manau gaugbori kecbang me? ³⁸ Nga faitobannu embauac ngeni ubagbori kecma numugec. Ongaasungo efaide nga sebingo ine ebiride.”

³⁹ Ye ifi dema monggoc kemma nunumu imocngoc numuec. ⁴⁰ Numuma hama yenenu yeni monggoc gau fegec. Nocac yeni kicngina ebiriec. Nga ye yoac deu yeni meremmigecdeac obohogec. ⁴¹ Nga ye atac harebecfu dzigene hama yenemma yofi deec, “Ngeni gau femangoc kecdae, imoc naric mi ande. Yaguc ine wisickede nga naso bic hadac. Negenggec, ngic yeni Ngicac Medac kererema kopocsicmeme yeneac mariu faigecde. ⁴² Benukererec ngicngko hadeac amma ngeni yacgec kenni!”

⁴³ Anu Yesu ye ifi demanungoc medac 12 yenearunac mong Yuda, yeng hau habu kunengngko wasaibeang nga gbarucnginagoc ye modacgec. Anu yeni womong gareng enara nga mitiac negen negengngic amma yudangic enarafocngina sueyunugec, yenearunac hagec. ⁴⁴ Hagec benukererec ngicngko yofi derecgeyemmeec, “Ni ngic muduckebade, ngeni yenoc mendanggema garenggeyombonggemamekembisia.”

⁴⁵ Anu Yuda ye hama Yesuaru bic kemma, “Kpoukpou.” dema muduckeec.
⁴⁶ Muduckeu yeni Yesu maria noboc noboc mema mendanggegec.

⁴⁷ Mendanggegec medac yenearunac mongngo ine wasaibeang kpedzima womong garengtoaac wanacngic kpema kedzaha noboc herecgeec. ⁴⁸⁻⁴⁹ Nga Yesungo yofi edeyunuec, “Ni wenacsoc ngenigoc kecma womonnu edekpou angemmeba ngeni imohai ine mi menugec. Nga yaguc ine godzungic meandae, ngeni ifi isoc wasaibeang nga gbaruc mema menugecdeac hadae.” Yoac mitikibiu fede, imoc sasawango ine fingecdacbeso.

⁵⁰ Yesungo ifi deu yeac areng sasawango ye wama kengec woragec.
⁵¹ Anu sebigborimedac mongngo kporuc linengngko memea imocsac kpeec, yeng Yesu modaru megec. ⁵² Memagec, yeng kporuc kpesima senggang worama kenec.

⁵³ Anu yeni Yesu mema womong garengtoa yenearu mekenggec. Mekenggec womong gareng enara sasawa nga enarafocngina amma mitiac negen negengngic, yeni kpeturanggema hagec. ⁵⁴ Nga Petoro ye ngadenginai hereaungoc modacyunu kemma womong garengtoa yeac amaac oda manaungoc enec. Emma imohai uamedac yenigoc gerec dzeunegemma tarec.

⁵⁵ Anu womong gareng enara nga yudangic yeneac tutumangtoa memba sasawa adzorogec. Adzoroma yeni Yesungo faka mangana dafi anec dema kpehomegecdeac manganaac kopocsicac yoac anggecdeac obohogec. ⁵⁶ Nga ngic homacngko ikoc amma yeac enacfu faifaiyoac degec nga gubeyaoacnginango socfungoc mi anec. ⁵⁷ Ngic goa yeneng kicnginai emma namma yofi dema enacfu faifai ammigec, ⁵⁸ “Ye yoac mong yofi deu negening, ‘Ni womong yomoc ngicmaringo memea, imoc hembarackema uameme

harebecac manau mong ngicmaringo mi memea mebade.' " ⁵⁹ Nga kopocsicac yoacngina imocngo ine ifingoc socfu mi anec.

⁶⁰ Anu womong garengtoango yacma botucnginai namma Yesu yofi kpesimiec, "Geac yoac dedae, imocac noboha mong mi denade me?" ⁶¹ Ifi deu Yesungo ine waicke namma turunga mong mi merennec. Nga womong garengtoango monggoc kpesimiec, "Ge Messia, Kenec keneheac medac me?" ⁶² Ifi deu Yesungo deec, "Ni imocnac.[§] Anu kecma ngeni Ngicac Medac Kuctoa mingina yeac foiaugeng tacma kurumenggac hoennu kicnginai hau henggecde." (*Mitiyegec 110:1; Danie 7:13*)

⁶³ Ifi deu womong garengtoa yeng ngakpihereha membarackema deec, "Yoacninaac boingicac monggoc mi obohonide. ⁶⁴ Ye Anutu emmima deu bic negendau, imocac dafi negendae?" Ifi deu sasawango ye kopocsihagoc negemma homeudeac deserigec.

⁶⁵ Ifi deserigec ngic goa yeneng sofohoma kiwa kporucng biranggema marigbung gbungngo heima degec, "Ge kpefingyoac dena!" degec gareng nanggec, yeneng ye mema kpegec.

⁶⁶ Anu Petorongo oda manau nammanu womong garengtaac wanac naroang mongngo ihai haec. ⁶⁷ Hama henu Petoro ye gerec dzeunegemma taru kiwa yearu fima deec, "Ge ifingoc Yesu Nadzaretenac, yegoc kefoc." ⁶⁸ Ifi deu Petorongo ine sebi heima deec, "Ye mi negemmiduae nga yoac denec, imoc mi negentegecduae." Ifi dema ama naguyau kemeu kokorec arohoec. ⁶⁹ Arohou wanac naroangng Petoro hemma ngic wegenac nanggec, torokpema yeni monggoc edeyunuec, "Ngic yomoc ye yenearunac mong." ⁷⁰ Ifi deu Petorongo ine monggoc busickpeec.

Nga naso mi hereemanu ngic imohai nanggec, yeneng monggoc degec, "Foracngoc, ge yenearunac mong. Ge Gariraia bangecfunacngoc." ⁷¹ Ifi degec ye yengenaoc sowecemema desopec amma deec, "Ngeni ngic dedae, ye mi negemmiduae." ⁷² Ifi deu imohaingoc kokorecng arohou yohockang anec. Anu Petoro ye Yesungo yoac edeec, imoc negensiec, "Kokorecng arohou atac yohockang mi ammanu geng neac busickpena harebec bic anude." Petorongo imoc negensima ubahodung kuneng mema kiachodung kiarec.

15

¹ Asoacngoc yombong womong gareng enara nga yudangic enarafocngina amma mitiac negen negengngic nga yudangic yeneac tutumangtoa memba sasawa, yeneng yoac deserigec. Deserima Yesu maria dedeckema Piratoaru mekenggec. ² Mekenggec Piratongo Yesu kpesimiec, "Ge yudangic yeneac ngictau me?" ifi deu merenec, "Imocnac geanggaoc denec."

³ Nga womong gareng enara yeneng Yesu yoacfufa yacma hanaya homac degec.

⁴ Ifi degec Piratongo monggoc kpesimiec, "Yeni geac yoac homac yombong dedaemoc, imoc negemma turunga mong mi merennade me?" ⁵ Ifi deu Yesungo turunga monggoc mi merenu Piratongo negeng ua homac meec.

⁶ Anu makekeng nasousoc ngic mong witicamau takefu yudangic yeneng yeac kpara kpacgec Piratongo yenoc witicamaunac wau makefec. ⁷ Amma ngic goa warac ngicngac here miac miac faka amma ngic goa yunuhomegec witicamau faiyunugec, yenearunac ngic mong kpara Baraba. ⁸⁻¹⁰ Nga womong gareng enara yeni Yesuac keracmangang amma yeac mariu mekenggec, Piratongo imoc bic negenec. Ifi negenu habutoa yeneng hama Piratongo angkefec, ifi isoc anudeac kpesimigec yeng meremma yofi kpesiyemmeec, "Yudangic ngeneac ngictau yungecngembeadeac negendae me?" ¹¹ Ifi deu womong gareng enara yeneng habu fenggeyemmegec yeneng Yesu wama ine Baraba naric yungecyemmegecdeac degec.

¹² Ifi degec Piratongo monggoc meremma kpesiyemmeec, "Anu ni yudangic ngeneac ngictau dedae, yeac dafi ambade?" ¹³ Kpesiyemmeu yeneng arohogec, "Ge ye mariponnu kpena homeu." ¹⁴ Ifi degec Piratongo monggoc kpesiyemmeec, "Nga ye noc kopocsic

§ 14:62: "Ni imocnac." imoc Anutuac kpara mong. Ge "Yoac goaac dedekperagi." henna. Hafac 1128.

meec?” deu ine yeneng monggoc seriangoc arohogec, “Ye mariponnu kpebesena.” ¹⁵ Ifi degec Piratongo habu yeneac negen negeng modarudeac negemma Baraba wau kenec. Nga yени Yesuac sebia dzikacngo kpemaguc mariponnu kpegecdeac wasai maringinai wayemmeec.

¹⁶ Anu wasaingic yeneng Yesu mema gawamang yeneac amaoda manau emma wasaingic sasawa hafoangoc kpedzucnegec. ¹⁷ Kpedzucnedacma ngakpiherec mong giweng giweng heimima somang batihema ira isoc oruhau heimigec kemeec. ¹⁸ Kemeu eweheihei siricfu kpacma edegec, “Ohec, yudangic yeneac ngictau.” ¹⁹ Dema yasungo oruhau kpema sofohoma haniaufafoc heima numumigec. ²⁰ Anu yeni defagoc ammigec wisickeu ngakpiherec saccsac imoc hesima yengena wamba heimigec kemeu mariponnu kpegecdeac mema ngadeau kenggoc.

²¹ Kemmagec Kirene taonnunac ngic mong kpara Simong, ye Aresande nga Rufu yereac mangngira, yeng semeng uaunac sinnu hamanu wasaingic yeneng Yesuac maripong tofohoudeac ngombonggegec tofohoec. ²² Tofohou yeni bangec buma mong kpara Gorigata, titiha hatasic, imohai Yesu mekenggoc. ²³ Mekemma sopo mong aengagoc kpara mira, imoc wainggoc yerecgema migec nga yeng ine imoc waec.

²⁴ Anu yeni ye mariponnu kpema wambaya mederema wiac mong me mong merang meude, imocac kpeing kpegec. ²⁵ Yeni asoac 9 kirocfu Yesu mariponnu kpegec. ²⁶ Kpema ye yoacfufaigec, imocac hania tafebisicfu yofi ohogec, “Yudangic yeneac ngictau.” ²⁷⁻²⁸ Anu yeni godzungic yohockang, mong foiau nga mong kanayau yegoc mariponnu momoc yunugec. Ifi anggec yoac mitikibiu oho ohoya yomoc seriec,

“Ye manganameme yenearunac mong, ifi negenggoc.”

(Yesaia 53:12)

²⁹ Anu ngic ihai kengha anggoc, yeni Yesu deendema ammima orucngina kpatitickema degec, “Ngeni ngic imoc henggoc, yeng womong hembarackema wenac harebecac manau monggoc meudeac deec. ³⁰ Ge geanggaoc onggongemema mariponnunac mesiemema mana!”

³¹ Anu womong gareng enara nga mitiac negengngic, yeneng ifingoc ye desusuic ammima denegeng amma degec, “Ye ngic goa onggongyunukefec nga yengena ine naric mi onggongemeude. ³² Ye Messia, Israe neneac ngictau kecdengo yaguc mariponnunac mau hemma negensinggenide.” Nga ngic yohockang mariponnu ifingoc yurugec, yereng ifingoc deendema ammioc.

³³ Wenac dzongiau 12 kiroc ammanu imohai ama kundung kpema kundungngo bangec sokoma fekemmanu 3 kiroc marai anec. ³⁴ Imohai Yesungo ubaudumeng kunengngoc kpacma yofi deec, “Eroi, Eroi rama sabaktani.” Imocac titiha yofi, “Anutuna Anutuna, ge nocac wanudang.”

(Mitiyegec 22:1)

³⁵ Ye ifi kparu ngic wegenac nanggoc, yenearunac goango imoc negemma degec, “Negenggoc, ye Eria kpacsambic ammide.”

³⁶ Ifi degec ngic mongngo nedzikemma kondung sobing mong mema waing aengagocfu nemuruckema yasuu faiu Yesuac enarau enu deec, “Tomai namma henni, Eriango hama mesiude me kpac!” ³⁷ Ifi demanu Yesungo ine ubaudumeng kunengngoc kparu asuya ereec. ³⁸ Ereu womonggac kporuc kuneng* imoc dzongiausing wihacnac tohoma mau yohockang anec.

³⁹ Anu wasaigareng yeac kicfu nanec, yeng Yesungo kparec nga homeec, imoc hemma yofi deec, “Foracngoc, ngic yomoc ye Anutuac medacnoc.” ⁴⁰ Nga ngac goa ifingoc hereau namma faka fingerec, imoc henggoc, yeneac botucfu Maria kpara mong Madara nga Maria, Yakobo mong munea deandae, ye nga Yosec yereac nonggongira amma Sarome, yeni yenahafoc nanggoc. ⁴¹ Yesungo Gariraia bangecfu kefu ngac imoc yenennoc ye modacma meficgekecgec. Amma ngac tosea homac, yeni Yerusarennu yegoc bic kemma ihai ye hemma nanggoc.

* 15:38: Kporuc imoc ama kpetiac nga ama kpetiac yombong, yereac botucngirau faifaia.

⁴² Marai bic anu hombanggac memengereac naso wegene hau sabataac naso femanu ⁴³ Yosefe Arimataia taonnunac, yeng ihai haec. Ngic ye kpactoayagoc yudangic yeneac tutumangtoa, imocac membangina mong amma ye Anutuac eucererenggac tomai kefec. Yeng kengeha kpac Piratoaru kemma Yesuac fareng meudeac kpesimal. ⁴⁴ Kpesimiu Pirato ye Yesungo bic homeec, imocac kpidohoma wasaienara kpacma Yesu bic homedac me kpac, imocac kpesimal. ⁴⁵ Kpesimiu Yesu bic homedac deu Yesuac fareng Yosefe desimie.

⁴⁶ Desimiu Yosefengo linengkporuc mong bummema Yesuac farenga mariponnunac mesiu mau kporucngo tembonggema kicsereu mekenec.[†] Kicsere imoc hocsirau singa usu usuya, imohai farenga faima hoctoa mong kpeditinggeu singa hedzickeec. ⁴⁷ Anu Maria Madara nga Maria Yosec nonggea, yereng Yesuac farenga dahai faiec, imoc henoc.

16

¹ Sabata tatac naso wisickeu imohai Maria Madara nga Maria Yakoboac nonggea amma Sarome, yeneng kemma Yesuac fareng nadzicmigecdeac kerec homunagoc bummegec.

² Bummema sonda gboria hanac hanaheau asoacngoc ama wereckenu kicsereu kemimagec wenac ereec.

³ Anu kemma yenaocngoc denegeng amma degec, “Merang hocsingaa naguya imohacnac hoc kpeditinggenemmeude?” ⁴ Ifi dema kic fima henggec hoctoa imoc ine bic kpedic kpeditinggea. Nga hoc imoc kunengtoa yombong. ⁵ Hemma kicsereu emma henggec medac monggo ngakpihereha kongac kongac mong heiec, yeng foiugeng taru hemma kpidohoma kerechtegec anggec. ⁶ Ifi anggec yeng yofi edeyunuec, “Ngeni mi kengecngunu. Yesu Nadzaretenac mariponnu kpegecmoc, ngeni ye hembeso hadae nga ye bic gborima yacdac, yei mi fede. Faigec fedac, fefea imoc henggec. ⁷ Ngeni kemma medacfora nga Petoro yofi edeyunugec, ye waraingemmema Gariraia bangecfu kende. Anu ngeni imohai kemma ye meficegec, yengenaoc edengunuec, ifi isoc.”

⁸ Ifi edeyunu yeni kpidohoma dzonongngina fedeevac kicsereunac worama kenggec. Amma yeni homac yombong kpidohoma kengecyuntecac amma ngic mong mi edeyunugec.

⁹ Yesungo sondau yarec, naso imohai hanahema Maria Madara fingecmiec. Ye warac hadehade ⁷ yearunac kporarec, ngac imocnoc fingecmiec. ¹⁰ Fингеми Mariango kemma ogofora yegoc momoc kecgec, yeni ubahodung negemma kiac kecmagec yofi edeyunuec, ¹¹ “Yesungo bic yacdac kecde, ni hendua.” ifi deu yeneng ye mi negensinggegec.

¹² Anu imocac ngadeau ngic yohockang yeri amabangec monnu kembesonga kemmaec ye siriha mong amma fingecyemerec. ¹³ Fингечемеру yeri dzigenema goa edeyunugec, yeneng ine mi negensinggegec.

¹⁴ Anu medacfora ¹¹ yeni yaka nema tacmagec Yesungo fingecyemmeec. Nga ye yarec hemma edeyunugec, imoc mi negensinggegec nga ubangina seriecac amma ngaba siricfu yoac edeyunuec. ¹⁵ Edeyunuma yoac yofi deec, “Ngeni bangectoa bangec, imohai kemma wiac sasawa Anutungo deu fingerec, yeni siduc gombung edekpou ayemmebisia.

¹⁶ Anu ngic me ngac mong negensinggema mitidoku nadziru Anutungo ye ebicfunac mesiu komoc kpeude. Nga mong ye mi negensinggeude, yeng ine yoacfou makpeude.

¹⁷ Nga negensinggegecde, ngenearu faka kuhagoc yofi fingerude. Ngeni neac kpacfou hadehade nga yafing kporacyunugede amma nedzarangyoac uba gboriausing degecde.

¹⁸ Ngeni boidzoc maringo megecde nga doku hodungagoc ngic memanganeyunuande, ngeni imoc negecdeu, imocngo mi memanganengunuude. Nga ngeni ngicngac hafeigoc yenearu mari faigec, yeni ngereegede.”

¹⁹ Kebu Yesungo yoac ifi edeyunu wisickeu Anutungo ye kurumennu meenu yeac foiau tacde. ²⁰ Anu medac yeni noboc noboc kemma siduc gombung ngicngac edekpou

† 15:46: Lineng imoc kpindzing mong ambiac ogea, imocngo wamba mekecgec.

ayemmegec. Nga Kebungo yenigoc kefu yeni ua megec faka kuhagoc fingerec, imocngo yoara meseriec.

Ruka Yeng Yesuac Siduc Gombung Ohoec

¹⁻³ Kunenna Teofiro, profete yeneng yoac degec, imocngo botucninau fora fingerec, imocac siduc ohogenduae. Ngicngac yeni hanac hanaheaunacngoc erema kicnginango faka fingerec, imoc hemma yeni siduc gombunggac kingangkpekpefura anggec. Yeni faka fingerec, imocac siduc edenunugec homacngo imoc hanahema ohogec. Imocac siduc edenunugec amma ohogec, imoc isinggema hanac hanaheaunac erema fingerecmoc, imoc dindingac arenggema ohogemba naric anudeac negensiai. ⁴ Ge yoac yomoc osoma yoac kpougenggec, imocac fora ande, imoc naric negennade.

⁵ Yuda bangecac ngictau Herode yeac nasou Abia ua arennumac womong gareng mong kefec, kpara Dzekaria. Yeac enema kpara Erisabete ye Aronggac fingecsahe, imohacnac.*

⁶ Ngicngahoc imoc yeri Anutuac kicfu dindingac yombong kecma dedeserioac nga singyoac sasawa modacma ikocngira kpac amma kpetiac kefoc. ⁷ Yeri kufing kefocac amma Erisabetengo sabaha kpac kefu yeri kecma ngicngac yada bic anoc.

⁸ Nga naso botuc ihai Dzekariango Anutuac kicfu uaarengfora yenigoc ua megec ⁹ yeni fakangina modacma merang sesegerec homuna gombunga kpedzereckeude, imocac kpeing kpegec Dzekaria heficgeec. ^(Makekeng 30:7-8) ¹⁰ Heficgeu sesegerec imoc kpedzereckebesonga nasoya hau ye Anutuac womong manau enec. Enu ngicngac habutoa yeni ngadeau numuma nanggec. ¹¹ Ifi ammagec Kebuac angero monggo hosuc heiheiac arata, imohai Dzekaria fingecmiec. Fingecmima foiaugeng nanec.

¹² Nga Dzekariango hemma kpidohoma kengec ebiria anu ¹³ angerongo yofi edeec, “Dzekaria, ge mi kengecguu, Anutungo nunumuga bic negendac nga enengga Erisabetengo medac mong kpenanggema megenude. Ge kpara Yohane, ifi kpacbesena.

¹⁴ Yeng geac ubangerec nga sogac sogai anude. Nga ngicngac homacngo ye fingerecac amma ifingoc ubangerec negenggecde. ¹⁵ Imoc yofiac, yeng Kebuac kicfu kuneng anude. Amma waing doku me doku seria mong naric mi neude. Ye nonggo heremanaunacngoc Tiri Asu wake wakeagoc amma ¹⁶ Israe ngicngacfora homac wangeyunuu yeni ubangina Kebu Anutungina, yearu merenggecde. ¹⁷ Amma medac ye manggac wangeyunuu ubangina meremma heregoc nambaracfocngina yeneac songo negenggecde. Amma yoackpekpe yeni negen negeng dindingac meficgeyemmeudeac ua meude. Nga yeng Kebuac kicfu kecma Eriaac onga nga kicfu uaya mekefude. Ifi mekecma ngicngac meefaiyunuu yeni Kebuac kicfu efaima yeac ngicngacfora anggecde.”

¹⁸ Ifi deu Dzekariango angero yofi edeec, “Ni neanna ngicyada nga enenna ifingoc, ye kifaya bic homac ammanu geac yoac dafiugeng negemba fora anude?” ¹⁹ Ifi deu angerongo deec, “Ni Gabirie. Anutuac kicfu nanganduae nga ye yengenaoc yoac edegubadeac suenuu hama siduc gombung yomoc edeguduae. ²⁰ Negennec, yoac deduae, imocac nasoya hau foraya fingerude. Nga ge yoacna imoc mi negensinggedanggac ge yoacga kpac anu ifi kecmana wiac deduaemoc, imocac nasoya hama fingerude. Fingeru wenac imohaingoc yoacgagoc monggoc annade.”

²¹ Anu ngicngacareng yeni Dzekariaac tomai namma ye Anutuac womonnu naso herea yombong nanecac kerectegec anggec. ²² Ifi anggec ye ngadeau mau yoara kpac anu yoac edeyunuudeac obohou yeni bic negentegecgec, “O, ye womonnu emma onga mong hendac.” Kecma ye yoara kpac anu mariangosac faka anec. ²³ Anu Dzekariaac womong garenggac ua nasoya wisikeu ye mama ameau monggoc dzigenema kenec. ²⁴ Kenu naso mi hereemanu enema Erisabete ye hereagoc amma afo 5 sufuu sufuu kefec. Kecma yofi negenec, ²⁵ “Yomoc Kebuac faka mong, yeng neac negensima naso yomohai gamena

* ^{1:5:} Womong gareng sasawa yeni Moseac dara Aronggac bangefora. Yeni Aronggac fingecsaheunacsac ngac naric megec.

mesawerema faka yomoc anendac. Nga ngicngac yeneng neac deendema monggoc mi anggecde."

²⁶ Anu Erisabeteac afoya 6 ammanu Anutungo angero mong kpara Gabirie sueu Gariraia prowinsiu taong mong kpara Nadzarete, ihai kenec. ²⁷ Kemma ngac naroang kpara Maria, ye fingecmiec. Maria ye ngic mong kpara Yosefe, yeac enema anude, imoc bic deserigec amma Yosefe ye Dawidiac kisicfunac. ²⁸ Angerongo Mariaac yofi deec, "Ohec, Kebungo gegoc kecde, wosoefactoayango gearu federac ubangerec negembesena." ²⁹ Ifi deu Maria ye imoc negemma kerektegec kuneng anec, "Angerongo noc wiacak negemma ifi edenude?" imoc negenu obohou negen negeng ua homac meec.

³⁰ Memanu angerongo yofi edeec, "Maria, ge mi kengecguu, Kebungo geac negenu ngereeande. ³¹ Amma negenna, ge sabac mong kpenanggema menade. Amma ge medac yeac kpara Yesu kpacbesena. ³² Medac imocngo engena yombong anude. Yeng Anutu Engenatoaninaac Medac, yeac kpara ifi kpacgecde. Nga Kebu Anutungo ye kisia Dawidi yeac ngictauac tatac miu ihai tarude. ³³ Amma yeng Yakoboac kisicfora yeneac ngictau amma nasoya kpac kefude nga amabangeha garenggeude, imoc wisic wisickea kpac feeng kefude." ³⁴ Ifi deu Mariango angero edeec, "Ni ngicgoc mong mi fedua nga imoc daifiugeng fingerudeac denec?" ³⁵ Ifi kpesimi yofi deec, "Tiri Asungo gearu mau Engenatoaac kucnco geac nokumuc amma kperacguude. Imocac amma sabacga kpetiac fingerude, yeac kpara Anutuac Medac degecde.

³⁶ Negenna, geac areng mocgu Erisabete, ye ngacyada amma sifu medac kpenanggeec. Ngicngac yeni ye kufing kecde, ifi degec nga yeng hereagoc anu afoya 6 bic ande.

³⁷ Anutuaru faka kpungge kpunggea mi fede." ³⁸ Ifi deu Mariango deec, "Negenna, Anutu ye neac minginna imocac ge yoac dedang, imoc naric fingecnembeso." Ifi deu angerongo wama kenec.

³⁹ Naso mi hereemanu Mariango efaima Yudaiaac sifec bangecfu taong monnu kenec. ⁴⁰ Kemma Dzekariaac amau emma Erisabete wenacngerec demiec.

⁴¹ Nga Erisabetengo Mariaac yoac negenu sabac hereau tarec, imocngo kpidohoec. Kpidohou Tiri Asungo Erisabetearu wakeu ⁴² ye kunengngoc kpacma deec, "Ge ngac botucninau kenecgagoc nga sabac heregau tacde, ye kenehagoc. ⁴³ Kebunaac nonggeango nearu hau faka yomoc fingecnende, imoc faka kuneng. ⁴⁴ Negenna, ge wenacngerecyoacga dena kedzacnango negembare sabacngo herenau sogaima yuengyuma andac. ⁴⁵ Ngac ye Kebungo yoac edeu imocngo fora fingerudeac negensinggeude, ngac imoc ye kenehagoc."

⁴⁶ Ifi deu Mariango deec, "Anutu, ge kicga fima nenna wanac naroangga mamea yombong amma kefai. Imocac amma ubaonganango Kebu heiwayong anggenu ⁴⁷ Anutu memengerecna, ongaasunango geac amma sogaide. ⁴⁸ Yeng kingang naroang mamea kecde, imoc hentegecdac nga yofinenggac namma feengkefude, ngicngacareng sassawango negennemna yofi degecde, 'Ye kenehagoc.' ⁴⁹ Kuctoa Minginango fakatoaya kuneng yombong anendac nga yeac kpara kpetiac. ⁵⁰ Kisicfunac kisic yeac ewea heimiandae, yeneac witiu yeac ubamangangngoo feengkefude. ⁵¹ Nga ngicngac yenang uba negengnginaac negenggec engena ande, yenearu kucfakaya mema maria sinema medereyuuu singsararang kpegecde."

⁵² "Ye ngictau kucnginagoc, yeni tatacnginaunac meicyunuma ngic kpac kuneng mong mi mekecgec, yeni memiacyunuec. ⁵³ Nga ngicngac here home homegoc kecdae, yeng yeni yengena wiac gombunga yemmemma mewakeyunuec amma finactoanginagoc, yeni ine maringinau wiac mong mi faima eng sueyunuu kenggec. ⁵⁴⁻⁵⁵ Anutungo yoara bangecnina Abrahang nga fingecsaheyaac edeyunuec, imoc mi nigeckpeec, kpac. Ye kingangkpekpefora Israe siriha ifiangoc maficyunuma wosoefac ayemmeude."

⁵⁶ Amma Mariango afo harebec isoc Erisabetegec kecma monggoc ameau dzigene kenec.

⁵⁷ Kenu Erisabete ye sabac fingec fingec nasoya wegeneu medac meec. ⁵⁸ Meu amafora nga yengena arengfora yeneng Kebungo yearu wosoefactoa ammiec, imocac

negemma yegoc momoc sogaigec. ⁵⁹ Anu uameme 8 ammanu yeni medac sebi tosea herecgegecdeac hama ngic yeneng yeac kpara Dzekaraia, mamaac wase megecdeac degec. ⁶⁰ Ifi degec nongea Erisabetengo kpetarima deec, “Yeac kpara Yohane kpacbesonga.” ⁶¹ Ifi deu yeneng degec, “Geac arengfocga yeneearunac kpac ifia mong mi kpacgec fede.” ⁶² Ifi dema yeni maringo faka amma medac kpara merac kpacnide, imocac mama kpesimigec. ⁶³ Kpesimigec Dzekariango kibi oho ohoac tafe, imocac kpesiyemmeu migec yofi ohoec, “Medac yeac kpara Yohane.” Ifi ohou yeni sasawango kerectegec anggec. ⁶⁴ Nga naso imohaingoc Dzekariaac enara anggeu nedzaranga heimerenu ye monggoc yoacdede amma Anutu dengerema kefec.

⁶⁵ Anu amafora yeni sasawango kengec anggec nga ngicngac Yudaia sifec bangetoau kecgec, yeni faka fingerec, imocac denegeng amma kecgec. ⁶⁶ Nga ye Kebuac kucngo sabacgoc kefec, imocac amma ngicngac siduc negenggec, yeneng yoac imoc negen negenginau faima yofi negemma kpesiemegec, “Sabac imocngo kecma dafi ambesande?”

⁶⁷ Anu Tiri Asungo sabacac mama Dzekariaaru wakeu, yeng kpefingyoac yofi deec, ⁶⁸ “Kebu Israeac Anutu kenehebisina. Yeng ngicngacfora nenannu hama witicfunac bic yungecnunuec. ⁶⁹⁻⁷⁰ Amma ye bicngoc yombong profete yeneac enacfu yoac faiu degecmoc, imoc modacma kingangngiha Dawidi, yeac fingecsaheunacngo ngic mong ebicfunac yungecnunu komoc kpenide, ye meficgenemmeec.

⁷¹ Yeng ngabafocnina kecdae nga ubango ukununuandae, yeneac mariunac mesinunuudeac negenec. ⁷²⁻⁷³ Nga Anutungo kisicnina Abrahanggoc yoac deserima deec, imoc negensima dzadzahac kpataninga modacma kisicfocnina wosoefac ayemmem ⁷⁴ ngabafocnina yeneac mariunac mesinunu kecma kengeha kpac eweheimima kecnode. ⁷⁵ Kecni kekecnasonina fedesoc, imohai yeac kicfu kpataning nga dindingac kecnideac ifi anemmeec. ⁷⁶ Anu sabacna gennoc waraima Kebuac sing mengerema singa heitumeinadeac amma Engenatoa yeac profete, ifinoc kpacgugecde. ⁷⁷ Ge yeac ngicngacfora kopocsicngina kpac anudeac kpouyemmenade nga yeni ebicfunac mesi mesi nga komoc kpegecdeac sing, imoc naric negentegecgecde. ⁷⁸ Nga Anutuninango songo nga wosoefac engena yombong anemmekedec ifi fingerude. Yeac songotoayaac kuc imoc wenac isoc erema nenanggaru mama ngicngac ⁷⁹ kundung manau nga homecac nokumucfu kecdae, yeni mekperagiyunu nenang ruaeac sinnu kennideac hanianina garenggema sing imoc edzacnunuude.”

⁸⁰ Anu sabac ye sebiugeng nga asuu yadiseri amma bangec kisiu kecma Israe ngicngac yeneac kicfu fingectegecdeac nasoac tomai kefec.

2

¹⁻² Kviriniungo Siria bangecac gawana kefec, naso imohai Roma bangecac ngictau Sisa Agustongo bangeha bangeha kpacarengngina mengeregecdeac yoac faiu kendarec. Nga osokporeng ua ifia warac mi feec. ³ Ifi anu ngicngac sasawango kpacarengngina mengeregecdeac taongngina fekenec, imocacsoc kendacgec. ⁴ Yosefe ye Dawidiac kisicfunac, imocac amma yeng Gariraia prowinsiunac erema Nadzarete wama Yudaia prowinsiu Dawidiac taongbisic kpara Betereheng, ihai kenec. ⁵ Nga enembingeha Maria ye hereagoc anu yegoc yerahafoc kpacngira kpacarennu ohogecdeac kenoc. ⁶ Yeri ihai kecmaec sabacac fingec fingecnaso haec. ⁷ Anu yeri amatatacfu titinga mong mi feecac yeri ngadeau tacmaec morocmedacngira fingeru Mariango sangohoma ramaburumaka otou ihai faiu keema feec.

⁸ Anu toforecfu ramagareng goa yeni Betereheng ama wegenacfу ramafoengina garengyunuma kecgec. ⁹ Kecmagec Kebuac angero monggo fingecyemmeu Kebuac kibikperagitoayango mekperagiyunu yeni kengec ebiria anggec. ¹⁰⁻¹¹ Ifi anggec yeng edeyunuec, “Ngeni kengec mi anggec. Imoc yofiac, yaguc yombong ngeneac amma Dawidiac taonnu Messia Kebungina fingecdac, ye ebicnginaunac mesingunuude. Nga ngicngac sasawa yeac amma ebiriangoc sogaigecde, ni siduc gombung imoc dekperagin-gemmeduae. ¹² Sabac ye merac imoc negenggecdeac ma yomoc ngemmehade, ngeni

kemma ramaburumaka otou sabac mong kporucngō birac biranggea feu meficgegecde.”¹³ Ye ifi demanu imohaingoc kurumenggac angerohabu kuneng, yeneng fingeclma yegoc namma Anutu dengerema yofi degec,¹⁴ “Anutu ohec, wi kurumennu febeso nga bangeclf ruae fingeclbeso. Anutungo ngicngac wosoefac ayemmede.”

¹⁵ Ifi dema angero yeni kurumennu dzigenema enggec ramagareng yeni yenaocngoc denegeng amma degec, “Betereheng taonnu faka fingeru Kebungo edenunudac, imoc bic kemma henni.”¹⁶ Ifi dema yeni bic kemma Maria nga Yosefe amma sabac oto manau feec, yeni meficyunuma yenenggac.¹⁷ Yenemma angerongo sabac yeac yoac deecmoc, imoc edeyunugec negendacgac.¹⁸ Nga ramagareng yeneng siduc anggec nga ngicngac imoc negenggac, yeni kerectegec andacgac.¹⁹ Mariango ine faka fingeclhaec, imoc hereau faima negensima kefec.²⁰ Nga angerongo yoac ramagareng edeyunuec, yeni imoc sasawa fora hemma negemma dzigenema Anutu afec afehe kenggac.

²¹ Uameme 8 wisickeu sabac sebi tosea herecgegecdeac nasoya hau yeni kpara Yesu kpacgac. Kpac imoc ye nonggeango mi kpenanggemanu angerongo bic kparec.

²² Kecma Moseac dedeseriyoac modacma duac duacnasoac mitikibiu oho ohoya nande, nasongina imoc wisickeu yeni sabacngō Kebuac kicfu fingerudeac Yerusarennu meenoc.²³ Kebuac dedeseriyoacfū yoac yofi oho ohoya fede, “Waracmedac fin-geckecgcedesoc yeni Kebuac kpataning areng.”²⁴ Nga sese faibesonga, imoc kebesac yohockang me gomoc gomocmedaha yohockang faibesonga, imoc Kebuac dedeseriyoacfū fede nga yeri imoc modacma mekenoc. (*Makekeng 13:1-2,10-13; Sesememe 12:1-8*)

²⁵ Naso imohai ngic mong Yerusarennu kefec, kpara Simeong. Ye ngic dindingac amma Anutu eweheimima Tiri Asugoc kefec. Amma ye Israengic yenearu memeseri fingerudeac tomai anec.²⁶ Nga Asungo warac yofi deficgema edeec, “Ge mi homemana Anutuac Messia fingeru hennade.”²⁷ Nga Yesuac nonggomama yereng dedeseriyoac feec, imoc modacma sabacngira Anutuac womonnu meenoc. Meenec Asungo Simeong bic wangeru womong manau emma²⁸ sabac menamma Anutu dengerema yofi deec,²⁹⁻³⁰ “Kebu minginna, ni wanacngicga kicnango Memengerecga hembadeac denec, imoc bic hendraac ruaegoc kekecna mewegenena kembade.”³¹ Ge ngicngac sasawa yeneac kicfu sing imoc bic mengeredang.³² Nga yeng bangeha bangeha ngicngac ge mi negensi-tinggudae, yeni mekperagiyunuma kperagingina anude amma ye israengicngacfocga yeneac kibikperagitoa.”

³³ Ifi deu sabac nonggomama yeri yeac yoac imoc negemma kerectegec anoc.³⁴ Nga Simeongngō kenecyunuma sabac nonggea Maria yofi edeec, “Negenna, Israengic homacngō medac yomocac amma mayunuude nga homacngō yeac amma yacma nanggecde, ifi fingerudeac Anutungo meisnggec. Nga ngic homac yeni ye hemma yeac ngaba amma deendema ammigecde.”³⁵ Ammigec geac ubaherega ifingoc dzikacac beangngō herecgeude. Ifi anu ngicngac homac yeneac negeng sufuma feec, imoc didiu fingerudeac.”

³⁶ Anu profete ngac mong kpara Hanna, ye ifingoc womonnu kefec. Ye Fanuereac naroang Aseac kisicfunac. Amma ye ngic mema yegoc kifa 7 kecmānu ewea homeec.

³⁷ Homeu ye hodzec kecmānu kifaya 84 anec. Amma yeng womong mi wawa hadzing toforec yaka segekecma Anutu numumikefec.³⁸ Kecma naso imohaingoc yenigoc wegena namma Anutu dengereec. Dengerema ngic Yerusarenggac tembuckekecngina fingerudeac tomai kecdacgac, yeni sabacac siduc dekperagiyemmeec.

³⁹ Yosefe nga Maria yeri Kebuac dedeseriyoacngō dede, imoc sasawa andarec wisickeu Gariraia prowinsiu dzigenema Nadzarete amanginai kemma kecgec.⁴⁰ Kecgec medacngō yadiu Anutuac ubangerecngō yearu feu yeng kuc nga negentegec wake wakea meec.

⁴¹ Yesuac nonggomama yeri makekenggac hombang henecdeac kifasoc Yerusareng taonnu engkefoc.⁴² Amma yeni hombanggac faka modacma Yesungo kifaya 12 ammanu yenahafoc hombannu kenggac.⁴³ Kemma kecmagec hombang naso wisickeu dzigene

hagec Yesungo Yerusarennu tarec. Taru nonggomama yereng imoc mi negemma hama ⁴⁴ yofi negenoc, “Ye habu yenigoc sinnu kecde.” Ifi negemma yeri uameme mocgu sinnu eng kenggec wisickeu Yesu hoforoc. Hofocma tosofocngina nga arengfocngina yenearu yerecgema ⁴⁵ mong mi meficgeocac monggoc dzigenema Yerusarennu meficgeecdeac kenoc.

⁴⁶ Uameme harebec wisickeu Anutuac womong manau emma Yesu meficgeoc. Meficgeec yeng kpoukpou yeneac botucfu womonnu tacma negengyemmemma dekpesi ayemmeec. ⁴⁷ Amma Yesungo negen negenggoc yombong ngic sasawa yoacngina merenecac yeni kpidohoma imoc wiac engena ande, ifi negenggoc. ⁴⁸ Nga nonggomama yereng ye hemma kpidohoma nonggeango yofi edeec, “Medac, ge nocac faka ifia anecmenec? Manggagoc nereng negengyohoc amma hofocukecdic.” ⁴⁹ Ifi deu yeng edeyuruec, “Ngeri nocac hofocnudape? Mannango ua mekecde, ua imoc mebadeac denenec, imoc mi negendape me?” ⁵⁰ Ifi deu yeri yoac imocac obohooc.

⁵¹ Nga ye nonggomama yerigoc dzigenema Nadzarete taonnu kemma imohai enacn-gira tofohoma kefec. Nga nonggeango faka sasawa fingerec, imoc negen negengau faiu feec. ⁵² Nga Yesungo negen negeng nga kifayaac arenna yadiseri anu Anutu nga ngic yeni yenahafoc hendzidziegec.

3

¹ Ngictau Sisa Tiberiongo kifa 15 tatahau bic tackefec. Nga Pontio Piratongo Yudaia bangecac gawana kefec. Kecmanu Herodengo Gariraia bangecac gareng anec nga munea Firipongo Ituraia nga Trakoniti bangecac gareng anec amma Risaningo Abireneac gareng, ifingoc kecgec. ² Ifi kecmagec Hannas nga Kaifa yereng womong garengtoa kefoc. Naso imohaingoc Dzekariaac medac Yohanengo bangec kisiu kefu Anutuac yoacngo yearu haec. ³ Yohanengo Yodang doku noboc noboc bangec fekende, imohai yerecgema ngicngac yofi dekperagiyemmeec, “Ngeni kopocsicngina kpac anudeac ubangina dzigeneu mitidoku nadzicbisia.” ⁴ Profete Yesaiango yoac imoc deec, yeac kibiu yofi oho ohoya fede,

“Bangec kisiu kpakpac mong yofi fingecde, ‘Ngeni Kebuac sing wisima singa heitumegec.

⁵ Yeni kperemeng sasawa semegecde nga tikifagang sasawa imoc heitumegecde amma sing gbaring gbaring mengeregec dindingac anude nga sing kopocsiragoc heisoronggaigec ⁶ Anutungo ngicngac manganaunac mesinunuude, imoc ngiha ngihango hendacgecde.’” (*Yesaia 40:3-5*)

⁷ Ifi anu ngicngac homacngo Yohanearu kenggec. Kemma doku nadzicyemmeudeac edegec Yohanengo yofi edeyunuec, “Boidzocac gboricfora, Anutuarunac turunga habeso ande, ngeni imohacnac woragecdeac sing fede, merang goroyoac imoc edengunuec?

⁸ Imocac ngeni doku nadzicma ubamerenggac siricfu fora meficgebisia. Nga ngeni yofinenggac ngenanggac yofi mi negengemebisia, ‘Abrahang ye bangecnina.’ Anutungo hoc yomoc yenearu faka meu yenearunac Abrahanggac bangecfora naric fingecgecde.*

⁹ Naka ye bic ic haniau tacdeac ic goa fora gombunga mi anggecde, imoc sasawa heiu kpeu gerecfu ukuyunuude.”

¹⁰ Ifi deu ngicngac yeneng kpesimigec, “Ifi anu neni dafi annide?” ¹¹ Ifi degec yofi merengyemmeec, “Ngic mongngo ngakpia yohockang mekecde, ye mong hesima ngakpia kpac kecde, ye meficgebeso. Nga nenesemengagoc kecde, yeng faka imocngoc ambeso.” ¹² Nga takesimeme goa yeneng ifingoc hama doku nadzicyemmeudeac hama degec, “Kpoukpou, neni dafi annide?” ¹³ ifi degec Yohanengo edeyunuec, “Ngeni hiedzo megecdeac dengemmegec, imoc mi ferahema sirihausac mebisia.” ¹⁴ Nga wasaingic goa yeneng ifingoc kpesimigec, “Anu neni dafi annide?” Ifi degec deec, “Ngeni godzufaka me ikocfu amma degbedicfu monggarunac hiedzo mi mebisia. Ngeni uanginaac bummekecdae, hiedzo imocsac fengemmebeso.”

* 3:8: Abrahanggac bangecfora sasawango kekecseri megecde, israengic yeneng ifi negensinggec.

¹⁵ Anu ngicngac yeni Messiaac tomai kecgecac amma ubaherenginau negenggec, “Yohane yenoc Messia gedang.” ¹⁶ Ifi negenggecac Yohanengo yofi merengyemmeec, “Ni doku nadzicngemmeduae nga ngic ngadenau hade, yeng ine Tiri Asu nga gerecgor nadzicngemmeeude. Nga yeac kucngo neac kuc ferahade, ni ifiango yeac hanitabea witiha yungecba naric mi ngereeude. ¹⁷ Ye meic meicke saraha mariau mehama wit seuhagoc meic meicke sobengau feu, imoc fima seuha meickema fora mekpedzuc amma ameau faiude. Faima seuha wanggema gerek pisic pisickea kpac, imohai ukuu dzeude.” ¹⁸ Yohanengo yoac siriha homac dema ngicngac dederecge ayemmemma siduc gombung edeyunukefec.

¹⁹ Anu ngictau Herodengo ine muneaac ngac kpara Herodia hamangec mema faka mangana goa homac angkefecac Yohanengo faka mangana imocac nonoyoac ededarec. ²⁰ Edeu Herodengo yoara negemma monggoc Yohaneac ngaba amma witicamau faiec.

²¹ Ngicngac sasawango mitidoku nadzicmagec Yesungo ifingoc mitidoku nadzirec. Nadzicma numuma nammmanu kurumeng anggeu ²² Tiri Asungo kebesacac siric amma yearu maec. Mau kurumennunac enacudumeng mong yofi fingerec, “Ge songomedacna, ni gengsongo anggengkecduae.”

²³ Yesungo kifaya 30 ammanu uaya hanaheec. Nga ngicngac yeneng yofi negenggec, ye Yosefeac medac. Nga Yosefe ye Heriac medac ²⁴ nga Heri ye Matataac medac. Matata ye Rewiac medac nga Rewi ye Merikiac medac. Meriki ye Yanaiac medac nga Yanai ye Yosefeac medac. ²⁵ Yosefe ye Matatiaac medac nga Matatia ye Amosiac medac. Amosi ye Nahunggac medac nga Nahung ye Esiriac medac. Esiri ye Nagaiac medac ²⁶ nga Nagai ye Mahataac medac. Mahata ye Matatiaac medac nga Matatia ye Semeingga medac. Semeing ye Yosekeac medac nga Yoseke ye Yudaac medac.

²⁷ Yuda ye Yohananggac medac nga Yohanang ye Resaac medac. Resa ye Dzorobabeac medac nga Dzorobabe ye Saratiereac medac. Saratiere ye Neriac medac ²⁸ nga Neri ye Merikiac medac. Meriki ye Adiac medac nga Adi ye Kosanggac medac. Kosang ye Erimadanggac medac nga Erimadang ye Erieac medac. ²⁹ Eri ye Yesouac medac nga Yesou ye Eriedzeac medac. Eriedze ye Yoringgac medac nga Yoring ye Matataac medac. Matata ye Rewiac medac ³⁰ nga Rewi ye Simeonggac medac. Simeong ye Yudaac medac nga Yuda ye Yosefeac medac. Yosefe ye Yonanggac medac nga Yonang ye Eriakinggac medac.

³¹ Eriaking ye Mereaac medac nga Merea ye Menaac medac. Mena ye Matataac medac nga Matata ye Natanggac medac. Natang ye Dawidiac medac ³² nga Dawidi ye Isaiac medac. Isai ye Obedeac medac nga Obede ye Boasiac medac. Boasi ye Saraac medac nga Sara ye Nasonggac medac. ³³ Nasong ye Aminadaac medac nga Aminada ye Adaminggac medac. Adaming ye Araniac medac nga Arani ye Hesoronggac medac. Hesorong ye Pereseac medac nga Perese ye Yudaac medac. ³⁴ Yuda ye Yakoboac medac nga Yakobo ye Isakaac medac. Isaka ye Abrahanggac medac nga Abrahang ye Taraac medac. Tara ye Nahoreac medac ³⁵ nga Nahore ye Seruguac medac. Serugu ye Ragauac medac nga Ragau ye Peregeac medac. Perege ye Ebereac medac nga Ebere ye Seraac medac.

³⁶ Sera ye Kenanggac medac nga Kenang ye Arapakisaac medac. Arapakisa ye Senggac medac nga Seng ye Noaac medac. Noa ye Rametac medac, ³⁷ nga Ramec ye Metuseraac medac. Metusera ye Enokoac medac nga Enoko ye Yarediac medac. Yaredie ye Maharareac medac nga Maharare ye Kenanggac medac. ³⁸ Kenang ye Enosiac medac nga Enosi ye Seteac medac. Setengo Adanggac medac nga Adang yeng ine Anutuac medac.

uameme 40 wisickeu hereaac homeec. ³ Hereaac homema kecmanu mangana ming-nango edeec, “Ge Anutuac medac kecnecfu hoc yomoc dena imoc ic sogong anu.” ⁴ Ifi deu Yesungo meremmiec, “Yoac yofi oho ohoya fede,
‘Ngicngo ic sogonggacsac mi kefude, kpac.’”

(Dedeseri 8:3)

⁵ Ifi deu yeng Yesu bangebuma monnu wangec enu piratac isoc fingeru bangeha bangeha gawamangnginagoc edzahema ⁶ deec, “Bangeha bangeha yomocac kibikperagia nga imoc garenggebadeac kuc bic nenggec. Nga ni imoc ngic mong me mong mibadeac kuc fenende. ⁷ Imocac ge eweheinennadeu ni imoc sasawa waba geac andarude.” ⁸ Ifi deu Yesungo yofi meremmiec, “Yoac yofi oho ohoya fede,

‘Ge Kebu Anutuga mocgu eweheimima kingang kpemibesena.’”

(Dedeseri 6:13)

⁹ Ifi deu yeng Yesu monggoc wangecma Yerusarennu kemma Anutuac womong imocac oda herea wi yombong nande, imocac bumau faiu nanu edeec, “Ge Anutuac Medac fora kecnecfu geanggaoc yomohacnac yuma kemen. ¹⁰ Yoac yofi oho ohoya fede,
‘Ye angerofora uayoac yemmeu yeneng ge sing sasawa kengkec nec, imohai gareng-gugecde.’

¹¹ amma

‘Ge haniga hocngo heibacac yeneng maringina witiau faiguma sesehegugecde.’”

(Mi-
tiyegec 91:1,12)

¹² Ifi deu Yesungo deec, “Yoac yofi dedea fede,

‘Ge Kebu Anutuga faitobannu mi faibesena.’”

(Dedeseri 6:16)

¹³ Ifi deu mangana minginango faitobang ammidaru wisickeu wama kemma naso monggac tomai kefec.

¹⁴ Anu Tiri Asungo Yesuaru wakema feu ye Gariraia bangecfu monggoc dzigeneu bangec fekende, imocac ngicngac sasawango siduha negendacgec. ¹⁵ Nga yeng kpekpeturang amanginau emma kpouyemmeu ngicngac sasawango dengeregec.

¹⁶ Anu Yesungo yadi yadibangeha Nadzarete, imohai kemma kpekpeturang amau engande, faka imoc modacma ihai enec. Emma mitikibi osoudeac nanu ¹⁷ yeni profete Yesaiaac kibi kpouya migec ye imoc yungecma kibiu yoac yofi feec, imoc meficgeec.

¹⁸ “Kebuac Asungo nigoc kecde nga neng ngicngac makpekpea siduc gombung edeyunubadeac Kebungo dzimbonga nadzicnenec. Ngic witicfu kecdae, yeni witicngina kpac anude nga kicpisicngo kicfifi anggecde, imoc edeyunubadeac yeng suenuec. Suenuu hama ebicgoc kecdae, yeni ebicngina meickema wange-cyunubade. ¹⁹ Nga Kebuarunac naso gombunga hangemmeude, imoc ifingoc dekperagibade.”

(Yesaia 61:1-2)

²⁰ Yesungo kibi imoc monggoc kpouma kibigareng miec. Mima mataru kpekpeturang amau ngicngac tacgec, yeni kicngina yearu sasawa fidacgec. ²¹ Figec yeng yofi edeyunuec, “Yoac mitikibiu osoba negendau, imocac fora yaguc hafoangoc fingec-ningemmede.” ²² Nga yeac enacfunac yoac dedea imocngo wosoefac nga kuhagoc anecac ngicngac sasawango yeac negenggec naric anu kerectegec amma yeac kpesiemegec, “Ngic yomoc ye Yosefeac medacngi ifi dede.”

²³ Ifi degec Yesungo yofi edeyunuec, “‘Dota, ge geanggaoc mengereemena.’ Yoac heihei imoc fede nga ngeni imoc bic edenubeso andae. Amma monggoc yofi, ‘Ge Kafanaung taonnu ua mena siducga negengandimbe, imoc yei bangecgau ifingoc mena henni.’” ²⁴ Dema monggoc torokpema deec, “Foracngoc, profete mong ye yengena bangecfu kenu ngicngac yeneng naric mi hoanggegecde, imoc edengunudiae. ²⁵ Eria bic kefec, naso imohai Israe bangecfu ngac hodzec homacngko kecgec. Kecmagec kurumeng nagu heiu kia mi kpeec, kifa harebec nga afo 6 bangec imohai boditoa fingerec. ²⁶ Fingeru Anutungo Eria sueu Israe ngac yeanaru mong mi kenec. Nga ye Sidong bangecac Sarepac taonnu ngac hodzec mong kefec, yearu sueec. ²⁷ Nga profete Erisango Israe bangecfu kefec, naso imohai ngicngac homacngko kukuserigoc kecgec, yeanarunac mongno mi ngereec, kpac. Nga Siria bangecfunac ngic mong kpara Naimang, yengsac ine ngereec.”

²⁸ Ifi deu ngicngac sasawa kpekpeturang amau tacgec, yeny imoc negemma herengina buu ²⁹ yacma Yesu igockema meickema taong ngadeau kemegec. Kemema taongngina tikiu tarec ihai hofe mong nanec, imohai kemma ukugec kemeudeac negemma wangecma kenggec. ³⁰ Kenggec, yeng ine ngicngac botucnginau nedereyunuma kenec.

³¹ Yesungo Gariraia bangecac taong mong kpara Kafanaung, ihai kemema sabata nasou ngicngac Anutuac yoac kpouyemmeec. ³² Nga yeac kpoukpoung ngicngac uakibi mekecdae, yeneac siricfu kuhagoc yombong ngicngac yeneng imoc negenggec engena anec. ³³ Amma kpekpeturang amau ngic mong yafing seuhagoc kefec, yeng yoac kuhagoc kpacma deec, ³⁴ “Ah, Yesu Nadzarenec, neneac wiac imoc geac mi ande. Ge memanganenununadeac hanec me? Gensiduaenoc, ge Anutuac kpetiac ngic.” ³⁵ Ifi deu Yesungo yafing yoac seria ammima yofi edeec, “Ge waickema ngicfunac erema kenna!” Ifi deu yafing ye ngic kpefaheu botucnginau makpeu yearunac erema kenec. Nga ye ngic imoc mong mi memanganeeec. ³⁶ Ngicngac sasawango imoc hemma kerectegec amma denegeng amma degec, “Ye noc yoac mekecdde? Ngic yomoc ye kuc mimia nga kuhagoc yombong, yeng asu seuhagoc edeyunu erema kendae.” ³⁷ Ifi fingeru Yesuac siducngo bangec imocac tegia noboc noboc amasoc kendaru negenggec.

³⁸ Yesungo kpekpeturang ama wama Simonggac amau kenec. Nga Simong sefena sebigerectoa ammiu feu Yesungo sefena mengereudeac edegec. ³⁹ Edegec Yesungo namma ngac feu hemma sebigerec yoac seria edema kpetarimi sebigerecngi ngac wama meickeec. Meickeu ngac ye naso imohaingoc yacma yenenggareng anec. ⁴⁰ Anu wenackiwa keme kemeac ngicngac sasawango ogofocngina hafei hania hania ayemmeec, yeny meyunuma Yesuaru hagec. Hagec Yesungo ngicngac hafeinginagoc sasawa maria witinginau faima mengereyunudarec. ⁴¹ Mengereyunuu yafing nga hadehade ifingoc ngicngac homac yeneearunac erema yofi kpacgec, “Ge Anutuac Medac.” Nga ye Messia, imoc negenggec ac yeneng yoac imoc mi degecdeac deracyunuec.

⁴² Wereckengau Yesungo taong wama bangec botuc mong ngiha kpacfu kenu ngicngac yeneng ye hofocgec. Hofocma meficgema yeng yenigoc kefudeac negemma ye monnu mi kembeso degec. ⁴³ Ifi degec ine edeyunuec, “Taong goa fekendae, ni imohai ifingoc kemma Anutuac eucererenggac siduc gombung dekperagiyemmebesare. Anutungo imocacnac suenuec.” ⁴⁴ Ifi dema Yudaia bangecfu kpekpeturang amangina fekenec, imohai Anutuac yoac dekpou ayemmemma kefec.

5

¹ Naso monnu Yesungo Genesarete dzohong tegiau nammanu ngicngac yeneng Anutuac yoac negenggecdeac hama igocemema oronggegec botucnginau nanec. ² Namma kic fima henu gomba yohockang dzohong tegiau taroc. Nga kondungyang memengic yeneng gombangina faigec taru ufcicngina duacma nanggec. ³ Nanggec Yesungo gomba mong, Simonggac gomba, imohai emma tacma Simong edeu yeng gomba kapianec kpesiu dzohonnu kenu ngicngac edekpou ayemmeec.

⁴ Wisickeu Simong yofi edeec, “Kondungyang mebesonga dzohonnu doku keme kemea fede, ngeni ihai kemma ufcicngina ukuma kondungyang megec.” ⁵ Ifi deu Simongngi meremmiec, “Kunenna, neni tofcnac yomohai hafoanoc uatoa mema kondungyang mong mi meding nga geng denecac ine kemma ufcicngina ukubade.” ⁶ Ifi deu yeny ufcicngina ihai ukuma kondungyang homac yombong megec ac ufcicngina wakema barackebesonga anec. ⁷ Ifi anu yeny ogofocngina gomba monnu tacgec, yeny marikarac heiyemmegec hama maficyunugec. Maficyunuma kondungyang gomba yohockang mewakegec ac gomba yereng kondunnu kemebesonga anoc.

⁸ Simong Petorongo faka imoc hemma Yesuac haniu makpemafafoc heimima deec, “Kebu, ni ngic kopocsicnagoc anduaeac wanuma kenna.” ⁹ Simong nga ngic yegoc kecdacgec, yeneng kondungyang homac yombong megec ac amma kerectegec anggec ac ifi deec. ¹⁰ Nga Sebedaioac medahora, Yakobo nga Yohane, yeri Simonggoc kondungyang mema kecma ifingoc imoc hemma negenec wiac engena yombong anec. Nga Yesungo

Simong edeec, "Ge mi kengecguu. Ge kondungyang meme nga yaguc ngicmeme annade." ¹¹ Ifi deu yeni gombangina mema tegiau faima wiac sasawa wama Yesu modacgac.

¹² Anu Yesungo taong monnu kecmanu ngic mong kukuseringo sebia semedaru manganeyombonggeec, yeng ihai kecma Yesu hemma makpema kiwa bangecfu hetutuckema kpacsambic ammima deec, "Kebu, ge negenna naric anu medzuacnubang." ¹³ Ifi deu Yesungo maria sinema kpiserema deec, "Ge ngereenadeac songona fede." Ifi deu imohaingoc kukuseringo ngic imoc waec. ¹⁴ Wau Yesungo derahema deec, "Sebigau faka fingecdac, imocac ngic mong mi edebesena. Ge womong gareng yearu kemma sebiga edzahena. Amma Mosengo seseac deec, imocac sirihau sese faina ngicngac yeneng sesega imoc hemma negentegecgecde." ¹⁵ Nga Yesuac siduc, imoc ine kuneng yombong yadima kenu ngicngac habutoa homac yeneng yeac yoac negenggecde nga yeng hafeingina mengereudeac hagec. ¹⁶ Ifi anggec Yesungo naso homac kperecge tegecma bangec goa nigha kpacfum kemma numukefec.

¹⁷ Kecma naso monnu Yesungo Anutuac yoac edekpou ayemmemanu farisaio nga dedeseriyoacac kpoukpoungic goa Gariraia nga Yudaia amabisic sasawa amma Yerusarennac hama tacgec. Nga hafei mengec mengereac kuc Kebuarunac, imocngu Yesuaru feec.

¹⁸ Ifi femanu ngic goango hama ngic mong hanimaria homemea dzakeu faima tofohoma ama manau Yesuac kicfu faigecdeac negemma mekenggec. ¹⁹ Mekenggec ngicngac homacngo hedzickema nanggecac yeni Yesuac kicfu faigecdeac sing hofocma ngic imoc amabubuyau tofoho emma ama bubuya hesarima ihacsing ngic botucnginaiu Yesuac hoannu dzakeagoc faigec kemeec. ²⁰ Kemeu Yesungo negen negensingngina hemma yofi deec, "Ngic, kopocsicga imoc bic wawaya."

²¹ Ifi deu mitiac negen negengngic nga farisaio yeni yenaocngoc yofi negenggec, "Ngic imoc noc ngicngu Anutu emmide? Anutu mocgungo kopocsic naric waude." ²² Ifi negenggec Yesungo wiac ubanginaiu negensigec, imoc hemma yofi edeyunuec, "Ngeni nocac ubanginaiu ifi negensidae?" ²³ Yoac damocngu deni efea ande, 'Kopocsicga kpac ande.' me yofi, 'Ge yacma kenna.' ²⁴ Ngicac Medac ye bangecfu kopocsic wawaac uayoac nga kuc femide, ngeni imoc negenggecdeac amma yofi deba." Ye ifi dema ngic puringgac yofi deec, "Ni edeguduue, ge yacma dzakega mema amagau kenna."

²⁵ Ifi deu yeng imohaingoc ngicngac sasawa yeneac kicfu yacma fefea feande, imoc mema Anutu dengerema ameau kenec. ²⁶ Kenu ngicngac sasawango homac yombong kpidohoma kerektegec amma Anutu dengeredacgec. Nga kengecngu mewakeyunuu degec, "Neni faka morora mi hengennina yaguc kicninango hending."

²⁷ Anu Yesungo imohacnac mama kemma takesimeme ngic mong kpara Rewi, ye takesimeme amau tacmanu hemma yofi edeec, "Ge hama ni modacnuna." ²⁸ Ifi deu Rewingo yacma wiac sasawa wadacma Yesu modarec. ²⁹ Nga Rewi ye Yesuac amma ameau yaka kuneng ohou takesimeme nga ngicngac homacngo yenigoc tacma yaka negec. ³⁰ Ifi anggec farisaio nga miti negen negengngicfoengina yeneng negenggec naric mi anu Yesu medacfora yeneac yoackpekpengina kpema degec, "Ngeni nocac takesimeme nga manganameme yenigoc nenedoku nedae?" ³¹ Ifi degec Yesungo yofi merengyemeeec, "Ngicngac sebingina hafeia kpac kecanda, yeni dotaac mi ayem-mekecde. Hafeinginagoc, yeneng ine dotaac ayem-mekecde." ³² Ni ngicngac dindingac kpacyunubadeac mi mayai, kpac. Ni ine manganameme yeni ubangina merenggecdeac kpacyunubesonga mayai."

³³ Ngicngac goa yeneng Yesu kpesimigec, "Yohaneac medacfora nga farisaio yeneac medacfoengina yeni naso homac yakasege kecma nunumu ua meandae. Nga geac medacfoengina yeneng ine nenedoku nekecdae." ³⁴ Ifi degec Yesungo yofi merengyemeeec, "Memeturang ngicngu ogofora yenigoc kecma yakasege anggecdeac naric mi deude.

³⁵ Kecma naso monnu memeturanggac ngic yeneearunac meickegecde, naso imohai ine yakasege anggecde."

³⁶ Yesungo torokpema yoac mong heima yofi edeyunuec, “Monggo kporuc gbori-aunac sintaha herecgema mema eseau naric mi faima kpebiude. Ifi anudeu kporuc gboria manganeude amma gboria nga esea kpeturangyuruu siriha naric mi fingerude. ³⁷ Nga ngic mongngo waing gboria bokong yangseberango memea eseau naric mi kpeu kemeude, kpac. Ifi anudeu waing gboriango bokong esea imoc tindziru manganeu dokuya maude. ³⁸ Imocac waing gboriango bokong gboriau kpeni kemeu naric ande. ³⁹ Amma ngic mongngo waing esea bic neec, yeng waing gboria neudeac songo naric mi negenude, kpac. Ye yofisac deude, ‘Waing esea imoc gombunga yombong.’ ”

6

¹ Yesungo sabata naso monnu wit uausing kemmanu medacfora yeneng wit fora merecgema sebera kpetima asasahema negec ² farisaio goango yenemma kpesiyem-megec, “Ngeni sabata nasou faka mi angana imoc nocac andae?” ³ Kpesiyemmegec Yesungo yofi merengyemmeec, “Dawidingo uamedacfrogoc herenginaac homema faka anggec, ngeni imoc mi osonegeng angandae gedang. ⁴ Ye Anutuac womonnu emma ic sogong Anutuac sese faifaia, imoc mema yengena nema uamedacfora ifingoc yemmeec. Nga ic sogong imoc womong gareng yenengsac naric neandae, ngictehec yeneng kpac.” (*1 Samue 21:1-6*) ⁵ Ifi dema yofi edeyunuec, “Ngicac Medac ye sabataac Kebu.”

⁶ Sabata naso monggac Yesungo kpekpeturang amau emma Anutuac yoac kpouyem-meec, imohai ngic mong marifoia homemeango yenigoc tarec. ⁷ Nga Yesungo sabata nasou hafeigoc memengerecua mong meu yeni haniaya mong meficgema yoacf faigecdeac miti negen negengngic nga farisaio, yeni garemmema nanggoc. ⁸ Yesungo ine negen negengngina hemma ngic yeac yofi deec, “Ge yacma erahama botucninau nanna.” Ifi deu ngic ye yacma ekemma botucnginau nammanu ⁹ Yesungo yofi edeyunuec, “Wiac mong kpesingemmeba, sabatanasou damocngo angana ande? Faka gombunga me faka mangana ayemmebesonga amma homebeso andae, agengngina tigecdeac dede me goa memanganeyununideac dede?” ¹⁰ Ye ifi dema kiwa fikengfiha amma yenendacma ngic yeac deec, “Mariga sinena.” Ifi deu ngic ye maria sineu maria ngeree ¹¹ yeni herebutoa yombong negemma yenaocngoc Yesu dafi ammigecdeac denegeng anggec.

¹² Yesungo naso imohai numuudeac tikiu emma tofocnac hafoa Anutu numumima kecmanu ¹³ ama wereckenu medac kpacyunu kenggec medac 12 meisngyunuma aposoro kpac imoc yemmeec. Nga aposoro yeneac kpacngina yofi: ¹⁴ Simonggac kpara mong Petoro kparec nga yeac munea Anderea, Yakobo nga Yohane, Firipo nga Batoromaio. ¹⁵ Mataio nga Toma amma Arifaioac medac Yakobo nga Simong, yeac kpara mong Dzerote. ¹⁶ Amma Yuda, Yakoboac medac nga Yuda Karioto taonnunac, yeng kecma Yesu kerereu megec.

¹⁷ Anu Yesungo tikiunac medacfora 12 yenigoc mama bangec tumia monnu medacfora homac yenigoc nanec. Nanu ngicngac habu kunengngo Yudaia bangec noboc noboc nga Yerusarennac amma Tiro nga Sidonggac kondunnu amabangec fekende, imohacnacng hagec. ¹⁸ Hama Yesuac yoac negenggecde nga yeng hafeingina mengereudeac hagec. Amma ngicngac asu seuhagoc hama yeneng ifingoc ngereegec. ¹⁹ Nga kucngo yearunac yenearu kemma ngicngac sasawa mengereyunuec yeni sasawango ye kpeseregecdeac negenggec.

²⁰ Ifi anggec Yesungo kiwa medacfora yenearu fima deec, “Ngicngac wanac kecdae, ngeni kenecnginagoc, nocac Anutuac eucerereng imocnoc ngeneac. ²¹ Nga ngicngac yaguc herenginaac homedae, ngeni kenecnginagoc, ngeni yaka nema gebecngunuude. Amma kiac ubahodunggoc yaguc kecdae, ngeneng kenecnginagoc, ngenennoc kecma dzomoregecde. ²² Nga ngicngac yeneng Ngicac Medacac amma ngeni ubango ukun-gunuma demanganengunuma ngadeau faingunuma kpac mangana kpacngunugecde, imoc ngeni kenecnginagoc. ²³ Ngeni naso deduaemoc, imohai ubangerec negemma yuengyuma amma sogaibisia, nocac kurumennu bungngina kuneng tomaingina fede. Nga ngic yeneac bangecfocnginango warac profete faka imocngoc profete ayemmegec.

²⁴ Ngicngac dzofinacgoc kecdae, ngeni sowecnginagoc, nocac ngeni wiacngina songeagoc hafoa bic megec wisickeec. ²⁵ Nga ngicngac semeng negebec yaguc angkecdae, ngeni sowecnginagoc. Ngeni kecma herenginaac homegecde. Nga yaguc dzomocgoc kecdae, ngeni sowecnginagoc. Ngeni kecma ubamangang negemma kiacgecde. ²⁶ Amma ngicngacngo dengerengunukecdae, ngeneac deduae, ngeni sowecnginagoc, nocac yeneac bangefocnginango warac profete ikoha ifingoc dengereyunukecgec.

²⁷ Ngicngac yoacnaac kedzac kpeandae, ngeni ine yofi edengunuduae, ngeni ngabafocngina heresongogoc hoangyunubisia amma ngic ubango ukungunuandae, yeni faka gombunga ayemmebisia. ²⁸ Nga ngic sowecyoac edengunuandae, ngeni yeni kenecyunubisia amma memanganenguandae, ngeni yeneac numubisia. ²⁹ Nga ngic mongngo munggungga noboc kpeudeu ge munggungga noboha ifingoc wamibesena nga mongngo ngakpiga witiau meudeu ngakpiga mana ifingoc wana mebeso. ³⁰ Nga ngic yeneng gearunac wiac monggac derecgeandae, ge wiac imoc yemmebesena amma mongngo geangga wiac wangecguu monggoc meremma genudeac mi hatahemibesena.

³¹ Ngic yeneng noc faka angemmegecdeac negensiandae, ngeni faka siriha imocngoc ayemmebisia. ³² Nga ngic goa yeneng ngeneac songo negenggjec ngeneng yeneac songo negenggecdeu ngeneac ubangerecyoac homac mi debesonga. Kopocsicmeme ngic yeneng ifingoc ngic damoc yeneac songo negengandae, yeneac songo negenggecde. ³³ Nga ngicngac goa faka gombunga angemmekecgec ngeni faka gombunga ayemmegecdeu ngeneac ubangerecyoac homac mi debesonga. Kopocsicmeme ngic yeni imoc ifingoc angandae. ³⁴ Anu ngic ngenearu turung anggec ngeni turunga ifiangoc kpoungemmegecdeac negensigecdeu ngeneac ubangerecyoac homac mi debesonga. Ngic kopocsicnginagoc yeni ifingoc manganameme ogofocngina wiacngina turungagoc yemmeandae. ³⁵ Anu ngeni ine ngabafocngina heregoc yeneac songo negemma faka gombunga ayemmebisia. Amma ngeni turungngina wagec yenearu febeso nga kpougecdeac mi negembisia. Ngeni ifi anggecdeu faka gombungaac bungngina kuneng feude nga ngeneng Mangngina Anutu Engenatoa yeac nambaracfora anggecde. Yeng ngicngac ihoc bahoha nga kichodungnginagoc nga ngic mangana faka gombunga ayemmeude.

³⁶ Mangnginango ngicngac wosoefac ayemmekede, ngeneng ifi isocngoc wosoefac ayemmebisia."

³⁷ "Ge ngicngac mi demanganeyunubesena, yoac imoc modacnadeu ngic yeneng ifingoc mi demanganegugecde. Amma ge ngicngac mi isingyununa nga mi desiyunubesena, yoac imoc modacnadeu ngic yeneng ifingoc mi isinggugecde nga mi desigugecde. Nga ngicngac kopocsicngina wana. Ifi anna yeni ifingoc geac kopocsic wagecde. ³⁸ Ngeni wiacngina ngicngac naric yemmebisia, ifi anggecdeu, Kebungo wiacngina turunggeu kemu kpemindzaiude. Amma monggoc kpakeu wakema kpetinggeu noboha tabunginai mau megecde. Nocac ngeni wiac kpetengina isingga ngicngac yemmeandae, kpete siriha ifiangoc yeni isingga turung kpoungemmegecde."

³⁹ Yesungo monggoc yoac heima yofi edeyunuec, "Ngic kicpisic mongngo kicpisic ogea mong naric mi wangerude, yeri ifi amma yerahafoc tenu kemeeecde. ⁴⁰ Nga ngen negengmeme medac mongngo kpoukpouyaac engena mi anude. Kpoukpoungu medacfora hafoangoc kpouyemmedaru wisickeu yeni yeac siric andacgecde. ⁴¹ Anu ge tosogaac kicfu gocbisic mong tacdemoc, imoc hemma geangga kicfu ic kebanga fede, imoc ine mi negensianne, faka imoc naric mi ande. ⁴² Ifi amma ogogaac yofi mi debesena, 'Toso, ge negemmana kicgau gocbisic tacde, imoc meickebadeac negenduae.' Ikocngic, geangga kicfu ic kebanga kuneng fede mi hemma imoc naric mi annade. Ge geangga kicfunac ic kebanga meickemaguc ogogaac kicfu gocbisic tacde, imoc hentegecma naric meickenade.

⁴³ Ic mong gombungau fora mangana naric mi fingerude nga ic manganau fora gombunga naric mi fingerude. ⁴⁴ Ic sasawa yeni foranginango haniangina mekperagigecde. Ge witic waeyagoc, imohacnac fig icac fora naric mi mesinade nga wainggac fora imoc

fareng nga gberafefunac naric mi mesinade. ⁴⁵ Wiac gombunga ngic gombungaac ubatohong gombungaunac ereude. Nga ngic mangana yeac tohong manganaunac wiac mangana ereude. Wiac ngic ubahereau wakema fede, enarango imocnoc dekperagiude.

⁴⁶ Ngeni nocac Kebuna Kebuna kpacnuandae nga yoacna wama mi modacnugecde? ⁴⁷ Ngic mong ye hama yoacna negemma imoc modacma uaya ifingoc meudeu, ye ngic dafia, imoc edzacngunubade. ⁴⁸ Ngic mong ye ama meudeac dema bangec usuu peperandzi fingeru imocac witiau wotunga ukuu kemeec, ngic imoc ye isoc. Ye ama seria meecac kia tunggbangtoango hama ama imoc memanganeudeacsoc mi anec. ⁴⁹ Nga ngicngac goa yoacna negemma uaya mi meandae, yeni ngic mong ye ama meudeac dema wotunga bangec perekkeau ukuu kemeude, ye isoc. Kia kpeu doku yadima ama imoc kpeu ama imocngo bic barackema mama kpedzamedarec.”

7

¹ Yesungo yoac imoc sasawa ngicngac edeyunudaru negenggec wisickeu Kafanaung taonnu kenec. ² Kemma ihai wasai gareng monggac wanacngic ye homebesonga amma feec. Amma ye ngic gombungango mingina yeac ewea heimiande.*

³⁻⁴ Nga wasai garengngo Yesuac siduc negemma yudangic enarafovngina goa Yesuaru sueyunuu kemma ngombonggema degec, “Ge wasai garenggac wanacngic mong men-gerenadeac hana. Wasai gareng ye ngic gombunga, ye naric meficgina. ⁵ Ye israengic nenanggac songea negengande nga yeng kiwa amma kpekpeturang amanina meec.”

⁶⁻⁷ Edegec Yesungo yenigoc kemma amma mewegenemanu wasai garengngo ogofora goa sueyunuu yofi egegecdeac kenggec, “Kunenna, nasoga homac mi wana. Ge noc gombunnaac amawarocnau erenade, ni ifiango gearu naric mi habade, imocac ge ihai namma yoac dena medacna ngereeu. ⁸ Imoc yofi, ni ifingoc ngic kucnginagoc yeneac bageu kecbadeac fainugec. Amma neac bageu wasaifocna kecanda. Nga monggac kenna deba kenude nga monggac hana deba haude. Amma wanacngicnaac yomoc mena deba meudenoc.” ⁹ Ifi deu Yesungo imoc negemma kerectegec amma dzigenema habu modacgac, yeni yofi edeyunuec, “Ni wiac mong edengunuba negenggec, Israe bangecfu negen negensingngina kuhagoc yofia mong mi henai.” ¹⁰ Nga ngic sueyunuyunya, yeni garenggac amau dzigenema kemma henggec wanacngiha ye hafeia kpac anec.

¹¹ Anu Yesungo taong mong kpara Naing, ihai kenu medacfora nga ngicngac homac-ngo ye modacgac. ¹² Kemma taongodaac nagutoayau kensikemanu ngic yeni medac mong homeec, yeac farenga tofohoma magec. Medac imoc ye ngac hodzec monggac medaha mocgusac anu ngicngac habu homacngo ye modacma taonnunac magec. ¹³ Ifi magec Kebungo ngac imoc hemma ubea manganeu deec, “Ge mi kiacna.” ¹⁴ Ifi dema kemma katapa imoc kpesereu ngic tofohogec, yeni wama nanggec Yesungo deec, “Medac, ni edeguduae, ge yacna.” ¹⁵ Ifi deu homemeango yacma yoac deec. Nga Yesungo medac imoc nonggea monggoc miec. ¹⁶ Nga ngicngac yeneng imoc hemma kpidohoma homac kengcyunu Anutu dengerema degec, “Profete kuneng mongngo nenannu fingecma kecde nga Anutungo ngicngacfora nenang yugcnunuma kecde.” ¹⁷ Siduc imocngo Yudaia bangecfu nga bangec goa nobohau tacdae, ihai kenu sasawango yoac imoc negenggec.

¹⁸⁻¹⁹ Yohaneac medacfora yeneng kemma siduc imoc ammigec Yohanengo medahora yohockang kpacyuruu haec yeri Kebuaru kemma yofi dema kpesimiecdac sueyuruec, “Hanemmeudeac dedea, imoc ge me neni ngic monggac tomai kecbisina?” ²⁰ Ifi dema sueyuruu yeri Yesuaru kensikema yofi dema kpesimio, “Hanemmeudeac dedea, imoc ge me neni ngic monggac tomai kecbisina? Yohane dokunadzicngi imoc kpesigendededec suenurude.” ²¹ Sueyuruec, naso imohaingoc Yesungo ngicngac homac hafeinginagoc nga kucmama amma asu manganagoc mengereyunuec amma kicpisic homac mengereyunu kicfifi anggec. ²² Nga ngihoc yereng ifi edeec Yesungo deec, “Ngeri kemma

* ^{7:2:} Wasai gareng yomoc yeac bageau wasaingic 100 isoc kecgec. Wasaingic garengnginagoc yeni israengic kpac, yeni bangec monnunac.

wiac hennegeng andaoc, imocac siduc Yohane ammibesera. Ngic kicpisic yeni kicfifi andae nga hanimangang yeni sing kenda amma kukuseringinagoc yeni sebingina ngereede. Nga kedzacfong yeni yoac negendae amma homemea, yeneng gboridae nga ngicngac makpekpea yeneng siduc gombung negendae. ²³ Nga mongngo neac amma negemmangang mi angande, ye kenehagoc.”

²⁴ Anu Yohaneac medahora kemmaec Yesungo yeac yofi dema habu edeyunuec, “Ngeni bangec kisiu noc wiac henggecdeac kenggec? Komba mong firangngo kpeu kockpac anu, imoc henggecdeac kenggec me? ²⁵ Imoc kpac anu noc wiac hembesonga kenggec? Ngic mong wambaya kibiagoc me? Negenggec, ngic wambahina kibia gombunga gombunga heiandae nga bangecac songotoagoc kecandae, yeni ngictau amau kecandae. ²⁶ Ngeni profete mong hembesonga kenggec me? Yeng profete goa sasawa feracyunude, ifinoc deduae. ²⁷ Yeacnoc yofi oho ohoya fede, ‘Negennec, ni enacdedena sueba yennoc waraigemma singga mengeregenude.’ (*Marekai 3:1*)

²⁸ Ni yofi deba negenggec, ngic ngacfunac fingeccgec, yenearunac mongngo Yohane naric mi ferahaec. Anu Anutuac eucererenggac manau mamea,[†] yang ine Yohaneac engena.”

²⁹ Ngicngac sasawa nga takesimemengic momoc, yeni imoc negemma yofi negenggec, Anutu ye yoac fora nga dindingacac mingina, ifi dema Yohanearu kemma mitidoku nadzicgec. ³⁰ Nga Farisaio amma dedeseriyoacac negen negengngic yeni ine Anutungo sing deyemmeec, imoc ngadehema Yohanearu mitidoku mong mi nadzicgec.

³¹ Anu Yesungo yofi deec, “Ngicngac yofinenggac kecdae, ngeneac fakangina yofi. ³² Ngeni nambarac sobenu takecdae isoc. Yeni tacma yenaocngoc yofi dema kpacemean-dae, ‘Neni kungac fifini ngeni nocac yegec mi fededau nga ubahodung yegec heini nocac mi kiacdau?’ ³³ Yohane dokunadzicngoc hama ic sogong nga waing mong mi neec, imohai ngeni yofi degec, ‘Ye yafingagoc.’ ³⁴ Nga Ngicac Medac ye hama nenedoku neande, imohai yofi deandae, ‘Henggec, ye nenedoku efea mi nekecde nga takesimeme nga manganameme yeneac tosongina.’ ³⁵ Nga Anutuac negen negentegec imoc gombunga ande imocac nambaracfora yeneac fakangina ireckeude.”

³⁶ Farisaio mong kpara Simong ye Yesugoc yaka neudeac amea heitaiu yeac amau emma taroc. ³⁷ Tarec manganamemengac mongngo taong imohai kefec, ye yoac yofi degec negenec, “Yesungo Simonggac amau tacde.” ifi degec negemma kirung mong arabastro hocngoc memea kerecdokuyagoc homuna gombunga, imoc mekenec. ³⁸ Mekemma Yesuac ngadeaugeng haniau namma kiaru kickumiango mama Yesuac hani heiu urucsusianggo imoc mekerenggema hania titikokoc ammima kerecdoku homuna gombunga imocngoc hania nadzicmiec. ³⁹ Nadzicmiu farisaio Yesu heitaiec, yeng imoc hemma yengenaocngoc yofi negenec, “Ngac hadac ye manganamemengac. Nga ngic yomocngoc profete fora ambac dede ye dafiugeng kpeserema faka yomoc ande, imoc negemmibac.”

⁴⁰ Ifi negenu Yesungo yofi edeec, “Simong, ni yoac mong edegubeso negenduae.” ifi deu deec, “Oc, kpoukpou dena.” ⁴¹ Ifi deu yofi edeec, “Ngic yohockang yeri dzogareng mong yearunac turung anoc, mongngo 500 denari nga mongngo 50. ⁴² Amma yeri turung imoc kpoumiecdeac osima kefecac turungngira waec. Wau yerearunac damocnggo dzogarenggac songo homac negenude?” ⁴³ Kpesimiu Simongngo merenec, “Dzo homac wamiec yeng, ifi negenduae.” deu Yesungo deec, “Negenggosi amma yoac dindingac denec.”

⁴⁴ Anu yeng ngac yearu dzigenema Simong yofi edeec, “Ge ngac yomoc henna. Ni amagau ereba ge haninaac doku mong mi nendang, yeng ine kickumiango hanina dzuacma yengena orucsusianggo hanina mekerenggedac. ⁴⁵ Nga amagau haba geng ubangerecac titikokoc mong mi anendang nga yeng hadua, imohacnaclngoc haninau titikokoc anendac. ⁴⁶ Nga geng orucna kerecdokungo mong mi nadzicnendang nga

[†] *7:28:* Yesungo yengena negemma Anutuac eucererenggac manau mamea deec.

yeng hanina kerecdoku homunagocngo nadzicnendac. ⁴⁷ Imocac edeguba negenna, ye heresongoya hafoangoc edzacnudacac kopocsiha hafoangoc ifingoc wamiba kpac andacde. Mong ye kopocsiha kapianec wawaya, ye ine songo kapianecsac femide.” ⁴⁸ Ifi dema ngac yofi edeec, “Kopocsicga imoc bic wawaya.” ⁴⁹ Ifi deu ngicngac goa tatacfu tacgec, yeni yenaocngoc denegeng amma degec, “Yomoc merac ngic? Ye kopocsic ifingoc wayemmede.”

⁵⁰ Nga Yesungo ngacac yofi deec, “Ge ruaegoc kenna. Negen negensinggango ebicfunac mesigudac.”

8

¹ Yesungo taong nga amabisicfu yerecge kemma Anutuac eucererenggac siduc gombung edeyunukefec. Ifi kenu medacfora 12 ²⁻³ nga warac ngac goa asu mangana nga hafeinginagoc mengereyunuec, yeneng yegoc momoc kengkecmagec dzofinacnginango maficyunugec. Ngac homac ifi anggec yenearunac mong kpara Maria kpara mong Madara, Yesungo warac yearunac hadehade 7 kporacmiec. Nga mong Yoana, ye Herodeac gareng Kusaac enema amma mong kpara Susana.

⁴ Ngicngac homac yeni taong tackenecsoc, imohacnacngoc Yesuaru hama habu kuneng anggec yeng yoac mong heima yofi edeyunuec, ⁵ “Gbome kpegi kpegingic monggo gbome kpegiudeac uau kenec. Kemma gbome kpegiu gbome goango mama sinnu heiu ngic yeneng witiau tigec nga neng yeneng hama nedacgec. ⁶ Nga goa harongannu heima nemonggema ereu bangec dokuya kpac anecac sokuema homeec. ⁷ Amma gbomea goa haseng manau heiu haseng nga gbomea yerahafocngoc yadiec hasengngo imoc heihomeec. ⁸ Nga gbome goango bangec gombungau heima kpea nemonggema fora 100 sasawa fingecdarec.” Ifi dema kunengngoc yofi kpacma edeyunuec, “Kedzahagoc yeng yoac yomoc negembeso.”

⁹ Anu medacfora yeneng yoac heiheiac hania, imocac kpesimigec ¹⁰ yofi merengyemmeec, “Anutuac eucererenggac negen negeng sufufuya, imoc ngeneng negentegecgecdeac bic ngemmengemmea. Amma goa yeni kicngina fikecma mi henggecde nga kedzacnginango negengkecma naric mi negentegecgecde, imocac yoac heiheiausing yoac sasawa yemmeyemmea.” (*Yesaia 6:9*)

¹¹ “Yoac heiheiac hania imoc yofi, gbome imoc Anutuac yoac. ¹² Nga gbome sinnu heiec, imoc ngicngac goa yeni yoara negenggec. Nga mangana minginango hama yoac imoc ubanginaunac meickeu yeni negensingbeso obohoma komoc mi kpegecde. ¹³ Gbome harongannu heiec, imoc ngic goango Anutuac yoac negemma heresongogoc bic hoanggegecde nga yoacngo ubanginai godea mong mi meecac naso wegenanecsac taru faitobannaso hau yeni wagecde. ¹⁴ Nga gbome hasennu heiec, imoc ngic goango Anutuac yoac negenggec, yeni kekecnginaac negengyohoc nga dzofinacac faitobang amma bangecac kekec hensongo angkecgec, imocngyoac heihomeu fora mangana amma kpac angkecde.”

¹⁵ “Anu gbome bangec kerehagocfu heiec, imoc ngic goa yeneng Anutuac yoac negemma ubaherengina faima sing dindingac nga gombunga mekecgecde. Mekecma seserigoc kecma fora maficgegecde.”

¹⁶ “Ngic mongngo kifa kpedzereckema tera bageau faima mi kperahaude nga fefe bageau faiu mi tarude. Imoc kpac, ye kifa tatahau faiu tacma ngicngac amau eregecde, yeneng kperagi hendacgecde. ¹⁷ Imoc yofiac, wiac sasawa sufufuya fede, imoc didiu fingectegerude nga wiac seme semea fede, imoc kecma kperagiau fingectegerude. Imoc sufufuya mi kengkefude. ¹⁸ Ngic mong ye wiac goa femide, ye wiac monggoc migegecde nga mong ye wiac mong mi femide, yearunac wiac fenende dema negende, imoc ifingoc wangecgec eng kefude. Imocac amma ngeni yoac negendae, imoc henghomema negemma kecbisia.”

¹⁹ Anu Yesuac nonggo munafora yeneng yearu kenggec ngicngac homacngo hedzickegecde amma naric mi henggec. ²⁰ Ifi anggec goa yeneng Yesuaru yofi degec enec,

“Nonggo munafocga yeni hama genggecdeac ngadeau nandae.” ²¹ Ifi degec Yesungo deec, “ngicngac Anutuac yoac negemma modackedae, yeneng nonggo munafocna andae.”

²² Naso monnu Yesungo medacfora yenigoc gombau emma yofi edeyunuec, “Nenang dzohong noboc kenni.” Ifi deu kemmagec ²³ Yesungo gau feu kia firangtoango hama dzohongtoa kpeu dokungo gomba mewakebeso anu yeni kemebeso anggec. ²⁴ Amma medac yeneng Yesuaru kemma midima degec, “Kunennina, Kunennina, neni kemebesonga andimbe.” Ifi degec Yesungo yacma firang nga dokuac siritembong dekpetari ayecmeu firang kpac anu dzohongngo ning kpema feec. ²⁵ Feu medacfora yeneac deec, “Ngeni negen negensingngina kpac, ifi isoc ande.” Ifi deu medac yeni kengecyunu kerectegec amma yenaocngoc denegeng amma degec, “Ye noc ngic? Yeng firang nga dzohong yoac edeyuruu yeac enac tofohodape.”

²⁶ Yesu nga medacfora yeni dzohong ferecgema Gerasene bangecfu kenggjec. Bangec imoc Gariraia dzohong noboc. ²⁷ Kensikema Yesungo gombaunac mama taong imocac ngic mong hadehadeforagoc meficgeec. Ngic imoc ye naso herea bic senggang kecma amau ngisitataha kpac kicsereu kecande. ²⁸ Ngic imocngko Yesu hemma seriangoc arohoma Yesuac hoannu makpema yofi kparec, “Yesu Anutu engenatoaac Medac, neac wiac imoc geac mi ande. Ni desambic anggenduae, ge kpendzennu mi fainubesena.”

²⁹ Nga Yesungo asu seuhagoc yearunac kporaru erema kenudeac bic edeec, imocac ifi deec. Asu seuhagoc imocngko naso herea ammiu ngic yeneng mema sengngo hanimaria kpema garenggegec. Nga ye seng kperecgedacma asu seuhagocngko wangecma bangec kisiu kengkefec. ³⁰ Nga Yesungo kpesimie, “Ge kpacga merac?” Kpesimi deec, “Habutoa.” Hadehade homacngko yeac hereu kemema kecgecac amma yeng ifi deec.

³¹ Nga hadehade yeneng Yesu desambic ammigec, “Ge hofeu suenununa mi kemeni.”

³² Nga bangec imohai berechabu kunengngko fagannu surukpema kecgec. Anu yeni kporacyunu berecfu kemegecdeac desambic ammigec yang ifi anggecdeac negengyem-meeec. ³³ Negengyemmu yeni ngicfunac erema berec habu yenearu kemegec berec yeneng fagannunac nedzima dzohonnu kemema doku nema homedacgec.

³⁴ Homedacgec berecgareng yeneng faka fingerec, imoc hemma kengec worama siduc deyadigec taonnu nga bedzou kenec. ³⁵ Kenu ngicngac yeneng imoc negemma faka fingerec, imoc henggecdeac Yesuaru hagec. Hama ngic hadehadeagoc kefec, ye henggec. Yeng negentegecma wamba heima Yesuac haniu tarec. Ifi taru yeni hemma kengecyunei. ³⁶ Nga ngic hadehadeforagoc kefecngko dafiu ngereedac, imoc ngic kicnginango faka fingeru henggec, yeneng siduc ayemmegec. ³⁷ Ayemmegec gerasenengic yeneac amabangec, imocac ngicngac sasawango kengec homac yunuecac amma Yesungo wayunuudeac edegec. Edegec Yesungo dzigenema kenudeac gombau enec. ³⁸ Enu ngic hadehade kporacmie, yeng Yesugoc kenudeac derecgeu Yesungo ine suema yofi edeec, ³⁹ “Ge amagau dzigene kemma Anutungo fakatoa anggendas, imoc dekperagibesena.” Ifi deu ngic ye kemma Yesungo yearu fakatoa meec, imoc taong hafoangoc dekperagiyemmedarec.

⁴⁰ Yesungo dzohong noboc kensikemanu ngicngac yeneng ye heitaigec. Yeni sa-sawango yeac tomai kecgec. ⁴¹⁻⁴² Nga kpekpeturang amaac gareng mong kpara Yairo, yeng haec. Ye naroanga mocgusac, kifaya 12 ammanu homebesonga anecac amma ngic ye hama Yesuac haniau makpema amea kenudeac desambic ammiec. Ammiu yeni kemmagec ngicngac habutoango noboc hedzickegec.

⁴³ Anu ngac mong ye sacherec amma kecmanu kifaya 12 anu ye dzofinaha sasawa dota hania hania yemmeu mongngo ye mengereudeac sing mi meficgeec. ⁴⁴ Ngac imoc ye habu yeneac botucfu Yesuac ngadeausing kemma ngakpiherehaac witic susia kpesereu sawa bic gbanggeec. ⁴⁵ Gbanggeu Yesungo kpesiec, “Merang kpreserenudac?” Ifi deu yeneng degec, “Imoc mi negendimbe.” nga Petorongo edeec, “Kebu, ngicngac homac-ngo orongguma hedzicgudae.” ⁴⁶ Ifi deu Yesungo yofi deec, “Mongngo kpreserenudac, kuc wanuma monggaru kenu negendua.” ⁴⁷ Ifi deu ngac ye yofi negenec, “Ye bic

meficgedac.” Ifi negemma sufu sufu worabeso osima dzonoma fedeu hama Yesuac haniau makpeec. Amma ye Yesu kpeseredac nga dafiu ngerec ngeree bic yombong fingeclmidac, ngicngac yeneac kicfu imoc dekperagidarec.⁴⁸ Dedaru Yesungo yofi edeec, “Naroanna, ge ruaegoc kenna. Negen negensinggango mengeregudac.”

⁴⁹ Amma ye yoac denammanungoc kpebung gareng, yeac amaunac yoac yofi haec, “Naroangga bic homedac, ge kpoukpou monggoc ebic mi mina.”⁵⁰ Ifi degec Yesungo imoc negemma Yairo edeec, “Ge mi kengecguu eng negensinggena. Ye kekec monggoc meficgeude.”⁵¹ Yesungo ifi dema amau kensikema ngic mongngo amau mi enudeac kpetarima Petoro nga Yohane amma Yakobo nga naroanggac nonggomama, yenigocsac enudeac deec.⁵² Dema ngicngac hafoangoc yeni naroanggac kiacsonggong anggec yofi edeyunuec, “Ngeni kiac wagec, naroang ye mi homedac, ye gau fede.”⁵³ ifi deu yeni dzomoremigec. Naroang ye bic homedac, ifi negenggec.⁵⁴ Nga ye ine naroanggac mariau mema kpacma deec, “Naroang, ge yacna.”⁵⁵ Ifi deu asuya monggoc kpoduu imohaingoc yacma taru Yesungo yaka migecldeac edeyunuec.⁵⁶ Nga nonggomama yereng kerectegec anec Yesungo ine ngic mong mi edeyunuecdeac kpae heiyemerec.

9

¹ Yesungo medacfora 12 kpacyunu hadacgec hadehade nga yafing sasawa kpracyunugecdeac nga hafei hania hania mengeregecdeac uayoac nga kuc yemmeec.² Yemmemma Anutuac eucerereng dekperagigecdeac nga hafeigoc mengereyunugecdeac sueyunuma³ yofi edeyunuec, “Ngeni singgac mefic mong mi mekembisia, hie nga yaka amma yasu nga dzo mong mi mebisia nga ngakpi yohockang mi mekembisia.”⁴ Nga ama monnu kensikegec, ngic yeneng ama heingemegec ngeni ama imohai tacyac angkecgec wisickeu taong monnu kembisia.⁵ Nga taong mong imocac ngicngac yeneng mi hoangngunugecdeu ngeni taong imoc wama haninginaunac yube kpegec mau yeni imoc henggec faka imocngo manganangina edzacyunubeso.”⁶ Ifi deu yeni amea amea kemma siduc gombung dekperagikecma hafeinginagoc mengereyunugec.

⁷ Ifi anu Gariraia bangecac gawanatoa kpara Herode, yeng wiac sasawa fingerec, imocac siduc negenu obohoec. Nocac ngic goa yeneng yofi degec, “Yohane dokunadzicnco homefunac gborima yacma kecde.”⁸ Ifi degec goango yofi degec, “Eriango fingeclmidac kecde.” nga goa yeneng degec, “Profete bicngoc yombong kecgec, yeneacunac mongngo hadac.”⁹ Nga Herodengo deec, “Neng Yohane ubea bic kperecgeai nga yomoc ine merac ngicac siduc negengkecduae.” Dema Yesu henudeac kicfifi kefec.

¹⁰ Anu aposoro yeni dzigenema ua megec, imocac siduc Yesu ammidacgec. Ammigec yeng meyunuma meickema tembuha tacbesonga taong mong kpara Betsaida, imohaigeng kenggec.¹¹ Kenggec habutoa yeneng imoc negemma ye modacgec. Modacgec, yeng hoangnyunuma Anutuac eucerereng dekperagiyemmemma ngerec ngereeac ayemmeec, yeni mengereyunuec.

¹² Ama marai anu medacfora 12 yeneng Yesuaru hama degec, “Bangec yomoc ngiha kpacfu kecmina ama marai andeac habu sueyununa amabangec tackende, imohai kemma yaka meficge nema imohai febisia.”¹³ Ifi degec deec, “Ngeneng yaka yemmegec negec.” Ifi deu merenggec, “Neni ic sogong marimong nga kondungyang yohockangsac mekecdimbe. Neni yaka mong mi bummebing dede habu sasawa yeneacsoc naric mi ambac.”¹⁴ Ngic imoc yeneac kpetengina 5 tauseng, ifi isocnco kecgecac amma ifi degec Yesungo medacfora yofi edeyunuec, “Ngeni ngicngac edeyunugec, yeni 50 habusoc ifi kpedzucnema tackenggec.”¹⁵ Ifi deu medac yeneng ngicngac ifi anggecdeac edeyunugec sasawango matacgec.¹⁶ Matacgec Yesungo ic sogong marimong nga kondungyang yohockang, imoc mema kiwa kurumennu fiu enu kenehema mendzirec. Mendzicma ngicngac mederema yemmegecdeac medacfora yemmeu¹⁷ yeneng imoc mederema ngicngac yemmegec. Yemmegec ngicngac sasawango negebec amma yaka tosea neti anggec, imoc kpedzucnegec kemema sakac 12 wakeec.

¹⁸ Yesungo naso monnu yengenaocngoc numuudeac kecmanu medacfora yegoc kecgec yeni kpesiyemmeec, “Ngicngac yeni neac merac deandae?” ¹⁹ Ifi deu degec, “Goango Yohane dokunadzic nga goango Eria amma goa yeneng ine profete mong esea, yeng gborima kecde deandae.” ²⁰ Ifi degec deec, “Nga ngeni ngenaoc ine neac merac deandae?” Ifi deu Petorongo deec, “Ge Anutuac Messiah.” ²¹ Ifi deu, yeni yoac imoc ngic mong mi edeyunugedeac deracyunuec.

²² Nga Yesungo yofi deec, “Ngicac Medac ye kpendzeng homac kpebeso. Yudangic enarafocngina nga womong gareng enara amma mitiac negengngic yeneng ye ubango wama kpegec homebeso. Homeu uameme harebec ammanu monggoc gborima yacbeso.”

²³ Yesungo habu sasawa yofi edeyunuec, “Ngic mong ye ni modacnubeso negendeu ye yengena ubasebiaac songo memama wenacsoc mariponga miacma tofohoma modacnubeso. ²⁴ Ngic mong ye yengena kekeha segereudeac negemma uaya mekecde, ye kekeha sufumiude. Nga mong ye neac amma kekeha waude, ye ine kekeha fingecmiude. ²⁵ Imoc yofiac, ngic mong ye bangecac wiac sasawa meficgema mekecde, ye ine kekeha sufumidarude nga yengena memanganeemeu kekeha imoc fora kpac anude. ²⁶ Nga ngic mongngo neac negenu gameagoc ande amma neac yoacnaac negenu gameagoc anude, yeac siduc yofi, Ngicac Medac ye Mamaac nga angeroforaac amma yengena kibikperagitoagoc haude, naso imohai yeng ngic imoc yeac ifingoc negenu gameagoc anude. ²⁷ Nga ngic yomoc nandae, ngenearunac goa yeni mi homemagec Anutuac eucerereng hau henggecde, imoc forangoc edengunuduae.”

²⁸ Anu yoac imoc deec, imocac sonda mocgu isoc wisickemanu Yesungo Petoro nga Yakobo amma Yohane meyunuu numugedeac tikiu enggec. ²⁹ Emma numumanu kicmesuyaheimerenu sirinha mong anu wambaya kperagima kongac koporarac yombong anec. ³⁰ Ifi ammanu imohaingoc ngic yohockang, Mose nga Eria yereng fingecma yegoc denegeng anoc. ³¹ Yeri kibikperagitoangiragocngoc fingecma Yesungo Yerusarennu kemma kekeha mesima wayunuma enudeac denegeng anggec.

³² Nga Petoro ogohoragoc, yeni gautoa fegec. Fegecfunac gborima yacma Yesuac kibikperagitoa nga ngic yohockang yegoc nanec yenenggec. ³³ Nga ngic yohockang yeri Yesu wama kemmaec Petorongo Yesu edeec, “Kunenna, yei kecni songea andeac bedzo bedzo harebec meni, geac mong, Moseac mong nga Eriaac mong.” Ye wiac imoc mi negentegecma eng ifi deec.

³⁴ Yoac denammanu hoeng mongngo fingecma mama semeyunu kengec amma hoeng manau kemmagec ³⁵ hoeng manaunac ubaudumeng mong yofi kpacma deec, “Yomoc neac Meisingmedacna, ngeni yeac yoac negembisia.” ³⁶ Ubaudumeng imoc kpac anu yeni kic fima Yesu tembuha nanu henggec. Hemma medac yeni yoacngina waickema nanggec. Nga naso imohai wiac henggec, imocac ngic mong mi edegec.

³⁷ Wereckengau Yesungo medacfora harebec yenigoc tikiunac kememagec ngicngac habu kunengngoc meficgegec. ³⁸ Anu habu yeneac botucfunac ngic mongngo Yesuac kpacma derecgema deec, “Kpoukpou, ge hama medacna henna, ye medacna mocgusac.

³⁹ Hadehade mongngo medac mendanggeu ye arohou asu manganango mema kpekpefac ammima sebiamekuc kpekutung meu enaraunac sofororoc ereande. Asu imocngoc medac mi wama naso homac memanganeyombonggeande. ⁴⁰ Nga medacfocga yeneng kporacmigedeac edeyunuba yeni kporacbibiema wadau.” ⁴¹ Ifi deu Yesungo yofi deec, “Ngicngac areng yomoc ngeni negensingngina kpac amma fakangina sicsauha. Naso herea ngenigoc monggoc tacbadeac modzona tide. Ge medacga nearu mehana.”

⁴² Ifi deu medac ye wegenera kemmanu asu seuhagocngoc medac kpefaheu bangecfu makpeu yeac sebiamekuc kpekutung meu Yesungo asu seuhagoc yoac seria ammima medac mengerema mama monggoc miec.

⁴³ Miu ngicngac yeneng Anutuac kuctoa imoc hemma kerectegec amma negenggec wiac engena anec. Amma yeni Yesuac ua sasawa hemma kerectegec anggec. Ifi ammagemeng medacfora yofi edeyunuec, ⁴⁴ “Ngeni kedzac kpema yoac yomoc negenggec. Naso

mi hereemanu yeni Ngicac Medac kererema ngicngac yeneac mariu faigec kpegecde." ⁴⁵ Ifi deu medac yeni yoac imoc mi negentegecgecdeac Anutungo uba negen negengngina hedzickeec. Hedzickeu yeni Yesuac yoac obohoma imocac hania kpesimigecdeac kengecyunuec.

⁴⁶ Anu medac yenearunac merang engena ande, imocac yenaocngoc yoacngina engemmama anec. ⁴⁷ Ifi anggec Yesungo negen negeng ubanginai feec, imoc bic negemma medacbistic mong mema yegoc faiu nanu ⁴⁸ yofi edeyunuec, "Ngic mong ye kpacna negemma medac yomoc hoanggeude, yeng ni ifingoc hoannude. Nga ni hoannude, yeng Kebu suenuec, ye ifingoc hoanggeude. Imoc yofiac, ngeneac botucfunac ngic mong mamea kecande, yeng engena ande." Ifi deu ⁴⁹ Yohanengo deec, "Kebu, ngic mongngo geac kpacfu hadehade nga yafing kporacyemmeu neni imoc hemma nenanggoc mi kecdeac amma kpetarimiding." ⁵⁰ Ifi deu yofi deec, "Ngic mong ye uanginaac ngaba mi ande, yeng ogongina ande. Imocac ngeni ye mi kpetarimibisia."

⁵¹ Yesungo kurumennu enudeac nasoya wegene hau negen negenga Yerusarennu sueu kenec. ⁵² Kenu ngic goa sueyunuu yeni waraima nenesemeng nga amagerec mengeregecdeac Samariaac guruama monnu kensikegec. ⁵³ Kensikegec Yesungo Yerusarennu kenude, ngicngac yeneng imoc negenggecac Yesu ama mong mi heimigec. ⁵⁴ Ifi anggec medahora Yakobo nga Yohane yereng imoc hemma yofi deoc, "Kebu, neni kurumennunac gerek deni mama ngic yomoc yonohodaru, imoc naric ambing me?" ⁵⁵ Deec Yesungo dzigenema yoac ifia negembesonga kpaе heiyemeru ⁵⁶ medacforagoc guruama monnu kenggec.

⁵⁷ Sinnu kemma ngic mongngo Yesu edeec, "Ge ihai me ihai kennadesoc modacguma gegoc kembadeac negenduae." ⁵⁸ Ifi deu yeng yofi meremmic, "Katekasi yeni bangec manau gefenginagoc nga sawa neng yeni faecnginagoc amma Ngicac Medacngo ine kparicganga kpac." ⁵⁹ Ye ngic mong yofi edeec, "Ge hama ni modacnuna." Ifi deu yeng deec, "Kebu, negennemmana kemma manna tonggomaguc habade." ⁶⁰ Ifi deu meremmic, "Homec yeni yenaocngoc tonggoemegec nga geng ine wayunuma kemma Anutuac eucerereng dekperagima kecbesena." ⁶¹ Nga ngic mongngo deec, "Kebu, ni modacgubadeac negenduae nga kemma arengfocna edeyunumaguc ine habade, imoc naric me?" ⁶² Ifi deu Yesungo yofi edeec, "Ngic mong ye negen negenga bic suemaguc dzigenekpe ande, ngic ifiango Anutuac eucererenggacsoc mi ande."

10

¹ Imoc wisickeu Kebungo ngic 72 meisinyunuma yohockang yohockang hendzicyunuec. Hendzicyunuma yengena taong nga amabisic kembesonga negensiec, imohai yeneng waraimigecdeac sueyunuma yofi edeyunuu kenggec, ² "Semeng fora homacngoc kpauedac fede nga ua ngic ine efeanecsac kecdae. Imocac ngeni semeng mingina numumigec yeng ua ngic sueyunuu yeneng kemma foraya mekpedzuc ambisia.

³ Negenggec, ramamedahango katekasi yeneac botucfu kecdae, siriha imocacsoc suengunuba kembisia. ⁴ Ngeni dzobirang me hie nga hanitabe mi mema kembisia. Amma sinnu ngic mong maficgema yoac mi mebisia. ⁵ Amma ngeni ama imohai me imohai enggecde imohai emma yofi debisia, 'Ruae ngenearu febeso.' ⁶ Ifi degec ruaengic mong imohai kecdeu ngeneac ruaeng ye hoanggeude nga mi kecdeu ruae imoc monggoc ngenanu dzigeneude. ⁷ Ngicngac ama ngemmegec ngeni imohaingoc tacbisia. Nga yени yaka nga doku ngemmegec ngeni imocnoc nebisia. Ngeni amayuguc mi kembisia. Uango ua ngic uabungngina maficgewayembe, imocngko ngereeude.

⁸ Ngeni taong monnu kenggec ngic yeneng ama heingemmema wiac mong negecdeac ngemmedae, ngeni imoc nebisia. ⁹ Ngeni taong imohai ngicngac hafeinginagoc mengereyunuma yofi edeyunubisia, 'Anutuac eucererengngo ngenearu bic mewegenengunuma hama fede.' ¹⁰ Nga ngeni taong monnu enggec ama mi heingemmecdeu

ngeni ine amasingnginau kemma yofi edeyunubisia,¹¹ ‘Taongnginaac yubengo hanininau mendanggedac, neni imoc ifingoc kpeni mama imocngo manganangina edzacngunubeso. Nga ngeni ine yofi negembisia. Anutuac eucererengngo yei bic mewegenengunuma hama fede.’¹² Amma nasoya hau taong imocac turunga ebiria yombong haude, imoc Sodong amabangec ferahemac fingerude, imoc edengunuduae.

¹³ Korasing nga Besaida ngicngac, ngeni sowecnginagoc. Ngenearu kucfaka homac bic fingerec. Amma kucfaka ifia Tiro nga Sidong taonnu fingeckbacfu yeni kopocsicnginaac ubahodunggac wamba bic heima hama nadzicma tacma ubamereng ambau.¹⁴ Nga ising ising nasotoau Anutungo Tiro nga Sidong areng, yeneac ubamangang negemma turunga efeanec yemmemna ngeni ine turunga ebiriangoc ngemmeude.¹⁵ Amma Kafanaung, geng kurumennu ennadeac ifi negengkecnec nga kpac yombong. Ge homecamau megu keme kemea siriha annec.¹⁶ Ngic mong ye kedzaha ngenearu faide, yeng kedzaha nearu faide. Nga ngeni ngadengunuude, yeng ni ngadenuude nga Kebu suenuec, ye ifingoc ngadeheude.”

¹⁷ Anu ngic 72 yeni sogac sogaigoc dzigenema degec, “Kebu, neni kpacga kpacni hadehade nga yafing yeneng yoacnina tofohoma woragecde.”¹⁸ Ifi degec Yesungo yofi merengyemmeec, “Ni Satang hemba yeng piratac isoc heima kurumennunac maec.¹⁹ Negenggec, ni uayoac nga kuc bic ngemmeai. Ngemmeba ngeni boudzoc nga we-meweme witinginau naric tigecde amma ngabanina nga yeac arengfora sasawa yeneng ngeneac bageu kecgecde. Nga wiac mongno ngeni naric mi memanganengunuude, kpac.²⁰ Nga hadehade nga yafingngo enacngina tofohoma woraandae, ngeni imocac homac mi sogaibisia. Nga kpacarengngina kurumennu oho ohoya fede, ngeni imocac homac yombong sogaibisia.”

²¹ Naso imohaingoc Tiri Asungo Yesu ammiu sogac sogai songongo mewakemiu yoac yofi deec, “Manggac, kurumeng nga bangec mingina, geng wiacga sasawa yomoc mesufuyemmenecac ngiccareng negen negentegengcnginagoc nga fitira kecdae, yeni imoc mi hennegeng andae. Amma nambaracbisic bisic, yeni wiac yomoc mekperagiymenec, imocac dengereguduae. Manggac, ge imoc hemma ubaga ngereede, imoc fora.

²² Mannango wiac sasawa nene imoc mekecduae. Nga mongno Medahaac hania naric mi negende, Manggacngosac negemmide. Ifi isocngoc mongno Manggacac hania naric mi negende, Medacngosac ye negemmide. Amma Medacngko ngicngac meisingyunuma Manggac edzacyunude, yeneng ifingoc ye negemmigecde.”

²³ Anu Yesungo medacfora yenearу dzigenema yeneacsac yofi dema edeyunuec, “Faka yomoc fingeru kicnginango hengkecdae, ngeni kenecnginagoc.²⁴ Ni edengunuba negenggec, warac profete nga ngictau homac yeneng ngeni wiac hengandae, imoc hembeso negemma sifu mi henggec. Nga ngeni wiac yomoc kedzacnginango negengandae, yeneng imoc ifingoc negembeso ayemmeu mong mi negenggec.”

²⁵ Anu dedeseriyoac negen negengngic mongno hama Yesu faitobannu faiudeac negemma deec, “Kpoukpou, ni faka dafi amma kekecseriac maridzoming mebade?”²⁶ Ifi deu Yesungo yofi meremmiiec, “Dedeseriyoacfу yoac oho ohoya fede, ge kibi imohai dafi osonegeng angannec?”²⁷ Ifi deu ngicngoc meremmiiec,

“Ge ubaherega nga ubaongaga nga kucga amma negen negengga hafoangoc Kebu Anutuga heresongogoc hoanggesena.” *(Dedeseri 6:5)*

Amma,

“Ge geangga anggengande, siriha imocngoc gegoc wegena kecdae, yeni heresongogoc hoangyunubesena.” *(Sesememe 19:18)*

²⁸ Ifi deu Yesungo yofi edeec, “Ge yoac dindingac dema merennendang. Ifi amma kecengkecbesannec.”²⁹ Nga ngic ye Yesungo yeac ngic dindingac debeso, ifi negemma kpесimieс, “Nga ngicngac neac wegena kecdae, imoc merac yombong?”³⁰ Kpesimiu Yesungo meremmiiec,

“Ngic mongno Yerusarennac Yeriko taonnu kemeudeac kemma godzungic yeneac mariu heiec. Heiu yeneng wambaya hesima kpegec homebeso anu ukugec feu woragec.

³¹ Femanu womong gareng monggo imohacsing kemema ngic feec, ye hemma kpegegenggema nobocsing kenec. ³² Kenu womong gareng yeneac memefic ngic monggo ifingoc imohai kemeec. Kemema ngic imoc henu feu ye ifingoc kpegegenggema nobocsing kenec.

³³ Anu samariangic monggo sing imocngoc modacma kemema ngic feec, ye hemma yeac ubea manganeec. ³⁴ Manganeu yearu kemma kerec doku nga waing dokuya kubehau kpakema kubeha biranggemie. Biranggema yengena donggi witiau faima kiangamau mekemma henggareng ammiec. ³⁵ Amma wereckengau siriwa dzo yohockang kiangamaac gareng mima yofi edeec, ‘Ge ngic yomoc henggareng ammima kecbesena. Ni monggoc dzigeneba dzo imocngo mi heiude isoc, imohaingoc imocac turunga gembade.’ ³⁶ Ifi dema Yesungo dedeseriyoac negen negengngic yofi kpesimie. ‘Ge dafi negennec? Ngic ye godzungic yeneac mariu manganeec. Nga ngic harebec yenearunac ngic merang yeac ogo amma wegena kefec?’

³⁷ Ifi kpesimiu yeng meremmiiec, ‘Yeac ubamangang negemma meficgeec, yeng.’ Ifi deu Yesungo yofi edeec, ‘Ge geanggaoc kemma ye anec, ifi isoc angkecbesena.’

³⁸ Yesu nga medacfora yeni kengkecma guruama monnu kensikegec. Kensikema ngac mong kpara Mata, yeng Yesu ameau enudeac heitaiec. ³⁹ Heitaiu Mataac munea kpara Maria, yeng Kebuac haniu matacma yoara negenec. ⁴⁰ Negemmanu Matango ine dzandzung namma yenigoc mi tacma ha namma Yesu edeec, ‘Kebu, ge neac negengyohoc mi annec. Ni tembuclna ngenenggareng ua mebadeac munana wanudac, ye edena meficnuu.’ ⁴¹ Ifi deu Kebungo yofi meremmiiec, ‘Mata Mata, ge wiac homacac negengyohoc amma ebic mekecne. ⁴² Amma wiac mogusac imoc megec ngereeude. Maria ye wiac gombunga isinggema mekecde, imoc monggo yearunac naric mi meickeude.’

11

¹ Yesungo naso monnu kemma botuha monnu numuu wisickeu medacfora yenearunac monggo deec, ‘Kebu, Yohane ye medacfora numugecdeac sing kpouyemmeec, ge ifingoc ifia goa kpounemmena.’ ² Ifi deu Yesungo yofi deec, ‘Ngeni yofi dema numubisia, ‘Manggac, geac kpac kpetiac febeso. Anu eucererengga imocngo hanemmebeso. ³ Ge wenacsoc yaka socnina nemmebesena. ⁴ Kopocsicnina wanemmena. Neni ifingoc ngic yeneac kopocsicnginaac turung kpoukpouac wayemmekecdimbe. Faitobannu mi fainunubesena.’

⁵ Ifi dema yofi edeyunuec, ‘Ngenearunac monggo tofocnac dzongiau ogea monggac amau kemma debac, ‘Ogona, ge ic sogong harebec meficnuna turunga ngade gembade.

⁶ Ogona monggo sing hereaunac hama tofocnac amanau hau yakana kpac anu noc gumebadeac obohoduae.’ ⁷ Ifi deu ogea ama manau tacma debac, ‘Ge ebic mi nenna. Nagunina bic meserima nambaracfocnagoc gaufedimbeac naric mi yacma megembade.’

⁸ Ni edengunuba, ye ogeaac amma ic sogong mi mibac dede yeng ngombonggema engngoc kpesimibac, imocac amma ye sifu yacma ic sogong miude.

⁹⁻¹⁰ Ngic mong ye numukecde, yeng wiac imoc meude nga hofockecdengo wiac imoc meficgeude amma naguu heiande, yeac nagu witimigece. Imocac ngeni numugec turunga ifi ngemmeude nga ngeni hofocma foraya meficgegecde amma naguu heigec nagu witingemmegecde. ¹¹ Ngeneac botucfu manggac monggac medahango kondungyanggac kpesimiu yeng boidzoc mangana naric mi miude. ¹² Nga ye kokorec gbomeaac kpesimiu weme weme naric mi miude. ¹³ Ngic ngeni mangana angandaengo sifu nambaracfocnina ubangerecac wiac gombunga yemmegecdeac negentegecdae. Imocac yofi negenggec, kurumeng Mangnginango fakangina gombunga imoc homac feraheu ngicngac Tiri Asuya yemmeudeac kpesimidae, yeni Tiri Asuya naric yemmeude.’

¹⁴ Naso monnu Yesungo hadehade mong yoara kpac, imoc ngicfunac kporarec. Kporaru hadehadengo ngicfunac erema kenu ngic yoara kpac kefec, yeng yoac deu ngicngac yeneng kerectegec anggec. ¹⁵ Nga ngicngac goa yeni ine yofi degec, ‘Ye hadehade nga yafing yeneac ngictaungina Bedzeburu yeac kucfu ngicngac yenearunac

kporacande.” ¹⁶ Anu goa yeneng ine Yesu kuha isinggegecdeac negemma kurumennunac faka kuhagoc mong meudeac egec.

¹⁷ Edegec Yesungo negen negengngina bic negemma yofi edeyunuec, “Bangec mong-gac ngic yeneng ngaba angemema tohogecdeu bangec imoc kisi fingeru ama mongngo ama moggac witiau makpema kpac anude. ¹⁸ Nga Satangnggo tohoma yengenaocngoc kporacemeudeu ye nga arengfora naric mi serima nanggecd, kpac. Nga ngeni neac ine deandae, ‘Ye Bedzeburungo ammiu yeac kucfu hadehade nga yafing kporacyunuande, imoc obohode.’ ¹⁹ Neng Bedzeburuac kucfu hadehade nga yafing kporacyunubai dede ngeneac medacfocngina yeni ifingoc yeac kucfu hadehade nga yafing kporacyunubau. Ifi anu ngeneac medacfocnginango yoacngina isingga desigecde. ²⁰ Nga Anutungo gbonga faiu ni imocnggo hadehade nga yafing kporacyunuduaeu Anutuac eucererengngogenearu bic hadac kecde, ngeni imoc negenggoc.” *(Makekeng 8:16-19)*

²¹ “Ngic kuhagoc mongngo dzikacac iwaya mema ameaac gareng kecmanu finaha gombunga feude. ²² Nga ngic mong kuha monggoc, yeng yearu hama yegoc ewema firang anudeu yeng ngic yeac dzikacac iwaya wangecmidarude. Wangeru ama minginango dzikac wiac, imocac kucfu seria kefec, imoc kpac anu ngic kuha monggocnggo yeac finaha hamangec mema hendzicma ngicngac goa yemmeude. ²³ Ifi anu mong ye neac ogona mi ande, ye ubeango wanude. Nga mong ye nigoc mekpedzuc ua mi meude, yeng neac wiac sinsasarang kpeudeac ua meude.”

²⁴ “Asu seuhagoc yeng ngicfunac erema bangec dokuya kpac, ihai kemma tacne-genudeac tatac hofocma yerecgema kecande. Kecma tatac mong mi meficgeudeu yengenaocngoc yofi deude, ‘Amana warac tacma wayai, imohai monggoc dzigenema kembadeac negenduae.’ ²⁵ Ifi dema kemma ama imoc wangge memengere angana henude. ²⁶ Hemma monggoc kemma arengfora 7 wangecyunu hagecde. Arengfora imoc yeneng ye ferahema mangana yombong andae, yeni meyunuma kemma ama imohai enarangina anu tacgecde. Tacgec ngic ye warac mangana kefec, imoc ferahema imocac mangana yombong kefude.”

²⁷ Yesungo yoac ifi demanu ngac mongngo habu yeneac botucfunac kpacma deec, “Ngac meguma namuu garengguec, ye kenehagoc.” ²⁸ Kparu Yesungo imoc wama yofi deec, “Ngicngac Anutuac yoac negemma hoanggeandae, yeni kenecnginagoc.”

²⁹ Ngicngac habu yeni engngoc hamangoc fegec Yesungo yoac torokpema yofi deec, “Naso yomocac ngicngac ngeni areng mangana yombong. Ngeni kucna isinggegecdeac faka kuhagoc fingecngemmeudeac derecgeandae. Nga ngeni faka kuhagoc mong mi ngemmengemmea, Yonaaru kucfaka fingerec, ifiasac henggecde. ³⁰ Niniwe taonggac ngicngac yeneng negensinggegecdeac Kebungo Yonaaru faka kuhagoc meec. Nga siriha imocngoc Ngicac Medac yengenaoc ngicngac yomocnggo negensinggegecdeac fakaya kuhagoc meude.

³¹ Seba bangecac ngactau ye Saromoac negen negentegec meudeac bangec tegiau sautfunac haec. Imocac amma yeng ising ising nasou ngicngac yomoc yenigoc yacma nammagec fakangina isingga yeneac mangana deyemmeude. Anu negenggoc, yomocngo* Saromoac negen negeng ferahade. *(1 Ngictau 10:1-13)* ³² Niniwe taonggac ngic yeni Yonaac dedekperagiyaoac negemma ubamereng anggecac amma yeneng ising ising nasou ngicngac yomoc yenigoc yacma nammagec yeneac fakangina isingga yeneac mangana deyemmegecde. Negenggoc, yomocngo† Yonaac faka ferahade.

³³ Monggo kifa kpedzereckema sufu sufuu me pake bageau naric mi faiude, ye kifa imoc tatahau faiu tacma kperagiu ngicngac yeni erema kperagia henggecde.

³⁴ Kicga imoc sebigaac kifa amma kicga gombunga fema sebiga sasawa mekperagidarude. Nga ge kickerec me kicmangang mekecmka kicgango manganeudeu ine sebiga sasawa kundung kpeude. ³⁵ Imocac amma ge kperagia fegende, imoc kundung kpebacac amma garengemema kecbesena. ³⁶ Ge sebiga sasawango kundunga kpac kperagigoc feudeu

* 11:31: Yesungo yengenaac imoc deec. † 11:32: Yesungo yengenaac negemma “yomocngo” deec.

sebiga kperagiango sokoma feude. Imoc kifa mong kperagitoayagoc mekperagiguande, ifi isoc.”

³⁷ Anu Yesungo yoac demanungoc farisaio mongngo yegoc yaka neudeac heitaiu yeac amau emma taroc. ³⁸ Matacma maria mi dzuacma yaka eng neudeac anu fari-saiongo imoc hemma kpidohou ³⁹ Kebungo ine yofi edeec, “Farisaio ngeni teratasengina ngadeasac dzuacandae nga ngeni ubaherengina manau ine kickerec amma wiac manganango wake wakea fede. ⁴⁰ Ngeni negen negengtegecngina kpac. Kebungo ngadeau wiac meec, yeng manaac ifingoc meec. ⁴¹ Ngeni imocac amma ngicngac makpekpea wiac heregoc yemmebisia. Ifi anggec wiacngina sasawa dzuac dzuara anude.

⁴² Farisaio, ngeni romboc nga gime amma mondzungngina sasawa imocac kpete mema 10 imohacnac mocgu hendzicma Anutu miandae. Nga faka dindingac nga heregoc Anutuac songo negembesonga, imoc ine ihoc bahoc amma waandae, imocac ngeni sowecnginagoc. Ngeni faka gombunga imoc modacbisia amma tosea mi wabisia.

⁴³ Farisaio, ngeni kpekpeturang amau tatac warac warac imohai tacgecdeac angemme-ande nga ngicngac yeneng kpedzaroc sobennu eweheihei faka angemmecdeac songo negengandae, imocac ngeni sowecnginagoc. ⁴⁴ Kicsere esea mong wiahka kpac ngic yeneng mi negemma eng witiau kengha andae, ngeni kicsere ifia isoc kecdae, imocac ngeni sowecnginagoc.”

⁴⁵ Ifi deu dedeseriyoacac negen negengngic yenearunac mongngo edeec, “Kpoukpou, ge ifi dema neni ifingoc dengbarinnununec.” ⁴⁶ Ifi deu Yesungo yofi merenec, “Dedeseriyoacac negen negengngic, ngeni ifingoc sowecnginagoc. Ngeni ngic yeneac ngadenginau finac ngicngko memeacsoc kpac, imoc faiandae nga ngenang ine ngicngac ebicngina efea anude, imoc meficyunugecdeac gbongngina mong mi sinegecede.

⁴⁷ Bangecfocnginango profete esea yunuhomegec homegecmoc yeneac kicsereu simengngina miacandae, imocac ngeni sowecnginagoc. ⁴⁸ Yeneng profete yunuhomegec nga ngeneng kicsrerengina simenggoc miackeandae, ngeni ifi amma yofi dekperagidae, ‘Neni fakaninau uba mocgu kecdimbe.’ ⁴⁹ Ngeneac amma Anutuac negen negentegecngo bicngoc yofi deec, ‘Ni profete nga aposoro yenearu sueyunuba yeneng goa yunuhomegecde nga goa yunukporac ayemmegecde.’ ⁵⁰ Imocac amma bangec hanac hanaheaunacngoc erekecma profete yunuhomegec sacngina maec, imocac turunga yagucac ngicngac kecdae, ngenearunacngo kpoudacgecde. ⁵¹ Turung imoc Abeac sacfunac hanahema erekecma Dzekariaac sacfu erede. Yeni Dzekaria arata nga kpetiac ama botucngirau kpehomegec. Oc, ngicngac areng yomoc ngeneng turunga imoc kpoudacbisia, imoc edengunuduae.

⁵² Dedeseriyoacac negen negengngic, ngeni Anutu negemmigecdeak ki, imoc ngicngac yenearunac meickegec. Amma ngenang imohai mi emma ngicngac yeneng embesonga ammagec ine kpaе bic faiandae, imocac ngeni sowecnginagoc.”

⁵³ Anu Yesungo wama ngadeau kemeu mitiac negen negengngic nga farisaio, yeneng yeac negemmanggang amma kpesi kpesi hania hania kpesimigec. ⁵⁴ Yeni, “Yoac goa segeu meni.” dema yeac gareng mema kecgec.

12

¹ Ngicngac homac yombong, teng tauseng nga noc ifiacsoc yeni kpezucnema nanggecac yenaocngoc timbimbingsemegec. Nga Yesungo medacfora, yeneac negemma yofi deec, “Ngeni farisaio yeneac ikoc fakangina imocac henghomema kecbisia, imoc yis isoc ic sogonnu sokoude. ² Wiac mong sangoyagoc fede, imoc kecma nonongkac fingectegerude nga sufu sufuya fede, imoc negendacgecde. ³ Imocac ngeni kundunnu yoac sasawa deandae, imoc kperagiaw negenggecde nga ama mana kapiau kedzacnginaiu sangic deandae, yeni imoc ama witiau namma dekperagigecde.

⁴ Nga tosofocna, ngic goa yeni sebingina kpehomegecdeac kuc mekecma monggoc memanganengunugecdeac kuc hofocandae, ngeni yeneac mi kengecngunubeso, imoc edengunuduae. ⁵ Ngeni ine Kebu monggacsac damungunubeso. Yeng ngunuhomegecde

gerechofeu ukungunuu kemegecdeac uayoac nga kuc mekecde. O, yofi deduae, ngeni yeac ine damungunubeso. ⁶ Ngicngac yeni nengbisic 5 faigec peni yohockang sacsacngo bummeandae nga Anutungo neng imoc yeneac neng naric mi nigekpeude. ⁷ Amma ngeneac orucdzongina kpete, imoc ifingoc oso osodara. Nga ngeneng sawaac nengarengtoa yeni feracyunudae, imocac ngeni mi kengecngunubeso.

⁸ Ngic mong ye ngic yeneac kicfu Ngicac Medac yeac deande, ‘Ni yeac areng anduae.’ ifi deu Ngicac Medacngo yeac ifingoc Anutuac angerofora yeneac kicfu yofi deude, ‘Ye neac ngic.’ ⁹ Nga ngic mong ye ngic yeneac kicfu ine ni busicnuude, neng ye ifingoc Anutuac angerofora yeneac kicfu busic kpebade. ¹⁰ Ngic mong ye Ngicac Medac emmiude, yeac kopocsic wamigecde nga mongngo Tiri Asu denggbaringgema emmiude, imocac kopocsic wawaya ine mi fede. ¹¹ Ngic yeneng mengunuma kpekpeturang amau nga yoacgarenggac enara nga ngickuneng, yeneac kicfu faingunugecde, ngeni naso imohai negengyohoc amma yofi mi debisia, ‘Neni turunga dafi merennide nga noc yoac denide?’ ¹² Naso imohaingoc Tiri Asungo yoac enacnginai faiu ngeni imoc debisia.”

¹³ Anu ngicngac habu yeneac botucfunac ngic mongngo Yesuac deec, “Kpoukpou, dacna ye mannaac maridzoming tembuha mekecde, imocac geng dena noboha ni mederema nenu.” ¹⁴ Ifi deu Yesungo yofi meremmiec, “Ngic, ngereac iwai mederema gareng ambadeac mongngo mi fainuec.” ¹⁵ Ifi dema torokpema yeneac yofi deec, “Ngeni dzofinactoac kichodung ambauac garengngina mebisia. Ngic monggac dzofinactoa, imocngo yengena kekehaac siriha mi heficeude.”

¹⁶ Ifi dema yoac mong heima yofi edeyunuec, “Ngic dzofinactoagoc mongngo uayau semeng fora homac anu ¹⁷ semenga dahai faiudeac negengemema ¹⁸ yofi ambade negenec, ‘Ni semengama dafiguc mekecduae, yeni hembarackema monggoc meyadiyunuma mema semeng nga wiacna gombunga sasawa kpedzucnema ihai kpeturanggebade. ¹⁹ Kpeturanggeba wisikeu neanna ubaonganaac yofi debade, ni kifa homacacsoc wiac gombunga bic kpedzucnedua, imocngo kekecna meefaiu menec amma sogac sogaigoc kecbade.’ ²⁰ Ifi deu Anutungo yeac yofi deec, ‘Kapangic, tofocnac yomohaingoc kekecga wangecgugecde. Nga wiacgamekpedzuc amma wanade, imoc goa yeneng megecde.’”

²¹ Nga Yesungo monggoc torokpeec, “Ngic mong ye yengenaac amma bangecac dzofinactoa mekpedzuc amma Anutuac kicfu ine dzofinaha kpac kecde, yeac kekeha imocacsoc anude.”

²² Imocac amma Yesungo medacfora yofi edeyunuec, “Neni noc yaka nenide nga sebininaiu noc wamba heima kecni. Ngeni imocac kekecnginaac defagung mi ambisia. ²³ Kekecngo yaka ferahaude nga sebingo ngakpikporuc ferahaude. ²⁴ Ngeni wondong yenenggec. Yeni heikpenec nga netohong mong mi negenggec Anutungo sifu eng semeng yemmekecde. Nga Anutuac kicfu ngeneng neng yeneac engena andae. ²⁵ Ngenearunac mongngo dewaidzoc amma kefu imocngko kekecnasoya kapianec monggoc naric mi mehereeude. ²⁶ Ngeni wiac kapia ifiaac obohoma tosea goaac ifingoc negengyohoc mi ambisia.

²⁷ Dzaring eng tohoandae, ngeni yenembisia. Yeni witic mi yumuandae amma uatoa mi mema sifu yadiandae. Ngictau Saromongo warac wamba kibia gombunga gombunga heikefu kibikperagitoayango ine dzaring yeneac kibi kereng kereng mi ferahaec. ²⁸ Nga dzaring amasobennu eng tohoandae, yeni yagucac fingecdae nga ngic yeni wereckenu herecgema gerecfu ukuyunugecde. Nga Anutungo dzaringtehec ifia wamba heiyeemeudeu yeng ifingoc ngicngac ngen negensingngina kapia mekecdae, ngeni ngakpikporucngina torokpeu torokpe imoc monggoc ngemmeude.

²⁹ Imocac ngeni noc yaka nga doku dahacnac fima negecdeac negengyohoc nga demadzac imoc wabisia. ³⁰ Nga bangeha bangeha ngicngac yeneng imoc megecdeac ngen negengngina imohai faigec fekecde. Nga ngeni wiac imocac obohoandae, Mangnginango imoc bic negende. ³¹ Ngeni yeac eucerereng meficgegecdeac ua mebisia nga wiac imocnoc ifingoc torokpeu torokpe megecde.”

³² “Habubisic, ngeni mi ebiribisia. Mangngina ye eucererenga ngemmeudeac negenu ngereede. ³³ Ngeni finacngina suegec ngicngac yeneng imoc bummedacgec ngeni dzo imoc mema ngicngac makpekpea kecdae, ngeni ubangerecac wiac imoc yemmebisia. Ngeni dzobirang mi barackeudeac meficgebisia. Nga ngeni dzofinac kuha mi maude, imoc kurumennu kpedzucnebisia. Ihai hamangecngic ngeni mi hagecde nga dzauk-pazdadzanggo wiac mi memanganeude. ³⁴ Imoc yofiac, ngeni dzofinacnginanofu faigec fede, imohaingoc ubasongongina ifingoc feude.”

³⁵ “Ngeni kporucngina seria kpema kifangina kpedzereckema efaima kecbisia. ³⁶ Ngic kuneng ye memeturang amaunac hama naguu heiu ua ngihango yeac tomai kecma nagu bic witimiude, ngeni ifi isoc tomai kecbisia. ³⁷ Nga mingingnginango hama uamedacfora yeneac gaugbori kecgec meficyunuude, ngeni kenecnginagoc. Foracngoc, ye yengenaoc yeneac kingang kpeudeac kporuha mewegenema ‘Ngeni tacmagec.’ deu tacgec yaka meha yemmeu negecde, imoc edengunudiae. ³⁸ Ye tofocnac dzongjau me ama werec wereckenggac gaugbori kecmagec hama yenenudeu uamedac imoc yenei kenecnginagoc. ³⁹ Hamangecngic ye ama hetackema engande. Nga ama mingina mong ye hamangecngic noc nasou haude negendeu ye hamangecngic kpae heimiude. ⁴⁰ Nga ngeni Ngicac Medacac aua mi negemmagec ye haude, imocac amma ngeni ifingoc efaima kecbisia.”

⁴¹ Anu Petorongo deec, “Kebu, ge yoac heima dedammoc, imoc neneac me ngicngac sasawa yeneac denec?” ⁴² Ifi deu Kebungo yofi merenec, “Amagareng gombunga mong negentegehagoc minginaac yoac dede modacande, minginango amagareng ifia uayoac miu ye uamedacfora yeneac enarangina amma yaka nasou hendzicma deecfu negecdeac yemmekefude. ⁴³ Yemmekefu minginango dzigene hama henu uamedacngu ua imoc medarudeu uamedac ye kenehagoc. ⁴⁴ Foracngoc, minginango wiara sasawa garenggeudeac demiude, imoc fora yombong. ⁴⁵ Anu wanacngic mong ye yengenaocngoc ine yofi negensiudeu, ‘Minginnango bic mi haude.’ Ifi dema ua ngicngac goa yunuma minginaac wiac nedacma doku seria nema ubea sufuude. ⁴⁶ Ifi anudeu wanacngic ye tomai mi kecma minginaac uamemenaso nga auaya mi negemmanu minginango haude. Hama uamedac imoc herecge meickeu kemema negen negensingngina kpac, yenigoc kefude. ⁴⁷ Nga wanacngic mong ye minginaac yoac negemma mi efaima kecde, yeng dzikac ebiria kiude. ⁴⁸ Nga wanacngic mong ye minginaac uayoac nga songo mi negemma dzikacac arennu faka goa angande, ye dzikac efeanecsac kiude. Ngicngac yeneng ngic mong wiac ebiria migec mekecde, yearu wiac ebiriangoc fingecmiudeac negenggecde. Nga yeni ngic mong wiac homac garenggeudeac uayoac migec mekecde, yeng wiac monggoc negen negengtegecog garenggeu imoc mi memanganeudeac negenggecde.

⁴⁹ Ni bangecfu gerec habuya habuya fiba dzeudeac mayai. Amma gerec imoc bic dzebacfu ubana ngereebac. ⁵⁰ Amma ni dokunadzic siriha mong nadzicbesare. Ni imoc negemma herenango ebiriu kecma uana imoc hafoangoc wisickeu herena ngereeuude. ⁵¹ Ni bangecfu ruae meficgebadeac mayai, ngeni imoc mi negembisia, imoc kpac. Ni ine tohoemegecdeac mayai, imoc edengunudiae. ⁵² Nga yofinenggac nga namma enude, imohai ngicngac 5 ama mana monnu kecdae, ngeni tohoma kecgecde. Harebec yeneng yohockang yerigoc nga yohockang yeri harebec yenigoc ngaba ngaba angemegecde. ⁵³ Yeni tohoma manggacngo medac yegoc ngaba anude nga medac yeng mamagoc ngaba anecde. Nenggac ye naroangagoc ngaba anude nga naroangng nonggeagoc ngaba angemeecde. Nga erangi yeri tohoemema ngaba angemeecde.”

⁵⁴ Anu Yesungo ngicngac yeneac yofi deec, “Ngeni wenac keme kemeau hoeng mong hemma yofi bic deandae, ‘Kia kuneng kpeude.’ ifi degec kia kpeude. ⁵⁵ Nga sautfunac firang kpeu negemma yofi deandae, ‘Bangec gerea anude.’ degec ifi angkecde. ⁵⁶ Ikocngic, ngeni bangecfu nga sawau wiac fingecande, imoc hemma naric isinggegecde. Nga nasso yofinenggac kecdimbe, imocac faka hemma isinggebau dede imocngo naric ambac.

⁵⁷ Amma ngeni faka damocngo dindingac ande, imoc ngenaoc isinggebau dede imoc naric ambac. ⁵⁸ Anu ngabaga mongngo yoacfу faiguudeac meguu ngerahafoс sinnu kengkecdape, ge imohai yoacngira dengereecdeac uatoa mebesena. Ifi mi annadeu ye desi desingic yearu faiguude. Nga desi desingicngo keracnatanggaru faiguu keracnatangngо witicamaу faiguude. ⁵⁹ Faiguu ge ihai takecma ngabagaac turung hafoangoc nga dzo wisickea yombong kpoumaguc witicamaunac manade, imoc edeguduae."

13

¹ Naso imohaingoc ngic goa yeneng Yesu siduc yofi ammigec, "Gariraiangic goa yeni sesenginaac yang Anutuac hosuc heimagec Piratongo deu ngicfora yeneng kemma yunuhomema sacngina imoc sesenginaac yang sawagoc meturanggegec." ² Ifi degec Yesungo yofi kpesiyemmeec, "Ngic homegec, yeneac kopocsicngо gariraiangic sasawa yeneac kopocsic ferahaecac ifi fingecyemmeec, ngeni imoc negensidae me?" ³ Nga imoc kpac yombong. Ngeni ubangina mi merenggecdeu ngeni sasawango yeni homegec, ifi isocngoc homedacgecde, imoc edengunuduae. ⁴ Nga Siroang amaherecngо barackema ngicngac 18 witinginaу mama yunuhomeec. Imocac ngeni dafi negensidae, yeneac kopocsicngо Yerusarennu ngicngac sasawa kecdae, yeneac ferahade me?" ⁵ Imoc kpac yombong. Nga ngeni ine ubangina mi merenggecdeu ngeni sasawango yeni homegec, ifi isocngoc homedacgecde, imoc edengunuduae."

⁶ Anu Yesungo yoac mong heima yofi edeyunuec, "Ngic mong ye fig ic mong waing uayau homeru nanec. Nanu ye kemma fora hofocma ⁷ waing uaac gareng edeec, 'Ic yomocac fora hofocma kecbare kifa harebec bic ande nga ye nocac eng namma bangec kereha nedarude? Imocac ic imoc herecgema ukuna.' ⁸ Ifi deu waing uagarengngо deec, 'Kunenna, ge imoc wana kifa yomohai ifingoc nammanu haniau usuma bangec goa kerehagoc heikebesare. ⁹ Ifi amba ngadeguc fora gombunga anude gedang. Nga fora mi anudeu ge naric herecgema ukubesena.'

¹⁰ Sabata naso monnu Yesungo kpekpeturang ama monnu emma kpoukpou ua meec. ¹¹ Meu ngac mong imohai tarec, ye hafeiac hadehade mongngo ngadea mendanggeu ngadehokuc kefu kifaya 18 bic anu naric mi kpehengaibac. ¹² Nga Yesungo ye hemma yearu haudeac kpacma edeec, "Ngac negenna, ni hafeiga meickeba kpac ande." ¹³ Ifi dema maria witiau faimanu ngac ye ngadea bic kpehengaima sorongaiu yacma namma Anutu dengereec.

¹⁴ Ifi anu kpekpeturang amaac gareng yeng ine Yesungo sabatau mengec mengere ua meecac herebu negemma ngicngac edeyunuec, "Uameme 6 fede, imohai ua mebesonga. Ifi anu ngeni naso imohai hagec mengerengunugecde nga sabata nasou ine kpac." ¹⁵ Ifi deu Kebungo meremmiec, "Ikocngic, ngeni sasawa burumaka nga donggifocngina doku yemmegecdeac sabata nasou yungecyunugеc, yeni amanginaunac magec meyunu kengandae, imocngо ngereede. ¹⁶ Nga ngac yomoc Abrahangac naroannoc, ye ine Satangngо kifa 18 bic dzegeu kecmanu sabata nasou yungec yungera anude, imoc negenggec ifingoc ngereede." ¹⁷ Yesungo ngabafora turunga ifi merengyemmeu yeni gameyunudarec. Nga ngicngac tosea yeni ine faka engena sasawa meu henggec, imocac sogac sogai andacgec.

¹⁸ Imocac Yesungo yofi deec, "Ni noc wiacfusing yoac heiba ngeni Anutuac eucererenggac siriha naric negentegecgecde?" ¹⁹ Imoc mastet gbomea isoc, ngic mongngo mastet gbomea mema uayau homeru yadima ic wegena anu sawau neng yeneng hama fawau faec heigec."

²⁰ Ifi dema Yesungo monggoc deec, "Anutuac eucerereng, imoc noc wiacfusing yoac heiba negenggecde, ²¹ Imoc yis isoc, ngac mongngo farawa 20 kiroacsoc meu uuha yisgoc yerecgema meu hafoangoc yisagoc anude."

²² Yesungo taong nga amabisicfu yerecgema ngicngac yенearu kpoukpou ua mema Yerusarennu kenudeac kenec. ²³ Kemmanu ngicngac goa yeneng kpesimigec, "Kebu, ngicngac efeanec, yenengsac komoc kpegecde me?" ifi degec Yesungo yofi merenec,

²⁴ “Ngeni nagu kapiau enggecdeac ua seserigoc mekecbisia. Ni edengunuba, ngicngac homac yeni Anutuac eucererennu enggecdeac uatoa mema obohogecde.

²⁵ Nga ama minginango yacma nagu heiu ngeni ngadeau namma naguu heima degecde, ‘Kebu, nagu witinemmena ereni.’ Ngeni ifi degec yeng merengngemmema yofi deude, ‘Ngeni dahacnac? Ni mi negengngunuduae.’ ²⁶ Ifi deu ngeneng degecde, ‘Neni gegoc nenedoku neing nga geng neneac sinnu namma edekpou anemmenec.’ ²⁷ Ifi degec, yeng ine monggoc edengunuude, ‘Ngeni dahacnac? Ni mi negengngunuduae. Manganameme, ngeni neac kicfunac meickegec.’

²⁸ Ngeni Abrahang nga Isaka amma Yakobo nga profete sasawa Anutuac eucererennu tacgec yenenggecde. Nga ngeni ine ngadeau ukungunugec kemegecde. Ihai ngeni kiacma enac kisaranggema kecgecde. ²⁹ Nga ngicngac yeni wenac ere eraunac nga keme kemeaunac amma nort amma sautnacngo hama Anutuac eucererennu tacma nenyaka negecde. ³⁰ Amma goa ngadea kecandae, yeni warac warac anggecde nga warac warac kecandae, yeneng ngadea anggecde.”

³¹ Naso imohaingoc farisaio goa yeneng hama Yesuac degec, “Herodengo gubeso andeac bangec yomoc wama kenna.” ³² Ifi degec Yesungo yofi merengyemmeec, “Ngeni kemma katekasi imoc yofi edegec, ‘Negennec, ni yaguc nga wereckenu hadehade nga yafing kporacyunuma hafeigoc mengereyunuba uameme harebecfu uana wisickeude.”

³³ Ni yaguc nga wereckenu amma wereu kengkecbade. Profete yeni bangec goau naric mi yunuhomebesonga, kpac. Yeni Yerusarennusac yunuhomebesonga, faka ifi fede.”

³⁴ Yerusareng Yerusareng, ge profete yunuhomeannec nga ngic gearu sueyunuyunuya, yeni hocngo yenereannec. Nga Kokorec nonggeango nambaracfora kpeganga bageau foforacyunuande, ni ifi isoc naso homac nambaracfoga kpedzucungunubadeac negembare ngeneng ine imocac songo mi negenggec.

³⁵ Negendae, amangina kisi nanude nga ngeni monggoc mi nenggecde kecma yofi degecde, ‘Kebuac kpacfu ngic hade, ye kenehagoc.’ ifi degecde, imohai ngeneng monggoc nenggecde.” (Mitiyegec 118:26)

14

¹ Yesungo sabata naso monnu farisaio yeneac enarameme monggac amau yaka neudeac enu farisaio yeneng yeac haifaka hennegeng amma tacgec. ² Imohai ngic mong sebia yadi yadia, yeng hama Yesuac kicfu nanu ³ Yesungo dedeseriyoacac negengngic nga farisaio yofi kpesiyemmeec, “Sabatau ngic mengec mengereyunua sing mong fede me kpac?” ⁴ Ifi deu yeni turunga mong mi merenggec Yesungo ine ngic imoc maringo mema mengerema sueu kenu ⁵ yofi edeyunuec, “Ngearunac monggac medac me burumaka monggo dokuteng monnu kemeu sabata naso anu ye sifu bic kemma kpedziu ereude.” ⁶ Ifi deu yeneng yoac imocac turunga meremmigeceac obohogec.

⁷ Anu imohai ngic heitaiyunuyunuya goa yeneng tatac warac warac isingga ihai tacgec Yesungo yenensima yoac heima yofi dema edeyunuec, ⁸ “Ngic mongngo memeturanggac yakau heitaiguude, imohai ge yakaac tatac warac waracfu bic mi tacbesena. Ngic heitaiyunuyunuya, yeneac mongngo gedang geac engena anu ⁹ ngic ye nga ge ngerahafof heitainguruec, yeng hama yofi edegeude, ‘Ge meickemana ngic yomocngo taru.’ Ifi deu gameguu tatac wisic wisickeau yombong kemma tacnade. ¹⁰ Ngic mong heitaiguu ge ine kemma tatac wisic wisickeau tacbesena. Ifi anna ngic heitaiguec, yeng hama gemma yofi gedang deude, ‘Tosona, ge tatac warac waracfu ekemma tacna.’ Ifi deu ngicngac bic tacdae, yeneac kicfu eweheihei anggenude. ¹¹ Ngic mong ye yengena sebi meengande, ye memagecde nga mong ye sebia memaemeande, ye meenggecde.”

¹² Nga Yesungo ngic heitaiec, yeac ifingoc yoac mong yofi deec, “Ge wenacfu me marai yakaneneac areng goa heitaiyununade, imohai ogofocga me dacmunac me arengfocga me dzofinacnginagoc geac wegenacfu kecdae, yeni mi heitaiyunubesena. Yeneng turunga gedang monggoc kpougenggec sing imohai turungga bic menade, imoc mi ngereede. ¹³ Ge heitaiyununadeac yaka mengerenade, naso imohai ine ngic makpekpea

nga sebimangang nga hanimangang amma kicpisic heitaiyunubesena. ¹⁴ Ge ifi amma kenecgagoc annade. Imoc yofiac, ngic imoc yeni turunga kpouenggecdeacsoc mi anggecde. Nga geng yaka imocac turunga imoc ngicngac dindingac gborima yacgecde, naso imohai menade.”

¹⁵ Ifi deu yeni yaka netacma yoara negenggec yeneearunac ngic mongngo Yesu edeec, “Mong ye Anutuac eucererennu emma yaka netarude, ye kenehagoc.” ¹⁶ Ifi deu Yesungo yofi edeec, “Ngic mongngo nenesemeng kuneng mengereudeac negemma ngicngac homac yeneac yoac faima heitaiyunuec. ¹⁷ Heitaiyuu yakaneneac naso hau ye wanacngiha sueu yeng ngic heitaiyunuec, yeni edeyunuudeac kemma deec, ‘Hagec, wiac sasawa bic mengereding tacde.’ ¹⁸ Ifi deu ngic sasawango degbedic amma ngic warac warac yeng deec, ‘Ni bangec mong bummedua, imoc hembadeac kembeso negenduae, imocac negenna mi manganebeso.’ ¹⁹ Nga mongngo deec ‘Ni burumaka ngiwa 10 uaac amma bummedua, imocac kemma uau tobangyunubeso negenduae, imocac negenna mi manganebeso.’ ²⁰ Ifi deu ogongira mongngo deec, ‘Ni ngac medua, imocac amma naric mi habade.’ ²¹ Nga wanacngic ye kemma yoac imoc sasawa mingina edeu minginango herebu negemma wanacngic yofi edeec, ‘Ge taonggac sinnu nga singbisicfu bic kemma ngicngac makpekpea nga sebimangang amma kicpisic nga hanimangang, yeni hesicyununa hagec.’

²² Ifi deu wanacngicngo kemma deec, ifi isoc amma dzigenema yofi edeec, ‘Kunenna, ge dedang, imoc bic andacdua nga ama manau ine tatac fedengoc.’ ²³ Ifi deu minginango deec, ‘Ge singtoa nga singbisic fedacde, imohai kemma ngicngac yenemma hagecdeac serima dema hesicyunuma hana yeni amana mana yomoc mewakebisia. ²⁴ Ngic heitaiyunuyunya, yeneearunac mongngo yakana ohoai, imoc naric mi nehembesande, imoc edengunuduae.’ ”

²⁵ Yesungo kenu ngicngac habutoango ye modacma kenggec dzigenema yenemma deec, ²⁶ “Ngic mong ye hama modacnubeso negenside, ye yengena nonggomama nga eneng nambaracfora amma dacmunac nga yengena kekeha ifingoc mi ngadeheudeu ua medacna naric mi anude. ²⁷ Nga mong ye yengena mariponga mi tofohoma modacnuudeu ye medacna naric mi anude. ²⁸ Ngeneearunac ngic mongngo kicfifiac amaherec mebesonga negende, ye ama naric medarude me kpac, imocac waicke tacma hanahema iwaic buma osoareng andarudeu ngereeude. ²⁹ Nga ye hanahema ifi mi amma eng simenga yeregema faima ama tosea mi medzickebac dede ngicngac yeneng imoc hemma deendema ammima ³⁰ yofi degecde, ‘Ngic yomoc ye ama mebesonga amma kuha mong mi feecac ama ua mi mesiec.’

³¹ Anu ngictau mongngo ngicfora 10 tauseng eng meyunuma kemma ngictau mong ye ngicfora 20 tauseng, yenigoc ewegecde, imoc mi ngereeude. Ye matacma yofi isingga maguc anude, neac ngicfocna 10 tauseng yeneng ngabafocna hagecde naric yunugecde me kpac. ³² Imoc naric mi anudeu yeni hereaungoc kecmagec yeng gubekisang ngic ruae dafi fingerudeac sueu kenude. ³³ Imocac ngeneearunac mongngo yengena wiac sasawa mi ngadehedarudeu ua medacna naric mi anude.

³⁴ Kondung imoc wiac gombunga. Nga kondungngo kiacma songea kpac anudeu ine ye songea monggoc naric mi meficgeude. ³⁵ Kondung ifiango yaka sereau ukuni memefic mi anude nga bangec kereha semeng uau faiandae, imocgoc kpeturanggenideac sircifingoc mi ande. Imoc eng ukuandae. Kedzahagoc yeng yoac yomoc negembeso.”

15

¹ Takesimeme ngic nga manganameme sasawa yeneng Yesuac yoac negembesonga yeac hoannu kendacgec. ² Nga farisaio nga mitiac negen negengngic yeneng negenggec imoc naric mi anu nasosoc yofi dekecgec, “Ngic yomoc ye manganameme hoangyunuma yenigoc yaka neande.” ³ Ifi degec Yesungo yoac mong heima yofi edeyunuuec, ⁴ “Ngeneearunac ngic mong ye ramafora 100 femide. Ifi femiu yeneearunac rama mong sufuudeu minginango dafi anude? Ye rama 99 wayunuu bangec kisiu nanggec kemma

mocgu imoc hofockecma meficgeude. ⁵ Meficgema ubangerec negemma fuayau faima tofohoma mekenude. ⁶ Mekemma ameau kensikema ngic ogofora nga tosofora wegenac kecdae, yeni kpacyunuma yofi edeyunuude, ‘Ngeni hagec nenahafoc sogaini. Ni ramana sufuec, imoc meficgedua.’ ⁷ Ifi isoc ngic kopocsihagoc mocgungosac ubamereng anu sogac sogai siriha imocngoc kurumennu fingerude, imoc edengunuduae. Nga ngicngac 99 yени ubamerenggac sing mi obohoma kpetiac bic kecdae, yeneac amma sogac sogai ifia mi fingerude.

⁸ Me ngac mong ye siriwa dzoya 10 mekecma mong ukuu sufuudeu ye dafi anude? Ye kifaya kpedzereckema ama wanggema serima hofockengkecma meficgeude. ⁹ Meficgema ngac ogofora nga tosofora wegenac kecdae, yeni kpacyunuma yofi edeyunuude, ‘Ngeni hagec nenahafoc sogaini. Ni dzona ukuba sufuec, imoc meficgedua.’ ¹⁰ Nga ngic kopocsihagoc mongngo ubea merenu Anutuac angero yeni yenahafoc ifingoc sogaijegede, imoc edengunuduae.”

¹¹ Yesungo torokpema deec, “Ngic mong ye medahora yohockang kefoc. ¹² Nga medaha kapiango mama edeec, ‘Manggac, ge dzofinac goa hendzicma neac nobohana nenna neannaoc mekecbade.’ Ifi deu mangngirango iwaya hendzicma medahora yemerec. ¹³ Yemeru naso mi hereemanu medaha kapia ye dzofinaha kpedzucnedacma mema bangec hereau kenec. Kemma imohai bangecac sicsaukekecfu dzofinactoaya mekefec, imoc ukudarec. ¹⁴ Ukudaru kpac ammanu bangec imohai boditoa fingeru ye yaka nga wiac sasawaac obohoec. ¹⁵ Obohoma bangec imocac mingina mong yearu kemma ogo ammiu yeng bereha garenggeudeac berecodau sueu kenec. ¹⁶ Kenu berec yeneng yaka sebera negec, imoc neudeac ammiec nga mongngo ine yaka mong mi gumegec.

¹⁷ Ifi anu ye yengenaoc kekeha hentegecma deec, ‘Mannaac uamedacfora yaka negebec angandae. Nga neng ine yei yakaac homema homebeso anduae. ¹⁸ Imocac ni yacma mannaaru kembadeac negenduae. Kemma yofi edebade, “Manggac, ni kurumeng arenggac nga geac kicfu momoc kopocsic meficgeai, ¹⁹ imocac monggoc medacga kpacnugede, imoc mi ngereeude. Ge sifu menuna yagurangicfocga yenearunac mong isoc amma kecbesare.”’ ifi negemma kenec.

²⁰ Amma medac ye hereaungoc kemmanu mamango bic hemma yeac ubea manganeu yearu nedzima kemma tofohoma titikokoc ammiu ²¹ medacngo deec, ‘Manggac, ni kurumeng arenggac nga geac kicfu momoc kopocsic meficgeai, imocac medacga monggoc kpacnugede, imoc mi ngereeude.’ ²² Nga manggacngo ine wanacngicfora yofi bic edeyunuec, ‘Ngeni bicbic kemma ngakpiherrec gombunga yombong mehama heimigec kemeu gbonggac ring heimima hanitabe haniau heimigec kemeu. ²³ Ngeni kemma burumakamedaha gbofoma, imoc mehagec kpema nenahafoc nesogai anni. ²⁴ Medacna yomoc ye bic homeec, ifi negening ammanu ye kekec monggoc meficgedac. Ye sufuecfunac monggoc meficgeding.’ Ifi deu yeni nesogaitoa anggoc.

²⁵ Ifi ammagec medaha kunenggo semeng uau kecma ihacnac ama mewegenema hama ine musi nga yegec fede fedec udumeng negemma ²⁶ uamedac mong kparu hau kpesimalie, ‘Noc faka fingede?’ ²⁷ Ifi deu uamedacngo turunga yofi merenec, ‘Manggango kpesipiriha kpac gombunga amau monggoc dzigenedacac amma manggango deu burumakamedaha gbofoma kpeding.’

²⁸ Ifi deu dara ye herebu meficgema ngadeau namma amau enudeac mi ammiu mamango mama amau enudeac demekiri ammiu ²⁹ darango mama edeec, ‘Negenna, ni kifa dafiguc geac wanac ua mema kecma yoacga mong mi kpeai. Ifi mekecba ogofocna yenigoc noningmedaha mong nenideac mong mi nennec, kpac. ³⁰ Nga medacga imoc ye iwaiga singtoangacgoc kecma ukuma hau geng ine yeac amma burumakamedaha busia kuneng kpenec.’

³¹ Ifi deu mamango deec, ‘Medacna, ge nasosoc nigoc kecannec nga neac wiac sasawa imoc geacnoc. ³² Nga nenang yaguc ubangerec negemma nesogai ambisina.

Munaga yomoc ye bic homeec, ifi negening ammanu ye kekec monggoc meficgedac. Ye sufuecfunac monggoc meficgedinggac ifi anni.’”

16

¹ Yesungo medacfora yoac yofi edeyunuec, “Ngic mong dzofinacgoc yeng dzogareng ngic mong meec. Meu yeng yegoc kecma yeac dzofinac garenggekefec. Garenggekefu goa yeneng yeac yofi dema eedgec, ‘Dzogarengga imoc ye dzofinacga mi garenggema sicsauc faiande.’ Imocac amma yeng dzogarenga kparu hau ² edeec, ‘Geac fakaga mangana degec negengkecduae. Dzogarennna monggoc naric mi kecnade. Ge imocac dzofinacac nga uagaac siduc hafoangoc ohoma nenna.’ ³ Ifi deu dzogareng yengenaocngoc yofi negenec, ‘Ngickunennango dzogareng ua nearunac meickeude. Nga ni ama uamemeac osiduae amma kucna mi fede, derecgenecngic ambadeac gamenude, imocac dafi ambade?’

⁴ ‘O, yaguc negenduae. Uaunac meicnugec kpac anu goa yeneng amanginau heitainugecdeac faka mong ambade.’ ⁵ Ifi negemma ngic sasawa kunengaac turung mekecgec, yeni tembul tembul kpacyunuec. Kpacyunu ngic warac enec, ye kpesimie, ‘Ge kunenna yearunac turungga dafiguc annec?’ ⁶ Ifi deu meremmiec, ‘Oriwa kereha kes 600.’ Ifi deu edeec, ‘Ge turungkibiga mema bic tacma kes 300sac ohona.’ ⁷ Dema ngic mong kpesimie, ‘Nga ge turung dafiguc annec?’ Kpesiu meremmiec, ‘Wit toru 800, imocacsoc.’ Ifi deu edeec, ‘Ge turungkibiga mema 640sac ohona.’ ⁸ Anu dzogareng mangana ye negengising amma anecac dzofinac minginango dengereec. Nocac banectoa bangec yomocac medacfora yeni kperagiaac medacfora ferahemba ebiriangoc meficemeandae.

⁹ Neng ine yofi edengunuduae, dzofinac yengenaocngoc fakaya dindingac kpac, ngeni wiac imoc mema ogo gboria meficgebisia. Ifi anggec dzofinacac naso kpac anude, imohai ogofocnginango bangec feengkefude, ama imohai heitaingunugec enggecde. ¹⁰ Ngic mong ye yoac modacma wiac kapianec gombunga garenggeande, ye ifingoc yoac modacma wiac kuneng garenggema kefude. Nga mong ye yoac mi modacma ikoc amma wiac kapianec gombunga mi garenggeande, ye ifingoc yoac mi modacma ikoc amma wiac kuneng gombunga mi garenggeude. ¹¹ Nga ngeni yoac mi modacma bangecac dzofinac mangac manganea gombunga mi garenggegecde isoc ngic mongngo dzofinac fora garenggegecdeac maringinau naric mi faiude. ¹² Nga ngeni yoac mi modacma ngic monggac dzofinac gombunga mi garenggegec isoc, imohai wiac ngeneac desi desia imoc ngemmegecdeac osiude. ¹³ Uamedac mocgungo ngic kuneng yohockang yereac kingang naric mi kpeude. Ye monggac songo negemma mong ngadeheude me monggaru kpeketahemba mong waude. Ngeni, Anutu nga dzofinac yereac kingang sofucngoc kpegecdeacsoc mi ande.”

¹⁴ Yesungo yoac imoc deu farisaio yeni hiedzoac songo kuneng Feyemmeecac amma imoc negemma detenic ammigec. ¹⁵ Ammigec Yesungo yofi edeyunuec, “Ngic yeneng dindingac dengemmegecdeac ngeni imoc yeneac kicfu faka dindingac angkecdae. Nga Anutungo ine wiac ubaherenginau fede, imoc negendacde. Imoc yofiac, ngic yeneng wiac monggac negenggec engena angkecde, imoc Anutungo henu faka mangana yombong ande.

¹⁶ Moseac dedeseriyoac nga profete yeneac yoac dekperagigec erema Yohane fingeru naso imoc wisickede. Nga imohacnac erema ngicngac yeneng Anutuac eucerereng dekperagigecde. Dekperagigec ngicngac yeni serima ihai endae. ¹⁷ Bangec nga kurumeng meickeu kpac anude, imoc efea nga Anutuac dedeseriyoac imohacnac dzikangabisic meicke imoc ine naric mi fingerude. ¹⁸ Ngic mong ye enema wama ngac mong meude, ye serofaka anude nga mong ye ngac wawaya meude, yeng ifingoc serofaka anude.”

¹⁹ Anu Yesungo monggoc deec, “Ngic mong kefec, ye dzeingakpia gombunga linengngo memea* amma ngakpia witiau sacsac siriha gombunga heima wenacsoc

* 16:19: Lineng imoc dzaring mong dzuama imoc ambi feranga isoc.

nenesemengtoagoc nga ondzonggboc amma songo witiau takefec. ²⁰ Nga yeac amasinnu, oda ngadeau ine ngic mong makpekpea kpara Radzaro kefec. Ye sebiau kubecngo wake wakea nga ngic yeni ihai faigec fekefec. ²¹ Fema ngic dzofinacgoc yeac tebounac yaka tosea maande, imoc neudeac ammikefec. Nga kasi yeneng ine hama kubeha aberekecgec.

²² Kecma ngic makpekpeango homeu angero yeneng ye mekemma Abrahanggac hoannu faigec kefu ngic dzofinacgocngo ifingoc homeu tonggogec. ²³ Tonggogec ye homecamau kecma ihai kpenzeng kuneng kpekefec. Ifi kpekecma kic fima henu Abrahangnggo hereau yombong tarec nga Radzaro henu yeac hoannu tarec. ²⁴ Ifi hemma kpacma deec, ‘Abrahang manna, ni yei gerec manau kpenzeng kuneng kpeduae, imocac amma ge ubaga neac manganeu Radzaro suena kemma gbonga susiango dokuu nemurucke hama nedzaranna menomaneu.’ ²⁵ Ifi deu Abrahangnggo yofi deec, ‘Medacna, ge wiac mong negensibesena. Ge bangecfu kecmana ngicngac yeneng iwai gombunga gombunga gengjec mekecna Radzaro ine manganasac migec. Yaguc Radzaro yei menomanedae nga geng ine kpenzeng kpekecne.’ ²⁶ Nga monggoc torokpema deduae, botucninau tufatoa faifaia fede. Ifi anu mongngo yeihacnac ferecgema gearu haude me ihacnacnggo yei haha, imoc osiosia.’

²⁷ Ifi deu dzofinacgocngo deec, ‘Ifi anu manggac derecgegembra, ge Radzaro suena mannaac amau kenu. ²⁸ Dacmunafocna 5 ihai kecdae, yeneng kpenzengbangec yomohai habauac ye kemma gorongina kpema edeyunubeso.’ ²⁹ Ifi deu Abrahangnggo ine yofi deec, ‘Yeni Mose nga profete yeneac yoac mekecma negengkecbisia.’ ³⁰ Ifi deu dzofinacgoc kefecnggo deec, ‘Abrahang manna, imoc kpac. Ngic mongngo homecfunac gborima kemma edeyunuu ine ubamereng anggecde.’

³¹ Ifi deu Abrahangnggo yofi deec, ‘Yeni Mose nga profete yeneac yoac mi negemma wagecdeu ngic mongngo homecfunac gborima deu ye ifingoc naric mi modacgecde.’”

17

¹ Anu Yesungo medacfora yeneac yofi deec, “Ngicngac faka mangana anggecdeac faitobang, imocnggo bangecfu fingerude. Nga ngic mongngo ngicngac ogofora faitobang ifia ayemmeude, ye ine sowehagoc. ² Ye nambarac kapia yenearunac mong mangana mi kpoumiudeac ye yagucnoc dzamandzing ubeau ubahemima kondunnu ukugec kemeu, imoc yearu ngereebac. ³ Ngeni ngenaocngoc garengemema kecbisia. Tosoga mongngo kopocsic meficgeudeu ge goroyoac edena. Nga ye ubea merenudeu kopocsiha wabesena. ⁴ Nga ye uameme mocguac manau atac 7ngoc ge memanganeguu naso 7 ifingoc gearu dzigenema hama yofi deude, ‘Kopocsic yomoc anaiac ubahodung negenduae.’ Imoc deudeu kopocsiha wakebesena.”

⁵ Anu aposoro yeneng Kebuac degec, “Ge negen negensinnina meyadinemmena.” ⁶ Ifi degec Kebungo yofi merengyemmeec, “Negen negensingngina kapia mastet gbomea isoc fengemmeudeu ngeni fig ic yomoc ye yengenaoc godeagoc fukema kondunnu kemema nanudeac egegec ye enacngina tofohoma naric kemema nanude.”

⁷ “Anu ngeneearunac mongngo wanacngiha bangec mendzic mendzic kefude me ramaburumaka garenggekefude, yeng semeng uaunac hama amau ereu minginango matacma yaka neudeac mi deude. ⁸ Ye ine yofi edeude, ‘Ge ngakpikporucga mewegenema yakana mengerema henggareng anemma tomai nanna. Tomai nammana neba wisickeuguc ge yaka naric nenade.’ ⁹ Minginango wanacngic uayoac ifi miu yeng yoara tofohoma ua medacdac, imocac ubangerecyoac mi edeude. ¹⁰ Ngeni ifingoc wiac anggecdeac dengecdengemmea, imoc mesidacma yofi debisia, ‘Neni wanacngic amma uaninasac meding.’”

¹¹ Yesungo ifi dema Yerusarennu kenudeac sing modacma Samaria nga Gariraia botucngirau kenec. ¹² Kemma guruama monnu emmanu ngic 10 kukuseringinagoc sinnu hamagec meficyunuec. Anu yeni hereaungoc namma ¹³ kpacma degec, “Yesu, kunennina, ge neneac ubaga manganeu.” ¹⁴ Ifi degec Yesungo yenemma edeyunuec, “Ngeni kemma womong gareng fingecyemmema sebingina edzacyunuec.” (Sesememe

14:1-32) Ifi deu yeni sinnu kemmagecngoc sebingina ngereec. ¹⁵ Ngereegec yenearunac mongngo sebia ngereeue hemma dzigene hama seriangoc arohma Anutu dengereec. ¹⁶ Dengerema Yesuac haniau kicmesuya hetutuckema makpe fema yeac ubangerec yoac deec. Amma ngic imoc ye Samariangic. ¹⁷ Ye ifi anu Yesungo kpesimiec, “Ni negemba ngic 10 yeneng ngerec ngeree meficedau nga ngic 9 yeni damoc? ¹⁸ Ngic yomoc ye areng monnunacnggo yeneac botucfunac yengsac Anutu afeheudeac dzigenema hade nga goa yeni ifingoc anggoc naric ambac.” ¹⁹ Dema Yesungo yeac yofi deec, “Ge yacma kenna, negen negensinggango mengeregudac.”

²⁰ Farisaio goa yeni Anutuac eucerereng noc nasoac haudeac Yesu kpesimigec yofi merengyemmeec, “Anutuac eucerereng hau ngeni imoc kicngo naric mi henggecde. ²¹ Amma yofi naric mi degecde, ‘Ngeni henggec, ye yoc me ngeni henggec, ye edimoc.’ Negenggec, Anutuac eucerereng imoc ubaherenginau fede.” ²² Ifi dema medacfora yeneac yofi deec, “Kecma naso mong hau ngeni Ngicac Medacac uameme mocgusac henggecdeac angemmeude amma naric mi henggecde. ²³ Nga ngicngac yeni ngeneac yofi degecde, ‘Ngeni henggec, ye edi.’ me ‘Ngeni henggec, ye yei.’ Ifi degec ine mi modacyunubisia nga ihai bic mi kembisia. ²⁴ Imoc yofiac, sawau piratac heiu kperagiango nobocnac ferecgema noboc kengande, Ngicac Medac ye ifi isocngoc hahanasoyau fingectegerude. ²⁵ Hanahema ine naso yomocac kisic yeneng ye ngadehegec kpendzeng homac kpeude.

²⁶ Noaac nasou faka fingerec, Ngicac Medacac haha nasou faka ifiangoc fingerude. ²⁷ Ngicngac yeni nenedoku nema ngic ngacfufu kenggec nga manggac yeneng degec, ‘Ni naroanna ngic mibade.’ Ifi angkecmagec Noango wageu enu doku yadima wiac sasawa semedaru manganema kpac andarec. ²⁸ Nga Rotiac nasou faka ifiangoc fingerec. Ngicngac yeni nenedoku nema iwai bummema suema nenyaka mehomedkecma ama mekecgec. ²⁹ Nga wenac mong ifi amma kecmagec Rotingo Sodong waec, wenac imohaingoc Anutungo negenu kurumennunac gerec nga sarafa hoc* imoc ine kia isocngo mama wiac sasawa dzedaru kpac andarec. ³⁰ Nga Ngicac Medac fingectegerudeac nasoyau faka ifia isoc fingerude.

³¹ Naso imohai ngic me ngac mong ye ama witiau tarude nga iwayanggo ama manau taru ye imoc meudeac ama manau mi embeso. Nga mong ye semeng uau nanude, ye ifingoc amea dzigene mi kembeso. ³² Roti enemaaru faka fingerec, ngeni imoc negensisibisia. ³³ Ngic mong ye kekeha segereudeac ua mekecde, ye kekeha ukuu sufumiude nga mong ye kekeha ukuu sufuude, ye kekeha fingecmiude. ³⁴ Tofocnac imohaingoc yohockang yeri fefe mocguac witiau femaef Kebuac areng yeneng yerearunac mong mema mong ine wagec feude. ³⁵ Nga ngac yohockang yerahaoc imohaingoc namma flawa medzamema kecmaef Kebuac areng yeneng yerearunac mong mema mong ine wagec nanude. ³⁶ Nga ngic yohockang yeri semeng uau kecmaef Kebuac areng yeneng yerearunac mong mema mong ine wagec uau kefude, imoc edengunudae.” ³⁷ Ifi deu medacfora yeneng kpesimigec, “Kebu, faka imoc dahai fingerude?” Kpesimigec Yesungo yofi merengyemmeec, “Koec koec neng yeni fareng fede, imohai eacgecde.”

18

¹ Medac yeneng nasosoc modzotitia kpac nunumu ua megecdeac Yesungo yoac mong heima yofi edeyunuec. ² “Yoac isic isingge ngic mong ye taong monnu kefec. Ye Anutuac kengec mi angkefec nga ngicngac yeneac eweheihei mong mi angkefec. ³ Nga taong imohaingoc ngac hodzec mong kefec, ye nasosoc yearu hama yofi dekefec, ‘Ngabafocna yeneng memanganubeso amma kecdaef neac yoac dindingac dema meficiubesena.’ ⁴ Ngac ye ifi dekefu yoac isic isinggengo meficeudeac mi negenec. Amma ngade ngac imocac modzea tiu yengenaocngoc ine yofi negenec, ‘Ni Anutuac kengec mi anduae nga ngic yeneac eweheihei mong mi negenduae. ⁵ Nga ngac hodzec yomoc ye nasosoc

* 17:29: Sarfa hoc imoc hoc mong dzagec dzagec. Gerecfu dzeu gerecyohoc ande.

nearu hama hatahenengkecde, imocac amma yoara mengeremibesare. Ifi mi ambadeu ye nasosoc hakefu modzona tiyombonggeude.’”

⁶ Anu Kebungo yofi deec, “Ngeni yoac isic isingga faka dindingac mi modacande, yeng yoac deec, imoc negensibisia. ⁷ Anutungo ngicngacfora meisingngunuec, ngeneac amma modzea mi tiude. Ngeni hadzing toforec ye meficngunuudeac kiacnginango yearu kenu ye ngeneac amma faka dindingacfuf meficngunuudenoc. ⁸ Nga nasongina mi mehereema faka dindingac fingeengmeudeac ua bic meude, imoc edengunuduae. Nga Ngicac Medacngo haude, imohai ngicngac ye negensinggedae, ngicngac ifia negemba homac kecgecde.”

⁹ Ngic goa yeni yenanggac negenggec dindingac anu goa ngadeyunuma kecgec, yeneac negemma Yesungo yoac mong heima yofi deec, ¹⁰ “Ngic yohockang, farisaio mong nga takesimeme mong, yereng numuecddeac Anutuac womonnu enoc. ¹¹ Emma farisaiongo yacma namma yengenaac negemma yofi dema numuec, ‘Anutu ni ngic goa, godzungic nga faka mangana me kaisero angandae, yeni isoc kpac. Nga takesimeme ngic edimoc, ni ifingoc ye isoc kpac, imocac ubangerec edeguduuae. ¹² Amma sondasoc uameme yohockang yakasege kecanduae nga wiac sasawa mekecduea, imoc 10nunac mocgu genganduae.’ ¹³ Anu takesimeme ngic yeng farisaioac hereau namma kpehengaima kurumennu fiu enudeac negengebirima ine ngonducnema mokuhau kpema yofisac dema numuec, ‘Anutu, ni kopocsicmeme, ge neac ubaga manganeu.’ ¹⁴ Nga takesimemengo ifi deecac Anutuac kicfu ngic dindingac amma amau kenec, imoc edengunuduae. Nga farisaio ye ine kpac. Ngic mong ye yengena sebi meende, yeni ye memagecde nga mong ye yengena sebi memaemeude, ye meenggecde.”

¹⁵ Ngicngac goa yeni Yesungo sabacfocngina mariango kpeseryunuudeac yearu meyunu hagec. Hagec medac yeneng yenemma ine kpetariyemmegec. ¹⁶ Kpetariyemmegec Yesungo ine kpacyunuma deec, “Nambaracbisic yeni nearu naric hagec, ngeni kpae mi heiyeemegec. Anutuac eucerereng imoc nambaracbisic yofia yeneac. ¹⁷ Foracngoc, mong ye nambarac kapia angkecdae, ifi isoc mi angkecde, ye Anutuac eucererennu naric mi enude, imoc edengunuduae.”

¹⁸ Ngic enara mongngo Yesu kpesimie, “Kpoukpou gombunga, ni dafi amma kekecseri mebade?”

¹⁹ Ifi deu Yesungo yofi meremmiec, “Ge nocac gombunga denendang? Anutu mocgungo gombunga kecde. ²⁰ Ge dedeseriyoac yomoc bic negennec,

‘Ge kaisero mi ambesena, ngicngac mi yunuhomebesena, hamangec mi mebesena, enacfu faifai mi ambesena nga nonggo manghocga seseheyurubesena.’”

(*Makkekeng 20:12-16; Dedeseri 5:16-20*)

²¹ Ifi deu ngicng merenec, “Ge denec, imoc sasawa sebigborinaungoc angereai.”

²² Ifi deu Yesungo imoc negemma edeec, “Ge wiac monggac engngoc kpedadanggenec, imoc yofi ambesena. Finacga sasawa fegende, imoc suena hiedzo kirecgeu imocngoc ngicngac makpekpea medereyemmebesena. Ifi anna kurumenggac dzofinac fingeengenu hama modacnubesena.” ²³ Ifi deu ngic ye yoac imoc negemma ubaebic kuneng meec, nocac ye dzofinactoa homac femiec.

²⁴ Yesungo ngic henu ubaebic meu yofi deec, “Ngic dzofinactoagoc yeneng Anutuac eucerereng manau enggecdeac uatoa yombong ande. ²⁵ Kamerengo bungic singau engeng imoc ua efea nga ngic dzofinactoagocng Anutuac eucererennu engeng, imocngoc ine uatoayagoc.” ²⁶ Ifi deu ngicngac yeneng yoac imoc negemma kpesimigec, “Ifi anu merang naric komoc kpeude?” ²⁷ Ifi degec Yesungo deec, “Ngic ngeni faka goa megecdeac obohodae, imoc Anutungo naric meude.”

²⁸ Ifi deu Petorongo deec, “Negennec, neni ama nga iwainina wama ge modacguma kecdimbe.” ²⁹⁻³⁰ Ifi deu Yesungo yofi deec, “Ni foracngoc edengunuduae, ngic mong ye Anutuac eucererenggac amma amea me enema me nambaracfora nga dacmunafora amma nonggomama wayunuma kecde, yeac yofi fingerude, ye warac iuaiagoc kefec,

imoc ferahema kekec nasoyau iwaia monggoc homac meficgeude. Amma wisickeu bangec siriha mong haude, imohai kekecseri ifingoc meficgeude.”

³¹ Anu Yesungo medacfora 12 ngadeau meyunuma yofi edeyunuec, “Negendae, nenang Yerusarennu ennide. Enni imohai profete yeneng warac Ngicac Medacac yoac kibinginau ohogecmoc, imocac fora fingecdarude. ³² Nga ngic yeni ye mema faigec bangec monnunac ngic Anutu mi negemmidae, yeneac mariu enu yeneng detenic nga meenti memati ammima desofoc ammigecde. ³³ Amma dzikacngo ye kpekecma kpehomegecde. Nga ye uameme harebec ammanu ine monggoc gborima yarude.” ³⁴ Ifi deu medac yeneng yoac imoc negemma mong mi negengireckegec. Yoac imocac hania imoc yeanaru sufufuya feu Yesungo yoac deec, imoc mong mi negengireckegec.

³⁵ Yesungo Yeriko taong mewegenemanu ngic kicpisic mongngo sing tegiau tacma iwaiac derecgekefec. ³⁶ Amma negenu ngicngac habutoango ferahema kengha anggac kpesiec, “Imoc dafi andae?” ³⁷ Kpesiu edegec, “Yesu Nadzaretenac, yeng ferecgema kende.” ³⁸ Ifi degec yeng kunengngoc kpacma deec, “Yesu Dawidiac bangec, neacnec ubaga manganeu.” ³⁹ Kparu ngicngac kiwau kenggec, yeneng kpetarimima waickema tarudeac edegec yeng ine monggoc arohoec, “Dawidiac bangec, neacnec ubaga manganeu.” ⁴⁰ Kparu Yesungo namma kicpisic yearu mekenggecdeac edeyunuu yeni wegenac mekenggec Yesungo yofi kpesimie, ⁴¹ “Ni noc wiac anggembadeac negennec?” deu merenec, “Kebu, kicfifi ambadeac negenduae.” ⁴² Ifi deu Yesungo edeec, “Negen negensinggango mengeregudeac, ge monggoc kicfifi anna.” ⁴³ ifi deu ngic ye imohaingoc kicfifi amma Yesu modacma Anutu dengereu ngicngac sasawa yeneng imoc hemma Anutu dengeregec.

19

¹ Yesungo Yeriko ferecge kemmanu ² takesimeme ngic yeneac enara mong dzofinactoayagoc, kpara Sakaio, ye ihai kefec. ³ Yeng Yesu ye ngic dafia dema hembesonga negenec. Amma ye ngic wegena anu ngicngac homac yeneac botucfu nanecac Yesu naric mi henec. ⁴ Ifi anu Yesungo sing kenudeac kenec, ye ngicngac yeneac botucfunac ihai waraima nedzi kemma fig ic mong nanec, imocac witiau emma kic fima tarec. ⁵ Taru, Yesungo imohai kensikema kiwa fiu enu edeec, “Sakaio, ni yaguc amagau hama tacbade, ifi negenduaeac ge bic mana.”

⁶ Ifi deu Sakaiongo icfunac bicbic mama Yesu ubangerecgoc hoanggeu ameau kenoc. ⁷ Kenec ngicngac sasawa yeneng imoc hemma negenggec naric mi anu degec, “Yesungo manganamemengic yeac amau nocac kendac?” ⁸ Ifi degec Sakaiongo ine ihai namma Kebuac deec, “Kebu negenna, finacna mekecduae, imocac noboha ngicngac makpekpea yemmebade nga goa ikoc ayemmemma wiac meai, yeneac turung atac fo meemma monggoc yemmebade.”

⁹ Ifi deu Yesungo yofi deec, “Anutungo yaguc ama mana yomocac mingina ebicfunac mesiyunu komoc kpegecde. Ngic yomoc ye ifingoc Abrahanggac kisicfunac. ¹⁰ Imoc yofiac, Ngicac Medac ye ngicngac sufufuya hofocyunuude nga kpedzucyunuude amma ebicfunac meyunuudeac maec.”

¹¹ Ye ifi dema kemma Yerusareng taong mewegeneec, imocac yeneng yofi negenggec, “Anutuac eucerereng imoc kicninau yombong bic fingectegerude.” Ifi negenggec amma Yesungo yoac mong heima torokpema yofi edeyunuec,

¹² “Ngic mongngo ngickunenggac arenunac fingec finger, yeng yofi negenec, ‘Ni bangec hereau komba yeneng ngictau kpac nenggec dzigenema bangec yomocac ngictau ambade.’ ¹³ Nga ye kembesonga dema wanacngicfora 10 kpacyunuma dzo mong kpara mina mocgu tembus tembus yemmemma deec, ‘Ni kembareng ngeni dzo yomocnggo emekeng emeha amma kpetea meyadibisia.’* ¹⁴ Nga ngic yeac ama mocgufora, yeneng ine ye ubango ukugec. Ifi anu ye kenu ngic goa yofi dema edeyunuma sueyunugec kenggec, ‘Yeng neneac ngictau kefudeac songo mi negendimbe.’

* 19:13: Mina mocgu imoc wenac 100ac uabung.

¹⁵ Nga ye ihai kefu yeneng ngictau kpac migec kecma monggoc dzigenema bangehau haec. Hama wanacngicfora dzo yemmeec, imoc dafi meyadigec, imoc negenudeac kpacyunuec. ¹⁶ Kpacyunuwanacngic warac warac yeng hama deec, ‘Kebu, ni dzo nennec, imoc meyadima dzo 10 monggoc maficgeai.’ ¹⁷ Ifi deu ngictaungo yofi deec, ‘Ge wanacngic gombunga amma ua gombunga medang. Ge yoac dedena modackecma wiac kapia gombunga garenggedanggac taong 10 garengyununadeac uayoac nga kuc genduae.’ ¹⁸ Nga wanacngic ngade, yeng hama deec, ‘Kebu, dzo nennec, imocngo dzo 5acsoc monggoc meyadie.’ ¹⁹ Ifi deu ngictaungo edeec, ‘Ge taong 5 imocac gareng faiguduae.’

²⁰ Anu ua ngic mongngo hama deec, ‘Kebu, dzoga yomoc kporuc manau sufuba tarec, imoc henna. ²¹ Ge ngic gerea amma kpekpeturang uaac hiedzo mi faima sifu meanne. Nga uau heihomec mi amma sifu foraya kpedzianne, imocac geac kengecnuu ifi anai.’ ²² Ifi deu ngictaungo deec, ‘Ge wanacngic mangac manganea, yoacga meremba imocngo giude. Ni ngic gerea amma kpekpeturang uaac hiedzo mi faima sifu meanduae. Nga uau heihomec mi amma sifu foraya kpedzianduae, imoc bic negennec. ²³ Nga ge nocac dzona yomoc dzo tohonu mi fainec? Ifi ambannu dzigenema dzona imoc nobohagoc mebai.’

²⁴ Ifi dema ngicngac goa ihai nanggec, yeneac deec, ‘Ngeni dzo imoc wangecma wanacngic minadzoya 10 femide, ye migec.’ ²⁵ Ifi deu yeneng degec, ‘Kebu, ye dzoya 10 bic fede.’ ²⁶ Ifi degec yofi merengyemmeec, ‘Ngic mong wiac goa femide, ye wiac monggoc migecde nga mong ye wiac mong mi femide, yearu wiac fedemoc, imoc ifingoc wangegecde, imoc edengunuduae. ²⁷ Anu ngabafocna yomoc yeni neng ngictaungina kecma garengyunubadeac wagec, ngeni ngic imoc yei meyunu hama kicnau yunuhomegec.’”

²⁸ Yesungo yoac ifi deu wisickeu ye waraima Yerusarenne enec. ²⁹ Emma tiki kpara Oriwa, imocac wegena hama Betefage nga Betania amabangec mewegenema medac yohockang, yofi dema sueyuruec. ³⁰ “Ngeri dindingac kemma amabangec sing enarau tacde, imohai enec donggi medaha mong ngicngo witiau mi tatara, imoc witickegec nande. Nanu ngeri imoc maficgema witic yungecma mema haec. ³¹ ‘Ngeri nocac donggi yungecdape?’ Ifi kpesigecdeu ngeri yofi debesera, ‘Kebungo imocgoc ua meudeac dede.’” ³² Yesungo ifi dema ngic sueyuru kemma yeng deec, imoc sasawa maficgedaroc. ³³ Maficgema donggi medaha yungerec minginango deec, “Ngeri nocac donggi medaha yungecdape?” ³⁴ Ifi deu yereng deoc, “Kebungo imocgoc ua meudeac dede.” ³⁵ Ifi dema yeri donggi medaha imoc Yesuaru mema kenoc. Amma Yesungo emma tarudeac yeri ngakpingira herea hesima donggi medahaac witiau kpesorohoma Yesu enudeac maficgeoc. ³⁶ Maficgeec ye emma tacma kenec, imohai ngicngac yeneng ngakpiherecngina hesima sinnu tiamegec.

³⁷ Nga Yerusareng wegenac Oriwa tikiac sing keme nande, imohai yeac arengfora habu kuneng yeneng kucfaka hengkecgec amma ubangerec negemma udumengyadango Anutu dengerema yofi degec,

³⁸ “Ngictau Kebuac kpacf hade, ye kenehagoc. Kurumennu ruae feu sawau wi dedengerec febeso.” *(Mitiyegec 118:26)*

³⁹ Ifi kpacma dengeregec farisaio goa habu yeneac botucfu nanggec, yeneng Yesuac degec, “Kpoukpou, ge arengfocga dena waickebisia.” ⁴⁰ Ifi degec Yesungo merengyemmeec, “Yeni waickegecde hoc yeneng arohogecde, imoc edengunuduae.”

⁴¹ Yesungo Yerusareng mewegenema taong imoc hemma kiacma ⁴² yofi deec, “Geng yofinenggac ruaegoc kecnadeac sing hentegecna ngereebac. Nga sing imoc ine yaguc sufufu fema kicgau mi fingectegecde. ⁴³ Geac nasoga haude, imohai ngabafocga yeneng noboc noboc orongguma bangec usuma heiemma igocgugecde. ⁴⁴ Igocguma yeneng memanganeguma nambaracfocga geac botucfu kecdae, yeni yunuomedacgoc bangecfu fegecde. Amma geac manau hoc mong wagec mongngo monggac witiu mi tarude, nocac Kebugango hadac, ge imoc mi hentegecdang.”

⁴⁵ Amma Yesungo Anutuac womonggac oda manau emma ngicngac yeneng wiac emekeng emeha amma nanggec, yeni kporacyunuma ⁴⁶ yofi edeyunuec, “Yoac oho ohoya yofi fede,

‘Ni womonna yomocngo nunumuac ama ambeso.’

(Yesaia 56:7)

Nga ngeneng ine imoc merenggec hamangecmeme yeneac sufu sufuama ande.” (Yeremia 7:11)

⁴⁷ Anu Yesungo wenacsoc womonnu kpoukpou ua meu womong gareng enara nga mitiac negen negengngic amma habu yeneac enarafocngina yeneng ye kpegecdeac nasoyombonga hofocma kecgec. ⁴⁸ Nga ngicngac yeni yeac yoac negengyombonggema kecgec nga yoara mong wagecdeac mi negenggec. Imocac amma ngaba yeneng ye meickegecdeac sing mong mi meficegec.

20

¹ Yesungo naso monnu Anutuac womonnu ngicngac edekpou ayemmemma siduc gombung edeyunuu womong gareng enara nga mitiac negen negengngic amma yudangic enarafocngina yeni yenahafoc hama kicnginau namma ² kpesimigec, “Ge noc kucfu ua yomoc menec nga merang uayoac imoc genec? Imoc edenununa.” ³ Ifi degec yeng yofi merengyemmeec, “Ni ifingoc kpesingemmeba wiac mong edenugec, ⁴ Yohanengo dokunadzic ua mekefec, imoc kurumennunac me ngicfunac?” ⁵ Ifi deu yeni yenaocngoc denegeng amma degec, “Imoc kurumennunac.” Ifi denideu yeng yofi kpesinemmeude, ‘Anu ngeni nocac ye mi negensinggegec?’ ⁶ Amma ‘ngicfunac’ ifi denideu ngicngac sasawa yeneng hocngo neneregecde nocac yeni Yohane ye profete, imoc ubaherenginango negensidae.” ⁷ Ifi dema meremmigec, “Dahacnac haec, imoc mi negendimbe.” ⁸ Ifi degec Yesungo yofi merenec, “Ifi degec, ni merang uayoac nenu ua mekecduae, imoc ifingoc mi edengunubade.”

⁹ Ifi dema Yesungo yoac mong heima ngicngac yofi edeyunuec, “Ngic mongngo waing uayau waing homerec. Homeru wisickeu waing ua garenggegecdeac ngic meficyunuma yenigoc uayoac dedzege anggec nga yengena ine naso herea bangec monnu kefudeac kenec. ¹⁰ Kemma kecmanu fora kpememe naso hau wanacngiha mong sueu waing uaac gareng yeneraru kenu yeneng waing fora imohacnac yeac noboha migecdeac kenec. Kenu waing uaac gareng yeneng wanacngic imoc dzoboya kpema entegeng suegec kenec. ¹¹ Kenu minginango ifi hemma ngic mong sueec. Sueu kenu waing uaac gareng yeneng ye ifingoc kpema faka mangana yombong ammima entegeng suegec kenec. ¹² Kenu wanacngiha atac harebec sueu kenu yeneng ye ifingoc kpegec sawa mau kporacgec kenec.

¹³ Ifi anu ua minginango yofi deec, ‘Dafi ambade? Ni medacyombonna songo negemmianduaemoc, ye sueba kenu ye sifu eweheimigecde.’ ¹⁴ Dema medacyombonga sueu waing uaac gareng yeneng ye hemma yenaocngoc denegeng amma degec, ‘Yeng kecma ua yomoc tiu enude. Nenang ye kpehomeni yeac bangec nga maridzoming imoc nenang anude.’ ¹⁵ Ifi dema medac imoc kporacgec oda ngadeau kemeu kpehomegec.”

Ifi dema Yesungo kpesiyemmeec, “Ua mingina imocngo waing uaac gareng yeni dafi ayemmeude? ¹⁶ Yeng hama waing uaac gareng yunuhomema waing ua imoc uagareng goa yeneac mariu faiude.” Ifi deu yeneng imoc negemma yofi degec, “Ifi naric mi fingecbeso.” ¹⁷ Ifi degec Yesungo yenemma yofi deec, “Yoac yofi oho ohoya nande, imoc titiha negensibisia,

‘Amameme ngic yeneng hoc mong mangana dema ukugec. Nga hoc imocngo amaac hoc wotung amma seria nanude.’

(Mitiyegec 118:22)

¹⁸ Ngicngac sasawa hoc imocac witiau mayunude, yeni sebingina tegerude. Nga hoc imocngo yeneac witiu makpema hedzameyunu kapuc kpegecde.”

¹⁹ Mitiac negen negengngic nga womong gareng enara yeni imohaingoc ye mebeso anggec. Yesungo yeneac yoac heima deec, imoc bic negenggec amma ngicngac yeneac kengecyunuu ine wagec.

²⁰ Anu yeni Yesu hembima ngicfocngina sueyunugec, yeneng yoara negendimbe siric yearu kenggec. Kemma noc yoac dafi deu negemma ine prowinsiac desi desingic yeac mariu faigecdeac negenggec. ²¹ Nga ngic imoc yeneng Yesuac degec, "Kpoukpou, ge yoac denec nga wiac kpounemmenec, imoc fora sasawa. Amma ge Anutuac sing ngicngac edekpou ayemmemma yoac monde monde mi angkecnec, geac ifi negendimbe. ²² Imocac edenununa, neni takesi ngictau Sisa naric minide me kpac?" ²³ Ifi degec Yesungo ikocngina hentegecm a yofi edeyunuec, ²⁴ "Ngeni dzo mong edzacnugec hemba. Onga nga kibi yoc, imoc meracac?" deu degec, "Imoc Sisaac." ²⁵ Ifi degec Yesungo deec, "Imocac ngeni Sisaac wiac, imoc Sisa mibisia nga Anutuac wiac, imoc Anutu mibisia." ²⁶ Ifi deu yeni ngicngac yeneac kicfu enacfu faifai ammima meme, imoc obohogec. Amma yoacngina turunga merenec, imocac kerectegec amma yoac mong mi degec.

²⁷ Anu Sadukaio yeneng homecfunac yacyac mong mi fede, ifi deandae. Amma yenearunac goa Yesuaru hama kpesimigec, ²⁸ "Kpoukpou, Mosengo dedeserivoac yofi ohonemmeec,

'Ngic mong ye ngac mema gboriha kpac kecma homeu ngic imocac muneango daraac hodzec mema gboric kpeficgema daraac kpac miacma kecbeso.' (*Dedeseri 25:5-10*)

²⁹ Naso monnu dacmunac seweng kecgec nga waracdacnginango ngac mema gboriha kpac kecma homeec. ³⁰ Homeu muneango daraac hodzec mema ³¹ eng kecma homeec. Anu munangirango hodzec imoc mema ifingoc sabaha kpac kecma homeu dacmuna seweng yeni ngac imocngoc mema gboricfocngina kpac kecma homedacgec ³² amma ngac ye wisickeu ifingoc homeec. ³³ Amma yeng ngic seweng yeneac enengngina amma kecma yacyac nasou ye dacmunac seweng yenearunac meracac enema anude?"

³⁴ Ifi degec Yesungo yofi merengyemmeec, "Bangec yomocac kekek nasoac medacfora yeneng ngac meandae nga mangac yeneng yofi deandae, 'Ni naroanna ngic mibade.'

³⁵ Nga ngicngac homecfunac gborima yacyac nga kekeseri megecdeacsoc andae, yeni ihai eweeneng mi anggecde. ³⁶ Yeni homecfunac yacyac, imocac kisic anggecde. Amma yeni Anutuac nambaracfora kecma angero isoc anggecdeac yeni monggoc naric mi homegecde. ³⁷ Homecfunac yacyac fede, imoc Mosengo ifingoc ohoma dekperagiec. Imoc yofi, icfu gerek dzeu ye hemmanu Kebuac dede yoacf u yofi fingerec,

'Ni Abrahang nga Isaka amma Yakobo yeneac Anutu.' (*Makekeng 3:6*)

³⁸ Yeac hehennu yeni sasawango kekecnginagoc. Ye gbori kecdimbe, neneac Anutu, homemea yeneac Anutu kpahac." ³⁹ Ifi deu mitiac negen negengngic goa yeneng yofi degec, "Kpoukpou, ge yoac gombunga yombong denec." ⁴⁰ Anu imocac ngadeau yeni kengecyuu mongngo kpesi kpesi monggoc mi kpesimigec.

⁴¹ Ifi anu Yesungo yofi deec, "Ngeni yoac yofi negembisia, yoac mong yofi fede, 'Messia ye Dawidiac arennumac fingerude.' ⁴² Nga Dawidi ye yengenaoc Mitiyegecfu yofi deec fede,

'KEBUNGO neac Kebuna yofi edeec, "Ge foinaugeng tacmana ⁴³ ngabafocga hanigaac bageau faiyunuba yeni hanititiga anggecde."'

(*Mitiyegec 110:1*)

⁴⁴ Imocac Dawidi ye 'Neac Kebu' kparecngo dafiu yeac arennumac ande?"

⁴⁵ Yesungo ngicngac sasawa yeneac kicfu medacfora yofi edeyunuec, ⁴⁶ "Ngeni mitiac negen negengngic yeneac henghomema kecbisia. Yeni ngakpi herec gombunga faima amayuguc anggecdeac songo negengandaе nga suenecfu kemma ngicngac yeneng yeneac wenacngerec deyemmegecdeac songongina kuneng fede. Amma yeni kpekpeturang amau nga yakatoa nasou warac warac tatacfu tacbesonga songongina angkecde. ⁴⁷ Amma yeni ngac hodzec yeneac amangina wangecyuuandae. Amma yeneac negengngeree fingerudeac nunumu hereangoc numuandae. Yeni ikocfaka ifia angandaeac turunga ebiriangoc megecde."

yohockang, ifisac faiu kemeu hemma ³ yofi deec, "Foracngoc, ngac hodzec yomoc ye hiedzoja kpac kecma dzo faima ngic sasawa sese faidau, imoc feracyunuma faidarec, imoc edengunuduae. ⁴ Imoc yofiac, yeni finactoangina wakema feder, imohacnac tosea mema sesengina faidau. Ngac ye ine noc wiac femidac imocnoc hafoangoc faidacma entegeng kecde."

⁵ Anu ngic goa yeneng Anutuac womong hoc kibia gombungango memea amma sese nga ubangerec hania haniego Anutu mikecgec, imocngo womong kibiagoc anudeac memengere anggec, imoc hemma siduc degec Yesungo yofi edeyunuec, ⁶ "Ama yomoc hensongo homac andae, imoc naso herea mi tarude. Naso mong haude, imohai ngic yeneng imoc sasawa hembarackegecde. Hembarackegec hoc mongngo monggac witiau wagec mi tarude."

⁷ Ifi deu yeneng kpesimigec, "Kpoukpou, ge faka denec, imoc noc nasaoc fingerude nga naso imohai noc soi fingeru hemma naso wegenede negennide, imoc edenununa."

⁸ Ifi degec Yesungo deec, "Ngic yeneng ikocfu wangecngunubauac ngeni henghomema kecbisia. Ngic homac yeneng hama neac kpac kpacma yofi degecde, 'Ni Messiah.' nga 'Naso bic hadac.' ifi degec ngeni mi modacyunubisia, kpac. ⁹ Nga ewekpekpetoa amma ubakpekpe udumengtoagoc fingeru ngeni imoc negemma kengec mi ambisia. Wiac ifia hanahema fingecbeso nga naso ine imohaingoc yombong mi kpac anude."

¹⁰ Amma monggoc torokpema yofi deec, "Bangec goa yeneng ogofocngina yenigoc ewekpekpe anggecde nga ngictau monggac arengngco ngictau monggac areng yenigoc ngaba angemegecde. ¹¹ Usocta meude nga bodinaso nga hafei kuneng bangec monnu nga monnu ifiangoc fingeckenude. Fingeckenu bangecfu nga sawau soi hania hania fingeru henggecde."

¹² "Faka ifia mi fingecmanungoc yeni kpacnaac amma ngeni ngunukporac angem-mema mengunuma kpekpeturanggac amaaeng yeneac mariu faingunugecde. Nga yeneng witicamau faingunugec ngeni ngictau nga gawana yenearu mengunuma kenggecde. ¹³ Nga naso imohainoc neac dedekperagi yoac edeyunugecdeac sing fingecngemmmeude. ¹⁴⁻¹⁵ Ni negen negentegec ngemmema yoac enacnginau faibade. Ifi amba ngabafocngina yeneac botucfunac mongngo yoac ngemmehade, imoc naric mi memaude me kpeude. Imocac amma ngeni yeneac kicfu noc yoac deni dema mi arenggekecbisia. ¹⁶ Kecma nonggo mang nga dacmunafocngina amma sactoso nga ogofocngina yeneng kererengunuma ngaba yeneac mariu faingunugec ngenearunac goa yunuhomegecde. ¹⁷ Neac kpacnaac amma ngicngac sasawango ubango ukungunugecde. ¹⁸ Nga ngeneac orucnginaunac orucdzongina mongngo ine naric mi sufuude. ¹⁹ Ngeni seriangoc namma kekecngina onggonggecde.

²⁰ Wasaingic habu yeneng hama Yerusareng oronggecde, naso imohai ngeni yofi bic negenggecde, taong manganeudeac naso bic hade. ²¹ Imohai ngicngac Yudia bangecfu kecdae, yeni worama tikiu embisia nga Yerusareng taong manau kecdae, yeni worama ngadeau kemebisia amma ngadeau kecdae, yeneng Yerusareng manau mi embisia. ²² Naso imoc turung kpoukpou naso anude. Imohai yoac sasawa oho ohoya feder, imocac fora fingerude. ²³ Naso imohai ngac heregoc kecdae nga nenggac sabac namuu meyunukecdae, yeni ebicnginagoc anggecde. Bangec yomohai ebic kuneng fingerude nga bangecac ngicngac witinginau ngaba fingerude. ²⁴ Nga ngaba yeneng dzikacac beangngco ngic noboha yunuhomema noboha witicyunuma bangeha bangeha meyunuma kemma faiyunugecde. Amma bangeha bangeha ngicngac areng Anutu mi negemmidae, yeneng hama Yerusareng haninginango tima kecmagec nasongina dedea, imoc wisickeu kenggecde.

²⁵ Naso imohai wenac nga afo amma asomeng yenearu soi fingerude. Nga bangeha bangeha ngicngac yeni ubaebic mema kondunnu namma kondung tembonggac udu-meng negemma negengyohoc amma dafi ambesonga obohogecde. ²⁶ Ebic imocngo bangecfu fingerudeac ngicngac yeni imoc negemma negengyohoc nga kengec amma homecgboric anggecde. Sawau kuc sasawa yeni kockpac anggecde. ²⁷ Anu naso imohai

yen Ngicac Medac henggec ye kuctoayagoc nga kibikperagitoayagocng hoeng witiau haude.²⁸ Faka imoc fingeckbeso ammanu ngeni kpehengaima yacma orucngina miacma nambisia. Naso imohai ebifunac mesingunugec enggecdeac naso wegeneude.”

²⁹ Anu Yesungo yoac mong heima yofi edeyunuec, “Ngeni fig ic nga ic sasawa hemma negembisia. ³⁰ Ic yeni maringina besaiudeu wenac naso wegeude, imoc ngenaoe bic negenggecde. ³¹ Ngeni wiac sasawa deduae, imoc fingeru hemma ifingoc yofi negembisia, Anutuac eucerereng bic mewegenengnude.

³² Foracngoc, ngicngac areng yomoc, yeni mi homemagec wiac yomoc fingeckdarude, imoc edengunudiae. ³³ Bangec nga kurumeng, yeri kpac anecde nga neac yoac imoc naric mi kpac anude.

³⁴ Ubasufu nga dokunene amma bangecac negengyohoc imocng meebeiringunubauac ngeni garengngina meemebisia. Wenac imoc utac fingeckgemmebacac. ³⁵ Wenac imohai subango yang kpeande, ifi isoc bangectoa bangec imohai hama ngicngac sasawa yenearu fingeckdarude. ³⁶ Imocac ngeni nasosoc garengemema kecma nunumu ua mekecbisia. Mekecma wiac sasawa yomoc fingeckbeso ande, imohacnac woragecdeac kuc mema Ngicac Medac, yeac kicfu serima nanggecde.”

³⁷ Yesungo naso imohai wenacsoc Anutuac womonnu kpoukpou ua meec. Mema kecmanu ama marai anu tiki mong kpara Oriwa, imohai kenu toforeu takefec.

³⁸ Weredeknu ngicngac sasawa yeneng Anutuac womonnu yeac yoac monggoc negenggecdeac kengkecgec.

22

¹ Hombang mong, ic sogong yisya kpac nene, kpara mong makekeng deandae, imoc wegeneec. ² Wegeneu womong gareng enara nga mitiac negengngic yeni Yesu homecfu faigecdeac sing mong meficgegecdeac negensigec. Amma yeni obohogec nocac yeni ngicngac yeneac kengcyunuec. ³ Yuda kpara mong Karioto ye medacfora 12 yenearunac mong. Nga Satangngo yeac ubahereau kemeu⁴ yeng kemma womong gareng enara nga womonggac keracnatang garengngina, yenigoc tacma Yesu sing dafiu mema yeneac mariu faiudeac yoac denegeng anggec. ⁵ Nga yeni ubangerec negemma dzo kpetea mong dema migecdeac yoac dedzege anggec. ⁶ Yudango yenigoc uba mocgu amma sing dafiu meficgema habu yegoc mi kecmagec Yesu sufufuu yeneac mariu faiudeac kicfifi kefec.

⁷ Kecma ic sogong yisya kpac nene, imocac hombannu ramamedaha kpeandae, uameme imoc hau ⁸ Yesungo Petoro nga Yohane yofi dema sueyuruec, “Nenang makekenggac ramamedaha nenideac ngeri kemma wiac mengereec.” ⁹ Ifi deu kpesimioc, “Dahai mengerededeac negensinec?” ¹⁰ Deec merengyecmem yofi deec, “Ngeri kemma taonnu enecde, imohai ngic mong dokuenanga tofohoma hau ngeri yegoc ewacma modacma kemma ye ama monnu enu ngeri yegoc emma ¹¹ ama mingina yofi edebesera, ‘Kpoukpouno yofi kpesigende, amamana damohai medacfocnagoc makekenggac ramamedaha nenide?’ ¹² Ifi deec yeng ama witiau amamana mong kuneng edzacnguruude. Nga ihai wiac bic faifaia tacdacde, ngeri imohai iwai mengerebesera.” ¹³ Ifi deu yeri kemma Yesungo edeyuruec, imocac sirihau wiac meficgema makekenggac ramamedaha ohomengere anoc.

¹⁴ Anu yakanene naso hau Yesungo medacfora yenigoc yaka nebeso tacma ¹⁵ yofi edeyunuec, “Ni makekenggac ramamedaha yomoc ngenigoc nebesonga homac yombong anende. Amma imoc nemaguc kpendzennu embade. ¹⁶ Imoc yofiac, ni yaka yomoc monggoc mi nene kecbarengoc Anutuac eucererennu foraya fingerude.” ¹⁷ Ifi dema kpakenec mong mema Anutu dengerema yofi deec, “Ngeni yomoc mema ngenaoe emema negec. ¹⁸ Ni waing gbomeaac dokuya monggoc mi nene kecbarengoc Anutuac eucerereng haude.” ¹⁹ Ifi dema ic sogong mong mema Anutu dangge edema mendzicma yemmemma yofi deec, “Yomoc fusina, imoc ngeneac amma faifaia. Ngeni neac negensima

imoc negec.” ²⁰ Yaka negec wisickeu ye kpakenec ifingoc mema deec, “Kpakenec yomoc sacnaac dzadzahac gboria, imoc ngeneac amma kpetic kpetinggea.

²¹⁻²² Ngicac Medac ye Anutungo sing demiecfu kenudenoc nga ngic docfu fainuude, ye maria neac marinagoc yakatebou tacdape, ngic imoc ye ine sowehegoc.” ²³ Ifi deu medacfora yeni merang yeneac botucfunac faka imoc anude, ifi dema yenaocngoc kpesiemegec.

²⁴ Anu medac yeni yenang botucfunac merang engena kecde, imocac yoacngina engemmama anu ²⁵ Yesungo edeyunuec, “Bangec monnunac ngicngac Anutu mi negensinggeandae, yeni ngictaufocnginango ngicngac garengyunuma enac tofoc tofohofocngina meyunuandae. Ifi meyunuma ine yofi deandae, ‘Neni memeficngina kecdimbe.’”

²⁶ Ngeneng ine ifi mi ambisia. Mong ye engena ande, ye ngadea ambeso nga enarangina kecde, yeng tosotora yeneac kingangkpekpengina siricfu kecbeso. ²⁷ Imocac yofi kpesidue, ngic merang engena ande? Ngic yaka eng tacma neude me yakau kingangkpekpe ua mema kecde? Yaka eng tacma neude, ngeni yeac negenggecde. Nga neng ine sifu ngeneac botucfu kingangkpekpe siricfu kecduae. ²⁸ Amma ni faitobang manau kecbareng ngeni mi wanuma nigoc kecgec. ²⁹ Mannango eucererenggac kuc neac mariu faiec, ifi isocngoc neng eucererenggac kuc ngeneac mariu faibade. ³⁰ Faiba ngeni imocgoc kecma eucererennau yaka nga doku nema tacgecde. Amma ngeni ifingoc ngictautatac mema Israe kisic 12 yeneac fakangina isingga desigecde.

³¹ “Simong, Simong, negenna, Satang ye ngic yeneng wit seuha kpegec maudeac kpemindzaheandae, ifi isoc gombungaunac merengngunuu manganegedeac bic arenggema deregenendac. ³² Nga Simong ge ine negensingga ukuna mi maudeac, neng geac amma nunumu ua bic medua. Amma ubaga meremma nearu monggoc dzigenema dacmunafoega meseriyunubesena.” ³³ Ifi deu Petorongo merenec, “Kebu, ni gegoc witicamau kembade amma homebadeac bic efaidua.” ³⁴ Ifi deu Yesungo edeec, “Petoro, ni edeguba yaguc tofocnac yomohaingoc kokorec mi arohomanu geng neac sebiheina atac harebec anude.”

³⁵ Anu Yesungo yofi edeyunuec, “Ni warac suengunuba kenggec, imohai dzobirang me hie me hanitabe mi mekecgec ngeni wiac monggac kpedadanggegec me?” Ifi deu yeneng degec, “Kpac.” ³⁶ Ifi degec Yesungo yofi deec, “Nga yaguc ine yofi deduae, Ngic mong ye dzobirangagoc me hieagoc kecde, yeng imoc mebeso. Amma wasaibeanga kpac kecde, ye ngakpitoaya sueu hiedzo kirecgeu imocngo wasaibeang bummebeso. ³⁷ Mitikibiu yoac oho ohoya fede, imocngo nearu fora fingecbeso, imoc edengunuduae. Yofi,

‘Yeni yeac godzungic degec.’

(Yesaia 53:12)

Neac negemma yoac degec fede, imoc yaguc fora fingecdarude.” ³⁸ Ifi deu medac yeneng degec, “Kebu henna, neni wasaibeang yohockang mekecdimbe.” degec Yesungo deec, “Imoc soha.”

³⁹ Dema Yesungo faka angkefec isoc amma taong wama Oriwa tikiu kenu medacfora modacma kenggec. ⁴⁰ Kensikema yofi edeyunuec, “Ngeni faitobannu embauac numugec.” ⁴¹ Ifi dema medacfora wayunuma kapianc kpesima kemmafafoc heima ⁴² yofi dema numuec, “Manggac, ge negenna naric anu kpakenec yomoc nearunac meickena. Amma neac songo mi fingecbeso, kpac. Geac songo nga negeng imocngo seribeso.” ⁴³ Ifi numumanu angero monggo kurumennunac fingecmima mama meseriu ⁴⁴ Yesungo ine negengebirima seriangoc numuu sengerangango sac isoc amma bangecfu maec. ⁴⁵ Numuu wisickeu yacma medacfora yeanaru dzigene kemma yenenu yeni ubahodung negemma gau fegec ⁴⁶ yofi edeyunuec, “Ngeni nocac gau fedae? Ngeni faitobannu embauac yacma numugec.”

⁴⁷ Yesungo yoac denammanungoc habutoa mong yearu hagec. Hama medac 12 yenearunac mong kpara Yuda, yeng waraiyemmemesa Yesu muduckeudeac yearu mewegeneu

⁴⁸ Yesungo deec, “Yuda, ge Ngicac Medac muduckema doc menec, ec.” ⁴⁹ Ifi deu ngic Yesu oronggema nanggec, yeneng faka mangana imoc fingecbesonga anu hemma kpesima degec, “Kebu, neni wasaibeango yununide me?” ⁵⁰ Nga yenearunac monggo womong

garengtoa yeac wanacngic kpema kedzaha foiugeng herecgeec. ⁵¹ Herecgeu Yesungo yofi deec, “Ngeni faka imoc wagec.” Ifi dema wanacngicac kedzaha kpreserema mengereec.

⁵² Anu ngic Yesu mebesonga hagec, imoc womong gareng enara nga womonggac keracnatang enaramemengina amma yudangic enarafocngina yeneac yofi deec, “Ngeni godzungic meandae, ifi isoc wasaibeang nga gbarucnginagoc hadae. ⁵³ Ni Anutuac womonnu wenacsoc ngenigoc kecbareng ngeni sifu imohai mi menugec. Nga yaguc ine ngeneac naso anu kundunggac kucngo garenggac tatac mekecde.”

⁵⁴ Ifi anu yeni Yesu mema womong garengtoaac amaumekenggec Petoro ye ngadeng-inau hereaungoc modacyunuma kenec. ⁵⁵ Kenu ngic goa yeni amaac oda manau sobeng dzongiau gerec figec dzeu dzeunegemma tacgec Petorongo yeneac botucfu mataru ⁵⁶ wanac naroang mongngo Petoro gerecfu taru kic fima hemma deec, “Ngic yomocngo yegoc kecande.” ⁵⁷ Ifi deu Petorongo ine sebi heima deec, “Ngac, ge denec, ni ye mi negemmiduae.” ⁵⁸ Ifi deu naso mi hereemanu ngic mongngo Petoro hensima deec, “Ge ifingoc yenearunac mong.” Ifi deu Petorongo deec, “Ngic, ge negennec ni kpac.”

⁵⁹ Nga aua mocgu isoc nammanu ngic mongngo monggoc serima deec, “Fora yombong, ngic yomoc ye gariraiangic, ye ifingoc yeac arenunoc kecande.” ⁶⁰ Ifi deu Petorongo ine merenec, “Ngic negenna, ge denecmoc, imoc mi negentegecduae.” Dema yoac imoc mi desimanungoc kokorecng arohoec. ⁶¹ Arohou Kebungo dzigenema Petoro henu Petoro ye Kebungo yeac yoac deec, imoc negensiec, “Kokorecng tofocnac yomohaingoc mi arohomanu geng neac sebiheina atac harebec anude.” ⁶² Imoc negemma Petorongo ngadeau kemema ubahodung kuneng mema kiac hodung kiarec.

⁶³ Ngic Yesuac gareng kecgec, yeneng Yesu dedzomoc ammima kpema ⁶⁴ kiwa kporucng biranggema degec, “Merang gudac, geng imocac kpefingyoac dena.” ⁶⁵ Ifi dema yeni faka hania hania ammima desusuic ammigec.

⁶⁶ Ama wereckenu yudangic enarafocngina, imoc womong gareng enara amma mitiac negen negengngic yenahafoc kpeturanggemagec Yesu yudangic yeneac tutumangtoau mekemma ⁶⁷ yofi degec, “Edenununa, ge Messia me?” Ifi degec yeng yofi merengyem-meeec, “Edengunuba naric mi negensinggegecde. ⁶⁸ Nga kpesi kpesi kpesingemmabadeu turunga naric mi merenggecde. ⁶⁹ Nga yofinenggac nga namma enude Ngicac Medacng Anutu Kuctoa minginaac foiaugeng tarude.” ^(Mitiyegec 110:1) ⁷⁰ Ifi deu yeneng degec, “Ifi anu ge Anutuac Medac me?” Ifi degec, yeng merengyem-meeec, “Ni imocnoc, ngeneng ine imoc dedae.”* ⁷¹ Ifi deu yeneng degec, “Yoacninaac boingicac monggoc mi obohodimbe. Ye imoc yengena enarango deu bic negending.”

23

¹ Dema kpeturanggema tacdacgec, yeni sasawa yacma Yesu mema Piratoaru mekemma ² imohai yoacfumma haniaya yofi degec, “Ngic yoc ye ngicngacfocnina yenearu singngina mesufuma takesi Sisa minideac kpetarinemmema yengenaac ifi dekecde, ‘Ni Messia, ngictau mong.’” ³ Ifi degec Piratongo kpesimie, “Ge yudangic yeneac ngictau me?” Ifi deu meremmiie, “Imocnoc geanggaoc denec.” ⁴ Anu Piratongo womong gareng enara nga habu yeneac deec, “Ngic yomocngo singyoac mong mi kpeec, ni kopocsiha hofocduae.” ⁵ Ifi deu yeneng ine serima degec, “Ye ngicngac kpouyemmema here miac miac Gariraianac hanahema ayemme hakecma Yudaia bangecfu sokoma ihai wisickede.”

⁶ Ifi degec Piratongo imoc negemma kpesiyem-meeec, “Ngic yomoc Gariraia ngic me?” ⁷ Amma ye Yesuac hania negemma Herodengo bangec garenggede, ye ihacnac, ifi negenec. Negemma Herodengo naso imohai Yerusarennu ifingoc kefecac Yesu sueu yearu kenec. ⁸ Kenu Herodengo Yesuac siduc bic negenec. Ye Yesungo faka kuhagoc goa meu henudeac negengkefec. Ifi negemma naso herea Yesu hofockefecac amma Yesu yearu mekenggec ubangerec yombong negenec. ⁹ Negemma Yesu kpesi kpesi homac kpesimieng yeng ine imocac turunga mong mi merenec. ¹⁰ Nga womong gareng enara nga

* ^{22:70:} “Ni imocnoc” imoc Anutuac kpara mong. Ge “Yoac goaac dedekperagi.” henna. Hafac 1128.

mitiac negengngic yeneng hama namma yeac hania seriangoc yombong degec. ¹¹ Nga Herode nga wasai arengfora yeneng ye ngadehema dedzomoc ammima ngakpi mong kibiagoc heimigec kemeu Piratoaru monggoc suegec mekenggoc. ¹² Herode nga Pirato yeri warac ngaba ngaba kefoc nga wenac imohaingoc ogo ogo anoc.

¹³ Anu Piratongo womong gareng enara nga enarameme amma ngicngac kpacyunu hadacgoc ¹⁴ yofi dema edeyunuec, “Ngic imoc ye ngicngacfocnina herengina miacande, ifi dema mehadau. Nga neng ngeneac kicfu kpesimiba wiac negemma yoacfu faidae, imoc kpac anu kopocsiha hofocduae. ¹⁵ Nga Herodengo ifingoc negemma eng merenu mema hadau. Ifi anu ngic yomocngo mangana mong mi memanu neng homecfu faibadeacsoc mi ande, ngeni imoc negentegecbisia. ¹⁶ Ifi anu ye memeting goa mima waba kenudeac negenduae.” ¹⁷ Anu hombang nasou gawanango ngic mocgu witicamaunac yungecbeso, faka imoc feec.

¹⁸ Imocac habutoa sasawa yeneng arohogec, “Ye meickema Baraba yungecnemmena.” ¹⁹ Baraba ye warac taonnu ngicngac yeneac here miac miac faka amma ngic kpehomeec, imocac amma witicamau faigec. ²⁰ Nga Piratongo ine ngicngac yenearu monggoc serima deec nocac ye Yesu yungeru kenudeac negenec. ²¹ Ifi deu yeni arohogec, “Ge mariponnu kpena homeu, mariponnu kpena homeu.” ²² Arohogec naso harebec anu Piratongo deec, “Ngic yomoc ye noc kopocsic yombong meficgeec? Ni kopocsiha mong mi meficgema homecfu faibadeacsoc mi anduae. Ifi anu memeting mima waba kenudeac negenduae.”

²³ Ifi deu yeni mariponnu homeudeac serima seriangoc arohma Piratoac yoac ferahema udumengtoa meficgema yeneng firang anggec. ²⁴ Ifi anggec Piratongo yeneac yoac negemma negengyemmemma Yesu desiyemmeec. ²⁵ Amma ngic ye here miac miac faka angkecma ngic kpehomeu witicamau faigec tarec, ye yungecgecdeac degec, imoc yungecyemmemma Yesu ine maringinai faiu songongina modacgecdeac wayemmeec.

²⁶ Wayemmeu wasaingic yeneng Yesu mekemmma henggec ngic mong Kirene taon-nunac, kpara Simong, ye semeng uaunac hau sinnu meficgema yeng Yesuac maripong tofohoudeac ngombonggegec tofohoma Yesu modarec. ²⁷ Nga ngicngac habu kunengngo modacgec, yeneac botucfu ngac homac yeneng yeac dekiac amma ubamangang kuneng anggec. ²⁸ Ifi anggec Yesungo dzigenema edeyunuec, “Yerusarenac ngacnaroang, ngeni neac mi kiacgec. Ngeni ngenang nga nambaracfocngina, yeneac amma ine kiacbisia. ²⁹ Naso mong haude, imohai ngicngac yeneng yofi degecde, ‘Ngac kufing nga sabac mi megec amma namu mi gumecyunugec, yeni kenecnginagoc.’ ³⁰ Naso imohai ngicngac yeneng tikiac degecde, ‘Tiki ge witininau mama ferandzinununa.’ Nga faganggac yofi degecde, ‘Fagang ge tohoma kperacnununa.’ (*Hosea 10:8*) ³¹ Yeni ic sabayagoc nande, imohai faka ifia andaeu ic bic ururuedacf, imoc memanganeyombonggegecde.”

³² Anu yarengic yohockang yeri Yesugoc yurugecdeac ifingoc meyuru kemma ³³ bangec buma mong kpara Hasic degec, imohai kensikema Yesu mariponnu kpegec amma yarengic mong foiugeng nga mong kanaugeng, ifi yurugec. ³⁴ Yunugec Yesungo deec, “Manggac, yeni ua medae, imoc mi negentegecma andaeac kopocsicngina wana.” Nga yeneng wambaya kpeing kpema mederegec. ³⁵ Ngicngac yeni wiac fingerec, imoc ifi hennammagec yudangic enarafocnginagoc yeneng ifingoc desusuic ammigec, “Ye Messia, Anutuac meisingmedaha andeu yeng ngicngac goa onggongyunuec, ifi isoc yengena ifingoc onggongemeu.” ³⁶ Nga wasaingic yeneng ifingoc defagoc ammima yeac wegenacf hama waing aengagoc yearu sinemima ³⁷ degec, “Ge yudangic yeneac ngictau kecnecfu geangga onggongemeu.” ³⁸ Nga oruha witiau yoac yofi oho ohoya nanec, “Yomoc yudangic yeneac ngictau.”

³⁹ Anu yarengic yohockang yerearunac mong nanec, yeng Yesu desusuic ammima deec, “Ge Messia annecfu geangga onggongemema neri ifingoc onggonnuruna.” ⁴⁰ Ifi deu ogeango kpetarimima deec, “Ge ifingoc yoacfu firang mi andang amma Anutuac kengecguu ngereebac. ⁴¹ Nerang kopocsicniraac turunga faka dindingacf ifi anecmedae nga ngic yomoc ye ine kopocsic mong mi meficgeec.” ⁴² Ifi dema Yesuac deec, “Yesu, ge

eucererenggau kensikema ngictau tatac mema ni negensinubesena.” ⁴³ Ifi deu Yesungo yofi edeec, “Foracngoc, yagucngoc nigoc eucererennu kecdede, imoc edeguduae.”

⁴⁴ Anu wenac dzongiau 12 kiroc ammanu imohai ama kundung kpema kundungngo bangec sokoma fekemmanu 3 kiroc marai anec. ⁴⁵ Nga wenackiwa kundung kpeec, naso imohaingoc Anutuac womonnu kpoructoa womongmana kpetiac yombong naguyau nanec, imoc tohou yohockang anec. ⁴⁶ Nga Yesungo ubaudumeng kunengngoc kpacma deec,

“Manggac, ongaasuna marigau faiduae.”
Ifi deu asuya ereec.

(Mitiyegec 31:5)

⁴⁷ Anu wasai garengngo imoc hemma Anutu eweheimima deec, “Ngic yomoc ye kopocsiha kpac, imoc fora.” ⁴⁸ Nga ngicngac sasawa yeni faka fingerec, imoc hennegeng ambesonga hagec, yeneng faka imoc fingeru hemma mokucnginau kpema kiacma amanginau kenggec. ⁴⁹ Nga Yesuac arengfora sasawa nga ngac goa Yesu modacma Gariraianac hagec, yeni ine hama hereau namma faka fingerec, imoc henggec.

⁵⁰⁻⁵¹ Ngic mong kefec kpara Yosefe, ye Yudaia bangecfu Arimataia taonnunac. Amma ye yudangic yeneac tutumangtoaac memba kefec. Ye ngic yumea nga fakaya dindingac amma Anutuac eucererenggac tomai kefec. Nga yeac ogoforango yoac degec nga faka anggéc, yeng imocac negenu mi ngereec. ⁵² Ifi anu yeng Piratoaru kemma Yesuac fareng meudeac kpesimie. ⁵³ Kpesiu negemmiu ye Yesuac fareng mesima linengkporuc imocngko tembonggemamekemma kicsere mong gboria, imohai faiec.* Kicsere imoc gboria amma hoc sirango mengec mengerea nga ngic mong imohai mi tonggo tonggoya. ⁵⁴ Anu wenac imoc sabataac efac kpefac naso anu sabata naso hanahbeso anec.

⁵⁵ Nga Gariraia bangecfunac ngac goa Yesu modacgec, yeneng Yosefe modacma kicsereu kemma Yesuac fareng faigec, imoc hennegeng amma ⁵⁶ monggoc dzigenema amanginau kemma fareng imocac kerecdoku homuna gombunga memengere amma sabatanasoac singyoac fede, imoc modacma tomai kecma tacnegenggec.

24

¹ Sonda gboria hanahema asoac ama negemma ngac yeni kerecdoku homuna gombunga memengere anggéc, imoc mema kicsereu kenggec. ² Kemma henggec hoctoa kicsere sing hedzic hedzickeamoc, imoc bic kpedic kpedidingea feu kicsere naguya eng nanec. ³ Nanu ngac yeni kicsere manau emma Kebu Yesuac farenga ine mi meficgegec.

⁴ Amma yeni noc wiac fingecdac dema obohoma nammagec imohaingoc ngic yohockang ngakpingira kongac koporarac yombong, yereng hama kicnginau fingecma nanoc.

⁵ Nanec ngac yeni kengec amma ngonduncnema nammagec ngic yohockang yereng yofi edeyunuoc, “Ngeni ngic gboridac kecde, ye nocac kicsereu hofocdae? ⁶ Yenoc Anutungo homecfunac bic megboriu yacma yei mi kecde. Amma yeng Gariraia kecmangoc yoac edengunuec, imoc negensisibis. ⁷ ‘Ngicac Medac ye kopocsicmeme yeneac mariu faigec, yeneng mema mariponnu kpegec homeude.’ imoc fingerudeac deec, ‘Nga uameme harebec ammanu monggoc gborima yarude.’” ⁸ Ifi deu ngac yeni yeng yoac bic deec, imoc negensisigec.

⁹ Negensisima kicsereunac monggoc dzigene kemma medac 11 nga tosofocngina faka sasawa fingerec, imoc edeyunudacgec. ¹⁰ Ngac kenggec, yeneac kpacngina Maria Madara nga Yohana amma Maria Yakobo nongfea nga ngac goa yenhafoc kenggec, yeneng siduc imocngoc aposoro edeyunugec. ¹¹ Nga ngac yeneng yoac imoc edeyunugec, imocac medac yeneng negenggec sicsauc anu yoacngina mi negensinggegec. ¹² Nga Petorongo ine yacma nedzima kicsereu kenec. Kemma kicsereu okarima henu kporucususu tembonggegec imocngosac tarec. Ye imoc hemma negenu wiac engena anu monggoc dzigene kenec.

¹³ Anu wenacnaso imohaingoc ngic yohockang Yesu modacandape, yereng ama mong kpara Emausi, imohai kembesonga kenoc. Bangec imoc Yerusarenggac hereau 11

* 23:53: Lineng imoc kpindzing mong ambiac ogea, imocngko wamba megec.

kiromita, imocfi tarec. ¹⁴ Nga yeri faka sasawa fingerec, imocac denegeng amma kenoc. ¹⁵ Yeri yoac imocac denegeng amma negen negeng ua mema kemmaec Yesu yengenaoc ngadengirau kemma maficyuruu yerigoc kenggec. ¹⁶ Amma yeri kic mesufuu ayecmeu mi hensioc.

¹⁷ Ifi anu Yesungo yofi kpesiymerec, “Ngeri sinnu noc wicac ngeraoengoc denegeng andape?” Ifi deu yeri ubahodung siric amma waickema nanoc. ¹⁸ Namma mong kpara Kereopa, yeng kpesiymie, “Ge kuricngic mocgungosac Yerusarennu kecmina sonda yomocac manau ihai faka fingeclac, imoc mi negendang me?” ¹⁹ Ifi deu yeng deec, “Noc faka fingeclac?” Ifi deu yereng edeoc, “Yesu Nadzaretenac yearu faka fingerec. Ye profete mong amma Anutu nga ngic yeneac kicfu yoac deec nga faka sasawa meec, imoc kuhagoc yombong anec. ²⁰ Nga womong gareng enara nga israengic enarafocnina, yeneng ye homeudeac dema gamang yeneac mariu faigec yeneng mariponnu kpegec homeec. ²¹ Nga neni yofi negensinggeing, yennoc israengicngac mesinunuude. Faka fingerec, imocac uameme yaguc harebec ande. ²²⁻²³ Anu ngac goa neneac habuunac, yeni yaguc asoac yombong kicsereu kemma farenga hofocdau. Hofocma dzigenema hama yofi edenunudau, ‘Angero yereng ongau fingeclac yofi deec, “Yesu ye bic gboridac kecde.” ifi dedau.’ Ifi degec kpidohoding. ²⁴ Amma nenearunac ngic goango kicsereu kemma ngac yeneng dedau, ifi isoc yombong maficgedau nga yengena ine mi hendau.”

²⁵ Ifi deu Yesungo yofi edeyuruec, “Ngeni negen negengngina kpac nga wosongina nomana yombong. Profete yeneng bicngoc yoac sasawa degec, imoc bic mi negensinggedae. ²⁶ Imoc yofi fingerudeac degec, ‘Messia ye kpendzeng kpekefu wisickeuguc kibikperagiatoaac amea naric enude.’” ²⁷ Yengena siduc imoc mitikibiu oho ohoya fedacde, imoc Moseac kibiunac hanahema kengkecma profete sasawa yeneng yeac siduc ohogec, ye imocac hania deireckyemerec.

²⁸ Anu yeri ama kembesonga kenoc, imoc mewegenema Yesungo ferecgema kembeso siric isoc anu ²⁹ yereng kpetarimima deoc, “Ama marai anu kundung kpebeso andeac ge nerigoc kenni.” Ifi deec yerigoc amau emma tacgec. ³⁰ Yesungo yerigoc tacma yaka nebesonga ic sogong mema kenecyoac dema mendzicma yemerec. ³¹ Yemeru kicngira tegeru Yesu hensimaec yeng imohaingoc aockeu ³² yeraocngoc denegeng amma deoc, “Yeng sinnu mitikibiac hania edekpou anecmema deireckenemeru herenirango yacyombonggedac, imoc fora yombong.” ³³ Nga yeri imohaingoc yacma dzigenema monggoc Yerusarennu kemma medacfora 11 ogofocnginagoc kpeturanggema tacmagec maficgyunuoc. ³⁴ Maficgyunuoc yeneng edeyuruma yofi degec, “Kebungo fora homefunac gborima yacdac, ye Simong bic fingeclac.” ³⁵ Ifi degec yereng sinnu yerearu faka fingerec nga Yesungo ic sogong mendziru hensioc, imocac siduc andaroc.

³⁶ Siduc ifi andarec yeni yoac imoc negemma tacmagec Yesu yengenaoc botucnginai namma deec, “Ruae ngenearu febeso.” ³⁷ Ifi deu yeni kpidohoma kengec amma negensisgec, “Wosonga hendimbe.” ³⁸ Ifi negensisgec yeng yofi deec, “Ngeni nocac kpidohoma negengyohoc andae?” ³⁹ Imoc ni neanaoc, ngeni hanimaria henggec. Wosonga yeni sicfusingina kpac. Ngeni imocac hama kpaserenuma nenggec.” ⁴⁰ Ifi dema hanimaria edzacyunu ⁴¹ yeni kerektegec amma ubangerectoa negemma sifu mi negensisgec yeng yofi kpesiymie, “Ngeni yaka mong faigec tacde me?” ⁴²⁻⁴³ Ifi deu yeni kondungyang dzedzea noboha migec mema kicnginai neec.

⁴⁴ Nema yofi edeyunuec, “Ni ngenigoc kefai, imohai yofi bic edengunuai, wicac sasawa neac negemma Moseac dedeseryoacfua nga profete yeneac kibiu amma Mitiyegegecfu oho ohoya fede, imoc sasawa fora fingeclac.” ⁴⁵ Ifi dema ye imohaingoc negen negengngina meireckyemmeu yeni mitikibiac yoac negentegegec ⁴⁶ yofi torokpema deec, “Imocac amma yofinoc oho ohoya fede, Messiangko kpendzeng kpema homema uameme harebecfu monggoc gborima yarude.” ⁴⁷ Yaru ngicngac yeni yeac kpacfu ubamereng nga kopocsic wawaac sing imoc Yerusareng taonnusing hanahema bangeha bangeha ngicngac sasawa yenearu yoac dekperagigec kenude. ⁴⁸ Faka yomocnac kicnginai fingeclacmoc imoc dekperagibisia. ⁴⁹ Nga Mannango wicac ngemmeudeac

deec, neng imoc suengemmeba mebisia. Negenggec, ngeni taong yomohai tacma imoc mi wabisia kecma wihacnac kuc heingemmebade. Ngeni kuc imoc memaguc naric kengha ambisia.”

⁵⁰ Anu Yesungo waraiyemmeu taong wama ngadeau Betania amabangec, imohai kemma maria miacma kenecyunumanu ⁵¹ Anutungo meu wayunuma kurumennu enec. ⁵² Enu yeni afehema songo kuneng meficgema Yerusarennu monggoc dzigenema kenggec. ⁵³ Nga yeni nasosoc womonnu kecma Anutu ubangerec edekecgec.

Yohane Yeng Yesuac Siduc Gombung Ohoec

¹ Hanac hanaheunacngoc enacyoacngo kefec nga enacyoac ye Anutugoc kefec amma enacyoac ye Anutu. ² Amma yennoc hanac hanaheau Anutugoc kefec. ³ Nga Anutungo enacyoacfу deu wiа sasawa fingeclarec, wiа sasawa fingeclma fekende imoc yea kpac mong mi fingerec. ⁴ Yearunoc kekec feec nga kekec imocngо ngicngac yeneac kperagi anec. ⁵ Nga kperagingo kundung mekperagiу kundungngо kperagi imoc semeudeac ambibiema waec.

⁶ Anutungo ngic mong sueu haec, yeac kpara Yohane. ⁷ Yeng kperagi imocac hepucngic amma dedekperagi imoc ngicngac mekperagiyemmeudeac haec. Yeng ifi hau ngicngac sasawango kperagia imoc negensinggegecdeac negenec. ⁸ Ye yengenaoc kperagi imoc mi kefec, kpac. Ye ine kperagi imoc mekperagiudeac haec.

⁹ Anu kperagi fora yombong, yeng bangecfu ngicngac sasawa mekperagiyemmebeso haudeac anec. ¹⁰ Anutu ye kperagiango bangec nga wiа sasawa maficgedaru kperagia imocngо bangecfu kefu ngicngac yeneng ine ye mi hensigec. ¹¹ Ye bangehau dzigenemanu arengfora yeneng ama mi heimigec. ¹² Nga ngicngac ama heimima kpara negensinggegec, yeni Anutuac nambaracfora anggecdeac deyemmeec. ¹³ Deyemmeu ngicngac imoc yeni ngic sacfusiunac me sebiac songounac me ngic monggac songounac mong mi fingeclgec, kpac. Yeni Anutu yengenaarunac fingeclgec.

¹⁴ Anu enacyoacngo sebfusiagoc amma botucninau kefec. Kefu medac mocgungo fingeclma Manggacarunac kuc nga kibikperagia mekefec, kuc nga kibikperagia imocnoc hening. Henni yearu danggunuc nga yoac fora wake wakea fede.

¹⁵ Yohanengo yeac hepuc amma dekperagima kpacma yofi deec, “Ni yeacnoc yofi deai, ngadenau hama kecde, ye kunenna, nocac ni mi fingeclbarengoc ye kechakefec.”

¹⁶⁻¹⁷ Dedeseriyoacngо Mosegoc hau yearunac meing nga danggunuc amma yoac fora imoc Yesu Kristogoc haec. Amma ye danggunuc hafoangoc femide, imocngо nenannu wisic wisickea kpac hakecde. ¹⁸ Ngic mongngо Anutu mong mi henec, kpac. Medaha mocgusac Mamaac hoannu kecande, ye Anutungo. Yeng Manggac dekperaginemmeec.

¹⁹⁻²⁰ Yudangic Yerusalem taonnu kecgec, yeneng womong gareng nga womong gareng yeneac memefic sueyunugec Yohanearu kemma kpesimigec, “Ge merac?” kpesimigec, yeng haniaya mi hesonggema yofi dekperagiyemmeec, “Ni Messia kpac.” imocngо Yohanengo dedekperagi. ²¹ Ifi deu yeneng monggoc kpesimigec, “Ge merac, ge Eria me?” kpesimigec yeng deec, “Ni ye kpac.” deu degec, “Ge profete yombong me?” degec merenec, “Kpac.” ²² Ifi deu degec, “Anu ge merac? Suenunudau, yenearu yoac turunga dafi mekemma edeyununide? Ge geanggaac dafi deannec?” ²³ Ifi degec Yohanengo yofi merenec,

“Bangec kisiu ubaudumeng fingerec imoc nennoc yofi kpacduae, ‘Ngeni KEBUAC sing heitumeigec.’” (Yesaia 40:3)

Profete Yesaiango neac ifi deec.”

²⁴ Anu farisaio yeneng ngic goa sueyunugec kemma ²⁵ Yohane kpesimigec, “Ge Messia kpac nga Eria kpac amma profete kpac. Ge nocac ngic doku nadzicyemmeannec?”

²⁶ Ifi degec Yohanengo yofi merengyemmeec, “Ni doku nadzicngemmmeanduae. Nga botucnginau ngic mong kecde, ngeni ye mi negemmidae. ²⁷ Yeng ngadenau hama kecde nga ni ifiango yeac hanitabe witiha yungecba naric mi ngereeude.” ²⁸ Yohanengo Betania amau Yordang doku nobocgengau doku nadzicyemmekefec, imohai faka imoc fingerec.*

* ^{1:28:} Betania amau yohockang feoc. Mong Yerusalem wegeña nga mong Yordang wegeña.

²⁹ Wereckengau Yohanengo namma henu Yesungo yearu hau ngicngac yofi edeyunuec, "Henggec, imoc Anutuac ramamedaha, yeng bangectoa bangec imocac ngicngac sasawa yeneac kopocsic meickeude." ³⁰ Yeacnoc negemma yofi deai, "Ngic mong ngadenau hama kecde, yeng ni mi fingebare bicngoc yombong kefecac ni feracnude. ³¹ Neng ye mi negemmiai. Nga israengicngac ngeneng ye hentegecgecdeac neng hama doku nadzicngemmebade."

³² Yohanengo yofi dekperagiec, "Ni Tiri Asu hemba yeng kebesacac siric isoc kurumen-nunac mama yeac witiau taru henai. ³³ Nga ni ye mi negemmibare suenuec, yeng yofi edenuec, 'Asungo mama ngic yearu taru hennade, yeng Tiri Asungo nadzicngemmeude.'

³⁴ Ni imocnoc hemma hepuc amma yofi dekperagiai, ngic yomocngo Anutuac medac."

³⁵ Anu wereckengau Yohane ye medacfora yenearunac yohockang yerigoc imohai monggoc nanggec. ³⁶ Nammagec Yesungo kenu hemma medahora yofi edeyuruec, "Henec, imoc Anutuac ramamedaha." ³⁷⁻³⁸ Ifi deu negemma medahora yereng Yesu modacma kenec Yesungo dzigene yeremma yofi kpesiyemerec, "Ngeri noc wicac angecmede?" kpesiyemeru deoc, "Rabbi, (imocac titiha kpoukpou) ge dahai kecnec?" ³⁹ Deec yofi edeyuruec, "Ngeri hama henec." ifi deu yeni yenahafov kemma ama kefec, imoc hemma wenac imoc yegoc taroc. Faka yomoc marai 4 kiroc fingerec.

⁴⁰ Anu Yohaneac yoac negemma Yesu modaroc, yerearunac mong Anderea, Simong Petoroac munea. ⁴¹ Yeng Yesu hemma dzigenema warac warac yengena munea Simong meficgema yofi edeec, "Neri Messia meficgedic." (Messia imocac titiha Kristo.) ⁴² Ifi dema Simong hesickeu Yesuaru kenec Yesungo ye hemma yofi deec, "Ge Simong Yohaneac medac, geac kpacga Kefa debesonga." (Imocac titiha hoc amma grikyoacf Petros.)

⁴³ Wereckengau Yesungo Gariraia bangecfu kembesonga negemma Firipo meficgema yofi edeec, "Ge hama modacnuna." ⁴⁴ Nga Firipo nga Anderea amma Petoro yeni Besaida taonnunac.

⁴⁵ Anu Firipongo Natanae meficgema yofi edeec, "Mosengo dedeserioac kibiu ohoec nga profete yeneng ifingoc ohogec, neni ngic imoc meficgeding. Imoc Yesunoc, Yosefeac medac, Nadzarete taonnunac." ⁴⁶ Ifi deu Natanaengo deec, "Nadzarete taonnunac wiac gombunga mong mi fingeconde." ifi deu Firipongo deec, "Ge hama henna."

⁴⁷ Nga Yesungo Natanae henu yearu kenu yofi deec, "Henggec, ngic yomoc israengic fora, yearu ikoc nga faitobang faka mong mi fede." ⁴⁸ Ifi deu Natanaengo kpesimie, "Ge dafi negennunec?" Ifi deu Yesungo yofi edeec, "Firipongo mi kpacgumanu fig ic haniau tacmana bic gendua." ⁴⁹ Ifi deu Natanaengo yofi edeec, "Rabbi, ge Anutuac medac, Israe neneac Ngictau." ⁵⁰ Ifi deu Yesungo yofi meremmiec, "Ge fig ic haniau tacna gendua deduaeac negensinnunec. Kecma faka yofia monggoc ferahema fingeru hennade. ⁵¹ Negenggec, kurumeng anggeu ngeni Anutuac angerofora yeneng Ngicac Medac yearu engemmama anggec yenenggecde, imoc fora yombong edengunuduae."

2

¹ Uameme yohockang wisickeu Gariraia bangecfu Kana taonnu memeturang fingerec. Nga Yesuac nonggea ihai kecmanu ² Yesu nga medacfora momoc heitaiyunugec. ³ Nga yeni waingngina kpac anu nonggeango Yesu edeec, "Waingngina kpac ande." ⁴ Ifi deu Yesungo yofi edeec, "Ngac, neac wiac imoc geac mi ande, nasona mi hadacngoc." ⁵ Ifi deu nonggeango uamedac edeyunuec, "Yeng wiac monggac edengunu ngeni imoc sasawa tofobobisia."

⁶ Anu yudangic yeni duac duac fakangina modacma enang dokuyagoc faigec tacande. Imocac amma imohaingoc enang hocngo memea 6 faigec tarec. Enang mocgu mocgu imoc 100 lita, ifingo tackenec. ⁷ Nga Yesungo uamedac yofi edeyunuec, "Ngeni doku fima enannu kpakegec kemema wakeu." ifi deu yeni doku figec kemema wakedarec. ⁸ Figec wakeu yeng yofi edeyunuec, "Ngeni yaguc fima imoc yakagarenggaru mekenggec." Ifi deu fima mekenggec. ⁹ Mekemmagec dokungo waing anu yaka-garenggo imoc nehemma waing dahacnac dema obohou uamedac doku fima mekenggec,

yenengsac negenggec. Ifi nehemma yakagareng memeturangngic, ye deu haec. ¹⁰ Hau edeec, “Fakanina yofi feder, hanahema waing gombunga ngic gumecyununi nekecmu ubasufu anggec waing songea kpac gumecyunuandimbe. Anu geng ine waing gombunga mesufuna tacdacac yaguc meficgenec.”

¹¹ Yesungo Gariraia bangecfu Kana taonnu kecma negensinggegecdeac faka kuhagoc imoc hanahema meec. Mema kuc nga kibikperagia ifi mekperagiu medacfora yeneng imoc hemma ye negensinggegec.

¹² Kecgec wisickeu Yesu nga nonggo munafora amma medacfora yenahafoc Kafanaung taonnu kemema ihai wenac goa kecgec. ¹³ Kecgec yudangic yeneac makekenggac naso wegene hau Yesungo Yerusareng taonnu enec. ¹⁴ Emma henu ngic yeneng womonggac oda manau ramaburumaka nga kebesacneng faigec nga goa tatacnginai tacma hiedzo emekecmagec Yesungo yenene. ¹⁵ Yenemma indzuru mong mudzea mudzea mema imocngo ngic sasawa ramaburumakanginagoc womonnunac yunukisang ayemmeu kemegec. Kememagec ngic hiedzo emekecgec, yeneac dzongina megigi amma tebonginaheimerenec. ¹⁶ Heimeremma ngic kebesacneng suegec, yeni yofi edeyunuec, “Ngeni wiacngina imoc meickegec! Ngeni Mannaac ama anggec emekpesi ama mi ambeso.” ¹⁷ Faka imoc fingeru medacfora yeneng yoac mong oho ohoya feec, imoc negensigec,

“Geac amaac amma herenango gerec dzema dzendandannuude.” *(Mitiyegec 69:9)*

¹⁸ Amma yudangic yeneng meremma egegec, “Ge faka imoc andanggac noc faka kuhagoc mena hemma negensinggenide?” ¹⁹ Ifi degec Yesungo meremma yofi edeyunuec, “Ngeni womong yomoc hembarackegec ni uameme harebecfu imoc mi-acbade.” ²⁰ Ifi deu yudangic yeneng degec, “Ngic yeneng womong yomoc kifa 46 mekecmu medzickegec. Anu geng uameme harebecfusac naric miacnade me?”

²¹ Yesungo ine yengena sebiaac womonnu yoac heima deec. ²² Kecma homecfunac megboriu yaru medacfora yeneng Yesungo yoac ifi deec, imoc negensigec. Negensima mitikibiu yoac oho ohoya fede nga Yesuac yoac momoc negensinggegec.

²³ Anu Yesungo Yerusarennu makekenggac hombang naso femanu ihai kecma faka kuhagoc meu ngicngac homacngo hemma yeac kpara negensinggegec. ²⁴ Nga Yesu yenengenaoc ngicngac haifakangina hentegecdarecac amma ubakeraha mong mi edeyunuec.

²⁵ Imoc yofiac, ye yengenaoc ngic yeneac ubaherenginai wiac sasawa fede, imoc negenecac ngic monggac haniaac ngic mong mi kpесimie.

3

¹ Farisaiongic mong kpara Nikodemo, ye yudangic yeneac ngickiwa mong kefec. ² Nga yeng tofocnac dzongiau Yesuaru hama deec, “Rabbi, geng Anutuarunac mama kpoukpou ua mekecne, imoc negendimbe. Geng faka kuhagoc meanne, ua ifia ngic monggo Anutuya kpac kecma naric mi mebac.” ³ Ifi deu Yesungo yofi meremmic, “Foracngoc, ngic mong ye fingec fingec gboria mi fingerude, yeng Anutuac eucerereng naric mi henude, imoc edeguduae.”

⁴ Ifi deu Nikodemongo deec, “Ngic bic yadi yadiyang dafi monggoc fingerude? Ye nonggeaac heremanau naric mi enude nga monggoc naric mi fingerude.” ⁵ Nga Yesungo yofi meremmic, “Foracngoc, ngic mong ye dokuu nga Asuu gboria mi fingerude, yeng Anutuac eucererennu naric mi enude, imoc edeguduae. ⁶ Nga ngicfunac fingec fingera, yeng ngic siricngoc nga Asuunac fingec fingera, ye Asu siricngoc. ⁷ Ngeni fingec fingec gboriau fingecgecdeac edeguba mi kpidohona. ⁸ Firanggo yengena songo modacma kpeu udumenga negengannec. Nga ye dahacnac hade amma dahai kenunde, imoc ine mi negennec. Ngicngac Asuunac fingec fingera, yeni sasawango siricngina ifia.”

⁹ Ifi deu Nikodemongo meremmic, “Yoac sasawa denec, imoc dafi fingecdarude?”

¹⁰ Ifi deu Yesungo meremma yofi edeec, “Ge israengic yeneac kpoukpoung wiac imoc dafi mi negentegecnec? ¹¹ Foracngoc, neni wiac hengandimbe nga negengandimbe, neni imocac hepuc nga dedekperagingic amma dekperagingemmeandimbe, imoc edeguduae.

Anu ngeni yoac imoc mi mema honggeandae. ¹² Ni bangecac wicac yoac dema edengunuba ngeni mi negensinggegecde. Nga kurumenggac wicac edengunubadeu ngeni imoc dafi negensinggegecde? ¹³ Ngic mongngo kurumennu mi enec. Ngicac medac kurumennunac maec, ye mocgungo kurumennu enec.

¹⁴ Mosengo bangec kisiu boudzoc miaru nanec, ngic yeneng ifi isoc Ngicac Medac miacgec nambeso. ¹⁵ Anu ngicngac ye negensinggegecde, yeni sasawango kekecseri megecde. ¹⁶ Imoc yofiac, Anutungo bangectoa bangecfu ngicngac ngeneac noc isoc ammiecac Medaha mocgu faiu bangecfu maec. Imocac ngic mongngo ye negensinggeude, ye manganau mi kemeude yeng ine kekecseri meude. ¹⁷ Anutungo Medaha bangecnigc manganangina isinggema desiudeac sueu mi maec, kpac. Ye bangecnigc ebicfunac mesiyunu komoc kpegecdeac bangecfu sueu maec. ¹⁸ Amma ngic mong Medaha negensinggede, ye yoacfу mi faiude. Nga mong ye Anutuac Medaha mocguac kpara mi negensinggede, yeng ine mi negensinggeecac amma yoacfу bic makpeec.

¹⁹ Yoacninaac desi desiac hania imoc yofi, kperagingo bangecfu hau ngicngac angam-memengina manganaac amma kundunggac songo monggoc negemma kperagia wagec. ²⁰ Ngicngac faka mangana angandae, yeni fakangina mangana didiu mi fingectegerudeac sasawango kperagia ngadehema kperagia naric mi hagecde. ²¹ Nga ngic mong ye faka fora meande, yeng kperagia naric haude. Amma ye Anutuac kucfu uaya meande, imoc fingectegerude.”

²² Kecma Yesu nga medacfora Yudaia bangecfu kemma ihai yenigoc kecma ngicngac doku nadzicyemmegec. ²³ Naso imohai Saring taong wegenacfu Ainong taonnu doku homac feec. Imocac Yohane ye ifingoc ihai kecmanu ngicngac yearu kenggec yeng ifingoc doku nadzicyemmekefec. ²⁴ Faka imoc Yohane witicamau mi faimagec fingerec.

²⁵ Anu Yohane medacfora nga yudangic mong, yeni yuda yeneac dzuac dzuac fakang-inaac amma yoacngina engemmama anec. ²⁶ Anu medac yeneng Yohanearu kemma edegec, “Rabbi, ngic gegoc Yordang nobocgeng kefec geng yeac hania edenununec, yennoc ngicngac doku nadzicyemmeu sasawango yearu kendacdae.” ²⁷ Ifi degec Yohanengo yofi merengyemmeec, “Anutungo kurumennunac wiac mi miudeu ngicngi imoc naric mi meude. ²⁸ Ni Messia kpac. Ni ine yeac singwarac ambadeac Anutungo suenuu hayai. Imocacnoc bic edengunuai, ngeni dedena imoc negendaec hepucna naric anggecde.

²⁹ Ngic enembingeagoc yeng ngacfу kenude. Anu ngicac ogeango yeac enacfunac memeturanggac siduha negemma ubangerecta negenude. Nga ni ifi isoc yaguc ubangerec hafoangoc negenduae. ³⁰ Yeac kpacsiducngо yadiu neacngо mamea ambeso.

³¹ Wihacnac maec, yeng wiac sasawaac engenatoa ande. Nga ngic bangecfunac fingec finger, yeng bangecfunac, imocac amma bangecac yoac deude. Kurumennunac maecngо wiac sasawaac buma anec kecde. ³² Amma yeng wiac wi fede, imoc hennegeng angkefec, imocac hepuc amma dekperagiu ngic mongngo yeac yoac mi hoanggeude. ³³ Anu ngic mong ye yoac imoc mema hoanggeude, yeng Anutu ye fora, imoc deseruide.

³⁴ Anutungo ngic sueec ye Anutuac yoac deude. Imoc yofiac, Anutungo Tiri Asu hendzicma nobohasac kpeteagoc mema mi yemmeude, kpac. ³⁵ Manggacngо heregoc Medahaac songo negemma wiac sasawa mariau faiec. ³⁶ Imocac Medaha negensinggede, ye kekecserigoc kefude. Nga Medahaac yoac kpeude, ye kekec mi henu Anutuac turung ine yearu fekefude.”

4

¹ Farisaio yeni Yesuac yofi negenggec, “Yeng habu meyunuma doku nadzicyemmeu Yohaneac habu kpetea ferahede.” ² Nga Yesu yengenaoc ngicngac doku mi nadzicyemmeu medacfora yeneng doku nadzicyemmegec. ³ Nga Yesungo yoac ifi negemma Yudaia bangec wama Gariraia bangecfu monggoc dzigeneec.

⁴⁻⁵ Ihai kemma Samaria bangec ferecgeboso amma Samariaac taong mong kpara Sika, ihai kensikeec. Sika taong imoc Yakobongo medaha Yosefeac bangec desimiec, imocac

wegenac tarec. ⁶ Anu Yesungo Yakoboac dokuteng tarecfu, imohai sing kengkecma kuha kpac anu dokuteng imocac tegiau mama tarec. Tacmanu 12 kiroc isoc anec.

⁷⁻⁸ Anu medacfora yeni yaka bummegecdeac taonnu kemmagec samariangac mongngo doku fiudeac hau Yesungo yofi edeec, "Doku mehana neba." ⁹ Ifi deu ngacng deec, "Ge yudangicng dafi samariangac nearu dokuac denec?" Yudangicngac yeni samariangicngac yenigoc emenecngina mi feecac ngacng ifi deec.

¹⁰ Ifi deu Yesungo yofi edeec, "Ge Anutu haringaac hania nga merang dokuac kpesi-gende, imoc negentegecma kpesimibang debac yeng doku kekehagoc gembac." ¹¹ Ifi deu ngacng deec, "Kebu, ge doku finadeac wiacga kpac nga dokuteng imoc herea anu doku kekehagoc dahacnac finade? ¹² Bangecnina Yakobongo dokuteng yomoc menemmeec. Geng ye ferahenec me? Ye yengena nga medacfora amma ramaburumakafora, yeni doku yomohanac nekecgec."

¹³ Ifi deu Yesungo yofi meremmiec, "Ngicngac doku yomoc neandae, yeni sasawango dokuac monggoc ayemmeande. ¹⁴ Nga mong ye neng doku miba neude, yeng dokuac monggoc mi ammibesande. Nga doku mibade, imocng yearu dokukiwa sike sikea fingecma kekecseri maficgemiude." ¹⁵ Ifi deu ngacng deec, "Kebu, ge doku imoc nenna nema dokuac monggoc mi anembeso nga doku fibadeac yomohai monggoc mi habesare."

¹⁶ Ifi deu Yesungo yofi meremmiec, "Ge kemma ewega dena haec." ¹⁷ Ifi deu ngacng deec, "Ni ewena kpac." deu Yesungo yofi edeec, "Ni ewena kpac, ge fora denec. ¹⁸ Ge ngic 5 bic meyununec nga ngic yofinenggac mena ngerahafoc kecdape, ye geac ewega kpac." ¹⁹ Ifi deu ngacng deec, "Kebu, ge profete, imoc gentegecduae. ²⁰ Kisicfocnina yeneng tikibuma yomohai Anutu afehekecgec. Anu ngeneng yofi deandae, 'Yerusareng, imohaisac Anutu afehebesonga.' "

²¹ Ifi deu Yesungo yofi edeec, "Ngac negensinnuna, naso mong wegeneude, imohai ngicngac ngeneng tikibuma yomohai nga Yerusarennu Anutu monggoc mi afehegecde. ²² Ngeni wiac hania mi negentegecdae, imoc numumidae. Ebicfunac mesi mesi nga komoc kpegecdeac kuc, imoc yudangic neneearunac fingerec nga Anutu negengireckema numumima kecdimbe.

²³ Naso mong hama kecde nga bic hadac, imohai ine dedengerec ngicngac fora, yeni ongaasungina forango Manggac dengeregecde. Manggacng nunumu areng ifia yeneac negenu ngereeude. ²⁴ Anutu ye Asu. Imocac amma ngicngac dengerebesong dema ongaasungo nga faka forau dengerebisia." ²⁵ Ifi deu ngacng deec, "Messia, kpara mong Kristo deandae, ye fingerudeac dedea, imoc negenduae. Yeng hama wiac sasawa dekperaginemmeude." ²⁶ Ifi deu Yesungo yofi edeec, "Yoac edeguduae, imoc ni."

²⁷ Ifi demanu medacfora yeneng amaunac dzigene hagec. Hama Yesungo ngacgoc yoac denegeng anocac hemma kerectegec anggec. Amma mongngo yofi mi kpesimie, "Ge noc wicac kpesiminec me yegoc noc wicac dedape?" ²⁸ Anu ngacng Yesuac yoac negemma enanga wama amau dzigene kemma amafora edeyunuec, ²⁹ "Ngeni hama henggec. Ngic mong ni faka anai meai, imoc seng deficnudacde. Ye Messia gedang?" ³⁰ Ifi deu yeneng taong wama Yesuaru hagec.

³¹ Anu medacfora yeneng yaka neudeac yofi degec, "Rabbi, ge yaka nena." ³² Ifi degec yeng yofi edeyunuec, "Yaka fenende, imoc ngeni mi negendae." ³³ Ifi deu medacfora yenaocngoc denegeng amma degec, "Ngic mongngo yaka meha migec nedac gedang."

³⁴ Ifi degec Yesungo yofi edeyunuec, "Suenuec, yeac enac tofohoma uaya mekecma mesibade, imocng yakana ande. ³⁵ Ngeni yofi deandae, 'Afo 4 wisickeuguc semeng fora anude.' Neng yoac mong deba negenggec, ngeni kicngina firma uau henggec, yaka bic fora amma kpekpauc fede. ³⁶ Ifi anu heihomec nga kpememengic yeri yerahafoc ubangerec negeneccdeac kpememengicng uayaac bung mema kekecseriac fora ifingocmekpedzuc anude.

³⁷ Nga, 'Ngic mongngo wiac homeru mong ye fora mekpedzuc anude.' yoac ifi deandae, imocac foranoc fingecde. ³⁸ Ngic goa yeneng ua megec ua imocac fora fingerec.

Nga ngeni heihomec mi ammagec ni suengunuba fora mekpedzuc ambisia. Ngeneng yeneac ua torokpema tigec enec."

³⁹ Samariangacngo Yesuac yofi dekperagiyemmeec, "Yeng ni faka anai meai, imoc seng deficnudacde." ifi deecac taong imohacnac samaria ngicngac yenearunac homacngo Yesu negensinggegec. ⁴⁰ Imocac amma samariangicngac Yesuaru kemma yeng yenigoc kefudeac heitaigec. Heitaigec yeng negengyemmema wenac yohockang yenigoc kefec. ⁴¹ Yesungo ihai kecmanu homacngo yombong yeac yoacac amma negensinggema ⁴² ngac edegec, "Neni warac geac siducac amma negensinggeding. Nga yaguc nenaoc yeac enacfunac yoara negemma negensinggedimbe. Amma gennoc bangecngic sasawa neneac memengerec ngic, imoc negendimbe."

⁴³ Anu uameme yohockang wisickeu Yesungo Samaria bangec wama Gariraia bangecfu kenec. ⁴⁴ Ye ihai kemma yengenaac yofi dekperagiemeec, "Profete mongngo yengena bangecfu kefu ngicngac yeneng eweheihei mong mi ammigecde."

⁴⁵ Anu gariraiangic yeni makekenggac nasou Yerusareng taonnu kenggec Yesungo faka sasawa meu henggecac amma Gariraia bangecfu kenu amafora yeneng ubangerec-goc heitaigec. ⁴⁶ Heitaigec Yesungo Kana taong Gariraia bangecfu doku merennu waing anec, ihai monggoc dzigene kenec. Kenu ihai ngictauac kia mong haec, yeac medacngo Kafanaung taonnu hafei feec. ⁴⁷ Nga kiango Yesu Yudaia bangecfunac dzigenema Gariraia bangecfu hade, ifi negemma yearu kemma medaha mengereudeac edeec, nocac medaha homebeso anec. ⁴⁸ Ifi deu Yesungo yofi edeec, "Ngeni faka kuhagoc nga faka morora mi hemma eng mi negensinggegecde." ⁴⁹ Ifi deu kiango deec, "Kebu, ge bic hana, medacna homebeso ande." ⁵⁰ Ifi deu Yesungo yofi edeec, "Ge kenna, Medacga bic ngereedac kecde." ifi deu ngic ye Yesuac yoac negensinggema dzigene kenec.

⁵¹ Dzigene kememanungoc wanacngicfora yeneng hama sinnu meficgema edegec, "Medacga bic ngereedac kecde." ⁵² Ifi edegec, ye ngeree, imocac nasoyombonggac kpesiyemmeu yeneng degec, "Worang hadzing 1 kiroc, imohai sebia nomanedac." ⁵³ Ifi degec mamango negensiec, "Yesungo naso imohainoc suenuma dedac, 'Medacga ye bic ngereedac kecde.'" Ifi negemma siduc edeyunu ye nga wiacfura yeni Yesu negensinggegec. ⁵⁴ Yesungo Yudaia bangecfunac Gariraia bangecfu dzigene hama negensinggegecdeac faka kuhagoc meu imocngo naso yohockang anec.

5

¹ Imocac ngadeau yudangic yenang hombang mong hau Yesungo Yerusarennu enec. ² Emma Yerusareng taonnu nagutoa mong kpara Ramaac nagu, imocac nobohau dzohong mong feec. Imoc hebiraio yoacf Betesida deandae, imocac tegiau firangama 5 tackenec. ³⁻⁴ Anu firangama imocac manau ngicngac hafeinginagoc nga kicpisic amma goa hanimangang nga puringa ifia homacngo fekenggec, yeni doku kockpac anudeac tomai fegec. Imoc yofiac, naso goau Kebuac angero mongngo doku imohai haande. Hau doku kockpac anu mong ye waraima dokuu kemedo, yeng hafeia sasawa kpac angande.

⁵ Anu ngicngac fekenggec, yeneac botucfunac ngic mong puringa kefu kifa 38 bic anec, yeng ihai fekefec. ⁶ Nga naso herea ihai fekefec Yesungo hemma imoc negemma yofi kpesimie, "Ge ngereebeso anggende me?" ⁷ Ifi deu puringngo meremmiem, "Kunenna, doku kockpac ammanu merac ngicngko meficnuma dzohonnu fainubac. Ni kemebeso ambare mongngo hefacnuma kemeande." ⁸ Ifi deu Yesungo yofi edeec, "Ge yacma fefega mema kenna." ⁹ Ifi deu ngic ye naso imohaingoc sebia ngeree yacma fefea mema kenec.

Nga naso imoc ine sabata naso anec. ¹⁰ Anu yudangic yeneng ngic ngeree hemma edegec, "Yaguc sabatanasou fefega mema kenna, imoc singng mi dede." ¹¹ Ifi degec merengyemmeec, "Ngic mengerenudac, yeng suenuma dedac, 'Ge fefega mema kenna.'" ¹² Ifi deu kpesimigec, "Merac ngicngko fefega mema kenna." dedac? ¹³ Nga ngic ngeree ye merang mengereec, imoc mi negenec nocac Yesungo ngichabutoa nanggecac, ihai kemma kperucgeec.

¹⁴ Anu imocac ngadeau Yesungo ngic imoc womong manau meficgema yofi edeec, “Ge sebiga bic ngereedac. Nga ebic mong kunengngoc fingeckembacac kopocsic monggoc mi meficgebesena.” ¹⁵ Ifi deu ngicngo kemma yudangic edeyunuec, “Ngic mengerenudac, imoc Yesu.”

¹⁶ Yesungo sabata nasou ua ifia mekefecac yudangic yeneng ngaba seria ammigec. ¹⁷ Yesungo yofi merengyemmeec, “Mannango uaya mehakefec nga yofinenggac medengoc imocac amma neng ifingoc ua mekecduaengoc.” ¹⁸ Ifi amma Yesungo sabatanasoac singyoac memanganeec nga torokpema Anutuac Manna dema ye isocngoc anec, imocac amma yudangic herengina monggoc yaru Yesu kpehomebeso anggec.

¹⁹ Ifi anggec Yesungo yofi merengyemmeec, “Foracngoc, Mamango ua mong meu Medacngo imoc hemma yengenaoc ua imocsac naric meude, imoc edengunuduae. Mamango ua mede, Medahango ua imocngoc meude. ²⁰ Imoc yofiac, Manggac ye Medaha songogoc hoanggema ua mede, imoc sasawa edzahekecde. Nga ua sasawa meu hengandae, imoc engenatoa edzaheu meu ngeni imoc hemma kerectegec anggecde. ²¹ Manggacngo ngic homemea midiyunuma megboriyunukecde, ifi isocngoc Medacngo ngic megboribeso negemmiu ngeree megboriude. ²²⁻²³ Manggacngo ngic angammemengina mi desiude, kpac. Ngic sasawango Manggac eweheimianda, ifi isoc Medac eweheimigecdeac yeng desi desiuia Medahaac mariu faidarec. Nga ngic mong ye Medahaac eweheihei mi ammiande, yeng Manggac sueec, ye ifingoc eweheihei mi ammiude.

²⁴ Foracngoc, ngic mong ye neac yoac negemma Manggac suenuec, ye negensinggeude, yeng kekecsrigoc kecma yoacf mi enude, imoc edengunuduae. Yeng homec wama kekecfu bic endac. ²⁵ Foracngoc, ngicngac bic homegec, yeneng Anutuac Medacac ubaudumeng negemma kekec megecde. Naso imoc haude nga yaguc bic hadac, imoc edengunuduae. ²⁶ Manggac yengenaaru kekec fede, siriha imocngoc yeng kekec Medac miu Medacaru ifingoc kekec fede. ²⁷ Nga Medaha ye Ngicac Medac, imocac amma Manggacngo ngic isingyunuma desiyunuudeac kuc miec.

²⁸⁻²⁹ Ngeni yoac imocac kerectegec mi ambisia. Imoc yofiac, ngicngac kicsereu fedae, yeni sasawango naso mong hau ubaudumenga negemma kicsereunac eregecde. Faka gombunga angkecma homegec, yeni kekec megecdeac yacgecde. Nga faka mangana angkecma homegec, yeneng yoacf nanggecdeac yacgecde. ³⁰ Ni wiac mong neanna ubaac naric mi mebade, kpac. Ni wiac kedzacnango negemma negenganduae, imocac siriha fakangina isinggema desibade. Neanna songo mi modacanduae, kpac. Suenuec yeac songo modacbade. Imocac amma neac desi desiuango dindingac ande.

³¹ Ni neannaoc haniana dekperagibadeu dedekperagina imocngko fora mi anude, kpac. ³² Mongngo neac hepuc amma haniana dekperagiande. Nga yeng neac hanianaac wiac dekperagiande, imocngko fora ande, imoc negenduae.

³³ Anu ngeni ngic goa sueyunugec Yohanearu kenggac, yeng yoac foraac hepuc amma imoc dekperagiyemmeec. ³⁴ Ngic mongngo neac dedekperagi naric mi deude, kpac. Ngeni ebicfunac mesingunuba komoc kpegecdeac yoac yomoc edengunuduae. ³⁵ Yohane ye siriha yofi, kifa mong dzema mekperagingunuande, ye ifi isoc anec. Mekperagingunu ngeni naso wegenanec kperagi imocac songo negemma kperagia imohai kecgec.

³⁶ Ni neannaoc dedekperagi metacduae, imocngko Yohaneac dedekperagi ferahede. Nga Manggacngo uaya mema mesibadeac nenec. Amma ua mekecduaengo hepucna amma Manggacngo suenuec imoc dekperagiude. ³⁷⁻³⁸ Amma Manggac suenuec, yennoc hepucna amma haniana bic dekperagie. Ye ngic sueu ngeneng ye mi negensinggedae amma Manggacac ubaudumeng mi negemma yengena dafia mi henggec nga enacyoarango ubaherengina mi fede. ³⁹ Mitikibingo kekecseri meficgengemmude, ngeni ifi negensinggema kibi imoc osonegeng angkecdae. Kibi imocngonoc neac hepuc amma neac hania dekperagiude. ⁴⁰ Nga ngeni ine nearu hama kekec megecdeac mi angemmede.

⁴¹ Ni ngic yeneac dedengerec mi hoanggebade, kpac. ⁴² Nga Anutuac songo imoc ngeneac ubahereu mi fede, imoc negenduaengoc. ⁴³ Nga ni Mannaac kpacfua haba ngeni mi hoannuggecde. Nga ngic mong yengena kpacfua haudeu ngeni ye bic hoanggegecde.

⁴⁴ Ngeni ngenaocngoc dengereemema Anutu mocgu yearunac dedengerec haande, imocac mi angemmeudeu ngeni ye negensinggegecdeac obohogecde. ⁴⁵ Neng kecma Manggacaru yoacfua faingunubade, ngeni ifi mi negembisia. Ngeni Mosearu heirima kecgec yeng yoacfua faingunuude. ⁴⁶ Mosengo neac negemma ohoec. Imocac amma ngeni imoc negensinggebau dede ni ifingoc negensinnubau. ⁴⁷ Ngeni Moseac mitikibi mi negensinggedaeu neng yoac deduae, imoc ifingoc naric mi negensinggegecde.”

6

¹ Yesungo yoac imoc dedacma Gariraia dzohongtoa, imocac kpara mong Tiberia dzohongtoa, imoc ferecgema edibigeng enec. ² Nga yeng hafeigoc yenearu faka kuhagoc meu ngicngac yeneng imoc henggecac amma ngicngac habutoango ye modacgec. ³ Modacgec Yesungo medacfora yenigoc tikibumau emma tacgec. ⁴ Anu yudangic yeneac makekeng hombang naso wegeneec.

⁵ Nga Yesungo kic fiu kenu ngicngac habutoango kuting kuting yearu kenggec, yenemma Firipo yofi kpesimiec, “Nenang yaka dahacnac bummema ngicngac habutoa yomoc yemmeni negecde?” ⁶ Yeng noc faka meude, imoc bic negemma Firipo eng tobanggema kpesimiec. ⁷ Kpesimi Firipongo meremmiec, “Nenang afo 8ac uabung, imocac socfu yaka bummema hesisicke yemmeni yeneacsoc mi anude.”*

⁸ Ifi deu medacfora yeneac botucfunac Anderea, Simong Petoroac muneango deec, ⁹ “Medacbisis mong yei nande, ye ic sogong 5 bari gbomeango memea† nga kondungyang yohockang mekecde, imocngo ine habutoa dafi yemmeni sokoyunuude?”

¹⁰ Ifi deu Yesungo yofi deec, “Ngeni ngicngac matacgecdeac edeyunugec.” Ifi deu edeyunugec kpindzingtoa feec, imohai matacgec. Ngic tacgec, yeneac kpetengina 5 tauseng isoc anec. ¹¹ Tackenggec Yesungo ic sogong imoc mema Anutu ubangerec edema mederema ngicngac ihai tacgec, yeni yemmeec. Yemmeu wisikeu kondungyang ifingoc mema medereu songonginaac areng menec anggec.

¹² Negec gebecyuuuu Yesungo medacfora yofi edeyunuec, “Yaka tosea neti anggec fema manganebacac ngeni imoc kpedzucnedacgec sakacfua kemedaru.” ¹³ Ifi deu yeni ic sogong 5 bic negec, imocac tosea kpedzucnedacgec kemema sakac 12 wakeec.

¹⁴ Wakeu ngicngac yeng faka kuhagoc meec, imoc hemma degec, “Foracngoc, ngic yocnoc profete bangefua haudeac dedea.” ¹⁵ Nga ngic yeneng hama Yesu mendanggema ngictaungina faibesonga degec Yesungo negengyemmemma meickema monggoc tembuha tikiu enec.

¹⁶ Enu ama kundung kpemanu medacfora yeni dzohongtoa tegiau kemegec. ¹⁷ Kememagec ama kundung kpeu Yesungo yenearu mi hamanu yenaocngoc gombau emma dzohongtoa ferecgema Kafanaung kembesonga kenggec. ¹⁸ Kememagec firangtoa kpeu dzohonggac tempong kuneng yarec. ¹⁹ Nga yeni 5 me 6 kiromita, imocacsoc puri kpema kememagec Yesungo doku witiau titi kemema gomba mewegeneu yeni hemma kengec anggec. ²⁰ Ifi anggec ine Yesungo yofi edeyunuec, “Imoc ni, neannaoc haduae, ngeni kengec mi anggec.” ²¹ Ifi deu negemma Yesu gombau taiembeso ammagem gombango bangec kembeso degec, imohai bic kensikeec.

²² Wereckengau ngicngac habutoa yeneng dzohong noboc namma degec, “Gomba mocgungosac yoc taru hending. Nga Yesungo ine medacfora yenigoc imohai mi enu yeni tembuengina emma kendau.” ²³ Ifi dema nammagec gomba goa Tiberia taonnunac kemema, Kebungo Anutu dangge dema ic sogong gumecyuuuecfu, ama imoc mewegenema hagec. ²⁴ Hama yeni Yesu nga medacfora ihai mi yenenggecac habutoango Yesu hofobesonga Kafanaung taonnu kenggec.

* 6:7: Ye denari 200 deec. † 6:9: Bari flawa imoc wit flawa siriha ifia.

²⁵ Hofocma dzohong edibigeng kemma meficgema kpesimigec, “Rabbi, ge noc nasoac yei hadang?” ²⁶ Ifi degec Yesungo yofi edeyunuec, “Foracngoc, neng faka kuhagoc meba hendau, imocac amma mi hofocnudae, imoc edengunuduae. Ngeni yaka negebek andauac hofocnudae.” ²⁷ Yaka mong hoaema kpac angande, ngeni imocac uatoa mi mebisia. Nga Ngicac Medacngo kekecseriac yaka ngemmeude, imocac uatoa mebisia. Imoc yofiac, yeac witiu Anutu Manggacngo yengena dedeseriac dzic faiec.”

²⁸ Ifi deu yeni kpesimigec, “Anutuac ua mebeso dema noc ua meni ngereeude?” ²⁹ Ifi degec turunga yofi merengyemmeec, “Anutuac ua yomocnoc. Anutungo ngic sueu haec, ngeni ye negensinggegec.”

³⁰ Ifi deu yeneng degec, “Hemma negensinggunideac noc faka kuhagoc menade nga ge noc ua naric menade? ³¹ Kisicfocnina bangec kisiu mannayaka[‡] nekecgec, imocacnoc yofi oho ohoya fede,

‘Ye kurumennunac yaka yemmeu negec.’” (*Makekeng 16:4; Nehemia 9:15; Mitiyegec 78:24*)

³² Ifi degec yofi edeyunuec, “Foracngoc, Mose ye yengenaoc kurumenggac yaka mi mema ngemmeec, imoc edengunuduae. Mannango kurumenggac yaka fora ngemmeude. ³³ Anutuac yaka, ngic yennoc kurumennunac mama bangecngic yeneac kekec meficgewayemmeude.”

³⁴ Yeng ifi deu degec, “Kebu, ge yaka imoc nasosoc nemmektebesena.” ³⁵ Ifi degec Yesungo yofi edeyunuec, “Ni neannaoc yaka kekehagoc, imocac ngic mong ye nearu haude, yeng yakaac mi homeude nga mong ye ni negensinnuude, yeng dokuac monggoc mi ammiude. ³⁶ Neng ine yofi bic edengunuai, ngeni bic nenggec nga sifu mi negensinnuandae. ³⁷ Mannango ngicngac sasawa nenec, yeneng nearu hagec ngadeau naric mi kisangyunubade. ³⁸ Ni neanna ubanaac kurumennunac mi mayai. Suenuec, yeac negen negeng modacbadeac mayai. ³⁹ Nga suenuec, yeac songo nga negen negeng yofi, ye yengenaoc ngicngac nenec, yeni marina titingaunac mi mabisia nga yeni kecma naso wisic wisickeau midiyunuba yacdacgecede. ⁴⁰ Mannaac negen negeng imoc yofi, ngicngac Medaha hemma negensinggegecede, yeni sasawango kekecseri megecede. Nga naso wisic wisickeau neng midiyunubesanduae.”

⁴¹⁻⁴² Nga yeng yofi deec, “Ni neannaoc yaka fora amma kurumennunac mayai.” Imocac amma yudangic yeneng negenggec naric mi anu degec, “Ngic yomoc Yesu, i. Ye Yosefeac medac nga neni nonggomama negengyurudimbe. Ammanu yeng dafi yofi dede, ‘Ni kurumennunac mayai.’” ⁴³ ifi degec Yesungo yofi deec, “Ngeni negemmangang wagec.

⁴⁴ Mannango ngic mong mi heitaiudeu yeng nearu naric mi haude. Manggac suenuec, yeng ngicngac heitaiunuec nga neng naso wisic wisickeau midiyunubesanduae.

⁴⁵ Profete yeneac kibiu yoac yofi oho ohoya fede,
‘Anutungo kpouyemmedarec.’

(*Yesaia 54:13*)

Imocac amma ngicngac sasawa Manggacac yoacf u kedzac faima yearunac negen negeng medae, yeneng nearu hadacgecede. ⁴⁶ Ngic monggo Manggac mi henec, kpac. Ngic mocgungo Manggacgoc kefec, yeng Manggac henec. ⁴⁷ Foracngoc, ngic monggo ye negensinggede, yeng kekecserigoc anude.

⁴⁸ Ni neannaoc kekecac yaka. ⁴⁹ Kisicfocnina yeneng bangec kisiu mannayaka[§] nema homedacgec. ⁵⁰ Ngeni yaka kurumennunac maec, yocnoc nema mi homegecede. ⁵¹ Ni neannaoc yaka kekehagoc amma kurumennunac mayai. Ngic mong ye yaka imoc neudeu ye kekecseri meficgema kechereema kefude. Yaka imoc fusina. Ngicngko kekec meficgegecdeac yemmebade.”

⁵² Ifi deu yudangic yoacngina manganeu degec, “Ngic yomoc ye dafi sebfusia nemmeu nenideac dede?” ⁵³ Ifi degec Yesungo yofi edeyunuec, “Foracngoc, ngeni Ngicac Medac sacfusia mi negecdeu kekecngo ngenearu mi feude, imoc edengunuduae. ⁵⁴⁻⁵⁵ Imoc

[‡] 6:31: Anutungo bangec kisiu yaka mong meficgewayemmeu asoacsoc sobing isoc kpedzucnekecgec, imoc kpara mannayaka [§] 6:49: Anutungo bangec kisiu yaka yemmekefec, imoc asoacsoc sobing isoc bangecfu fingekefu ngicngac yeneng imoc kpedzucnema nekecgec, imoc kpara mannayaka.

yofiac, neac fusi, imocngo yaka fora nga neac sac, imocngo doku fora, imocac amma ngic mong ye sacfusina neude, yeng kekecserigoc anu neng naso wisic wisickeau ye megboribade.⁵⁶ Anu mong ye neac sac nga fusi neude, yeng neac heremanau kefu neng yeac heremanau kecbade.⁵⁷ Manggac suenuec, ye kekec mingina nga ni yeac amma kecduae. Nga mong ye fusina neude, ye ifi isocngoc neac amma kefude.⁵⁸ Yaka yomocngo kurumennunac maec kecde, imoc bangecfocniango yaka nema homegec, ifi isoc kpac. Mongngo yaka yomoc neude, yeng kecma kekecseri meude.”⁵⁹ Yesungo yoac imoc Kafanaung kpekpeturang amau ngicngac edekpou ayemmeec.

⁶⁰ Ifi deu negemma medacfora yeneearunac homacngo degec, “Kpoukpou imoc ebihagoc, mongngo imoc negemma naric mi modarude.”⁶¹ Ifi degec Yesungo edekpou ayemmeu medac yeni yoac homac osogecac yengenaoc negengyemmema yofi edeyunuec, “Yoac imocngo memanganengnude me?”⁶² Nga Ngicac Medac ye warac kefecfu dzigene enu ngeni imoc hemma dafi anggecde?⁶³ Asungo kekec meefaiude nga sebiac kekec, imocngo memefiha kpac. Ni yoac edengunudua, imoc Asu nga kekec.⁶⁴ Anu ngeneac botucfunac goango ine yoacna mi negensinggedae.” Imoc yofiac, ngicngac damoc yeneng ye mi negensinggegec nga ngic merang Yesu doc mema ngaba yeneac mariu faiude, Yesungo imoc bic negenec.⁶⁵ Ifi anu yofi torokpeec, “Ngic goa ngeneng mi negensinggedae, imocac amma waraima bic edengunudua, Manggacngo ngic mong mi meefaiudeu, yeng nearu naric mi haude.”

⁶⁶ Ifi deu medac homacngo Yesu wama amanginai kemma yegoc monggoc mi yerecgegec.⁶⁷ Kenggec Yesungo medacfora 12 yofi kpesiyemmeec, “Ngeni ifingoc wanuma kembeso angemmede me?”⁶⁸ Ifi deu Simong Petorongo yofi meremmiec, “Kebu, gearu kekecseriac yoac fora fedeac neni ngic monggaru naric mi kennide.⁶⁹ Neni bic negentegegecma negensinggudimbe, genoc Anutuac Kpetiacngic.”

⁷⁰ Ifi deu Yesungo yofi deec, “Neng medac 12 meisingngunuai nga ngeneearunac ine mongngo hadehade ande.”⁷¹ Ye yoac imoc Simong, Karioto taonnunac yeac medaha Yudaac negemma deec. Ngic imocngo medac 12 yeneearunac amma yeng Yesu doc meudeac anec.

7

¹ Imocac ngadeau yudangic Yudaia bangecfu kecgec, yeni Yesu kpehomebesonga sing hofogcgec. Imocac amma yeng ihai mi kengha amma Gariraia bangecfu yerecgema kefec.² Anu yudangic yeneac bedzo 40ac hombang wegene haec.*³ Nga Yesu munafora yeneng edegec, “Ge bangec yomoc wama Yudaia bangecfu kemma fakaga imoc ihai mena medacfocga henggecde.⁴ Mong ye habu yeneac kicfu fingecbeso negende, ye sufufuu ua mi mebeso. Ge fakaga imoc annadeu ngicngac yeneng fakaga hentegecgecdeac didiu kecma mebesena.”⁵ Nga munafora yeneng ifingoc ye mi negensinggegec.

⁶ Ifi anggec Yesungo yofi edeyunuec, “Neac naso mi hadac nga ngeneac naso, imoc ine nasosoc feude.⁷ Ngicngac yeni ubango naric mi ukungunugecde. Nga neng ine angammemengina mangana dekperagianduaec ubango ukunugec.⁸ Ngeni hombannu kenggec nga ni ine bic mi kembade nocac neac nasoyombong mi ande.”⁹ Ye ifi dema wama Gariraia bangecfu tarec.

¹⁰ Taru munafora hombanggac kemmagec ye ifingoc kemma fingectegecma mi keng keng sufufuu kenec.¹¹ Ifi anu yudangic yeneng hombannu Yesu hofocma kpesiemegec, “Ngic imoc dahai?”

¹² Kpesiemegec ngicngac habutoango yeac sangic kpema homac denegeng amma degec, “Ye ngic gombunga.” ifi demagec goa yeneng degec, “Kpac, ngic imocngo ngicngac habutoa ikoc ayemmeande.”¹³ Amma yudangic yeneac kengcyunuui mongngo Yesuac yoac didiu mi deec.

* ^{7:2:} Hombang imoc Anutungo bangec kisiu kifa 40 garengyunuu bedzonginai kecgec, yeni imoc negensima hombanga tacandae.

¹⁴ Anu hombang imoc bic dzonginemanu Yesungo womonnu emma ngicngac edekpou ayemmeec. ¹⁵ Kpouyemmeu negemma yudangic yeneng kerechtegec amma degec, “Ngic imoc ye dafi, ye negen negeng mong mi mema sifu mitikibiu yoac oho ohoya fede, imoc negende.” ¹⁶ Ifi degec Yesungo yofi merengyemmeec, “Ni yoac kpoungemmeduae, imoc neanna yoac kpac. Imoc suenuec, yeac yoac. ¹⁷ Ni yoac kpoungemmeduae, imoc Anutuarunac me neanna ubanaac deduae, imoc ngic mongngo Anutuac enac tofohobeso negende, yeng negentegerude. ¹⁸ Ngic mong ye ubeaac yoac deande, ye yengena dedengerec fingerudeac negensima imoc deude. Nga mong ye ngic sueec, yeac dedengerec fingerudeac ua meande, yeng ngic fora, yearu faka dindingac fede. Faka segesegea yearu mong mi fede.

¹⁹ Mosengo dedeseriyoac ngemmeec, fora. Nga ngeneearunac ngic mongngo imoc ine mi modackecde, kpac. Amma ngeni nocac nuhomebeso negendae?”

²⁰ Ifi deu habutoa yeneng merenggec, “Ge yafinggagoc. Merang gubeso dede?” ²¹ Ifi degec Yesungo yofi edeyunuec, “Ni faka kuhagoc meba ngeni henggecac sasawango kerechtegec andae. ²² Negenggec, Mosengo ngeni sebi tosangina, imoc heregegecdeac uayoac ngemmeec. Mose ye yengenaoc imoc mi hanahemanu yeac bangecfora yeneng ine hanahegec. Imocac amma ngeni faka imoc modacma sabata nasoungoc ua imoc megecde. ²³ Amma ngeni Moseac dedeseriyoac mi ferahegecdeac sabata nasoungoc ngic yeneac sebi tosangina herecgeandae. Ngeni faka ifia mekecdaeu neng sabata nasoungoc mong sebia hafoangoc mengerebare nocac ngaba anendae? ²⁴ Ngeni kicnginango sebiu heheng imohai mi isingga debisia. Ngeni ine yoac dindingac negengising amma debisia.”

²⁵ Ifi deu Yerusareng taonggac ngic goango kpesiemegec, “Ngic imoc kpehomebeso dedae me? ²⁶ Nga ngic ye yoac didiu demanu nocac turunga mong mi merendae? Yeni ye Messia, imoc bic ireckedae gedang. ²⁷ Nga Messia haudeu ye dahacnac haude imoc ngic mongngo mi negenude nga ngic yoc ye dahacnac, imoc ine negendacdime.”

²⁸ Ifi degec Yesungo imoc negemma womong manau namma yoac kucgoc dema yofi edekpou ayemmeec, “Ngeni ni negennuma dahacnac hayai, imoc negendaengoc. Ni neanna negen negennu wiac mong mebesonga mi hayai. Suenuec, yeng fora anu ngeneng ye mi negendae. ²⁹ Nga suenuec, ye negemmiduae, nocac yearunacnoc hayai.”

³⁰ Ifi deu yeni mendanggema witicamau faibesonga negenggec. Nga nasoya mi haecac mongngo mi kpeserema megec. ³¹ Nga habutoa yeneearunac ngicngac homacngoc ye negensinggema degec, “Messiango haude, imohai yeng faka kuhagoc meude, imoc ngic yocngoc faka kuhagoc homacngoc meande, imoc mi ferahema meude.”

³² Habutoa yeneng ifi dema sangicfu yoac denengeng anggec. Anggec farisaio yeneng imoc negemma womong gareng enarafocngina yenigoc kpedzucinema keracnatang sueyunugec Yesu mendanggema witicamau faigecdeac kenggec. ³³ Ifi anggec Yesungo yofi deec, “Ni naso wegenanecsac ngenigoc kecbade. Kecma suenuec, yearu monggoc dzigenema embade. ³⁴ Ngeni ni hofocnubibiema naric mi meficnugede nga ni kembade, imohai ngeni naric mi hagecde.”

³⁵ Ifi deu yudangic yenaocngoc denegeng amma degec, “Ngic yomoc ye dahai kenu hofocma mi hennideac dede. Ye arengfocnina grik bangecfu sinsasarang kpema kecdae, ihai gedang kemma grikngicngac yoac edekpou ayemmeude. ³⁶ Ngeni ni hofocnubibiema naric mi meficnugede nga ni kembade, imohai ngeni naric mi hagecde. Yoac imocac hania mi negentegecdimbe.”

³⁷ Hombang wisic wisickea, imocac nasoyadau Yesungo mama yoac kucgoc yofi deec, “Ngic mong ye dokuac homeandeu ye nearu naric hama nebeso. ³⁸ Nga mongngo ni negensinnude, yeacnoc mitikibiu yofi oho ohoya fede, ‘Yeac hereunac kekecac dokukiwa tohoma kenude.’” ³⁹ Ngicngac ye negensinggema kecdae, yeneng Tiri Asu ngade megecde, imocac ifi deec. Yesungo naso imohai kurumennu emma kuc nga kibikperagiagoc mi anecac amma Asu imoc mi yemmeyemmea.

⁴⁰ Anu ngicngac habutoa yeneng yoara imoc negemma goango degec, “Ngic yomocngo profetenina fora yombong.” ⁴¹ Amma goa yeneng degec, “Ngic imoc ye Messiah.” nga goa yeneng degec, “Kpahac, Messiango Gariraia bangecfunac mi haude.” ⁴² Mitikibiu yoac yofi oho ohoya fede, “Ye Dawidiac dzominga Beterehennunac, imoc Dawidiac ama yombong.” ⁴³ ngic yeni ifi dema Yesuac amma tohoemmegec. ⁴⁴ Tohma goango ye mendanggema witicamau faibesonga, ifi degec amma mongngo ine sebiau mi kpesereec.

⁴⁵ Keracnatang yeni womong gareng enara nga farisaio yenearu eng dzigenema kenggecac kpesiyemmegec, “Ngeni nocac Yesu mi mehadae?” ⁴⁶ Kpesiyemmegec degec, “Ngic mongngo yoac ifia deu mi negenning.” ⁴⁷ Ifi degec farisaio yeneung merengyemmegec, “Ngeni ifingoc yeac ikocfu makpedau me? ⁴⁸ Enarameme nga farisaio neneac botucfunac mongngo ye naric mi negensinggedimbe, kpac yombong. ⁴⁹ Nga sicsauc areng yomocngo dedeseriyoac mi negentegecdae, ngeni sowec medae.”

⁵⁰⁻⁵¹ Ifi degec, yeneearunac mong kpara Nikodemo, ye warac Yesuaru kenec, yeng yofi deec, “Dedeseriyoacniango yofi dede, ‘Ngic monggac yoara nga angammemea mi hennegeng amma isinggema tactacngoc yoacfum faibesonga.’” ⁵² Ifi deu turunga yofi meremmigec, “Ge ifingoc Gariraia bangecfunac me? Mitikibiu hennegeng amma yofi bic hennade, profete mongngo Gariraia bangecfunac mi fingerude.” ⁵³ Ifi dema yacma amanginasoc kendacgec.

8

¹⁻² Yesungo oriwa tikiu emma taru ama wereckembeso ammanu mama monggoc Anutuac womonnu enec. Enu ngicngac yearu hadacgec tacma miti kpouyemmeec.

³ Ifi amma tacmanu mitiac negen negengngic nga farisaio yeneng ngac mong sero anu hemma Yesuaru mehama kicnginai faigec nanec.

⁴ Nanu Yesu kpesimigec, “Kpoukpou, ngac yomocngo sero kicninau anu hending.

⁵ Nga dedeseriyoacfum Mosengo ngac ifianoc hocngo yenerehomenideac deserinemmeec. Geng yaguc dafi denec?” ⁶ Yeni Yesungo yoac mong dafi deu negemma yoacfum faini dema fuitobang ammigec.

Ifi ammigec Yesungo ngonducnema gbongango bangecfu kibi ohoec. ⁷ Ohoma nammanu kpesima kpesi anggec kpehengaima yofi edeyunuec, “Ngenearunac ngic mong kopocsiha kpac kecde, yeng waraima hoc ukuu ukubisia.” ⁸ Ifi dema monggoc ngonducnema bangecfu kibi ohoec. ⁹ Anu yeni Yesuac yoac imoc negemma kifanginaac sirihau yadango waraima Yesu wama kendacgec ngac ye botucnginai tembuha nanec.

¹⁰ Ifi nanu Yesungo kpehengai hemma yofi kpesimie, “Ngac, ngic yeni dahai kendau? Ge manganaac areng, imoc mong dedau me?” ¹¹ Kpesimi deec, “Kebuna, kpac.” Ifi deu Yesungo yofi edee, “Neng ifingoc ge mangana areng mi debade. Ge kemma kopocsic monggoc mi meficgesena.”

¹² Yesungo monggoc torokpema yoac yofi edeyunuec, “Ni banjectoa bangec imocac ngicngac ngeneac kperagi. Mong ye ni modacnude, yeng kundunggac sing mong mi modarude. Amma ye kekecac kperagi kefude.” ¹³ Ifi deu farisaio yeneng merenggec, “Ge geanggaocngoc dekperagiemenec, imoc singng mi dedeac yoacga fora mi ande.”

¹⁴ Yesungo meremmma yofi edeyunuec, “Ni neannaocngoc haniana dekperagiemeduae, imoc fora. Ni dahacnac hayai nga dahai kembade, imoc neannaoc negenduae. Ngeni ine dahacnac hayai nga dahai kembade, imoc mi negendae. ¹⁵ Ngeni bangecngic siricnginai ngicngac fakangina isinggema haniangina deandae. Neng ngic mong isinggema hania dede ua mi mebade. ¹⁶ Ni tembuca ua imoc mi mekecduae. Manggac suenuec, yegoc ua mekecdipe. Imocac neng desi desia meduae imocngoc foragoc ande.

¹⁷ Dedeseriyoacnginai yoac yofi oho ohoya fede, ‘Ngic yohockang dedengira mocgu anu yoacngira fora anude.’ ¹⁸ Imocac amma neannaocngoc dekperagiemeba Manna suenuec, yeng ifingoc hepucna amma dekperaginuude.”

¹⁹ Ifi deu farisaio yeneng kpesimigec, “Geac Mangga dahai kecde?” degec Yesungo meremma yofi edeyunuec, “Ngeni ni mi negennudae nga Manna ifingoc mi negem-midae. Ngeni ni negennubau debac Manna ifingoc negemmibau.” ²⁰ Yoac imoc, womonggac mana monnu soikia katapa tarecfu, imohai ngic edekpou ayemmeec. Nga ngic mongngo mendanggema witicamau mi faigec nocac ye ifi ammigecdeac naso mi anec.

²¹ Amma Yesungo monggoc yofi edeyunuec, “Ni komba ngeni hofocnuma kopocsicng-inagoc kecma homegecde. Nga ni kembade, imohai ngeneng naric mi hagecde.” ²² Ifi deu yudangic yeneng degec, “Ni kembade, imohai ngeni naric mi hagecde. Ye nocac ifi dede? Yengena sebia eweude me?” ²³ Ifi degec yofi edeyunuec, “Ngeneng emu bangecfunac nga ni bangecfunac kpac, ni wihacnac. ²⁴ Imocacnoc edengunuduae, ngeni kopocsicnginagoc kecma homegecde. Ngeni ‘ni kecduaengoc’, imoc mi negensinggedaeu kopocsicngina fekefu homegecde.”

²⁵ Ifi deu kpesimigec, “Anu ge merac?” degec yeng yofi edeyunuec, “Ni haniana bic edengunudua. ²⁶ Ni ngeneac haifakangina homac hennegeng amma isingga desibadeac fede. Anu suenuec, ye yoac foraac mingina nga wiac yearunac negenduae, imoc bangecfu dekperagibade.”

²⁷ Yesungo Mamaac negemma edeyunuuu yeni obohogec. ²⁸ Obohogec Yesungo yofi edeyunuec, “Ngeni Ngicac Medac nanggegec nanude, ngeni naso imohai ‘ni kecdu-aengoc’, imoc negentegecgecde. Ni wiac mong neannaoc mi angkecduae, Mannango kpounenec, imoc debade. ²⁹ Suenuec, yeng nigoc kecde. Ni yeac songo modacma ua mekecduae. Imocac amma ye wanuu tembcna mi kecbade.” ³⁰ Yesungo yoac ifi deu ngicngac homacngo ye negensinggegec.

³¹ Yesungo yudangic ye negensinggegec, yeni yofi edeyunuec, “Ngeni neac yoac hoanggema kecgecdeu neac medacfocna fora anggecde. ³² Ifi amma yoac fora negentegecgecde nga yoac forango witicfunac yungecngunuude.” ³³ Ifi deu meremmiigec, “Neni Abrahanggac kisicfunac, mongngo wanac mi menunuec. Nga merang wanac menunuec geng yungecnununadeac denec?”

³⁴ Ifi degec Yesungo yofi deec, “Ni fora yombong edengunuba, mongngo kopocsic meande, ye kopocsicngiha kecde. ³⁵ Wanac meu kecande, ye ama imocac manau hombonanga naric mi kefude. Nga Medacngiha am imocac manau hombonanga kefude. ³⁶ Imocac Medacngiha yungecngunuudeu ngeni witicngina kpac kecgecde. ³⁷ Ngeni Abrahanggac kisicfora, imoc negenduae. Neac yoacac titinga mong ine ngeneac ubahereu mi nandeac nuhomebeso efaidae. ³⁸ Ni Mannaac hoannu kecma wiac hennegeng anai, imocnac edengunuduae. Nga ngeni ine mangnginaarunac wiac nga faka negengandae, imocnac amma kecdae.”

³⁹ Ifi deu degec, “Neneac mannina Abrahang.” degec Yesungo yofi merengyemmeec, “Ngeni Abrahanggac nambaracfora ambau debac yeac kekec nga faka modacbau.

⁴⁰ Ni ngic mongngo Anutuarunac yoac fora negemma edengunubare ngeni nocac nuhomebeso andae? Abrahang ye faka ifia mong mi angkefec. ⁴¹ Ngeni ine mangnginaac kekec nga faka modacandae.” Ifi deu yeneng degec, “Neni sicsaucfunac mong mi fingering, kpac yombong. Mannina mocgu Anutu.”

⁴² Ifi degec Yesungo yofi deec, “Ni Anutuarunac fingecma neanna ubanaac mi mayai. Yennoc suenuec, imocac ngeni Anutu mangngina ambac dede heregoc neac songo negemma hoannubau. ⁴³ Nga ngeni ine yoacnaac kedzac kpegecdeacsoc mi ande, imocac amma ngeni yoac deanduae, imoc mi negentegecdae.”

⁴⁴ Nga mangana mingina, yennoc ngeneac mangngina nga faka yeac songou fede, ngeni imoc megecdeac angemmeude. Ye hanahemangoc ngic yunuhomeande nocac yeac ubahereau faka fora mi feu faka fora mi mema nangkecde. Ye ikocngic nga ye ikocac mama kecdenoc. Imocac amma ye yoac ikoc dema yengenaoc nanggeeme kefude.

⁴⁵ Nga ni yoac fora deduaeac ngeni neac yoacna mi negensinggegecde. ⁴⁶ Ngenearunac mongngo neac kopocsic mong negendaeu naric mi heficgebac. Nga ni yoac fora

deduae isoc ngeni nocac mi negensinnudae? ⁴⁷ Anutuac arengfora yenennoc yoara negenggecde. Ngeni ine Anutuac arengfora kpac, imocac yeac yoac mi negenggecde.”

⁴⁸ Anu yudangic yeneng meremmiigec, “Ge samariangicnac amma ge hadehadegagoc, ifi deandimbe nga imoc yoac fora.” ⁴⁹ Ifi degec Yesungo meremma yofi edeyunuec, “Ni hadehadena kpac. Ni Manna eweheihei ammiba ngeneng ine eweheihei mong mi anengandae. ⁵⁰ Ni neanna kpac kuneng mebadeac ua mi meanduae nga mongngo neac kpac miacma desiude. ⁵¹ Foracngoc, ngic mong ye neac yoac mekefudeu, ye naric mi homebesande, ni edengunuduae.”

⁵² Ifi deu yudangic yeneng degec, “Ge hadehadegagoc, neni yaguc negenggudimbe. Abrahang ye homeec nga profete yeni ifingoc homegec. Geng ine denec, ‘Mong ye neac yoac mekefude, yeng mi homebesande.’ ⁵³ Anu ge kisicnina Abrahanggac engena mi annec. Ye homeec nga profete yeni ifingoc homegec. Amma ge geanggaac negenna engena ande, imocngo naric mi ande.”

⁵⁴ Ifi degec Yesungo yofi edeyunuec, “Ni neannaoc dengereemebeadeu imocngo fora mi ambac. Nga Manna ngeneac Anutungina kecde, yeac ifi deandae, yeng eweheihei anende. ⁵⁵ Ngeneng mi negemmidae, neannaoc ine ye negemmidae. Neng ye mi negemmidae debadeu, ngic ikoha amma ngeni isoc ambade. Ni negemmidaengo yoara mekecduae. ⁵⁶ Bangecngina Abrahang ye neac naso fingeru imoc hembeso negemma songotoa femiec. Femiu hemma songo negenec.”

⁵⁷ Ifi deu yudangic yeneng degec, “Ge kifaga 50 mi andacngoc nga ge Abrahang hennec, imoc naric mi heide.” ⁵⁸ Ifi degec Yesungo yofi deec, “Foracngoc, Abrahang mi fingecmanu ‘ni kecduaengoc’, imoc edengunuduae.” ⁵⁹ Ifi deu yeni hoc mema heibeso anggec yeng sufu sufuu womong ngadeau kemee.

9

¹ Yesungo sinnu kemma ngic mong kicpisic fingec fingeru henec. ² Henu medacfora yeneng kpesimigec, “Rabbi, ngic yoc meracac kopocsicac amma kicpisic fingerec? Yengenaac me nonggomama yereac kopocsicac?”

³ Ifi degec Yesungo yofi edeyunuec, “Ngic yengena me nonggomama yeneng kopocsic maficgegec, imocac kpac. Anutuac ua mong yearu fingectegeru henggecdeac ifia fingerec. ⁴ Suenuec, nenang yeac ua wenacfungoc mekecbisina. Nga ama toforemanu mongngo ua naric mi meude. ⁵ Ni bangecfu kecma bangecac kperagi anduae.”

⁶ Ifi dema bangecfu sofohoma imoc bangecgoc yerecgeu goteng fingeru ngic kicpisic yeac kiwau hosoe. ⁷ Hosoma yofi edeec, “Ge Siroang dzohonnu kemma doku nadzicna.” (Siroanggac titiha imoc “Sueec.”) Ifi deu kemma nadzicma kicfifi amma dzigeneec.

⁸ Ifi amma dzigene hau amafora nga ngicngac goa warac iwaiacl derecgekefu henggec, yeneng degec, “Ngic yomocngo tacma derecgekefec me?” ⁹ Goango degec, “Imoc yennoc.” Nga tosea yeneng ine degec, “Imoc ye kpac, imoc ye isoc mong.” nga yengenaoc deec, “Ni ngic yomocnoc.” ¹⁰ Ifi deu kpesimigec, “Ge dafi amma kicga fidang?” ¹¹ Ifi degec deec, “Ngic kpara Yesu, yeng goteng yerecgema kicnau hosoma suenuma deec, ‘Ge kemma Siroannu doku nadzicna.’ ifi deu kemma nadzicma kicfifi andua.” ¹² Ifi deu kpesimigec, “Nga ngic imoc damoc?” degec deec, “Ni mi negenduae.”

¹³ Ifi deu yeni ngic warac kicpisic kefec, imoc farisaio yenearu hesicke kenggec. ¹⁴ Nga Yesungo goteng yerecgema ngic kiwa merecgeu kicfifi anec, imoc sabata nasou ifi anec.

¹⁵ Nga farisaio yeneng ifingoc ngic hemma kpesimigec, “Ge dafi amma kicfifi andang?” degec deec, “Ye gotengngko kicnau hosou imoc nadzicma kicfifi andua.”

¹⁶ Ifi deu farisaio goango degec, “Ngic imoc ye sabata tatacninaac sing mi modacde, imocac ye Anutuarunac kpac.” Ifi degec goango degec, “Ngic kopocsihagocng dafi faka kuhagoc ifia mebac?” Ifi dema yenaocngoc tohogec. ¹⁷ Tohoma kicpisicngko kicfifi anec, ye monggoc kpesimigec, “Ge ngic kicga merecgeec, yeac dafi denec?” degec deec, “Ye profete mong.”

¹⁸ Ifi deu yudangic yeneng ngic imoc kicpisic kefecfunac ngereema kicfifi anec, imoc mi negensinggegecac nonggomama kpacyuruma ¹⁹ kpesiyecmegec, “Ngic yomoc ye ngereac medac me? Ye kicpisic fingerec, ifi dedape me? Nga ye dafiu yaguc kicfifi ande?” ²⁰ Ifi degec nonggomama yereng yofi merennoc, “Ngic yomoc nereac medac. Ye kicpisic fingerec, imoc negendipe. ²¹ Nga dafiu yaguc kicfifi ande nga merang kiwa merecgedac, imoc neri mi negendipe. Ye bic yadi yadiaac amma yengena kpesimigec, yengenaoc haniaya edengunubeso.” ²² Yeri yudangic yeneac kengecyuruu ifi deoc. Yudangic yeneng yoac mong bic yofi dedzege anggec, “Mongngo Yesu ye Messianoc ifi dema deficgeudeu neni ye kpebung yeneac ngadeau faini kefude.” ²³ Imocac amma nonggomama yereng deoc, “Ye bic yadi yadiaac yengena kpesimigec.”

²⁴ Ifi deec yeni monggoc ngic kicpisic kefecmoc, ye naso yohockang kpacma egegec, “Ge Anutu afehena. Ngic dedang, ye kopocsihagoc, imoc negemmidimbe.” ²⁵ Ifi degec, yeng merengyemmeec, “Ngic imoc kopocsicmeme me kpac, imoc mi negenduae. Nga wiac mocgu negenduae, ni warac kicpisic kefaingo yaguc kicfifi anduae.” ²⁶ Ifi deu kpesimigec, “Ye noc wiac anggendar? Ye siriha dafiu kicga merecgedac?”

²⁷ Ifi degec yeng merengyemmeec, “Ni imoc bic edengunudacdua nga ngeni ine nearu kedzac mi faidau. Ngeni nocac monggoc negembeso andae? Ngeni ifingoc yeac medacfora ambeso negensidae me?” ²⁸ Ifi deu yeni desusuic ammigec, “Genoc ngic imocac medac nga neni Moseac medacforango kecdimbe. ²⁹ Anutungo Mose edeu yoara deec, imoc negendimbe. Nga ngic yomoc ye dahacnac, imoc ine mi negemmidimbe.”

³⁰ Ifi degec yofi merengyemmeec, “Ngic imoc kicna merecgedac. Nga ye dahacnac haec, imoc ngeni mi negendae. Ni imocac warecngunuduae. ³¹ Nenang yofi negendimbe, Anutungo kopocsicmeme yeneac yoac naric mi negengyemmeude. Anu ngic mongngo eweheimima dedea tofohoande, Anutungo ye negemmiude. ³² Bicngoc yombong hanahema feerekefecfu siduc mong yofia mi negenning, ‘Ngic mong kicpisic fingecma kecmanu ngic mongngo kiwa merecgeec.’ ³³ Ngic imoc Anutuarunac mi mabac dede, ye ua mong ifia naric mi mebac.” ³⁴ Ifi deu yofi meremmigec, “Ge hafoangoc manganaunac fingecnecngo yoac kpounemmenec, i.” Ifi dema kucgoc kisanggec maec.

³⁵ Anu Yesungo ngic kisanggec maec, imoc negemma hofockemma meficgema edeec, “Ge ngicac medac negensinggenec me?” ³⁶ Ifi deu ngic imocnggo deec, “Kunenna, ye merac? Edzacnuna hemma negensinggeba.” ³⁷ Ifi deu Yesungo yofi edeec, “Ge bic hendang. Ngic imocngonoc gegoc yoac yoac ande.” ³⁸ Ifi deu deec, “Kebu, ni negensingguduiae.” Ifi dema ye afeheec.

³⁹ Nga Yesungo yofi deec, “Ni fakanginaac ising ising fingerudeac bangecfu mayaiac ngic kicpisicngo kicfifi anggecde nga kicfifi yeni kicpisic anggecde.” ⁴⁰ Yoac ifi deu farisaio goa yegoc nanggec, yeneng imoc negemma degec, “Neni ifingoc kicpisic me?”

⁴¹ Ifi degec Yesungo yofi deec, “Ngeni kicpisic kecbau debac kopocsic mi fengemmebac amma ngeneng ine yaguc dedae, ‘Neni kicfifi kecdimbe.’ imocac amma kopocsicngina fengemmekefude.”

10

¹ Ni fora yombong edengunuduae, “Ngic mongngo rama yeneac oda manau embeso dema oda naguya wama monnusing enudemoc, ye hamangec nga godzungic. ² Ngic naguusing engande, yeng rama yeneac gareng. ³ Nga nagugarengngo yeac amma odanaguya naric witiude. Witiu rama yeneng ubea negenggec, yengenaoc rama kpacnginai kparu hagec waraiyemmeu yenahafoc ngadeau kemegegecde.

⁴ Ye ramafora hesicyunu kemedacgec waraiyemmeu ramafora yeni yeac ubea nege daeac ye modacgecde. ⁵ Amma yeni ngic furia naric mi modacgecde. Yeneng yeac ubea mi negendaec kengec amma woragecde.” ⁶ Yesungo yoac yomoc heima deu yeneng ine imocac obohogec.

⁷ Obohogec Yesungo monggoc yofi edeyunuec, “Foracngoc, neng rama yeneac nagu, imoc edengunuduae. ⁸ Ngic goa ni mi fingecbare hagec, yeneng hamangec

nga godzungic. Nga rama yeneng ine yeanearu kedzac mi faigec. ⁹ Ni neannao nagi. Monggo nearu ferecgema oda manau enudeu Anutungo ye ebicfunac mesiu komoc kpeude. Amma ye naguisung engemmama amma nenesemeng meficgeude. ¹⁰ Hamangecngic yeng wiac hamangec meudeac nga yunuhomema kpetotieyunuudeac haude. Nga neng kekec monggoc nga monggoc mekecgecdeac hayai.

¹¹ Neannaoc ramagareng gombunga. Gareng gombungango rama yeneac amma kekeha waude. ¹² Nga ngic mong ye yagura kemma ngic monggac ramagareng kecde, yeng rama yeneac minggingngina mi amma kecmanu katekasi hau ine hengkpatema woraude. Worau katekasingo rama yiniegiric ayemmeude. ¹³ Ngic imoc ye yaguraua mekecdeac rama yeneac negengyohoc mi anude. ¹⁴⁻¹⁵ Neannaoc ramagareng gombunga. Mannango ni negennude nga neng Manna negenduae, ifi isoc neannaoc ramafocna negengyunuduae nga ramafocna yeneng negennudae. Neng rama yeneac amma kekecna wabade.

¹⁶ Amma ramafocna goa kecdae, yeni oda yomohanac kpac. Nga neng hesicyunuba ubana negenggecde. Ifi anggec ramakpebung mocgu nga ramagareng mocgu anude.

¹⁷ Ni kekecna wama monggoc mebadeac amma Manggacngo neac songo negende. ¹⁸ Ngic monggo nearunac kekecna naric mi meickeu ni neannaoc kekecna wabade. Amma kekecna wama monggoc mebade, imocac uayoac nga kuc nearu fede. Imoc Mannango deserinenec.”

¹⁹ Yoac imocac amma yudangic yeni monggoc tohogec. ²⁰ Tohoma ngic homac yeneng degec, “Ye yafingagoc kecdeac ubasufu ande. Ngeni nocac yearu kedzac faidae?” ²¹ Nga ngic tosea yeneng degec, “Yoac ifia ngic yafingnginagoc, yeneac yoac kpac. Yafing yeni kicpisic kiwa naric mi merecgegecde.”

²² Yerusarennu nomang naso anu womong naguya bicngoc desigec, imocac homban-naso anec. ²³ Imohai Yesungo womong manau firangmemeac mana mong feec, kpara Saromoac firangmeme mana, ihai kengha anec. ²⁴ Ifi anu yudangic yeneng oronggema edegec, “Ge noc nasou haniaga dekperaginemmena negemma monggoc mi obohonide? Ge Messia kecnecfu imoc deireckenemmena.”

²⁵ Ifi degec Yesungo yofi merenec, “Imoc bic edengunuai anu ngeni mi negensinggedae. Ni Mannaac kpacfua mekecduae, imocngco haniana mekperagiude. ²⁶ Ngeni ine mi negensinnudae, nocac ngeni neac ramafocna, yeanearunac kpac. ²⁷ Ramafocna yeni ubanaac kedzac faigec ni negengyunuba yeneng modacnugecde. ²⁸ Modacnugec kekecseri yemmeba yeni wiac monggo naric mi memanganeyunubesande. Nga ngic monggo marinaunac naric mi mesiyunuude. ²⁹ Mannango yeni nenec, yeng wiac sasawa yeneac engena. Imocac Mannaac mariunac monggo naric mi mesiyunuude. ³⁰ Ni nga Manggac neri mocgu.”

³¹ Ifi deu yudangic yeneng hocngo heigecdeac hoc monggoc megec. ³² Ifi anggec Yesungo yofi edeyunuec, “Manggacac ua gombung homac edzacngunuai. Anu hania damocac ngeni ngaba amma hocngo nerebesonga andae?” ³³ Ifi deu yudangic yeneng merenggec, “Ua gombungaac amma hocngo gerebeso mi andimbe. Ge bangecngicngo geangaac Anutu dema Anutu emminec, imocac amma ine hocngo gerebeso andimbe.”

³⁴ Ifi degec Yesungo yofi merenec, “Dedeseriyoacnginau yoac yofi oho ohoya fede, imoc mi negendae me? Anutu yengenaoc deec,

‘Ni deba, ngeni sasawango anutuareng.’

(*Mitiyegec 82:6*)

³⁵ Nga ngic Anutuac enacyoac bicngoc mekecgec, yeneac Anutungo deecfu, ‘Ngeni anutuareng.’ ifi anu Anutuac yoac mitikibiu fede, imoc netohonideac singa mong mi fede. ³⁶ Anu Anutungo ngic meisnggema desima sueu bangecfu maec, imoc ni. Ni yofi bic dedua, ‘Ni Anutuac medac.’ Ifi deaiac ngeni nocac yofi dedae, ‘Ge Anutu emminec.’

³⁷ Ua mekecduae, imoc Mannaarunac mi andeu ngeni mi negensinnubisia. ³⁸ Nga Mannaac ua mebadeu ngeneng ine mi negensinnuma sifu faka kuhagoc mekecduae, imoc negensingebisia. Ifi amma Mannango nearu kecde nga neng yearu kecduae, imoc

negemma negentegecgecde.” ³⁹ Ifi deu yeneng monggoc mendanggeboso anggec, yeng maringinaunac hesima woraec.

⁴⁰ Anu Yesungo Yodang doku ferecgema doku noboc Yohanengo doku nadzic ua hanahema meec, ihai kemma kefec. ⁴¹ Ihai kecmamanu ngicngac homacngo yearu hama degec, “Yohanengo negensinggegdeac faka kuhagoc mong mi mekefec. Amma ye ngic yomocac hania deec, imoc sasawa sifu fora ande.” ⁴² Ifi dema bangec imohai ngicngac homacngo Yesu negensinggegdeac.

11

¹ Ngic mong kpara Radzaro, ye Betania amau hafei ammiu feec. Nga Maria nga dara Mata yereng ama imohai kefoc. ² Nga Maria yennoc Kebuac haniu kerec homuna gombungango nadzicmima yengena orucusiango mekerenggeec. Nga Mariaac naina Radzaro yenoc hafei ammiec.

³ Hafei ammiu nainghora yereng Yesuaru yoac faiec kenu deoc, “Kebu negenna, ngic hensongo ammiannec, ye hafei ammiu fede.” ⁴ Ifi deec kenu Yesungo imoc negemma yofi deec, “Ye homeudeac hafei mi ammide. Hafei imoc Anutuac kuc nga kibikperagi heficgeucdeac fingegecde. Fingeru Medahaac kuc nga kibikperagi ifingoc fingegecde.”

⁵ Nga Yesungo Mata muneagoc amma Radzaro yeni heresongogoc hoangyunukefec.

⁶ Anu yeng ine siduc imoc negemma uameme yohockang bangec ihaingoc torokpema kefec. ⁷ Ifi kecmaguc medacfora yofi edeyunuec, “Nenang Yudaia bangecfu dzigenema kenni.” ⁸ Ifi deu medacfora yeneng degec, “Rabbi, yudangic yeneng hocngo gerebeso anggec nga geng naso mi hereemanu monggoc ihai kennade.” ⁹ Ifi degec Yesungo yofi merenec, “Uameme mocguac manau aua 12 fede nga ngic mongngo wenacfu sing kengande, ye naric mi fopockeu makpeude nocac ye bangetoa bangec imocac kperagi henude. ¹⁰ Nga mong ye kundunnu kengande, ye fopockeu makpeude nocac yearu kperagia mong mi fede.”

¹¹ Ifi dema yoac monggoc torokpema edeyunuec, “Nenang ogonina Radzaro gau feu ni midiba yarudeac ihai kembade.” ¹² Ifi deu medacfora yeneng degec, “Kebu, ye gau fedeu fekecma ngereeude.” ¹³ Yesungo Radzaroac homecac deu, yeneng ine negenggec gautehec feu dede isoc anec.

¹⁴ Imocac ye tongganang yofi edeyunuec, “Radzaro ye bic homedac.” ¹⁵ Nga ngeni negensinggegdeac amma ni imohai mi kefaiac ubangerec negenduae. Ngeni yaguc hagec yearu kenni. ¹⁶ Ifi deu Toma kpara mong Tombosonga* yeng medac ogofora edeyunuec, “Nenang ifingoc yegoc homenideac kenni.”

¹⁷ Yesungo Betania taonnu kensikeu Radzaro ye kicsereu wenac yohoc nga yohoc bic ferahemana edegec negenec. ¹⁸ Yerusareng nga Betania botucngirau kiromita harebec, imocacsoc wegeng wegeng taroc. Imocac ¹⁹ Yudangic homacngo naingngiraac amma demeefai ayecmebesonga dema Mata nga Maria yerearu hatacgec. ²⁰ Tacmagec Yesu hade degec Matango imoc negemma maficeudeac kenu Mariango ine amau tarec.

²¹ Taru Matango kemma Yesu edeec, “Kebu, geng yei nenigoc kecbang debac nainna mi homebac. ²² Nga geng yaguc iwai monggac Anutu kpesimina ye naric genude, imoc negenduae.”

²³ Ifi deu Yesungo yofi edeec, “Nainggango gborima yarude.” ²⁴ Ifi deu Matango deec, “Ye naso wisic wisickeu homecfunac yacyac fingeru yarude, imoc negenduae.” ²⁵ Ifi deu Yesungo yofi edeec, “Homecfunac yacyac nga kekec, imoc ninoc. Mong ye ni negensinnude, ye homeude nga sifu kefude. ²⁶ Nga ngicngac yei kecma negensinnude, yeni sasawango mi homebesandae, imoc negensinggenec me kpac?” ²⁷ Ifi deu deec, “Oc Kebu, ge Messia Anutuac Medac bangecfu mabeso dedeanoc, imoc bic negensingguduau.”

²⁸ Ifi dema dzigene kemma munea Maria kparu kenu sangicfu edeec, “Kpoukpounungo hatacma geac dede.” ²⁹⁻³⁰ Anu Yesungo taonnu mi hasikemangoc Matagoc ewaroc ihaingoc nanecac Mariango yoac imoc negemma bic yacma kenec. ³¹ Kenu yudangic

* ^{11:16:} Ye ogeagoc foratombosonga fingeroc.

yeneng demeefaiac hama tacgec, yeni Mariango gereagoc yacma kenu hemma ye kicsereu kiarudeac kende dema modacgec.

³² Anu Mariango Yesu nanec, imohai kensikema Yesuac haniau makpema edeec, “Kebu, ge yei tacbang debac nainna naric mi homebac.” ³³⁻³⁵ Ifi dema kiaru yudangic yegoc hagec, yeni yenahafoc kiacgec Yesungo yenenu ubahodungngo ongaasuya meebeiriu negenghodungaima kickumea mamanu deec, “Dahaigeng faigec?” deu degec, “Kebu, hama henna.” ³⁶ Ifi anu yudangic yeneng hemma degec, “Henggec, ye Radzaroac heresongo kuneng femiec.” ³⁷ Nga goa yenearunacngo degec, “Ye warac kicpisic kiwa merecgeec. Nga ye ngic yomoc gombunga garenggeu mi homebac.”

³⁸ Yesungo monggoc ubaebic mema kicsereu kenec. Kicsere imoc hockedzebe anu hoc mongngo singa hedzickema feec. ³⁹ Feu kensikema edeyunuec, “Ngeni hoc imoc meickegec.” ifi deu ngic homeec, yeac naina Matango deec, “Kebu, ye homunagoc bic andac nocac ye uameme yohoc nga yohoc bic kendac.” ⁴⁰ Ifi deu Yesungo edeec, “Ge negensinggenadeu Anutuac kuc kibikperagiagoc hennade, ifi bic edegudua.”

⁴¹ Ifi deu hoc meickegec Yesungo kic fiu enu yofi deec, “Manggac, ge yoacna bic negendang, imocac geac dangge deduae. ⁴² Ge nasosoc nunumuna negengannec, imoc bic negendua. Anu geng ni suenunec, imoc ngichabu yoc nandae, yeneng negensinggegecdeac ifi edegudua.” ⁴³ Ifi dema Yesungo kucgoc kpacma deec, “Radzaro, ge yacma ngadeau mana.” ⁴⁴ Ifi deu ngic homemea hanimaria nga kicmesuya kporucusucngo kpfusema birac biranggea, imocngo yacma maec. Mau Yesungo edeyunuec, “Ngeni yungecmigec kenu.”

⁴⁵ Yudangic homacngo Maria hembeso hagec, yeni Yesungo ua meec, imoc hemma ye negensinggegec. ⁴⁶ Ifi anggec, yenearunac goango ine farisaio yenearu kemma Yesungo faka meec, imocac siduc ayemmegec. ⁴⁷ Ayemmegec womong gareng enarafocngina amma farisaio, yeni tutumangtoaac memba kpedzucyunuma yofi degec, “Ngic yomoc ye negensinggegecdeac faka kuhagoc homac medeac nenang dafi anni? ⁴⁸ Ye wani kecma faka ifia torokpema meudeu ngic sasawango ye negensinggegec Roma yeneng hama amawomonnina nga ngicngacfocnina wangecnunubauac.”

⁴⁹ Ifi degec, yenearunac mong kpara Kaifa, ye kifa imohai womong gareng enara kefec, yeng yofi edeyunuec, “Ngeni wiac mong mi negentegecdae. ⁵⁰ Ngicngac areng sasawa mi kpac anggecdeac ngic mocgungo bangec areng yeneac amma homeu ngereeude, ngeni imoc mi negentegecdae me?” ⁵¹ Yoac imoc yengena ubeaac negemma mi deec. Yeng kifa imohai yudangic yeneac womong garengtoa kefec, imocac kpefing deec. Yesungo bangec areng yeneac amma homeudeac ifi anec. ⁵² Ye yeneacsac homeudeac mi maec. Ye Anutuac nambaracfora sinsararang kpegec kecdae, yeni kpedzucyuu areng mocgu anggecdeac ifi deec.

⁵³ Ifi deu naso imohaingoc Yesu kpegecdeac hanahema dekirc anggec. ⁵⁴ Ifi anggec Yesungo negemma yudangic yeneac botufu monggoc nonongkac mi yerecgekefec. Ye ine worama Eferaing ama bangec kisi wegenacfu feec, ihai medacfora yenigoc kemma kefec.

⁵⁵ Yudangic yeneac makekeng hombang naso wegene hamanu ngicngac homacngo Anutuac kicfu kpetiac anggecdeac dzuacemegecde, imocac amma amangina wama Yerusarennu kenggec. ⁵⁶ Kemma womong manau namma Yesu hofocma yenaocngoc kpesiemegec, “Ye hombannina haude me dafi negendae?” ⁵⁷ Nga womong gareng enarafocngina nga farisaio yeneng deserima ngicngac yofi edeyunugec, “Yesu dahai kecde, imoc mongngo meficgema edenunugec mendanggema mebisina.”

12

¹ Makekenggac hombang imocac wenac 6 femanu Yesungo Radzaroac taonnu Betania, ihai kenec. Yesungo ngic yenoc homecfunac megboriec. ² Yeni imohai Yesuac amma yaka gombunga ohogec Matango yaka fama arenggeu negec. Nga ngic Yesugoc tacma yaka negec, yenearunac mong Radzaro. ³ Tacmagec, imohai Mariango sebiac kerec

lita noboha, kpete imocacsoc mema Yesuac haniau kpakema nadzicmiec. Kerec, imoc narda foraunac memea* amma imocac buma kuneng. Nadzicmima orucdzoeango hania meusuranggeec. Ifi anu kerec imocac homunango fima ama mana sokodacma feec.

⁴ Anu medacfora yeneac botucfunac medac mong Yuda Kariotonac, yennoc ngade Yesu doc meudeac anec amma yeng deec, ⁵ “Nenang kerec imoc faini kifa mocguac uabunggac dzo kirecgeu† ngic makpekpea yemmebing, imocngko ngereebac.” ⁶ Yuda ye imoc ngic makpekpea yeneac negensima mi deec, kpac. Ye ine hamangecngicac amma dzohiengina garenggekecma dzo hamangec menec angkefec. ⁷ Ifi deu Yesungo deec, “Ge ngac imocac yoac wana. Ye kerec imoc faiu femanu homeba naso imohai eng tonggonubauac amma nadzicnende. ⁸ Ngic makpekpea yeni nasosoc ngenigoc kecgecede nga neng ine ngenigoc nasosoc mi kecbade.”

⁹ Anu yudangic homacngo Yesungo Betania taonnu kecde, ifi negemma Yesuacsac mi kenggec. Yeni Yesungo Radzaro homecfunac megboriec, ye momoc hembeso kenggec. ¹⁰⁻¹¹ Ifi fingeru yudangic homacngo Radzaroac amma enara yeneac dede wama Yesu negensinggec. Imocac womong gareng enara yeneng Radzaro ifingoc kpegecdedac yoacua megec.

¹² Wereckengau ngicngac habutoango hombanggac Yerusarennu kenggec. Kemma Yesungo Yerusarennu haudeac wegenanec hade, ngicngac yeni ifi negemma ¹³ ic maria dzuamagoc mema Yesugoc ewacgecdedac sinnu kenggec. Kemma yofi kpacgec, “Ohec, ngic KEBUAC kpacfudade, ye kenehagoc. *(Mitiyegec 118:26)*
Yeng Israe neneac Ngictau.”

¹⁴ Ifi kpacgec Yesungo donggi medaha mong maficgema imohai emma tarec. Imocacsac yofi oho ohoya fede,

¹⁵ “Sionggac naroang ge mi kengecguu. Henna, ngictaugango donggi medahaac witiau tacmanu haude.” *(Dzekaraia 9:9)*

¹⁶ Faka fingerecfunac medacfora yeneng imocac hania mi negenghomegec. Kecma Yesungo kuc nga kibikperagiagoc anec, naso imohai ine faka ammigec nga yoac yeac negemma oho ohoya fede, imoc negengireckegec. ¹⁷ Anu ngichabu yeni Yesugoc kemma Radzaro kicsereunac kpacma homecfunac megboriu henggec, yeneng siduc imoc desahegec. ¹⁸ Ye faka kuhagoc imoc meecac amma habutoango yegoc ewacgecdedac kenggec. ¹⁹ Ifi anggec ine farisaio yeni yenaocngoc denengeng amma degec, “Negenggec, nenang wiac mong anganggac siriha kpac. Ngicngac kpedzongacngo ye modacma kendacdae.”

²⁰ Anu ngicngac hombanggac Anutu afehegecdedac Yerusarennu kenggec, yeneac botucfu grikngic goa momoc kecgec. ²¹ Kecma Firipoaru hama degec, “Ngickuneng, neni Yesu hembeso negendimbe.” nga Firipo ye Gariraia bangec Besaida taonnunac. ²² Ifi degec Firipongo hama Anderea edeu yerahafoc kemma Yesu edeoc.

²³ Edeec Yesungo yofi meremna edeyuruec, “Ngicac medac ye kuc nga kibikperagiagoc anudeac nasoya hade. ²⁴ Foracngoc, wit gbomea mong bangecfu mi kemema tohoudeu imoc yengenaocsac tarude, imoc edengunuduae. Nga bangecfu kemema tohoudeu imocngko fora homac maficgeude. ²⁵ Ngic mong ye sebiaac kekecac songo negengande, ye kekeha sufumiude. Nga sebiaac kekec bangec yomohai ubeango waande, yeng kekeha mekecma kekecseri maficgeude. ²⁶ Nga ngic mong ye kingang kpekpene ambeso negendeu ye ni modacnubeso. Nga ni kecbade, ye imohai ifingoc nigoc kefude. Nga ngic mong ye neac kingang kpeudeu, Mannango ye seseheude.”

²⁷ Amma Yesungo monggoc deec, “Yaguc ubaongana ebiriu dafi debade? Manggac, ge naso yomohacnac onggonnuna. Nga neng ine imocac ammanoc naso yomohai hasikeduae. ²⁸ Manggac, ge kpacga mekperagina.”

Ifi demanu kurumennunac udumeng mong yofi fingerec, “Ni kpacna bic mekperagiai amma monggoc mekperagibade.” ²⁹ Yoac ifi fingecmanu ngicngac habutoa nanggec,

* 12:3: Narda imoc dzaring mong marikomoc. Dokuya homunagoc imocngko kerec, imoc memea. † 12:5: Ye denari 300 deec.

yeneng udumeng imoc negemma degec, "Parandangng heide." Nga toseango ine degec, "Angero mongngo yegoc yoac dede." ³⁰ Ifi degec Yesungo yofi deec, "Udumeng imoc neac amma mi hadac, kpac. Imoc ngeneac memeficac fingeecdac. ³¹ Yaguc banectoa bangec imocac ngicngac fakangina ising isinggaoso nga yoacngina desigecde. Amma bangec yomocac ngictau meickegecde. ³² Anu ngic yeneng bangecfunac miacnugec ni emma ngicngac sasawa kpedziyunuba nearu hadacgecde." ³³ Yengena siric dafiu homeude, imocac dekperagima edeyunuudeac ifi deec.

³⁴ Ifi deu ngic habutoango meremmagic, "Dedeseriyoacf yofi degec negengandimbe, 'Messiango fingeclma nasoya kpac, kechereema kefude.' Anu ge dafi denec, 'Ngic yeneng Ngicac Medac miacgac embeso.' Nga Ngicac Medac imoc merac?" ³⁵ Ifi degec Yesungo deec, "Kperagingo naso wegenanecsac ngenigoc kefude. Kundunggac kucngo semengunubacac ngeni kperagi fengemmemanu kperagigoc kecbisia. Ngic mong ye kundunnu kengkecde, ye sing dafiu kende, imoc naric mi negentegerude. ³⁶ Imocac amma ngeni kperagingo ngenigoc feamanungoc kperagi imoc negensinggebisia. Ifi angkecmca kperagiac nambaracfora anggecde." Yesungo ifi dema wayunuma yenearunac meickeec.

³⁷ Yesungo faka kuhagoc homac kicnginau meu yeni ine ye mi negensinggegec.

³⁸ Profete Yesaiaac yoac yomoc fora fingeclbeso,

"Kebu, yeni yoac dekperaginemmegec, imoc ngic merac negensinggeec amma meracaru KEBUAC mariseri fingeclmiec." ^(Yesaia 53:1)

³⁹ Imocac amma yeni naric mi negensinggegec. Amma Yesaiango yoac mong yofi torokpema deec,

⁴⁰ "Yeni kicnginango mi henggecdeac kicngina mekundung kpeec amma faka meu ubangina dzingfong anu mekundung kpeyunuec nga ubadzigec dzigene mi fingeclmemmanu mengereyunubaiac." ^(Yesaia 6:10)

⁴¹ Yesaiango Yesuac kuc kibikperagiagoc henecac yeac negemma yoac yomoc deec.

⁴² Ammanu ngickiwa botucnginaunac homacng Yesu negensinggegec nga farisaio yeneng ine kpebunggac ngadeau faiyunubauac yeni imoc mi dekperagiyemmegec.

⁴³ Ngic yeneng dedengerec ayemmegecdeac songotoa feyemmeec nga Anutungo dedengerec ayemmeudeac wagec.

⁴⁴ Anu Yesungo kucgoc kpacma yofi deec, "Ngic mong ni negensinnude, ye nisac kpac, ye suenuec, ye ifingoc negensinggeude. ⁴⁵ Nga mong ye nende, yeng suenuec ifingoc henude. ⁴⁶ Nga ngicngac negensinnudae, yeni sasawango kundunnu monggoc mi kecgecde nocac bangecfu kperagia mama fingecltegerek, imoc ni. ⁴⁷ Ngic mong ye yoacna negemma mi tofohoudeu neng fakaya mi isinggema desibade, kpac. Ni ngicngac fakangina isinggema desibadeac mi mayai. Neng ine ngicngac ebicfunac mesiyunubade nga yeni komoc kpegecdeac mayai.

⁴⁸ Anu mong ye ngadenuma yoacna mi hoanggeude, wiac monggo fakaya isinggema desimiude. Yoac deai, imocngonoc naso wisic wisickeau fakaya isinggema desiude.

⁴⁹ Ni neanna ubanaac yoac mi deanduae, kpac. Manggac suenuec, yeac yoac debadeac dederege anenec. ⁵⁰ Yeac dedeseriyoac imoc kekecseri, imoc negenduae nga imocac amma Manggac yoara edenuec, imocngoc debade."

13

¹ Makekenggac hombang nasoac tofocnac mocgu femanu Yesungo bangec yomoc wama Manggarac dzigeneudeac nasoya wegeneec, imoc bic negengemeec. Ifi negemma bangecfu wiacfura yeneac heresongoya fekefec, imoc hafoangoc edzacynumaguc kekeha wisickebeso, ifi negenec. ² Yeni maraiac yaka nema tacgec. Nga mangana minginango negen negeng Yuda, Simong Kariotoac medac ubeau bic yofi faiec, yeng Yesu docfu faiu ngaba yeneng mebisia.

³ Nga Mamango wiac sasawa Yesuac mariau bic faiec nga ye Anutuarunac mama monggoc dzigene enude, ye imoc bic negenec. ⁴ Negemma tataha wama yacma ngakpi

hereha hesima keremmeme mong mema kebangau dzegeec.⁵ Dzegema tera yadaosong, imohai doku kpeu kemeu medacfora yeneac hani dzuacyemmema keremmeme kebangau dzegeec, imocng haningina mekerenggeryemmeec.

⁶ Ifi amma Simong Petoroaru kenu Petorongo kpесimie, “Kebuna, ge dafiac hanina dzuacnade?”⁷ Ifi deu Yesungo yofi edeec, “Ni faka anduae, ge yaguc imocac hania mi negentegecne amma ngadeguc hania negentegecna.”⁸ Ifi deu Petrongo deec, “Kpac yombong, ge neac hani mi dzuacnade.” deu Yesungo meremmiec, “Ni haniga mi dzuacbadue, ge nearu mi tahockenade.”⁹ Ifi deu Simong Petorongo deec, “Kebuna, ge haninasac kpac, orucna nga marina momoc dzuacnenna.”

¹⁰ Ifi deu Yesungo yofi deec, “Ngic mong ye doku bic nadzirec, ye hafoangoc kongac kpeecac monggoc mi nadzicma haniasac dzuacbesonga. Ngeni kongac bic kpegec amma imoc ngeni sasawa ngeneac ine mi deduae.”¹¹ Nocac ngic merang ye doc meu megecde, imoc bic negenec. Imocac yofi deec, “Ni sasawa ngeneac imoc mi deduae.”

¹² Yesungo haningina dzuacdaru wisickeu ngakpi hereha heiu kemeu monggoc matacma yofi kpesiymmeec, “Ni faka ngenearu medua, imocac hania negentegecdae me?”¹³ Ngeni neac kpoukpou nga Kebu kpacnuandae, imoc naric deandae, nocac ni imocnoc. ¹⁴ Ni Kebu nga kpoukpounginango haningina dzuacduaeu ngeni ngenaoc ifingoc haningina dzuacmebisia. ¹⁵ Ni faka gombungaac ongea edzacngunuma angemmeduae, siriha imocngoc ngenaocngoc modacma mebisia.

¹⁶ Foracngoc, wanacngicngo mingina mi feraheude nga sue sueango ngic sueec, ye mi feraheude, imoc edengunudiae. ¹⁷ Ngeni yomoc negemma modacgecdeu Anutuac ubangerecngo ngenearu feude.

¹⁸ Ni sasawa ngeneac mi deduae. Meisingngunuai, ngeni ine negengngunudiae. Amma yoac mitikibiu oho ohoya feder, imoc fora fingerudeac yoac yomoc heficgeec, ‘Ngic nigoc yaka neande, ye gofoc gofobango tifacnuudeac bic hania miacde.’ (*Mitiyegec 41:9*)

¹⁹ Faka imoc fingerude nga, ‘Ni kecduaengoc.’ ngeni imoc negensinggecdeac amma yaguc faka imoc mi fingecmanu imocac siriha edengunudiae. ²⁰ Foracngoc, ni ngic me ngac mong sueba hau mongngo ama heimiude, yeng ni ama heinende ande. Anu ngic mong ye ni ama heinenude, yeng suenuec, ye ama heimiudengoc.”

²¹ Yesungo yoac imoc demanu ongaasuya ebiriu yoac yofi dekperagie, “Ni fora yombong edengunuba, ngeneac botucfunac mongngo docfu fainuu menugecde.”²² Ifi deu medacfora yeni yenaocngoc kicngoc engemma degec, “Imoc meracac dede?” ifi dema obohogec. ²³ Nga medacfora yeneac botucfunac songomedaha yeng Yesuac hoannu tarec. ²⁴ Ifi taru Simong Petoro ye hatango sosoc yofi anec, “Ge kpесimina, imoc meracac dede?”

²⁵ Ifi deu medac imoc Yesuac mokucfu heifema kpесimie, “Kebu, ge imoc meracac denec?”²⁶ Ifi deu Yesungo deec, “Ni ic sogong tosea yomoc nemuruckema ngic mong mibade, ngic imocnoc.” Ifi dema ic sogong mema nemuruckema Yuda, Simong Kariotoac medac miec.

²⁷ Miu ic sogong meu Satangngko hereau kemeec. Kemeu Yesungo yofi edeec, “Ge ua mebeso negennec, imoc kemma bic mebesena.”²⁸ Ifi deu medacfora tacgec, yeneng noc wiacak edede, imocac obohogec. ²⁹ Imoc yofiac, Yuda ye dzohie mekefecac hombanggac wiacak mong bummeudeac edede me ngic makpekpea wiacak mong yemmeudeac dede, ifi negenggec. ³⁰ Nga Yudango ic sogong tosea memanu imohaingoc yacma kemeec. Nga tofocnac naso yombong bic anec.

³¹ Anu Yesungo yofi deec, “Yaguc Ngicac Medacngko kuc nga kibikperagiagoc fingektegecde. Fingegegeru ngicngac yeni Ngicac Medac uayaac amma Anutuac kuc nga kibikperagi negenggecde. ³² Ngicngac yeni Medac hemma Anutuac kuc nga kibikperagi negenggecdeu Manggacngko Medahaac kuc nga kibikperagi ngicngac mekperagiyemmeude, imocac naso wegenede.”³³ Nambaracfocna, ni naso wegenanec

ngenigoc kecmangoc kembade ngeni ni hofcnugecde. Anu yudangic edeyunuai, imocngoc yaguc edengunuduae. Ni kembade, imohai ngeneac hahaac sing mong mi fede, kpac. ³⁴ Singyoac gboria mong ngemmeduae, ngeni ngenaocngoc heresongogoc hoangemebisia. Neng ngeni heresongogoc hoangngunukecduae, ngeni ifi isoc nge-naocngoc heregoc tembuc tembuc songogoc hoangemebisia. ³⁵ Ngeni ngenaocngoc heresongogoc hoangemegecdeu ngicngac sasawango ngeni neac medacfocna kecdae, imoc negenggecde.”

³⁶ Ifi deu Simong Petorongo kpesimiec, “Kebu, ge dahai kennade?” ifi deu Yesungo yofi deec, “Ge yaguc ni kembade, imohai naric mi modacnunade, kecma ngadeguc modacnunade.” ³⁷ Ifi deu Petorongo monggoc kpesimiec, “Kebu, ni nocac yaguc naric mi modacgubade? Ni geac amma kekecna naric waba doude.” ³⁸ Ifi deu Yesungo meremma yofi edeec, “Ge naric neac amma kekecga wana doude, ifi denec me? Foracngoc, ni edegubade, kokorecngo mi arohomanu geng atac harebec neac busic kpenade.”

14

¹ Ngeni ubaebic mi mebisia. Ngeni Anutu negensingema ni ifingoc negensinnubisia. ² Neac Mannaac amau amamana homac fekende. Imoc mi febac dede yofi bic eden-gunubai, “Ni ngeneac ama mana mengerebadeac kembade. ³ Amma ngeneac amatatac heitumeibadeac kemma dzigene hama hesicngunubade. Ni kecbade, ihai nenahafoc kecnideac negenduae. ⁴ Amma dahai kembade, ngeni imocac sing bic negendae.”

⁵ Anu Tomango kpesimiec, “Kebu, ge dahai kennade, imoc mi negendimbe. Imocac sing dafi negentegecnide?” ⁶ Kpesimi Yesungo yofi deec, “Ninoc sing nga yoac fora amma kekec. Ngic mongngo nia kpacfu Manggacaru keng keng imocac sing mong mi fede. ⁷ Ngeni ni negennudaeu Manna ifingoc negemmigecde. Amma ngeni yaguc namma enude imohai ye negemmima bic hendaе.”

⁸ Ifi deu Firipongo deec, “Kebu, ge Manggac edzacnununa henni socnunuude.” ⁹ Ifi deu Yesungo yofi edeec, “Firipo, ni naso herea ngeneac botucfu kecbare ge mi negen-nunec. Ngic mong ye nene, yeng Manna henec. Nga dafiac Manggac edzacngunuba henggecdeac denec? ¹⁰ Ni Manggacac hereu kecduae nga Manggacng neac hereu kecde. Ge imoc mi negensinggenec me? Yoac edengunuanduae, imoc neanna ubaac mi debade, kpac. Manggacng neac hereu kecma ua imoc mekecde. ¹¹ Ngeni yoacna yomoc negensinggec, ni Manggacac hereu kecduae nga Manggacng neac hereu kecde. Ifi deba obohogecdeu uana meanduae, imoc negensinggebisia.

¹² Foracngoc, mong ye ni negensinnude, ye ni ua meanduae, imocngoc meude, imoc edengunuduae. Amma ua mekefai, yeng imoc ferahema monggoc meude, nocac ni Manggacaru kembade. ¹³ Medacngo Manggacac kuc nga kibikperagi heficgeudeac amma ngeni wiac sasawa neac kpacfu kpesigec, imoc ambade. ¹⁴ Amma wiac monggac neac kpacfu kpesinenggecdeu ni imoc ambade. ¹⁵ Ngeni heregoc neac songo negenkecdaeu singyoacna modacgecde.

¹⁶ Anu neng Manggac kpesimiba yeng memeseringina mong ni isoc ngemmeu yeng ngenigoc nasosoc kefude. ¹⁷ Amma ye yoac foraac Asu. Nga bangecfunac ngicngac yeni ye naric mi megecde. Yeni ye mi hengandae nga ye mi negemmigecde. Nga ngeneng ye negemmidae, ye ngeneac botucfu amma herenginaunoc kefude. ¹⁸ Nga wangunuba beging isoc mi kecgecde, kpac. Ni ngenearu habade. ¹⁹ Naso wegenanec wisickeuguc bangectoa bangec imocac ngicngac yeneng ni monggoc mi nenggecde nga ngeneng ine nenggecde, nocac ni kecduaeac amma ngeni kecgecde.

²⁰ Ni Mannaac hereu kecduae nga ngeni neac hereu kecdae amma ni ngeneac hereu kecduae, ngeni naso imohai imoc negentegecgecde. ²¹ Ngic mong ye neac singyoac hoanggema modacande, ye heregoc neac songo negenude. Nga mong ye heregoc neac songo negenudeu Mannango yeac songo ifingoc negenude. Amma neng yeac songo negemma fingecmibade.”

²² Ifi deu Yuda Kariotoac waseango Yesu kpesimiec, “Kebu, ge nenisac fingechnembebesonga negensinec nga bangectoa bangec, imocac ngicngac yenearu kpac, imoc dafiac?” ²³ Ifi deu Yesungo yofi meremmiec, “Ngic mong ye heregoc neac songo negendeu ye enacyoacna modarude. Modaru Mannango yeac songo negenu nereng yeac hereu amatatacnira mema kecdede.” ²⁴ Nga mong ye heregoc neac songo mi negenude, ye enacyoacna mi modarude. Nga ni yoac deba negengandae, imoc neac yoac kpac, imoc Manggac suenuec yeac yoacnac.

²⁵ Ni ngenigoc kecma yoac yomoc edengunuduae. ²⁶ Nga Manggacngo memeficngina Tiri Asu neac kpacfusueu mama yeng wiac sasawa kpoungemmema yoac edengunuai, imoc heigborongemmeude. ²⁷ Ni faingunu kembade nga ruaena faiduae, imocngo ngenearu fekefude. Bangectoa bangecac ngicngac yeneng ruae yemmeandae, ruaena imoc ifi isoc kpac. Imocac ngeni kengec mi ambisia amma ubaebic mi mebisia.

²⁸ Ni Manggacaru kemma monggoc ngenearu dzigene habade, ifi deba negendau. Amma ngeni heregoc neac songo negendae isoc sogaibau nocac Manggac yennoc neac engena. ²⁹ Nga kembadeac fora ngadeguc fingegegeru ngeni negensinggegecdeac amma kembadeac fora mi fingegecmanungoc siduha yaguc edengunuduae.

³⁰ Ni naso herea monggoc ngenigoc yoac yoac mi ambade. Bangectoa bangec yomocac ngictau haude. Nga yeac wiac mong neac hereu mi fede. ³¹ Ni Manggacac songo negengkecduae. Amma yeng uayoac deserinenec, imocac sirihau ua mekecduae, bangectoa bangec yomocac ngicngac yeneng imoc negentegegecdeac amma deduae, ngeni yacgec wama kenni.”

15

¹ Ni waing ic fora nga Mannango wainguaac mingina. ² Ic fawa goa nearu fema fora mi angkecgec ye imoc sasawa kperecgema ukuyunuude. Nga fawa fora angandae, imoc sasawa foraya homac anudeac ye imoc kperecgema memengere anude. ³ Ni enacyoac edengunuaiac ngeni bic kongac kpegec kecdae. ⁴ Amma ngeni nigoc kpeketahemah kecbisia. Ifi anggec neng ngenigoc kpeketahemah kecbade. Ic fawango waing icfu mi kpeketaheudeu, ye fora naric mi anude. Ifi isocngoc ngeni nearu mi kpeketahemah kecgecdeu fora mong mi anggecde.

⁵ Ni neannaoc waing ic nga ngeni fawafocna. Ngic mong ye nearu kpeketahemah kecde, neng yearu ifingoc kpeketahemah kecba yeng fora homac anude. Ngeni nia kpacfua mong naric mi megecde. ⁶ Mong ye nearu mi kpeketahemah kefudeu ye ngicngofawa heregema ukuu dzanggeande, ifi isoc ye ukugecde. Nga fawa ifia kpedzucnema gerecfu ukugec dzeude. ⁷ Ngeni nearu kpeketahemah kecgecde nga neac yoac ngenearu kpeketahemah feudeu wiac monggac angemmeu kpesigec, imoc fingegecngemmeude. ⁸ Nga ngeni fora homac meficgemagec Manggacngo faka imocac kpac kuneng meu ngeni medacfocna fingegegecgecde.

⁹ Manggacngo ni songogoc hoannukefec, neng ifi isocngoc ngeni songogoc hoanggunukefai. Ngeni neac songo manau kpeketahemah kecbisia. ¹⁰ Ni Mannaac dederecge yoac modacma yeac songo manau kpeketahemah kecduae. Ifi isoc ngeneng neac singyoac modacgecdeu neac songoac manau kpeketahemah kecgecde. ¹¹ Neac ubafeacngo ngenearu fede nga ubangerecngina hafoangoc fengemmeudeac yoac yomoc edengunuduae.

¹² Yomoc neac singyoac, neng ngeneac songo negengkecduae, siriha imocngoc ngeni ngenaocngoc heresongogoc hoangemema kecbisia. ¹³ Mong ye ogofora yeneac amma kekeha waude, yeac heresongo imoc engena yombong. ¹⁴ Nga ni singyoac ngemmeai, imoc sasawa modacgecdeu ngeni neac ogofocna anggecde.

¹⁵ Kingangmedac ye minginango wiac angkecde, imoc mi negenude. Imocac ni ngenec kingangmedac monggoc mi debade, kpac. Ni ngeneac ogofocna deduae, nocac ni Manggacarunac yoac negennai, imoc sasawa edengunudarai. ¹⁶ Anu ngeni neac kpacfwiac monggac kpesigec Manggacngo imoc ngemmeudeac amma neng meisngngunuai. Ngeneng ine ni mi meisinnugec, kpac. Meisingngunuma fora meficgegecdeac uau

faingunuai. Nga ngeni kemma fora meficgebisia. Meficgegec fora imocngo fefeseri feengkefude. ¹⁷ Anu ni singyoac yofi ngemmeduae, ngeni ngenaocngoc heregoc songo negengemekecbisia.

¹⁸ Bangetoa bangec yomocac ngicngac yeneng ubango ukungunudaeu ngeni yofi negembisia. Yeni ubango ngeni mi ukungunugec imohai ni ubango bic ukunugec.

¹⁹ Ngeni bangetoa bangec yomocac ngicngac kecbau yeni yenang ayemmeande, ifi isocngoc ngeneac songo negembau. Nga ngeni ine bangec yomohanac kpac, neng ine ngeni bic meisingngunuma bangec yomocac ngicngac yenearunac meicngunuai. Imocacnac yeneng ngeni ubango ukungunugecde. ²⁰ Ni yoac warac edengunuai, imoc mi nigeckngunubeso, wanacngicng mingina naric mi feraheude. *(Yohane 13:16)*

Imocac amma ngicngac nukporac anenggec, yeni ifi isocngoc ngeni ngunukporac angemmegecde. Nga neac yoac hoanggeandaeu ngeneac yoac ifingoc hoanggegecde.

²¹ Yeni suenuec, ye mi negemmidae. Imocac yeni neac kpacnaac amma ngeni ifi angemmedacgecde.

²² “Ni mama yenearu yoacna mi debai dede yeni kopocsicngina kpac kecbau. Amma yaguc ine kopocsicnginaac amma degbedic anggecdeac sing mong mi fede. ²³ Ngic mong ye ubango wanude, ye ifingoc Manna ubango waude. ²⁴ Ni ua mekecduae ngic mongng faka kuhagoc ifia bicngoc mi meec, imoc yeneac botufu mi mebai dede, yeni kopocsicngina kpac kecbau. Nga yeni ine imoc yaguc hemmaguc Mannagoc neri ubango ukunurugec. ²⁵ Anu yoac yomoc,

‘Yeni hania kpacfu ubango ukunugec.’

(Mitiyegec 35:19; 69:4)

imoc dedeserijoacnginai oho ohoya fede nga imocngo hafoangoc fingerudeac ifi anggec.

²⁶ Memeficngina haude, ye Manggacarunac suengemmeba haude amma yennoc yoac foraac Asu nga yeng hama ni dekperaginuude. ²⁷ Nga ngeneng hanac hanaheaunacngoc nigoc kecgec, imocac ngeni ifingoc naric dekperaginugecde.”

16

¹ Ngeni negemmangang amma mi wanugecdeac yoac yomoc bic edengunuadua. ² Ngic yeni kpekpeturang amaac kpae heingemmema ngadeau faingunugecde. Nga naso mong haude, imohai ngic yeni Anutuac ua medimbe dema ngunuhomegecde. ³ Yeni Manggac nga ni mi negennurudaeac ifi anggecde. ⁴ Ni hanac hanaheaunacngoc yoac imoc mi edengunuai nocac ni naso imohai ngenigoc kefai. Nga naso mong haude, imohai ni yoac edengunuadua, imoc mi nigeckngunudeac amma yaguc monggoc edengunuadua.

⁵ “Ni suenuec, yearu dzigenebadeac naso wegene hade. Nga ngenearunac mongngo yofi mi kpesinende, ‘Ge dahai kennade?’ ⁶ Neng yoac yomoc edengunuaduaac ine ngeni ubahodungng mewakengunuude. ⁷ Ni yoac fora edengunuaduae, ni kembade, imocngo ngenearu ngereeude. Ni mi kembadeu memeficngina naric mi haude. Neng kemma ye sueba ngenearu haude. ⁸ Yeng hama bangetoa bangec yomocac ngicngac kopocsicngina nga faka dindingac amma desi desia imoc edzacyunuma heficgeyemmu negenggec fora anude. ⁹ Kopocsicac hania yofi, yeni ni mi negensinnudae. ¹⁰ Nga faka dindingacac hania yofi, ni Manggacaru emba ngeni mi nenggecde. ¹¹ Amma desi desiac hania yofi, bangetoa bangec yomocac ngictau ye yoacf u bic makpeec.

¹² Nga nearu ngeneac yoac homacngoc fede. Nga ngeni ine yaguc imoc tofohoma mekecgecdeacsoc mi ande. ¹³ Yoac foraac Asu maude, yeng yoac forau mekpedzuc angemmedarude. Amma ye yengena ubeaac yoac mi deude. Ye Anutuarunac yoac negengande, imoc deude nga faka ngadeu fingebesande, imocac momoc edengunuude.

¹⁴ Ye ni dekperagingemmema kpac kuneng nenude, nocac ye neanna ubatohonnunac yoac imoc meude. ¹⁵ Manggacaru wiac sasawa fede, imocac mingina ni. Imocac amma yofi deduae, wiac sasawa Asungo mema dekperagingemmemeude, imoc nearunac. ¹⁶ Ngeni naso wegenanec mi nenggecde nga naso wegenanec monggoc fede, imohai nenggecde.”

¹⁷ Ifi deu medacfora goa yenaocngoc kpesiemegec, “‘Naso wegenanec fede, imohai mi nenggecde nga naso wegenanec monggoc fede, imohai nenggecde.’ yoac imocac hania dafi? Amma monggoc dedac, ‘Ni Manggaru kembade.’” ¹⁸ Anu negenggec obohou degec, “Naso wegenanec fede, imocac hania dafi? Neni yoac imocac hania obohodimbe.”

¹⁹ Medacfora yeneng kpesimibeso anggec Yesungo imoc bic negemma yofi edeyunuec, “Naso wegenanec fede, imohai mi nenggecde nga naso wegenanec monggoc fede, imohai nenggecde. Imocac ngenao cngoc kpesi medae me?” ²⁰ Foracngoc, ngeni kiac songgong ammagec bangectoa bangec yomocac ngicngac yeneng sogaigecde, imoc edengunuduae. Nga ngeni ubahodung anggec ubahodungngina imocngo merennu ngeni ubangerec monggoc meficgegecde. ²¹ Ngac mong ye medacmeme nasoya wegene hau kpendzeng kpema sabac meude. Sabac mema ye kpendzeng imoc nigeckpeude. Ye sabac bangecfu bic fingecdac, imocac amma sogaiude. ²² Ngeni imocacsoc yaguc ubaebicgoc kecdae. Amma monggoc ngenemba imohai ngeni ubangerec negemma sogaigec ngic mongngo sogac sogaingina imoc naric mi meickeude.

²³ Anu naso imohai ngeni wiac monggac mi kpesinenggecde, kpac. Foracngoc, ngeni wiac monggac neac kpacfumanggac numumigec yeng imoc ngemmeude, imoc edengunubade. ²⁴ Ngeni warac neac kpacfumanggac mi numukecgec. Nga sogac sogainginango hafoanggoc fengemmeudeac ngeni wiacac numuma mebisia.

²⁵ Ni yoac heima yoac edengunu kefai. Kecma nasoya hau ni yoac heima ngenearu monggoc mi debade, kpac. Ni didiu yombong Manggaru wiac dekperagibade. ²⁶ Naso imohai ngeni neac kpacfumanggac numugecde. Nga neng ngeneac amma Manggaru numubade, imoc mi deduae. ²⁷ Ngeni heregoc neac songo negendaе nga ni Manggaru runac hayai, imoc negensinggegecde. Imocac Manggaru yengenaoc ngeneac songo negende. ²⁸ Ni Manggaru runac hama bangecfu mayai nga monggoc bangec wama Manggaru dzigene kembade.”

²⁹ Ifi deu medacfora yeneng degec, “Negenna, ge yaguc yoac mi heima didiu denec.” ³⁰ Amma wiac sasawa negendacnec, imoc yaguc negendimbe. Ge monggo kpesienggecdeac mi obohonecac amma ge Anutuarunac hanec, imoc negensinggedimbe. ³¹ Ifi degec Yesungo medacfora yofi edeyunuec, “Ngeni yaguc negensinggedae.”

³² Negenggec, naso mong hade nga bic hadac imohai ngeni ni tembuclna wanuma ticpac tohoma sinsararang kpema tembuclna amanginasoc kenggecde. Nga tembuclna mi kecbade, nocac Manggaru nigoc kefude. ³³ Ngeni nearu ruaegoc kecgecdeac yoac yoc edengunuduae. Nga ngeni bangectoa bangec yomohai kpendzeng kpema kecgecde. Nga ni bangec yomoc bic feraheaiac ngeni ubangina kuha mi mabeso.”

17

¹ Yesungo yoac imoc dema kiwa kurumennu fiu enu yofi numuec, “Manggaru, naso bic hadac. Ge medacgaac kuc nga kibikperagi ngicngac mekperagiyemmena. Ge ifi anna Medacngoc ifingoc geac kuc nga kibikperagi ngicngac mekperagiyemmeude. ² Geng bangecngicngac sasawa yeac kuc bageau faiyununec. Nga yeac areng denec yeng kekecseri yemmeudeac yenyi yeac bageau kecgecdeac uayoac nga kuc ye minec. ³ Anu yenyi Anutu mocgungo fora kecde amma yeng Yesu Kristo sueu maec negennurugecde, imocngo kekecseriac hania. ⁴ Ni ua mebadeac denennec, imoc mesiai amma geac kuc nga kibikperagi bangecfu mekperagiyemmeai. ⁵ Manggaru, bangec nga kurumeng mi fingecmaecngoc ni geac kicfu kuc nga kibikperaginagoc kefai, ge kuc nga kibikperagina imoc nenna.

⁶ Manggaru, ge geanggaoc ngicngacfocga bangec yomohacnac meisingyununa geac kpacga mekperagiyemmeai. Yenyi geac ngicngac kecgec geng yenyi nennec nga yeneng yoacga tofohoma kecgec. ⁷⁻⁸ Amma enacyoac nennec, imoc bic yemmeba megec. Imocac yenyi wiac sasawa gearunac hau nennec, imoc negendaе. Nga geng suenuna gearunac hayai, imoc ifingoc yaguc fora yombong negendaе.

⁹ Imocac yeneac numugenduae. Bangectoa bangec yomocac ngicngac yeneac mi numuduae, kpac. Ni geng ngicngac nennec, yeneac amma numugenduae nocac yeni geac ngicngac areng ¹⁰ nga neac wiac sasawa imoc geac nga geac imoc neac. Nga ni yeneac kekecfu kuc kibikperagigoc mema kecduae. ¹¹ Kekecnasona bangecfu wisickebeso ammanu yeni bangecfu kecmagec neng gearu habade. Kpetiac Manggac, nerang mocgu nga ifi isoc yeneng mocgu anggecdeac geng kpacga nennec, imoc arennu yenenggareng ambesena. ¹² Neng yenigoc kefai, naso imohai kpacga nennec, imocngo garengyunuma onggongyunuba ngic mongngo mi sufuec. Yenearunac mocgusac, hofeac medac, yeng manganeec. Mitikibiu yoac fede, imoc hafoangoc fora fingerudeac ifi fingerec.

¹³ Anu neac feac feacngo yenearu sokodarudeac amma yoac sasawa yomoc bangec yomohaingoc dekperagima yaguc gearu habade. ¹⁴ Ni enacyoacga yemmeai. Amma yei kuriha kecduaeac bangectoa bangec yomocac ngicngac yeneng ubango ukunugec nga siriha imocngoc yeni kuric kecdaeac bangectoa bangec yomocac ngicngac yeneng yeni ubango ukuyunugec. ¹⁵ Ge bangecfunac meicyununadeac mi numugenduae, kpac. Manganaac minginango memayunubacac geng kaso ayemmebesena, imoc numugenduae. ¹⁶ Ni bangectoa bangec yomohanac kpac nga yeni ifi isocngoc yomohanac kpac. ¹⁷ Geac yoac imoc fora amma imocngo kpetiac kekecfu meyadiyunubeso. ¹⁸ Nga geng ni bangectoa bangec yomohai suenunec, ifi isocngoc neng yeni bangecfu sueyunuduae. ¹⁹ Yeni yoac forau kecma kpetiac kecgecdeac neng yeneac amma kpetiac kekecfu kecduae.

²⁰ Anu ni yeneacsac mi numugenduae. Nga enacyoacga degec ngicngac yeneng imoc negemma negensinnugecde, yeneac momoc numugenduae. ²¹ Yeni sasawa mocgungoc anggecde nga geng suenunec, imoc ngicngac bangectoa bangec yomohai negensinggecdeac yeneac yofi numugenduae, Manggac, ge neac hereu kecnec nga neng geac hereu kecduae, siriha ifingoc yeneng nerang here manau kecbisia. ²² Nerang mocgu kecdipe, ifi isoc yeni mocgu kecgecdeac amma geng kuc kibikperagiagoc nennec, imoc bic yemmeai. ²³ Yeni mocgu yombong kecgecdeac neng herenginau kecba geng neac hereu kecnade. Ifi fingeru bangectoa bangec yomocac ngicngac yeni geng suenuna mayai, imoc negentegecgecde. Nga ge neac songo negennec, ifi isoc yeneac songo negengkecne, imoc ifingoc negentegecgecde.

²⁴ Manggac, bangec nga kurumeng mi fingecmaec ge bic heresongogoc hoannuma kuc nga kibikperagi nennec. Nga ngicngacfocna nennec, yeni neac kuc kibikperagiagoc imoc henggecdeac neng kecbade, imohaingoc nenahafoc kecnideac anende. ²⁵ Faka dindingacac Manggac, bangecngic yeneng ge mi negenggugec neng ine negenguai. Nga geng ni suenuna mayai, neac ngicngacfocna imoc bic negendae. ²⁶ Geng ni songogoc hoannunec, songo imocngo yeneac hereu feude nga ni herenginau kecbadeac neng geac kpac bic dekperagiayemmeai amma dekperagiayemmebade.”

18

¹ Nunumu wisickeu Yesungo medacfora yenigocmekemma Kidrong doku ferecgema noboc yufu ua mong feec, ihai kemma enggec.

² Nga Yesungo medacfora yenigoc naso homac imohai kpeturanggekecgec Yuda ye Yesu docfu faiu megecde, yeng ifingoc yufuu imoc negenec. ³ Ye ifi negemma womong gareng enara nga farisaio yeneac wasaingic amma keracnatang meyunuu haec. Hama yenahafoc kifa hania hania nga yareac wiac goa momoc mekenggec.

⁴ Anu Yesungo faka fingecmiude, imoc bic negendarecac amma yenearu wegenac kemma yofi kpesiyemmeec, “Ngeni merac hofocdae?” ⁵ Kpesiyemmeu degec, “Yesu Nadzaretengic, ye hofocdimbe.” ifi degec Yesungo yofi deec, “Imoc ni.”* Ifi demanu Yuda Yesu doc meec, yeng yeneac botucfu nanec. ⁶ Nga Yesungo yofi deec, “Imoc ni.” imohai yeni ngade ngade kemma bangecfu makpegec. ⁷ Kpfemagec monggoc

* 18:5: “Imoc ni” imoc Anutuac kpac mong Miti eseau yemmeyemmea. Ge yoac goaac dedekperagi imohai henna. Hafac 1128.

kpesiyemmeec, “Ngeni merac hofocdae?” deu degec, “Yesu Nadzaretengic.” ⁸ Ifi degec Yesungo yofi merenec, “Ni bic edengunudua, imoc ninoc. Ngeni ni hofocnudaeu naric medac yomoc wayunugec kembisia.” ⁹ Nga Yesungo yoac bic deec, imocnggo hafoangoc fora anudeac torokpema yofi deec,

“Ge ngic nennec, yenearunac mong mi waba sufuec.” *(Yohane 6:39)*

¹⁰ Anu Simong Petoro yeng wasaibeang mong ameagoc mekefec, imoc kpedzima imocngo womong gareng enaraac wanacngiha kpara Mariku, ye kpema kedzaha foiaugeng herecgeec. ¹¹ Herecgeu Yesungo Petoro yofi edeec, “Ge beangga ameau faina kemeu. Manggacngko kpendzenggac sokoc nenec, imoc nedacbesare.”

¹² Anu wasaingic nga enara amma yudangic yeneac keracnatang yeneng Yesu mendanggema maria dzegema ¹³ hanahema Hanasiaru mekenggac. Nga Hanasi kpegea Kaifa ye kifanaso imohai womong garengtoa kefec. ¹⁴ Nga “Ngic mocgungo ngicngac areng yeneac amma homeude, imocnggo ngereeude.” Imoc Kaifango yudangic bic dederecge ayemmeu feec.

¹⁵ Yeni Yesu mekemmagec Simong Petoro nga medac ogea mong, yeri Yesu modaroc. Modarec medac imocnggo womong garengtoa negemmiec yeri Yesu modacma womong garengtoaac ama imocac oda manaungoc enec. ¹⁶ Enu Petoro ye ine oda naguac ngadeau nanec. Nammanu medac ogeango womong garengtoa negemmiec, yeng mama nagugareng ngac naguu nanec, ye edema Petoro hesickeu oda manau enoc. ¹⁷ Emmaec wanac naroang nagugareng nanec, yeng Petoro kpesimie, “Ge ifingoc ngic mehadau, yeac medac me?” deu Petorongo deec, “Ni imoc kpac.” ¹⁸ Nga ama nomang anecac wanacngic nga keracnatang yeneng hama gerecmosora kpedzucnema figec wewengaima feu sebingina megec gereeu nanggac. Nammagec Petoro ye ifingoc sebia meu gereeudeac hama botucnginau nanec.

¹⁹ Anu womong garengtoango Yesu medacforaac nga yengena kpoukpou uayaac dekpesi ammiec. ²⁰ Ifi ammiu Yesungo yofi meremmiec, “Ni didiu bangefu ngicngac yoac edeyunukecma yoacna nasosoc kpekpeturang amanginau amma womongtoanginau dekefai. Nga yudangic sasawa kpeturanggeandae, imohai dema sufu sufuu mong mi deai. ²¹ Nga geng nocac imoc kpesinennec? Ngicngac yoac deba negenggac, yeni kpesiyemmena. Negenghenna, yoac deai, yeneng negendae.” ²² Ifi deu keracnatang yenearunac mong wegenac nanec, yeng Yesu kpepatanggema yofi edeec, “Ge noc sinnu namma womong garengtoaac yoac turunga ifi meremminec?” ²³ Ifi deu Yesungo yofi meremmiec, “Ni yoac mong mangana deduae, imoc dekperagina me fora deduae nocac nudang?” ²⁴ Ifi deu Hanasingo Yesu witihagoc sueu womong garengtoa Kaifa, yearu mekenggac.

²⁵ Anu Simong Petorongo sebia meu gereeu nammanu yeni kpesimigec, “Ge medacfora yeneac arenunac mong me?” ifi degec, yeng sebi heima deec, “Ni kpac.” ²⁶ Ifi deu womong garengtoaac wanacngic mong, ye Petorongo kedzaha herecgeec, yeac arenunac, yeng deec, “Ge yufu uau yegoc tacna neng genai.” ²⁷ Ifi deu Petorongo monggoc busic kpeu imohaingoc kokorecngko arohoec.

²⁸ Werekengau yeni Yesu Kaifaarunac wasaingic oda manau kecandae ihai mekenggac. Nga womong gareng yeni Anutuac kicfu wonongnginagoc amma makekenggac ramamedaha mi nebinggac dema ine oda manau mi enggac. ²⁹ Ifi anggec Piratongo sobennu mama kpesiyemmeec, “Ngeni ngic yomoc noc haniaac yoacf faidae?” ³⁰ Ifi deu yeneng turunga meremmiigec, “Ye faka mangana mi ambac dede gearu mi faibing.” ³¹ Ifi degec Piratongo yofi edeyunuec, “Ifi anu ngeni mekemma ngenang singngina modacma fakaya isinggema desigec.” Ifi deu yudangic yeneng degec, “Neni ngic mong kpeni homeudeac kuc mi metacdime.” ³² Yesungo warac yengena home homeac sing deec, imoc hafoangoc fora anudeac faka imocnoc fingerec.

³³ Nga Piratongo oda manau monggoc emma Yesu kpacma kpesimie, “Ge yudangic yeneac ngictau me?” ³⁴ Ifi deu Yesungo yofi meremmiec, “Ge yoac imoc geanggaoc denec me goango neac edegudauac denec?” ³⁵ Ifi deu Piratongo yofi meremmiec, “Ni yudangic

kpac. Geangga ngicngacfocga amma womong gareng enara yeneng nearu faigudau. Nga geng noc faka annec?"

³⁶ Ifi deu Yesungo yofi merennec, "Neac eucerereng imoc bangectoa bangec yomohacnac kpac. Imoc yomohacnac ambac dede ni yudangic yeneac mariu mi fainugecdeac enac tofoc tofohofocna yeneng neac amma yenigoc ewekpekpe ambau. Nga neac eucerereng imocngo bangec yomohacnac kpac." ³⁷ Ifi deu Piratongo deec, "Fora, ge ngictau mong me?" ifi deu Yesungo yofi merenec, "Geng neac ngictau mong denec. O, ni ua imoc mebadeac fingecma yoac fora imocac hepuc amma imoc dekperagibadeac bangectoa bangec yomohai mayai. Nga ngic mong ye yoac foraac arennu kecde, yeng neac ubaudumennaac kedzac kpeude." ³⁸ Ifi deu Piratongo deec, "Nga nocngo yoac fora ande?"

Ifi dema monggoc Yuda yenearu dzigene mama yofi edeyunuec, "Ni yeac kopocsic mong mi meficgeduae. ³⁹ Ni ngic mocgu makekenggac hombannu witicamaunac faingemmeba maande, faka ifi fedeac yudangic ngictaungina faingemmeba maudeac angemmede me?" ⁴⁰ Ifi deu yeni monggoc kucgoc yombong arohogec, "Ngic ye kpac, Baraba ine faina mabeso." Nga Baraba ye ine yarengic.

19

¹ Anu Piratongo deu wasaingic yeneng dzikacngo Yesu kpema sebia kperec merecge kpegec. ² Kpema somang batihema ngickunenggac ira isoc mengerema oruhau gborockegec. Nga yeni ngakpi mong herea giweng giweng heimigec kemeec. ³ Ifi amma hoangau hama degec, "Ohec, yudangic yeneac ngictau." Ifi dema kpekpepetang ammigec.

⁴ Anu Piratongo monggoc ngadeau mama deec, "Negenggec, ni ngic yeac kopocsic mong mi meficgeduae, imoc negenggecdeac amma wangecma maduae." ⁵ Ifi deu Yesungo ngakpia giweng giweng nga iraya waeagoc, imoc tacmanungoc mama nanu Piratongo deec, "Ngeni ngic yomoc henggec." ⁶ Ifi deu womong gareng enara nga keracnatang yeneng ye hemma kpacgec, "Mariponnu kpegec, mariponnu kpegec!" ifi degec Piratongo deec, "Ni yeac kopocsic mong mi meficgeduaeac amma ngenaoc wangecma kemma mariponnu kpegec." ⁷ Ifi deu yudangic yeneng meremma degec, "Ye yengena sebia meemma ni Anutuac medac deec, imocac neni dedeseriyoachina fede, imohai namma ye homebeso, ifi dedimbe."

⁸ Ifi degec Piratongo negemma monggoc damukpeec. ⁹ Damukpeu ye oda manau monggoc emma Yesu kpесimie, "Ge dahacnac yombong?" ifi deu Yesungo turunga mong mi merenec. ¹⁰ Ifi anu Piratongo monggoc kpесimie, "Ge neac yoac turunga nocac mi merennec? Ni naric mesigubade nga mariponnu naric gubade, imocac uayoac nga kuc nearu fede, ge imoc mi negennec me?" ¹¹ Ifi deu Yesungo meremma yofi edeec, "Ge kuc imoc wihamacnac mi genggena dede geanggaoc naric mi memanubang. Imocac yofi ande, ngic geac mariu fainudac, yeac kopocsicngo geac ferahede."

¹² Ifi deu imohaingoc Piratongo Yesu dafi kenudeac negensimanu yudangic yeneng kpacgec, "Ge ngic imoc wana kenudeu Sisa og ea mi kecnade. Mong ye yengena meemma yofi dede, 'Ni ngictau.' ye Sisa emmiude." ¹³ Ifi degec Piratongo imoc negemma Yesu wau kenudeac sing hoforec. Hofocma Yesu wangeru ama ngadeau mama bangecbisic botuha mong kpara Hocdzake, ihai desi desitatacfu emma tarec. Bangecbisic imoc hebiraio yoacfufa kpara Gabata.

¹⁴ Anu makekeng nasoac efac kpefac amma yaka kpedzucnegec femanu 12 kiroc wegeneu Piratongo yudangicngac yofi edeyunuec, "Ngeni ngictaungina henggec." ¹⁵ Ifi deu yeni kpacgec, "Meickena, meickema mariponnu kpeba homeudeac negendae me?" Ifi kpacgec edeyunuec, "Ni ngictaungina mariponnu kpeba homeudeac negendae me?" Ifi deu womong gareng enara yeneng meremma degec, "Ngictaunina imoc Sisa, mong mi kecde, kpac."

¹⁶ Ifi degec Piratongo mariponnu kpegecdeac maringinau faiec. ¹⁷ Faiu Yesu yenge-naoc mariponga tofohou bangec buma mong kpara Hasic degec nga hebiraio yoacfufa

Gorigata, imohai mekenggec. ¹⁸ Imohai kemma Yesu mariponnu kpegec. Nga yegoc ngic yohockang noboc nga noboc Yesu botucngirau, ifi yunugec.

¹⁹ Anu Piratongo yoacbuma mong yofi ohoma mariponnu faiu nanec, “Yesu Nadzaretenac, yudangic yeneac ngictau.” ²⁰ Anu Yesu mariponnu kpegec, bangecbisic imoc amatoa wegenacf u feecac amma yudangicngac homacngo kibi imoc osogec. Kibi imoc hebiraio yoacf u latingyoacf amma grikyoacf oho ohoya nanec. ²¹ Ifi oho ohoya femanu yudangic yeneac womong gareng enarafocngina yeneng Pirato yofi edegec, “Yudangic yeneac ngictau, ifi mi ohona. Ngic yomoc yengenaoc deec, ni yudangic yeneac ngictau, ge ifi ohobesena.” ²² Ifi degec Piratongo deec, “Yoac ohoduae, imoc ohoduanoc.”

²³ Anu wasaingic yeni Yesu mariponnu kpegec nanu wambaya mema mederegec, yohoc nga yohoc anu sokoma megec. Nga ngakpia imoc susuic dzuhura kpac, ²⁴ yeni imoc hemma denengeng amma degec, “Nenang yomoc mi mesuckema meracac anudeac kpeing kpeni.” Anutuac yoac hafoangoc flora fingerudeac wasaingic yeni ifi anggec. Yoac yofi oho ohoya fede,

“Yeneng wambana mederema ngakpina megecdeac kpeing kpegec.” (*Mitiyegec 22:18*)

²⁵ Anu Yesuac nonggonasia yeri nga Keropaac enema Maria amma Maria kpara mong Madara, yeneng Yesuac mariponnu wegenac kemma nanggec. ²⁶ Nammagec Yesungo songomedaha henu nonggeagoc wegenac nanec yeremma nonggea yofi edeec, “Nenggac, imoc geac medacyombongga.” ²⁷ Ifi dema medac, ifingoc edeec, “Medac, imoc geac nonggoga.” Ifi deu medac ye imohaingoc Yesu nonggea yegoc kefudeac wangeru ameanu kenoc.

²⁸ Uana mesidacdua, Yesungo imoc negemma yoac mitikibiu oho ohoya fede, imoc hafoangoc flora fingerudeac yofi deec, “Ni dokuac anende.” ²⁹ Ifi deu bokong mong waing aengagoc wake wakea nanec, yeni kondung sobing mong imohai mema wainnu nemuruckema babacmeacf dzegema faigec Yesuac enarau enec. ³⁰ Enu Yesungo waing imoc nema yofi dema arohoec, “Ni uana bic mesidacdua.” Ifi demanu ubea sorohoma mau asuya yaru homeec.

³¹ Uameme imoc makekenggac efac kpefacac naso anec. Nga yudangic yeneng ngic mariponnu yunugec, yeneac farengngina sabata nasou mariponnu mi nambeso negenggec. (Sabata naso imocngo hombang kuneng yombong.) Imoc amma wasaingic yeneng mariponnu ngic haningina kpetackema mesiyunugecdeac Pirato kpesimigec. ³² Kpesimigec wasaingic yeneng hama ngic Yesugoc mariponnu yurugec, yereac haningira monggac hanahema kpetackema monggac ifingoc kpetackegec. ³³ Kpetackema Yesuaru hama henggec, ye bic homeec, ifi anu hania mi kpetackegec. ³⁴ Nga wasaingic mongngo ine sangarango Yesuac pandzenga nembarackeu sac nga doku imohacsing maec. ³⁵ Ngeni ifingoc faka fingerec, imoc negensinggegecdeac amma ni kicnango hendarai nga imoc dekperagiduae. Amma ni wiac dekperagiduae, imocngo flora ande, imoc negenduae.

³⁶ “Yeni sira mong mi kpetackegecde.” (*Makekeng 12:46; Bangec kisiu 9:12; Mitiyegec 34:20*) Yoac yomocngo mitikibiu oho ohoya fede, imoc hafoangoc flora fingerudeac ifi fingerec.

³⁷ Mitikibiu yoac mong yofia fede,
“Nembarackegec, ngic imoc yeni kicnginango henggecde.” (*Dzekaraia 12:10*)

³⁸ Imoc wisickeu ngic mong kpara Yosefe Arimatianac, yeng Piratoaru kemma Yesuac fareng mesiudeac kpesimie. Kpesimi Piratongo desiu Yosefengo kemma Yesuac farenga mesiec. Imoc yofiac, ye Yesuac medac anu ye yudangic yeneac kengec kpeu fingectegecma mi kefec. ³⁹ Nga Nikodemo, ye warac tofocnac Yesugoc yoac yoac anoc, yeng ic sopea homuna gombunga ebiha 30 kiroacsoc, imoc mehaec. Sopo yereac kpacngira mira nga aroe, imocngo yerec yerecgea. ⁴⁰ Yeri imoc mehama yudangic yeneac fareng tonggo tonggoac faka modacma farenga mema sopongo kpedanggema

lineng kporucnggo tembonggeoc.* ⁴¹ Anu yeri Yesu mariponnu kpegec, bangec botuc imohaingoc ua mong feec, ua imocac manau kedzebe mong gboria ngicnggo memea nanec. Nanu kicsere ngic mong warac mi faigec, imohai faioc. ⁴² Yudangic yeni imohai hombanggac efac kpefac anggec nga kicsere imoc wegenac feecac Yesuac farenga imohai faioc.

20

¹ Sonda gboria uameme hanac hanaheau ama werec wereckenggac Maria Madarango kicsereu kemma kedzebe naguac hoctoa, imoc meic meickea henec. ² Ifi hemma monggoc nedzikemma Simong Petoro nga medac mong, Yesuac songomedaha, yeri edeyuruec, “Yeni Kebu kicsereunac meickema dhaigeng faidau, imoc mi negendimbe.”

³ Ifi deu Petoro nga medac ogea yeri kicsereu kemma ⁴ yeraha foc sinnu nedzikemma medacogeango kucgoc nedzima Petoro ferahema yeng bic kicsereu kensikeec. ⁵ Kensikema okarima henu kporucsusu tembonggegec, imocngosac tarec. Nga ye manau ine mi enec. ⁶ Simong Petoro ye ngade hama kicsereu emma henu kporucsusu imoc tarec. ⁷ Kporucsusu oruhau kperahagec, imocnggo tembuha kporuc tosea kpou faifaiango imocgoc mi tarec, ifi henec. ⁸ Ifi hemma nammanu medacogeaa waraima kicsereu kenec, yeng ifingoc kicsereu emma imoc hemma negensinggeec. ⁹ Imoc yofiac, Yesu homecfunac yacbeso, imocac mitikibiu oho ohoya feder, yeri imoc warac mi ireckemangoc ¹⁰ dzigenema amangirau kenoc.

¹¹ Anu Mariango kicsere ngadeau namma kiarec. Kiacmangoc okarima kicsereu kicfima henec. ¹² Henu angero yohockang yeri ngakpiherecngira kongac kongac yerenec. Yerenu Yesuac farenga feecfu, monggo oruhaugeng nga mongngo haniaugeng, ifi taroc. ¹³ Tacma kpesimio, “Ngac, ge nocac kiacnec?” kpesimie Mariango merenec, “Yeni Kebunaac farenga meickema dhai faidaauc obohoma kiacduae.” ¹⁴ Ifi dema dzigene henu Yesungo ngadeau nanec. Nanu Yesungo nande, imoc mi hentegeru ¹⁵ Yesungo yofi kpesimie, “Ngac, ge merac hofocma kiacnec?” deu negenec, “Ua minginango kpesinende.” ifi negemma deec, “Kunenna, geng Yesuac farenga meickema monnu faidang isoc edenuna kemma meba.”

¹⁶ Ifi deu Yesungo yofi deec, “Maria.” ifi deu dzigenema “Rabbouni.” deec. (Arama yoacf Rabbouni, imocac titiha kpoukpouna.) ¹⁷ Nga Yesungo yofi edeec, “Mannaaru mi enduangoc, imocac mi kpreseruna. Ge kemma tosofocna yofi edeyununa, ‘Ni Manna nga ngeneac Manggac amma neac Anutuna nga ngeneac Anutu, yearunoc embade.’” ¹⁸ Ifi deu Maria Madarango medac yenearu kemma Yesu henec nga yoac edeec, imoc edeyunuec.

¹⁹ Uameme imohaingoc ama bic toforemanu Yesu medacfora yeni yudangic yeneac kengecyuuu amangina nagu heima kpetinggema tacgec. Tacmagec Yesungo hama botucnginau namma yofi edeyunuec, “Ruae ngenearu febeso.” ²⁰ Ye ifi dema maria nga pandzenga edzacyunuec. Edzacyuuu medacfora yeni Kebu hemma sogaigec. ²¹ Nga Yesungo monggoc yofi edeyunuec, “Ruae ngenearu febeso. Mannango suenuu hayai, neng ifi isocngoc ngeni suengunuduae.” ²² Ye ifi dema enacasuya fifiyemmemma yofi deec, “Ngeni Tiri Asu megec.” ²³ Ngeni ngic yeneac kopocsic wayemmegecdeu kopocsicngina kpac anude. Nga ngeni kopocsicngina witickegecdeu kopocsicnginaac witicfu kecgecdengoc.

²⁴ Medac 12 yeneac botucfunac mong kpara Toma, Tombosonga degec, yeng Yesungo medacfora fingecyemmemec, naso imohai mi tarec. ²⁵ Imocac medac ogofora yeneng edegec, “Neni Kebu hending.” degec Tomango deec, “Ni kicnango biringngi kpegec mi hembade nga gbonnango maria titingau mi faibade amma pandzengau marinango mi faiba enudeu imoc naric mi negensinggebade.”

²⁶ Ifi deu uameme 8 imocac ngadeau Yesu medacfora nga Toma yenaha foc monggoc emma tacgec. Yeni nagungina heima kpetinggema tacmagec Yesungo botucnginau

* 19:40: Lineng imoc kpindzing mong ambiac ogea, imocnggo wamba mekecgec.

fingecma namma yofi deec, "Ruae ngenigoc febeso." ²⁷ Ifi dema Tomaac yofi deec, "Toma, gbongga sinena marinaac titingau enu nga kicgango henna. Amma mariga sinena pandzennau enu negengyohoc wama negensinggena." ²⁸ Ifi deu Tomango deec, "Ge Kebuna amma Anutuna." ²⁹ ifi deu Yesungo yofi edeec, "Ge kicngo nendanggac negensinggenec. Nga ngic mong ye kicngo mi hemma negensinggeude, ye kenehagoc."

³⁰ Yesungo medacfora yeneac kicfu ngicngac yeneng negensinggegecdeac faka kuhagoc homac mekenec, imoc kibi yomohai mi ohodarai. ³¹ Nga Yesu ye Messia Anutuac medac, ngeni imoc negensinggema kekec yeac kpacfu mekecgecdeac kibi yomoc oho ohoya fede.

21

¹ Imocac ngadeau Yesungo Tiberia dzohonnu medacfora monggoc fingecyemmeec. Imoc yofi fingerec, ² Simong Petoro nga Toma Tombosonga dekecgec amma Natanae Gariraia bangecfu Kanang taonnunac nga Dzebedaioac medahora amma Yesuac medacfora yenearunac ngic yohockang, yeni yenahafoc tacgec. ³ Tacma Simong Petorongo ogofora edeyunuec, "Ni kondungyanggac kembadeac negenduae." Ifi edeyunu degec, "Neni gegoc momoc kennide." Ifi dema yenahafoc gombau emma kemma tofocnac imohai kondungyang mong mi megec.

⁴ Wiac mong mi mekecmagec ama wereckenu Yesungo dzohong tegiau nanec. Nanu yeni Yesungo nande, imoc mi hensigec ⁵ Yesungo yofi kpesiymmeec, "Medacfocna, ngeni kondungyang mong medau me kpac?" deu yeni degec, "Kpac." ⁶ Ifi degec yeng yofi edeyunuec, "Ngeni ufcngina gomba foiaugeng ukugec kemeu goa meficgegecde." Ifi deu yeni deec imoc modacma ufcngina ukugec kemeu kondungyang ebiriango yombong ufcfu kemegecac kpedzibibiema wagec. ⁷ Nga Yesuac songomedacngo Petoro edeec, "Imoc Kebunoc." ifi deu Simong Petorongo negemma sebiasac nanecac ngakpia heima gombaunac yuma dzohonnu kemema waraiyemmeec. ⁸ Nga medacfora goa dzohong tegiaugeng 100 mitacsoc hereau mi tacgecac yeni gombau namma ufcngina kondungyangagoc kpedzi kenggec.

⁹ Kensikema tegiau emma henggec ic sogong goa nga kondungyang gerecyohocfu tarec. ¹⁰ Ifi taru Yesungo yofi deec, "Ngeni kondungyang goa yaguc medau, imoc mehagec." ¹¹ Ifi anggec Simong Petorongo tembuha gombau emma ufc kpedziu tegiau enec. Nga imoc kondungyang kuneng kunengngo wakema kpetengina 153 imocacsoc anec nga ufcngi sifu mi tegerec. ¹² Nga Yesungo yofi edeyunuec, "Ngeni hama menegec." ifi deu medacfora kengecyuu yenearunac mongngo, ge merac dema, mi kpesimigec. Imoc Kebunoc, yeni ifi bic negenggec. ¹³ Nga Yesungo gerek kiawu hama ic sogong mema yemmemma kodungyang ifingoc mema yemmeec. ¹⁴ Yesungo homecfunac yarec, naso imohai medacfora fingecyemmeec, imoc atac harebec anec.

¹⁵ Anu yaka negec wisickeu Yesungo Simong Petoro yofi kpesiymie, "Simong Yohaneac medac, ge neac songo heregoc negennec, imocngo tosofoga yeneac ferahede me?" ifi deu Petorongo deec, "O, Kebu ni geac heresongo negenduae, ge imoc bic negennec." Ifi deu Yesungo yofi deec, "Ge ramafocna medaha yaka gumecyunubesena." ¹⁶ Dema Yesungo monggoc deu atac yohockang anec, "Simong Yohaneac medac, ge foracngoc neac songo heregoc negennec me?" deu Simongngo deec, "O, Kebu ni geac heresongo negenduae, imoc bic negennec." ifi deu Yesungo yofi deec, "Ge ramafocna yeneac gareng kecbesena." ¹⁷ Dema Yesungo monggoc kpesiymiu atac harebec anec, "Simong Yohaneac medac, ge neac songo heregoc negennec me?" Yesungo kpesiymiu atac harebec anu Petoro ye negengebirima Yesu yofi edeec, "Kebu, ge wiac sasawa negendacnec. Ni geac heresongo negenduae, imoc bic negennec." ifi deu Yesungo yofi edeec, "Ge ramafocna meyunuma yaka gumecyunubesena."

¹⁸ "Ni fora yombong edeguduae, ge sebigbori kecma geanggaoc wambaga faima songoga modacma kenha angannec. Nga ge kpengeng annade, naso imohai mariga miacna ngic mongngo wamba heigemma songoga mi fede, imohai megu kemma

faigugecde.” ¹⁹ Petorongo homehau siric dafi homema Anutu dengereude, Yesungo imocac heabima deec. Amma monggoc edeec, “Ge hama modacnuna.”

²⁰ Yesungo ifi deu, Petorongo dzigenema Yesuac songomedaha henu yeng yeri modacyuruec. Ngic modacyuruec, yeng warac yaka negec, naso imohai Yesuac mondacf uheima merang doc meudeac kpesimiec. ²¹ Nga Petorongo medac imoc hemma Yesu kpesimiec, “Kebu, ge yeac dafi negennec?” ²² Ifi deu Yesungo yofi edeec, “Ni songona andeu yeng kecmanungoc dzigene habade, imocngo ine geac wiac mi ande. Ge eng hama modacnuna.” ²³ Ifi deu tosotora botucnginaunac yofi netohogec wakeec, “Medac imoc mi homeude.” Nga Yesungo mi homeudeac mi deec, kpac. Ye yofisac deec, “Ni songona andeu yeng kecmanungoc dzigene habade, imocngo geac wiac mi ande.” Yoac wisic wisickea

²⁴ Medaha imoc ninoc. Ni wiac yomocac hepuc amma dekperagima ohoai. Nga yoacna imoc fora, imoc negendimbe. ²⁵ Yesungo wiac goa homac meec, ngic mongngo wiac imocac yoac sasawa kibiu ohodacobac imoc bangectoa bangec yomohai faifaiac titinga negemba mi fingebac.

Aposoro Yeneac Siduc

¹ O Teofiro, ni warac yoac ohogenai, imoc Yesungo hanahema ua meec amma enacyoara kpounemmeec, imocac yoacsiduc seng anggendarai. ² Ye uaya mekengkefu nasoya wegene haec imohai Tiri Asuac kucfu aposoro warac meisingsyunuec, yени uaareng dederecge ayemmemma kurumennu enec, imocac siducnec ohodarai.

³ Yeng kpendzeng kpekecma homema monggoc gborima yacma uameme 40ac manau yengenaoc fingecsufu ayemmemma faka hania hania mema Anutuac eucererenggac hania edekpou ayemmeec. Ayemmeu yeni faka imoc hemma ye fora kecde, imoc negentegecgec. ⁴ Amma yenigoc tacyac amma yoac yofi edeyunuec, “Ngeni Yerusareng bic mi wabisia. Manggacac dedeseriyoac edengunuba negenggec, imoc fora kpeudeac tomai kecbisia. ⁵ Imoc yofiac, Yohane ye doku bic nadzicngemmeeec nga yoc ine naso mi hereemanu Tiri Asu nadzicngemmeeude.”

⁶ Ifi deu kpedzucnema tacgec yeneng kpesimigec, “Kebu, ge naso yomohai Israe ngicngac monggoc kpedzucnununa neni nenang bangec ngictauninagoc amma kecnide me?”

⁷ Ifi degec yofi edeyunuec, “Manggac ye kuc minginango yeng wenac me yabung-naso hania hania faiec feder, imoc negentegecgecdeac kuc mi ngemme ngemmea.

⁸ Negenggec, Tiri Asungo ngenearu mama kuc ngemmeu ngeni siducedefocna anggecde. Nga ngeni Yerusareng amma Yudaia nga Samaria bangec sasawa yerecgema yoacna dekenggec bangeha bangeha sokodacbeso.”

⁹ Yesungo ifi edeyunuma kicngina witiau efaima enec. Emmanu hoengng kicngin-aungoc merucgema meenec.

¹⁰ Meemmanu yeni fimodacma hofogec ngic yohockang ngakpingira kongac kongac-ngo mi yenearu fingecma nambesera i. ¹¹ Namma yofi edeyunuoc, “Gariraia bangecfunac ngic, ngeni kicngina sawau fimangoc mi nambisia. Anutungo Yesu kurumennu meenu ye wangunuma endac. Amma ngic enu hendau, yennoc kecma siriha ifiangoc habesande.”

¹² Anu aposoro yeni Oriwa tikibumaunac dzigenema mama Yerusarennu enggec, imoc sing wegenac anu sabata nasou sing imoc naric kengha angkecgec.* ¹³ Yerusarennu kemma ama tacyac angkecgec, imohai emma tacgec. Tacgec, yeneac kpac yofi: Petoro nga Yohane amma Yakobo, Anderea nga Firipo amma Toma, Batoromaio nga Mataio amma Yakobo Arifaioac medac, Simong Dzerote nga Yuda Yakoboac medac. ¹⁴ Ngic imoc yenennoc uba mocgu amma nunumu ua tatahoc mekecgec. Ifi anggec Yesuac nonggea Maria nga ngac goa amma Yesuac munafora, yeneng yenigoc yenahafoec kecma nunumu ua momoc mekecgec.

¹⁵ Anu Yesuac arengfora 120 nganoc ifingo kpedzucnema tacmagec Petorongo botucnginai namma yofi edeyunuec. ¹⁶ “Negen negensinggoc tosofocna, negenggec, Yudango ngic hesicyunu kemma Yesu mendanggegec, yeacnoc Tiri Asungo bicngoc Dawidiac enacfu yoac faiu ohoec, imoc fora fingecbeso, imocac ifi anec. ¹⁷ Yuda warac nenang arenocc amma kefec, ye nenahafoec Kebuac uamemeac denecdenemmea.”

¹⁸ “Amma ngic yeng faka manganaac dzo mema ua bangec mong bummeec, ihai kemma oruhango kpemeremma kekpeu wosea kpendziru keracbawa madarec. ¹⁹ Amma imocac siduc Yerusareng ngicngac sasawa negendacma bangec, imocac kpara Akedama degec, titiha yofi, ‘Bangec sac maefcu.’ ”

²⁰ “Mitiyegecfu yoac yofi oho ohoya fede,
‘Ye amabangeha kisi fingeru ngic mongngo yeac kporucbedzou mi tacbeso.’ (Mitiyegec 69:25)

Amma monggoc yofi,
‘Ngic mongngo yeac ngicenaraac tatac mebeso.’

(Mitiyegec 109:8)

* ^{1:12:} Imoc 800 mitasac anec.

²¹⁻²² Imocac amma ngic mong yeac turunga meisinggbesonga. Yohanengo Yesu mitidoku nadzicmiu uaya hanahema mema nenanggoc kengha kecma kurumennu enec, naso imohai ngic nenanggoc kecgec, ngic imoc yeneac botucfunac ngic mong isinggeni yang nenanggoc Yesu homecfunac yarec, imocac siduc nenahafof debisina.”

²³ Petorongo ifi deu ngic yohockang maficyurugec: Mong kpara Yosefe Basaba dekecgec, yeac kpara mong Yusto, amma ogea Matia. ²⁴ Maficyuruma yofi dema numugec, “O, Kebu ubaheheng mingina, ge ngic yohockang yoc yerearunac daoc meisinggema edzacnununa henni. ²⁵ Henni yang aposoro kpac mema Yudaac tatac mebeso. Yuda ye tataha imoc wama yengena sing monnu kenec.” ²⁶ Ifi dema numuma meisinggeudeac kpeing kpegec Matia heficgeu aposoro 11 yenearu torokpegec.

2

¹ Pentekos tacyacac naso wegenemanu yenahafof ama mocguu kpedzucnema engensicfu tacgec.* ² Tacmagec kurumennunac udumengtoa mong firang kucgoc kpeande, imocac udumeng isoc ioha yombong fingecma maec. Mama ama tacgec, ihai emma wakeu ³ yeni siriha yofi henggec: Nedzarang gerezborang isoc fingecma ngicngac orucnginasoc tohma tackenec. ⁴ Anu Tiri Asungo ubanginau kemema wakeec. Wakeu yoac siriha mong mong degec. Asungo minginasoc maficgeyemmu yoac dekenggec.

⁵ Anu yudangic homac bangec noboc nobocnac hahayango Yerusareng taonnu tacgec, yeni Anutuac yoac modacma kecgec. ⁶ Nga udumengtoa fingeru habu homacngo imoc negemma hama kpedzucnema kerectegec anggec. Imoc yofiac, Tiri Asugoc yeneng ngicngac yeneac yoacnginausing tembus tembus degec negenggec. ⁷ Negemma kerectegec amma warecyunuma degec, “Ngic yomoc yoac andae, yeni sasawango gariraiangic. ⁸ Nga yeni dafiu nenang yoacninausing yombong tembus tembus degec negendimbe?”

⁹ Neni yoc patangic nga medengic amma erangngic, me Mesopotamia bangecfunac nga Yudaia bangecfunac amma Kapadokia bangecfunac, neni Ponto bangecfunac nga Asia bangecfunac, ¹⁰ amma monggoc Firigia bangecfunac, neni Pamfuria bangecfunac nga Aigita bangecfunac amma Ribia bangecfu Kirene ama tegia tegia, imohacnac amma Roma taongtoanac hading. ¹¹ Amma yudangic nga bangec monnunac ngic yudangic yenigoc torokpegec, kretangic amma arabiangic. Nenang ifingoc kecma yoacninasoc Anutu fakatoayaac yoacsiduc degec negendimbe.” ¹² Ifi dema kerectegec amma obohoma denegeng amma degec, “Faka fingecde, imoc wiac siriha mong yombong, imoc mi negentegecdimbe.”

¹³ Goango ine yeneac deendema amma yofi degec, “Yeni waingdoku homac nedauac ubangina sufude.”

¹⁴ Ifi degec Petoro ye tosofora 11 yenigoc namma ubea meyadima yofi edeyunuec, “Yudangicngac amma ngicngac sasawa Yerusarennu kecdae, ni faka yomocac hania dekperagingemmeba negenggec. ¹⁵ Ngeni ngic yomoc yenemma yofi negensidae, ‘Waingdoku nema ubangina sufude.’ ifi kpac. Yaguc asoac 9 kirocsac andeac waingdoku mi nedau, kpac. ¹⁶ Nga faka yomocacnac, profete Yoelengo yoac yofi deec,

¹⁷ ‘Kebungo yofi dede, “Naso wisikebeso ammanu ni Asuna kpakeba mau ngicngac sasawango medacgecde. Amma naroang medacfocngina yeni profeteyoac degecde nga sebigborifocngina onga henggecde amma yadafocngina gaukpefing henggecde. ¹⁸ Amma naso imohainoc ni enac tofoc tofoho ngicngacfocna, yenearu Asuna kpakeba mau yeni profeteyoac degecde. ¹⁹ Amma deba wi sawau soi fingerude. Nga emu bangecfu faka bibiagoc siria hania hania fingerude. Naso imohai sac nga gerec amma hosuctoa fingerude. ²⁰ Kebuac nasotoaac kuc kibikperagiagoc mi fingecmanu wenackiwa meremma kundung kpeude nga afokiwa sac isoc anude. ²¹ Anu Ngicngac yeneng KEBUAC kpac kpegec Anutungo

* ^{2:1:} Pentekos tacyacac naso imoc Yuda yeneac hombang mong anec. Imocac oho ohoya yomohai fede: Makekeng 23:16; Sesememe 23:15-16; 34:22; Bangec kisiu 28:26-31; Dedeseri 16:9-12.

yeni sasawa kopocsicnginaac ebicfunac mesiyunu komoc kpegecde.” , (Yole 2:28-32)

²² Israengic, ni edengunuba negenggec, Yesu Nadzaretenac, ye Anutungo meefaima nonggo tacmimanu botucngina faka kuhagoc nga negensinggegecdeac faka kuhagoc nga faka mi hengena meec. Imoc bic irecireckeac hania hentegecgec. ²³ Yeacnoc Anutungo bicngoc negenu feec, imocac sing desima ngeneac mariu faiec. Ngeneng ye bangec monnunac ngic, dedeseria kpac kecdae, yeneac mariu faima edeyunugec yeni ye mariponnu kpegec homeec. ²⁴ Anu homecngo ye naric mi segereec. Imocac Anutungo homecac kpendzennunac megboriu yarec. ²⁵ Dawidingo yeac enac mema yofi deec, ‘Ni nasosoc kicna KEBUARU fikecdue. Yeng foinaugeng kecdeac wiac mongngo menuu goroc goroc naric mi ambade. ²⁶ Imocac ubaherenango ubangerec negemma nedzarannango sogaiu sebina ifingoc ruaegoc anude. ²⁷ Geng ubaongana wana homec amau naric mi kemeude. Ge enac tofoc tofohongicga onggonggena kicsere naric mi henude. ²⁸ Geng kekecac sing kpounennec. Geac kicfu sogac sogai hafoangoc fede nga foigaugeng ubangerec feengkefude.’ (Mitiyegec 16:8-11) Yoac imoc Dawidingo dekperagie.

²⁹ Tosofocna, bangecnina Dawidiac hania dema enacefac yofi edengunuba, ye homeu tonggogec. Anu kicserea feecngo yaguc fede. ³⁰ Ye profete kefecac yofi negenec, ‘Anutungo yeac bangecyombonga yeneac arenunnac medaha mong meisngema ye ngictautatahau faiu tarudeac deseriec.’ (Mitiyegec 132:11)

³¹ Imoc kpefing hemma negemma Kristo yacyahaac yofi deec, ‘Anutungo enac tofoc tofohongiha onggonggeu kicsere naric mi henude.’ (Mitiyegec 16:10)

³² Anu Yesu yenoc Anutungo homecfunac midiu yaru neni kicninango fora hendaring.

³³ Ye yacma dzigene enu Anutu marifoango seseheec. Nga Mamango warac Tiri Asu miudeac deec, ye imoc mema kpakeu maec, imoc yagucnog hennegeng andae. ³⁴ Dawidi ye kurumennu mi enec, kpac. Yeng ine yoac yofi deec,

‘KEBUNGO neac Kebuna yofi edeec, “Ge foinaugeng tacmana ³⁵ ngabafocga hanigaac bageau faiyunuba yeni hanititiga anggecde.”’ (Mitiyegec 110:1)

³⁶ Imocac amma israengicngac sasawa, ngeni yofi negengyombonggebisia: Ngeni Yesu mariponnu kpegec, ngic imocnog Anutungo Kebu nga Messianina fainemmeeec kecde.”

³⁷ Petorongo yoac ifi edeyunu herengina yaru, yengena nga aposoro arengfora yofi kpesiyemmegec, “Tosofoc, neni dafi anni, ngereeude?”

³⁸ Ifi degec Petorongo yofi edeyunuec, “Kopocsicngina kpac anudeac ngeni tembus tembus Yesu Kristoac kpacf u bangina dzigene doku nadzicgec. Ifi anggec Anutungo wosoefahaac Tiri Asuya ngemmeude. ³⁹ Nga dedeseriyoac imoc ngenang nga nambarac-focngina amma hereau kecdae, Kebu Anutuninango kpacngunuma heitaingunuudesoc, ngeni naric megecde.”

⁴⁰ Petoro ye ifi dema gorongina kpema yoac homac torokpema edeyunuec, “Kebungo ngic mangac manganea yeneac faka imohacnac mesingunu ngeni komoc kpebisia! Yenigoc manganema kpac ambauac.” ⁴¹ Anu wenac ihai ngicngac 3 tauseng yeni Petoroac yoac negensinggema doku nadzicma Yesuac habuu torokpegec.

⁴² Anu aposoro yeneng siduc gombung kpouyemmegec imoc negenggecdeac yenang singngina meserima kecma ubango dedzege amma uba urecfu yaka nema nunumu ua mekecgec. ⁴³ Nga aposoro yenearu faka kuhagoc nga faka morora hania hania fingectegerec ngicngac sasawango kerectegec anggec. ⁴⁴ Anu Yesu negensinggec, yeni uba urecfu wiac sasawangina imoc mekecgec. ⁴⁵ Amma yeni bangec nga hiefinacngina suegec dzo kirecgeu tosofocngina wiac hofocgecsoc medereyemmegec. ⁴⁶ Nga ngicngac wenacsoc Anutuac womanu uba mocgu amma kpedzucnekecgec, yeni uba urecfu amaya yaka nekecma yakangina imoc ubangerecgoc mederema emenec angkecgec. ⁴⁷ Ifi amma Anutu dengerema kecgec ngicngac habutoango yeneng dzidziema eweheihei

ayemmegec. Anu Kebungo wenaha wenaha ngicngac kopocsicfunac mesiyunu komoc kpegec yengena arennu torokpeyunuec.

3

¹ Wenac monnu 3 kiroc marai nunumunaso anu Petoro nga Yohane yeri Anutuac womonnu enoc. ² Anu ngic mong hanimangang nonggo heremanaunac ifia fingerec, ye Kebuac womonnu nagu mong kpara Nagukereng, ihai wenaha wenaha tofoho emma faigec takefec. Ye ngicngac womonnu engemmama anggec, yenearu ubangerecac wiacak derecgeudeac ifi anggec. ³ Ngic imocngo Petoro nga Yohane yeri womonnu embeso ammaec yeremma ifingoc ubangerecac wiacak derecgeyemerec. ⁴ Derecgeyemeru yereng ye henserioc. Henserima Petorongo yofi edeec, “Ge nerenna!” ⁵ Ifi deu “Yereng wiac mong nembesonga dedape.” ifi negemma kic fima yerenec.

⁶ Yeremmanu Petorongo yofi edeec, “Ni hiedzona kpac nga wiac mocgu fenende, imoc ine gamba mena! Yesu Kristo Nadzaretenac, yeac kpacfу acma kenna.” ⁷ Ifi dema marifoiau mema miaru imohaingoc hania ubea seriec. ⁸ Seriu kucbiric acma namma yerigoc womonnu enggec. Emma yeng yu engemmama nga sing kengha amma Kebu dengereec. ⁹ Kebu dengerema kengha anu ngicngac hafoangoc yeneng hemma degec. ¹⁰ “Yennoc womonggac nagu kpara Nagukereng, ihai hiedzoac derecgeyemeudeac takefec.” Ifi dema hensima kpidohoma dzonong fede fede anggec.

¹¹ Ngic ye Petoro nga Yohane yerearu kpeketaheu ngicngac homacngo Anutuac womong mana kakasang mong feec, kpara Saromo, imohai yerearu kemma kpedzucnedacma kerectegec anggec. ¹² Ifi anggec Petorongo yenemma ngicngac yofi edeyunuec, “Israe ngicngac, ngeni ngic yomoc hemma kerectegec mi ambisia. Amma ngeni neri mi nerenseribisia. Faka imoc nereac kucac mi fingecdac nga imoc nereng Kebuac kicfu gombunga kecdipeac mi fingecdac. ¹³ Imoc kpahac, kisicfocngina Abrahang nga Isaka amma Yakobo, yeneac Anutu yennoc enac tofoc tofohoa Yesu ngickunenggac kuc kibikperagiagoc miec. Ngeni ine ye ngadehema bangec monnunac ngic Anutu mi negemmidae, yenearu faigec. Foracngoc, Piratongo yoara isingga yungecbesonga desiec. Nga ngeneng ine wagec. Amma godzungicngo ngic mong kpeu homeec, ngeni yennoc yungecngemmeudeac serima dema ¹⁵ kekecac enarameme kpegec. Nga Anutungo ye homecfunac megboriu yarec, neni imocac hepuc aning.

¹⁶ Nga neri Yesuac kpac kpacma negensinggedicac ngic yomoc hendae, ye kuc medac. Nga Yesuac kpacfу nege negensinggoc kecdipe, imocac amma ye ngereehomedac. Ngeni sasawango faka imoc hendae.

¹⁷ Tosofocna, ngeni nga garengfocngina Yesuac hania mi negemma ifi anggec, imoc yaguc negentegecduae. ¹⁸ Foracngoc, Anutungo Messia meisinggeec, yeng kpendzeng kpekecma homeudeac profete sasawa yeneac enacfu yoac faiu degec, imoc sasawa Anutu deecfu fingecdarec. ¹⁹ Imocac ngeni kopocsicngina kpac anudeac ubangina dzigeneu Anutu hoanggebisia. ²⁰ Ifi anggecdeu Anutuac hoannunac kenec kuhagoc haude. Amma bicngoc Messia meisinggengemmeec, ye suengemmeude, imoc Yesunoc. ²¹ Ye kurumennu emma kecmanungoc, wiac sasawaac mengec mengere naso hau dzigeneude. Imocac yoac Anutungo bicngoc yombong kpetiac profetefora enacnginau faiu dekperagigec. ²² Mosengo yofi deec,

‘Kebu Anutunginango ngeneac arennunac profete mong ni isoc, ifia meficgengemmeu yeng yoac sasawa deude, imoc negendacbisia. ²³ Anu monggo profete imocac yoac mi tofohoudeu ye arengnginaunac meickema kpehomebesonga.’ (*Dedeseri 18:15,18-19*)

²⁴ Naso yomohai faka fingecdac, imoc Samuearunac profete sasawa nangeregec, yeneng bic dekperagigec. ²⁵ Anutungo kisicfocngina yenigoc dzadzahac mema Abrahang yofi edeec,

‘Bangefocga yeneac arennu ngicngac bangeha bangeha keneheyunudacbade.’ (*Fingec fingec 22:18; 26:4*)

Ngeni dzadzahac imoc nga profete yeneac yoac maridzoming imoc mekecdae. ²⁶ Ngeneacnoc bic negensima Anutungo medaha sueu mama fingerec, imoc ngeni sasawa kpenggodzuac sinnunac merengngunuudacma kenecngunuudeac ifinoc anec.”

4

¹ Petoro nga Yohane yeri ngicngac yoac ifi edeyunuma nammaec womong gareng amma womonggac tebengic enara nga sadukaio yeni yenahafoc yerearu kemma ihai nanggec. ² Nga ngic nanggec yereng yoac edekpou ayemmemma Yesu ye enaranina mema homecfunac yarec, imocac yoacsiduc desaheyemmedarec yeni herebu negemma ngaba ayecmegec. ³ Ifi ayecmema mendangyuruma ama bic marai anecac witicamau faiyurugec tacmaec ama wereckenec. ⁴ Anu habutoango Petoro yoac deu negenggec, yenearunac homacngo imoc negensinggema Yesuac habuu torokpegec. Anu ngicngac imoc kpetengina 5 tauseng anec.

⁵ Wereckengau yudangic yeneac tutumangtoaac memba nga enarafocngina amma mitiac negen negengngic, yeni Yerusarenヌ kpeturanggegec. ⁶ Kpeturanggema womong garengtoa Hanasi nga Kaifa amma Yohane nga Aresande amma womong gareng enara kecdae, yeneac arengfocngina sasawa yenahafoc kpedzucnema tacgec. ⁷ Tacma Petoro nga Yohane meyuru hama kicnginau faiyurugec. Faiyuruma yofi dekpesi ayecmegec, “Ngeri noc kucfu nga meracac kpacfu faka yomoc medaoc?”

⁸ Kpesiyecmegec Petoro ye Tiri Asungo ubeau wakeu yofi edeyunuec, “Enarameme nga Israe garengfocnina deba negenggec. ⁹ Ngeni ngic hanimangang ye dafi ngereedac amma yearu faka gombunga dafi fingecmidac, imohaingoc kpesinecmebau. ¹⁰ Ngeni nga israengic sasawa negenggecdeac yoac yofi deireckebea, ngeneng Yesu Kristo Nadzaretenac mariponnu kpegec homeu Anutungo ye homecfunac megboriu yarec kecde. Nga yeac kpacfu ngic imoc ngereema kicnginau nande.

¹¹ ‘Amameme ngic yeneng hoc mong mangana dema ukugec. Nga hoc imocngo amAAC hoc wotung amma seria nanude.’ (*Mitiyegec 118:22*)

¹² Ngic monggaru kpeketahegec yeng kopocsicac ebicfunac naric mi mesiyunuude, komoc kpegecdeac sing mong mi fede, kpac. Bangeha bangeha nenang Yesuac kpacfu kecni yeng kopocsicac ebicfunac mesinunu komoc kpenide.”

¹³ Anu Petoro nga Yohane yeri kibiamma yadau mong mi tarocngo kengeha kpac enacefacngoc yoac deocac yeni imoc negemma kerectegec anggec. Amma yeri Yesugoc kefoc, imoc yerensigec. ¹⁴ Anu ngic sebia ngeree, yeng yerigoc nanu henggecac yoac merengyecmegecdeac obohogec. ¹⁵ Obohoma tutumangtoaunac ayecmegec sobennu mama nammaec yenaocngoc yoac yofi dema denegeng anggec. ¹⁶ “Nenang ngic yohockang dafi ayecmenideac obohode. Yeri negensinggegecdeac faka kuhagoc yombong meec fingectegeru Yerusarenac ngicngac yeneng siduha bic negendacbau, imocac busic naric mi kpenide. ¹⁷ Nga yoac imoc amasoc kenu negendacbauac yeri Yesuac kpacfu yoac monggoc mi edekpou ayemmeecdeac dekengec ayecmeni.”

¹⁸ Ifi dema kpacyuruma yofi edeyurugec, “Ngeri Yesuac kpac ngic monggoc edekpou mi ayemmebesera.” ¹⁹⁻²⁰ Ifi degec Petoro nga Yohane yereng yoac yofi merengyemmeoc, “Wiac kicninango hening amma kedzacninango negening, imoc busic naric mi kpenide. Ngeni ngenaoc negenghenggec, ngeneac yoac me Anutuac yoac tofobobesonga. Damocngo Anutuac kicfu ngereede?”

²¹ Ifi deec yeni dekengec yoac monggoc ayecmema eng faiyurugec kenoc. Imoc yofiac, faka fingerecac ngicngac sasawa Anutu dengeregec. Imocac aposoro dafi ayemmebeso, imocac obohogec. ²² Nga ngic faka kuhagoc sebiau fingeru ngeree, ye ngicyada kifaya 40 feraheecac yeni aposoro eng wayurugec.

²³ Wayurugec Petoro nga Yohane yeri arengfocngira yeanaru dzigenema kenoc. Kemma womong gareng enara amma garengfocngina yoac edeyurugec, imocac yoacsiduc edeyunudarec negenggec. ²⁴ Negemma yeni uba mocgu amma Anutu kpacma dengerema yofi degec, “Kuctoa mingina Anutu, ge kurumeng nga bangec amma kondung nga imocac iwai hania hania meficyunune. ²⁵ Geng bicngoc Tiri Asu edena yeng kisicnina amma enac tofoc tofohoga Dawidi, yeac enara meefaina yeng yoac yofi deec,

‘Foracngoc bangeha bangeha ngicngac areng, yeni faka mangana anggecdeac yoac dedzege andae nga ngiha ngiha yeni negen negeng ua mema kpedzongemeandae, imoc mi ngereede. ²⁶ Bangecac ngictau yeni efaigec ngic enara uayoacnginagoc, yeni kpeturanggema KEBU memadae. Nga yeng ngic meisinggema kerecdokungo nadzicmiec, ye ifingoc memagecdeac yoac dedae.’ *(Mitiyegec 2:1-2)*

²⁷ Geac enac tofoc tofohoga kpetiac, imoc Yesu Kristo nga geng ye kerecdokungo nadzicminec. Nga taong yomohainoc Herode nga Pontio Pirato, yereng bangec monnunac ngic Anutu mi negemmidae, yeneng israe ngicngac yenigoc kpeturanggema ye keracmangang ammigec. ²⁸ Amma waracngoc geangga kucfu nga enacgang denecac sirihau ifi ammidacgec. ²⁹ O Kebu, yomoc ine dekengec yoacngina hennegeng amma enac tofoc tofohofocga kuc meficnunuma nanggenununa yoacga kengeha kpac dekperagiyemmebisina. ³⁰ Demina mariga sinena sebiu ngerec ngeree nga negensinggegecdeac faka kuhagoc nga faka mi hehena kpetiac enac tofoc tofohoga Yesu, yeac kpacfufingeckembeso.’

³¹ Ifi numugec wisickemanu amabangec kpedzucnema tacgec, imoc kpididieu Tiri Asungo ubanginau wakeu Anutuac yoac kengeha kpac ngic enacefac deireckyemmegec.

³² Yesu negensinggegec, habu imoc yeni uba mocgu amma wiac feyem mee, imocac neac geac mi dema urecngina mekecgec. ³³ Aposoro yeneng Kebu Yesu homecfunac yarec, siduc imocac hepuc amma kuhagoc dekperagigec. Nga danggunuctoayango sokoyunudacma feec. ³⁴ Yeneac botucnginau mongngo wiac monggac mi obohoec, kpac. Ngicngac sasawa amabangecnginagoc kecgec, yeni amabangecngina imoc desigec hiedzo kirecgeu ³⁵ Aposoro yeanaru faigec. Faigec, yeneng ngic yeni iwaiac obohogecsoc medereyemmekecgec.

³⁶ Anu ngic mong kefec kpara Yosefe, aposoro yeneng kpara mong Banaba degec, imocac titiha yofi: Demesseri medac. Ye Rewiac arenunac Kipiro nucfu fingerec. ³⁷ Ngic yeng bangeha mong desiu hiedzo kirecgeu aposoro yeanarumekemma faidarec.

5

¹ Anu ngic mong kefec kpara Anania, ye enema Safiragoc bangecngira noboha mong desiec dzo kirecgeec. ² Kirecgeu dzo tosea meickema faiu tarudeac enema edeu negentegeru uba mocgu anoc. Amma toseasac aposoro yeanaru mekemma faiec.

³ Faiu Petorongo yofi edeec, “Anania negenna, Satangngko ubagau kemeu geng Tiri Asu ikoc ammima bangecka nobohaac bung tosea herandzina fede. ⁴ Amabangecga noboha fegembeso dema fegembac me desina dzo kirecgeu imocng ‘ifi me ifi amba’ dema ambang. Ge ubagango tobangguu ifi andang, imoc naric mi ande. Negennec, ge ikoc annec, imoc ngic neni mi anemmenec, kpac. Ge Anutunoc ikoc ammidang.”

⁵ Ifi deu Anania ye yoac imoc negemma imohaingoc todingge makpeu asu heifeec, imoc kpac anu homeec. Anu yeni sasawango faka fingerec, imocac siduha negemma damuyunu kungectoa anggec. ⁶ Nga ngicmedac yeneng yacma farenga biranggema tofoho kemma tonggogec.

⁷ Tonggomagec aua harebec wisickeu enema ye ewearu faka fingerec, imoc mi negemma haec. ⁸ Hau Petorongo yofi kpesimie, “Bangec nobohango dzo kirecgdedac, imocsac me?” kpesimi yeng deec, “Oc, imocsacnec.” ⁹ Ifi deu Petorongo yofi edeec, “foracngoc, ngeri Kebuac Asu tobanggecdeac denegeng amma uba mocgu andaoc. Negennec, ewega tonggoma hadau, yeni nagu ngadeau nandae, mi hereemanu ge ifingoc

tofogu kemma tonggogugecde.” ¹⁰ Ifi edemanu ye imohaingoc haniau todingge makpeu asuya ereu homeec. Homeu ngicmedac yeni ama manau emma ye bic homeec, ifi hemma farenga tofoho kemma ewea feec, imocac tegiau tonggogec. ¹¹ Anu kpebung sasawa amma ngicngac sasawa yeneng siducngira negemma damuyunu kengectoa anggac.

¹² Aposoro yeneng negensinggegecdeac faka kuhagoc nga faka mi hehena, imoc homac ngicngac yenearu megec. Nga Yesuac habu sasawa yeni Anutuac womong mana mong katapa mi kpekpea feec, kpara Saromo, ihai uba mocgu amma kpeturanggema kecgec.* ¹³ Kpeturanggegec ngicngac yeneng kengec amma yenearu mi torokpegec. Amma yeni sifu eweheihei ayemmemma kecgec. ¹⁴ Ifi anggac ngicngac homac yeni Kebu negensinggema yenearu kentorokpe anggac Yesuac habu yadie. ¹⁵ Aposoro yeni faka kuhagoc megec henggecac amma yeni hafeigoc fefe nga dzakegoc sinnu yofi dema faiyunugec, “Petorongo kengha anu sifunec ongeango kpahacyunu hafeingina kpac ambeso.” ¹⁶ Amma Yerusareng taong yerec yerec amabangec hereau tackende, imohanc ngicngac homac hafeinginagoc amma asu seuhagocngo memanganeyunugec, yeni hesicyunu kenggec ngereedacgec.

¹⁷ Faka ifia fingeru womong garengtoa nga arengfora sadukaio ngichabu, yeneng keracmangang angkecma ¹⁸ aposoro mendangyunuma witicamau faiyunugec.

¹⁹ Faiyunugec tofocnac imohai Kebuac angero monggo nagu meyemmemma hesicyunu mama yofi edeyunuec. ²⁰ “Ngeni Anutuac womannu emma namma kekec gboriaac hania ngicngac sasawa edeyunudadacbisia.”

²¹ Ifi edeyunu negemma ama werec wereckenggac womannu emma ngicngac edekpou ayemmegec.

Naso imohai womong garengtoango arengforagoc yudangic yeneac tutumangtoa, imocac memba nga israe ngicngac yeneac enaratoa kpacyunu hadacma kpeturanggegec. Kpeturanggema aposoro meyunu hagecdeac witicamau yoac faigec kenec. ²² Kenu keracnatang yeni kensikema witicamau hofocyunuma dzigene hama degec, ²³ “Neni kensikema nagu kia seria yombong memea henni gareng yeni naguu nandau. Anu nagu witima emma ngic hofocyunuma ine ngic mong mi hending.” ²⁴ Yoac imoc degec womonggac tebengic enara nga womong gareng enara, yeneng faka fingeclac, imocac obohogec.

²⁵ Ifi ammagemc ngic monggo hama deec, “Negendae, ngic witicamau faiyunudau, yeni womannu ngicngac kpouyemmemma nandae.” ²⁶ Ifi deu tebengic kunengngina yeng keracnatang meyunu kenggec. Nga ngic yeneng hocngo yenerebauac kengecyunu aposoro yumeau hesicyunu hagec.

²⁷ Nga yudangic yeneac gamang, imocac memba, tutumannu faiyunugec nammagec womong garengtoango yoac yofi kpesiyemmeec. ²⁸ “Ngeni ngic yeac kpacsiduha ngicngac edekpou mi ayemmegecdeac dederac angemmeing. Nga ngeni ine yoac imoc edekpou ayemmemma Yerusarennu monggo desahedae. Amma ngic imoc yeac sawaac kopocsic, imoc neneac witiu faibeso dedae.”

²⁹ Ifi degec Petoro nga aposoro goa yeneng yoac yofi merengyemmegec, “Anutuac yoac wama ngicyoac tofoc tofoho, imoc naric mi ambesonga. ³⁰ Ngeni Yesu maringenango mariponnu kpema kpehomegec kisicfocninaac Anutungo ye homecfunac megboriu yarec. ³¹ Yaru Anutungo meemma enaramemetoanina nga memengerecnina amma kasonina gununggeu foiau nande. Nga israengic ngeni ubangina dzigeneu kopocsicngina kpac anudeac ifi anec. ³² Anutungo Tiri Asu enac tofoc tofohofora yemmeande. Nga Tiri Asu nga neni Yesuac siduc imoc nenahafoc dekperagidimbe.”

³³ Yoac ifi edeyunu wosongina meu aposoro yunuhomegecdeac degec. ³⁴ Ifi degec tutumangnginau farisaiongic mong tarec, kpara Gamarie, ye mitiac negen negengngic nga ngicngac yeneng yeac ewea heikecgec. Yeng deec, “Ngeni ngic yomoc ama sobennu meyunu kemema nammagec.” ³⁵ Ifi deu meyunu kemegec enaramemme arengfora yofi

* 5:12: Imocac onga hafac 615nu nga 617nu fede.

edeyunuec, "Israengic, ngeni ngic yomoc haniangina negentegecma faka ayemmebisia. ³⁶ Warac naso mong ngic mong kpara Teuda yengenaoc fingecma deec, 'Ni ngick-unengngina.' ifi deu ngic 400 isoc yearu kpeketahegec. Nga ye yengena dzikac kima homeu arengfora ticipac tehegec uangina kpac anec. ³⁷ Ye kpac anu takesiac amma kpac oso oso nga oho oho naso megec, naso imohai Gariraia bangefunac ngic mong kpara Yuda, ye ngic goa herengina miaru yeni ye modacgec. Yuda yengena ifingoc kpegec kpac anu arengfora ticipac tehedadgec.

³⁸ Imocac amma yofi edengunuba negenggec, ngeni ngic yomoc wayunugec kenggec. Yeni uaareng yomoc ngic negen negennu medaeu imoc bic kpac andarude. ³⁹ Nga Anutungo nonggo tacmanu medaeu ngeni mi kpetariyemmegecdeacsoc anggecde. Kecma Anutu ngaba ammibauac."

⁴⁰ Ifi edeyunu ireckema aposoro kpacyunugec hagec dzikacngo yunugecdeac edeyunugec. Yunugec wisickeu yeni yoac monggoc Yesuac kpacf mi dekperagigecdeac deracyunuma sueyunugec.

⁴¹ Sueyunugec, yeni naric Yesu kparaac amma gamekpekpe ayemmegec, imocac ubangerecfu tutumannunac mama kenggec. ⁴² Amma yeni wenaha wenaha Anutuac womonnu nga amaya amaya, imohai Yesu ye Messia imocac siduc gombung edekpou ayemmemua ua imoc mi wagec.

6

¹ Naso imohai Yesuac habu sokoma kenec. Sokoma kenu nenesemeng wenacsoc mendzicyemmekecma yudangic grikyoac dekecgec, yeneac hodzec medadangyunugec. Ifi anggec, yeni yudangic ama mingina kecgec, yeneac ubakpekpe anggec ² aposoro 12 yeneng Yesuac habu kpacyunudacma yofi edeyunugec, "Neni yaka hendzic hendzic ua imoc nanggema Anutuac yoac dede, imocac ua wadacni mau naric mi ngereeude. ³ Negen negensinggoc tosofocna, ngeni imocac amma ngic 7 ngenang botucfunac meis-ingyunubisia. Ngic Asungo ubangina wakeu negen negeng nga fakangina gombunga yenengkecdae, ngic fakangina ifia meis-ingyunubisia. Nga neneng ua imoc yemmeni mebisia. ⁴ Nenaoc ine ua imoc wama nunumu nga Anutuac enacdede ua mekecbisina."

⁵ Yoac ifi degec habutoa yeneng negenggec ngereec. Anu ngic yofiguc meis-ingyunugec: Stefano, ye negen negensingtoayagoc amma Tiri Asu wake wakea femiec, amma Firipo nga Porokoro amma Nikano, Timong nga Pamena amma Nikorao. Nikorao ye Antiokianac nga ye bangec monnunac ngicngo warac Anutu mi negemmima kecma yudangic yenearu torokpeec. ⁶ Yeni ngic imoc aposoro yeneac hoannu faiyunugec nanggec aposoro yeneng maringina sebinginai faima yeneac amma numugec.

⁷ Anu Anutuac yoacngo Yerusalem yadima sokoma kenu Yesuac habu yenearu nasoya nasoya torokpeu torokpe fingeckenec. Fingeckenu Anutuac womong gareng, yenearunac homacngo siduc gombung negensinggema modacgec.

⁸ Stefano ye Anutuac danggunuc nga kuc homac femiec. Imocac amma yeng ngicngac botucnginai kecma Kebu negensinggecdeac faka kuhagoc nga faka mi hehena homac meec. ⁹ Anu yudangic yeneac kpekpeturang amangina mong kpara Feackekec* degec, yenearunac ngic goango yacma Stefanogoc yoacngina engemmama anec. Ngic imoc yeni Kirene nga Aresandria amaunac amma Kirikia nga Asia bangectoaunac. ¹⁰ Nga Stefano ye Tiri Asuac kucfu yoac negentegecma deu yeni yoac turunga merembesonga osigec.

¹¹ Osima ngic goa fenggeyunugec, yeneng Stefanoac yofi degec, "Ngic ye Mose nga Anutu demanganeyuruu negening."

¹² Ifi degec ngicngac habutoa amma yudangic enarafocngina nga mitiac negeengngic, yeneac wosongina miacgec. Miacgec yeni Stefano mema mendanggema yudangic yeneac tutumangtoau mekemma ¹³ ihai ngic ikoha faiyunugec yeneng hepuc amma yofi degec, "Ngic imoc ye nenanggac ama kpetiac nga dedeseriyoacnina wisic

* 6:9: Kpekpeturang ama imocac memba yeni warac ebicfu kecgec. Yeni ngickuneng mocgu mocgu yeneac wanac kecgec. Kecma yenaocngoc hiedzo kpeturanggema bummeemema ngic imoc wayunugec.

wisickea kpac tatahoc demanganeande.” ¹⁴ Yeng yoac yofi deu negening, “Yesu Nadzaretenac, yennoc ama yomoc iriringgema singyoac Mosengo deficgenemmeec, imoc wama yoac gboria heficgenemmeande.”

¹⁵ Nga yudangic sasawa tutumangtoanginau tacgec, yeneng Stefano henserima henggec kicmesuyango angero yeneac sirci isoc anec.

7

¹ Womong garengtoango Stefano kpesimie, “Yoac dedae, imoc fora me?” ² Ifi deu Stefanongo yofi deec, “Mangfocna nga sactosofocna, yoac deba negenggec: Kisicnina Abrahang ye Harang taonnu mi kemma Mesopotamia bangecfu kecmanu Anutu kuc nga kibikperagi mingina, yennoc fingecmima yofi edeec,

³ ‘Ge amabangecka nga arengfocga wayunuma neng bangec mong edzacgubade, ihai kemma kecbesena.’ *(Fingec fingec 12:1)*

⁴ Anu ye yoac ifi negemma Kardea bangec wama Harang taonnu kemma kefec. Ihai kecmanu mama homeec. Homeu Anutungo bangec ngeni yofinenggac kecdae, Abrahang imohai sueu haec. ⁵ Hesicke hama bangec mong mi wamiu tiuenec, imoc kpac yombong. Ye nga bangecfora dengec tigec enudeac areng kpeyemmeec, imoc nambaraha kpac kecmanu edeec.* ⁶ Amma Anutungo yoac mong yofi deec, ‘Esangaboga nga bangecfocga yeni kifa 400 ngic mong yeneac bangecfu kuric kecma enac tofoc tofoho ua mema sisic witiau kecbesandae.’

⁷ Amma yoac mong yofi torokpeec,

‘Enactofoc tofohofofocngina meyunugede, ngic imoc yeni turunga yemmebade nga nambaracfocga faiyunugec bangec yomohai dzigene hama enac tofoc tofoho anemma kecbesandae.’ *(Fingec fingec 15:13-14)*

⁸ Anutungo Abrahang dzadzahac mima sebi tosangina herecgegecdeac† Anutungo Abrahang edeec. Ifi edeecac medaha Isaka kpeficgeu fingecma uameme 8 femanu medahaac sebi tosea herecgeec. Anu Isakango Yakobo kpeficgeec nga Yakobongo kisicfocnina 12 kpeficyunuec.

⁹ Kisicfocnina yeni munangina Yosefe keracmanggang ammima Aigita bangecfu faigec ngic goa yeneng bummemma mekenggec. Ihai kecmanu Anutungo yegoc kefecac amma ¹⁰ kpendzennunac meickema ubangerecgoc kekec heficgemie. Yeng Yosefe wosoefac ammima negen negentegec miu Aigita ngictau Faraongo negen negenga imoc hengngereema yengena amagerec nga aigitangicfora momoc garengyunuma kefudeac ngickuneng faiec.

¹¹ Faiu kecmanu Aigita nga Kanaang bangecfu bodi fingeru ebic kuneng meficegec. Ifi fingeru kisicfocnina yeni nenesemenggac homema kecgec. ¹² Kecmagec ‘Aigita bangecfu semeng fede’ ifi degec negemma Yakobongo medacfora sueyunuu ihai kenggec. ¹³ Kecma naso monnu monggoc kenggec Yosefengo dacfora haniaya dekperagiyemmeec. Dekperagiyemmeu Faraongo Yosefe yengena nga arengfora haniangina negentegerec. ¹⁴ Ifi anu Yosefengo dacfora edeyunu kemma mangngina Yakobo nga arengfocngina sasawa bic kpacyunugec hagec. Nga ngicngac hagec, yeneac kpetengina 75 anec. ¹⁵ Nga Yakobo ye Aigita bangecfu kemma kecma homeec nga medacfora kisicfocnina yeni ifingoc ihaingoc homedacgec. ¹⁶ Homegec farengngina Sikeng amau meyunu hagec. Hama Abrahangnggo Sikeng amau Hamoro medacfora yenearunac bangec mong kicsereac amma siriwa dzo dafigucngoo bummeec, imohai tonggoyunugec.”

¹⁷ “Anutungo wiac Abrahang miudeac bicngoc deseriec, imoc fora fingerudeac naso wegenemanu Yakobo esangabofora nga bangecfora yeni Aigita bangecfu homac fingec-sahe anggec. ¹⁸ Ifi amma kecmagec Aigita ngictau gboria mong fingerec, yeng Yosefeac hania mi negenec. *(Makekeng 1:8)*

* ^{7:5:} Fingec fingec 17:8; 48:4 † ^{7:8:} Sebi tosea, imoc ngicmedac fusacnginaac dumbengaac sebera fede, imoc herecgeandae.

¹⁹ Anu ngictau yennoc kisicfocnina meenti memati ayemmemma memanganeyunudarec. Amma yeng yofi edeyunuec, ‘Ngeni sabacfocnina wayunugec homedacbsia.’ ”

²⁰ “Mose ye naso imohai fingeru Anutungo sabac gombunga imoc henu ngereec. Nga ye mamaac amau afo harebec kefu garenggegec. ²¹ Ifi amma mekemma ama ngadeau tihereema faigec feec. Femanu Farao naroangango meficgema yengena medac isoc mema mekefu yadie. ²² Yadiu Farao ngicfora yeneng aigitangic yeneac faka nga negen negeng kpoumigec negentegecma kecma wiac deme anu kuhamog anec.”

²³ “Kecma kifaya 40 anu ye israengic ogofora yenennegeng anudeac ubea efaio kenec. ²⁴ Kemma aigitangic monggo israengic mong eng kpeu hemma ogea meficgema turunga meremma aigitangic homemea kpeec. ²⁵ Kpema yofi negenec, ‘Ni arengfocna Faraoac mariunac mesiyunubadeac dema Anutungo ua nende, imoc negentegecdae gedang.’ Ye ifi negenec anu israe ngicngac yeneng imoc ine mi negentegecgec. ²⁶ Anu wereckengau monggoc kemma israengic yohockang eng eweec meficyuruma demefac ayecmemma yofi edeyuruec, ‘Ngihoc waec, ngeri areng mocgungo ewedape, imoc naric kpac.’ ”

²⁷ “Ifi deu ngic ogea kpeecngo Mose kpefahama yofi deec, ‘Monggo mi nereac desidesingic me gareng faiguec. ²⁸ Ge worang aigitangic kpehomedang, ifi isoc ni gedang ifingoc nubeso annec.’ ” *(Makekeng 2:14)*

²⁹ Ifi deu Mosengo yoac imoc negemma imohaingoc worama Midiang bangecfu kemma kuric kefec. Ihai kecma ngac mema medac yohockang kpeficyuruec.”

³⁰ “Anu kifa 40 monggoc kecma Sinai tikiugeng bangec hoctsiragocfu kemma kecmanu angelo monggo icbarama susiau gereborang manau fingeru henec. ³¹ Hemma kpidohoma hentegerudeac kenu Kebuac yoac yofi fingerec, ³² ‘Ni kisicfocga yeneac Anutu, Abrahang nga Isaka amma Yakobo, yeneac Anutunoc.’ Fingeru Mose ye dzonong fede fede amma kengec kpeu kiwa sufuma ngonducnema nanec. ³³ Nammanu Kebungo yofi edeec, ‘Bangec nannec, imoc bangec kpetiac, imocac hanitabega hesina. ³⁴ Ni ngicfocna Aigita bangecfu sisicyunugec kiacudumeng anggec ereu yenenduae. Amma mesiyunubadeac yaguc maduae. Imocac Aigita bangecfu sueguba bic kembesena.’ ” *(Makekeng 3:2-10)*

³⁵ “Ngic yeneng Moseac yoac wama yofi degec, ‘Monggo ge neneac desidesingic me gareng mi faiguec, kpac’ ” *(Makekeng 2:14)*
Anutungo ngic yenoc israengic yeneac enarameme nga mesi mesingicngina anudeac dema angelo sueu gereborang manau fingecmima ua imoc demie. ³⁶ Ifi amma Anutungo Mose sueu kemma hesicyunu haec. Ye Aigita bangecfu nga Kondung sacsacfua nga bangec kisiu faka mi hehena nga negensinggegecdeac faka kuhamog homac mema kecmanu kifa 40 anec.”

³⁷ “Amma Mose yennoc israengic yofi edeyunuec, ‘Anutungo arengfocnina yeneac botufunac profete mong ni isoc meficgengemmeude.’ ” *(Dedeseri 18:15)*

³⁸ Amma yengngoc bangec hoctsiragocfu kisicfocnina yeneac kpebunggoc kpeturanggema kecma Sinai tikiu emma angeroac enacfuna yoac kekehagoc negemma mama edenunuec.”

³⁹ “Kisicfocnina yeni yengena wama yoara membaickema Aigita bangecfu dzige-negecdeac ubangina suema ⁴⁰ Arong yofi edegec, ‘Ge nemuonga mong menemmena nemu imocnggo warainemmebeso. Mosengo Aigita bangecfunac hesicnunu haec, ye gedang bic sufuma kpac anec.’ ” *(Makekeng 32:1)* ⁴¹ Ifi dema naso imohai nemuonga burumaka medaha siric isoc mema hosuc heimigec. Yeni mariginango onga mema imoc deafehe ammima hoanggegec. ⁴² Ifi anggec Anutungo ngadeyunuma sawau onga hadehade afeheyunugecdeac wayemmeec. Profete yeneac kibiu yoac imocac yofi bic oho ohoya fede,

‘Israe mingina, ngeni kifa 40 bangec hoctsiragocfu kecma yang hosuc heima me sesegerec goa mong mi ohonenggec, kpac. ⁴³ Ngeni nemu Morokoac kporucbedzo

tofohokecgec nga nemu Refang, yeac asomeng onga mekecgec. Wiac imoc-noc numumigecdeac memengere anggecac amma ni Babirong bangec hereau faingunubade.’” (Amosi 5:25-27)

44 “Kisicfocnina yeni bangec hocsiragoc, ihai Anutuac kporucbedzo megec, imoc Anutungo Mose siriha edzahema derecgemiec, imocac sirihaus memea. 45 Bedzo imocnoc kisicfocnina Yosuango enara meyemmeu yei bangecareng goa yeneac bangecfu mehama tacdacgec. Tacmagec Anutungo bangecareng kecgecmoc, yeni yunukporac ayemmeu kisicfocnina yeni bangec tigec enu Anutuac kporucbedzo imohaingoc torokpeu torokpe mekengkecmagec Dawidi fingerec.”

46 “Anutungo Dawidi wosoefac ammiu yeng Yakoboac Anutu, yeac amawomong mong meficgeudeac numumie. 47 Foracngoc, imoc yengenaoc kpac, Saromongo Anutuac womong memie. 48 Engenatoa yeng ine ngic yeneng womong mong maringo memea, ihai tacyac mi angande. Profete mongngo enacyoac yofinoc deec,

49 ‘Ngictau tatacna imoc kurumeng nga bangec imocngo titiserina, Kebungo ifi dede. Ngeneng amatatacna mong menenggec imoc ine mi ngereeude amma fefe moggac manau tacnegembade, imoc obohoude. 50 Foracngoc, ni marinango wiac sasawa meficgedarai.’” (Yesaia 66:1-2)

51 “Ngicngac gori goria, ngeni ubakedzacngina fonggo fonggoya, kisicfocnina yeni Tiri Asu deendema ammikecgec, ngeni ifingoc ifi andae. 52 Kisicfocnina yeni profete sasawa yunukporac ayemmegec. Profete yeneng dindingac mingina fingerudeac kpefingyoac degec nga ngeneac kisicfocnina yenennoc yenahafoc profete imoc yunugec. Kecma Ngic Dindingac yengena fingeru ngenennoc doc mema ye kpehomegec. 53 Ngeni angeroac enacfunac dedeseriyoac megec nga imoc ine sifu wagec.”

54 Stefanongo yoac ifi edeyunu negemma wosonginau meu yeni herebu kuneng negemma yearubigeng fima enacngina kisaranggema nangengngina manganeec.

55 Stefano ye ine Tiri Asungo ubeau wakeu kurumennu fiu enu Anutuac kuc kibikperagiau Yesu Anutu foiau nanu hemma deec, 56 “Negendae, ni kurumeng anggeu Ngicac Medacngo Anutu foiau nanu hendraue.” 57 Ifi deu yeni sasawango kpeborongtoa kpema kedzacngina kpefonggema yearu ururunggema kpefahe kpefahe kemma 58 taong ngadeau kensikema hocngo ukuma heigec. Ifi amma hepucngic yeni ngakpingina herea hesima ngicmedac mong kpara Sauro, yeac haniu guruhegec.

59 Guruhema Stefano hocngo heigec yeng yofi dema numuec, “O Kebu Yesu, ge ubaon-gana mena.” 60 ifi demafafoc heima arohoma kpacma deec, “Kebu ge kopocsicngina yomoc wayemmena.” ifi dema homeec. Homeu Saurongo faka imocac negenu ngereec.

8

1 So, naso imohaingoc Yerusarennu kpebung kecgec, yeni hanahema yunukporac ayemmegec. Ayemmegec ticpac tehma Yudaia nga Samaria bangectoa kendacgec aposoro yeneng ine tacgec. 2 Amma ngic goa Kebu eweheimima kecgec, yeneng Stefano mema kiasonggongtoa yombong ammima tonggogec. 3 Anu Sauro ye kpebung yunukporac ayemmeudeac amaya amaya emma ngicngac metai ayemmemma witicamau faiyunuec.

4 Yesuac habu yeni ticpac tehma kenggecngi ine guruamasoc kecma ngicngac Anutuac enacyoac dekperagiyemmekecgec. 5 Ifi ammagec Firipongo samariangic yeneac taonnu sikema Kristoac yoacsiduc dekperagiyemmeec. 6 Dekperagiyemmemma negensinggecdeac faka kuhagoc meu hemma kedzac kpema yoara yenahafoc negenggec. 7 Imoc yofiac, ye asu seuhagoc homac kisangyuu ngic hereunac erema arohoma woragec. Amma ye puring hania hania homac mengereyunei. 8 Ifi anu taong imohai ngicngac yeni ubangerec kuneng negenggec.

9 Anu taong imohai ngic mong kefec kpara Simong, ye bangecac hadehadegoc ua mekefu samariangichabu yeneng henggec bibiagoc anec. Ye yengenaac negenu engena anec. 10 Anu engena mamea yeni yenahafoc yeac negenggec engena anu eweheimima

yofi dema kecgec, "Anutuac kuc kunengngo yearu fede." ¹¹ Ye boru mema kerec ayemmeu kpidohoma yearu kpeketahemu nasoherec kecgec. ¹² Anu Firipongo Anutuac eucererenggac siduc nga Yesu Kristoac hania deireckeyemmeu ngicngac yenahafoc negensinggema mitidoku nadzicgec. ¹³ Ifi anggec Simongngo ifingoc Yesu negensinggema doku nadzicma Firipoac hoannu kefec. Firipongo faka kuhagoc nga faka mi hehena meu Simong ye imoc hemma kpidohoma negen negeng ua homac meec.

¹⁴ Samariangicngac yeni Anutuac yoac negenguba anggec, imocac siduc Yerusarennu aposoro yenearu kenu negenggec. Negemma Petoro nga Yohane sueyurugec kenoc.

¹⁵ Ihai kemema yeni Tiri Asugoc anggecdeac Kebu numumioc. ¹⁶ Tiri Asungo warac yenearu mong mi mamanu yeni Kebu Yesuac kpacfusac mitidoku nadzicgec. ¹⁷ So, aposoro yeri maringirango sebinginau faiec yeni Tiri Asugoc anggec.

¹⁸ Aposoro yeri ngic yeneac sebiu maringira faiec Tiri Asugoc anggec, Simongngo imoc hemma dzo yerearuhama ¹⁹ yofi edeyuruec, "Ngeri uayoac nga kuc imoc ni ifingoc nene neng ifingoc ngicsebinginau marina faiba Tiri Asugoc ambisia."

²⁰ Ifi deu Petorongo yofi edeec, "Anutuac wosoefac imoc hiedzongo bummebeso negennecac hiedzogagoc ngerahafof hofeu kemebesera. ²¹ Anutungo uba ikocga hendeac kuc yomocngo mong mi yafinggumanu entegeng kecnade. ²² Ge manganaga imoc wama ubaga dzigeneu Kebu numumina ubagau songo ikoha dzuacgembac.

²³ Manganaac hodungango ge memanganeguu ngicngac memanganeyununadeac fakango fuseguecnoc." imoc henduae.

²⁴ Ifi deu Simongngo deec, "Wiac dedapemoc, imoc mi fingecnembeso. Imocac ngeraoc neac amma Kebu numumieec."

²⁵ Anu aposoro yeri ngicngac Kebuac yoac dekperagima edekpou ayemmemma Yerusarennu dzigenebeso dema Samaria guruama tackendesoc siduc gombung dekperagiyemmemma kenoc.

²⁶ Kebuac angero mongngo Firipo yofi dema edeec, "Ge efaima sing Yerusarennunac emu Gadza taonnu kemedi, imohai kembesena. Sing imoc kisi fede." ²⁷ Ifi dema edeu Firipongo efaima kenec. Anu Etiopia bangectoau ngactau mong kefec kpara Kandake, yeac ngickuneng mong* dzofinahaac garengto, yeng Yerusarennu Kebu afeheudeac kengenecfunac ²⁸ dzigenema keretacfu tacma ferecge kemma profete Yesaia, yeac yoackibi osoec. ²⁹ Ifi ammanu Asungo Firipo yofi edeec, "Ge bic keretac edimocac hoangau kenna."† ³⁰ Ifi deu Firipongo yearu nedzima kemma ngic ye profete Yesaia, yeac yoackibi osou negemma kpesimieec, "Yoac osonec, imocac hania negentegecneec me?"

³¹ Kpesimi deec, "Mongngo mi dekperaginemmanu neannaoc naric mi negentegecbade." Ifi dema Firipo ye keretau enu yerahafof tarecdeac derecgemieec. ³² Yoackibi osoec, imoc yofi,

"Rama mong kpehou anggecdeacmekenganda me ramamedahango dzoea merec merecgengic yearu waickema feande, siriha imocacsoc amma enara mong mi anggec. ³³ Yeni yoacfu kuha memama yeac yoacac fora mi dema bangecfu kekeha meickegec. Anu yeac esangabofora yeneac kpetengina mongngo oso osoac siriha kpac. Imoc yofiac, Kebuac arengfora yeneng kekeha bangecfunac wangecgec." (Yesaia 53:7-8)

³⁴ Ifi osoma ngickunengngo Firipo yofi dema kpesimieec, "Profete ye meracac ifi dede, ye yengenaac me ngic monggac?" ³⁵ Kpesimi Firipongo enara anggema mitikibiac yoac imohacnac torokpema Yesuac siduc gombunggac hania edekpou ammieec.

³⁶ Ifi amma kengkecma doku monnu kensikema ngickunengngo yofi deec, "Henna, doku yoc fede, ge naric mitidoku nadzicnembang me?" ³⁷ Ifi deu Firipongo deec, "Ubaga hafoangoc negensinggenadeu naric ambade." deu yoac yofi meremmemieec, "Yesu Kristo ye Kebuac medac, imoc negensinggeduae." ³⁸ Ifi dema keretac dzgeeu taru

* 8:27: Ngic imoc ye gbomea meic meickea. † 8:29: Ge ifingoc Dedeseri 23:1 nga Yesaia 56:3-7 osona. Warac ngic ifia yeni Anutuac hoannu naric mi hagec. Yaguc Tiri Asungo sing gboria meficgenemmede.

Firipo nga ngickuneng yerahafoc dokuu kemema Firipongo doku nadzicmiec. ³⁹ Nga dokuunac eremaec Kebuac Asungo Firipo ioha wangecma kenu ngickunengngo monggoc mi hemma ubangerec negemma kenec. ⁴⁰ Firipongo ine Asodoc taonnu kenu henggec. Amma ihacnac hanahema amea amea siduc gombung dekperagiyemmemma kengkecma Kaisarea taonnu mesiec.

9

¹ Sauroac hereu ubagerec kuneng fekefecac Yesuac habu ngaba ayemmemma yunumeme amma womong garengtoa yearu kemma yofi edeec, ² “Ngic me ngac Damasko taonnu sing gboria modacdae, yeni meficyunuma meyunuma maringina dedeckema Yerusareng taonnu meyunu habadeac Damasko kpekpeturang amaac enara, yeneac kibi mong ohoma nenna.”

³ Miu ye kemma Damasko mewegenebeso ammanu imohaingoc kurumennunac kperagingo ioha mama neraranggeec. ⁴ Neraranggeu ye bangecfu todingge kpeu fema yoac mong yofi fingeru negenec, “Sauro, Sauro, ge nocac nukporac anemma kecannec?” ⁵ ifi deu Saurongo kpесimieс, “Kebu ge merac?” ifi deu deec, “Nukporac anengkecneс, Yesu ninoc. ⁶ Imocac ge yacma amau kenna! Ihai kecmana dafi ambesonga, imocac yoac edegugecde.”

⁷ Anu ngic yegoc kenggec, yeni yoacngina kpac anu engsac iridzagec amma nanggec. Nocac yeni yoac negenggec amma ngic mong ine mi henggec. ⁸ Nga Saurongo yacma kic fiudeac kpanggung manggung anu ngicfora yeneng mariau mema Damaskomekenggec.

⁹ Mekenggec ihai uameme harebec kiwa nomaneu tacma nenedoku mong mi neec.

¹⁰ Damasko taonnu ubamereng ngic mong kefec kpara Anania, ye Kebungo ongau fingecmima kparec, “Anania.” kparu deec, “Kebu ni yomoc.” ¹¹ deu Kebungo yofi edeec, “Ge yacma sing kpara Dindingac deandae, ihai kemma Yudaac amau emma ngic mong kpara Sauro, Tarso taonnunac, ye hofocma meficgebesena. Negenna, ye numuma tacde. ¹² Ye ongau kpefing yofi hendac: Ngic mong kpara Anania, yeng yearu kemma kiwa fiudeac dema maria sebiau faidac.”

¹³ Ifi deu deec, “Kebu, ngic yeac homac degec negenganduae. Ye geac kpetiac arengfocga Yerusarenヌ megigi noc efea ayemmeande. ¹⁴ Nga yei ifingoc kpacga kpacma dengereandimbe, neni sasawa witicnunuma menunu kenudeac womong gareng enara yeneng uakibi migec yofinenggac mekecde.” ¹⁵ Ifi deu Kebungo yofi edeec, “Ge kenna. Ni ngic yenoc meisinggeba ye siducedena bangec monnunac ngicngac nga ngictaufocngina amma israe medacfora yeanearu kpacsiducna deyadibeso. ¹⁶ Ammanu kpacnaac amma sueba kpendzeng nga ebic hania haniaac witiau kecbeso, imoc edza-hema kpoumibade.”

¹⁷ Ifi deu Anania ye kemma ama dedea, ihai emma Sauroac sebiu maria faima deec, “Tosona Sauro, yacna. Kebu Yesu sinnu fingecgenec, yennoc suenude. Ge kicga fina Tiri Asungo ubagau wakeudeac haduae.” ¹⁸ Ifi demanu ye imohaingoc kiwaunac wiac mong fonoc isoc mau kiwa fima yacma mitidoku nadzirec. ¹⁹ Nadzicma yaka nema seriec.

Sauro ye Yesuac habu Damasko kecgec, yenigoc uameme goa kefec. ²⁰ Kecma imohain-goc yudangic yeneac kpekpeturang amau emma Yesuac hania dekperagiyemmemma yofi edeyunuec, “Yesu ye Anutuac medac.” ²¹ Ifi edeyunuu yeni negemma kpidohoma yofi degec, “Ngic imocngonoc Yerusareng taonnu kpac imocnoc eweheihei ammigec megigi ayemmemma yei ifingoc witicnunuma womong gareng enara yeanearu meyunu kenudeac haec.” ²² Ifi degec Saurongo serima yofi deec, “Foracngoc, Yesu ye Messia.” Ye imocac hania edzacyunuу yudangic Damasko kecgec, yeni negemma kpidohoma yoara turunga mi merenggec.

²³ Ye uameme homac ifi angkefu yudangic yeneng Sauro kpegecdeac yoac dedzege anggec. ²⁴ Ifi amma yeni kpegecdeac dema oda naguyau hadzing tofocnac gareng faiyunugec nangkecgec. Yeac dekiriec anggec, imoc yengenaaru hau negenec. ²⁵ Anu Sauro yoaraac uba merenggec, yeneng tofocnac ye ufcu barima oda titingau sing faigec ngadeau kemema kenec.

²⁶ Kemma Yerusarennu kensikema Yesuac habu yenearu torokpeudeac yoara deu yeri sasawango kengec anggec. Nga ye ubamereng fora anec, imoc mi negensinggegec. ²⁷ Anu Banabango Sauro mema aposoro yenearu hesicke kemma yofi edeyunuec, “Kebungo Sauro sinnu fingecmima yoac edeec. Ifi anu ye Damasko taonnu kengeha kpac Yesuac hania dekperagiec.” ²⁸ Anu Saurongo yenigoc Yerusarennu tacyac amma yoac kengeha kpac deede ayemmemma kengha anec. ²⁹ Amma Kebuac kpacfu serima namma ngic siduc gombung kengeha kpac, enacefac edeyunuec. Edeyunuu yudangicngo grikyoac dekecgec, yenigoc Anutuac enacyoac denegenggac amma yoacngina engemmama anec. Anu ngic imoc yeneng ye kpebeso anggec. ³⁰ Ifi anggec Yesuac habu yeneng imoc negemma Kaisarea taonnu hesicke kemema faigec kengkecma Tarso taonnu kengsikeec.

³¹ Anu kpebung Yudaia nga Gariraia amma Samaria bangecfu kecgec, yenearu ruae fingerec. Fingeru ruaegoc kecma kpetengina kuneng amma sahema Kebu eweheimima ubango hoanggema afehegec. Anu Tiri Asungo ubaebicngina meickeec.

³² Petoro ye amabangec tackende, imoc yerecgema kengkecma Yesuac kpetiac areng* Rida taonnu kecgec, yenearu kemesikeec. ³³ Sikema ihai ngic mong henec, kpara Ainea, ye puring amma fefeu fekefu kifa 8 bic anec. ³⁴ Nga Petorongo yofi edeec, “Ainea, Yesu Kristongo mengereguideac yacma fefega geanggaoc mengerena.” deu ye imohaingoc yacma nanec. ³⁵ Ifi anu ngicngac Rida taong nga Sarong bangecfunacngo ye hemma ubangina meremma Kebuaru kenggec.

³⁶ Yope taonnu ubamereng ngac mong kefec, kpara Tabita, kpara grikyoacfusing Dorkas. Yearu memeficac faka gombunga feecac makpekpea maficyunuma kefec. ³⁷ Anu naso imohai Tabita ye hafei fingecmiu homeec. Homeu yeni farenga kerec nadzicmima amamana monnu meemma faigec feec. ³⁸ Nga Yope imoc Rida taong wegenac tarecac Yesuac habu yeni Petorongo Rida tacde, imoc negemma ngic yohockang sueyurugec yearu kemma yofi desambic ammima edeoc, “Ge naric nenearu bic habang me?”

³⁹ Deec Petoro ye negemma efaui yerigoc kenggec. Kensikeu fareng feecfu hesicke enggec. Enu ngachodzec sasawa yeni oronggema kiacubamangang anggec. Nga Tabita gbori kecma ngakpikporuc kpebiyemmekefec, imoc edzahedacgec. ⁴⁰ Edzahegec Petorongo sueyunuu kemedacgecfafoc heima numuec. Numuu wisickeu farenga feecfu dzigenema yofi edeec, “Tabita ge yacna.” deu ye kiwa fima Petoro hemma yacma tarec. ⁴¹ Tacmanu Petorongo mariau mema miaru yacma nanec. Nanu Yesuac kpetiac areng amma ngachodzec Tabita gborima yarec, imoc henggecdeac kpacyunuec. Kpacyunuu hagec Tabita yarec, imoc edzacyunuec. ⁴² Nga yeni siduc imoc degec, imocngo Yope taonnu sokoma kenu homacngo Kebu negensinggegec. ⁴³ Nga Petorongo ngic mong kpara Simong, yamberec seberameme, yeac amau naso herea isoc tacyac anec.

10

¹ Kaisarea taonnu ngic mong kefec, kpara Konerio. Ye Itaria wasaiareng tosea, yenearunac ngic 100, yeneac kunengngina kefec. ² Ye yengena nga arengfora sasawa, yeneng heregoc Anutuac songo negemma eweheimima kecgec. Konerio ye ubangereac wiac homac ngicngac makpekpea yemmekefec amma Anutu wenacsoc numumikefec.

³ Konerio ye 3 kirocac ua mananu Anutuac angero mongngongau yearu fingecma edeec, “Konerio.” ⁴ Ifi deu kpidohoma kengec kpeu kiwango gbong henserimanu deec, “Kebu noc wiac?” deu yeng deec, “Nunumuga nga ubangerecgaac wiac makpekpea yemmeannec, imoc sese isoc Anutuaru enu ye imocac negengngerekecde. ⁵ Imocac ge yaguc Yope taonnu ngic sueyununa kemma ngic mong kpara Simong, kpara mong Petoro, ye hesicke habisia. ⁶ Ye yamberec seberameme ngic mong kpara Simong, yeac amau kecde. Amea imoc kondung tegiau tacde.”

* 9:32: Yesuac kpacfu kopocsic deficgema mengadeheda, yeni Anutuac kicfu kpetiac andae.

⁷ Angerongo yoac imoc edema kenu Konerio ye enac tofoc tofohongic yohockang nga wasaingickereng mong, ngic imoc heitaiyunuma yoac deu negenec. ⁸ Imoc ayemmedacma Yope taonnu sueyunuu kenggoc.

⁹ Ngic yeni kengkecma sinnu fegec ama wereckenu monggoc kengkecma ama mewe-genebeso ammagec, Petorongo wenac dzongiau numuudeac ama witiau waranda isoc feec, ihai enec.* ¹⁰ Emma yakaac homema deu yaka ohomagec Kebungo kiwa merecgeu faka yofi henec: ¹¹ Kurumeng anggeu wiac mong henec. Imoc kporuc isoc tegia noboc noboc mema bangecfu faigec mama, ifi isoc anec. ¹² Imocac manau yamberec amma nengboudzoc hania hania feec. ¹³ Mamanu yoac mong yofi fingerec, “Petoro ge yacma kpenec anna.” ¹⁴ Ifi fingeru Petorongo yofi deec, “Kebu imoc naric kpac, ni wiac wonongagoc nga Kebungo kpaie, imoc mong mi neai nga naric mi nebade.” ¹⁵ Ifi deu atac yohockang anu deec, “Anutungo kpaie imoc meickede, imocac ge wonongagoc mi dena.” ¹⁶ Nga faka imoc fingeru atac harebec anu imohaingoc kporuhagoc kpedziu kurumennu monggoc enec.

¹⁷ Enu Petoro ye onga henec, imocac negengfagung amma tacmanu Konerio ngicfora yeni Yope taonnu sikema Simonggac amaac kpesi kpesi kengkecma odanaguyau namma

¹⁸ kpachofoc amma kpesigec, “Simong kpara mong Petoro, ye ama yei kecde me?”

¹⁹ Nga Petorongo onga henecac negengfagung amma kecmanu Asungo yofi edeec, “Negennec, ngic harebec yeni hama ge hofogudae. ²⁰ Imocac ge yacma kemema yenigoc kembesonga dema negengyohoc mi ambesena. Ngic imoc yeni neng sueyunuba hadae.”

²¹ Ifi deu Petorongo yeneareu kemema deec, “Ngic hofocdau ni yomocnoc, ngeni dafiac hadae?” ²² Ifi deu ngic yeneng yofi degec, “Wasaingic gareng Konerio ye Anutu eweheimima faka gombunga modackecde. Nga yudangic sasawa yeni yeac negenggoc ngereeande, yenoc angero kpetiac monggo fingecmima amea heitaiguma enacgaunac yoac negenudeac edeec.” ²³ Ifi degec Petorongo amau heitaiyunuma edoc bedoc ayemmeu fegec.

Fema wereckengau yacma ye nga ngic imoc yeni kembeso anggoc Yesuac habuunac goa Yope kecgec, yeni yenahafoc kenggoc. ²⁴ Yeni sinnu tofocnac mong fema ama wereckenu yacma kengkecma Kaisarea kensikegec. Konerio ye arengfora amma tosofora heitaiyunuu tomai kecmagec kensikegec. ²⁵ Kemma Petorongo amau embesonga ammanu Koneriongo hama hoangaufafoc heima numumiec. ²⁶ Numumi Petorongo mema miacma yofi edeec, “Yacna ni ngicogogangoc.”

²⁷ Ifi denegeng amma ye ama manau emma ngic kpedzucnema tacgec, yenemma yofi edeyunuec. ²⁸ “Ngeni yudangic neneac faka negendae. Neni bangec monnunac ngic ngenigoc ogo nga engemma kekec ifi mi annideac kpaeyoac seria fede. Ni ine ngeni ngic wonongnginagoc dema desusuic mi dengemmebadeac Anutungo imoc ededzacnu anec. ²⁹ Imocacnac heitainugec haba dema mi obohoai. Anu yoc heitainudae, imocac hania degec negemba.”

³⁰ Ifi deu Koneriongo yofi edeec, “Uameme 4 bic wisickemanu marai 3 kirocac ua memanu numubare ngic mong ngakpia kperagiagocngo nearu fingecma ³¹ yofi edenuec, ‘Konerio negenna, Anutungo nunumuga nga ubangerecgaac wiac makpekpea yemmeanec, imocac negengngereede. ³² Imocac ge Yope taonnu ngic sueyununa Simong kpara mong Petoro, ye hesicke habisia. Yeng yamberec seberameme Simong, yeac amau kecde. Amea imoc kondung tegiau tacde.’ ³³ Yoac ifi deu ni imocacnac gereagoc sueyunuba gearu hadau. Hagec geng yoacna negemma hanecac naric ande. Nga Kebungo yoac edeguec, imoc seng dena negennideac Anutuac kicfu nenahafoc kpedzucnema tacdimbe.”

³⁴ Ifi deu Petorongo enacefac amma yofi edeyunuec, “Anutungo ngicngac isinnunuma monggac songo negemma mong mi waude, imoc foracngoc negentegecyombonggeduae.

³⁵ Ngic bangeha bangeha eweheimima angammeme dindingac angkecdae, yeneac

* 10:9: Israe ngic yeni amangina siriha dafi megec imoc ongau hafac 247nu fede.

negenu ngereeande. ³⁶ Foracngoc, Anutungo Yesu Kristo mocgu, ngic sasawa nenang Kebunoc sueu maec. Yeng ruae yoac gombung israe ngicngac nenearu deficgenemeeec, imoc ngeni negendae. ³⁷ Amma Gariraia bangecfu hanahema wiac fingecma Yudaia bangec sokoma kenec, imoc ngeni negendae. Imoc yofi: Yohane ye ngic dokunadzicac yoac edeyunuec. ³⁸ Anu Anutungo Yesu Nadzaretenac kuc nga Tiri Asu faimiu yeng bangec yerecgema kengha amma ngic maficyunuma mengereyunukefec nga mangana minginaac kucngo ngicngac kekecngina memanganedarec, yeni mengereyunudarec. Anutungo nonggo tacmimanu yeng ua imoc meec.

³⁹ Anu Yesungo yudangic neneac bangecfu nga Yerusarennu ua meec, imoc hennegeng andaring. Ifi amma kecmamu yeni ye mariponnu kpegec homeec. ⁴⁰ Homema femanu wenac harebec anu Anutungo ye megboriu yacma ngicngac fingecyemmeu henggec. ⁴¹ Ngicngac sasawa yenearu mi fingerec, kpac. Anutungo waracngoc siducedefora meisinnunuec, nenearusac fingerec. Ye homecfunac yaru neninoc nenedoku yegoc neing. ⁴² Nga Anutungo ngic yenoc ngic gbori nga homemea angammemenina desiudeac gununggeec, yoac imocac hepuc amma ngichabu gorongina kpema desaheyemmenideac denemmeec. ⁴³ Anu profete sasawa yeneng yeacnoc hepuc amma yoac yofi degec, ‘Ye negensinggegecd, yeni yeac kpacf uopocsicngina kpac anude.’ ”

⁴⁴ Petoro ye yoac ifi dema nammanungoc negemma tacgec Tiri Asungo yenearu mama ubangina wakeec. ⁴⁵ Wakeu ngic sebi tosangina herec herecgeango Yesu negensinggegec nga Petorogoc kenggec, yeni Tiri Asungo wosoefahaac kuc bangec monnunac ngicngac, yenearu ifingoc faiyemmeu ⁴⁶ nedzarangyoac dema Anutu dengerema deafehe ammigec, yeni imoc negemma kerectegec anggec. Ifi anggec Petorongo yofi deec, ⁴⁷ “Nenang Tiri Asugoc aning, faka imoc ngic yomoc ifingoc fingecyemmeu mitidoku naric mi segereyemmebesonga.” ⁴⁸ Ifi dema yeni Yesu Kristoac kpacf doku nadzicgecdeac deyemmeec. Nga yenigoc uameme goa tarudeac eedgec.

11

¹ Aposoro goa nga Yesuac habu Yudaia bangecfu kecgec, yeni bangec monnunac ngicngko Anutuac yoac negenguba anggec, imocac siduc negenggec. ² Nga Petorongo Yerusarennu dzigene kenu sebi tosangina herec herecgea, yeneng dehou ammima ³ yofi edegec, “Ge nocac sebi tosangina mi herec herecgea, yeneac amau emma yenigoc yaka nedang?”

⁴ Ifi degec Petorongo faka haniaunacngoc fingecereec, imoc edeyunuec. ⁵ “Ni Yope taonnu numuma kecbare kicna merecgeu onga mong yofi henai: Wiac mong kporuc kuneng isocngo tegia noboc noboc menamma kurumennunac nearu faigec maec, ifi isoc anec. ⁶ Mau hereema kperirickema yofi henai, yamberec kuneng kapia nga goa enacnginagoc amma nengboudzoc hania hania feec. ⁷ Ifi yenembare nearu kpakpac yofi fingerec, ‘Ge yacma kpenec anna.’ ⁸ Ifi deu yofi deai, ‘Kebu imoc naric kpac. Ni wiac wonongagoc nga Kebungo wiac mong kpaef, imoc enacna mi kpesereefu mi kpesereude.’ ⁹ Ifi deba kurumennunac yoac mong fingeru atac yohockang anec, ‘Anutungo kpae imoc meickede, imoc wonongagoc mi debesena.’ ¹⁰ Faka imoc fingeru atac harebec anu iwai imoc kporuhagoc monggoc kpedziu kurumennu enec.

¹¹ Anu negenggec, naso imohaingoc Kaisarea taonnunac ngic harebec sueyunugec nearu hama ama kefai, ihai nammaggec ¹² Asungo yofi edenuec, ‘Ge yenigoc kembeso dema negengyohoc mi ambesena.’

Ifi deu komba negen negensinggoc tosofocna ⁶ yomoc, yeneng modacnugec kemma wasaingicgareng yeac amau ening. ¹³ Enni yeng yoacsiduc yofi anemmeec, ‘Neac amau angero mongngo fingecnemma yofi edenuec, “Ge Yope amau ngic sueyununa kemma Simong kpara mong Petoro, ye hesicke hagec. ¹⁴ Yeng yoac edeguu ge nga arengfocga ngeni yoac imoc negemma hoangema komoc kpegecde.” ’

¹⁵ Anu ni siduc gombung edeyunubare warac nenannu Tiri Asu maec, ifi isocngoc yenearu madac. ¹⁶ Ni imoc hemma Kebungo yoac yofi deec, imoc negensiai, ‘Yohane ye

doku nadzicngemmee, yoc ine Tiri Asu nadzicngemmeeude.' ¹⁷ Nga nenang Kebu Yesu Kristo negensinggmina Anutungo wosoefahaac kuc nemmee, yeng ine wosoefahaac kuc siriha imocngoc yemmeu ni ifiango Anutu naric mi kpetarimibade."

¹⁸ Petorongo ifi dema edeyunuu yeni negemma ubangina kuha mau Anutu afehema yofi degec, "Foracngoc, Anutungo bangec monnunac ngicngac ubangina meremma kekecseriac fora anggecdeac ifinoc ande."

¹⁹ Ngicngac yeni Stefano kpema Yesuac habu goa yenahafoc yunukporac ayemmegec ticipac tehema goango Foiniki bangecfu nga Kipiro nucfu amma Antiokia taonnungoc kensikegec. Kemma kecma yudangicsac siduc gombung dekperagiyemmegec. ²⁰ Anu Yesuac habu botucnginai ngicngac Kipiro nucfunac nga Kirene bangecfunac kecgec, yeni Antiokia taonnu hama grikngic yenigoc ifingoc denegeng amma Kebu Yesuac siduc gombung dekperagiyemmegec. ²¹ Dekperagiyemmegec Kebungo kuc yemmeu ngicngac habutoa yeni negensinggema ubangina Kebuaru faigec.

²² Imocac yoacsiduc kpebung Yerusarennu kecgec, yeneac kedzacfu kemeu yeni imoc negemma Banaba suegec Antiokia amau kenec. ²³ Kensikema Anutungo danggunuc uaya bic meficgeec, ye imoc hemma ubangerec negemma ubanginango Kebuaru heis-erigecdeac demeefai ayemmegec. ²⁴ Ye ngic gombunga amma ye ubeau Tiri Asu nga negen negensing wake wakea femiu ngicngac homacngo imoc hemma Kebuaru torokpegec.

²⁵ Nga Banabango Sauro hofocma meficeudeac Tarso kenec. ²⁶ Kemma meficgema hesickeu Antiokia taonnu hama kpebung yenigoc kifa mocgu kecma ngic homac Anutuac enacyoac edekpou ayemmegec. Nga Antiokia amau hanahema ngicngko Yesuac habu, yeneac kpac Kristoac ngic deficgeyemmegec.

²⁷ Naso imohai profetengic goa Yerusarennac Antiokia taonnu magec. ²⁸ Yenearunac tosongina mong kpara Agabo. Asungo kpebing edeu yeng yacma bangecsoc boditoa fingerudeac deficgeec. Nga bodi imoc Roma ngictau Sisa Kraudio kecmanu naso imohai fingerec. ²⁹ Fingeru Yesuac habu yeni yoac imoc negemma Yudaia bangecfu negen negensinggoc tosofocngina kecgec meficyunugecdeac hiedzo feyemmegesoc kpeturanggema yenearu faigec kenudeac deserigec. ³⁰ Deserima hiedzo meficgegec, imoc Banaba nga Sauro yemecgec yeri imoc mekemma Yesuac habu Yerusarennu enarafovngina kecgec, yeni yemmegec.

12

¹ Naso imohai ngictau Herodengo kpebung kecgec, yenearunac ngicngac goa yunuma memanganeyunuudeac negemma mendangyunuma witicamau faiyunuec. Ifi ayem-mema ngade yoacfу faiyunuma ngaba ayemmemma yunubeso negenec. ² Amma yeng deu Yohane dara Yakobo wasaibeangngoc kpehomegec. ³ Ifi anu yudangic yeni songo negenggec nga yeng yenemma ic sogong yisya kpac nene, imocac tacyacnasou deu Petoro ifingoc mendanggema witicamau faigec. ⁴ Ye makekenggac tacyacnaso wisickeu Petoro* yudangic yeneac kicfu yoacfу faiudeac negensima deu witicamau faiec. Faima wasaingic 16 yeneng areng 4 nga 4 hendzicma namma garenggegec. ⁵ Ifi anggec Petoro ye witicamau tacmanu kpebung yeni tatahoc Anutuaru numukecgec.

⁶ Anu Herodengo ama wereckenu Petoro yoacfу faiudeac deec, naso imoc wegen-emanu tofocnac imohaingoc wasaingic yohockang yereng Petoro seng yohockangngoc yeranggoc witickema faiec botucngirau feec. Femagec wasai goa yeni nagu ngadeau gareng nanggec. ⁷ Yeni ama manau ifi fegec Kebuac angero mongngo hama ihai nanu amamana imoc kperagidarec. Kperagiу angerongo Petoro pandzengau kpe-serema midima deec, "Ge bic yacna." demanu seng imohaingoc Petoroac mariaunac fotockema mau ⁸ angerongo deec, "Ge fadengga dzegema hanitabega heina kemeu." Dema angerongo monggoc edeec, "Ngakpiga herea heina kemeu modacnuna." ⁹ Ifi deu Petorongo yacma angero modacma kenec. Kemma angerongo faka yearu meec,

* 12:4: Ge Makekeng nadung 12 nga 13 imohai osoma negentegecna. Ihai tacyac yohockanggac hania dekperack-teragia fede.

imocac negenu onga isoc anec. ¹⁰ Nga yeri nagu yohockanggac gareng nanggec, imoc feracyunuma kemma aieng nagutoa taonggac kiwaugeng mewegenemaec, imoc yengenaoc anggeu kemeoc. Kemema sinnu kemma angero ye ioha aockeec.

¹¹ Ifi anu Petoro ye negen negenga sariu yofi deec, "Yaguc negentegecdue, Kebungo angeroya sueu Herodeac mariunac nga yudangic yeneac herebuunac mesinude." ¹² Ifi negentegecmca kemma Yohane Marekoac nonggea kpara Maria, yeac amau sikeec. Ihai homacngoc kpeturanggema numuma tacgec. ¹³ Tacmagec Petorongo ama naguyau namma nagu heiu uanaroang mong kpara Rode, yeng imoc negemma mama ¹⁴ Petorongo yoac deu ubea negemma nagu mi witiwiti, eng sogaima ama manau emma, "Petoro ye hadac naguu nande." dema edeyunuec. ¹⁵ Edeyunuu yeni negemma degec, "Ubaga sufude me?" degec, yeng serima deec, "Fora yombong, yeng nande." deu yeneng degec, "Imoc angeroyango gedang."

¹⁶ Nga Petoro ye heimangoc nammanu yeni nagu witima yengena hemma kpidohogec. ¹⁷ Kpidohogec yeng maribarac tuema deracyunudacma Kebungo witicamaunac yungeru maec, imocac yoacsiduc ayemmemma deec, "Ngeni siducna yomoc Yakobo nga negen negensinggoc tosofocnina edeyunugec." Ifi dema meickema monnu kenec.

¹⁸ Ama wereckenu wasaingic yeni Petoro hofocma degec, "Ye dafiu aockedac?" dema kpidohoma oboc kpoboc yombong anggec ¹⁹ Herodengo meficgegecdeac deu hofocbiegec. Hofocbiegec dekpesi ayemmeu kpac anu wasai yeneng nagugareng imoc yunuhomegecdeac desiec. Desiyunuma Yudaia bangec wama Kaisarea kemema kefec.

²⁰ Herodengo Tiro nga Sidonggac ngicngac herebu meficgeyemmekefec. Imoc yofiac, yeni nenesemengngina Herodeac bangecfunac megecac amma yeni kpedzucnema yearu hama ngaba kpac anu ruae fingerudeac kpesimigec. Yeni warac Herodeac ngickereng mong kpara Birasto, ye Herodeac gaufefe amea garenggema kefec, yearu kemma yeng yenigoc kefudeac dengombong ammigec. ²¹ Herodengo yoac imoc negemma imocac turunga merengyemmeudeac naso edeyunuec. Naso imohai ye ngictau ngakpia heima ngictautatahau matacma urecyoacngina edeyunuec. ²² Edeyunuu ngic yeni sasawango horianggemima yofi degec, "Yoac imoc ngicyoac kpac, imoc Anutuac yoac." ²³ Anu ye Anutu mi afeheecac amma naso imohaingoc Kebuac angerongo Herode kpeu kamango kigec homeec. ²⁴ Homemanu Anutuac yoacngo yadima kenec.

²⁵ Anu Banaba nga Sauro Yerusarennu sueyurugec, yeri ua imoc medarec wisickeu dzigene Antiokia kenecdeac Yohane kpara mong Mareko hesickeec yenahafoc kenggec.

13

¹ Kpebung Antiokia kecgec, yeneac botucfu profete nga kpoukpou yofingo kecgec: Banaba nga Simong, kpara mong Nige, Rukeo Kirene amauunac nga Sauro amma Manaeng.* ² Anu yeni naso monnu yakasege kecma Kebu afehegecdeac kpedzucnema kecgec Tiri Asungo yoac yofi edeyunuec, "Banaba nga Sauro yeri neac ua meecdeac kpacyuruma ua yemera, ngeni imoc meecdeac desiyecmegec." ³ Ifi deu yeni yakasege kecma maringina sebingirau faima numukenehe ayecmema faiyurugec kenoc.

⁴ Tiri Asungo ifi dema sueyuruu yeri Sereukia taonnu kemeoc. Ihai sikema kporucwageu emma kengkecma Kipiro nucfu enoc. ⁵ Emma Sarami taong ihai kemma yudangic yeneac kpekpeturang amangina tackenecsoc, ihai emma Anutuac yoac deireckeyemmekenoc. Kenec Yohanengo yerigoc yenahafoc kecma meficyuruec.

⁶ Anu nuc imohai hanising ferecge kengkecma Pafo amau kenggec. Ihai kensikema yudangic mong bangecac hadehadegoc nga profete ikoha kefec kpara Bara Yesu, ye meficgegec. ⁷ Ngic yeac tosoya kia mong kpara Sergio Pauro. Kia imoc ye negeengtoayagoc nga Anutuac yoac negembesonga ammiu Banaba nga Sauro kpacyuruec.

* 13:1: Ngickereng Herodeac nonggomama yereng Manaeng heibeing ammima mekefec yadie.

⁸ Kpacyuruu Erima, ngic bangecac hadehadegoc,[†] yeng yereac yoac mefahema kiango Yesu negensinggebacac deraheec.

⁹ Ifi anu Tiri Asungo Sauro, kpara mong Pauro ubeau wakeu Erima kiwango henseris-erima yofi edeec, ¹⁰ “Mangana minginaac medac, ge Kebuac sing dindingac fekende, imocac ngaba seria amma kecna ubagau ikoc nga manganango wake wakea. Ge Kebuac sing dindingac femanu mengbaringgekecnec nasoherec ifi kecma faka imoc mi wanec. ¹¹ Imocac yaguc Kebuac kuc gearu fingeru hembesena. Kicga kundung kpeu naso botuc yomoc wenac kperagia mi heheng kecbesena.” Ifi deu imohaingoc wiac hoeng hoeng isocngo kiwa sangoheu kiwa kundung kpeu mariango meang kpeang amma mariau megecdeac deec. ¹² Faka imoc fingeru kiango hemma Kebuac siduc gombung kpoumigec, imocac negenu engena anec.

¹³ Pauro nga ngicfora yeni Pafo taong wama wageu monggoc emma kengkecma Pamfiria bangecfu Perege taonnu kensikegec. Kensikegec Yohanengo ihai wayunuma Yerusarennu dzigeneec. ¹⁴ Dzigeneu yeni Perege wama kengkecma Pisidia bangecfu Antioquia taong waseau, ihai kensikegec. Ihai kecmagec sabata naso anu yeni yudangic yeneac kpekpeturang amau emma tacgec. ¹⁵ Tacgec gareng yeneng Anutuac dedeseriyoac nga profete yeneac yoackibi goa oso wisickema yofi edeyunuec, “Tosohocnina ngereng Anutuac enacyoac mong negendape isoc demeseri anemmeec negenni.”

¹⁶ Ifi degec Paurongo yacma waickema tacdacgecdeac maribarac kpouyemmemma yofi edeyunuec, “Israengicngac, ngeni nga habu goa Anutu eweheimiandae, ngeni edengunuba negenggec: ¹⁷ Israengicngac nenang Anutungo kisicfocnina meisinkyunu yeni Aigita bangecfu kuric kecma sahegec. Amma ye kuctoayango imohacnac hesicyunu hama ¹⁸ bangec kisiu hocsiragocfu faiyunuma yenenggareng ayemmeec. Yenenggareng amma mebibieyunuma kecmanu kifa 40 wisickeec. ¹⁹ Wisickeu yeng Kanaang bangecfu amabangec seweng kpedzongyunuma kisicfocnina bangec imoc yemmeu minginasoc amma kecmagec kifa 450 wisickeec.

²⁰ Wisickeu Kanaang bangecfu kecmagec yeng dedesingic meficyunu keceremagec profete Samue fingerec. ²¹ ‘Ngictaunina mong fingeru.’ degec Anutungo Benyaminggac arenunnun Kisi medaha kpara Sauro, ye meficgeyemmeu kifa 40 enaramemengina amma kefec. ²² Kecmanu ye meickema ngictaungina Dawidi faiec. Amma yeac hania yofi dekperagiec, ‘Ni Dawidi, Isaia medac yeac ubana ngereeuyeng ammai. Yennoc enac tofoc tofohana kefude.’” (*Mitiyegec 89:20; Yesaia 13:14*)

²³ “Anu yoac yofi dedea fede, ‘Dawidi arengfora yenearunac israengicngac nenang kopocsicac ebicfunac mesinunuudeac ngic mong fingerude.’ Anutungo imoc deserinemmeec, imocac fora fingerec nga imoc Yesunoc. ²⁴ Anu Yohanengo ngic botucfu mi fingegecma kecmanu israengicngac sasawa ubangina dzigeneu mitidoku nadzicgecdeac edeyunuec. ²⁵ Edeyunuma uaya mesiu wisickebeso ammanu yofi edeyunuec, ‘Ngeni ngic negennuandae, ni ye kpac. Negenggec, neac ngadeu hade, ye engenatoa nga ni ifiango yeac hanitabe witiha yungecba mi ngereeude.’

²⁶ Tosofocna, Abrahanggac bangecfura nga habu goa Anutu eweheimiandae, ngeni yoacna deba negenggec, kopocsicac ebicfunac mesi mesiac sing fede nga komoc kpeni, yoac imoc nenannu faiec fede. ²⁷ Nga Yerusareng ngic engena mamea, yeneng Yesu mi hentegecma ye kpegecdeac desigec. Yoacfufi faima desigec nga sabata tatac nasosoc profete yeneac kpefingyoac osonegeng angandimbe, imoc seriec. ²⁸ Foracngoc, yeni Yesuac kopocsic hofocbibiema eng hodzinggema Piratoac mariu faigec, yeng desiu kpehomegecdeac degec. ²⁹ Anu mitikibiu yoacsiduha oho ohoya fede, yeni imoc ammidacma mariponnunac mesima kicsereu mekenggec. Yeni mekemma kedzebe ngicngo miac miackeau sinegec emma feec. ³⁰ Feu Anutungo ine homecfunac megboriu yarec. ³¹ Yacma ye ngicngac yegoc Gariraia bangecfunac Yerusareng taonnu yenahafoc kenggec, yeni uameme homac fingecyemmeec. Fingecyemmeu henggec, yenennoc siducedefora anggec kecdae.

[†] 13:8: Kpac imoc titiha bangecac hadehadegoc.

³² Anu Antungo bangecfocnina hanahema wiac yemmeudeac deseriyemmeec, ³³ imoc Yesu megboriu nambaracfocngina nenannu fora fingeru imocac siduc gombung edengunuandimbe. Imocacnoc Mitiyegec nadung yohockang, imohai yoac yofi oho ohoya fede,

‘Ni yagucnac megudua. Ge medacna nga ni geac Mangga.’ (Mitiyegec 2:7)

³⁴ Yeng Yesu megboriu yarec nga ye ngade homehome nga hoachoa imoc yearu monggoc mi fingerude. Yoac imocac Anutungo yofi deec,

‘Ni Dawidigoc dzahacemeic, imocac fora kenec kenehe kpetiac ngemmabade.’ (Yesaia 55:3)

³⁵ Amma Mitiyegec monnu yoac yofi fede,

‘Ge kpetiac ngicga onggongena ye mi hoaebeso.’ (Mitiyegec 16:10)

³⁶ Dawidiac yofi negendimbe, Anutungo ye ua demiec, imoc ngicfora yenearu mesima homeec. Homeu esangabofora faiyunugec, ihaingoc tonggogec hoaema kpac anec.

³⁷ Anu Anutungo ngic megboriec, yeng ine hoac hoaea kpac.

³⁸ Tosofocna yofi edengunuba negenggec: Kopocsic dzuac dzuac, imoc ngic yennoc maficgeec, dedekperagi yoac imocngo ngenearu haec. ³⁹ Nga Moseac dedeserijoacng Kopocsicngina naric mi dzuarec. Nga Yesu negensinggegec Kopocsicngina dzuaru kpac anude, imoc ine fede. ⁴⁰ Profete yeneng yoac yofi degec, imoc ngenearu seribacac nono edengunuduae.

⁴¹ ‘Ngicngac ngeni defagoc angkecdae henggec. Ni naso imohai faka morora meba ngeni imoc hengkpidoc amma hofeu kemegecde. Ngic mongngo edengunu imoc naric mi negensinggebau.’” (Habakuc 1:5)

⁴² Ifi deu Pauro nga Banaba yeri kpekpeturang amaunac mamaec ngic yeneng sabata tatac naso monggac yoac imocacngoc edeyunuecdeac derecgeyemecgec. ⁴³ Tutumang wisickeu mama yudangic nga bangec monnunac ngic homacng yudangic yenearu torokpema kecgec, yeni yenahafocngoc Pauro nga Banaba modacyurugec Anutuac wosoefahaac arennu seria kecgecdeac demeseri ayemmeoc.

⁴⁴ Nga sabata tatac nasongina monggoc anu taong imocac ngicngac yeni Anutuac yoac negenggecdeac ebiriango sikegec. ⁴⁵ Sikegec yudangic yeneng yenemma Pauro nga Banaba keracmangang ayecmegec Paurongo yoac deu yeneng yegoc yoacngina engemmama anu yoara kpema desusuic ammigec.

⁴⁶ Ifi anggec Pauro nga Banaba yeri yoac kucgoc kengeha kpac yofi edeyunuoc, “Hanahema yudangic ngeni Anutuac yoac dekperagingemmebesonga. Yaguc ngeni nge-naoc wama kekecseriac areng mi ambeso dedaeac neni wangunuma bangec monnunac ngicngac, yenearu kennide. ⁴⁷ Kebungo yofi denemmeec,

‘Neng ge bangec monnunac ngicngac, yeneac kifa faiguba geng ngicngac Kopocsicac ebicfunac mesiyununa dema ge ua imoc gemba mekengkecma bangec tegiau mekemma ebicfunac mesiyununa komoc kpegecde.’” (Yesaia 49:6)

⁴⁸ Ifi degec bangec monnunac ngicngac, yeneng imoc negemma ubangina ngereeu Kebuac yoacac dedengerec anggec. Nga kekec wisic wisickeu kpac, imocac areng anggecdeac Anutungo negengyemmeecsoc, yeni Kebu negensinggegec. ⁴⁹ Nga amabangec ihai Kebuac yoacngo wakema kenec.

⁵⁰ Taong imocac ngac kuneng goa yeni yudangic yenearu torokpema kecgec. Yudangic yeni amagareng nga ngac imoc wosoumeme ayemmemayunu kemma Pauro nga Banaba yurukporac ayecmemayunu amabangecngina segerema kisangyurugec kenoc. ⁵¹ Kemma fakanginaac amma haningiraunac yube kpefanggec mau wayunuma Ikoniong taonnu kenoc. ⁵² Nga Yesuac habu yeneac ubau songo kuneng nga Tiri Asu wake wakea fingecyemme kenec.

Yesu negensinggegec. ² Yudangic goa yeneng ine yoac imoc wama bangec monnunac ngic Anutu mi negensigec, yeni fenggeyunugec negen negensinggoc tosofocnina herebu negengyemmegec. ³ Negengyemmegec yeri serima naso herea taong ihai kecma kengeha kpac Kebuac yoac kuhagoc dekefoc. Ammanu Kebu danggunuhaac yoac meseriudeac yengenaoc nonggo tacyecmemanu yeri negensinggegecdeac faka kuhagoc nga faka mi hehena homac mema kefoc.

⁴ Ifi anec taong imocac ngic tohma goa yudangic yenearu kenggec nga goa aposoro yerearu kenggec. ⁵ Nga bangec monnunac ngic nga yudangic goa yeni garengfocngi-nagoc aposoro mangana ayecmemahocngo yereregecdeac yoac dzegergec. ⁶ Dzegergec yeri imoc negemma worama Rikaonia bangecfu kenoc. Kemma ihai Ristera nga Derebe nga amabangec goa wegenac tarecfu ⁷ siduc gombung dekperagiyemme kenoc.

⁸ Ristera taonnu ngic mong tarec, ye hanihora mangac manganea. Ye nonggo heremanaunac ifia fingeclma kenghaya kpac eng takefec. ⁹ Tackefu Paurongo siduc gombung edeyunu ngic ye negemma tacmanu yearu kic dindingac fima haniaya yofi negenec, "Ngic imoc ye ngerec ngereeac negen negensing femidenoc." ¹⁰ Ifi negemma yoac kuhagoc yofi edeec, "Ge yacma hongngoc nanna." ifi deu ngic ye poratacke yacma kengha anec.

¹¹ Anu ngic habutoa yeneng Paurongo faka meec, imoc hemma kucgoc kpacma Rikaonia yoacnginau sing yofi degec, "Nemu yeneng ngicsebi mema botucninau magec kecdae." ¹² Amma yeni Banaba ye nemu mong kpara Dia, ifi degec nga Pauro ye yoac dederegeac ngic, imocac amma nemu mong kpara Hermes, ifi degec. ¹³ Nga nemu Dia yeac sesememengicngo deu yeni burumaka ngiwa goa nga dzundzaring taong tegiau odanaguyaumekemema ngihoc yereac eweheima hosuc heibeso anggec.

¹⁴ Ammagec aposoro yeri imoc negemma ubaebic mema ngakpingira merecgema amangira wama bic habu yeneac botucfu kemma yofi arohooc, ¹⁵ "Yei, ngicngac ngeni noc andae? Neri ngic ngeni isoc, ngeneac siric. Ngeni nemungina kucmama kecdae, yeni ngadeyunuma Anutu kekehagoc mewegenegedeac siduc gombung dekperagin-gemmekedipe. Yeng wiac sasawa bangecfu nga kurumennu nga kondunnu fedacde, imoc meficgedarec.

¹⁶ Ngicngac warac kecgec, naso imohai bangec monnunac ngicngac negengyemme-manu yeni ubanginaac nga kekecnginaac songo hania hania, imocac kpaea mi faiyemme-manu yeni keceregec. ¹⁷ Keceregec ihoc bahoc mong mi angemmee, kpac. Ye haniaya negenggecdeac ubangerec angemmema deu kiawenac sawaunac nasoyau fingeckede. Nga ye nenesemeng nasoyau deu fingeru yakagina homac meficgengemmeeu songo witiau kecdae." ¹⁸ Ngihoc yereng yoac ifi gadzea mema yoac ua ebiriangoc mekecma dekpetari ayemmeec yereac hosuchelhei imoc wagec.

¹⁹ Yeri ihai kecmaec yudangic Antioquia nga Ikoniong taonnunac sikema yereac ua desakoigec. Desakoima ngicngac wangecyunugec, yenahafoc Pauro hocngo heigec. Heima negenggec, "Ye bic homedac." ifi dema ama ngadeau taikemma faigec feec.

²⁰ Femanu Yesuac habu yeneng hama oronggema memidi ammigec gborima yacma amau enec. Nga wereckengau ye Banabagoc Derebe taonnu kenoc.

²¹ Yeri kemma ihai siduc gombung dekperagiyemmeec ngic homacnggo Yesu negensinggegec. Ifi amma sing kenocfu, ihai monggoc dzigenema Ristera nga Ikoniong amma Antioquia taonnu tacyac hakefoc. ²² Hakecma amasoc sikema Yesuac habu negen negensingina kpedzucnema kecgecdeac demeseri ayemmemahof yofi edeyunuoc, "Nenang Anutuac eucererennu ennideac kpendzeng hania hania fingeclnemmeu imocac witiau kecbisina." ²³ Amma kpebung taong mocgu mocgu kecgec, yeneac enarafocngina meisingyunugec. Nga ngicngac Yesu negensinggegec, yeneac amma yakasege amma numuma kenecyunuma Kebuac hoannu faiyunuoc.

²⁴ Nga yeri Pisidia bangec ferecgema kengkecma Pamfuria bangecfu kenoc. ²⁵ Ihai kemma Perege taonnu yoac edeyunuuma Ataria taonnu kemeoc. ²⁶ Kemema kporucwageu emma kengkecma Antioquia dzigeneoc. Taong imohainoc Yesuac habu yeni warac

Kebuac kenecfu faiyuruma ua deyecmegec, imohai sikema mesioc. ²⁷ Ihai hasikema kpebung kpeditcunuma Anutungo nonggo tayecmemanu ua sasawa meoc amma bangec monnunac ngicngac, yenearu ua nagu mong meyecmeu Yesu negensinggegec, imoc edeyunudaroc. ²⁸ Amma yeri naso hereangoc Yesuac habu yeneac botucfu kefoc.

15

¹ Yudaia bangecfunac ngic goa yeni Antiokia taonnu kemema Yesuac habu yofi kpouyemmegec, "Ngeni Moseac yoacfу sebi tosangina mi herecgema komoc naric mi kpegecde." ² Ifi degec Pauro nga Banaba yericoc yoacngina engemmama anu uba mocgu mi anggec. Ifi angkecma yeni aposoro nga Yerusarennu habu enarafoengina yenigoc yoac imoc dengeregecdeac Pauro nga Banaba amma ngic goa meisinyunuma Yerusarennu sueyunugec kenggoc. ³ Nga kpebung yeneng singgac wiac yemmemma sueyunugec kenggoc. Kemma Foinike nga Samaria bangec kensikema Yesuac habu ihai kecgec, yeni yofi edeyunugec, "Bangec monnunac ngicngac homacngo ubamereng anggec." Ifi degec, yeni imoc negemma ubangerec kuneng ne-genggoc. ⁴ Nga yeni kengkecma Yerusarennu kensikegec. Kensikema kpebung nga aposoro amma Yerusareng kpebung enarafoengina, yeneng ama heiyemmegec. Heiyemmegec, yeni Anutungo nonggo tacyemmemanu misingua megec fora fingerec, imocac siduc meyemmegec. ⁵ Meyemmegec farisaioac mitiarennunac goango Yesu negensinggegec, yenearunac goa yacma yofi degec, "Bangec monnunac ngic yeni sebi tosangina herecgebésonga amma Moseac dedeseriyoac tofogecdeac demeseri ayemmebesonga."

⁶ Ifi degec aposoro nga enara yeni kpeditcunema yoac imoc tembul denegeng anggec. ⁷ Yoacula mekecma Petorongo yacma yofi deec, "Tosofocna, bangec monnunac ngicngac, yeni neac enacfunac siduc gombung negemma negensinggegecdeac Anutungo warac nenang botucfunac meisinnuec, imoc negendae. ⁸ Anutu ye uba hehengingo warac Tiri Asu nemmee, imoc ifingoc bangec monnunac ngicngac, yeneac negenecac Tiri Asu yemmee. ⁹ Nenang negensinggeing, ifi isoc yeni negensinggegec Anutungo ubangina dzuarec. ¹⁰ Ifi anu ngeni Anutu tobanggema Moseac dedeseri, imocac tofo kuneng Yesuac habu yeneac witiu faibeso dedae, imoc naric mi ande. Bangecfocnina nga esangabofocnina amma nenang imoc tofobibiema obohoing. ¹¹ Nga yofi negensinggedimbe, Kebu Yesungo yudangic nga bangec monnunac ngicngac, neni nenhafoc danggunuha nemmema ebicfunac mesinunu komoc kpenide."

¹² Ifi deu habutoa yeni engsac negemma tacgec. Nga Anutungo Pauro nga Banaba nonggo tacyemecmanu ua meoc, imocac siduc meyemmeoc. Yeri bangec monnunac ngicngac, yenearu negensinggegecdeac faka kuhagoc nga faka mi hehena homac meoc, imoc edeyunuoc.

¹³ Siduc meyemmeec wisickeu Yakobongo yoac yofi edeyunuec, "Tosofocna, deba negenggec, ¹⁴ Anutungo hanahema bangec monnunac ngicngac, yenearunac ngicngac meyunuу yeac arengfora anggecdeac sing meficgeec,* imocac yoac Simongngo dekper-agiu negending. ¹⁵ Negenni yeac yoacngo profete yeneac yoacgoc socfungoc ande. Negenggec, mitikibiu yoac yofi ohogec fede.

¹⁶ "Neng ngade kecma dzigenema Dawidiac amabara sesuhau monggoc heigborima meseribade. ¹⁷ Nga ngic toseango Kebu ni kpachofoc anemma meficnugecde amma bangec monnunac ngicngac, yeneng ifingoc arengfocna ambisia." (*Amosi 9:11-12*)

¹⁸ Kebu ye bicngoc yoac ifia deereecngo dedenoc.' ¹⁹ Imocac negengising amma yofi deduae, bangec monnunac ngicngac, yenearunacngo Anutu ubanginango hoanggema kecdae, yeni ebictoa mi yemmebisina. ²⁰ Yofisac desrima kibi ohoyemmebisina, ngicngac yeneng nemunginaac sese dema wiac heiyemmekedae, wiac wonongagoc ifia wabisia. Yeni serima kecma kaisero mi ambisia nga yamberec fusia sawagoc amma sacac

* 15:14: Sing imoc Konerioac amau hanahema fingerec.

segekecbisia. ²¹ Yeni Moseac yoac bic negendae. Nga imoc esea bicngoc yuda yeneng hanahema taonsoc osohakecgec. Amma imoc yofinenggac ifingoc sabata tatac nasoyau kpekpeturang amanginasoc osonegeng angandae.”

²² Anu aposoro nga kpebunggac enarafocngina amma kpebungtoa, yeni negenggec imoc naric anec. Nga yenearunac ngic enara yohockang meisingyurugec mong kpara Yuda, yeac kpara mong Basaba, amma Sira. Meisingyuruma yeri Pauro nga Banaba yerigoc yenahafoc Antiokia taonnu kenggecdeac sueyurugec. ²³ Amma yoackibi mong yofi dema ohoma yemmegec kenggec,

“Neni tosofocngina aposoro nga enarango bangec monggac habuunac tosofocnina Antiokia nga Siria amma Kirikia bangecfu kecdae, ngenearu yoackibi yoc faingemmedimbe.

²⁴ Wenacngerec. Neni mi sueyunumina neneearunac ngic goa yeni yenaoc ngenearu hama yoac edengunuma negen negengngina mesufugec negengyohoc anggec, imoc negending. ²⁵ Neni imoc negemma uba mocgu amma ngic yohockang meisingyuruma tosobocnina Banaba nga Pauro yerigoc sueyuruni hadae. ²⁶ Ngic yerinoc Kebunina Yesu Kristo, yeac amma kekecngira waoc. ²⁷ Anu ngic imoc meisingyuruding, yeri hama yoac imoc enacfу dekperagingemmeec negembisia. ²⁸ Tiri Asu nga neni nenahafoc ebic goa witinginai mi faingemmenideac negenni ngereede. Ngeni singyoac yomocsac modacgecdeac faingemmeni ngereede: ²⁹ Ngicngac nemunginagoc yeneng nemungina yeneac sese dema yang heiymemegec, ngeni imoc wama mi nebisia. Ngeni yamberec fusia sawagoc mi nebisia amma sac mi nebisia. Nga kaisero mi ambisia. Ngeni imoc sasawa wadacgec ngereeude.

Imocac ngeni ubangerecgoc kecbisia.”

³⁰ Anu kpebung yeni ngic imocnog sueyunugec kenggec. Kengkecma yeni Antiokia kemesikema Yesuac habu Antiokia kecgec, yeni kpedzucyunuma yoackibi imoc yemmegec. ³¹ Yemmegec memeseri yoackibi imoc hemma osoma ubangerec negenggec.

³² Amma Yuda nga Sira yeri profete kefocac yoac homac dema Yesuac habu ubangina meefaima demeseri ayemmeoc. ³³ Ifi angkefec naso wisickeu Yesuac habu yenearu dzigenebesonga turunga ruae nga kenecyoac ayecmegec kenoc. ³⁴ Nga Sirango ine ihai kecbeso negenec.

³⁵ Pauro nga Banaba yeri Antiokia taonnu uangira monggoc torokpema mekefoc. Mekefec ngic homac yenigoc memefic amma Kebuac yoac ngicngac edekpou ayemmemma siduc gombunggac hania dekperagiyemmeec. ³⁶ Kecma Paurongo Banaba yofi edeec, “Nerang monggoc dzigene kemma taonnu Kebuac yoac dekperagiyemmeic, ihai negen negensinggoc tosofocnina dafi kecdae, imoc kemma hennegeng ambisira.” ³⁷ Ifi deu Banabango Yohane Mareko yenahafoc kenggecdeac deec. ³⁸ Nga Mareko ye warac yerigoc kengkecma Pamfiria bangecfu ua wama woraecac amma Paurongo yegoc kenggecdeac negenu mi ngereec. ³⁹ Ifi amma Banabagoc yoacngira engemmama anu wama faiemeoc. Faiemema Banabango Mareko hesickeu kemma kporucwageu emma Kipiro nucfu kenoc. ⁴⁰ Nga Pauro ye Sira meu kembeso deec Yesuac habu yeneng Kebuac danggunucngu ngerearu febeso degec kenoc. ⁴¹ Kemma yeri Siria nga Kirikia bangecfu kengkecma kpebung demeseri ayemmekenc.

16

¹ Pauro ye kengkecma Derebe nga Ristera taonnu kenec. Anu Ristera ihai ubamereng ngic mong kefec, kpara Timoteo. Yeac nonggea yudangac nga ye Yesuac arennu toroc torokpea anu mama ye grikngic. ² Amma Yesuac habu Ristera nga Ikoniong taonnu kecgec, yeneng Pauro yofi egegec, “Timoteo ye fakaya gombunga.” ³ Edegec Paurongo yerahafoc kenecdeac edeu naric deec. Anu yudangic bangec imohai kecgec, yeneng Timoteo mama ye grikngic, imoc negendacgec. Imocac Paurongo yeneac amma Timoteoac sebi tosea herecgeec. ⁴ Nga yeri amaea amaea kemma aposoro nga

Yerusareng habuac enarafocngina singyoac dedzege anggec, imoc tofohogecdeac Yesuac habu edeyunukenoc. ⁵ Ifi amma ua meec kpebung yeneac negensing yadiec. Nga wenacsoc bangec monnunac ngicngac, yeneng aposoro yenearu kemma torokpekecgec homac anggec.

⁶ Asia bangetoau yoac dekperagiyemmebeso degec Tiri Asungo kpetariyemmeu Firigia nga Garatia bangec eng ferecgema kenggec. ⁷ Kengkecma Misia bangec nga Asia bangec botucngirau namma Bitinia bangecfu kembeso degec Yesuac Asungo kpae heiyemmeec. ⁸ Imocac yeni Misia bangec ferahemma kengkecma Troa taonnu kemegec. ⁹ Ihai sikema tofocnac imohai Paурongo onga mong yofi henec, Makedoniangic mongngo yearu fingecma namma desambic ammima yofi edeec, “Ge dokutoa ferecgema Makedonia bangecfu hama meficnunubesena.” ¹⁰ Pauro ye wiac imoc henu Anutungo nenii Makedonia bangecfu kemma siduc gombung dekperagiyemmenideac kpacnude, ifi negentegecma Troa wanideac bic efaiing.

¹¹ Efaima kporucwageu emma Troa wama ferecgema kengkecma Samotrake nucfu kensikeing. Kensikema wereckengau imohacnac kengkecma Neapori taonnu sikeing. ¹² Sikema ihai wageunac mama hanising kengkecma Firipi taonnu sikeing. Imoc Makedonia bangetoa imocac taongyada. Romangic yeneng warac bangec imoc megec. Anu taong imohai uameme goa kecmina ¹³ sabata naso anu taong odanagu wegenacf doku mong feec, imohai yofi dema kemeing, “Ngicngac numuandae, yeneac tacyac mong doku tegiau fede me kpac, imoc kemema henni.” Ifi dema kemema ngac kpedzucnema kecmagec meficyunuma matacma yenigoc yoac yoac aning. ¹⁴ Yeneac botucfunac ngac mong Tiatira taonnunac kpara Ridia, ye finacama mingina nga kporuc sacsac faikefec. Ye Anutu eweheimima kefu Kebungo ubea mekperagiu Paуроac yoac kedzac kpema negenec. ¹⁵ Amma ye yengena nga arengfora mitidoku nadzicma yofi derecgenemmeec, “Negen negennuguec ni Kebu fora negensinggeanduaeu neac amau erema nigoc tacyac ambisia.” Ifi dema ngombonnunu ening.

¹⁶ Naso monnu numukecgec, imohai monggoc kememina ihai wanac naroang mongngo meficnunuec. Naroang ye yafingagoc kecma ngicngac yeneac kpefingdede kefec. Ifi amma ngic mingalingfora hiedzotoa kirecgeyemmekefec.* ¹⁷ Anu yennoc meficnunuma Pauro nga neni modacnunuma kpacma arohoec, “Ngic yomocngo Anutu Engenatoa, yeac enac tofoc tofoho nga kopocsicac ebicfunac mesi mesi amma komoc kpegecdeac sing mong derecgenemmedacgec ngeni sing imohai komoc kpegecde.” ¹⁸ Faka imoc wenacsoc anemmekefu Paурongo imocac modzea tiu sisirema dzigene yafing yofi edeec, “Ni Yesu Kristo yeac kpacfu demekiri amma edeguba, ge ngac hereunac erema kenna.” Ifi deu ye imohaingoc erema kenec.

¹⁹ Kenu ngac mingalingfora yeni hiedzongina fingecyemmeande, imoc kpac anu negemma Pauro nga Sira mendangyuruma kpedziyuruma yoacf u faiyurugecdeac kia yeneac amasobennu kenggec. ²⁰ Kemma kia yenearu faiyuruma yofi degec, “Yeri yudangicngo amaninau dzomu meficgema tacyacnina memanganedape. ²¹ Amma faka goa furia romangic nenaoc menideac kpaeyoac dedea fede, imocnoc mema modacdacnideac edenunudape.”

²² Ifi degec ngichabutoango uba mocgu amma herebu negengyecmegec. Negengyecmegec kiango deu ngakpingira kucbiric hesigec. Hesima dzikacngo yurugec. ²³ Dzikacngo homac kperec merecgeyuruma witicama faiyuruma garengnogo nagu seria heima gombunga yombong garengyuruudeac edegec. ²⁴ Yoac seria ifia egegecac amma ye witicama mana ungguruha monnu faiyuruma haningira ic hendzic hendzirau faiu kindanggeu feoc.

²⁵ Tofocnac dzongiau Pauro nga Sira yeri Anutu yegec nunumu ammioc. Ammiec witicngic goango kedzac kpema negengyecmegec. ²⁶ Negengyecmemagec, imohaingoc usoctoa kuhagoc meu witicama kpemindzaheu naguya bic anggedarec amma ngic

* 16:16: Ngicngo bereckasi bummeandimbe isoc naroang ifi bummegec. Naso imohai yenearu faka ifia feec.

sasawa witicngina fotockedarec. ²⁷ Anu witicama garengngo gauunac kpidohoma yacma nagu anggema nandaru hemma, yofi negenec, "Witicngic woradau." ifi negemma wasaibeanga taima ewehomebeso anu ²⁸ Paurongo kungengngoc kpacma deec, "Ge sebiga mi kpena, neni hafoangoc tacdimbe."

²⁹ Ifi deu gareng ye arengfora deu kifa migec ama manau emma dzonong fede fede amma Pauro nga Sira yereac haniu makpema feec. ³⁰ Amma yacma ama manaunac hesicyuru mama kpesiyecmeec, "Ngickunenghoca, ni dafi amma komoc kpebade?" ³¹ Ifi deu yereng yofi edeoc, "Ge nga arengfocga ngeni Kebu Yesu Kristo negensinggegec yeng ebicfunac mesingunu komoc kpegecde." ³² Ifi dema ye nga arengfora Kebuac yoac edeyunuoc. ³³ Edeyunuec gareng ye yacma tofocnac imohaingoc amau emma kubecngira dzuacsangohe ayecmema deu yengena nga arengfora doku nadzicgec. ³⁴ Nadzicgec wisickeu yengena ama manau faiyuruma deu yaka gombunga mengerema yemecgec neoc. Anu ye nga arengfora yeni Anutuac ngic anggecac ubangina ngereeusogaigec.

³⁵ Ama wereckenu kia yeneng witicama gareng ngic yohockang yungecyuruudeac keracnatang sueyunugec. ³⁶ Sueyunugec garengngo yoac imoc negemma Pauro yofi edeoc, "Ni fainguruba kenecdeac kia yeneng yoac faigec hade. Imoc ngeri mama kemma ruaegoc kecbesera." ³⁷ Ifi deu Paurongo yofi edeoc, "Neri romangic arenna torokpema kecde, yeni hanianira mi negendacma ngic kicfu eng dzikacng nuruma witicama fainurugec. Nga yoc waic suenurugec negendae, imoc naric kpac. Yeni yenaoc hama hesicnurugec kendede."

³⁸ Anu Paurongo yoac ifi deu keracnatang yeni dzigene kemma kia yoac yofi edeyunugec, "Ngic yeri romangic arenunacng kecdape." Ifi degec yeni siduc imoc negemma damuyunu kengec amma ³⁹ nighoc yerear hama demebanang ayecmema witicamaunac hesicyuru mama amangina wama kenecdeac edeyurugec. ⁴⁰ Ifi edeyrugec yeri witicamaunac mama Ridia yeac amau emma Yesuac habu yenemma demeseri ayemmemma kenoc.

17

¹ Pauro nga Sira yeri Amfipori nga Aporonia taong ferecgema Tesaronike taonnu kenoc. Nga ihai yudangic yeneac kpekpeturang ama mong tarec. ² Nga Paurongo angande, ifi amma kpekpeturang amanginai emma sabata naso harebec yenigoc Anutuac yoac denegeng anggec. ³ Ifi amma yoac yofi dema mitikibiu yoac edzacyunuma deireckeyemmeec, "Messiango kpenzeng kpekecma homema monggoc gborima yarude, imoc mitikibiu dedea fede. Amma Yesu yennoc Messia, imoc dekperagikecduae." ⁴ Ye ifi seria deireckekeyemmeu yudangic goango ireckema Pauro nga Sira, yerear kpeketahegec. Nga grikngic Anutu eweheimima kecandae nga ngac kuneng yeni homacng yerear torokpegec.

⁵ Anu ngic homacng siduc gombung negenggec yudangic yeneng keracmangang ayemmemma kpedzaroc sobennu kemma yarengic kpacyunugec. Kpacyunuma taonnu dzomugerec meficgema Yasonggac amau Pauro nga Sira taroc, imohai kpedzucnedacgec. Kpedzucnedacma nighoc meyuruma ngic yeneac botucfu faiyurubesonga degec. ⁶ Dema hofocyurma Yasong nga Yesuac habuunac goa meyunuma amaac enarameme yeneac kicfu kpedziyunuma kenggec. Imoc yofi dema aro aro kenggec, "Bangeha bangeha dzomugerec meficgema ngicuba miacyemmeandae, ngic imonganoc nenearu ifingoc hadau. ⁷ Haec Yasongngo ama heiyemeru tacdape. Yeri Ngictau Sisaac dedeseriyoac kpema ngictau furia mong kpara Yesu, ye kpanggema dedape." ⁸ Yeni yoac ifi dema amangic nga enara wosongina megec. ⁹ Ifi anu gareng yeni Yasong nga tosofora ayemmegec sebingina kaso kpema hiedzo faigec wayunugec kenggec.

¹⁰ Ama toforeu Yesuac habu yeneng imohaingoc Pauro nga Sira Berea taonnu sueyunugec kenoc. Kemma ihai yudangic yeneac kpekpeturang amau emma siduc gombung deoc. ¹¹ Deec taong imocac yudangic yeni fakangina nga angammemengina kpacgoc

nga Tesaronike yeneac faka isoc kpahac, imocac enacyoac ubaefac hafoangoc negemma hoanggegec. Amma yoacngira ikoha me fora dema wenaha wenaha mitikibi osoma deusu anggec. ¹² Ifiac amma yudangic yeneearunac homacnggo Yesu negensinggegec amma grikngic nga grikngac kuneng homacnggo yerearu torokpegec.

¹³ Torokpegec Paurongo Berea taonnu Anutuac yoac dekperagiu siduc imocnggo Tesaronike kenu yudangic yeneng negenggec. Negemma Berea hama habutoa imoc demanganema herengina miacgec. ¹⁴ Ifi anggec Yesuac habu yeneng imohaingoc Pauro kondunnu suegec kemeeec. Nga Sira nga Timoteo yeri ihaingoc kefoc. ¹⁵ Anu ngic yeneng Pauro hesicke kengkecma Ateng taonnu faigec. Faigec yeng Sira nga Timoteo bic haecdeac edeyunu ngic yeni dzigeneggec.

¹⁶ Pauro ye Ateng taonnu yereac tomai kefec. Nga nemuonga wakemangoc tackenggec ye imoc hemma ubahodung kuneng negenggec. ¹⁷ Amma ye yudangic yeneac kpekpeturang amau emma yudangic yenang nga grikngic goa yudangic yenearu torokpema kecgec, yeni yenahafoc mitiac denegeng anggec. Amma ye ifingoc wenaha wenaha kpedzaroc sobennu kemma ngic tacgec, yenigoc miti denegeng anggec.

¹⁸ Anu taong imohai kekecac hania negen negengngic kecgec, kpacngina epikuengic nga stoikengic. Ngic imoc yeneng Paurogoc yoac demereng anggec goango Pauroac yofi degec, "Ngic imoc yennoc yadi yadima yoac debeso ande, imoc mi negendimbe." ifi degec toseango yofi degec, "Ye nemu furiaac dedekperagi ngic." Paurongo Yesuac siduc nga homecfunac yacyac, yoac imoc deecac yeni ifi degec. ¹⁹ Ifi dema sobengtoa mong kpara Areopage ihai hesicke emma degec,* "Ge yoac furia denec, imoc naric edenunubesena. ²⁰ Yoac imoc kedzacnina furia, imocac ge haniagoc dena negembeso anemmede." ²¹ Ateng ngic kuric nga ama mingina sasawa, yeni yoacsiduc furia negemma yoac imocsac denegeng amma siduc homac angkecgec.

²² Ifi anu Pauro ye Areopage tutumang botucfu namma ngic yofi edeyunuec, "Ateng ngic, ni wiac sasawa hemma haniangina yofi hentegecduae, ngeni nemu hania hania homac eweheiyemmemma yeneac faka hania hania mekecdae. ²³ Ni taongnginau kengha amma nemuongafocngina yenengkecma arata monnu kibi yofi oho ohoya feu henai, 'Nemu mi hennegeng angana, yeac arata.' Nga nemu imoc mi negemma eweheimiandae, yeac hania dekperagingemmeba negenggec.

²⁴ Anutu yennoc bangectoa bangec nga wiac sasawa ihai fede, imoc meficgema witiau wiac sasawa faidarec, yeng bangec nga kurumeng imocac mingina kecde. Ye womong ngic maringo memea, imohai tacyac mi angkecde. ²⁵ Amma wiac mong hoforu ngicnggo ua mema meficgeminade, imoc mi fede, kpac. Ye yengenaoc kekec nga asu amma wiac sasawa ngic yemmekecde. ²⁶ Amma ngic mocgu meficgema deu yearunac ngic bangeha bangeha nga habuya habuya fingecsahe kecgecdeac deec. Amma naso nga kpete, imoc yengngoc deyemmeec. ²⁷ Nga ngic yeni yenaoc ubanginango Kebu yengena hofocma meficgeandae, ye imoc negensima ifi anec. Foracngoc, ye hereau kpac, ye ngic nenang botucfu kecde. ²⁸ Nga yennoc kekecninaac hania, nenang yeac kucfu kecma angammeme angkecdimbe. Amma ngeneac negen negengngic goango yofinoc degec, 'Nenang Anutuarunac fingering.'

²⁹ Anu nenang Anutuarunac, imocac amma ngic yeni ubau negemma gol me siriwa me hocnggo marikibi meandae, Anutungo ifi isoc ande, imoc mi negensibisia. Anutu ye kuctoa mingina. ³⁰ Ngeni warac wiac imoc mi negentegecgecac Anutungo hemma imocac yoara mi deec. Yaguc ine bangeha bangeha ngicngac sasawa ubangina dzigeneudeac demeseri ayemmekecde. ³¹ Yeng bicngoc naso mong deec, imoc fede. Naso imohai bangeha bangeha ngicngac hanianina desima turunga dindingac merennemmeude. Amma ngic mong ye ua imocnoc meudeac demiec, ye ngic imoc edzacnunuudeac homecfunac megboriu yarec."

* ^{17:19:} Areopage bangec ihai kpekpeturang ama mong feec. Yeni ihai kpeturanggema yoac hania hania denegeng angkecgec.

³² Anu Pauro ye homecfunac yacyac, imocac yoac deu goango demembaic ammigec nga goango degec, “Yoac imoc naso monnu dena monggoc negembisina.” ³³ Ifi degec Paurongo wayunuma kenec. ³⁴ Anu ngic goango ine Pauroaru kpeketahemha Yesu negensinggegec. Imoc yenearunac desi desi ngickuneng mong kpara Dionisio, ye Areopageac memba mong nga ngac mong kpara Damari, amma ngicngac goa.

18

¹ Paurongo uaya mesima Ateng wama Korinti taonnu kenec. ² Ihai yudangic mong meficgeec kpara Akpira, ye Ponto bangecfu fingerec. Amma ye enema Prisika yegoc Itaria bangecfu kecmaec ngictau Sisa Kraudiongo yudangicngac Roma taonnu kecgec, yeneac dedeseriyoac dema sueyunuu kendacgec. Imocac yeri Roma wama Korinti taonnu gbori gbori hama kefoc. Anu Paurongo yerearu kenec. ³ Pauro ye seriamma memengic nga Akpira ye ua imocngoc mekefecac ye amea tacyac amma meficgeu yerahafoc hiedzo memeac ua imoc mekefoc. ⁴ Mekecma Paurongo sabata tatac nasosoc yudangic yeneac kpekpeturang amau emma yudangic nga grikngic denegeng ammagec yoac deireckeyemmeec.

⁵ Anu Sira nga Timoteo yeri Makedonia bangecfunac haec Paurongo ua goa wama siduc gombung dedeac hombananga kefec. Amma yudangic yoac deireckeyemmekefec, imoc yofi, “Yesu ye Messianoc.” ⁶ Ifi ayemmeu yeni yoara surema deendema ammigec yeng fakangina wama wambaya kpeihaiu yube mau yofi edeyunuec, “Ngeneac sacngogenang orucfu habeso. Nga kopocsicnginaac turunga neac mi anude, imoc ngenang anude. Imocac yaguc wangunuma bangec monnunac ngicngac, yenearu kembade.”

⁷ Paurongo ifi dema yuda yeneac kpekpeturang ama wama ngic mong kpara Titio Yusto, yeac amau emma tacyac anec. Ngic imoc ye Anutu eweheimima kefec nga amea imoc yudangic yeneac kpekpeturang ama tegiau tarec. ⁸ Nga yudangic yeneac kpekpeturang amaac gareng kpara Krispo, ye nga arengfora yeni Yesu negensinggegec. Nga Korinti ngicngac homacngo Kebu negensinggema mitidoku nadzicgec.

⁹ Anu Tofocnac monnu Kebungo Pauro ongau yoac yofi edeec, “Ni nanggegubade, imocac amma kengec amma enackidzic mi ambesena, ge serima kecma enacyoacna debesena. ¹⁰ Neac ngichabutoa taong yomohai kecdaec ngic yeneng gumeme mi anggecde.” ¹¹ Ifi edeu Paurongo kifa mocgu nga noboha ihai tacma Anutuac yoac ngicngac edekpou ayemmeec.

¹² Gariong ye Akaia bangecfu kiatoa kecmanu yudangic yeni uba mocgu amma Pauro ngaba ammima yoacfу mekenggек. ¹³ Mekemma kiaaru nesunggema yofi egegec, “Ngic yomoc ye dedeseriyoacnina kpeande. Ye sing mong tima Anutu eweheimigecdeac ngic fenggeyunuande.”

¹⁴ Edegec Paurongo enacefac amma yoac debeso ammanu Gariongngو yudangic yofi edeyunuec, “O yudangic, ngic ye kopocsic ebiria meficgebac dede yoacngina naric negembai. ¹⁵ Nga ngeni ine ngenang edekpouyoac nga kpac hania hania amma singngina imocac yoacngina engemmama andeac ngenaoc desibisia. Yoac ifia neng naric mi desibade, imoc neac ua kpahac.” ¹⁶ Ifi dema yoacfу kisangyunuu magec. ¹⁷ Mama yeni uba mocgu amma kpekpeturang ama imocac gareng Sostene kiaac kicfu kpegec kiango imoc hemma yohoc bahoc anec.

¹⁸ Paurongo Korinti kecma Yesuac habu dekpemac ayemmemha Siria bangecfu kenudeac Kengkereai taonnu kemema wageu enec. Amma Prisika nga Akpira yerigoc yenahafoc kenggec. Kemma ye Anutugoc dedeseri deecac Kengkereai ihai orucdzoea merecgema wedzerec. ¹⁹ Yeni Efeso taonnu sikema Paurongo Akpira nga Prisika wayuruma yudangic yeneac kpekpeturang amau emma yenigoc Anutuac enacyoac denegeng anggec. ²⁰ Amma yudangic yenigoc kefudeac desambic ammigec ye imoc wama yenigoc yoac yofi dedzege anec. ²¹ “Anutungo negennenude isoc ni ngenearu monggoc dzigenebade.” ifi dema Efeso taong wama wageu monggoc emma kenec. ²² Kengkecma Kaisarea sikema kpebung yenearu emma yenigoc yoac amma Antiokia kemeeec.

²³ Paurongo Antiokia imohai naso goau kefec. Kecma taong imoc wama Garatia nga Firigia bangec yerecgema Yesuac habu demeseri ayemmemma kenec.

²⁴ Naso imohai Efeso taonnu yudangic mong haec, kpara Aporo. Ye Aresandria taonnu fingecma kibiamatoa mesima mitikibiu yoac oho ohoya feec, imocac hania negentegecdarec. ²⁵ Ye Kebuac enacyoac kpoumigec negenec. Anu ye Yohaneac dokunadzic, imocac sirihasac negenec. Nga ye Yesuac sing gerek gerehagoc tongganangngoc deec.* ²⁶ Ye yudangic yeneac kpekpeturang amau siduc gombung kengeha kpac edeyunuec. Amma ihai siduc gombung deu Prisika nga Akpira yeri yoara negemma hoanggema Anutuac sing gboria tongganang deireckemioe.

²⁷ Nga Aporo ye Akaia bangecfu kembeso deu Yesuac habu yeni demeseri ammima Yesuac kpebung edi kecgec, yeneac kibi yofi ohogec, “Ngic yomoc ye ngenearu hau ngeneng ama heimibisia.” ifi ohomigec mekengkecma ihai sikeec. Sikeu Anutungo ngicngac danggunuha yemmeu Yesu negensinggekecgec, yenearu kemma homac meficyunukefec. ²⁸ Ye didiu yombong yoac kucgoc yudangic dedzameyunuma yofi dekperagie, “Yesu yennoc Messia.” Ye mitikibigoc yoac imoc dema edzacyunu ubangina kuha maec.

19

¹ Aporo ye Korinti taonnu kecmanu Paurongo sifecfusing ferecgae kengkecma Efeso sikema Yesuac habu goa maficyunuma ² kpesiyemmeec, “Ngeni Yesu negensinggema Tiri Asugoc anggec me kpac?” ifi deu yeneng degec, “Kpac, Tiri Asu kecde, siduc ifia mong mi negening.” ³ Ifi degec monggoc kpesiyemmeec, “Anu ngeni noc mitidoku nadzicgec?” deu yofi degec, “Neni Yohaneac mitidoku nadziring.” ⁴ Ifi degec Paurongo yofi edeyunuec, “Yohanengo ngic ubangina dzigeneudeac doku nadzicyemmemma yofi edeyunuec, ‘Ngadenau hama kecde, ngeni ye negensinggebisia.’ ye yoac imoc Yesuac negemma deec.” ⁵ Ngic yeni yoac imoc negemma Kebu Yesuac kpacfumitidoku nadzicgec. ⁶ Mitidoku nadzicgec Paurongo maria sebinginai faiu Tiri Asungo yenearu maec. Mama ubangina wakeu yeni nedzarangyoac nga profeteyoac degec. ⁷ Ngic ifi anggec, yeneac kpetengina 12 isoc anec.

⁸ Paurongo yudangic yeneac kpekpeturang amau emma kengeha kpac kecma afo harebec siduc gombung dekperagiyemmekefec. Amma ye Anutuac eucererenggac hania yenigoc demereng angemema defengge ayemmeec. ⁹ Ifi anu ngic goa yeni ubaseri amma Yesuac sing gombung ngadehema ngicngac habutoa yeneac kicfu imoc demanganegec Paurongo wayunuec. Wayunuma Yesuac habu kpedzucyunuma wenacsoc ngic mong kpara Tirano, yeac kpoukpou amau siduc gombung dekpou ayemmekefec. ¹⁰ Ye kifa yohockang ifi kecmanu Asia bangectoau yudangic nga grikngic ifingoc Kebuac yoac negendacgec.

¹¹ Nga Anutungo Pauro nonggo tacmimanu faka kiwa morora kuhagoc meec.

¹² Paurongo uakporuc nga keremmeme mekefec, ngicngac yeni imoc mema hafeigoc yenearu mekenggec, yeneng imoc kpeserema ngereegec nga asu mangana herenginaunac erema woragec.

¹³ Yudangic goa bangec yerecgema asu mangana yunukporac anggec, yenearunac ngic goango ngicngac asu manganagoc yeneac witiu Yesuac kpac kpacma tobanggema ua yofi mema degec, “Yesu kpacsiduha Paurongo dekperagiande, ge ngic yeac kpacfumorabesena.” ¹⁴ Amma yudangic mong kpara Skewa, ye womong gareng enara kefec nga yeac medacfora 7 yeni ifinoc anggec. ¹⁵ Ifi amma degec asumanganango yoac yofi merengyemmeec, “Yesu negenduae amma Pauro ifingoc negenduae. Anu ngeni merac?” ¹⁶ Ifi dema ngic asu manganagocngko kucgoc yacma wasai mema medac sasawa yunudacma ngakpingina mesuc kpesuc mema sebingina merecgeu yeni sac nadzicma senggang yacma amaunac mama woragec.

* ^{18:25:} Ngicngac yeni Yesuac enac tofoco tofoho anggecdeac Anutu Manggac nga Medac amma Tiri Asu yeneac kpacfumokunadzic monggoc ambisia. Yohaneac dokunadzic imoc soha mi anec, imocac dedea, imoc mi negentegerec.

¹⁷ Anu Efeso taonnu yudangic nga grikngic yeni imocac siduc negendacma kucngina mau dzonong fede fede anggec. Ifi amma Kebu Yesu afehema dengeregec. ¹⁸ Dengerema ngicngac Yesu negensinggegec, yenearunac homacng sikekma angammemengina mangana angkecgec, imoc nonongkac deficgedacgec. ¹⁹ Deficgegec ngicngac homacng warac bangecac hadehadegoc faka megec, yeni kibingina kpeturanggema ngic yeneac kicfu faigec gerecfu dzeeec.* Kpeturanggema faigec dzeeec, kibi imoc ngic 10 yeneng kifa 16 kampani ua mema ua bummegecde, dzo kpetea imocacsoc anec. ²⁰ Nga yeni ifi anggec Kebuac yoacsiducng kucgoc fingectegecma noboc noboc sokoma kenec.

²¹ Paurongo mising ua imoc mesidacma yofi deec, “Asungo ubanau negen negeng nendeac Makedonia nga Akaia bangec ferecgema Yerusarennu kemma tacba wisickeu Roma taonnu kembesare.” ²² Ifi dema memefihora Timoteo nga Erasto sueyuruu Makedonia bangecfu waraima kenoc. Nga yengena ine Asia bangecfu monggoc kapia torokpema kefec.

²³ Naso imohai Efeso taonnu Yesuac yoacsiducac amma kpeborongtoa fingerec. ²⁴ Imoc yofi: Siriwango marikibimemengic mong kefec kpara Demetrio, yeng Atemis nemu womonggac ongea kapis kapis siriwango meu enu ngic yeni bummekecgec. Bummegec ye nga ua ngic tosofora hiedzo homac kirecgeyemmekefec. ²⁵ Demetriongo ua ngic tosofora nga marikibimemengic sasawa kpedzucyunuma yofi edeyunuec, “Ngicwiac, ngeni uanina imocngo dzofinac meficgenemmeande, imoc negenda. ²⁶ Nga ngic mong hama kecde kpara Pauro, yeac hania negenda. Ye Efeso amaunac nga Asia bangec goaunac ngic noc efea fenggeyunuma uba mesufu ayemmema yofi edeyunuande, ‘Nemuonga ngicmaringo memea, imoc wiac fora kpahac.’ ²⁷ Yeng ifi anu uanina kuha mabacac nga imocsac kpac. Nemutoanina Atemis yeac womong efaibacac amma Atemis yengena kpacsiduha kuha madacbac. Anu Asia bangecfunac nga bangec noboc nobocnac ngic yenahafoc eweheimiandae amma siduha dafi kpac anude, imoc obohode.”

²⁸ Demetrio yeng yoac ifi edeyunu yeni herebu kuneng negemma arohoma yofi degec, “Efeso yeneac Atemis ye engenatoa!” ²⁹ Ifi amma ngic homacng yenearu torokpema taong wakema dzomu gerehagoc meficgebesonga kpekpeturangsobennu yenahafoc nedzima kendacgec. Amma Makedonianac ngic yohockang Pauro modaroc, kpacngira Gaio nga Aristako, yeri meyuruma kpedziyuru kenggec. ³⁰ Nga Paurongo ifi negemma ngic kpekpeturannu kembeso deu Yesuac habu yeneng segeregec. ³¹ Amma prowinsiac ngickuneng goa Pauroac toso kecgec, yeneng ifingoc kpekpeturang sobennu mi kenudeac dederacyoac yearu faigec kenec.

³² Nga kpekpeturang ihai ngicngac yeneng yoacorong homac anggec yoac sufudarec. Sufudaru goatoango “Hania damocac yei hama nandimbe?” ifi dema obohogec.

³³ Obohoma nammagec yudangic tosongina mong kpara Aresande, ye ngichabutoa botucnginau nammanu deede ammigec yoac dzaeu emma yoac demendzic anudeac ngic maribarac kpouyemmeec. ³⁴ Enu ngic yeneng ye yudangic, ifi hentegecma yenahafoc aua yohockang ferahema arohoma yofi degec, “Efeso yeneac Atemis ye engenatoa.”

³⁵ Ifi angkecmagec Efeso taonggac kibi oho ohongicng hama yofi edeyunuec, “Ngeni waickema tacdacgec! Efeso ngicngac ngeni negenggec, Atemistoaninaac ongea nga womonga henggareng angkecdimbe. Amma yeac onga sawaunac maec, imoc bangectoa bangecac ngicngac sasawango negendacdae. ³⁶ Imocac ngeni ubangina mau faka sicsauc mi ambisia. ³⁷ Anu ngic yohockang meyuru hadae, yeri nemuninaac womonnunac wiac mong hamangec mi medaoc me Atemis mi emmidaoc. ³⁸ Demetrio nga ua ngic ogofora yeni ngic monggac negenggec manganedeu ye yoacf faibisia. Anu yoacf faifafa, imocac naso fede amma kia kecdae. Ebicngina imoc yenearu mekemma yoacf faimebisia. ³⁹ Me ngenang yoac mong fedeu enarameme yeneac kpekpedzucfu mekenggec demengere ambisia.

* 19:19: Drakma 50 tauseng nande nga drakma mocgu, imoc uameme mocguac uabung.

⁴⁰ Ebicnina yofi feder, ngeni yaguc dzomugerec anggecac amma yoacfud fainunubauac. Dzomugerec meficgegec hania kpacfud ngickuneng hagecde isoc yoacac obohogecde."

⁴¹ Kibi oho ohongicngyo ac ifi dema sueyuu kenggec.

20

¹ Yoac orongtoa kpac anu Paurongo Yesuac habu heitaiyunuu hagec. Hagec dederecge ayemmemma meseriyunuma maringina mema Makedonia bangecfu kenec. ² Kemma bangec imoc ferecgema Yesuac habu tackenggec, yeneac negen negeng midima deme-seriyoac homac ayemmekenec. Kengkecma Grik bangecfu kemma ³ ihai afo harebec kefec. Kecma kondunnu kemema wageusing Siria bangecfu kembeso deu yudangic yeneng ngabayaoac dema dekirci anggec ye Makedonia bangecfusing dzigeneudeac negemma kenec. ⁴ Anu ngic yofigucngyo sinnu Pauro modackenggec: Piroac medac Sopate Bereanac nga Aristako nga Sekundo yeri Tesaronikenac, amma Gaio Derebenac nga Timoteo nga Tikiko amma Tirofimo, yeri Asia bangec dumbengaunac.* ⁵ Ngic imoc yeneng waraima Troa taonnu tomainina kecgec. ⁶ Tomainina kecmagec neni ine ic sogong yisya kpac nene, imoc tacnegennaso wisickeu Firipinac wage meing. Wage mema wenac 5 kengkecma Troa taonnu kemma ihai uameme 7 kefing.

⁷ Anu neni sondau maung nenideac kpedzucneni Paurongo wereckengau kenudeac negemma Anutuac enacyoac edeyunuma kefec. ⁸ Edeyunukecmanu tofocnac dzongineu amamana wi taring, imohai kifa homac dzeec. ⁹ Anu Paurongo yoacherec deu medac mong kpara Eutiko, ye gauac turic takecma nigeckpeu titing houhouyau ferecgema bangecfu kemema kpema feec. Femanu miacgec homemea anec. Ye ama mana harebec witiau wi, ihacnac makpeec. ¹⁰ Makpeu Paurongo kemema medac witiau foforahema fema ngicngac yofi edeyunuec, "Medac ye gbori fedec ngeni kiacma mi ewehomegec." ¹¹ Ifi dema ama manau emma maung gumecyunuma yenigoc yaka neec. Neu wisickeu yenigoc mitiac denegeng amma kecmanu ama wereckenu wayunuma kenec. ¹² Ngic yeni ine medac gboriu amea hesicke kemma wosongina nomaneu ubangerec negenggec.

¹³ Anu goa neneng Paurogoc Aso taonnu eacnideac suenunu kporuc wageu emma kenni yengena ine hanising haec, yeng areng ifi faiec. ¹⁴ Hama ihai meficnunuma wageu ereu neni nenhafoc kengkecma Mitirene taonnu kensikeing. ¹⁵ Ihanac kengkecma wereckenu dzintau Kio nucfu kemma kondung ferecgema mitiwocfu Samo nucfukening. Ihanac seikponoc Mirete taonnu kensikeing. ¹⁶ Paurongo pentekos tatac nasou Yerusarennu bic tarudeac deec. Nga neni Asia bangec dumbengau tacmina naso segebacac Efeso eng ferecge kengkecma Mirete sikeec.

¹⁷ Sikema ihai namma Efeso yoac faiu kenu kpebung enarafocngina hagec. ¹⁸ Hagec Paurongo yoac yofi edeyunuec, "Ni Asia bangecfu hama ngenearu uana dafi hanahema mekefai, imoc haniaunacngoc negengaandae. ¹⁹ Ni memaemeyombonggema Kebuac enac tofoc tofoho kecbare yudangic yeneng ngaba dekirci anemmagec kiacubahodung-goc nga faitobannu kefai. ²⁰ Anu yoac desahengemmema mong mi medadanggeba feec. Nga neni ngereegecdeac yoac homac ngicngac amasobengnginau nga amea amea kpoungemmekenai.

²¹ Ni bic seria kpoungemmeba yudangic nga grikngic ubamereng amma Anutuaru kemma Kebunina Yesu negensinggegecdeac ubana kuha mi mamanu dekperagingem-mekefai. ²² Anu yoc Asungo ubanau derecgenendeac Yerusarennu kenduae. Kamba faka mong dafia ihai fingecnenude, imoc mi negenghommeduae. ²³ Ni yofisac negenduae, witicama nga kpenzengngedi tomaina fede, imoc amasoc haba Tiri Asungo defic-nengkecde. ²⁴ Deficgenenu ni ine neanna kekecnaac negemba buma engena mi angande. Ni eng sing derecgenenna timodacbadeac anengande. Nga Anutu danggunuhaac siduc gombung desahebadeac Kebu Yesungo denenec, ua imoc mekecma mesibadeac ubana ande.

* 20:4: Rukango kibi yomoc ohoec, yeng Paurogoc Makedonia bangecfu earoc.

²⁵ Amma yomoc deba negenggec, ni Kebuac eucererenggac yoacsiduc ngicngac botucnginau dekperagingemmeba negengandae, ngeneng ngade kecma kicna monggoc mi henggecde. ²⁶⁻²⁷ Anutungo yoac sasawa derecgenemmeande, imoc hafoangoc eden-gunuai, imohacnac wiac mong mi waba feec. Imocac yaguc kedzac hesari angemmeba negenggec: mongngo ngeneearunac sufuudeu kopocsihaac turunga nearu mi feude.

²⁸ Ngeni ngenang garengemema Anutuac kpebung gombunga garengyunudacbisia. Ye yengena sacngo bummengunuec nga Tiri Asungo kpebung yeneac enara kecgecdeac meisingngunuecac ngeni ramagareng isoc Kebuac kpebungfora yenenggareng ambisia.

²⁹ Ni yofi negenduae: Ni wangunuba katekasi enaragocngo ngenearu hama rama memanganengunubeso anggecde. ³⁰ Amma ngenang botucfunac ngic fingecma yoac fora denggbaringgema Yesuac habu goa utac mengunugecdeac anggecde. ³¹ Ngeni imocac negentegecma efaima kecbisia. Ni kifa harebec hadzing tofocnac kiacubamanganggac nonosaeng tembus tembus dema gorongina kpekefai, imoc wagec mi maec, imocac ngeni uana imoc negensima kecbisia.

³² Ni Kebuac mariu faingunuduae amma yeac danggunucyoac gombungau kpedzucn-gunuma faingunuduae. Imocngko kuc megecdeac meseringunu ngeni ngicngac kpetiac kekec megec kecdae, yenigoc ngenahafoc maridzoming megecde. ³³ Anu ni ngenigoc kecma hiedzoac dewaidzoc mi angemmema ³⁴ marinango ua meba hiedzo kirecgen-emmeu neanna nga ngicfocna iwainina bummeing, ngeni imoc bic negendae. ³⁵ Uana sasawa mekefai, imohai yofi kpoungemmeai: Ngeni makpekpea meficyunugecdeac ua kucgoc mebisia. Kebu Yesungo yoac yofi deec, ‘Ge ubangerecfu ogoga wiac mong minade, imocac ubangerec buma kuneng gearu fingerude. Nga ubangerecfu ogogango wiac mong genude, imocac ubangerec buma gearu efea fingerude.’ yoac imoc mi nigeckunubeso.”

³⁶ Paurongo yoac ifi desima yenigocfafoc heima numuec. ³⁷ Numuu wisickeu negemma kiachodung kiaru yeni hoanggema titikokoc ammigec. ³⁸ Ye warac yoac mong yofi edeyunuec, “Ngeni kicmesuna monggoc mi henggecde.” Imocac yeni ubahodungtoa negemma hesicke kemma wageu faigec emma kenec.

21

¹ Neni wayunuma kporucwageu emma Ko nucfu kemma wereckengau Rodo nucfu kemma Patara taonnu sikeing. ² Ihai kporucwage mong Foiniki bangecfu kenudeac efaimanu maficgema ihai emma kening. ³ Kengkecma Kipiro nuc kanaugeng taru hemma ferahadacma Siria banectoaugeng kengkefec. Nga wagengo Tiro taonnu sikema finac ihai faiudeac kenec. ⁴ Faimanu neni amau emma Yesuac habu maficyunuma yenigoc wenac 7 kefing. Kecmina Asungo meyunuu yeni Pauroac goroyoac dema Yerusarennu mi kenudeac degec. ⁵ Anu kekeng nasonina wegeneu ngicngac nambaracfocnginagoc hesicnunugec nenhafoc taong wama kondung tegiau kemeing. Kemema sangiufafoc heima numuing. ⁶ Numuni wisickeu marimeme amma wageu emmina yeni amau dzigenegec.

⁷ Tirounac kengkecma Toremal taonnu sikmina wageu kekeng imoc wisick-eeec. Wisickeu neni Yesuac habu ihai yugucyunuma wenac mocgu yenigoc taring.

⁸ Wereckengau kengkecma Kaisarea sikema Yesuac siducedede Firipo maficgeing. Firipo ye memefic 7 faiyunugec, yeneac botucfunac. Anu neni yeac amau noc ening. ⁹ Ye naroangfora neakpac ngacnaroang kecgec, yeni Anutungo wosoefac ayemmeu profeteyoac dekecgec. ¹⁰ Ihai uameme dafiguc kecmina Yudaia bangecfunac profete mong kpara Agabo, ye nenearu hasikeec. ¹¹ Hasikema Pauroac fadenga mema imocngoc yengena hanimaria dzegema yofi deec, “Tiri Asungo yofi dede, ‘Fadeng yomocac mingina ye Yerusarennu kensikeu yudangic yeni yofinoc ammima bangec monnunac ngicngac, yeneac mariu faigecde.’”

¹² Yoac ifi deu neni nga amafora neneng Pauro Yerusarennu mi enudeac desegere ammima edeni ¹³ yeng yofi deec, “Ngeni homac kiacma wosoumeme mi anenggec.

Ni Yerusarennu witicfu embade, imocsac kpahac. Ni ifingoc Kebu Yesuac momoc homebadeacnoc efaiduae.” ¹⁴ Yoac edeni mi negenu wama yofi deing, “Kebu negenec, imoc fingecbeso.”

¹⁵ Uameme goa wisickeu Yerusarennu ennideac efaiing. ¹⁶ Efaini Kaisareanac Yesuac habuunac goa yeneng hesicnunuma ngic mong kpara Manasong, yeac amaunoc fainunugec. Anu Manasongngo Kipiro nucfu fingerec nga waraima ubamereng anec.

¹⁷ Anu kengkecma Yerusarennu sikeni imohacnac negen negensinggoc tosofocnina yeneng ogo anemmemma ubangerec negenggec. ¹⁸ Nga wereckengau Paurongo Yakoboac amau hesicnunuu ening. Emma tacmina kpebung yeneac enara yeni hagec. ¹⁹ Hadacgec Paurongo maringina meec. Mema Anutungo nonggo tacmimanu bangec monnunac ngicngac, yenearu misingua meu fora fingerec, imocac yoacsiduc sasawa ayemmeec.

²⁰ Paurongo yoacsiduc ayemmeu Anutu afehegec wisickeu Pauro yofi edegec, “Tosonina, ge yudangic tauseng dafiguc ferahema habunoc efeango Yesu negensinggema kecdae. Nga yeni sasawango Moseac dedeseriyoac seria mekecandae. ²¹ Anu geac yoacsiduc yofi hau yeni negengkecdae: Ge yudangic bangec monnu ngicngac, yeneac botucfu kecdae, yeni Moseac yoac wagecdeac amma sabacfocngina yeneac sebi tosangina mi herecgegecdeac deracyunuannec. Amma yudangic fakanina wagecdeac edeyunuannec. ²² Amma ngic yeneng geac ifi negengandaec dafi ambesonga obohode. Ge Yerusarennu hadang, imocac siducnoc negenggecde.

²³ Imocacneni yoac mong edeguni modacbesena. Nenearu ngic 4 kecdae, yeni Anutugoc dedeseri anggecac orucdzongina mi merec merecge kecdae. ²⁴ Geng yenearu tahockema faka kpetiac feder, imoc yenigoc modacma hosuc heiheingina bummena orucdzongina merecgema wedzecgec. Ge ifi anna gemma geac yofi negenggecde, ‘Yoara hau negening, imoc fora kpac. Ye yengenaoc Moseac dedeseriyoac tofohokecde.’ Ge ifi anna yudangic Yesu negensinggedae, yeni geac ngaba mi anggecde. ²⁵ Anu bangec monnunac ngicngacngo Yesu negensinggedae, yeneac warac singyoac deing, imocac yoacsiduc kibiu yofisac ohoma bic faiyemmeing, ngicngac yeni nemunginaac sese dema yang heiymmegec ngeneng imoc wama mi nebisia. Ngeni yamberec fusia sawagoc mi nebisia amma sac wamaguc mi nebisia. Amma ngeni kaisero faka wama imoc mi ambisia.”

²⁶ Ifi degec Paurongo yoacngina negemma ngic 4 yenearu tahockeu wereckengau yenahafoc Anutuac womonnu emma faka kpetiac hanahegec, imocac nasoya wisickeaa amma sesengina faima hosuc tembus tembusngina heigecdeac dekperagiyemmegec.

²⁷ Faka kpetiac imocac uameme 7 wisickebeso ammanu Paurongo Anutuac womonnu emma kecmunu Asia bangecfunac yudangic yeni ye hemma ngic ngaba ammima arohogec habutoa wosongina miaru ²⁸ Pauro mendanggema arohogec, “Oe Israengic, ngeni hama maficnunugec meni! Ngic yomocngo bangecsoc kengkecma yudangic nenang nga dedeseriyoacnina amma womonnina, imocac ngaba ambesonga, ngic ifi edeyunukecde. Amma womonninai grikngic hesicyunuma ereu kpetiac amanina yomoc goteng heidae.”* ²⁹ Pauro ye Efesonac ngic mong kpara Trofimo yegoc taonnu kengha anec yerenggec, imocac ye womonnu hesickeu yerahafoc endaoc, ifi eng negensima degec. ³⁰ Imocac amafora yeneng arongina negemma yacma gbindindinggema hama kpeturanggedacgec. Kpeturanggemagec ngic goango Pauro mendanggema womonunac kpedzima magec, imohaingoc nagu heidacgec.

³¹ Ngabangic yeneng Pauro mema kpehomebeso ammagec Roma wasaingic yeneac garengtoaar yoac yofi kenu negenec, “Yerusarengngic sasawa yeni yenahafocngoc ngaba sicsauc angemedae.” ³² Yoac ifi negemma imohaingoc wasai engena mamea meemema nedzima habutoa yenearu kemegec. Kemema henggec ngic yeni Pauro kpema kecgec garengtoa nga wasaifora sikegec, yenemema engsac wagec. ³³ Anu wasai

* ^{21:28:} Anutu womonga gotengagoc hemma ngaba ambacac yeni yoac imoc degec. Bangec monnunac ngic, yeneng ihai naric mi enggec, imoc kpaegoc.

garengtoango sikema deu medacfora yeneng Pauro mendanggema seng yohockangng dzegegec. Dzegegec Pauro ye merac amma noc wiac anec, imocac kpesi kpesi ua meec. ³⁴ Anu ngic yeni arona aroga anggec kpeboronnu yoac hania negenudeac obohoma deu wasai yeneng Pauro mema yenang uaamau dzigene kenggec. ³⁵ Anu Paurongo tireu embeso anu ngic yeneng yerecgema kucgoc igockegecac wasaingic yeneng Pauro mohockema enggac. ³⁶ Ifi anggec ngic habutoango modacyunuma aroho aroho kemma yofi degec, “Ngic ye kpeni kpac ambeso!”

³⁷ Ifi dema Pauro ama manau meembeso ammagec, yeng wasai garengtoa kpesimie, “Ni naric yoac edegubai me?” deu garengngo deec, “Ge grikyoac negennec? ³⁸ Warac aigitangic mongngo ngaba maficgeudeac godzungic 4 tauseng wangcyunuu bangec kisiu hojsiragocfu kenggec. Ge ngic imoc me mong?” ³⁹ Kpesimiu Paurongo yofi edeec, “Ni yudangic yombong amma Kirikia bangecfu Tarso taong tacde, imohacnac. Ge naric negennenna ngicngac yoac kapia edeyunuba.” ⁴⁰ Ifi deu negemmiu Pauro ye tireu namma ngicngac maribarac kpouyemmeu yoacngina kpac anu waickema tacgec hebiraio yoacfusing yofi edeyunuec.

22

¹ “Kunengfocna nga tosofocna, ni neanna hania edengunuba negenggec.” ² Anu Paurongo hebiraio yoacfusing deu negemma ning kpedacgec. ³ Nga ye tahockema edeyunuec, “Ni yudangic, Kirikia bangecfu Tarso taonnu fingecma imohai kecma yadiai. Kpoukpou Gamarie yeac bageau kecbare yeng kisicfocnina yeneac singyoac sasawa kpounenu negendarai. Amma ngeni yofinenggac faka andae, imoc ifingoc Anutungo negengngereenubes dema yoac imoc seria yombong mekefai. ⁴ Amma ngicngac momoc sing gboria modacgec yunukporac ayemmema witicyunuma witicamau faiyunukecma yunukpebuc ayemmegecdeac deaingoc. ⁵ Womong garengtoa nga yudangic gamang-toangina yeneng neac hepuc naric amma hania ifia dekperagibau. Yenennoc kibi mong ohogec, imocac siriha yofi: Ngicngac sing gboriau modacgec ni maficyunuma witicyunuma Yerusarenヌ meyunu haanduae. Nga turunga yemmegecdeac tosofocngina Damasko kecanda, yenearumekembadeac nenggec.

⁶ Ifi dema sing kengkecma wenac dzongiau isoc Damasko ama mewegenebare, imohaingoc kurumennunac kperagitoango gereagoc mama nerarannuec. ⁷ Nerarannuu bangecfu todingge kpe fema yoac mong yofi fingeru negenai, ‘Sauro Sauro, ge nocac nukporac anemma kecannec?’ ⁸ Ifi negemma yofi deai, ‘Kebu ge merac?’ Deba yofi edenuec, ‘Nukporac angannec, Yesu Nadzaretenac ninoc.’ ⁹ Ngic nigoc kecgec, yeni kperagitoa henggoc, yoac edenuec imoc ine obohogec. ¹⁰ Obohogec neng kpesiai, ‘Kebu, noc wiac ambadeac denennec.’ deba Kebungo yofi edenuec, ‘Ge yacma Damasko kenna wiac anna dema degecdegena, imoc edegugecde.’ ¹¹ Nga kperagitoango kicnau neraranggeu fiba kundung kpeec. Ifi amba ngicfocna yeneng marinau mema Damasko menu kenggec.

¹² Ihai ngic mong kefec kpara Anania, yeng dedeseriyoac henanggema memodacma kefu yudangic taong imohaingoc kecgec, yeni sasawango yeac negenggec ngereec. ¹³ Ngic yennoc nearu wegenac hasikema yofi edenuec, ‘Tosona Sauro, ge kicga fitegecna.’ ifi deu ihaingoc kicna fitegecma ye henai.

¹⁴ Ifi dema yoac yofi edenuec, ‘Kisicfocnina yeneac Anutu, yeng uaya mena dema ededzacgu anu geng Dindingac mingina hemma yeac enacfunac yoac negennadeac meisingguec. ¹⁵ Ge yeac siducdede amma wiac hennegeng annec, siduc imoc bangecsoc ngic edeyunu kembesena. ¹⁶ Negennec, ge naso mi ukuna! Yacma Yesuac kpac kpacna yeac kpacfu mitidoku nadzicma kopocsicga dzuacna.’

¹⁷ Ifi deu Yerusarenヌ dzigenema Anutuac womonnu emma numuba kicna merecgeu Kebu henai. ¹⁸ Hemba yoac yofi edenuec, ‘Ama yomocac ngicngac yeni geac enacfunac neac siducna negemma wagecde, imocac amma ge Yerusareng wama bic kenna.’ ¹⁹ Ifi

deu yoac yofi meremmiai, ‘Kebu, ge negensinggugec, ni witicfu meyunuma kpekpeturangamea amea meyunu emma dzikacnggo yunukefai, imoc bic negendae.’²⁰ Amma siducededega Stefano sacgoc homemea kpegecdeac ngakpingina hesigec garenggebare kpegec negemba ngereec, yени imoc negendacdae.’²¹ Ifi deba Kebungo yofi edenuec, ‘Kpahac, ni bangec hereau bangec monnunac ngicngac, yenearu sueguba kennadeac ge bic efaima kenna.’

²² Ngic yeni kedzac kpemagec, Paurongo yudangic wayunuma bangec monnunac ngicngac, yenearu kenudeac warac Anutungo edeec, yoac imoc edeyunuu yeni seriangoc arohogec, “Ngic ifia imoc kekeha kpac ambeso. Ye kefu naric mi ande.”²³ Ifi dema arohoma ngatangyunu ngakpingina herea hesima yube figec enu meuku anggec.

²⁴ Anggec garengtoango deu wasai yeneng Pauro amanginau meenggec. Amma ngic yeni nocac homac arohomigec faka negenudeac dzikacnggo kpegec kopocsiha deficgeudeac desiyemmeec.²⁵ Desiyemmeu yeni dzikacnggo kpegecdeac witicnggo mendangge dzegema taigec. Taigec Paurongo enarangina yofi dema kpesimiec, “Ngeni ngic mong romangic yeneac arenna torokpema kecde, ye yoacfum i faifai manganaac areng desima dzikacnggo naric kpegecde me? Imoc singyoacngina kpede.”

²⁶ Ifi deu enaranginango garengtoaru kemma edeec, “Dafi ambesonga? Ngic ye romangic yeneac arenna torokpeec kecde.”²⁷ Ifi deu garengtoango Pauroaru kemma kpesimiec, “Dena, ge foracngoc romangic arenna torokpema kecnec me?” deu Paurongo deec, “Imoc fora ni romangic yeneac arenunac.”²⁸ Ifi deu yeng deec, “Ni hiedzo homac faiba kirecgenuu romangic anai.” Ifi deu Paurongo deec, “Ni ine fingec fingecna romangic yeneac arenna fingerai.”²⁹ Ifi deu yeni imohaingoc Pauro faka ammibeso degec, imoc wagec. Wasai garengtoa yeng ine yofi negenec “Pauro ye romangic. Ni ngic ifia witicfu faihua, imoc naric kpac!” Ye ifi negemma kengec kpeec.

³⁰ Werekengau wasai garengtoango yudangic yeni Pauro hania damocac yoacfum faigec, imocac hania yombong negenudeac womong gareng enara nga yudangic tutumangtoanginaac memba deu sasawa kpedzucnegec. Ammanu Pauro yungecma hesicke kemema kpedzucnegec, yeneac kicfu faiec.

23

¹ Paurongo yudangic tutumangtoanginaac memba yenearu serima yoac yofi edeyunuec, “Tosofocna, deba negenggec, Anutuac kicfu ni kopocsicnaac negengfagunga kpac kecerema yaguc kecduaengoc.”² Ifi deu womong garengtoa kpara Anania, yeng ngic Pauro yafingga nanggec, yeni yofi dema edeyunuec, “Ngeni dumbengau kpegec.”³ Ifi deu Paurongo yofi edeec, “Anutungo guude, ge katapa mangana gbakingo oho ohoya, ifia manau bic dzame dzamea. Ge dedeseriyoac modacma yoacna isingga yeng desinnunadeac ua mebesena. Nga imoc wama nugecdeac serima denec, ifi amma dedeseriyoac fede, imoc ferahanec.”⁴ Ifi deu ngic nanggec, yeneng yofi edegec, “Ge Anutuac womong garengtoa kuha memama yoac ifia mi demina!”⁵ Ifi degec Paurongo yofi deec, “Tosofocna, ye womong garengtoa kecde, imoc mi negemma yoac singau mi dedua. Mitikibiu yofi oho ohoya fede,

‘Ge enaramemefocga mi sowecyunubesena.’”

(Makekeng 22:28)

⁶ Anu enaramemefocga mi sowecyunubesena. Kecmagec Paurongo imoc negemma ubea miacma tutumangtoau yofi edeyunuec, “Tosofocna, ni farisaiongic amma yeneac arenunac fingerai. Nga homecfunac yacyac fingerudeac negensinggema kecma yoac imoc nanggeanduae, imocac yoacfum fainudae.”⁷ Yoac ifi deu farisaiongic nga sadukaiiongic yeni yenaocngoc easiemegec tutumangngina tohoec.⁸ Nga sadukaiiongic yeni deandae, “Homecfunac yacyac nga angero amma bangecac hadehade nga yafing hania hania, imoc mi fede.” Nga farisaiongic yeneng deandae, “Imoc fora fedacde.”

⁹ Amma imocac tutumangngina orongtoa megec. Mekecma farisaio yeneac habunac mitiac negengngic goa yacma gereagoc yofi degec, “Neni ngic yomocac

kopocsic hofocdimbe. Angero me asu mongngo yoac edeefu neni imocac yoac mong mi debisina.” ¹⁰ Dema yoacnginango easiemegec wasai garengtoango Pauro taima merecgebauac kengec kpeu deu wasaingic yeneng kemema Pauro ngic botucnginaunac taimama ua amanginaumekenggec.

¹¹ Mekemma tofocnac imohaingoc Kebungo Pauro fingeclima yofi edeec, “Ge kucga mena, ge yei Yerusarennu neac hepuc amma haniana dekperagiyemmenec, imoc ifingoc Roma taonnu neac hepuc amma haniana dekperagiyemmebesena.”

¹² Ama wereckenu yudangic goango yoac dedzege amma yenaocngoc dedeseri seria yofi degec, “Nenang nenedoku segekecma Pauro kpehomemaguc nenedoku nebisa.”

¹³ Ngic yenyi uba mocgu amma yoac imoc dedzege anggec, yeneac kpetengina 40 ferahaec. ¹⁴ Ngabangic yenennoc womong gareng enara nga yudangic enarafocngina yenearu kemema deficgeyemmemma yofi edeyunugec, “Neni nenedoku segekecma Pauro kpehomemaguc nenedoku nenide, yoac imoc deseriding. ¹⁵ Imocac ngeni tutumangtoaac memba yenigoc wasai garengtoaru yoac yofi faigec kembeso, ‘Ge Pauro neneac tutumannu suena hau yoara monggoc dehomebisina.’ Anu yoacngina negemma ifi anu nenang sinnu sufuma Pauro mema kpehomemide.”

¹⁶ Ifi degec Pauro deuyango yareyoac imoc negemma wasaiamau emma aniheda.

¹⁷ Edeu Paurongo wasai yeneac enara mong kpacma yofi edeec, “Ge medac yomoc wasaigarengtoaru hesicke kenna. Yeng yoac mong edeude.” ¹⁸ Ifi deu ngic yeng medac imoc wasai garengtoaru hesicke kemema yofi edeec, “Witicngic Pauro yeng kpacnuma edenuu medac yomoc yoac edeguudeac hesicke haduae.”

¹⁹ Ifi dema edeu garengtoango medac mariau mema hedzhau meicke kemema tembungira tacma kpesimie, “Ge noc yoac mehanec, dena negemba.” ²⁰ Kpesimiu medacngu yofi edeec, “Yudangic yenyi gearu yoac faigec haudeac denegeng andau. Nga geng Pauro tutumangnginau hesicke kenna yeac haniaya seng negenggecde, ifi kpesigenggecde.

²¹ Kpesigemma haniaya seng negenggecdeac fenggegugec mi negembesena. Ngic kpetengina 40 ferahede, yenyi sinnu sufuma Pauro kpehomegecdeac dedeseri seria yofi dedau, ‘Neni nenedoku segekecma Pauro kpehomemaguc yaka nenide.’ Yoac ifi deserima yenyi bic efaima geac yoacac tomai kecdae.” ²² Medac ye yoac ifi deu garengtoango yofi derahema sueec, “Ge yoacsiduc imoc hama deficgema edenunec, imoc ngic mong mi edeyunubesena.”

²³ Amma wasai garengtoango wasaingic yeneac enara yohockang kpacyuruma yofi edeyuruec, “Ngeri kemema yofi ambesera, wasaingic 200 yenyi haningo sing kekeng nga becosic witiaukekeng 70 amma sangarameme 200, ifigucngu efaima tofocnac 9 kiroc ammanu Kaisarea mekembisia. ²⁴ Amma Pauroac becosic goa maficyunuma sate heiyemmebisia. Anu ngeni ye aikic garenggema ngictau Feriki, yearu mekembisia.”

²⁵ Ifi dema ngictauac kibi mong yofi dema ohoec.

²⁶ “Kraudio Risia neng Ngictau Feriki geac kibi yomoc ohoduae. Wenacngerec.

²⁷ Wasaingic yeneng ngic mong mehadae, yudangic yeneng mema kpehomebeso anggec. Anu neng ye romangic yeneac arenunac, yeac ifi negemma wasaingic yenigoc kemema maringinaunac mesiing. ²⁸ Mesini yoacfufaigec, imocac hania negemba dema enara tutumangnginau mekenai. ²⁹ Mekemma singyoacnginaac tohoma kecdaea amma yoacfufaigec, imoc maficgema yofi negenai, ‘Ye yoacfufaigec, imoc kpehome home me witicamau fai faiac siriha mi ande.’ ³⁰ Hau ngic goa yenyi sinnu sufuma Pauro mema kpegecdeac dekiric anggec negemma gearu bic sueba hade. Amma yoacfufaidau, ngic imoc ifingoc sueyunuba gearu hama yoara edegubisia.”

³¹ Ifi ohoma yemmeu wasaingic yenyi garengnginaac enac tofohoma Pauro tofocnacngoc hesicke kengkecma Antipatri taonnu kenggec. ³² Wereckengau wasaingic tosea yenyi amau dzigenemagec becosicfu tacgec, yenyi yenaoc Pauro hesickema Kaisarea kenggec. ³³ Kemema ngictau kibi mima Pauro ifingoc mariau faigec. ³⁴ Faigec ngictaungo kibi osoma Pauro kpesimie, “Ge Bangecga dahacnac?” deu Paurongo deec, “Ni

Kirikia bangectoaunac.” ³⁵ Ifi deu ngictaungo yofi edeec, “Ge yoacfu faigugec, yени hama fingechnenggec geac yoac debesonga.” Ye ifi dema Pauro Herodeac amau faima garenggegecdeac edeyunuec.

24

¹ Uameme 5 wisickeu womong garengtoa Anania nga yudangic enarafocngina goa amma singyoacac negengngic mong kpara Teaturo, yeni Kaisarea amau kemema ngictauaru Pauroac yoac degecdeac fingegec. ² Fingegec ngictaungo Pauro deu hau Teaturongo yeac yoac dema ngictau yofi edeec, “Ngictau gombunnina Feriki, ge gombunga garenununa ruaegoc kecdimbe. Amma geac negenggac amma kekecnina heimerenu gombunga kecni ³ nenearu amasoc nga iwai sasawa ngereema ereec. Imocac geac negenni naric angkecde. ⁴ Amma yoac deba uanaso ukubanggac mengisima negenninaac yoac wegenanec edeguba.

⁵ Ngic yomocac faka yofi hening, ye deendema anemmekecde, imoc yudangic bangecsoc kecdae, yeni sasawango ngaba sicsauc meficgeyemmeande amma Nadzarete mitiareng yeneac enaranoc kecde. ⁶ Ye Anutuac womong imoc goteng heibeso anu meing. [Mema dedeserininaac sinnu wiac ammibeso ⁷ ammina wasaigarengtoa Risia ye medacfora yenahafoc kucgoc hama gereagoc wangecnunuec. ⁸ Amma yeac hania degec, ngic imoc yeni gearu hama fingegecdeac deyemmeec.] Nga neni yeac yoac edegudimbe, imoc geanggaoc dekpesi ammima yoacfaidimbe, imocac hania sasawa meireckenade.” ⁹ Yoac ifi deu yudangic yeni meficgema yoara nanggegec.

¹⁰ Anu ngictaungo Pauro yoac anudeac wadzimiye yoac yofi meremmiec, “Ge bangec yomohai ngicngac yeneac desidesingic kifa homac kecannec, imoc negensima haniana ubangerecgoc deba. ¹¹ Ni Yerusarennu Anutu afeheba dema emma kecba uameme 12sac andac, ge yoac imoc negengyohoc amma ngic kpesiyemmena edegugec. ¹² Ni Anutuac womong manau ngic goa yenigoc yoacna engemmama mi anec. Me kpekpeturang ama goau me amasobennu haifaka mema ngicngac hagec, imoc mi anai. Faka imoc mong amba mi henggec. ¹³ Ngic yomoc yeneng haniana dema edegudae, yoac imocac fora ifingoc edzacgugecdeacsoc mi ande. ¹⁴ Amma mong deficgegembal negenna: Sing gboria goango miti miti deandae, imoc modacduae. Imocac sinnu kisicfocnina yeneac Anutu eweheimima yoac sasawango dedeserinina modacde, imoc nanggeanduae. Amma profete yeni yoac deoho anggec, imoc negensinggeduae. ¹⁵ Amma kecma ngic mangana nga gombunga homecfunac yacyac naso wegeneude, ngic yomoc yaguc nesunggedae, yeni nga ni nenahafoc wiac imoc fingerudeac negensinggema kecdimbe. ¹⁶ Ifi amma Anutuac kicfu nga ngic kicfu kopocsicnaac negengfagunga kpac ua serima memangoc kecanduae.

¹⁷ Ni kifa goa bangec hereau kecma ubangerecac wiac ngic arengfocna yemmebadeac amma Anutuac sese faibadeac Yerusareng taonnu hayai. ¹⁸ Amma hosuc heiheiac segekekec nga faka kpetiac mesima womannu emma kecbare meficnuggec. Ihai ngic habutoagoc me kpeboronggoc mi hayai. ¹⁹ Asia bangecfunac yudangic goa, yeni ine kpeborongtoa ifi anggec. Yeninoc kopocsicac wiac mong mekecbau dede gearu hama neac yoac dekperagibau. ²⁰ Me ngic yoc nandae, yeneac memba tutumannu nambare neac kopocsic mong meficgegec isoc deficgebisia. ²¹ Ni yoac mocgusac botucnginai namma yofi kpacma deai, ‘Homecfunac yacyac fede, yoac imoc nanggeanduae.’ Imocac yaguc geac kicfu menu hama yoacfaidimbe.”

²² Ngictau Feriki ye kekec gboriaac siduc negendarecac yofisac edeyunuec, “Wasai garengtoa Risiango Yerusarennac mau yoacngina desibade.” Ifi dema yoacngina feudeac dema sueyunuec. ²³ Amma ye wasaigareng yofi edema sueec, “Ngeni Pauro garenggema ngabakic mi hembisia amma tosotora naric hama heimefic ammibisia.”

²⁴ Uameme goa kecma Feriki ye nga enema, yudangac kpara Drusira, yeri yerahafo hama Pauroac deec erema Yesu Kristo negensinggegec hania edeyuruu negenoc.

²⁵ Negemmaec yofi edeyuruec, “Faka dindingac modacbesonga nga ubasebi garenggema

faka mangana wabesonga amma desidesi nasoya haude.” Ifi deu Feriki kengec kpeu Pauro yofi edema sueec, “Naric kenna, kecma nasa monnu titing mong fingechnenu monggoc kpacguba habesena.” ²⁶ Ngictau ye hakecmangoc yofi negenec: Paurongo hiedzo goa nenu witicamaunac waba maude. Negeunga ifi feecac nasosoc kpacma yegoc yoac denegeng angkefec. ²⁷ Ammanu kifa yohockang wisickeu kia mong kpara Porkio Festo, yeng ngictau Ferikiac tatac meec. Anu Ferikingo yudangic ubangerec kpeyemmedacma Pauro witicamau tacmanu wama kenec.

25

¹ Festo ye Yudaia bangectoaac ngictau ua hanaheec. Hanaheu uameme harebec wisickeu Kaisarea wama Yerusarennu enec. ² Enu womong gareng enara nga yudangickuneng yeneng yearu hama Pauroac yoac dekperagima ³ hatahemima yofi degec, “Ge neneac wosoefac amma yoac faina kenu Pauro ye Yerusarennu habeso.” Yeni sinnu sufuma namma Pauro kpehomegecdeac negemma ifi degec. ⁴ Edegec Festongo yofi edeyunuec, “Pauro ye Kaisarea ihai witicamau taru ni yei kapianec tacmaguc monggoc dzigenema kemebade. ⁵ Kemeba ngeni Pauro yoacfua faidauac wiac mong metacdaeu debeso dema ngeneearunac enarameme goa yeni nigoc kemegec kopocsic mong meficgeec isoc yeni yeac yoac imoc dedacbisia.”

⁶ Ifi dema uameme 8 me 10 Yerusarennu kecma Kaisarea kemma kemee. Kemema wereckengau desidesi amau emma tacma deec, “Ngeni Pauro mehagec!” deu meenggec. ⁷ Meenggec Yerusarennac yudangic yerecgadacma yoac hania hania homac nesunggema seria dema nanggec. Amma yeni yoac imocac fora meficgecdeac obohogec. ⁸ Nga Paurongo yoacngina turunga meremna hania yofi deec, “Ni yudangic dedeseriyoacngina me Anutuac womong me ngictau Sisa, yeni mong mi demanganeyunuai.”

⁹ Ifi deu Festongo yudangic ubangerec kpeyemmedarudeac Pauro kpesimie, “Ge Yerusarennu naric emma ihai yoacga desibai me?”

¹⁰ Ifi deu Paurongo yofi meremmiiec, “Yoc nanduae, imoc ngictau Sisa yeac yoac desi desiamanoc nga neac yoac yomohai desbesonga. Ni yudangic faka mangana mong mi ayemmeai, imoc geanggaoc negennec. ¹¹ Ni kopocsictoa mong meficgebai dede nuhomenadeac dena sebina mi segerebai. Nga yeni ikocfu nesunggema haniana dedaeu ngic mongngo yeneac mariu naric mi fainuude, imocac amma Roma ngictau Sisa yeng yoacna desiudeac deduae.”

¹² Ifi deu Festongo memeficfora yenigoc denegeng amma Pauro yofi edeec, “Ge ngictau Sisa yearu kembeso denec, imocac yearu kembesena.”

¹³ Uameme goa wisickemanu ngictau Agripango naina Beanikegoc Kaisarea kemema Festo yuguckeoc. ¹⁴ Amma yeri uameme goa yegoc tacyac ammaec Festongo Pauroac yoacsiduc ngictau Agripa yofi edeec, “Ferikingo ngic mong witicamau faima kendaru takecde. ¹⁵ Anu hasikema Yerusarennu emba yudangic yeneac womong gareng enara nga enarameme yeni nearu hama kpedzucnema ngic ye kpegec homeudeac edenugec. ¹⁶ Edenugec ni yoac turunga yofi merengyemmeai, ‘Ngic mong hania kpacfu memeting ammiammi, sing imoc romangic nenearu mong mi fede. Ngic yoaragocngo ngic yoacfufaide, yeri eacma nammaec fora debesonga.

¹⁷ Ifi meremba yei eacemeing, imohaingoc wereckengau ni desi desiamau emma Pauro mehagecdeac deai.’ ¹⁸ Ifi dema Pauro yoacfufaigec yeni yeac faka mangana mong deficgegecde debare yeni yenang mitinginaac sing fede, imocac hesucemegec. ¹⁹ Ngic mong kpara Yesu, yeac yofi degec, ‘Ye bic homeec.’ Anu Paurongo yofi dekperagiec, ‘Ye gbori kecde.’ Yeni ifisac degec. ²⁰ Nga ni yoac imoc negentegec badeac osima yofi kpesimiai, ‘Ge Yerusarennu naric emma ihai yoacga desibesonga me?’

²¹ Edeba Pauro ye ngictau Sisango yoara desiudeac deec. Ifi deu desiai, ‘Pauro ye witicamau tomai tacmanu kecma sing mong meficgemaguc ngictau Sissaaru faiba kenude.’”

²² Festongo ifi dema edeu Agripango deec, “Ni neannao ngic yengena enacfunac yoara negembadeac anende.” Ifi deu Festongo deec, “Wereckenu naric negennade.”

²³ Wereckengau Agripa nga Beanike yeri sebikibi meemema tutumang amau enoc. Nga wasai garengtoa nga ama imocac ngic engena yeni yenaha foc modacyuruma enggec. Anu Festongo deu Pauro meenggec. ²⁴ Meemmagec Festongo yofi edeyunuec, “Ngictau Agripa nga ngicfocna yaguc nigoc tacdae, edengunuba negenggec: Ngic yomoc nande, yeac amma yudangic noc efeango yei nga Yerusarennu kpacnuma hatahenemma deandae, ‘Ye naric mi kecheso.’ ²⁵ Nga yengenaoc Roma ngictau Sisango yoara desiudeac deecac yearu sueba kenude. Nga neng ine ye homeudeac kopocsic mong mi meficgeai. ²⁶ Amma yoac fora hofocma ngictau Sisa yeac kibi ohoba dema obohoduae. Imocacnoc ngic yomoc ye ngenearu nga ngictau Agripa gearu faiba nanu ngeni haniaya negemma fora meficgegec kibi ohoma faiba kembeso. ²⁷ Nga ni ngic mong witicamaunac kopocsihaac kibi mi ohoma Roma taonnu eng sueba kekenggac negemba naric mi ande.”

26

¹ Agripango Pauro yofi edeec, “Geanggaoc haniaga dena negenni.” Ifi deu Pauro ye maria sinema yengena haniaya yofi edeyunuec, ² “Ngictau Agripa, yudangic yeni yoacfufainudae, imocac turunga gearu debade. ³ Geng yudangic neneac haifaka nga deendemanina fede, imoc negendacnec, imoc fora, amma negennemmatacmana yoacna debadeac ubana ngereede.

⁴ Ni sabacfungoc amanau kekecmemena kecerema Yerusarennu kenai, imocac hania yudangic yeni negendacdae. ⁵ Ni waracngoc farisaio singngina tongganang yeneac botucfunoc kefai. Nga haniana hennegeng anggecngo dena imoc naric edegubau. ⁶ Anutungo homemea megboriyunuude, yeng yoac imoc bangecfocnina bicngoc deseriymemna edeyunuec, yoac imoc fora fingerude, imoc negensinggeduaec yaguc yoacfufainudae. ⁷ Israehabu 12 yeni hadzing tofocnac nasoya kpac Anutungo wiac deseriyemmeec, imoc fingecdarudeac negensinggema Anutu afahema kecdae. O ngictau Agripa, imocac hania imoc nenaha foc negensinggemaguc yudangic yeneng yoacfufainudau. ⁸ Amma Anutungo homemea megboriyunuukecde, imoc ngeni nocac negenggac mi angana isoc angkecde. ⁹ Amma ni Yesu Nadzaretenac, yeac kpacsiduhaac kuc sing hania haniau memabesare dema yofi anai.

¹⁰ Anu womong gareng enarango uakibi nenggec mekecbare kpetiac arengfora noc efea witicamau faiyunukecma yunuhomegecdeac degec, imoc hepuc amma negengyemmeai. Imocngoc Yerusarennu anai. ¹¹ Amma ni naso homac yudangic yeneac kpekpeturang amaya amaya kemma ubamereng kpemeting ayemmemna Yesu dengbaringgegecdeac ayemmemna yunukporac ayemmekefai. Amma herebu yombong ayemmeai, imoc efea kpac amma imoc yeisac mi anai, kpac. Ni bangec goaac taonnu ifingoc kemma yunukporac ayemmekefai.

¹² Ifi angkecba wormong gareng enara yeneac dedeu uakibi mema Damaskou ua ifingoc mebadeac fainugec kenai. ¹³ O ngictauna, ni sinnu kembare naso 12 kiroc ammanu kurumennunac kperagi mong kuneng wenacac kperagia ferahade, ifiango mama ni nga arengfocna nerarannunuec. ¹⁴ Nerarannunu neni bangecfu todingge kpefedacma hebiraio yoacfufainudae yaguc neac enac tofoc tofohongic annadeac fingecgenduaec. Imocac wiac yaguc hennec nga ngade edzacguba hennade, imocac enacdedena kebesena. ¹⁵ Ni yaguc arengfocga nga bangecareng, yeneac mariunac mesigukecblade. ¹⁶ Amma ni yenearu sueguba ge kemma ngicngac kicngina merecgena

* ^{26:14:} Naso imohai yeni burumakangina yasu biringagocng odau faiyunubesonga yasu imocng sebingina nendangge kecgec.

kundung ngadehema kperagiu kembisia. Amma Satanggac kuc herecgena yeni Anutuaru kembisia. Ifi amma kopocsicngina kpac anu Kebu ni negensinnuma kpetiac kekec yemmeyemmea, yeneac habuu torokpegecede.’

¹⁹ Ngictauna Agripa, ni kurumennunac onga henai, imoc mi kpeai. ²⁰ Ni hanahema Damasko kemma dzigenema Yerusareng nga Yudaia bangecac yuda ngicngac amma bangec monnunac ngicngac, yenearu kenai. Kemma yeni ubangina dzigeneu Anutuaru kpeketahemu ubamerem merenggac angammeme meficgegecdeac edeyunukefai.

²¹ Ni ifi anaiac yudangic yeneng womonnu menuma nuhomebeso anggec ²² Anutungo garennukecmanu enacyoara deai amma yaguc deduae. Ni ngic engena mamea nge-nahafocngoc tacmagec yomoc namma edengunuduae. Profete nga Mose yeneng wiac fingerudeac dema ohogec, imocngoc dekecduae. ²³ Messia ye kpendzeng negengkecma homeec. Amma homemea yeneac enara mema yacma yudangic nga bangec monnunac ngicngac momoc kperagiyora dekperagiyemmedarude. Yoac imocnoc Mose nga profete yeneng ohogec.”

²⁴ Pauro ye haniaya ifi dema edeyunu Festongo yofi arohomiec, “Ge negen negeng-toagango ubasufu meficgegende.”

²⁵ Ifi deu Paurongo yoac yofi meremmiac, “Ngictau Festo, ni ubasufu mi anduae. Ni yoac fora tongganang deduae. ²⁶ Yoac deduae, imocac hania ngictau Agripa yang negendeacnoc yearu efea deduae. Yoac deduae, imoc sufu sufu mi fingerec. Ngictau ge negen negeng monggac mi obohonec. ²⁷ Ngictau Agripa, ge profete yeneac yoac negensinggenec me? Negensinggenec, imoc negenduae.”

²⁸ Ifi deu Agripango yofi edeec, “Anengkecmana mi hereemanu Kristoac areng ambaiac.” ²⁹ Ifi deu Paurongo deec, “Naso herea me wegenera, imoc mi debade. Ge nga ngic goa yaguc yoac yomoc deba negendae, ngeni ni isoc anggecdeac numuduae. Senggoc tacduae, imocgoc anggecdeac ine mi deduae.”

³⁰ Ifi deu ngictau Agripa nga Festo amma Beanike nga goa tagec yeni yacma

³¹ kendacma denegeng amma yofi degec, “Ngic ye homecac me witicamaac areng mong mi ande.” ³² Amma Agripango Festo yofi edeec, “Ngic yomoc ye ngictau Sisango yoara desiudeac mi debac dede, ge naric yungecna kemma kecbac.”

27

¹ Anu wasaingic enara mong kpara Yurio, yeng Sisaac habu, imohacnac wasaingic 100 garengyunuec. Nga Itaria bangecfu kennideac naso wegeneu ngictaungo deu Pauro nga witicngic goa Yurio yeac mariu faiyunugec, yeng meyunuu yenahafoc kporucwageu enggec. ² Nga wage imoc Adramiteng taonnunac amma Asia bangec dumbengau modacma taong tackenec, ihai enudeac dedea, neni wage imohainoc emma Tesaronikenac makedoniangic mong kpara Aristako, yegoc nenahafoc kening.

³ Wereckengau wage Sidong taonnu emmanu Yuriongo Pauro ogo ammima negemmiu taonnu keng emma ogofora yugucyuu heimefic ammigec. ⁴ Nga wageu monggoc emma taong wamina firangngo kennideugeng haecac Kipiro nuc nga Asia bangec botucngirau kening. ⁵ Kemma Kirikia nga Pamfiria bangec ferecgema kengkecma Mira taonnu Rikia bangecfu kensikeing. ⁶ Kensikeni ihai Aresandria taonnunac kporucwage mong tacma Itaria bangecfu kembeso anec. Nga wasaingic enarango imoc meficgema ihai menunuu ening. ⁷ Emma uameme goa dengec dengec kengkecma ua ebiriangoc mema Kinido taong tarecfugeng sikeing. Sikeni firangngo kpemerennunu Kreta nucfugeng kening. ⁸ Kengkecma nuc imocac dumbenga mong kpara Sarimone ferecgema Rasaia mewegenema kondung medaha mong feec, kpara Wage bris gombunga, neni uaesa mekecmangoc ihai ening.

⁹ Kondunnu naso herea kengkefing amma kianomang naso mewegenenunu kecma memanganenunubacac Paurongo goroyoac yofi deec, ¹⁰ “Ngicwiac, yoc monggoc kennide negemba heocnenide. Wage nga finacsac kpac, ngic nenahafoc kondunnu kemebinggac.” imoc hemma negenduae. ¹¹ Ifi edeu wasaigareng yeng ine Pauroac

yoac mi negensinggema wagegareng nga wage mingina yereac yoac negemma tofohoec. ¹² Nga kondung medaha bic henggec wagengo ihai kianomanggoc tatacacsoc mi anec. Ifi anu yeni imoc wama Kreta nuc imocac taong mong brisiagoc kpara Foiniki, ihai naric endacma tacmagec kianomang naso wisickeudeac homacngo degec. Ihai mura seria mi kpeande, yowarecngosac efea kpeande.

¹³ Anu kondunggac firang firang gombunga kpeu wagengic yeneng degec, “Naric kennide.” dema angka kpedzigec ereu Kreta nuc kpegegenggemakening. ¹⁴ Kemmina naso mi hereemanu firang kpara murango nuc ferecgema wage sebikpengau kucgoc kpeec. ¹⁵ Kpema wage mefaheu firanggac kucfu wage garenggegecdeac ambibiema wagec firanggac songou kenu kenning. ¹⁶ Kengkecma nuc kapia mong kpara Kauda, imoc wadzahemima kemmina dinggi kondunnu kemebeso anu mi mebinggacsoc ¹⁷ uaesa mekecma dinggi wage witiau kpedzima faiing.

Nga wage tohobacac imoc witicngo meserima kpfuseing. Kpfusema dzegema Siriti sangiu, ihai embinggac amma wage yomeaac kporuc kuneng kpedzigec mau firangngo fifinunuu kenning. ¹⁸ Kenni firang kuhagoc kpema feu memanganenunubacac wereckengau finac goa kondunnu ukugec kemeec. ¹⁹ Kemeu hadzing tofocnac harebec anu wageac finac goa monggoc ukugec kemeec. ²⁰ Kemeu hadzing tofocnac homac firang yadango kpema feec. Feu nenii wenac me asomeng mong mi fingeru hemma negen negennina fonggou kekecnina mi fingerudeac negening.

²¹ Anu ngic yeni naso herea nenedoku wama kecmagec Paurongo kemma botucnginau namma yofi edeyunuec, “Ngicwiac, ngeni neac yoac negembau dede Kreta nuc mi wabing. Amma forangoc, wage mi manganeu finac naric mi ukubing. ²² Nga nenang botucfunac mongngo mi kpac anudeac ubangina kuha mi mabeso. Nga wage ine kpedzameude. ²³ Worang tofocnac Anutunaac enac tofoc tofohoya kecduae, yeac angero mongngo nearu hama namma ²⁴ yofi edenudac, ‘Pauro, mi kengecguu, ge Roma ngictau Sisa yeac kicfu nambesena, imoc fingegeben. Anutungo geac nunumuac amma yofi dede, “Ngic yomoc ngeni wageu kecdae, ngeneearunac mongngo mi kpac anude.”’ ²⁵ Imocac ngic yomoc ngeni ubangina ngereeu. Anutungo yoac edenuande, imoc ifi fingerude, imoc negensinggeduae. ²⁶ Anu wagengo ine nuc monnu enu wani nedzamebeso.”

²⁷ Ifi deu Adria kondunnu meang kpeang kecmrina hadzing tofocnac 14 anec. Amma tofocnac dzongiau wagengic yeni bangec mewegene ²⁸ negemma kpete ukugec kemeu mita 36 anec. Iohanec wisicke kemma kpete monggoc ukugec kemeu mita 27 anec. ²⁹ Anu hoc witiau embinggac dema kengecyuuu wage buyau angka 4 ukugec kemeu ama wereckenudeac numugec. ³⁰ Numumagec wagengic yeni wage wama worabeso negensima wage dinggia faigec kemeu ikoc amma yofi degec, “Neni wage dumbengau angka mong faini kemeude.” ³¹ Ifi degec Paurongo wasaigareng nga ngicfora yofi edeyunuec, “Wagengic woragecdeu ngeni komoc mi kpegecede.” ³² Edeyunuu wasaingic yeni dinggiac witic herecgegec kondunnu kemeec.

³³ Kemeu ama werec wereckengac Paurongo ngic yeni yaka negecdeac ngombongyunuma yofi edeyunuec, “Ngeni ebicfu yaka wama kecmagec, yaguc uameme 14 ande. ³⁴ Herenginango yakaac derecgemanu yaka mi nene kecma homebauac ngombongngunuma deduae.” Ifi dema yofi deec, “Ngeni ubayohoc mi anggec nocac orucdzongina mong mi mama sufuude.” ³⁵ Ifi deu yeni sasawango hemmagec kicnginau ic sogong mong mema Anutu dangge edema merecgema neec. ³⁶ Neu yeni imoc hemma ubangina ngereeu ifingoc yaka nedacgec. ³⁷ Ngic wageu kefing, neneac kpetenina 276. ³⁸ Anu yaka negec gebecyuuu wage efaiudeac wit homac wageu feec, imoc kondunnu ukugec kemeu wage efaie.

³⁹ Ama wereckenu bangec mi hehenaac hembibiegec. Amma kondung medaha mong hoc kpahac sangisac feu yeni imoc hemma wage imohai naric enudeac degec. ⁴⁰ Ifi degec ngic yeneng angka witicngina herecgegec kondunnu kemeu naso socfungoc wage gombunga garenggegecdeac somba yungecma kporuc kpedzigec enu firang kporucfu kpeu kondung kpendzicma kenggec. ⁴¹ Kemma kondung botuhau sangi mong erema

feec, ihai emma wage dumbengau hendanggeu serimanu siritembong yadango wage buyaubigeng kpedzameec.

⁴² Wage dzameu witicamangic yeni fifia mema worabauac wasaingic yeneng yunuhomebeso degec. ⁴³ Ifi degec wasaingic garengnginango Pauro onggongeudeac negemma kpetariyemmemma yofi edeyunuec, “Fifia meme ngeneng kondunnu waraima yuma kemema fifia mema tegiau enggec. ⁴⁴ Amma goa neneng katapa witiau nga goa wage kpedzac kpedzamea witiau kenggesc.” Neni nenahafoc ifingo ifi amma tegiau endacni nenearunac monggac sebia mi manganeec.

28

¹ Neni kondung tegiau gombunga emma naning. Nanni nuc imoc kpara Merite degec negening. ² Anu nuc imocac ngicngac yeneng hoannunuma kianomang nasoac amma gerectoa yukenemmegec dzeu negening. Amma faka gombunga goa ifia homac anemmegec.

³ Anu Paurongo gerec kpiriria kpedzucnema medzucke hama gerecfu faiu kemee. Kemeu boudzoc mong gerec negemmima gereckpiriria manaunac erema Pauro mariau kima kpataingge nanec. ⁴ Ifi nanu bangec imocac ngicngac yeneng imoc hemma denegeng amma degec, “Ngic imoc ye ngic kpehomeecnoc, ye kondunnu mi kemema homedac, imoc fora. Nga ye kondung tegiau yei eremanu turunga sikemu homeude.”

⁵ Ifi degec Paurongo boudzoc gigima kpesiu gerecfu kemeu sebiau ebic mong mi fingerec. ⁶ Yeni imoc hemma yofi degec “Boudzoc enara imohai yadiude me ye makpema homedarude.” ifi dema tomai tacmagec sebiau ebic mong mi fingeru yeni hemma negemma degec, “Ngic ye nemu.”

⁷ Nuc imocac ngickuneng kpara Popirio, yeac ama bangeha wegenac feu yeng ama heinemmeu uameme harebec yegoc tacyac aning. ⁸ Ammina Popirio mamango amau sebigerec hafei amma kerac ukuuku ammiu feec. Feu Paurongo ameanu emma maria sebiau faima numuma ngic mengereec. ⁹ Mengereu ngeree nuc imocac ngicngac siduc imoc negemma hafeigoc homac yeneng ifingoc sikedacgec mengereyunudarec. ¹⁰ Mengereyunuu ngicngac yeni ubangerectoa negennemmemma kekennaso wegeneu singgac nenyaka nga hiefinacgoc kennideac sirihau wageu fainemmegec.

¹¹ Kporucwage mong kianomang nasoac ihai nangkefec. Nga afo harebec wisickeu neni wage imohai emma kening. Wage imoc Aresandria taonnunac nga dumbengau nemuonga mong nanec, kpara Kasotoro nga Porukisi. Kasotoro nga Porukisi yeri foratombosonga. ¹² Kengkecma Siraku taonnu kensikema emma ihai uameme harebec tacma ¹³ taong imoc wama Regiong taonnu kemma taring. Imohai tacni werecken-gau ngadeninausing yowarec kpeu uameme mong wisickeu Puteori taonnu kening. ¹⁴ Kensikema negen negensinggoc tosofocnina goa maficyununi heitainunugec uameme 7 yenigoc tacyac amma imohacnac hanising kengkecma Roma kening. ¹⁵ Kensikeni Roma taonnu Yesuac habungo siducnina bic negenggecac goango hakecma Apio yeneac emenecfu maficnunugec. Nga goango ama mong kpara Kiang ama harebec, imohai maficnunugec. Maficnunugec Paurongo yenemmma Anutu dangge edema ubangerec negemma kuc maficgeec.

¹⁶ Roma taonnu sikeni Pauro witicamau mi faima ama monnu tarudeac deu yeni naric degec. Ye imohai tacma worabacac wasaingic monggo ye garenggema kefec.

¹⁷ Ye ifi tacmanu uameme harebec anu yudangic yeneac garengfocnina kpacyunuu sikema yenahafoc tacgec yoac yofi edeyunuec, “Tosofocna, ni yudangic arengfocnina mi memayunuai me kisicfocnina yeneac singyoac nga fakangina deendema mi anai, imoc fora. Anu yeni Yerusarennu mendannuma romangic yeneac mariu eng fainugec.

¹⁸ Fainugec romangic yeneng haniana dekpesi amma hania kpacf uuhomegecdeac dema kopocsicna hofocma yungecnugecdeac degec. ¹⁹ Ifi degec yudangic yeneng yoac imocac igocnuma kpetarigecac ngictau Sisango yoacna desiudeac deai. Yudangic yeneac yoac mong yei mehama deba dema mi hayai.

²⁰ Ni imocacnoc negemma ngenigoc denegeng annideac kpacngunuba sikedau. Israengicngac nenang Anutu dedeseriyaac fora fingerudeac negensinggema kecdimbeac amma seng yomoc marinau witicnugec kecduae."

²¹ Ifi deu degec, "Yudaia bangecfunac geac yoackibi mong mi faigec hau hening. Me ngic mong suegec hama geac kopocsic yoac mong mi deu negening. ²² Imocac wiac negennec, imoc geanggaoc dena negenni naric ande. Ge mitiareng denec, imoc bangecsoc deendema anggec negendimbe."

²³ Ifi dema tutumanggac naso mong degec naso imoc hau yudangic kpetengina homacngo Pauroac amau kpeturanggegec. Kpeturanggemagec, yeng Anutuac eucererenggac hania edeyunuec. Amma ye Moseac dedeseriyoac nga profete yeneac yoac, imoc osoma yenang negengngina wama Yesu negensinggegecdeac deireckyemmeudeac ua meec. Ye asoacngoc hanahema ifi dema kecmanu ama toforeyemmeec. ²⁴ Amma ngic goa yeneng imoc ireckema yegoc uba mocgu anggec nga goa yeni mi negensinggegec.

²⁵ Amma yudangic yeni yenaocngoc yoacngina feracemeu Paurongo yoac mocgu yofi edeyunuec, "Tiri Asungo profete Yesaiaac enacfus kisicfocngina yeneac yoac yofi deec,

²⁶ 'Ge kemma ngichabu yofi edeyununa: Ngicngac kedzacngo negen negeng, yeni imoc negemma naric mi negentegecgecde. Amma kicngo heheng yeni imoc hemma naric mi hentegecgecde. ²⁷ Imoc yofiac, ngicngacareng yomoc yeni herengina tondzera nga kedzacnginango yoac negenggecdeac ebiridae amma kicnginango wiac henggecdeac mepisickegec. Yeni kicnginango wiac mong hembauac nga kedzacnginango negembauac amma negengnginango wiac mong negentegecblauac, imoc yeni ubangina dafiu dzigeneu mengereyunubade.'

(Yesaia 6:9-10)

Ngeni yeni isocngoc. ²⁸ Imocac edengunuba negenggec, Anutungo memengerec sing meficgeec, imoc bangec monnunac ngicngac, yeneac arenoc ande, yeneng yoacna negemma komoc kpegecde." Paurongo ifi deu negemma wama kenggec. ²⁹ [Kemma sinnu yudangic yenaocngoc yoacngina feracemeu kenggec.]

³⁰ Pauro yengenaoc ama kuric bummemaka kifa yohockang ihai kecmanu ngicngac yearu kengha anggec, yeni ama heiyemmekefec. ³¹ Heiyemmemaka kengeha kpac yombong kecma Anutuac eucerereng dekperagiyemmeec. Ye Kebu Yesu Kristoac hania kpouyemmekefu ngic mongngo mi kpetarimie.

**Paurongo
Roma Kpebung Yeneac Kibi
Ohoe**

¹ Ni Paurongo kibi yoc ohoma Roma kpebung ngenearu faiduae. Yesu Kristo ye minginna nga ni yeac wanacngic. Yeng kpacnuma segerenuu aposoro ua mema Anutuac siduc gombung dekperagibadeac denenec. ² Yeng siduc gombung imocnac warac profete yenearu yoac dedzege amma haudeac deu yeneng imoc mitikibi kpetiacfu ohogec fede. ³ Siduc imoc yofi, Anutuac Medac, Kebunina Yesu Kristo, yeng ngicsebiac arennu Dawidiac fingecsaheunac fingerec amma ⁴ kpetiac Asungo kucgoc yombong yeac yofi dekperagiec, yennoc homecfunac gborima yarec, imocngo yofi edzacnunude, ye Anutuac Medacyombonga. Imoc Kebunina Yesu Kristoac siduc gombung. ⁵ Anutungo deu ye wosoefac anemmemma aposoro ua nemmeu neni yeac kpacac amma bangec monnunac ngicngac Anutu mi negemmidae, yeneac botucfu yoac dekperagini yeneng ye negensinggema yoara tofogecde, ua imoc mekecdimbe. ⁶ Nga Anutungo ngeni ifingoc kpacngunuma Yesu Kristoac areng anggecdeac negende.

⁷ Anutuac songoareng Roma taonnu kecdae, ngeni kpacngunuu yeac kpetiac areng kecdae. Nga Anutu Manninaac amma Kebu Yesu Kristoac danggunuc nga ruaengo ngenearu febeso.

⁸ Bangeha bangeha yeneng ngeneac negen negensingnginaac yoacsiduc edeemeandae, imoc wiac engena ifi negemma ngeneac negensima Yesu Kristoac kpacf Anutuna dangge edekecduae. ⁹⁻¹⁰ Ni numuanduae, imohai nasosoc ngeneac negensima numukecduae. Anutungo imoc hemma hepucna ande. Nga ongaasunango uaya mekecma yengena Medahaac siduc gombung dekperagianduae. Amma ni nasosoc Anutu numumiba yeng negenu naric anu ngenearu bic habade.

¹¹ Hama ngenemba nenahafoc kecma ngeni serigecdeac Tiri Asuac wosoefacac kuc ngenearu mederebade, imocac homac anende. ¹² Ni yofi negemma imoc deduae, ni ngenearu haba nenang negen negensinninango nanggeemema ngeneng ni meserinugec neng ngeni meseringunubade. ¹³ Negen negensinggoc tosofocna, yofi negenggecdeac anende. Ni miti uaac fora imoc bangec monnunac ngicngac Anutu mi negemmidae, yeneac botucfu kpedzucneanduae, ifi isocngoc ngenearu hama miti uaac fora goa kpedzucnebade. Amma imocac naso homac arenga faikecbare wiac goango ine dze-genukefec.

¹⁴ Ni gricngic nga bangec monnunac ngicngac Anutu mi negemmidae amma fakangina siriha kpac kecanda, yeni miti dekperagiyemmebesare. Amma ngic ngen negenggoc nga negen negengina kpac, yenearu siduc gombung mamangkima dekperagima imocngo turunna kpoubesare. ¹⁵ Imocac amma Roma taonnu ngicngac kecdae, ngenearu ifingoc siduc gombung dekperagibadeac herena yacande.

¹⁶ Siduc gombung imoc Anutuac kuc. Imocngo ngicngac sasawa negensinggeandae, yeni kopocsicac ebicfunac mesiyunu komoc kpegecde. Yoac imoc yuda yeneac arennu waraima kemma grik yeneac arennu momoc kenec. Imocac amma ni siduc gombunggac negemba gameagoc mi angkecde. ¹⁷ Anutungo ngicngac dindingac denemmeande, imocac siduc gombunnu yofi fingectegecande, negen negensinggoc hanahema negen negensinggoc mesibesonga. Amma yoac yofi bic oho ohoya fede,

“Ngic dindingac ye negen negensinggoc kecma kechereeude.” (Habakuc 2:4)

¹⁸ Ngicngac goa yeni Anutuac faka nga yoac ngadehema sing ferahaandae amma faka nga yoac fora kpema waandae. Ngicngac imoc yeneac turunga kurumenunac fingeru Anutungo imoc kpouyemmeude. ¹⁹ Anutu haniaya botucnginau dindingac hengkecdae. Imocnac Anutu yengenaoc mekperagiyemmeande. ²⁰ Amma hanahema amma bangec meficgeecfunac kecerema yofinenggac kecdimbengoc yengena kicng mi

hengena nga yeng wiac meficgeec, imoc henggec. Imocnggo yengena marikibiaac siriha fingecyemmeu negentegeckeckedae. Yeng nasoya nasoya kuc mingina kefecngo kefude amma ye Anutu, yeni imoc hentegecma kecdae. Imocac mongngo yoac mong yofi naric mi deude, "Anutu kecde, imoc mong mi negentegeeraiac kopocsicna wabeso."

²¹ Yeni Anutu negemmidae, amma eweheihei ine mi ammigecde. Nga ye Anutu, imoc negendaenoc nga yeni ine ye mi dengeregecde. Yeni ine negen negengngina ikoha, imocnggo faka meu kicpisic nga ubafong anggec kundungngo ubanegen negengngina semeu sing segegecde. ²² Yeni ifi kecma deandae, "Neni negen negentegecgoc." ifi dema samackpeng amma dzingfonga kecandae.

²³ Nga yeni Anutu homeha kpac, yeac kuc kibikperagiagoc wama ngic homemea, yeneac ongangina nga neng nga yamberec amma sekac ongangina goa imocac Anutu siriha, ifia dema mekecgecde. ²⁴ Ifi angandaec amma Anutungo yenang hereyacyac fakanginai wayunuu yeni kaiserofaka angkecma sebingina faka gameagocfu kpeandae.

²⁵ Anutungo wiac sasawa deu fingerec, yearu dedengerec nga dedengerec fekengkecbeso, imoc fora. Nga yeni ine Anutuac yoac fora wama ikocyaoac hoanggegecde. Nga ye wiac sasawa deu fingerec, yeac eweheihei faka wama yeac bageu monggoc mi kecandae. Yeng deu wiac fingerec, yeni imoc afehema imocac kingang kpeandae.

²⁶ Imocac amma Anutungo kpae mong mi heiyemmemma wayunuu hereyacyac faka gameagocnggo fenggeyunuu ngac yeni ngicgoc kecandae negengandimbe, yeni sing imoc wagec faka goa ngacnggo faka mi angana, imoc angemekecdae. ²⁷ Nga ngic yeni sing imohaingoc ngacgoc kekec kecandae negendimbe, imoc wama herengina gerec isoc borang tiu ngicnggo ngicfu kemma faka gameagoc angemeandae. Ngicngac ifi angkecdae, yeni yenaocngoc fakangina gameagoc anggec, imocacsoc turungango kekecnginai faka dindingac modacma meficgeyemmeude.

²⁸ Ngicngac yeni Anutu negemmibesonga negenggec wiac mamea anu faka imoc ngadehema wagec. Imocac amma Anutungo ifingoc kpae mi heima wayunuec. Wayunuu yeni faka kpedahango fenggeyunuu faka ngicnggo mi angana, yeni imoc modacma angemekecgec. ²⁹ Nga yeneac hereu faka mangana hania hania wake wakea feder, imoc yofi, yeni ngicngac dindingac kpac. Yeni ngabagoc nga kichodunggoc kecma faka mangana amma keracmanganggoc kecandae. Yeni herengina yaru ngic yunukpebuc anggecdeac ayemmeu ngabau eweandae. Yeni ikoc nga ngaba arennu ngic memanganeyunugecdeac ayemmeande amma gubekisang kecandae. ³⁰ Kecma yeni enacfu faifai amma Anutu ubango wama ubaseri kecma yoacngina goria amma sebiengeng faka angkecdae. Amma nonggo mangfocngina yeneac yoac kpema faka mangana gboria meficgeandae. ³¹ Nga yeni negen negengngina kpac kecma yenang yoacngina kpeandae. Yeni ngicngac tosofocngina heresongogoc hoangyunugecdeac obohoma ngicngac yeneac ubamangang mong naric mi negenggecde.

³² Ngicngac faka mangana ifia angandae, yeni homecac areng andae. Yeni Anutuac sing dindingac imoc negemmaguc sifu faka ifia angkecdae. Nga yeni imocgoc torokpema goa yenenggec faka mangana ifia amma kecgec, imoc ifingoc negenggec ngereeande.

2

¹ Imocac ngic me ngac, ge negenna, ge ngicngac goa yeneac fakangina isingga kopocsicnginagoc andae, ifi dekecnade, naso imohai geangga yeni isocngoc kopocsicgagoc annec, imoc deficemenade. Nga yeni isingyunuma, "Ngeni kopocsicnginagoc." ifi deannecac geangga ifingoc isingemenec ande. Nocac geac faka nga angammemega imoc yeneac isocngoc ande. ² Anu faka nga angammemengina ifia angkecdae, yeni Anutungo sing forau isingyunuma kopocsicnginaac turunga yemmeude, imoc negendimbe. ³ Nga ngicngac goa faka ifia angkecdae, ge yeneac faka isingga kopocsicnginagoc andae dema geangga faka ifiangoc angkecma Anutuac isic isingga sou degbedic yoac goa dema woranadeac negennec nga imoc kpac yombong. ⁴ Anutungo faka yumea yombong anggemma modzotitia kpac tomaiga naso herea kecande, imoc ngadehenadeu naric

mi ande. Nga ubaga merennadeac Anutungo yumea anggenda, ge sifu imoc negentegecbesena.⁵ Nga here dzege dzegegoc kecma ubaga mi meremma kopocsicmekpedzuc angkecma turunga menade. Nga Anutuac turung kpoukpouac nasotoa hau turunga dindingac fingectegecgenude.⁶ Imoc yofiac,

“Kebungo ngicngac tembus tembus angammemengina hennegeng amma turunga kpouyemmeude.”⁷ (Mitiyegec 62:12; Yoac negen negengagoc 24:12)

⁷ Mong ye mamangkima faka gombunga mekecma kurumenggac kuc kibikperagiagoc nga eweheihei amma kekecseri meudeac ammiu uatoa mekecde, Anutungo ye kekec wisic wisickea kpac miude.⁸ Nga mong ye yengenaacsac negemma kecma yoac fora mi tofohoande nga sing dindingac kpema mangana modacande, Anutungo yearu herebuya kpakema kopocsic turunga miude.⁹ Nga ngicngac angammeme mangana angkecdae, yeni sasawango kpendzeng nga ubaebictoa meficgegecde. Yuda arengngo imoc waraima meficgemagec grik areng yeneng momoc meficgegecde.¹⁰ Ngicngac faka nga angammeme gombunga angkecdae, yeni sasawango kurumenggac kuc nga kibikperagia nga eweheihei amma ruae meficgegecde. Yuda arengngo imoc waraima meficgemagec grik areng yeneng ifingoc meficgegecde.

¹¹ Anutu ye monde mondea mi femide.¹² Ngicngac dedeseriyoac yenearu mi faifaia, yeni kopocsic meficgegec Anutungo dedeseriyoara kpac, yeni sasawa manganaac areng desiyunuma wayunuude. Nga ngicngac dedeseriyoacac bageau kecma kopocsic meficgegec, yeni dedeseriyoacngyoacfufaiyunudaru kopocsicnginagoc kecma manganedacgecde.¹³ Nga ngicngac faka nga angammenginango dedeseriyoac modackecdae, Anutungo yenemma dindingac deyemmeude. Nga ngicngac dedeseriyoac kedzacngosac negengandae, yeni dindingac mi deyemmeude, kpac.

¹⁴ Anu bangec monnunac ngicngac Anutu mi negemmidae, yeni dedeseriyoac oho ohoya mi modacandaengo yoara sifu momorongnginai fede, yeni imoc tofohoma dedeseriyoac modacandae, yeni yenaoc dedeseriyoacac mingina anggecde.¹⁵ Nga dedeseriyoacngowiak ambesonga dede, imoc ngicngac ubanginau bic oho ohoya fede, imoc edzacnunuandae. Amma here negen negengngina imocngomeseriude. Ubangina nga here negen negengngina yeri yerahafofoc ua mema yoacfufopocsingngina deficgeandape me nanggeyunuma meficyunuandape.¹⁶ Imoc Anutuac desi desi nasotoau fingectegeru henggecde. Ni siduc gombung Yesu Kristongo nenec, imoc yofi dekperagianduae, Anutungo nasotoau ngicngac yeneac negeng sufufa feec nga fede, imoc isinggema desiude.

¹⁷ Yudangic ngeni ngenanggac deandae, “Ni yudangic dema dedeseriyoacngonanggenuu kecduae.” Amma ge Anutu negennec imocac negenna engena angkecde.

¹⁸ Anu dedeseriyoacngosing kpougenu ge Anutuac negen negeng nga songobic negemma faka nga angammeme damoc gombunga, imoc isinggema naric ireckenade.

¹⁹ Nga yofi negengemeannec, “Ngicngakicpisic yeneac sing edzacyunuyunu ngic amma kundung manau kengkecdae, yeneac kperagia, imoc ni.”²⁰ Nga dedeseriyoacfunegeeng negeng nga yoac fora hafoangoc fedec ge negen negengngina obohoandae, yeneac negennec, “Ni yeneac dederecgengic.” amma ngicngac nambaracuba mekecdae, yeneac yofi negengannec “Ni yeneac kpoukpou.”

²¹ Ge ifi amma goa edekpou ayemmemega geangga ine mi kpouemeannec. Amma hamangec mi mebesonga, ifi edeyunuma geangga sifu wiak hamangec meanne.

²² Amma kaisero faka mi ambesonga, ifi demaguc geangga kaisero anganne. Nga ge nemu ngadeyunuannec amma geanggaoc ine womonginai emma yeneac wiak hamangec meanne.²³ Amma Anutuac dedeseriyoac mekecma geanggaac negenna engena anu gennoc dedeseriyoac kpema Anutu game witiau faianne.²⁴ Mitikibiu yoac yofi oho ohoya fede,

“Ngeni ifi angkecdaeac amma bangec monnunac ngicngac, yeneac botucfu Anutuac kpac denggbaringgegecde.” (Yesaia 52:5; Edzekie 36:22)

²⁵ Ge sebi tosaga herecgema dedeseriyoac modacnadeu imocngo memefihagoc anude. Nga dedeseriyoac kpenadeu ine sebi tosaga herec herecgeango sifu sebi herec herecgea areng mi annade. ²⁶ Anu areng goa sebi tosangina mi herecgegec, yeni angammemenginango dedeseriyoac modacdacande, yeni sebi herec herecgeareng, kpacngina ifi naric kpacbesonga. ²⁷ Nga ge sebi tosaga herec herecgeango kecma dedeseriyoacac kibi mekecma dedeseriyoac ine kpema kecna ngic mong ye sebi tosea mi herecgegec, yeng dedeseriyoac modackecma faka nga angammemega isinggema ge kopocsicgaggoc deude. ²⁸ Ngic mong ye sebiugeng yudangic ande, ye yudangic fora mi ande, kpac. Nga ngicsebiu sebi tosea herecgeandae, imoc sebi herec herecge fora mi ande, kpac. ²⁹ Mong ye ubahereau yudangic ande, yeng yudangic yombong. Anutuac Asungo ubahereac herec herecge ua meu Anutungo ngicngac areng ifia dengereyunuande, imoc ngicac ua kpahac. Nga dedeseriac kibingo ubahereac herec herecge ua, imoc naric mi meude.

3

¹ Yudangic yeneng sebi tosangina herec herecgea kecmagec faka imocngo yofi meficyunuu areng goa tatacngina feracyunugecde. ² Anutungo yudangic kekecnginau hafoangoc nanggeyunuma ngic areng goa feracyunuma yudangic faka gombunga homac yombong ayemmeude. Yeng yeneac negenu ngeree yengena yoac garengegecdeac yeneac botucfu faiec fede, imoc negenggec engena ambeso. ³ Anutungo yoac dedea modackecde. Anu goa yeni negen negensingngina kpac kecgec, fakangina imocngo Anutuac faka mi meickeec. ⁴ Imoc kpac yombong. Yoac yofi oho ohoya fede, “Geng yoac denec, imoc fora fingegegerude nga ge ngic hania isinggema yoacngina desinec, imoc dindingac.”

(Mitiyegec 51:4)

Yoac yofi deni seria febeso, “Anutu ye fora nga ngicngac sasawa nenang ine ikocninagoc.”

⁵ Goa yeni deandae, “Ngicngac angammemenina mangananganonoc Anutuac faka dindingacmekperagiude.” Yoac imoc fora mi ande nga fora ambac dede Anutungo mangananinaac turunga kpounemmeu, imocngo dindingac naric mi ambac. Ni ngicac negen negeng modacma yoacna ifi deduae. ⁶ Anutu ye fakaya dindingac mi ambac debac bangeha bangehaac ngicngac naric mi isingyunuma desiyunubac, imoc foracngoc. ⁷ Neac ikocyaoacng Anutuac yoac fora mekperagima kpara dengerebac ye kopocsicngic naric mi denembac. ⁸ Goa yeni enacfu faifai anemmem deandae, “Wiac gombunga fingerudeac nenang angammeme goa mangana ambisina.” Nga goa yeneng neneac deandae, “Imocnoc kpounemmeandae.” Ngicngac yoac ifia deandae, yeni Anutungo kopocsicnginaac turunga, imocac sirihau yemmeude.

⁹ Imocac dafi denide, yudangic nenaoc grikngic feracyunukecdimbe me? Imoc kpac. Yudangic nga grikngic yeneac yoacngina yofi bic deding, “Nenang momoc sasawango kopocsicac bageau kecdimbe.” ¹⁰ Imocac yofi oho ohoya fede,

“Ngic mongngonec dindingac mi kecde, imoc kpac yombong. ¹¹ Amma ngic mong negen negentegegcoc mi kecde me mongngo Anutu hofoc hofoc ua mong mi mekecde, kpac. ¹² Yeni sasawango Anutuac sing ngadehedacma yenahafoc manganesegec, mongngonec angammeme gombunga mi angkecde, imoc kpac yombong.”

(Mitiyegec 14:1-3; 53:1-3; Miti dedengic 7:20)

¹³ “Yeni ubangina imoc kicsere angge anggea.”

(Mitiyegec 5:9)

“Yeni nedzarangnginango ikoc ayemmeandae amma bibicnginau boidzocac marasing mekecdae.”

(Mitiyegec 140:3)

¹⁴ “Yeni enacnginau sowecyoac nga negemmangang herenginaunac gerec dzema ere-ande.”

(Mitiyegec 10:7)

¹⁵ Nga yeni ngicngac yunuma sacngina hetinggegecdeac haninginango kpouma bic kengkecdae. ¹⁶ Amma yeni sing kengkecdae, imohai amabangec memanganema ngicngac ebicfu faiyunuandae.

¹⁷ “Ngicngac imoc yeni ruaegoc kekecac sing mi negendae, kpac.”

(Yesaia 59:7-8)

¹⁸ Amma yeni Anutuac kicfu dzonong federedec namma eweheimigecdeac mong mi negensiandae. ^(Mitiyegec 36:1)

¹⁹ Neni yofi negendimbe, dedeseriyoac imocngac ngicngac dedeseriyoac bagaeu kecdae, imoc yeneac enacngina medzickeudeac nga bangeha bangeha ngicngac sasawa yeni Anutuarunac turunga megecdeac amma yoara dede.

²⁰ Ngic mong ye dedeseriyoac modackecma Anutuaru haude, ye Anutungo yofi naric mi demiude, “Ngic imoc ye dindingac.” Dedeseriyoac imoc ine kopocsicnina dekperaginemmeu negennide.

²¹ Anu yofinenggac Anutungo ngicngac dindingac denemmeande, ye imoc didiu faiu hengkecdimbe. Sing imoc dedeseriyoac nga profete yeni hepuc angandae nga imoc dedeseriyoac sing mi ande, kpac. Imoc sing gboria amma siriha mong yombong.

²² Anutungo Yesu Kristo fainemmeec nga ngicngac ye negensinggedae, yeneac dindingac deyemmeude. Nga ngicngac sasawa nenang sircnina mong mong mi ande, ²³ nenang sasawa kopocsic meficgema kuc nga kibikperagia Anutuarunac haande, imoc kekecninau obohoma kecdimbe. ²⁴ Obohomina Yesu Kristongo witicfunac yungecnunuec. Yungecnunuma Anutungo wosoefac anemmeandeac amma dindingac denemmeude. Imoc fingecnemmeudeac nenaoc ua mong mi meing.

²⁵ Anutungo Yesuac sac hensima nonongkac faiu nanu ngicngac nenang Yesu negensinggenide, yeng kopocsic turung kpouac bung angkecde. Sing imohai Anutu ye yengena dindingac, imoc edzacnunuudeac negenu ngereec. Imoc yofiac, ye warac ngicngac faka yumea ayemmema kopocsicnginaac turunga bic mi kpouyemmemma

²⁶ naso herea modzotitia kpac tomaingina kefec. Ye naso yofinenggac ngicngac Yesu negensinggekecdimbe, nenang dindingac denemmeude. Ye yengena dindingac, imoc edzacnunuudeac negensima Yesuac uaac amma dindingac denemmeude.

²⁷⁻²⁸ Ifiac amma angammemina gombunga imocac sebinina meennideac sing mong mi federedec, kpac. Anutungo ngicngac dindingac deyemmeande, imoc negen negensingnginaac amma deude, neni imoc negemma meseridimbe. Yeni dedeseriyoac modackecdaeac ye dindingac mi deyemmeude, kpac. Imocac negen negensinggac amma sebiengeng naric mi annide. Ge uagaac amma ngic dindingac naric mi annade, imocac sebiga naric mi meennade. ²⁹ Goa yeni yofi deandae, Anutu ye Yuda yeneac Anutusac. Nga imoc fora kpac, ye bangec monnunac ngicngac, yeneac Anutu momoc kecde, imoc fora. ³⁰ Anutu mocgunganoc kecde. Amma ye sebi tosangina herecgegec, yeni negen negensingnginaac amma dindingac deyemmeude. Nga sebingina mi herecgegec, yeni ifingoc negen negensingngina hemma dindingac deyemmeude. ³¹ Nga negen negensinninango dedeseriyoac mi meickenide, kpac. Nenang negen negensingng dedeseriyoac nanggenide.

4

¹ Kisicnina Abrahang yeac hania henni. ² Goa yeni yeac deandae, “Anutungo angammemeaac amma yeac ngic dindingac demiec.” Imoc fora mi ande nga imoc fora ambacfu ye sebia naric meembac. Nga imoc ine Anutuac kicfu kpac.

³ Neni mitikibiu yofi osoandimbe,
“Abrahang ye Anutu negensinggeecac amma, yeng yeac ngic dindingac demiec.” (*Fingec fingec 15:6*)

⁴ Ngic mong ua meande, yeac uabung imoc wosoefac mimia mi ande, imoc ua meecac turunga ande. ⁵ Nga mong ye uaac sing wama negenserima Anutu negensinggeude, yeac yofi fingerude, Anutungo ngic mangana dindingac deyemmeande, yeng ngic imoc negen negensingaac amma uaya kpac wosoefacfu ngic dindingac demicide. ⁶ Nga mong ye angammeme gombunga mong mi ammanu Anutungo yeac dindingac deu yeac kenec meude, ngic ifia yeneac Dawidingo ifingoc yofi deec,

⁷ “Ngicngac goa yeni singyoac kpema kecmagec Anutungo manganangina wayemmeec nga kopocsicngina semeyemmeec, yeni kenecnginagoc. ⁸ Nga KEBUNGO ngic

monggac kopocsihaac kpete mi meude, ngic imoc ye kenehagoc.” *(Mitiyegec 32:1-2)*

⁹ Kenec yoac, imoc ngic sebi tosangina herecgegec nga ngic mi herecgegec yeneac momoc dedea. Abrahangng negensinggeecac Anutungo yeac negemma ngic dindingac demiec, ifinoc negemma deandimbe. ¹⁰ Abrahang ye sebi tosea herecgeuguc Anutungo dindingac demiec me? Imoc kpac, ye sebi tosea mi herecgemanungoc Anutungo ye dindingac demiec. ¹¹ Abrahang ye negensinggeu Anutungo yofi demiec, “Ngic imoc dindingac.” ifi dema sebi tosea herec herecgeac ma Abrahang miec. Ye sebia mi herecgema bic negensinggeec. Nga ngic sasawa sebingina mi herecgema negensinggeandae, Anutungo yeneac dindingac deudeac yeni Abrahanggac kisicfora, ifi kpacyunuec. ¹² Nga ngic sebi tosangina herecgema Abrahanggac hanititi modacma Kebu negensinggeandae, yeneac ifingoc yofi deec, Abrahang ye yeneac kisicngina. Negen negensinnu kisicngina Abrahang, ye hanahema sebi tosea mi herecgema bic negensinggeec, ye isoc andae.

¹³ Anutungo Abrahang nga bangecfora yenigoc yoac yofi dedzege anec, bangec nga kurumeng imoc ngeneac maridzoming anudeac ngemmebade. Nga imoc Abrahangng dedeseriyoac modarecac mi deec, kpac. Yeni negensinggegec nga Anutungo negengyemmemma dindingac deyemmeec, imocac witiau yoac dedzege anec. ¹⁴ Nga ngicngac yeni dedeseriyoac hoanggema maridzomingngina mebau dede negen negensinggoc kekec foraya kpac ambac. Nga Anutungo wiac yemmeudeac deseriec, imoc ifingoc kuha kpac ambac. ¹⁵ Dedeseriyoacngo kopocsicac turunga heficgeude nga dedeseriyoac mong mi feudeu dedeseriyoac ifingoc mi kpebau.

¹⁶ Abrahang ye ngicngac dedeseriyoac mekecdae, yeneac mangngina. Amma ye ngicngac negen negensing yeac isoc feyemmede, ye ngic ifia, yeneac manggac. Nga Abrahanggac bangecfora sasawa yeni dedzegeac yoac naric megecdac imoc wosoefacac bageau feu negen negensingnginaac amma megecde. ¹⁷ Nga Abrahanggac negensima yofi oho ohoya fede,

“Ni faiguba ge ngicngac areng homac yeneac mangngina annade.” *(Fingec fingec 17:5)*
Nga Anutungo ngic homemea megboriyunuande nga wiac mong mi fede, imoc bic fede, ifi isoc ye imoc dema kpara kparu fingecande.

Ifiac amma Abrahang ye nenang mannina, imoc Anutuac kicfu nga negen negensinggac sinnu. ¹⁸ Yeng gboricgoc anudeac siriha mi kefec, kpac. Nga ye Anutu negensinggeecac ngicngac areng homac yeneac kisicngina anec. Imocacnoc yoac yofi bic dedea feec,

“Bangecfocga yeni homac yombong, kpete imocacsoc fingecgecde.” *(Fingec fingec 15:5)**
¹⁹ Abrahang ye kifaya 100 isoc anu sebia dzaparema kpedziu negenec. Nga enema Sara ye kifa feraheu sabac meudeac siriha naric mi anec. Nga Abrahang ye negen negensinga sifu seria feecac kucmama mong mi anec. ²⁰ Ye Anutungo wiac miudeac deseriec, imocac negengyohoc mong mi amma serima negensinggema kecma Anutu afehekefec. ²¹ Nga Anutungo yoac deserimiecmoc imoc meudeac imocac kuha soha femiec, Abrahangng ifi negentegecma negenseriec. ²² Imocac amma yofi nande, “Anutungo yeac negensima, ngic dindingac demiec.”

²³ Nga yoac yomoc, “Yeac negensima ngic dindingac demiec.” imoc Abrahanggacsac negemma mi oho ohoya fede, kpac. ²⁴ Imoc nenanggac momoc oho ohoya fede. Anutungo Kebunina Yesu homecac arenunac megboriu nenang ua imoc meec, ye negensinggeni yeng ifingoc negennemmemma dindingac denemmeude. ²⁵ Nga nenang sing feraheing, imocac amma ngicngac yeneng Yesu homecfu faigec. Nga Anutungo dindingac denemmeudeac Yesu homecfunac monggoc megboriu yarec.

* 4:18: Asomenggac kpete imocacsoc fingecgecde.

5

¹ Ifi amma Anutungo negen negensinnina hemma dindingac denemmeu Kebunina Yesu Kristoac amma yegoc ruaeu kecdimbe. ² Yeng sing meficgenemmeu Anutuac danggunuc manau yofinenggac kecdimbe. Nga Anutuac kuc kibikperagiagoc ngade fingecnemmeude, imoc wiac engena, ifi negemma sogaima kecdimbe. ³ Amma imocsac kpac, nenang ifingoc kpendzeng witiau kecma imocac negenni engena anu sogaikecdimbe. Kpendzeng kpekpe, imocngo herenina meseriude. ⁴ Meseriu modzotitia kpac kecma seserigoc nannide nga eucererenggac fora fingerudeac negensinggema kecdimbe. ⁵ Ifi kecmina ubaninaac kuha naric mi maude. Nocac Tiri Asugoc anni Anutungo songoya ubahereninau kpakeec fede.

⁶ Nenang sicsauc kecminangoc Kristoac naso hau yeng nenanggac tatac mema homeec. Makpekpea kecminangoc, ye ifi anemmeec. ⁷ Ngic mongngo ngic dindingacac amma homeudeac negenside, siduc ifia mi negengandimbe. Nga mong ye faka nga angammemea gombunga angkecde, mongngo yeac amma kengec wama homecfu naric kembac gedang. ⁸ Anutungo songoya edzacnunuma Kristoac deu yeng ngicngac nenang kopocsigoc kecmina nenanggac ammanoc homeec. ⁹ Anu yeac sawaac amma Anutungo ngicngac dindingac denemmeu yofinenggac kecdimbe. Imocac ye ifingoc turung kpoukpouac nasou yoacnina deu komoc kpebesandimbe, imoc negenserima kecdimbe. ¹⁰ Nga nenang Anutuac ngabafora kecmina Medahaac homecngo ngaba meickeu Anutugoc ruae fingecnemmeec. Ruae fingecnemmeu nenang ifingoc Medahaac kekecac amma komoc kpebesandimbe, imocnog negenserima kecdimbe. ¹¹ Amma imocsac kpac, Kebunina Yesu Kristongo kopocsicnina meickema Anutugoc ruae meficgenemmeu nenang yofinenggac Anutuac negenni wiac engena anu sogaima kecdimbe.

¹² Imoc yofi fingerec, ngic mocguacsac amma kopocsic bangetoa bangecfu fingecma homec heficgeec. Nga ngicngac sasawa kopocsic meficgegecac amma homecngo ngicngac sasawa meyunuec. ¹³ Dedeseriyoac bangetoa bangecfu mi femanu kopocsicngo bic haec. Dedeseriyoac mong mi feu kopocsicac hennegeng naric mi fingerude. ¹⁴ Nga Adanggarunac erekecma Moseac nasou homecngo ine ngicngacareng sasawa garengyuncuec. Adangngko kopocsic meficgema Anutuac yoac kpeec. Nga goa yeni yeac kopocsic imoc isoc mi meficgegec nga homecngo yeni sifu meyunuec. Adang ye ngic haudeac dedea, yeac ongea.

¹⁵ Sing ferac ferahea, imoc siriha mong ande nga danggunuc imoc siriha mong, imoc fora. Ngic mocgungo kopocsicfu makpeecac ngicngac ebiriango homedacgec. Nga Anutungo wosoefahaac nga ubangerehaac wiac ngicngac yemmeande, imoc ine homactoa anu yenearu ebiria yombong kpakeyemmeec. Imoc ngic mocguacsac, Yesu Kristoac wosoefacac amma ifi fingecma feec. ¹⁶ Ngic mocgungo hanahema kopocsic meficgeec, Anutungo imocac amma wosoefahaac wiac yemmeande, ifi mi negembisina, kpac. Ngic mocgungo kopocsic hanahema meficgeu Anutungo turung kpoukpouac faka hanahema meec. Meu ngicngac homac yeneng ine sing ferahemma turungnginagoc anggec. Anggec Anutungo ifi hemma wosoefac ayemmema kopocsicnginaac turunga waec.

¹⁷ Ngic mocgungo hanahema sing feraheu yeac kopocsicac amma homecngo ngicngac garengyunuudeu ine yofi negembisia, Anutungo ngicngacareng danggunuctoa ayemmemma wosoefacfu dindingac deyemmeu, yeni ngic mocgu, Yesu Kristo, yegoc kecma kekecac arennu kecma wiac homac yenahafoc garenggegecde.

¹⁸ Ifi anu ngic mocgungo sing feraheecac Anutungo ngicngac sasawa manganaac arennu desiec. Nga ngic mocgungo angammeme dindingac anecac ifi isocngoc ngicngac sasawa kopocsicnginaac turunga meickeec. Meickeu Anutungo ngicngac dindingac deyemmedaru imocngo kekeceri heficge yemmeec. ¹⁹ Nga ngic mocgungo enac tofoc tofoho faka wau ngicngac ebiriangoc yeni kopocsicnginagoc andacgec. Nga ifi isocngoc ngic mocgungo enac tofoc tofoha anecac amma Anutungo ngicngac ebiriangoc yeneac dindingac deyemmeec nga deyemmeude.

²⁰ Anu kopocsicngina kuneng monggoc anudeac dedeseriyoac haec. Nga kopocsicngina kuneng yombong anu danggunucngo monggoc yombong kopocsicngina ferahema fingecma feec. ²¹ Imoc yofiac, kopocsicngi homec meficgema yenenggareng anec, ifi isocngoc danggunucngo garennina anu Anutungo Kebunina Yesu Kristoac amma dindingac denemmema kekec wisickea kpac nemmebesande.

6

¹ Imocac yofi debisina. Anutuac wosoefacngi yadiudeac nenang kopocsicfu monggoc torokpema mi kecbisina, kpac. ² Nga kopocsicfunac bic homeing, ifi negemmaguc sifu ihai monggoc torokpema mi kecbisina. ³ Nenang Yesu Kristoaru kpeketahama kecnideac doku nadzicnemmegec. Amma sasawango homehau bariyuhung anemmeu nadzicdaring, ngeni imoc mi obohodae. ⁴ Nga doku nadzicni Anutungo yegoc tonggonunu homecfu kemeing. Manggac ye kuc nga kibikperagitoayango Yesu homecfunac megboriu kekec gboriau enec. Enu nenang ifingoc kekec gboriau kecnideac yegoc torokpenunuec.

⁵ Yesungo homeec, imocac siricfu yegoc torokpema homeing. Amma ye homecfunac gborima yarec, nenang ifingoc torokpeinggac gborima yacnide imoc negendimbe.

⁶ Kopocsicac kuc heresebininaua mekecde, imoc kpac anudeac ubaherenina esea mariponnu Yesugoc kpekpea, imoc negendimbe. Kopocsicngi minginnina monggoc mi kefudeac ifi anec. ⁷ Imoc yofiac, Yesungo ngic homeec, ye kopocsihaac witicfunac bic mesiec.

⁸ Nga nenang Kristogoc bic homeing dema yegoc ifingoc kecnide, imoc negensinggedimbe. ⁹ Nga Anutungo Kristo homecfunac megboriu yarec. Amma ye yacma monggoc mi homeude, imoc noc negendimbe. Ye homecac kuc bageau monggoc mi kecde. ¹⁰ Ye ngicngac kopocsicninaac amma atac mocgasac homeu wisickeec. Amma yofinenggac kecde, imoc Anutuac hoannu kecde. ¹¹ Imocac ngeni ngenanggac yofi negembisia, kopocsicfunac bic homema imocac bageau monggoc mi kecdimbe. Nenang yofinenggac Yesu Kristogoc kpeketahema Anutuac hoannu kecdimbe.

¹² Kopocsicngi kpedzingunu sebiac negensongo hania haniango wangeckungubacac ngeni kopocsic faka uba eseau fekecde, imoc wama mi modacbsia. ¹³ Amma oruc kickedzac nga hanimaringina imocngi kopocsicac kingangkpekpe mi ambeso, kpac. Ngeni warac homecfu kecgec, yofinenggac ine kekec forau kecdae, imocac ngenaoe efaima kemma Anutuaru oruc kickedzac nga hanimaringina desigec imocngi yeac kingangkpekpe ambeso. ¹⁴ Ngeni dedeseriyoacac bageau kekec, imoc bic wama danggunucac bageau kecdae, imocac amma kopocsingi kunengngina mi ambeso.

¹⁵ Imocac yofi annide. Nenang dedeseriyoac bageau mi kecdimbe, kpac. Nenang danggunucac bageau kecdimbe. Imocac kopocsic meficgeni, imoc mi ngereeude nga ifi mi fingecbeso! ¹⁶ Ngeni ngic monggac wanac areng kecgecdeac desiemegecdeu ngeni yeac wanac areng kecma yeac enac tofobobisia, imoc negenda. Ifi isoc ngeni kopocsicac wanac areng kecma enara tofogecdeu homec meficgegecde. Nga ngeni enac tofoc tofohofakaac bageau kecma dindingac kekec meficgegecde.

¹⁷ Anu ngeni warac kopocsicac wanac areng kecgec, imoc bic wagec wisickeec. Wisickeu kpoukpouyoacac hoannu faingunugec, ngeni ubangina hafoangoc imohai desiemema imoc tofohokecgec ac amma Anutu dengereduae. ¹⁸ Ngeni kopocsicac witicfunac bic mesi mesingunuya nga yaguc dindingac kekec ac wanac areng amma kecdae. ¹⁹ Nga ngeni sebisiasc kucmamanginagoc kecdaeac ngeneac siricfu yofi deduae. Ngeni warac oruc kickedzac nga hanimaringina desiemema uba wonongagoc kekec nga singyoac kpekpe, imocac bageau wanac areng kecgec. Ifi kecma singyoac kpema kecgec. Ngeni ifi isocngoc yofinenggac oruc kickedzac nga hanimaringina desiemema dindingac kekec ac bageau wanac areng kecobia. Kecma kpetiac kekecfu yadiseri anggecde.

²⁰ Amma ngeni kopocsicac wanac areng kecmagec dindingac kekec ac yoacngi naric mi garengngunuec, kpac. ²¹ Ngeni imohai kopocsicac fora mekecgec imocngi kekecngina

memanganeec amma ngeni yofinenggac imoc negemma gamengunuande. Faka nga angammeme ifianoc homec heficeude. ²² Ngeni yaguc kopocsicac witicfunac mesingunungunya nga Anutuac wanac areng kecdae, imocac fora yofi, ngeni kpetiac kekec kecma yadiseri angkecmagec wisickeu kekecseri megecde. ²³ Imoc yofiac, kopocsicac buma imoc homec megecde nga Anutuac wosoefac, imoc Kebunina Yesu Kristoac amma kekecseri buma kpac nemmebesande.

7

¹ Tosofocna, ngeni dedeseriyoac negendae, imoc negenduae. Imocac yofi debeso negenduae. Ngicngac gbori kecmagec dedeseriyoacngo kunengngina amma garengyunuande, fora. ² Imocac ngac mong ye ngicfu kenudeu, ngic ye kecmanungoc ngacngo yegoc dzahacemema kefecde. Dedeseriyoacac sing ifi fede. Kecma ewea homeudeu dedeseriyoacngo ngac ngicfu witickec, imocac witiha kpac anude. ³ Nga ewea gbori kecmanungoc ngac ye ngic monggaru kenudeu yeac serongac degecde. Nga ewea homeudeu ine ngac ye dedeseriyoacac witicfu monggoc mi kefude. Ye naso imohai ngic monggac ngac anudeu serongac mi anude. ⁴ Tosofocna, ifi isocngoc Anutungo Kristoac sacfusiu ngeni yegoc ngunuhomeu ngeni dedeseriyoacac bageau monggoc mi kecdae. Ngeni ngic homecfunac yarec, yegoc torokpema kecgecdeac nga nenang Anutuac uaac fora annideac ye ifi anec.

⁵ Nenang warac uba eseaac arennu kecmina dedeseriyoacngo songo mangana herenina miaru homecac fora meficgeketing. ⁶ Nga yofinenggac dedeseriyoacfunac yungec yungecnunuya kecdimbe. Dedeseriyoacngo mendannunuec, imohacnac bic homeing. Dedeseriyoacfunac homema ua esea imoc wama Asuac ua gboriau emma nandimbe.

⁷ Imocac nenang yofi denide, dedeseriyoac yengenaoc kopocsic mi ande, kpac. Dedeseriyoacngo ine kopocsicac siriha edzacnuu negenghommeduae. Ge hensongo mi ambesena.

(Makekeng 20:17; Dedeseri 5:21)

Dedeseriyoacngo ifi mi debacfni hensongoac siriha naric mi negenghomebai. ⁸ Nga kopocsic ye dedeseriyoacfusing ine singa meficgema hensongofaka hania hania herena manau miacande. Amma dedeseriyoac mi febacfu, kopocsic ye homemea ambac. ⁹ Ni warac dedeseriyoara kpac kecbare dedeseriyoacngo hau negenai. Negemba imohai ine kopocsicngko kekehagoc amma ua meu ¹⁰ homeai. Imohai yofi henai, dedeseriyoacngo kekec meficgeudeac faifafa fede, imocngonoc homec meficgenenec. ¹¹ Kopocsicngko dedeseriyoacfu singa meficgema ikocfu wangecnuma kpebucnuec. ¹² Imocac yofi fede, dedeseriyoac imoc yengenaoc kpetiac nga nonoyoac ifingoc kpetiac nga dindingac amma gombunga.

¹³ Wiac gombunga, imocngko homecfu mi fainuec, kpac. Kopocsicac hania fingectegerudeac kopocsicngko ine homecfu fainuec. Nga kopocsicngko wiac gombunga mema imocngko nearu homec meficgeec. Ifi anu dedeseriyoacngo kopocsic heficeu kopocsic ye wiac mangana yombong, imoc fingectegerec.

¹⁴ Dedeseriyoac imoc Asuarunac, imoc negendimbe. Nga ni ine uba eseanagoc kecba kopocsicngko wanac menuu, kopocsicac bageu kecduae. ¹⁵ Nga faka nga angammeme angkecduae, imoc dafiac angkecduae, imoc mi negentegedduae. Ni wiac mong ambadeac negensianduae, imoc mi angkecduae. Nga faka ubanango waanduae, imoc ine angkecduae. ¹⁶ Amma faka goa songona mi angande, imoc mekecduaeu imocngko yofi deseride, dedeseriyoac imoc gombunga. ¹⁷ Ifi anu neannaoc faka imoc mi angkecduae, kpac. Kopocsic neac here manau fede, imocngko faka imoc angkecde. ¹⁸ Neac hereu wiac gombunga mong mi fede, ifi negenduae, imoc uba eseaac deduae. Imoc yofi, ni faka gombunga ambadeac negengkecma ine faka nga angammeme gombunga ambadeac obohoanduae. ¹⁹ Fora, angammeme gombunga ambesonga negenganduae, imoc mi angkecduae. Nga faka mangana wabadeac negenganduae, imoc ine angkecduae. ²⁰ Ni faka goa mi ambadeac anengkecde, imoc ambadeu ine neannaoc faka imoc mi anduae, kpac. Kopocsic herena manau fede, imocngko ine faka imoc heficeu anganduae.

²¹ Faka gombunga ambesonga negembare faka manganango ine herenaunac bic erema kekecna garenggeande, imoc meficeandue. ²² Amma ubaonganau Anutuac dedeseriyoac ubangerecgoc hoanggekecbare ²³ songo monggac singyoacngo ine sebinau fingeru henganduae. Nga imocngo negen negennau dedeseri fede, imocgoc ewema kecdape. Ewekecma kopocsicac singyoacngo sebina witicfu fama sebinau uaya mekecde.

²⁴ Ni ngic makpekpea ubahodunggoc kecma sebinagoc homecac bageau kecbare merang imohacnac mesinuude? ²⁵ Anutuac dangge deduae, Yesu Kristo Kebunina yeng mesinuude. Mesinuu neanna negen negennango Anutuac dedeseriyoacac bageau kecma wanac ua mekecduae nga ubana eseango ine kopocsicac singyoac kingang kpemima kecduae.

8

¹ Nga ngicngac Yesu Kristogoc kpeketahemu kecdae, yeni yoacac arennu mi makpegecde. ² Ge Yesu Kristogoc kpeketahemu kecna Kekec Asuac* dedeseriyoacngo kopocsic nga homecac singyoacac witicfunac yungecguec. ³ Uba esea ye dedeseriyoac kuha memau dedeseriyoacngo wiac obohou Anutungo ua imoc yofi meec. Ye Medacyombonga sueu nenang siric mema bangecfu maec. Mau Anutungo yeac sebiu kopocsicnina desima meickeu kpac anec. ⁴ Anu nenang uba eseaac sinnu kengkeng imoc wama Tiri Asugoc kpeketahemu kengkecdimbe. Kengkecma dedeseriyoacac faka dindingac kekecninau fingectegerude.

⁵ Ngicngac uba eseaac songo nga negen negeng modacanda, yeni negen negengngina uba eseaac arennu faiandae. Nga ngicngac Asuac songo nga negen negeng modacanda, yeni negen negengngina Asuac arennu faiandae. ⁶ Anu uba eseaac negen negeng imoc homehagoc nga Asuac negen negeng imoc kekehagoc amma ruaeagoc. ⁷ Uba eseaac negen negengngina Anutu ngaba ammikecde amma Anutuac dedeseriyoac mi tofohoande. Imoc dedeseriyoacac bageau kefudeac obohoude. ⁸ Nga ngicngac uba eseaac songo nga negen negeng modackedae, yeni Anutuac ubasongo meficgegecdeac singa obohokecdae.

⁹ Anu Anutuac Asungo ngeneac ubahereu kecdeu ngeni Asuac arennu kecgecde, uba eseaac arennu kpac. Nga mong ye Kristoac Asu mi mekecde, ye ine Kristoac areng kpac. ¹⁰ Nga Kristongo ngeneac ubahereu kefudeu sebingina imoc kopocsicnginaac amma homeec. Nga ongaasunginango ine dindingac kekecac amma kekehagoc anec. ¹¹ Anutu ye Asuyango Yesu homecfunac megboriec. Amma Asu imocngo ubaherenginai kecdeu yeng sebingina homecac bageau kecde, imoc ifingoc Asuyango megboriude.

¹² Negen negensinggoc tosofocna, negenggec, nenang turunninagoc kecdimbe nga imoc ine uba eseaac negemma kpac. Asungo bic megborinunuec, imocac amma uba eseaac arennu kecnideac turunga mong mi fenemmede. ¹³ Ngeni uba eseaac songo nga negen negeng modacma kecgecdeu homeac areng anggecde. Nga Asuac kucfu uba eseaac angammeme kpebucgegecdeu kechereema kecbesandae. ¹⁴ Anutuac Asungo ngicngacareng wangcyunukecde, yeni sassawango Anutuac medacfora. ¹⁵ Asu mongngo wanac menunu monggoc kengecgoc kecnide, asu ifia mi nemmec, kpac. Nenang asu siriha mong mema Anutuac medacfora aning. Nga Asu imocngo meficnunu yeac yofi kpacma dekecdimbe, "Manna, Manna." ¹⁶ Nenang Anutuac nambaracfora kecdimbe, yoac imocnoc Anutuac Asu yengenaoc hepuc amma ongaasuninau faiu dekecdimbe. ¹⁷ Nga yeac nambaracfora kecdimbeu yeac maridzoming memeareng ifingoc amma Kristogoc areng mocgu kecma maridzoming menide. Neni nenhafoc kuc nga kibikperagininagoc annideac yegoc ifingoc kpendzeng kpeni Anutungo fora nemmeude.

¹⁸ Imoc yofi negensidue, kuc kibikperagiagoc ngadeu nenannu fingectegerude, imoc wiac engena yombong nga yofinenggac ebic fingecnemmekecde, imoc wiac

* ^{8:2:} Kekec Asu imoc Tiri Asuac dede.

mamea. ¹⁹ Anutungo deu wiac fingeclarec imoc sasawango Anutuac medacfora didiu fingegecdeac mamangkima yeneac tomai kecdae.

²⁰ Nga Anutungo wiac deu fingeclarec, imoc ye negemmanu dzanggeande. Yeng wiac deu fingeclarec, imoc yengenaoc dzanggedarudeac mi negensiec, kpac. Anutu yengenaoc ifi faiec. ²¹⁻²² Amma imocac yofi negendimbe, Anutungo deu wiac sasawa fingeclarec, ihacnacngoc erekecma yaguc kecdimbe. Nga yeneng ifingoc wedzec horarac amma gadze yiniu homema hoaeandae, imocac witic hesima Anutuac nambaracfura yeneac amabangefu kenggecdeac ayemmeude. Amabangec imoc witha kpac nga imoc kuc nga kibikperagiagoc.

²³ Nga imocsac kpac. Anutungo hanahema Tiri Asu nemmeec. Ifi nemmeu nenang ifingoc sebininagoc bangec yomoc wama medacfora ac tatacfu bic ennideac herekiki anemmeu nasoyaac tomai kecdimbe. ²⁴ Amma nenang wiac foraya fingerudeac negenserima tomai kecma komoc kpenide. Mong ye foraya bic henu imoc fingerudeac negenserima kecande, faka siriha ifia mi feder, kpac. ²⁵ Nga wiac mi hengena imoc mebesandimbe, ifi negensinggema kecdimbeu modzotitia kpac mamangkima tomai kecnide.

²⁶ Ifi kecmina Asungo kucmamaninaac amma hama maficnunu ifi me ifi numuni ngereeude, imoc mi negentegecandimbeac amma yeng agennina tima yoara kpac hereudumengau numuu Anutuaru engande. ²⁷ Enu ngicherenina hengkecde, yeng Tiri Asuac negen negeng ifingoc negenude. Asu ye Anutuac negen negeng modacma kpetiac habu nenanggac amma nunumua faikecde.

²⁸ Anu yofi negendimbe, Anutungo arenga faima ngicngac negengyunuma kpacyunu yeni yeac arengfora kecdae. Ngicngac heregoc yeac songo negengandae, yeni negengyunuma kekecnginau wiac sasawa dindingac arenggema maficyunu ngereeyombonggeude. ²⁹ Imoc yofiac, Anutungo ngicngac bic negengyunuec, yeni meisngyunuu yadiseri amma yengena Medaha isoc anggecdeac desiyunuec. Medahango munafora homac yeneac waracdacngina anudeac ifi arenggeec. ³⁰ Arenggema ngicngac warac bic meisngyunuec, yeni ifingoc kpacyunu dindingac deyemmeeec. Dindingac deyemmeeac kuc kibikperagiagoc ifingoc yemmeec.

³¹ Imocac amma Anutungo nanggenunuma nenanggoc kecmanu mongngo sinnina hedzickema naric mi memanunuude. ³² Anutungo Medacyombonga mi segerema sasawa nenanggac amma ngaba yeneac mariu waec. Nga nenanggac waecac amma ye ifingoc ubangerehaac torokpema Medahagoc wiac sasawa nemmeude. ³³ Mongngo Anutuac meisngfora yoacf u faiyunuudeu, Anutungo yeneac yoac ifingoc deu firang anggecde. ³⁴ Yesu Kristo yennoc homeec. Homeu Anutungo ifingoc ye homecfunac megboriu yarec. Yacma Anutuaru enec, foiau tacma nenanggac amma numukecde. Imocac mongngo meisngfora yoacf u kopocsicnina goc dema negende, ye osiude. ³⁵ Amma Kristongo heresongogoc hoannunukecdeac, kekec imohacnac wiac mongngo nenang mederenunuudeacsoc mi ande. Kpendzeng me ubaebic me nunukporac anemmegecde me herehomehome me senggang kekec me manganebeso annide me dzikacbeang, imoc sasawango Kristoac songounac naric mi meicnunuude. ³⁶ Yoac yomoc bic oho ohoya fede,

"Geac areng andimbeac amma yeni asoacnac kemma marai homecfu fainunukecde."

Yeneng nenenggec neni rama kpebucyunuandae, yeni isoc andimbe." (*Mitiyegec 44:22*)

³⁷ Imoc sasawa fingeclarec Kristongo heresongogoc bic hoannunuu nenang yegoc kecma feracyunu yombonggema firang amma kecdimbe. ³⁸⁻³⁹ Nga Anutungo heresongogoc hoannunuu nenang Kebunina Yesu Kristogoc kpeketahemma kecmina wiac mongngo naric mi mederenunuude, imoc negenseriyombonggeduae. Imoc homec me kekec, angero goa me ngictau goa, wiac goa yaguc fedae me wiac ngade fingegecde, wiac goa kucnginagoc wiacnac me wiac goa kucnginagoc emuhacnac nga wiac goa Anutungo deu fingegec, yeni sasawango yeac songounac naric mi meicnunugecde.

9

¹ Ni Kristogoc kpeketahemu yoac fora deduae, ikoc mi anduae. Nga Tiri Asungo here negen negenna midiu imocnggo hepucna anu yofi deduae. ² Ni nasosoc arengfocna yeneac amma ubahodungtoa nga ubaebigcog kecduae. ³ Nga neng yeneac do mema sowecac bageau kecma Kristoaru agac kecbadeac negenduae. Neni kisicnina mocgu. ⁴ Nga yeni Israe areng, yeni manggacac medacyombong kuc nga kibikperaginginagoc kecdae. Yeni dzadzahac nga dedeseriyoacgoc kecma Anutuac womong garenggekecdae. Amma Anutungo wiac yemmeudeac deseriyemmeec, imoc yenearu fedengoc. ⁵ Nga yeni kisicbangecfocngina negendae, yeneac fingecsaheunac Kristongo ngic siric amma fingerec. Ye Anutunoc, wiac sasawaac engena. Yearu dedengerec nga dedengerec fekengkebeso, imoc fora.

⁶ Anutu yoara kuha made, ngeni ifi mi negembisia. Imoc yofi, Israengicngac Israe fingecsaheunac, yenearunac goa Israe yombong mi andae. ⁷ Imocac siriha yofi, Abrahanggac bangecfora goa yeni Sara kimearunac. Imocac yofi oho ohoya fede, “Isakaac fingecsaheungo geac bangecfocga yombong anggecede.” *(Fingec fingec 21:12)*

⁸ Sebiac arennu fingecdae, yeni Anutuac nambaracfura, ifi mi dede. Dedzegeac bageau fingecandae, yeni Abrahanggac bangecfora yombong andae. ⁹ Ye Abrahang nga Sara yerigoc yoac yofi dedzege anec,

“Ni naso deaimoc imohai habare Sarango medac mong mema kefude.” *(Fingec fingec 18:10,14)*

Songea arenmu meisinnunuude

¹⁰ Nga imocsac kpac, Bangecnina Isaka ye Rebekagoc feu yeng fora tombosonga kpenangyuruec. ¹¹⁻¹² Nga medac yeri mi fingecma kecmaecngoc yereac angammemengira gombunga me mangana mong mi femanu Anutungo yereac Rebeka yofi bic edeec, “Darango muneaac kingang kpeude.” *(Fingec fingec 25:23)*

Anutungo mong uayaac amma mi meisringgeude, ye songoya nga negen negengaac amma ngicngac kpacyunuande, imoc seria nanudeac ye ifi anec. ¹³ Imocac yofi oho ohoya fede,

“Ni Yakobo heresongogoc hoanggema Esau ine ubango ukuai.” *(Marekai 1:2-3)*

¹⁴ Ifiac amma yofi denide. Anutungo sing mi segeude. Ye yoara gombunga angande.

¹⁵ Yeng Mose yofi edeec,

“Ni monggac wosoefac ammibadeac negemma ye wosoefac ammibade. Nga monggac ubamangang ammibeso negenduae, ye ubamangang ammibade.” *(Makekeng 33:19)*

¹⁶ Ifi anu Anutungo yengena wosoefahaac amma ngic meisringgeude nga ngic ye yengenaocngoc songo meficgeecac me uatoa meecac amma ifi mi fingerude. ¹⁷ Mitikibiu yoac oho ohoya fede, imocnggo Farao yofi edeec,

“Ni gearu kucna bangeha bangeha edzacyunubade nga kpacna dekperagigec kenu negendacecdeac amma ge ngictau faiguba genggecede.” *(Makekeng 9:16)*

¹⁸ Imoc yofi, Anutungo mong wosoefac ammibesonga negendeu, imoc ammiude. Amma monggac herea dzegebesonga negendeu, imoc dzegeude.

¹⁹ Ge yoacna imoc negemma yofi denade gedang, “Anutuac songo nga negen negeng kpeudeac sing mi fede. Nga sing kpekpe mi febac dede yeng ni kopocsicnagogc naric mi debac.” ²⁰ Bangecngic ge negenna, ge ngicsac, ifi dema Anutuac yoac turunga mi merembesena. Marikibi minginango wiac mong meu wiac maringo memea, imocnggo mingina naric mi kpesimiude,

“Ge nocac ni ifia menunec?” *(Yesaia 29:16; 45:9)*

²¹ Enangmemengic ye songeaac arenmu ua naric meude, ye gbaki mema imocnggo enang mong uaya engena meude nga enang mong uaya mamea naric meude.

²²⁻²³ Enang goa yeni kuc kperaginginagoc anggecdeac Anutungo warac wosocefac ayemmemengic mengereyunuec. Ngicngac yeni yeac kuc kibikperagiagoc henggecede, songoya ifi anec. Ye desi desiac fakaya ngicngac edzacyunuudeac nga yeni kuha

negenggecdeac enang goa yeni kpedzac kpedzameaac arennu bic faifaia nandae, yeneac amma modzotitia kpac nasoherec tomaingina kecande, ye songea naric modacma ifinoc anude. ²⁴ Imocac nenannoc kpacnunuec. Imoc Yuda arengsac kpac, ye bangec monnunac ngicngac momoc kpacyunuec. ²⁵ Ye profete Hoseaac kibiu ifingoc yofi dede, “Ngicngac areng mong warac neac ngicngac mi kecgec, yeni neac ngicngac, ifi kpacnyunubade. Nga ngac mong heresongogoc mi hoanggeai, ye neac songongac, yeac kpara ifi kpacbade.” *(Hosea 2:23)*

²⁶ Nga bangec monnunac ngicngac Anutungo yeneac yofi deec, “Ngeni neac ngicngac kpac.” Amma bangec imohaingoc yofi kpacyunugede, “Yeni Anutu kekehagoc yeac medacfora.” *(Hosea 1:10)*

²⁷ Yesaiango ine Israe yeneac negemma yofi kpacma dede, “Israe ngicngac yeni kpetengina kuneng, imoc kondunggac sangi isoc anudeu ni sifu yenerunac noboha efeanecsac onggongyunuba komoc kpegecde. ²⁸ KEBUNGO bangecfu ngicngac yoacngina bicbic isingga desiyunuma uaya mesiude.” *(Yesaia 10:22-23)*

²⁹ Nga Yesaiango kpefingyoac yofi bic deec, “KEBU Kuctoa Mingina, yeng bangecfocina noboha goa mi onggongyunuu komoc kpebau debac Sodong nga Gomora yeni isoc ambing.” *(Yesaia 1:9)*

³⁰ Ni yofi torokpema deduae, bangec monnunac ngicngac, yeneng dindingac kecgecdeac seseria mong mi mekecma kekec dindingac eng meficgegec. Yeni negensinggegec, imocac amma Anutungo dindingac kpacyunuec. ³¹ Nga Israe ngicngac yeni ine dedeseriyoacngo kekec dindingacfaiyunuudeac seseria mekecgegec. Mekecma dedeseriyoacfusing dindingac kekec mi meficgegec. ³² Yeni faka nga angammemenginaac negensima negen negensing fora imoc ine wagec. Yeni hocfu kpondzong heima mayunuec. ³³ Imocac yofi oho ohoya fede, “Negendae, ni Sionnu hoc mong faiba imohai yeni kpondzong heigecde nga peperandziu tifainggema negemmang meficgegecde. Nga mongngo ye negensinggeudeu ye game kpekpeu mi enude.” *(Yesaia 8:14; 28:16)*

10

¹ Tosofocna, Anutungo arengfocna kopocsicac ebicfunac mesiyunuu komoc kpegecde, imocac heresonganango negengyombonggema ye numumianduae. ² Amma ni yeneac hepuc amma yofi deduae, yeni Anutuac kingang kpegecdeac ngombonggemema seseri angkecdae. Nga ye dafi kingang kpemibesonga, imocac negen negentegec ine mi feyemmede. ³ Amma yeni yenaocngoc sing dindingac meficgegecdeac arenggema uaya mekecdae. Nga Anutungo sing mong bic meficgema ngicngac dindingac deyemme-ande, sing imoc ine mi negendae. Ifi amma yeni Anutuarunac kekec dindingac fede, imocac bageau kecgecdeac waandae. ⁴ Kristongo dedeseriyoac hafoangoc modacdaru dedeseriyoacac ua wisic wisickea anec. Imocac amma ngicngac ye negensinggeandae, yeni sasawango dindingac kekec meficgegecde.

⁵ Mosengo dedeseriyoacac sing dindingac kekec imocac yofi ohoec fede, “Ngic mong ye dedeseriyoac modacdarude, yeng sing imohai kekehagoc amma kefude.” *(Sesememe 18:5)*

⁶ Nga Anutungo negen negensinninaac amma dindingac denemmeude, sing imocngu yofi dede, “Ge geanggaoc ubaheregango yofi mi kpesiemebesena, merang kurumennu enude?” *(Dedeseri 30:12)*

Imoc Kristo kurumennunac memaudeac negemma dede. ⁷ Me yofi, “Merang hofeu kemeude?” Imoc Kristo homecfunac meereudeac negende. Ifi mong mi negembisia.

⁸ Imocac geac yoac yofi dedea fede, “Anutuac yoac imoc hoanggau nga enacgau amma heregau fede.” *(Dedeseri 30:14)*

Nga negen negensinggac yoac imocnoc dekperagingemmekedimbe. ⁹ Imoc yofiac, ge enacbibicgango, Yesu ye Kebu, imoc dekperaginade nga Anutungo Yesu homecfunac megboriec, imoc negensinggenadeu Anutungo kopocsicgaac ebicfunac mesiguu komoc kpenade. ¹⁰ Nenang ubahereninango ye negensinggeni yeng dindingac denemmeude. Nga enacbibicninango ye dekperagini yeng kopocsicninaac ebicfunac mesinunuu komoc kpenide. ¹¹ Mitikibingo imocac yofi dede,

“Mongno ye negensinggeudeu, ye gamekpekpeu mi enude.” (Yesaia 28:16)

¹² Anu yudaareng nga grikareng siricngira mong mong mi ande. Kebu ye sasawa nenanggac Kebunina. Nga ngicngac yeac kpac kpacanda, yeni ubangerecgoc keneha hania hania naric yemmeude. ¹³ Nga

“Ngicngac yeneng KEBUAC kpac kpacgec Anutungo yeni sasawa kopocsicnginaac ebicfunac mesiyunuu komoc kpegecde.” (Yoele 2:32)

¹⁴⁻¹⁵ Nenang mong sueni yeng Anutuac yoac dekperagiyemmeude. Nga Anutuac yoac dekperagi negemma naric negensinggegecde. Negensinggema yeni Kebuac kpara kpacma komoc kpegecde. Imocac yofi oho ohoya fede,

“Ngic yeni siduc gombung mehakecgec ngicngac yeneng yeneac hani udumeng ubangerehagoc negenggecde.” (Yesaia 52:7)

¹⁶ Anu ngicngac yenearunac homacngo siduc gombung imoc ine mi tofogec. Yesaiango yofi dede,

“Kebu ge negenna, yoac dekperagiyemmeing, imoc yeni mi negensinggegec.” (Yesaia 53:1)

¹⁷ Nga Kristoac yoac dekperagiyemmeni yeni yoara negengandae. Amma yoac imoc negemma negensinggegecde.

¹⁸ Anu Israe yeni yoara kedzacnginango mi negenggec me? Ifi kpac, yeni bic negenggec. Yofi oho ohoya fede,

“Ubaudumengngina imoc bangecfu kengkecde. Yeni yoacnginango banectoa bangec yomocac noboc noboc wisic wisickeau kendarude.” (Mitiyegec 19:4)

¹⁹ Ifiac amma monggoc deba, Israe ngicngac yeni yoara ubaherenginango negentegecgec me? Mosengo Anutuac enac mema imocac yofi deec,

“Ni faka angemmeba ngeni ngicngac areng mong bangec mocguac areng mi andae, yeneac keracmangang anggecde. Nga areng mong negen negentegecngina kpac, ngeni yeneac herebu negenggecde.” (Dedeseri 32:21)

²⁰ Yesaiango kengeha kpac imocac torokpema bangeha bangeha ngicngac, yeneac yoac yofi deec,

“Ngicngac yeneng ni mi hofocnuma eng meficnugec. Nga neac dekpesia kpac kecgec, yenaru fingecyemmeai.” (Yesaia 65:1)

²¹ Amma Israe areng yeneac ine yofi deec,

“Ngicngac areng mong yoacna mi tofohoandae nga yoac kpekpe kecdae, yeneng hagecdeac asoacfuna kemma tofocnac marina sineyemmekeduae.” (Yesaia 65:2)

11

¹ Imocac amma yofi negemma kpesiduae, Anutungo ngicngacfora bic wayunuec me? Imoc kpac! Neannaoc Israengic Benyaminggac arenunac nga kisicna Abrahang.

² Anutungo ngicngacfora bic meisingyunuma mi wayunuec, kpac. Nga Eria ye hereebilha Anutuac kicfu dekperagima israengicngac yeneac yofi dema numuec, imoc mitikibiu oho ohoya fede, ³ “Kebu, yeni geac profetefocga yunuhomegec nga geac arataga kpembarakegec. Nga ni mocgungosac kecbare kekecna meickegecdeac negendae.” ⁴ Ye ifi numuu Anutungo ine turunga yofi meremmiec,

“Ni ngicfocna 7 tauseng bic segereyunuba kecdae. Nga yeni nemu Baari yearu fafoc mong mi heimigec.” Ngeni imoc negembisia. (1 Ngictau 19:10,14,18)

⁵ Ifi isocngoc Anutungo yofinenggac yenearunac tosea meisingyunuma wosoefaha ayemmeu yengena habubisic mong amma kecdae. ⁶ Yeng meisingyunuma danggunuha yemmeec, imoc yenang angammemengina gombungaac amma mi meisingyunuec, kpac. Ye angammemengina gombungaac amma meisingyunubac dede wosoefaha imoc wosoefac fora mi ambac.

⁷ Imocac amma yofi feder, Israe yeni wiac megecdeac uatoa mekecma imocac fora mong mi maficgegecde. Nga Anutungo ngicngac yeneac botucfunac meisingyunuec, yeneng ine wiac imoc maficgegecde. Anu Israe noboha yeni ubaseri nga ubafong amma kecdae.

⁸ Imoc yeneac yoac mong yofi oho ohoya feder,
“Anutungo faka meu yeni ongaasungina dzingfong anec. Amma kicnginango wiac mong mi hemma kedzacnginango wiac mong mi negenggoc. Yeni ifia keceregecnggo yaguc kecdaengoc.” (Dedeseri 29:4; Yesaia 29:10)

⁹ Imocac Dawidingo yofi deec,
“Yakaneneac fakangina angandae, imocngo subabanggeng nga ufc isoc meyunuu kopocsicninaac turunga ambeso. ¹⁰ Wiac mong mi henggecdeac yeni kicngina pisickebeso. Ge nasoya kpac ngadehokuc meyununa kecbisia.” (Mitiyegec 69:22-23)

¹¹ Ni yofi torokpema kpesiba, Israe yeni mayunuudeac kpondzong heigec me, imoc kpac. Yeni Anutuac yoac ferahegecac amma Anutungo bangec monnunac ngicngac, yeni kopocsicac ebicfunac mesiyunu komoc kpegecde. Israe yeneng yenemma keracmangang anggecdeac ifi anec. ¹² Nga Israe yeni Anutuac yoac ferahegec, faka imocngco Anutuac wosoefactoa heficgeu bangeha bangeha yenearu kendarec. Amma Israe yeni Anutuac sinnu makpegec, imocngco bangec monnunac ngicngac, yeni wiac gombunga homac yombong maficgeyemmeec. Kecma, Israe ngicngac sasawango negensinggegecde, naso imohai wiac engena yombong fingerude.

¹³⁻¹⁴ Anu bangec monnunac ngicngac kecdae, ngeneac yofi deduae, neanna arengfocna yeneng ngeneac keracmangang anggecde. Amma yeni sing imohai ngeni isoc kopocsicac dzuac dzuac mema komoc kpegecde. Ifi fingerudeac negemma neng ngeneac aposoro anai. Amma ua mekecduae imocac negemba engena yombong ande.

¹⁵ Anutungo Israe ngadehema waec, imocac bangec monnunac ngicngac ngeni Anutugoc uba mocgu amma ruae maficgegec. Ifi fedeu Anutungo monggoc Israe hoangyunuude, imocngco heficgeu homemea yeneng gborima kekec maficgegecde.

¹⁶ Ngeni yaka buma heima waraima Anutu migece deu yaka sasawa imoc kpetiac anude.* Amma ic godea kpetiac andeu fawa sasawa ifingoc kpetiac anude.

¹⁷ Anutungo oriwa fora imocac fawa goa metackema meickema, imocac tatahau, ge kate oriwa fawa yombong, kapia mong kperecgeguma oriwa forau torokpeguec. Nga geng fawa fora yenigoc kecnec isoc yofi anude, ge ic godeagoc torokpema kecma kerecgia ihacnac taima kecnade. ¹⁸ Ifi andeac, ge sebiengeng amma fawa noboha yeneac yofi mi negembesena, “Neng feracyunudae.” Ge ine sebiengeng annadeu yofi negembesena, ge ic fawasac, geng ic godea mi nanggenec nga ic godeango ine ge nanggeguma kecde.

¹⁹ Ifi deba geng yofi denade gedang, “Yeni ninoc icfu torokpenugecdeac fawa goa metackegec.” ²⁰ Denec isoc, yeni mi negensinggegecac amma metacyunuec. Nga geng negensinggenecac amma seria nangkecneengoc. Imocac negen negenggau sebiengenga kpac amma kengecgoc kecbesena. ²¹ Anutungo yengena fawa mi onggongyunuecfu ge ifingoc naric mi onggongguude.

²² Ge Anutuac faka yumea nga demetinga seria feder, momoc hentegecbesena. Ye ngic mayunuec, yeni demetinga seria ayemmeec nga ge ine faka yumeau anggenec. Ge

* ^{11:16:} Ye ic sogonggac dede. Imocac yoac Bangec kisu 15:17-21. Yaka buma heima Anutuac sese faibesonga imocac yoac yomohai feder: Makekeng 23:19; 34:22; Sesememe 2:12,14; 23:10,17,20; Bangec kisu 18:12; 28:26 Dedeseriyoac 26:2,10

yeac faka yumeaac bageau mi kecnadeu ge ifingoc herecgeguude. ²³ Nga fawa tosea negen negensingngina kpac, yeneng meremma negen negensinggoc anggecdeu ye icfu monggoc torokpeyunuude. Nga Anutungo icfu torokpeyunuudeac naric mi obohoude. ²⁴ Ge kateac oriwaac fawa kapia, imoc herecgeguma oriwa ic fora mong geac areng mi ande, imocgoc torokpegudeac mi ebiriudeu, oriwa ic fora yengena fawa monggoc toro torokpe ua imocingo wiac efea yombong anude.†

²⁵ Tosofocna, ngeni ngenanggac negenggoc engena ambac amma yoac mong yomoc sufu sufuya fede, imoc negenggecdeac negenduae. Imoc yofi, Israe noboha yeneac uba negen negengngina imoc fonggoma femanungoc bangec monnunac ngicngac, ngeni erema hakecma kpetenginaac sirihau hafoangoc ambeso. Kpetengina hafoangoc anuguc Israe areng tosea ifingoc erema torokpegecde. ²⁶ Ifi anu Kebungo Israe hafoangoc kopocsicac ebicfunac mesiyunu komoc kpegecde. Imocac yoac yofi oho ohoya fede, “Memengerec ngic ye Sionnunac hau Anutu ngadeheandae, yeneac faka mangana imoc sasawa Yakoboac arenunac meickeude.” ²⁷ “Nga kopocsicngina meickebade, imocngo naso imohai dzadzahacngina feude.” (*Yesaia 59:20-21; 27:9; Yeremia 31:33,34*)

²⁸ Siduc gombung hau Israe yeni imoc ngadehema Anutugoc ngaba angkecma ngeneac sing meefaijeg. Anutungo ine Abrahanggac bangecfora meisinyunuma kisicfocnginaac amma hoangyunukecde. ²⁹ Anutungo ngicngac kpacyunu wosoefacfu kuc yemmemma negen negenga ngade meremma monggoc wangecyunubac, faka imoc mi femide, kpac. ³⁰ Amma bangec monnunac ngicngac, ngeni warac Anutuac yoac kpekpe kecgec nga yofinenggac Israe yeneng yeac yoac kpekpe kecgecac amma Anutuac wosoefac ngenearu fingerude. ³¹ Yeni hanahema Anutuac yoac kpegecac ngeni Anutuac wosoefac megec. Nga Anutungo yofi faiec, ngeni wosoefac imoc megecguc yeni imoc ifingoc megecde.

³² Anutungo ngade ngicngac sasawa wosoefac ayemmeude. Ye imocac hanahema ngicngac yoackpekpenginaac amma witicfu faiyunudarec.

³³ O, Anutuac semeng dzohongagoc fede nga negen negenga imoc kuneng nga kpeukeme kemea. Anu yeac desi desiac hania nga fakaya amma angammemea, imoc negen negennina feraheude. ³⁴ Imoc yofiac,

yeac negen negennu wiac fede, imoc ngic mongngo naric mi negenude. Nga mongngo ye negen negeng naric mi maficgemiude. (*Yesaia 40:13*)

³⁵ Amma ngic mongngo hanahema Anutu wiac mong miecfu ye imocac turunga kpoumiude, imoc kpac yombong. (*Hiobe 41:11*)

³⁶ Anutu ye yengenaoc wiac sasawa maficgedarec. Imoc yengena kucfu fedacde amma yengena songo fingerudeac faifaia. Yearu dedengerec nga dedengerec fekengkecbeso, imoc fora.

12

¹ Ifi anu negen negensinggoc tosofocna, Anutungo wosoefac kuneng angemmeeac dederecge angemmema yofi deduae. Ngeni Anutuac kicfu asuu ua fora mema sebingina desigec imocingo Anutuac sese kekehagoc nga kpetiac anu yeng negenu ngereeubo.

² Ngeni bangectoa bangec yomocac ngicngac yenigoc angamemengina siriha mocgu mi ambeso. Anutungo uba negen negengngina heigborinemmu ngeni Anutuac songo negengising anggec yeng wiac kpacgoc nga gombunga yombong anu imoc negenu ngereeude, imocac siriha naric negentegecde.

³ Anutungo wosoefac anenu ni imocac sirihaus ngeni sasawa yoac yofi edengunuduae. Ge geanggaac siricfu isingemema feracmarabaha kpac Anutungo negen negensinggac kpetea genec, imocac sirihaus modacbesena.

⁴ Sebi ye hafoangoc mocgu ande, imocac manau oruc kickedzac nga hanimarinina fede. Amma yeni uangina mocgusac mi meandae, kpac. ⁵ Ifi isocngoc nenang homac

† 11:24: Ic nenea gbomegoc didimang yeneng sing ifia metorokpeandae.

amma Kristoac manau sebi mocgu andacdimbe nga nenii tembuc tembuc sasawa yeneac tosea.

⁶ Anutungo danggunuha nemmeec, imocac sirihau wosoefahaac kuc amma ua sirihai mong mong nemmeec, imoc fenemmede. Anutungo wosoefahaac amma mong profeteyoac deudeac miu, ye negen negensing femide, imocac sirihau modacma debeso.

⁷ Nga Anutungo ngic me ngac mong ogofora maficyunuudeac kuc nga ua miu yeng memefic uanoc mebeso. Nga kpoukpou uaac kuc femide, yeng imocac sirihau ngicngac kpouyemmebeso. ⁸ Mong ye ogofora negen negengngina midima demeseri ayemmeudeac kuc femide, ye uaya imocac sirihau mekecbeso. Mong ye ubangerecak ngicngac wiac hania hania eng yemmeande, ye wiac imoc wosoefacfu yemmebeso. Nga enara kecma ua imoc meande, ye seseri amma uaya mebeso. Nga ubamangang negemma memeficua meande, ye ubangerecfa nga songogoc ngicngac ogofora maficyunubeso.

⁹ Ngeni heresongogoc hoangemekecdae, imocngo faka fora ambeso. Ngeni faka nga angammeme mangana ngadehema faka gombunga serima angkecbisia. ¹⁰ Nga ngicngac negen negensinggoc kecdae, ngeni botucnginau heresongogoc hoangemema ewehei-hei angemegecdeac seserigoc feracemebisia. ¹¹ Amma ngeni ua serima megecdeac modzotitia kpac kecma herengina wagec Asungo midiu ngeni Kebuac wanac areng kecma yeac ua mekecbisia. ¹² Nga Anutungo wiac fingecngemmeudeac deec, imoc fingerude, ngeni ifi negemma sogaibisia. Nga kpendzenggac manau ngisima kecma mamangkima numukecbisia. ¹³ Amma kpetiac areng yeneng wiac moggac obohogec ngeni ebicngina negemma wiac yemmebisia. Nga ama monnunac goa hagec ngeni ama heiyemmegecdeac angemmebeso.

¹⁴ Amma ngicngac ngunukporac angemmegec ngeni yeni kenecyunubisia! Ngeni kenecyunuma mong mi sowecyunubisia. ¹⁵ Ngicngac sogaima kecanda, ngeni yenigoc sogaibisia. Nga ngicngac kiacanda, ngeni yenigoc kiacbisia.

¹⁶ Ngeni negengemema uba mocgu ambisia. Nga ngeni mamea yenigoc tacma ua mamea naric mebisia, tatac engenaac mi angemmebeso. Ngeni tembuc tembuc ngenang negengtoanginagoc dema ifi mi negengemebisia. ¹⁷ Nga ngicngac memanganungugec ngeni yeneac turunga mangana mi merengyemmebisia. Ngeni ngicngac sasawa yeneac botucfu faka gombunga ayemmegecdeac arenggema kecbisia. ¹⁸ Ngeni raeaegoc kecgecdeac kuc fengemmede, imocac sirihau ngicngac sasawa yenigoc raeaec sinnu kecbisia. ¹⁹ Songo tosofocna, faka mangana angemmegec, imocac turung mi kpouyemmebisia. Anutungo turungngina kpouyemmeudeac titing faimagec yengenaoc manganaac turung kpoukpou ua imoc mebeso. Imocac yofi oho ohoya fede,

“Manganaac turung kpoukpou, imoc neac ua, Kebungo ifi dede.” *(Dedeseri 32:35)*

²⁰ Ngeni yofi ambisia,

“Ngabaga hereaac homeu geng yaka mibesena nga dokuac ammiu geng doku gumebesena. Ge ifi annadeu gerecwewengaima oruhau kpeturanggena tarude.” *(Yoac negengagoc 25:21-22)*

²¹ Ge manganango memaguudeac titing mi faimibesena, ge ine faka gombungango mangana memama firang ambesena.

13

¹ Gawamangfocnina kunengfocnina kecdae, nenang yeneac bageu kecma enacngina tofohoma kecbisina. Gawamang sasawa imoc Anutu yengenaoc deu fingecgec yea kpac mong mi fingerec. ² Imocac mong ye gawamangfocnina yeneac yoac kpeude, ye Anutungo areng faiec, imoc kpeude. Amma ifi anganda, yeni yenaoc angammemenginaac turunga taima ebic maficgegecde. ³ Nga kia gawamanggo ngicngac faka gombunga angkecdae, yeni kengec mi maficgeyemmegecde, kpac. Ngicngac faka mangana angkecdae, yeni ine kengec maficgeyemmegecde. Nga ge kia gawamang yeneac kengeha kpac kecnadeac negennec isoc faka gombunga angkecna kia gawamanggo dengereguude.

⁴ Geng gombunga kecnadeac amma yeni Anutuac kingangngic kecdae. Amma yeni foracngoc wasaibeang kucmamayagoc mi mekecdaeac faka nga angammeme mangana maficgenadeu ine kengecubeso. Yeni Anutuac kingang ngicfora kecma manganameme yeneac turunga kpouyemmegecde. ⁵ Nga turung kpoukpou ua, imocacsac kpac, ngeni negeng madzac ambauac ifingoc enacngina tofobobis. ⁶ Gawamangfocnina yeni wisic wisickea kpac Anutuac bageu ua imocnoc mekecdae. Nga ngeni imocacnoc takesi faiandae. ⁷ Ngeni takesimeme yeni takesi yemmebisia nga finacac takesi degec imoc yemmebisia. Amma kunengfocnina yeneac kengecngunuu enarafocnina eweheihei ayemmebisia. Nga wiac ayemmebesonga dedea fede, imoc sasawa andacbisia!

⁸ Anu ngeni turungngina mong fedeu imoc bic kpoubisia. Ngeni heregoc songo negengemema kecbisia, faka imocac turung ine wisic wisickea kpac fekefude. Mong ye ngic ogea heresongogoc hoanggeude, yeng dedeseriyoac hafoangoc modarude.

⁹ Dedeseriyoac goa yofi fede,

“Ge kaisero mi ambesena, ngicngac mi yunuhomebesena, hamangec mi mebesena, hensongo mi ambesena.” (Makekeng 20:13-15,17; Dedeseri 5:17-19,21)

Dedeseriyoac imoc nga dedeseriyoac goa tosea, imoc yoac mocguac manau kpeturanggedacma yofi fede,

“Ge geangga anggengande, siriha imocngoc gegoc wegena kecde, ye heresongogoc hoanggebesena.” (Sesememe 19:18)

¹⁰ Nga mong ye ngicngac heresongogoc hoangyunuande, yeng ogofora ifingoc heresongogoc hoangyunuude. Ye naric mi memanganeyunuude. Ifi anu heresongogoc kekecngo dedeseriyoac hafoangoc modarude.

¹¹ Ngeni faka imoc mekecma naso yomocac negemma efaima kecbisia! Imoc yofiac, neni hanahema Kebu negensinggeing, imohai negenni naso herea isoc feec. Yofinenggac ine komoc kpenide imocac naso wegenedeac ngeni gauunac gborima yacisia. ¹² Tofocnac bic kpac anudeac ande nga ama wereckenudeac ande, imocac nenang kundunggac angammeme wadacma kperagiaac tebemareku heima mekecbisina.

¹³ Amma wiac wenackperagi angana ande, imoc modacbisina. Nenang doku seria nene nga kaisero amma sicsauc faka hania hania, imoc mi angkecbisina. Amma ewekpekpe nga keracmanganggoc kekec wadacbisina. ¹⁴ Uba eseaac songongo ngenearu yacbacac ngeni sebinginaac songo mi nanggebisia. Ngeni Kebunina Yesu Kristo ngakpi isoc heima kecbisia.

14

¹ Ngic mong ye negen negensinggoc kecma kucmama kefu ngeneng yengena negen negensingaa deendema mi ambisia, kpac. Ngeni ye botucnginau heitaima hoanggebisia. ² Goa yeni Kebu negensinggema yaka sasawa naric nedacgecde. Nga goa ine Kebu negensinggema kecma kucmama amma semeng uaac yakasac negecede. ³ Ngic mong ye wiac sasawa neande, yeng ogea yaka goa segea fede, ye mi ngadehebeso. Amma mong ye yaka goa segea fede, yeng ogea wiac sasawa neande, imoc kopocsihagoc mi debeso. Anutungo ye bic hoanggeec. ⁴ Geng ngic monggac kingangngic angammemea isingga yekopocsihagoc denadeac kuc mi genggena, kpac. Ye angammemeango deu maude me nanude imoc kebuyango ine naric deude. Amma kingangngic ye nanudengoc, Kebungo imocac kuc miudeac mi obohode.

⁵ Ngic mong ye uameme sasawa yeneearunac monggac negenu engena angkecde. Nga monggo ine uameme sasawa imocac negenu siriha mocgungoc angkecde. Ngic tembus tembus ye yengena ubea ireckedaru damocngo naric ande, imoc negenserima kecbeso.

⁶ Ngic uameme monggac negenu engena angande, ye Kebu negensima ifi anude. Nga yaka sasawa neande, yeng Kebuac negensima Anutu ubangerec edema yaka neude. Nga ngic yakasege angande, ye ifingoc Kebuac negensima Anutu ubangerec edeudengoc.

⁷ Nenanggarunac mongngo yengenaac amma kecde, imoc mi fede. Nga monggo yengenaac amma homeude, imoc mong mi fede. ⁸ Nenang gbori kecnideu Kebuac amma

kecnide nga homenideu Kebuac amma homenide. Homenide me gbori kecnideu Kebu yengena arenncoc kecnide. ⁹ Kristo ye gbori kecdimbe nga homegec nenanggac Kebu, imocac amma ye homema monggoc gborima kekec meec.

¹⁰ Ge tosogaac angammeme isinggema desinade me tosoga ngadehema memanade, imoc naric mi ande. Nocac nenang sasawa Anutuac yoacfу nambesandimbe. ¹¹ Mitikibiu yoac yofi bic oho ohoya fede,

“Kebungo yofi dede, ‘Ni kekec mingina. Imocac ngicngac sasawa yeni neac kicfufafoc heinenggecde amma nedzarang sasawango Anutu kecde, imoc dekperagigecde.’” ^(Yesia 45:23)

¹² Ifi anu nenang sasawa tembus tembuscina namma haifakanina bangecfu aning, imocac siduc Anutu dekperagimibesandimbe.

¹³ Nga nenang tosofocnina yeneac faka monggoc isinggema mi demanganeyunubisina, kpac. Ngeni ine yofi isinggehomebisia, tosofocnina mayunuudeac sinnu ic me hoc me botac mong mi faibisina. ¹⁴ Anu yaka me wiac mong imoc yengena seuha mi ande, imoc Kebu Yesugoc kpeketahemma kecma ireckema negenseriduae. Nga mongngo ine wiac monggac dema imoc seuhagoc, ifi negensiudeu, wiac imoc yearu seuhagoc anude. ¹⁵ Nga geng yaka mong nena negen negensinggoc tosoga imocac ubaebic meficgeudeu ye heresongogoc mi hoanggema kecne. Kristongo ifingoc tosogaac amma homeec, ye yaka nenegaac amma makpema manganebacac wabesena. ¹⁶ Imocac amma ngeni wiacngina seuha kpac mekecdae, imoc gombunga garenggema kecgecdeu, goa yeneng wiacngina gombunga fede, imocac deendema mi ammigecde. ¹⁷ Imoc yofiac, nenedoku imocngoo Anutuac eucererenggac fora mi ande. Tiri Asungo faka dindingac nga ruae amma sogac sogai nemmeande, imocngoo ine Anutuac eucererenggac fora ande.

¹⁸ Anu mong ye sing imoc modacma Kristoac kingang kpekecde, ye Anutungo negemmiu ngereeude nga ngicngac yeneng ifingoc ye hennegeng ammigec naric anude.

¹⁹ Imocac nenang ruaefakau meficemema angammemengina nanggeemema emekpesi angemebisina. ²⁰ Imocac ge yakagaac amma Anutuac ua mi hendzicna. Yaka sasawa imoc kongaha, imoc fora. Amma yaka nene fakagango tosoga naric ammiu makpeude. ²¹ Ge yakagango tosogaac ubea memanganema ammiu makpebacac geng yang me waingdoku segega kecnadeu imocngoo ngereeude. Me faka nga angammemega mongngo tosoga ubaebic meficgemibacac fakaga imoc wana ngereeude.

²² Amma geng wiac goa negen negenggau negenna naric anu imoc geanggaoc Anutuac kicfu mekecbesena. Nga ngic mong ye wiac goaac negenu naric angkecde nga imocngoo hereebic miu yoacfу mi faiemekede, ye kenehagoc. ²³ Ngic mong ye yaka goa negengyohocfu neude, yeng yoacfу makpeude. Ye mi negensinggema yaka imoc sifu neude. Faka nga angammemega negen negensinggoc mi angkecdimbe, imoc sasawa kopocsihagoc.

15

¹ Ngicngac Kebu negensinggema seria nandimbe, nenang kucmama kecdae, yeneac ebic serima tofohoma nenanggacsac negemma meficemema mi kecbisina. ² Amma nenang tembus tembuscina ngicngac wegona kecdae, yeni ngereegecdeac nga yeni Kebu negensinggema yadiseri anggecdeac kingang kpeyemmebisina. ³ Kristongo ifingoc yengenaac ngereeudeac ua mi meec, kpac. Yeng faka anec imoc yofi oho ohoya fede, “Desusuic areng yeni desusuic anggenggoc, imocngoo neac witiu enec.” ^(Mitiyegec 69:9)

⁴ Mitikibiu warac wiac sasawa ohodacgec, imoc nenang edekpou anemmegecdeac oho ohoya fede. Yoac negenni imocngoo meserinunuma nanggenunuwiac fingecnemeude, imoc negenseridimbe. ⁵ Amma Anutungo modzotitiae kpac nga nangge minginango meficngunumanu ngeni Yesu Kristoac negen negeng modacgec negen negengngina mocgu ambeso. ⁶ Ifi amma ngeni ngenahafoc enacurecfu Kebunina Yesu

Kristoac Anutu nga Manggac dengeregecde. ⁷ Nga Anutuac kpac kuneng fingerudeac negemma Kristongo hoangngunuec, ifi isocngoc ngeni hoangemebisia.

⁸ Ni yofi edengunuduae, Anutungo warac bangefcocnina yenigoc yoac dedzege anec. Nga Kristongo Anutuac yoac fora meseriudeac sebi tosangina herec herecgea yeneac kingang kpekpe anec.

⁹ Ifi anu bangec monnunac ngicngac, yeneng ifingoc Anutu wosoefahaac amma dengeregec. Imocac yofi oho ohoya fede,

“Imocac ni bangeha bangeha ngicngac areng tosea, yeneac botucfu dengereguma yegecfu kpacga afehebade.” *(2 Samue 22:50; Mitiyegec 18:49)*

¹⁰ Amma monggoc yofi dede,

“Bangec monnunac ngicngac, ngeneng yeac ngicngac arengforagoc kpeturanggema ngenahafoc sogaibisia.” *(Dedeseri 32:43)*

¹¹ Amma mong yofi,

“Bangec monnunac ngicngac, ngeni KEBU fendzonggema dengerebisia. Ngiha ngiha sasawa ngeni KEBU afehebisia.” *(Mitiyegec 117:1)*

¹² Nga Yesaiango torokpema yofi dede,

“Isaiac godeaarunac sera mongngo fingecma bangec monnunac ngicngac, yeneac ngictaungina amma garengyunuu yeneng ye negensinggema kecgecde.” *(Yesaia 11:10)**

¹³ Anutungo kekecseriac dedepang faiec, ye negensinggegec yeac sogac sogai nga ruae hafoangoc mewakengunubeso. Imoc mewakengunu Tiri Asungo nanggengunu kekecseriac dedepangno ubanegen negengnginai sokongunubeso.

¹⁴ Tosofocna, ngeni ngenaoc wiac gombunga arenggegec nga negen negeng sasawa imocngko mewakengunu ngenaocngoc gorongina naric kpeemegecde, fakangina ifia fede, imoc negenseriyombonggeduae. ¹⁵ Ni ifi negemma kengeha kpac kecma yoac goa heigboringemmemba ohoduae, imoc Anutungo wosoefac nga kuc neneac anduae. ¹⁶ Ifi amma Yesu Kristoac kingangkpekpe kecma bangec monnunac ngicngac botucnginai Anutuac kicfu womonggareng kecma ua kpetiac mekecma yeac siduc gombunggac ua mekecduae. Mekecba Tiri Asungo bangeha bangeha ngicngac areng tosea, yeni Anutuac sese dema kpetiac meyunu Anutungo yeneac negereede.

¹⁷ Ni Anutuac kicfu kingang kpekpe uaya mekecma Yesu Kristogoc kpeketahemba kecduae, imoc negemba engena yombong anu naric deduae. ¹⁸ Kristongo dafiu kuc nenu neng bangec monnunac ngicngac yenearu kemma yeac yoac dema uaya meba yoara modacgec, imoc mi dekperagiyemmebai imocngko ebiribac. ¹⁹ Imoc Anutuac Asu yeac kucfu fingerec, yeac kucfaka hania hania morora hemma yoara modacgec. Ni siriha ifia Yerusarennu hanahema bangec noboc noboc mekengkecma Iririkong prowinsiu wisickeu Kristoac siduc gombung dekperagiyemmedarai.

²⁰ Amma amabangec goau Kristoac kpacsiduc bic negenggec, yenearu siduc gombung mong mi edeyunukefai, imocac negemba ngereede. Imoc yofiac, ngic mongngo wotung bic ukuec, imocac witiau ua mebadeac mi anende. ²¹ Imocac yoac bic oho ohoya fede, “Yeac kpacsiduc mong mi dekperagiyemmegec, areng imoc yeneng hentegecgecde. Nga ngicngac kedzacnginango yeac kpacsiduc mi negenggec, yeneng imoc negentegecgecde.” *(Yesaia 52:15)*

²² Imocac amma naso homac sinnau kpa fingeru ngenearu mi hayai. ²³ Nga yofinenggac uana bangec yomohai bic mesiba wisickec. Amma ngenearu habadeac kifa homac songona bic anec. ²⁴ Imocac Spania bangecfu kembade,[†] naso imohai ngenembeso negenduae. Amma ngenigoc ewacma songona imohai mesimaguc Spania bangecfu kembeso deba ngeneng ni meficnugecdeac negenduae.

²⁵ Nga naso yomohai ine Yerusarennu kemma kpetiac areng ihai kecdae, yeni memeficac wiac yemmebesonga anduae. ²⁶ Kpetiac habu Yerusarennu kecdae, yenearunac

* 15:12: Isai imoc ngictau Davidiac mama. † 15:24: Spania imoc Inglis yoacf sing Spain.

goa makpekpea kecdae. Nga Makedonia nga Akaia habu yeneng yeneac ubaman-gang negemma memefic goa kpedzucnema faigecdeac degec. ²⁷ Yeni ifi anggecdeac ayemmeec. Yerusarenggac kpebung yeneng Asuac wiac gombunga bangec monnunac ngicngac, yenearu mederema yemmegec bangec monnunac ngicngac, yeneac turunga anec. Imocac amma yeni yenang dzofinacngo meficgeyemeude imocngo ngereede. ²⁸ Ifi anu ubangerecnginaac fora imoc Yerusarennu mekemma yemmeba makpekpea yeneng imoc megecdeac singa meseribade. Imoc wisickeuguc ngenearu sing hama Spania bangecfu kembade. ²⁹ Nga habade, naso imohai Kristoac kenec hafoangoc fede, imocgoc ngenearu habade, imoc negensiduae.

³⁰ Negen negensinggoc tosofocna, ngeni Kebunina Yesu Kristoac amma Asungo heresongogoc kekec meficgenemmeande, yeac amma yofi edengunuduae, ngeni se-riangoc meficnuma Anutu yofi numumibisia, ³¹ Yudaia bangecfu areng goa Kebu mi negensinggeandae, yeneac mariunac yeng onggonnudeac numubisia. Amma ni memeficac wiac mehama kpetiac areng Yerusarennu kecdae, yeni imoc henggoc ubangina ngereeude, imocac momoc numubisia. ³² Ifi ammagec Anutungo negenu ngereeau ngenearu hama sogac sogaigoc tacnegembade.

³³ Anutu ruae minginango sasawa ngenigoc kecbeso, imoc fora.

16

¹ Ngactosonina Foibe, ye nanggema yoac goa deba negenggoc. Ye Kengkereaiac kpebung kingang kpeyemmeande. ² Ngeni Kebugoc kpeketahemra ye hoanggema yeng wiac monggac obohou ngeni imoc meficgema mibisia. Ngeni kpetiac arenggac fakanina modacma ifi ammibisia. Ye ngicngac homac meficyunu kecma ni ifingoc meficnuec.

³ Prisika nga Akpira yeri nga ni, neni Yesu Kristogoc kpeketahemra kecma ua nenahafoc meandimbe. Wenacngerecna yerearu faiba hade. ⁴ Yereng neac amma kekecngira mi segereoc. Ni yerearu ubangerecna faiyecmeduae, imoc nengsac kpac. Bangec monnunac ngicngac, yeneac kpebung sasawa fekendae, yeneng ifingoc ubangerec deyecmedae. ⁵ Amma kpebung yereac amau kpeturanggeandae, yenearu ifingoc wenacngerecna faiba hade. Nga songo tosona Epaineto wenacngerecna ifingoc edebisia. Ye Asia bangecfunac Kristogoc kpeketahemra yeac waracmedac anec. ⁶ Nga wenacngerecna Mariaaru sueba kende. Ye ngeneac amma uatoa mekefec. ⁷ Amma ngicngahocna neac bangec mocguna Androniko nga Yunia yerearu wenacngerecna faiba kende. Yeri aposoro botucnginai eweheiheigoc uangira mekecdape. Nga ni Kristoaru mi kpeketahebare yereng ye bic negensinggeoc.

⁸ Ni Kebugoc kpeketahemra Ampiriatu heresongogoc hoanggeduae, yearu wenacngerecna faiba kende. ⁹ Amma Urbanogoc Kristoac ua meing, yearu wenacngerecna nga songo tosona Sitaki yerearu wenacngerecna faiba hau edeyurubisia.

¹⁰ Nga Apere ye Kristoac ngic fora, yearu wenacngerecna sueba kende nga Aristoburoac arengfora yenearu wenacngerecna faiba hau edeyunubisia. ¹¹ Nga Herodiong bangec mocguna amma Narikisoac arengfora Kebugoc kpeketahemra kecdae, yenearu wenacngerecna sueba hau edeyunubisia. ¹² Nga Kebuac ngac Tirifaina nga Tirifosa, yeri yeac ua mema kecdape. Amma tosongira Peresi ye yeac uatoa ifingoc mede nga ngicngac homacngo yeac heresongo negengkecdae. Wenacngerecna yenearu sueba hade. ¹³ Amma Rufu ye Kebuac meisng ngic nga yeac nonggea momoc, yerearu wenacngerecna sueba hau edeyurubisia. Nonggeango ni ifingoc nonggo anende. ¹⁴ Amma Asingkrito nga Firegong amma Hereme nga Patoroba nga Herema amma negen negensinggoc tosofocnina goa yenigoc kecdae, yenearu wenacngerecna sueba hade. ¹⁵ Nga Firorogo nga Yuria amma Nero nainagoc nga Orumpa amma yenigoc kpetiac areng sasawa kecdae, wenacngerecnango yenearu kende.

¹⁶ Ngeni titikokoc kpetiac angemema wenacngerecngina angemebisia. Kristoac kpebung sasawa, yeneng wenacngerecngina faigec ngenearu hade.

¹⁷ Tosofocna, goa yeni gurunendzic angandae, ngeni yeneac gareng meemebisia. Amma ngeni kpoukpouyoac bic megec, imoc memanganebauac wayunubisia. Imoc seriangoc dema edengunuduae. ¹⁸ Areng ifia yeni Kebunina Kristoac kingang ua mong mi kpekecdae. Yeni ine yakaac songo nga negensongongina fingerudeac ngicngac goa negengisinga kpac tobangyunuma ubaherengina mesufuma yoac gombunga dema dekerec ayemmegede. ¹⁹ Nga ngeni enac tofoc tofoho areng kecdae, ngicngac sasawa yeneng imoc bic negengecac negemba ngereede. Nga ngeni faka nga angammeme gombunga negentegecgecdeac amma angammeme manganaac arennu kopocsicngina kpac kecgecdeac anengande. ²⁰ Anutu, ye ruae mingina. Yeng naso mi hereemanu Satang haningina bageau memama kpedzameude. Kebunina Yesuac wosoefacngo ngenigoc febeso.

²¹ Timoteo, neac ua mocgungo wenacngereha ngenearu sueu hade nga Rukio amma Yasong nga Sosipate bangec mocguna, yeni wenacngerecngina ngenearu ifingoc suegec hade.

²² Ni Teatio, Kebugoc kpeketahemha kecma kibi yomoc ohoma ngenearu ubangerecna faiba hade.

²³ Gaio, ye ni nga kpebung sasawa ama heinemmeande, yeng ngeneac wenacngerec ifingoc faiu hade. Nga taonggac dzo gareng Erasto nga tosonina Kpato, yereng ifingoc ubangerecngira faiec hade.

²⁴ Kebunina Yesu Kristoac ruaengo sasawa ngenigoc febeso. Imoc Fora.

²⁵ Nenang sasawango Anutu kpackuneng minide. Ni Yesu Kristoac dekperagin-gemmema siduc gombung edengunuai. Anutungo imohainoc meseringunuu seria nanggecdeac yearu kuc ifia femide. Anu yoac imoc warac hanac hanaheaunacngoc sufu sufuu feerekefec. ²⁶ Feerekefu bangec monnunac ngicngac sasawa, yeneng ye negensinggema yoara modacgecdeac Anutu kekecseni minginango profete yeneac yoac mitikibiu fede, imocac deu yofinenggac didiu fingectegerec. Fingectegeru bangeha bangeha ngicngac areng tosea yeneng yoara naric negentegecgecde. ²⁷ Anutu mocgungo negen negentegec mingina. Nga nenang Yesu Kristogoc kpeketahemha dedengerec nga dedengerec Anutuaru faini fekengkecbeso, imoc fora.

**Paurongo
Korinti Kpebung Yeneac Warackibi
Ohoe**

¹ Anutungo Pauro negennenu Yesu Kristoac aposoro anai nga negen negensinggoc tosonina Sostene, nereng kibi yomoc faide hade. ² Anutungo Korinti taonnu yeac kpebung kecdae, ngeni kpacngunuma Yesuac amma kpetiac mengunuec, ngeneac kibi yomoc faingemmedipe. Amma ngicngac sasawango Kebunina Yesu Kristoac kpac kpacandae, kibi yomoc ngenearu momoc faidipe. Kebu Yesu ye ngeni nga nenii, nenanggac Kebu momoc. ³ Anutu Mannina nga Kebunina Yesu Kristo yereac danggunuc nga ruaengo ngenearu febeso.

⁴ Anutungo Yesu Kristoac amma wosoefac angemmeeec, imocac ni nasosoc ngeneac negemma Anutu dangge edekecduea. ⁵ Ngeni yegoc kpeketahemma kecgec yeng wiac sasawa hafoangoc ngemmeeec. Yoacdede nga negen negentegec kemea imoc sasawa bic fengemme. ⁶ Kristoac dedekperagi edengunuing, imocac fora kekecnginau fingeru hemma kecgecde. ⁷ Imocac amma ngeni Yesu Kristo didiu fingectegerudeac tomai kecma Asuac wosoefacac kuc sasawa, imocac mong mi obohodae. ⁸ Ye yengenaoc meseringunu kechereemagec naso wisickeu ngeni Kebunina Yesu Kristoac nasotoau kopocsicngina kpac nanggec yoacf u naric mi faingunuude. ⁹ Anutungo Medaha Kebunina Yesu Kristogoc momoc torokpegecdeac kpacngunuec amma yeng yoacdedea modarude.

¹⁰ Tosofocna, ni Kebunina Yesu Kristoac kpacf u negen negengngina midima yofi edengunuduae, ngeni sasawango yoacdedenginau nga negen negengnginau uba mocgu amma gurunendzic mi angemebisia. ¹¹ Tosofocna, Koroeac amaunac yeneng ngeneac yofi edenugec, "Yeni botucnginau tohoemema deendema angemema kecdae."

¹² Ngenearunac ngic goango deandae, "Ni Pauroac ngic." imoc deandae. Nga goango deandae, "Ni Aporoac ngic." amma goango deandae, "Ni Kefaac ngic." nga goango deandae, "Ni Kristoac ngic." ngeni tembuc tembuc ifia dekecdae. ¹³ Negenggec, Kristo ye mi tohoec, kpac. Yeni ngeneac amma Pauro mariponnu mi kpegec. Nga Pauroac kpacf doku mong mi nadzicngemmec, imoc kpahac. ¹⁴ Ni ngenearunac mong doku mi nadzicngemmec, imocac Anutu dengereduae. Krisipo nga Gaio yerisac nadzicyemerai. ¹⁵ Ifiac amma ngic mongngo yofi mi debeso, "Ni Pauroac kpacf doku nadzirai." ¹⁶ Stefana nga arengfora yeni ine doku nadzicyemmec, fora. Amma torokpema goa nadzicyemmec me kpac, imoc mong mi negenduae. ¹⁷ Kristongo doku nadzicyemmec badeac mi suenuec, kpac. Yeng ngicngac siduc gombung edekpou angemmebadeac suenuu hayai. Nga Kristoac mariponggac yoac imoc kucmama ambacac yoac imoc ngicac kucfu nga negen negentegecngoc mi debade.

¹⁸ Ngicngac hofeac sinnu kemedae, yeneng mariponggac yoac imoc negenggec ubasufu yoac angkecde. Amma Anutungo kopocsicac ebicfunac mesinunu komoc kpenide, imocac ine nenang yofi negensikecdimbe, mariponggac yoac imoc Anutuac kuc. ¹⁹ Yoac yofi oho ohoya fedengoc,

"Ni ngic negen negentegecnginagoc yeneac negen negentegec kpetotiebade nga ngic negen negenggoc yeneac negen negeng memabade." (Yesaia 29:14)

²⁰ Anutungo bangec yomocac negen negeng mema kapa yeneac negen negentegecatacfu faiu ngicngac negen negentegecnginagoc, yeni mamea anggec. Nga mitiac negen negengngic yeni engena kpac. Nga ngic yoac mereng kpereng mema deandae, yeneng fora mong mi meficegecde. ²¹ Nga ngicngac yeni bangecac negen negentegecngoc kecma Anutu negemmigecdeac obohogecde. Obohoma siduc gombung dengbaringgema imocac ubasufuyoac deandae. Ubasufuyoac imocac yofi dekperagini Anutungo ngicngac ebicfunac mesiyunu komoc kpegecde, ye faka imoc negenu ngereeude.

²² Yudangic yeni kuc hania hania isinggegecdeac faka kuhagocac kpesi kpesi faiandae.

Nga grikngic yeneng negentegec keme kemea meficgegecdeac ayemmeude.

²³ Anu nenang ine Kristo mariponnu kpegec homeec, yoac imoc edekpou ayemmeni, yudangic yeneng imoc negenggec ubangina mi heiude nga grikngic yeneng negenggec imoc ubasufuyoac angkecde. ²⁴ Anu Anutungo yudangic nga grikngic kpacyunu negensinggegecde, yeneng Kristoarunac Anutuac kuc nga negentegec megecde.

²⁵ Anutuac ubasufuyoacngo ngicngac yeneac negentegec ferahema negen negengtoa anude nga kucmamayango ngicngac yeneac kucngina ferahema kuctoayagoc anude.

²⁶ Tosofocna, ngeni siric dafia kecmagec, Anutungo kpacngunu hanahema negensinggegec, ngeni imocac siriha negensibisia. Ngenearunac ngic sebiubigeng negen negentegecnginagoc homac kpac nga ngicngac efeangosac kucngina engena amma kpacngina kekena, imoc homac kpac. ²⁷ Anutungo ngicngac negen negentegecnginagoc game kpekpeu faiyunuudeac ngicngac yeneac kicfu wiac ubasufuyagoc angkecde, ngicngac imoc meisinyunuec. Amma yeng ngicngac kucngina engena game kpekpeu faiyunuudeac ngicngac yeneac kicfu wiac kucmama angkecde, ngicngac imoc meisinyunuma meyunuec. ²⁸ Nga ngicngac yeneac kicfu wiac mamea angande nga wiac seuha deandimbe amma wiac kpac amma mi fede deandimbe, Anutungo imocnec meisinygeec. Meisinggeu wiac goa engena angande imoc kpac anudeac ye ifi negenec.

²⁹ Anu bangecngic me ngac mongno Anutuac kicfu namma yengenaac negenu engena ambacac, yeng ifi anec. ³⁰ Anutungo negengngemmeecac ngeni Yesu Kristogoc kpeketahemba kecdae. Yeng Yesu sueu Anutuac negen negentegec botucninau mehaec. Mehau nenang Anutuac kicfu dindingac nga kpetiac annideac yeng kopocsicac witicfunac mesinunuec. ³¹ Imocac yoac yofi oho ohoya fede,

“Ngic mongno miacemebeso negende, ye Kebungo kekehau dafi ammiec, imocsac negemma miacemebeso.” (Yeremaia 9:24)

2

¹ Tosofocna, ni ngenearu hama Anutuac negen negeng sufu sufuya fede dekperagingemmema yoacna efea me negen negentegectoaac siricfu yoac mong mi edekpou angemmeai, kpac. ² Ni ngenigoc kecma yofi deba seriec, “Korinti taonnu kecma Yesu Kristosac dekperagibade nga ye dafiu mariponnu kpegec homeec, imocsac dekperagibade.” ³ Ni ngenearu hayai, imohai kucmama nga kengec amma dzonong fede fede anai. ⁴ Amma Anutuac yoac dekperagima yoacna songeagoc me negen negentegecfu mi wangecngunuai, kpac. Tiri Asuac kucfakango yoacna meseriu ngeni imoc hemma negenggec. ⁵ Ngeneac negen negensing imoc ngicac negen negentegecfu feu mi ngereeude. Anutuac kucngosac negen negensingngina nanggeu febeso.

⁶ Imocac amma goa ngeni bic yadiseri anggec, ngeni yoac negen negentegecgor edengunuandimbe. Yoac dedimbe imoc naso yomocac negen negentegec kpac nga naso yomocac engena yeneac negen negentegec mi ande, nocac ngadeau kpac andacgecde. ⁷ Nga Anutuac kuc nga kibikperagingo fingectegec nemmeudeac ye bangec nga kurumeng mi fingecmaec negen negentegeha sufu sufuya imoc faiec feec, negen negentegec imocnec dekperagidimbe. ⁸ Naso yomocac engena sasawa sawau me bangecfu yenearunac mongno negen negentegeha mi negenggec, kpac. Yeni imoc negembau dede yeni kuc nga kibikperagi mingina Kebu mariponnu naric mi kpebau. ⁹ Imocac yofi oho ohoya fede,

“Anutungo wiac kicngo mi hehena nga kedzacngo mi negen negena amma ngic hereau mi negen negenga, imoc arenggema ngicngac ye hoanggema heregoc yeac songo negenggecde, wiac imoc yeni yemmeude.” (Yesaia 64:4)

¹⁰ Anutungo wiac imocacnec negensima Asuya sueu dekperaginemmeu negening. Yeng wiac sasawa hennegeng amma Anutuac negen negeng keme kemea momoc hennegeng angkecde. ¹¹ Geng ngic monggac ubaherea nga negena naric mi

negennade, kpac. Ngicac ongaasungosac imoc negenude. Siriha ifiangoc mongngo Anutuac ubaherea nga negen negena naric mi negenude, imoc kpac. Anutu yengena Asungosac wiac imoc negengkecde. ¹² Anutungo wiac hania hania wosoefacfu nemmeec. Amma nenang imoc negentegecnideac Asuya nemmeu meing. Bangecac asu mong mi meing, kpac. ¹³ Nga Anutungo wiac nemmeec, imocnog dekperagidimbe. Yoac imoc ngicac negen negentegecfu mi dekecdimbe, imoc Asuac negen negentegecfunoc modacma denide. Neni Asuac yoac imoc Asuac kucfu dekperaginide.

¹⁴ Anutuac Asuarunac Asuac wiac, imoc ngic mong ye Anutuac Asuya kpac kecma naric mi meude. Imoc yearu ubasufu faka anude. Asuac wiac imoc asuu henegeng ambesonga, imocac amma ngic Asuya kpac, yeneng Asuac wiac mi negenggecde. ¹⁵ Ngic Kebuac Asugoc kecde, yeng wiac sasawa naric hengising anude nga ngic mongngo ngic imoc naric mi hengising ammiude.

¹⁶ Mitikibininau yoac yofi oho ohoya fede,
“KEBUAC negen negeng imoc ngic mongngo naric mi negenude nga mongngo ye dederecge naric mi ammiude.” (Yesaia 40:13)

Nga nenang Kristoac negen negenggoc kecdimbe.

3

¹ Tosofocna, warac ngenebaru hayai, imohai ngic Tiri Asugoc kecdae, imocac sirihau yoac edengunubadeac osiai. Ngeni Kristogoc kpeketahemu sabac siricfu kecgecac ngicngac uba esea modacgec edeyunuanduae, ifi isoc yoac edengunuai. ² Ngeni naso imohai yaka seria negecdeacsoc mi anggecac namusac gumecngunuai. Nga ngeni yagucngoc yaka seria negecdeacsoc mi ande. ³ Ngeni uba eseaac siricfu kecdaengoc. Imoc yofiac, ngeni keracmangang angemema yoacngina ngabasiric deendema angemeanda. Ngeni ifi amma ngictehec siric kecma ⁴ mongngo deude, “Ni Pauroac ngic.” Nga mongngo ine deude, “Ni Aporoac ngic.” Ngeni ifi degecdeu negemba ngeni ngictehecac arennu kecdae.

⁵ Aporo ye merac nga Pauro ye merac? Neri kingangkpekpesac andipe. Kebungo ua nemeru neri imocac sirihau ua mekecdipe. Mekecde ngeni yoacnira hoanggema ye negensinggegec. ⁶ Neng komoc homecba Aporo yeng imocac witiau doku kpakeec. Nga Anutungo uaya mema imoc meyadiude. ⁷ Ngic yaka homerude, ye engena kpac nga doku semeng witiau kpakeande, ye engena mi ande. Anutungo wiac meyadikecde, ngeni yeac negenggec engena ambeso. ⁸ Amma ngic wiac homecande nga ngic doku witiau kpakeande, yeri uangiraac hania mocgu ande. Ngade kecma yeri tembuc tembuc uangiraacsoc bung meece.

⁹ Neri Anutugoc ua mekecdipe nga ngeni Anutuac semengua nga yeac ama. ¹⁰ Anutungo wosoefac anemma amamemeac negen negeng nenu imocac ngiha anai. Ifiac amma ni imocac sirihau simengwotung arenggema ukuba kemee. Nga imocac witiau ngic goango torokpema ama megecde. Amma amamemengic yeneng uangina dafi mekecma simeng witiau ama torokpema mekecdae, imoc tembuc tembucngina isingga mebisia. ¹¹ Anutungo Yesu Kristo bic gununggec simengwotunga isoc nande. Nga ngic mongngo yeac tegiau wotung mong ukuu kemeudeac singa mi fede.

¹² Anu ngic mongngo simeng imocac witiau torokpema ua mekefude, yeng gol me siriwa me hoc seria siriha gombunga me ic me birohoc me tomochno meudeu ¹³ uayaac hania Kebuac nasotoau fingectegerude. Naso imohai gerecngu uaninaac hania tembuc tembuc tobanggema mekperaginemmeude. ¹⁴ Ngic mongngo ama meu gerecngu uaya tobanggeu seria nanudeu ye imocac ua bung meude. ¹⁵ Nga monggac uaya dzeude isoc wiaha tegecma kpac anude nga Anutungo yengena gerecfunac mesiu komoc kpeude.

¹⁶ Ngeni yofi negembisia, ngeni Anutuac womong nga Anutuac Asungo ngeneac here manau kecde. ¹⁷ Nga ngic mongngo Anutuac womong memanganeudeu Anutungo ye ifingoc memanganeude. Anutuac womong imoc kpetiac nga womong imoc ngeninoc.

¹⁸ Ngic mong yengenaocngoc ikoc mi angemebeso. Botucnginaunac mongngo yengena negensima yagucac negen negentegec mekecdeu yeng bangecac ngic yeneac kicfu ubasufuyagoc amma negen negentegec fora meficgebeso. ¹⁹ Bangec yomocac negen negentegec imoc Anutuac kicfu ubasufuyagoc. Imocac yoac yofi oho ohoya fede, “Ye ngic negen negentegecnginagoc yeneac yoac dzegema yenang botacf u faiyunuude.”

(*Hiobe 5:13*)

²⁰ Amma mong yofi,

“KEBUNGO ngicngac negen negengnginagoc negendacde. Ye ngicngac denegengngina hennegeng amma negenu imoc uaya kpac ande.” (*Mitiyegec 94:11*)

²¹ Ngeni ngic monggac kpara kpacma yegoc torokpema sebiengeng angandae, imoc mi ngereede. Imoc yofiac, wiac sasawa imoc ngeneac bic anec. ²² Imoc Pauro me Aporo me Kefa me bangeha bangeha me kekec me homec me wiac mong bic faifaia fede me dengec fingerude, imoc sasawango ngeneac. ²³ Nga ngeni ngenaocngoc Kristoac ngicngac nga Kristo ye Anutuac ngic.

4

¹ Nenang Kristoac kingangkpekpefura. Nga yeng Anutuac negen negeng sufu sufuya, imoc garenggenideac uayoac nemmeu ua imoc mekecdimbe, ngicngac yeneng ifi negembisia. ² Ngic mong ye gareng ua mekecde, ye enaraac yoac modacma sing naric mi segebeso.

³ Nga ni neannaac yofi deba, ngeneng me ngic goa yeneng yoacf u fainuma yoacna desigecde, imocac negemba wiac engena mi ande. Nga neannaoc ifingoc naric mi isingemema forana debade. ⁴ Here negen negennau hofocemema ebic mong mi meficgeduae, flora. Nga ni kopocsicna kpac, imoc naric mi debade. Kebungo haniana hennegeng amma yoacna desiude. ⁵ Imocac amma ngeni nasoya mi fingecmanungoc ngic monggac yoac mi desibisia. Kebu yengenaoc hama wiac kundunnu sufuma fede, imoc mekperagima ngicngac negen negengnginaac hania didiu faiu fingectegerude. Amma yeng naso imohai ngicngac tembus dedengerecngina edeyunu negenggecde.

⁶ Tosofocna, ngeni yoacna negentegecgecdeac yomohai ngeneac amma neanna nga Aporoac sing edengunuba negembisia. Yoac mitikibiu oho ohoya fede, ngeni imoc mi ferahebisia. Ngeni ngic monggac sebi meemma monggac sebi mi memabisia. Ngeni negen negeng imoc megecdeac negenduae. ⁷ Geac fakaga imoc sirinha mong kpac, ge wiad sasawa mekecnec, imoc eng genggena mekecnec. Anu wiad imoc engsac genggec, imocac amma sebiga mi meembesena.

⁸ Ngeni bic gebecngunu finactoanginagoc anggec amma ngeni nenia kpac ngictau andae. Nga forangoc, ngeni ngictau fora kecbau debac songona kuneng ambac. Nga ngeni ngictau ambau isoc neneng ngenigoc kecma ngictau momoc ambing.

⁹ Ni yofi negenduae, Anutungo aposoro fainunu ngicngac yeneac areng wisic wisickeau nandimbe. Yeni tenicfagoc anemmegecdeac wenac kpekpeu fainunugec. Ngicngac nga angero yeneac kicfu gameagoc nga homeac areng isoc kecandimbe. ¹⁰ Neni Kristoac amma memaemema ubasufu isoc anni ngeneng ine sebingina meemma, “Neni Kristogoc kpeketahemu fitira kecdimbe.” ifi deandae. Nga kucmama kecmina ngeneng kucnginagoc kecgecde. Nga ngicngac yeneng ngeni eweheihei faka angemmema neni ine mangana dema wanunuandae. ¹¹ Anu neneng naso yofinenggac ifingoc hereninaac homema dokuac anemmeu wamba tegec tegera heima kecni ngicngac yeneng nunuandae. Amma amagerecnina kpac kuric isoc kecma ¹² nenaoc marininango uatoa meandimbe. Ngic yeneng sowecnunugec ine kenecyununide amma nunukporac anemmegec ubanina mi mau serima kecnide. ¹³ Nga ngicngac yeneng denggarinnunugec yeneac yoac gombunga denide. Neni yofinenggacngoc bangecfu seuc isoc anni ngicngac yeneng ukununugecde.

¹⁴ Gameac yoac edengunubadeac yoac yomoc mi ohongemeduae, imoc kpac. Ni ine songonambaracfocna demeting angemmebade, ifi isoc ohongemeduae. ¹⁵ Ngeni

Kristogoc kpeketahemha kecmagec garengfocngina teng tauseng demeting angemmebau ngeni sifu mangngina mocgusac kecde. Nennoc siduc gombung angemmeba ngeni Kristoaru kpeketahemha kekec gboria maficgegec. ¹⁶ Ifi anu negengngina midima edengunuduae, ngeni ni dafi amba hemma modacnuma anduae isoc ambisia. ¹⁷ Imocac amma yaguc Timoteo sueba ngenearu haude. Ye songomedacna kecma Kristogoc kpeketahemha kecde amma ye yoac modacma mong mi segeude. Ni Yesu Kristogoc kpeketahemha dafi kecanduae, yoac imoc kpebung sasawa fekendae, ngeni edekpou angemmeanduae. Nga Timoteongo ngenearu hama yoac imocnac heigboringemmeude.

¹⁸ Ngic goa ngenearunac yeneng neac ifi negemma deandae, "Ye nenearu mi haude." goa ngenearunacngo neac ifi negemma sebingina meemma yoacna kpeandae. ¹⁹ Nga Kebungo negenu ngereeude isoc naso mi hereemanu ni ngenearu habade. Hama yoac kpekpe areng kucngina dafi fede, imoc hennegeng ambade. Amma yoacnginasac mi negembade. ²⁰ Anutuac eucerereng imoc yoacfusing mi fingectegerude, imoc kpac. Imocngo Tiri Asuac kucfu fingectegerude. ²¹ Anu ngeni neac dafi angemme, imoc edenubisia. Dzikacgoc habadeac angemme, me heresongogoc nga yumea kekacak asugoc habadeac angemme?

5

¹ Ngenearu kaisero faka fede, yoac ifi degec negening. Kaisero faka mong bangec monnunac ngicngac Anutu mi negemmidae, yeneac botucfu mi feande, imocnac ngeneac botucfu fede. Imoc ngic mongngo mamaac enemagoc feyac angandape. ² Faka ifi femanu ngeni ine sebingina meengandae, imoc naric mi ande. Ngeni imocac ubahodung negemma ngic faka imoc angande, ye botucnginaunac meickebau, imocngo ine ngereebac. ³ Ni sebingo hereau kecduae, fora. Nga ongaasunango ine ngenigoc kecduae. Ifi kecma ngic imocac fakaya isinggema bic desiae. ⁴ Ngeni nga ni, nenang ongaasuu Kebunina Yesuac kpacfu kpedzucnema kecmina Kebunina Yesuac kucngo nenanggoc feu ⁵ nenang ngic ifia Satanggac mariu faibisina. Nga sebiango bangecac faka sasawa modacke, imoc memanganedaru kpac anu ongaasuyango Kebuac nasotoau komoc kpebeso.

⁶ Sebiengengfakangina imoc naric mi ande. Ngeni yis kapiianecsac uuhau faigec imocngo uuha sasawa meu sokoande, ngeni imoc bic negendae. ⁷ Anu nenang ramamedaha Kristo, yeni sese imoc bic kpegec homema dzuacnunuec. Imocac ngeni uuha esea yisgoc meickedacma uuha gboria faibisia. ⁸ Imocac amma nenang uuha esea yisgoc, imocac ngaba nga faka mangana wadacma faka kongaha nga yoac foragoc, imocac ic sogong yisha kpac mekecbisina.

⁹ Ngic serofaka angandae, ngeni yenigoc kpeketahemha mi kecbisia, imocac kibiu bic ohongemmeai. ¹⁰ Amma bangefu areng serofakanginagoc me kichodungnginagoc amma ngic ikoc amma ngicngac wiacngina wangecyunuandae me nemu eweheiyemeandae, ngeni yeni sasawa wayunudacgecde, imocac ine mi negemma dedua. Ngeni imoc anggecdeu ngeni bangec yomoc wadacma kenggecdeac singsac fengemmeude. ¹¹ Ngeni negensinggoc tosofocngina deyemmeandae, yeneac negemma ine yofi ohoai. Yeni serofaka angandae me hiedzoac kichodunggoc kecandae me nemu eweheiyemeandae me ngicngac goa deendema ayemmeandae me doku seria nekecma ubasufu angandae me ngicngac ikoc ayemmemba wiacngina wangecyunuandae, faka ifia angandaeu ngeni ngicngac imoc yenigoc kpeketahemha mi kecbisia nga ngeni yenigoc yaka ifingoc mi nebisia.

¹² Ngicngac ngadeau kecdae, yeni isingyunuma yoacngina naric mi desibade, imoc neac ua kpac. Ngeni ine arengfocngina botucngina kecdae, yeni isingyunuma yoacngina desibisia. ¹³ Nga Anutungo ngicngac ngadeau kecdae, yeneac faka nga angammemengina isinggema yoacngina desiude. Ngeni ngicngac mangac manganea botucnginaunac meicyunubisia.

(Dedeseri 17:7; 19:19; 21:21; 22:21,24; 24:7)

6

¹ Fakangina yomoc mi ngereeude. Ngenearunac ngic mongngo ogea ngaba ammima gamea kpaciak kpetiac tosotofora yenearu mi kemma feracyunuude. Feracyunuma ngic negensingngina kpaci, yenearu kemma ogea yoacfufa iandae. ² Kpetiac areng ngeneng kecma ngiha ngiha yoacngina desibesandae. Ngeni imoc mi negenda gedang. Ngeni ngade ngenaoc ngiha ngiha yoacngina desigecde, imocac ngenaoc yofinenggac wiac efeanec yoacfufa ifingoc desibisia, imoc ngereeude. ³ Amma ngeneng ngade angero isingyunuma yoacngina desigecde, ngeni imoc negendaenoc. Ifiac amma ngeni faka goa botucnginau fede, imoc naric isinggebisia. ⁴ Yaguc ine yoac mong botucnginau fingeru ngeni sing segema ngic goa kpebunggac eweheiheiu mi kecdae, yeni meisingyunuma yoacngina desigecdeac faiyunuandae. ⁵ Ngeni gamengunuudeac negemma imoc deduae. Nga ngeneac botucfunac ngic mongngo negentegecma kecma tosotofora yeneac ebicyoac dema mengereude, imocngo naric ambac. ⁶ Nga yofinenggac ngeni ine negensinggoc tosofocngina kecdae, ngeneng negensingngina kpaci, yeneac kicfu kemma yoacfufa iameanda.

⁷ Ngeni yoacfufa iameanda, faka imocngo edzacngunuude ngeni firang mi andae. Nga tosofocngina yeneng ikocfu yoacngina dema me wiacngina wangecngunuandae, ngeni imoc eng wagec feu ngereebac. ⁸ Nga ngeni ine negensinggoc tosofocngina mangana nga ikoc ayemmma wiacngina wangecyunuandae.

⁹ Ge ikoc mi angemebesena amma yoac yomocac mi obohobesena. Ngicngac Anutuac yoac kpeandae, yeneng Anutuac eucererengaac maridzoming naric mi megecde. Kaisero faka angandae me nemu eweheiymmeandae me singtoa ngac yenearu kengandae me ngic goa yeneng ngic ogofocnginagoc fema ngacgoc kekec isoc kecandae me ngic goa yeneng mficyunugecdeac negemma kpae mi heiymmemma engsac ngic ogofocnginagoc feandae me ¹⁰ hamangecmeme me ngicngac kichodungnginagoc me doku seria nema ubasufu angandae me enacfufa faifai yoac deandae me ikoc amma hiedzo wangecyunuandae, areng ifia yeni sasawango Anutuac eucererenggac maridzoming naric mi megecde. ¹¹ Nga ngenearunac ngicngac goango warac ifi kecgec. Ifi kecmagec Kebungo yengena kpaci nga Anutuninaac Asu yeac kucfu dzuacngunuma dindingac dengemmema kpetiac arennu faingunuec.

¹² Goa yeni deandae, “Ni faka hania hania sasawa naric ambade, kpaea mong mi fede.” Nga neng ine deba, “Wiac sasawa imocngo memefihagoc mi ande. Wiac sasawa naric ambade, fora. Nga wiac mongngo ine garenhubeso anu imoc wama naric mi modacbesare.” ¹³ Yaka imoc hereninaac amma fede nga hereninango yakaac amma fede. Nga kecma Anutungo meicyuruu kpaci anecde. Sebininango Kebuac amma fede, imoc serofaka anudeac amma mi fede nga Kebu ye sebininaac amma kecde. ¹⁴ Anu Anutu kuctoayango Kebunina megboriu yarec, kecma yeng nenang ifingoc megborinunuuyacnide.

¹⁵ Anu sebingina imoc Kristoac sebiaac tosea ande, ngeni imoc negembisia. Nga ni Kristoac sebia tosea singtoangacgoc kpeturanggeba yeac sebiac noboha anu mi ngereeude, imoc kpaci yombong. ¹⁶ Imoc yofiac, ngic mongngo serongacgoc feudeu ye yegoc sebi mocgu andape, ngeni imoc negembisia,

“Ngicngac yohockang yeri sebi mocgu anecde.” yoac imoc dedea fede. (Fingec fingec
2:24)

¹⁷ Anu mong ye Kebugoc kpeketahemma kecde, yeng yegoc asu mocgu anecde.

¹⁸ Ngeni kaisero faka woramima meickebisia! Nga mong ye faka nga angammeme mangana goa angande, imoc yengena sebiac ngadeu angkefude. Nga sero angande, ye ine yengena sebia kopocsic mficgemima memanganeemeude. ¹⁹ Anutungo Tiri Asu ngemmeu mekecdae, ye ubaherenginau kefu sebingina imoc yeac womong, imocac ngeni ngenaoc ubasebinginaac mingina kpaci. ²⁰ Ngeni bungngina memea nga Kebungo bung imocacsoc faiec, imocac ngeni sebinginango Anutu kpaci kuneng mibisia.

7

¹ Ngeni kibinginau yofi kpelinenggec, “Ngic ye ngacgoc feude, imoc naric me kpac.” imocac yofi deba negenggec: ² Kaisero faka fingebacac ngic tembuc tembuc ye yengena enemagoc ambeso nga ngac tembuc tembuc ye yengena eweagoc ambeso. ³ Nga singngo wiad dede, ngicnggo enema imoc mibeso nga ngacnggo ifingoc ewea imoc mibeso. ⁴ Amma ngac ye yengena sebiac mingina mi ande, kpac, eweango ine yeac sebiac mingina ande. Nga ifi isocngoc ewea ye yengena sebiac mingina mi ande, kpac. Enemango ine yeac sebiac mingina ande. ⁵ Imocac eweeneng ngeri ngeraocngoc sebingira mi segereemebesera. Ngeri naso goausac numuecdeac uba mocgu amma naso dema naric segereemebesera. Nga ngeraoc sebingira garengemeecdeac kuc mi fengecmedeac Satangnggo faitobannu faingurubacac ngeri naso wegenanecsac eng kecma monggoc ngerahafoc kecbesera. ⁶ Nga imocnggo dedeseriyoac mong mi ande. Ngeri dafi naric anecde imocac deduae. ⁷ Neanna songo ine yofi, ngicngac ngeni ni kecduae isoc kecgec ngereebac. Anu Anutungo wosoefahaac wiad nemmeande, imoc ngicngac tembuc tembucnina nemmeu mekecdimbe. Ye ngic mong kuc yoc mima mong imoc miude.

⁸ Ngic goa ngeni ngac mi mema eng kecdae amma ngachodzec ngeneac yofi deba negenggec, ngeni ni isoc eng kecgecdeac negemba ngereede. ⁹ Ngeni garengemegecdeac kuc imocacsoc mi fengemmedeu, ngeni seroac songo herenginau ereu manganebauac memeturannu meemema eweeneng anggec ngereeude.

¹⁰ Nga eweeneng ngeneac yoac yomoc demeseri angemmeba yoacna modacbsia. Ngac mongnggo ewea naric mi wabeso. Imocnggo neac yoac kpac, imoc Kebuac yoac.

¹¹ Ngac mong ye ewea wama kenudeu yofi ambeso, ye eng kecbeso me ewea warac kefec, yearu monggoc kemma yegoc ruae meficgema eweeneng monggoc ambesera. Nga ngic mongnggo enema naric mi wama kembeso.

¹² Amma ngicngac tosea ngeneac yoac mekecduae, imoc ine Kebuac enacfunac mi meing. Ngic monggac enemango Yesu mi negensingema eweagoc kefudeac negendeu, ngicnggo enema mi wabeso. ¹³ Me ngac monggac eweango Yesu mi negensingema enemagoc kefudeac negenudeu ngacnggo ewea mi wabeso. ¹⁴ Ngac mong ye ewea negen negensinga kpac kecde, ye ewea kpetiac anudeac ammiude. Nga ngic mong ye enema negen negensinga kpac kecde, ye enema kpetiac anudeac ammiude. Ifi mi anggecdeu nambaracfocngina seucnginagoc kecgecde. Nga nambarac yeni ine yofinenggac kpetiac andae. ¹⁵ Anu mongnggo Yesu mi negensinggede, yeng ewea me enema negensinggecde, ye waudeac negensiu kpa mi faibisia. Anutungo ruaegoc kecnideac kpacnunuec. ¹⁶ Ngac, geng ewega kopocsicfunac mesina komoc kpeude me kpac, imoc naric mi negennec. Nga ngic, ge enengga kopocsicfunac mesina komoc kpeude me kpac, ge imoc naric mi negennec.

¹⁷ Anutungo ngicngac kekecnginaac sirihau mocgu mocgu kpacngunuma heitaingunuu ngeni imocac sirihau kecbisia. Amma kpebung sasawa ngeneng faka imoc modacgecdeac edengunuanduae. ¹⁸ Ngic mong ye sebi tosea herec herecgeac areng kecmanu Anutungo ye kpacma heitaiecfu yeng negeng imoc mesufuudeac ua mi mebeso. Nga ngic mong ye sebi tosea mi herec herecgea kecmanu Anutungo kparecfu yeng sebi tosea mi herecgebeso. ¹⁹ Sebi tosea herec herecgea me mi herec herecgea, imocnggo wiad engena mi ande. Nga Anutuac nonoyoac modacbesonga, imocnggo wiad fora yombong. ²⁰ Nga ngic mocgu mocgu ngeni kekec siriha dafi kecmagec Anutungo kpacngunuma heitaingunuec, ngeni kekec siriha imocngoc kecbisia.

²¹ Ge minginggaac wanacngic kecmana Anutungo kpacguecfu imocac negengyohoc mong mi ambesena. Nga ge ngic yungec yungec annadeac sing fingecgenu imoc naric modacbesena. ²² Ngic mong ye minginaac wanacngic kecmanu Kebungo kpacma heitaiecfu, yeng naso imohai sifu Kebuac ngic witihakpac ande. Amma ngic mong witihakpac kecmanu kparu, yeng sing ifiangoc Kristoac wanacngic anu Kristongo yeac mingina anude. ²³ Kebungo bungngina bic meec, imocac ngeni ngic yeneac bageu wanac areng

mi kecbisia. ²⁴ Tosofocna, ngeni nanang siriha dafi nammagec Kebungo mocgu mocgu kpacngunuma heitaingunuec, ngeni siric ifiangoc Anutuac kicfu kecbisia.

²⁵ Ngac goa ngeni ngicfu mi kemma eng kecdae, ngeneac negemma Kebuarunac singyoac mong mi fenende. Nga Kebungo wosoefac anenec, imocac siriha negen negenna deba ngeni negengyohoha kpac kecma yoacna naric modacbisia. ²⁶ Naso yomoc ebic kuneng fingecma fedearc amma ngeni yofinenggac kecdae isoc, ifi torokpema kecgec ngereeude, ifi negenduae. ²⁷ Ge enenggagoc bic dzegeremeocfu ngac wabesonga mi negensibesena. Nga yoac dedzegega kpac kecma ngac menadeac hofoha fai mi ambesena. ²⁸ Nga ge sifu ngac mong menadeu kopocsic mi meficgenade. Nga ngac mongngo eng kecma ngicfu kenudeu ye ifingoc kopocsic mi meficgeude. Eweeneng angkecdae, yeneac kekecfu ebic hania hania fingecande, ni imohacnac onggongngunubadeac negenduae.

²⁹ Tosofocna, naso wegenanecsac fede, ifi deduae. Ifiac amma ngic enenggoc kecdae, ngeni enengfocngina kpac, ifi isoc kecbisia. ³⁰ Nga ngicngac kiackecdae, ngeni kiacngina kpac, ifi isoc kecbisia. Nga ngicngac sogac sogaigoc kecdae, ngeni sogac sogaingina kpac, ifi isoc kecbisia. Amma wiac bummedae, ngeni wiacngina kpac isoc kecbisia. ³¹ Nga ngicngac bangec yomoc wiac bummemae mekecdae, ngeni wiacngina efeanec feyemmede, ifi isoc kecbisia. Nga bangec yomoc yaguc fede, imoc kpac ambesande.

³² Bangecac ebicngo mi fingecngemmudeac songona ande. Ngic ngacfu mi kenec, ye Kebuac wicac negen negenga kuneng femide amma ye dafi anu Kebungo negemmiu ngereeudeac ua meude. ³³ Nga ngic mong ye ngac bic meec, ye ine bangecac wicac negen negenga kuneng femide amma ye enema faka dafi ammiu enemango negemmiu ngereeude. ³⁴ Ifi amma negen negenga tohoma yohockang anude. Nga ngac naroang me ngac kosisc ye Kebuac wicac negen negenga kuneng femide, ye yofi negende, "Ni dafiu kecba sebina nga ongaasuna kpetiac anude." Nga ngac mong ye ngic bic meec, ye ine bangecac wicac negen negenga kuneng femide, ye ewea faka dafi ammiu eweango negemmiu ngereeudeac ua momoc meude.

³⁵ Ngeni meficngunubadeac amma yoac yomoc deduae, imoc kudoc kpengemmudeac kpac. Ngeni siriha kecma Kebuac ua nasosoc mekecmagec bangecac wiacngo negen negengngina mi mesufubeso, ifi negenduae.

³⁶ Ngac mongngo ngicfu kengkenggac nasoya ferahema sifu ngicfu kenudeac ammiu mamango hanahema kpetarima ngade negengyohoc amma naric deude, ye kopocsic mi meficgeude. Nga naroanga ngicfu naric kenude. ³⁷ Nga manggac mong ye negengyohoc mi amma naric garengemema naroanga amea tacbeso, imoc ubayau bic negenseriu ye fakaya gombunga anude. ³⁸ Nga ngic mong ye naroanga ngicfu faiude, ye fakaya gombunga. Nga mongngo naroanga ngicfu mi faiude, yeng manggac fakaya feraheude.*

³⁹ Ngac mong ye ewea gbori kecde, ye ewea kecmanu yegoc kpeketacemema kecbesera. Kecma ewea homeu ye ebiha kpac amma ngic monggaru kembeso dema songea anu naric kembeso. Imoc Kebuac negen negennu ambeso. ⁴⁰ Nga ye eng kecbac debac keneha engena ambac. Neac negen negeng ifi ngemmeduae. Nga ni ifingoc Anutuac Asugoc kecduae, imoc negensiduae.

8

¹ Ngicngac yeni yang kpema nemuac sesengina faima neandae, imocac hania yofi deduae, nenang sasawango negen negentegecgoc kecdimbe, imoc negendimbe. Nga yofi ifingoc negendimbe, "Negen negengngi ngicngac sebingina meenude." Nga heresongogoc kekec imocngo ngicngac nanggeyunuude. ² Ngic me ngac mongngo yofi negemma kecdeu, "Ni negen negentegecnagoc." ye negen negentegec kekec dindingacac siricfu mi kecde. ³ Nga mong ye Anutuac heresongogoc hoanggedeu Anutungo ye negemmiude.

* ^{7:38:} Kebanga 36-38 mitiac negen negengngi imocac hania uba mocgu mi andae. Buk Baibelu sing mong meremmerenga fede.

⁴ Nemuac sese nebesonga me kpac, imocac yofi bic negentegecdimbe. Anutu mocgungo kecde nga nemu yeni wiac fora kpac. ⁵ Ngicngac yeni nemungina sawau me bangecfu kecgec kpacngina anutu deyemmeandae. Kebu nga anutu ifia homac kecdae. ⁶ Ifi kecmagec Anutunina ye mocgusacnac. Yearunac wiac sasawa fingeclarec amma ye imocac mama nga nenang yeac amma kecdimbe. Kebunina Yesu Kristo ye mocgu nga yeac witiu wiac sasawa nga nenang kecdimbe.

⁷ Negen negentegec imoc ngicngac goa yeneac ubau mi fede, yeni nemuac negemma faka fora dema yeneac sese nema kpanggeyunuanda nga here negen negengngina kucmamango seuhagoc anude. ⁸ Nga yakanene imocngo Anutuac wegenacfu mi fainunuude, kpac. Yaka nenide isoc imoc yeac kicfu engena mi ande. Nga mi nenideu isoc wiac monggac mi obohonide. ⁹ Goa ngeni ine negengefaima nemagec tosofocngina kucmama kecdae, yeni yakaac amma faitobannu faiyunugec mayunubacac ngeni gareng meemema kecbisia. ¹⁰ Ge negen negentegecgagoc. Amma geng nemuac womonnu tacma nenaudeu ogoga monggo here negenga kucmamango ihai kecma fakaga hemma ubea midiu yeng nemuac sese ifingoc nema ubayohoc meficgeude. ¹¹ Ge ifi angkecma negen negentegecgagocngo ngicngac kucmama memanganeyununade. Nga Kristongo tosoga yeac ifingoc homeec. ¹² Amma ngeni tosofocngina yeneac here negen negeng memanganeyemmegec kucmama fingeleyemmu Kristoaru kopocsic meficgegecde. ¹³ Imocac amma yofi deduae, ni yakanango tosona ebicfu faiba makpebacac naric yang wama monggoc mi nebesare. Negen negensinggoc tosona ebicfu faibadeu, imoc mi ngereeude.

9

¹ Ni ngic kpaea kpac amma ni aposoro. Kebunina Yesu kicngo hemma Kebugoc kpeketahemha kecma ua mekecba ngeni ua imocac fora andae. ² Foracngoc, ngicngac goa yeneng neac yofi negendae, “Ye aposoro kpac.” ifi negenggec ni sifu ngeneac aposoro anduae. Amma Kebuac aposoro kecduae, ngeninoc imocac foraya andae.

³ Ngicngac goa yeneng neac ngadedyoac dema kecgec imocac turunga meremma yofi edeyunuduae, ⁴ kpebung yeneng neri ifingoc yaka nemecgec nedede, imoc singngo dede. ⁵ Amma neri ifingoc enenghochnira negen negensinggoc kecdape, sinnu meyurude habing, imoc ngereebac. Aposoro goa nga Kebuac munafora amma Kefa, yeneng enengfocnginagoc kengha angandae. ⁶ Nga Banabagoc nerengsac kekecniraac wiac fingerudeac ua marinirango medede, ngeni ifi negensiandae. Nga imoc kpac, singngo ifi mi dede. ⁷ Wasai ngic monggo wasaiua mema yengenaarunac bunggac dzo mi meude. Nga mong ye waing homeru fora anu yengenaoc gbomea mema neudenoc. Me monggo ramaburumaka garengyunuma kecande, yeng yeneearunac namu menec angande.

⁸ Ni ngic yeneac negeng mema yoac yomoc mi deduae, kpac. Dedeseriyoacngi imocac ifingoc dede. ⁹ Mosengo dedeseriyoacf yofi ohoec fede, “Burumakango wit sebera meickebesonga tidzameudeac ua ebiria mekecde, imocac dumbenga mi dzegebesena.” *(Dedeseri 25:4)*

Anutungo burumaka yeneac negemma imoc mi deec, kpac. ¹⁰ Foracngoc, ye ngicngac nenanggac ifingoc negemma ifi deec. Imoc nenanggac momoc negemma oho ohoya fede. Ngic bangec mendzickecde nga ngic wit sebera kpetima kecde, yeri fora nasoya hau ua imocac foraac noboha meecdeac negensima ua mekecdape.

¹¹ Anu Anutuac Asuac gbome ngenearu kpeginideu ngenearunac ifingoc sebiac mefic menide, ngeni imoc negenggec ngereebeso. ¹² Nga ngic goa yeni ngenearunac wiac goa naric megecdeu neneng imoc torokpema monggoc menide, ngeni ifi negenggec ngereebeso. Nga neni Kristoac siduc gombung kpaе heibinggac negemma ngenearunac semeng memeac dede fedemoc, imoc wama mong mi mema sebiac ebic hania tofohoma kecdimbe.

¹³ Ngic Anutuac womonnu ua mekecdae, yeni yakangina womonnu meficgema neandae. Nga aratau kingang ua mekecdae, yeni arataac seseunac tosea meandae, ngeni imoc bic negendae. ¹⁴ Nga goa yeni siduc gombung mekperagingemmmeandae, yeni sing

imohacnacngoc kekecnginaac semeng maficgebisia, Kebungo sing imoc faiec. ¹⁵ Ni ine memefic ifia mong mi mekefai. Amma ngeneng wiac mong nenggecdeac negemma kibi yomoc mi ohoduae, kpac. Neanna semeng maficgebade, imocac negemba engena ande. Nga homebaiac mongngo sinna imoc naric mi meickeude. ¹⁶ Anutungo igocnuma dzegenuu siduc gombung ngicngac edekpou ayemmekecduae. Amma siduc gombung mi dekperagibai dede yeac sowec bageau kecbai. Imocac neannaoc ua gombunga meduae dema kpacna naric mi miacbade. ¹⁷ Amma neanna songo modacma uaac kpesi kpesi faiba naric degec ua yomoc mebaiu yeneng uabung nenggec mebai. Nga Kebu yengenaoc ua yomoc mebadeac denenec, imoc modacma garengua buma kpac mekecduae. ¹⁸ Nga bunna siriha yofi ande, ni siduc gombung dekperagikecma wiac mebadeac dedea, imoc wadacma engsac naric dekperagiyemmebade.

¹⁹ Ngic monggo neac kpae mi faiec, kpac. Nga neng ine ngicngac homac kpedziyunubadeac negemma yeneac bageu naric faiemema wanacngicngina amma kecduae. ²⁰ Ni yudangic kpedziyunubadeac amma yenigoc kecma yudangic siricnginau angkecduae. Neannaoc dedeseriyoacac bageu mi kecduae, fora. Nga ngicngac dedeseriyoacac bageu kecdae, yeni kpedziyunubadeac yenigoc kecma yeni isoc dedeseriyoacac bageu kecduae. ²¹ Nga ngicngac goango dedeseriyoacac bageu mi kecdae, yeni kpedziyunubadeac yenigoc kecma dedeseriyoac kpac isoc kecduae. Anu neannaoc Anutuac dedeseriyoac ngadeau yombong mi kecduae, ni ine Kristoac dedeseriyoacgoc kecduae. ²² Kecma ngicngac kucmama kpedziyunubadeac yeni isoc yenigoc kucmama amma kecduae. Amma ngicngac hania hania kecdae, ynearunac goa kopocsicac ebicfunac mesiyunuba komoc kpegecdeac yenigoc kecma kekec hania hania modacma yeni isoc kecduae. ²³ Ni siduc gombunggac amma uana sasawa mekecduae, kecma imocac fora nasoya hau neanna imocac siriha noboha mebadeac negensiduae.

²⁴ Nedzi nedziac ngic ariacsobennu firang anggecdeac nedziandae, yeni sasawango nedzimagec mocguno firanggac sokoc meude, ngeni imoc bic negendae. Ngeni ngenang sokocngina megecdeac ifi isoc nedzibisia. ²⁵ Ngic ariacf u kpacngina faiandae, yeni sasawango sebingina hafoangoc efaideac arengegecde. Ngic yeneng dzaring dzangge dzanggea ubahemmegedeac ifi anggecde. Nga nenang dzaring dzangge dzanggea kpac ubahenemmegedeac sebinina hafoangoc garengemenide. ²⁶ Ni sicsauc mi nedzianduae nga ngicngac maringina eng ukugec pong kpeu ukuandae, ifi isoc mi anganduae. ²⁷ Ni yofi anganduae, ngicngac tosea ynearu siduc gombung edekpou ayemmemma hennegeng nasou ngic kpedaha ambaiac sebina kpekecduae. Imoc neac wanac areng amma yoacna modarudeac ifi ammikecduae.

10

¹ Tosofoyna, ngeni kisicfocnina yeneac yoacsiduc negentegecgecdeac negenduae. Hoengngo kperacyunu yeni sasawango imocac bageu kengkecma kondung fer-ecgegec. ² Hoeng nga kondung yereng mitidokungina anu yeni sasawango Mosegoc torokpegecdeac imohai doku nadzicgec. ³ Amma yeni sasawango Asuac yaka siriha mocgu nekenggec. ⁴ Asuac hoc peperandzingo modacyunu hoc ihacnacnoc doku mau yeni sasawango Asuac doku siriha mocgu nekenggec. Nga hoc peperandzi imoc Kristonoc. ⁵ Nga Anutungo kisicfocngina botucnginau ngic homac yeneac fakanginaac amma ueba mi ngereec. Mi ngereeu yeni bangecfu mayunu homedacgec farengngi-nango bangec kisiu sinsararang kpema fekenec.

⁶ Yeni faka mangana angkecgec, imoc ifingoc nenanggaru fingebacac siduc imoc nenanggac amma faifaia fede. ⁷ Amma monggoc deba, ngeni yeni isoc nemu eweheihei mi ayemmebisia. Yeneac yoac yofi oho ohoya fede,

“Ngicngac yeneng matacma nenedoku nemaguc yacma yegec fede fede kecgec.”
(Makekeng 32:6)

⁸ Anu mong deba, nenang ifingoc serofaka mi ambisina. Ynearunac ngicngac goa yeni serofaka angkecgec ac ngicngac 23 tauseng yeni uameme mocguac manau

makpema homedacgec. ⁹ Ni monggoc torokpema deba, goa yeneng Kebu faitobang ammigec boidzoc yeneng yinigec homedacgec. Nenang ifingoc Kristo mi tobanggebisina. ¹⁰ Nga ngicngac goa yeneng modzotitiac yoac degec ngickpekpe angerongo hama kpebucyuncuec. Nenang siriha imocngoc modzotitiac yoac mi debisina. ¹¹ Faka yenebaru fingerec, imoc ongea isoc ande. Siriha imocngoc yofinenggac ngicngac naso wisic wisickeau kecdimbe, imocnggo goronina ambeso. Imocac amma yoac imoc mitikibiu oho ohoya fede. ¹² Imocac ngic monggo yofi deande, “Ni seria nanduae.” ye kecma makpebacac garengemebeso. ¹³ Anu faitobang ngicngac goa yenebaru fingegec, siriha ifia ngenebaru ifingoc fingegegemmeude. Nga Anutungo yoac dema imoc modarude. Faitobang fingegegemmeu ngeni ebic imoc tofohoma kecgecde. Nga imocnggo kucngina mi feraheudeac faitobang ebiria kpae heimiude. Faitobang hangemmeu yeng imohacnac woragecdeac sing meficgengemmeu faitobangnggo kucngina mi memaudeac garenggunuude.

¹⁴ Songo tosofocna, nemu yeneng witicngunubauac ngeni nemu eweheihei faka wama imohacnac worama yeni mi hoangyunubisia. ¹⁵ Ngeni ngicngac negen negentegecnginagoc, imocac amma ngeneac yofi deba, ngeni ngenaocngoc yoacna negemma isinggebisia. ¹⁶ Kenecac sokoc keneheandimbe, nenang imoc nema Kristo yengena sawagoc kpeketahemba yegoc sac mocgu annide. Nga ic sogong tueandimbe, imoc nema Kristo yengena sebigoc torokpema yegoc sebi mocgu annide. ¹⁷ Ic sogong imoc hafac mocgu. Yeni hafac mocgusac mema imohacnac mederenemmegec nenang sasawango imoc neandimbeac nenang ngicngac homac kecma sebi mocgungoc andimbe.

¹⁸ Ngeni Israe ngicngac yenemma negensibisia. Ngicngac seseac wiac ohogec noboha neandae, yeni arata kpanggeandae. ¹⁹ Ngicngac nemu sesengina dema wiac heiyemmegec, imocnggo wiac engena mi ande, ngeni yoacna imoc negentegecgec. Nga nemu yengena ifingoc wiac engena mi ande. ²⁰ Nga bangeha bangeha ngicngac Anutu mi negemmidae, yeneng seseac wiac faiandae, imoc Anutuac negemma mi faigecde. Yeni ine hadehade nga yafinggac negemma sesegerec ohoandae. Nga ngeneng ine hadehade nga yafing yenigoc kpanggeyunugec mi ngereede. ²¹ Ngeni Kebuac sokoc nga hadehade nga yafinggac sokoc momoc mema imohacnac ifingoc negecede, imoc naric mi ngereeude. Nga ngeni Kebuac yaka nga hadehade nga yafinggac yaka momoc kpanggeandae, imocnggo osiande. ²² Nga kucninan Kebuac kuc mi ferahade. Nenang Kebuac here miacbinggac ifi mi ambisia.

²³ Goa yeneng deandae, “Wiac hania hania sasawa annideac kpae mong mi fede.” Nga neng ine yofi deduae, “Faka goa imocnggo tosofocga yeneac memefic mi anude. Wiac sasawa annideac kpae mong mi fede, fora. Amma faka goango ine mi miacnunuma meserinunuude.” ²⁴ Ngic ye yengena gombung fingerudeac negemma fakaya mi ambeso, kpac. Ngeni tosofocngina yenebaru gombunga fingerudeac negensima fakangina ambisia.

²⁵ Ngicngac yeneng suenecfu wiac sasawa faigec ngeni imoc here negengngi-naac amma heikpesia kpac naric eng menec ambisia.

²⁶ “Bangeha bangeha nga wiac sasawa bangecfu fede, imoc KEBUAC.” *(Mitiyegec 24:1)*

²⁷ Anu ngicngac Kebu mi negensinggeandae, yenebaruac monggo ameau kpacngunuu ngeneng yofi ambisia, ngeni ihai kenggecdeac negenggec naric anu yeac amau embisia. Enggec yeng yaka ngemmeu ngeni here negengnginaac amma dekpesi mong mi amma imoc naric nedacisia. ²⁸ Nga ngic monggo yofi dekperagingemmeudeu, “Yomoc nemu seseac yang noboha.” imohai ine yaka imoc mi nebisia. Imoc yengena nga here negenggac amma yaka imoc wama mi nebisia. ²⁹ Nga geac here negenggaac mi deduae, kpac. Ni tosogaac negemma imoc deduae. Nenang kpaea kpac kecdimbeac ngic monggac here negengngoo naric mi isinnunubeso. ³⁰ Nga ngicngac yenigoc yaka nema Kebuac dangge denideu yeneng wiacac bic dangge deding, imocac desure naric mi anemmebisina.

³¹ Ngeni nenedoku nedae me wiac mong angandaeu ngeni Anutuac negensima den-gerebisia. ³² Ngeni yudangic nga grikngic amma Anutuac kpebungfora negemmangang mi meficgeyemmebisia. ³³ Anu ngicngac homac ebicfunac mesiyunuba komoc kpegecde nga yeneac gombunga fingerudeac amma ua imoc mekecduae. Neanna gombunna fingerudeac ine mi mekecduae.

11

¹ Ni Kristoac faka nga angammeme modacanduae nga ngeneng siric imocngoc neac faka nga angammeme hemma modacnubisia. ² Nga ngeni neac wiac sasawa negensidae amma yoac edengunuma ngemmeai, imoc meandaē, imocac dengerengunudiae.

³ Ngic mocgu mocgu sasawa yeneac orucngina imoc Kristo nga ngac mocgu mocgu yeneac orucngina imoc ngic amma Kristoac oruha imoc Anutu, ngeni imoc negentegecgecdeac negenduae. ⁴ Nga ngic mong ye oruha kperahema numuude me profeteyoac deude, ye yengena oruha gamekpekpe meficgemiude. ⁵ Nga ngac mongngo oruha mi kperahema numuude me profeteyoac deude, ye ine yengena oruha gamekpekpeu faiude. Imoc ngac mongngo oruha wedzecdarec isoc. ⁶ Amma ngac mong ye oruha mi kperahaudeu ye oruha merecgeu wegna ambeso. Nga ngac ye oruha ifi merecgeude me wedzerude faka imocngoc gameagoc andeu ye oruha kperahema kecbeso.

⁷ Ngic ye Anutuac onga nga kibikperagia, imocac amma ye oruhau wiac mong faima mi kperahebeso. Ngacngo ine ngicac kibikperagia. ⁸ Anutungo ngic ngacfunkac mi meficgeec, ye ine ngac ngicfunac meficgeec. ⁹ Nga ngic ye ngacac amma mi mefic meficgea, ngacngo ine ngicac amma mefic meficgea. ¹⁰ Imocac ngac ye kuha femide imocac ma isoc wiac mong oruhau heima kperahebeso. Ye angero yeneac amma ifi ambeso.

¹¹ Ngac ye tembuha kekec imoc mi fede nga ngic ye tembuha kekec ifingoc mi fede. Ngic nga ngac ngeni meficiemema kecbisia, Kebungo areng ifi faiec. ¹² Ngac ye ngicfunac mefic meficgea, ifi isocngoc ngic ye ngicfunac fingec fingeramma wiac sasawa imoc Anutuarunac hakecde.

¹³ Ngeni ngenaoc faka imoc isinggebisia. Ngac mongngo oruha mi kperahema Anutu numumiande, imoc mi ngereeude. ¹⁴ Anu ngic mong ye orucsabaya kuneng mekecde me orucdzoya dzegeande, faka imocngoc gameagoc angande. Ngic nenang angammemeninango imoc kpounemmekede. ¹⁵ Nga ngac mong ye orucdzoya kuneng femideu ye imoc negenu wiac engena, imoc naric nga gombunga, nocac ye orucdzoyango orucsira kperaheudeac imoc mekecde. ¹⁶ Mongngo yoac yomocac deendema anudeac negendeu ye yofi negembeso, nenearu faka ifia mong mi fede nga Anutuac kpebung yeneac botucfu faka mong ifia ifingoc mi fede.

¹⁷ Yoac torokpema edengunuba, imoc dedengerecyoac mi debade. Ngeni tutumangnginau ubagombung yoac mi dema ngenaocngoc memanganeemeandae. ¹⁸ Nga hanahema yomocac deduae, ngeni kpebunnu kpedzucnema tacma yoacngina tohoemeu kecandae, imoc negenai. Yoac imocac negemba fora isoc ande. ¹⁹ Ngenearu tohoe-memefaka fingecbeso. Anutungo ngicngac damoc fakangina fora hemma botucnginau nanggeyunuande, imoc didiu fingectegerude. ²⁰ Ngeni kpedzucnema enacurec yaka neandae, imocngoc Kebuac maung fora mi angande. ²¹ Amma ngeni yaka mehama yakanene nasou ngicngac tembulc tembulc ngenaoc yakanginasoc nedacgec goango ine herenginaac homeandae nga goa ngeneng doku homac yombong nema ubangina sufuande. ²² Ngeni amanginau tacmangoc yakangina waraima nebisia, faka imocngoc naric ambac. Ngeni Anutuac kpebung ngadeyunuandae, ifi isoc angandae. Amma toso-focngina goa iwaingina kpac kecdae, yeni gamekpekpe ayemmeandae. Ifi angandaeac dafi dema dengerengunubade, imoc obohode.

²³ Kebungo yoac yomoc edenuu negenai. Nga yoac imoc warac bic edengunuai, imoc yofi, Yudango Yesu doc meec, tofocnac imohainoc yofi fingerec, Yesungo ic sogong mong mema ²⁴ Anutuac ubangerec dema ic sogong mendzicma yofi deec, “Yomoc fusina, imoc ngeneac amma faifaia. Ngeni imoc nema neac negensima nekecbisia.” ²⁵ Nga yaka negec

wisickeu ye kpakenec mema yofi deec, “Kpakenec yomoc sacnaac dzadzahac gboria. Ngeni imoc negecdesoc neac negensima nekecbisia.” ²⁶ Ngeni ic sogong nga kpakenec yomoc negecdesoc, naso imohai Kebuac homec dekperagigecde. Dekperagi kecmagec ye haude.

²⁷ Ngic mong eweheiheia kpac Kebuac ic sogong nga kpakenecfunac neudeu Kebuac sacfusiac turunga imoc yearu fingerude. ²⁸ Ifi anu ngicngac tembuc tembuc ngeni ngenaoc isingememaguc ic sogong nema kpakenecfunac nebisia. ²⁹ Ngic mong ye Kebuac sacfusia mi hentegecma engsac neude, ye nenedokuyau kopocsicac turunga meficgemiude. ³⁰ Fakangina ifiac amma botucnginai ngicngac homac yeni kucmama nga hafeinginagoc andae. Amma goa yeni bic wangunuma homegec. ³¹ Nga nenang tembuc tembuc hanianina faka forau hengising annideu kopocsicac turunga nenannu mi habac. ³² Anutungo ngade bangec nga kurumeng memanganema meickeude, nenang imocgoc manganebinggac ye kopocsicac turungango metinnunuude.

³³ Tosofocna, imocac amma yofi ande, ngeni yaka negecdeac kpeturanggema haandae, naso imohai ngicngac ogofocngina waraima megecdeac tomai ambisia. ³⁴ Nga ngeni tutumangnginai kopocsicac turunga meficgebauac ngic mongngo hereaac homeudeu ye amean tacma yaka nemaguc habeso. Nga yoacna tosea fede, imoc ngenearu hamaguc torokpema edengunubade.

12

¹ Tosofocna, Asuac ua fede, ngeni imocac wiac negenggecdeac negenduae. ² Ngeni Anutu mi negensinggema kecgec, naso imohai hadehade nga yafing yeni nemuonga yoacngina kpac, yenearu wangeengunugec ngeni modacyunuma engsac kengkecgec, ngeni imoc negendae. ³ Imocac amma yofi deba negembisia, Anutuac Asungo ngic mong meu yeng yofi mong mi deude, “Yesu ye sowethagoc.” Nga Tiri Asungo ngic mong meu yeng, “Yesu ye Kebu.” ifi naric deude. Asu siriha mongngo yearu ua meu ine imoc deudeac obohoude.

⁴ Asungo wosoefahaac amma kuc hania hania nemmeande, imoc sasawa Asu mocgu, yearunac hakecde. ⁵ Nga Kebungo ua hania hania nemmeande, imoc sasawa Kebu mocgu, yearunac hakecde. ⁶ Amma Anutungo sing hania hania kuha mederenemme-ande, imoc sasawa Anutu mocgu, yearunac hakecde.

⁷ Asungo ngicngac mefincnunuudeac arengfora tembuc tembuc menunuma kekecninau kuha mekperagiude. ⁸ Amma Asungo ngicngac menunuu mongngo yoac negen negentegecgcoc deude nga mongngo yoac keme kemea deude. Nga Asu mocgungo nenearu ua imoc meude. ⁹ Mongngo Asuarunac negen negensing seria meude. Nga mongngo yearunac hafei mengec mengereac kuc hania hania meude. ¹⁰ Asu imocngoc ngic mong faka hania hania kuhagoc meudeac negen negeng miude. Nga mongngo profete yoac deudeac negen negeng miude. Amma mongngo asu hania hania isingyunuudeac negen negeng miude. Nga mongngo nedzarangyoac hania hania deudeac negen negeng miude. Amma mongngo nedzarang yoacfusing yoac merenudeac negen negeng miude. ¹¹ Asu ye mocgu amma yennoc ua sasawa mekecma negen negenga nga songoya modacma kuha arengfora tembuc tembuc mederenemmeude.

¹² Sebinina imoc mocgu nga imocac tosea homac fekende. Imocac tosea sasawa kpeturanggegoc sebi mocgu anude. Nga Kristoaru siriha ifi isocngoc fede. ¹³ Asu mocgungo kpeturannunuma doku nadzicnemmeu sebi mocgu aning. Nenang yuda ngicngac me grik ngicngac me wanac areng me witicnina kpac kecdimbe, nenang sasawa Asu mocgungoc mema doku isoc nedaring.

¹⁴ Sebinina imocac tosea homac fekende, imoc wiac mocgu kpac. ¹⁵ Nga haningo yofi debac, “Ni mari kpac, imocac amma sebiac tosea mong mi anduae.” ye sifu sebigoc torokpema sebiac tosea anude. ¹⁶ Nga kedzacngo debac, “Ni kic kpac, imocac sebiac tosea mong mi anduae.” ye sifu sebigoc torokpema imocac tosea anude. ¹⁷ Anu sebingo hafoangoc kicsac ambac dede ye yoac negenudeac osibac. Me hafoangoc kedzacsac

ambac dede ye homuna negenudeac osibac. ¹⁸ Yaguc yofi ande, Anutungo negen negenga nga songoya modacma sebiac tosea sasawa tembac tembac sebi mocguaru arengyunuma torokpeyunuec. ¹⁹ Anu sebiac tosea sasawango siric mocgusac ambac dede yeni kpeturanggema sebi mocgu hafoangoc naric mi ambau. ²⁰ Sebi ye mocgu nga sebiac tosea yeni homac.

²¹ Nga kicngo mariaac yofi naric mi deude, "Ni gea kpac tembac naric kecbade." Amma orucngo haniac ifingoc yofi naric mi deude, "Ni ngeria kpac tembac naric kecbade."

²² Imoc kpac, sebiac tosea goa kucngina mamea deandimbe, yenennoc sebininau uatoa yombong meandae. ²³ Nga sebiac tosea goa negenni eweheiheia kpac, yeni eweheihei monggoc ayemmemma kperacyunuandimbe. Amma sebiac tosea goa henggecdeac negenni gameagoc angkecde, imoc faka gombunga modacma kperahokecdimbe.

²⁴⁻²⁵ Nga sebininaac tosea goa eweheiheinginagoc, yeni kperacyunubesonga mi negengandimbe. Amma sebinina tosea yenaocngoc tohoemebauac Anutungo sebinina arenggema sebinina tosea goa mamea negengandimbe, yeni ine monggoc eweheiye meec. Eweheiye memma yeni socfungoc garengemegecdeac ifi anec. ²⁶ Amma sebiac tosea mongngo kpendzeng kpeudeu sebitosofora yenahafoengoc meflicgema kpendzeng kpegecde. Nga sebiac tosea mong dengereudeu sebiac tosea sasawa yeni yenahafoengoc sogaijegede.

²⁷ Anu ngeneng ine yofinenggac Kristoac sebi amma tembac tembac sebiaac tosea andae. ²⁸ Amma Anutungo kpebunnu ngicngac goa yofi faiyunuec, warac warac aposoro nga yeneac ngadeau profete amma yeneac ngadeu mitiac kpoukpou faiyunuec. Ifi faiyunumaguc goa faka kuhagoc megecdeac faiyunuec. Ngicngac goa yeni hafei ua hania hania megecdeac Asungo imocac kuc yemmeec. Amma ngicngac meficyunugecdeac areng goa faiyunuec nga wiac garenggecdeac ngicngac ifia faiyunuec amma goa nedzarangyoac hania hania degecdeac faiyunuec.

²⁹ Anu nenang sasawango aposoro mi annide nga sasawango profete mi annide, kpac. Amma sasawango kpoukpou mi annide. Nga sasawango kucfaka menideac negen negeng mi mekecdimbe. ³⁰ Amma hafei ua hania hania menideac Asungo imocac kuc nenang sasawa mi nemmeec. Nga sasawango nedzarangyoac mi deandimbe amma sasawango yoacninausing imoc mi merengandimbe.

³¹ Anu ngeni Asungo wosoefahaac amma kuc nemmeande, imocac engenaya megecdeac serima kecbisia. Amma sing mong torokpema edzacngunubade imocnggo sing sasawa feracyunude.

13

¹ Ni Asuac kucfu yoac hania debai me Asuac kucfu angero yeneac yoac hania hania debade amma ngicngac yeni heresongogoc ine mi hoangyunuma kecbai, imohai ni gonggong isoc arohma me tambaring isoc udumengtoasac angkebade. ² Amma profeteyoac debai dede nga negen negeng keme kemea sasawa negentegecdeac amma negen negentegecnagoc kecbai dede tiki meickebadeac negen negensinna imocacsoc fenende amma ngicngac yeni heresongogoc ine mi hoangyunubai foraya mong mi meficgebai. ³ Nga dzofinacna sasawa mederema ngicngac yemmebai amma sebina meemma homecfu faibai nga ngicngac yeni heresongogoc ine mi hoangyunubai dede ni foraya mong mi meficgebai, kpac.

⁴ Heresongogoc hoanggemema kekec, imocnggo ngic monggac modzotiti mi negenude, ye yumea kefude. Nga imoc keracmanganga kpac kecma yengena yoac homac mi deude amma sebiengeng mi anude. ⁵ Ye faka mi angana, imoc mi amma yengenasa mi negensiude. Ye herebuya kpac kecma turungyoac mong mi deude. ⁶ Ye faka manganaac amma ubangerec mong mi negenude, kpac. Ye faka foraac ine sogaiude.

⁷ Ye wiac monggac modzea mi tiude. Ye wiac sasawa negensinggeude amma wiac sasawa fingerudeac negensima kecma, imocac kucmama mi anude. Nga wiac hania hania fingecmiu serima nanude.

⁸ Heresongogoc hoangemema kekec, imocngo naric mi kpac anude. Profeteyoacnina imoc ine kpac anude amma nedzarangyoacnina imoc meickeu kpac anude nga negen negennina keme kemea, imoc ifingoc kpac andarude. ⁹ Negen negennina amma profeteyoacnina imoc wiac nobohasac nemme nemmea. ¹⁰ Nga wiac hafoa fede, imoc Anutuarunac hauguc wiac noboha nemme nemmea, imoc kpac andarude. ¹¹ Ni medac kecma medacbiscicac siricfu faka negensima yoac dekefai amma medacbiscicac siricfu negen negeng isingga gema arenggekefai. Kecma ngic amba nambarac kekec meickeu yada sing keidue.

¹² Anu yofinenggac wiac hengandimbe, imoc wikinnu onga ireckea kpac, ifisac wiac hengkecdimbe. Ngade kecma wiac fora kicngo hennide. Yofinenggac wiac noboha negengandimbe. Anutungo hafoangoc negennenec, ni ifi isoc naso imohai wiac hafoangoc negendacbade. ¹³ Ifi anu wiac harebecngo feengkefude, imoc nenang Kebu negensinggedimbe nga kekecseri febesande imocac negeng amma heresongogoc hoangemema kekec. Nga wiac harebec ynearunac wiac mocgungo engena ande, imoc ngicngac ogofocnina heresongogoc hoangeme kekec.

14

¹ Ngeni heresongogoc hoangeme kekecac angemmebeso. Amma ngeni Asuac faka megecdeac songongina kuneng ambeso. Amma ngeni profeteyoac megecdeac negenggec engena yombong febeso. ² Mong ye nedzarangyoacfusing yoac deande, ye ngic nenanggoc yoac mi deude, kpac. Ye ongaasuyango yoac keme kemea Anutu edeu, ngic monggo imoc naric mi negentegerude. ³ Nga mong ye profeteyoac deande, yeng ngicngac ubaherengina midima meserinunuma nanggenunuude. ⁴ Nga ngic nedzarangyoac deande, ye yengena meseriemeude nga profeteyoac deande, yeng kpebung meserinunuude. ⁵ Anu ngeni sasawango nedzarangyoac degecdeac negemba ngereede. Nga ngeni profeteyoac degecdeac songona kuneng ande. Monggo nedzarangyoac dema yoara mi merenudeu ye ngic profeteyoac dede, yeac mamea anude. Nga yeng yoara merenudeu ye ifingoc kpebung meseriu socngira mocgu anecde.

⁶ Tosofocna, ngenearu hama yoac goa dekperagingemmbai me yoac keme kemea goa edengunubai me profeteyoac debai me kpoukpouyoac goa debai dede imocngo memeficngina ambac. Ni ine ngenearu hama nedzarangyoacsac debai dede, imoc memefihia kpac ambac.

⁷ Imoc ifingoc fora yofi ande. Kungac nga gita yeri kekecngira kpac amma yeri sifu udumengngiragoc. Ge imoc eng sicsauc kpena udumenga siriha mi fingerudeu ngicngac yeni kungac me gita imocac ubea obohogecde. ⁸ Amma dzikacac tomengngo udumenga gombunga mi fingeru ngic yeni dzikacac naric mi efaigecde. ⁹ Ge ifingoc yofi negembe-sena, ubagau yoac dindingac denadeu ngicngac yeni yoacga naric negentegecgecde. Ge ine sicsauc nga kpeboronggoc denadeu yeni yoacga obohogec yoac sawau engsac denade.

¹⁰ Yoac hania hania bangecfu fekende nga yoac mong titiha kpac, imoc mi fede. ¹¹ Ni ngic monggac yoac siriha mi negentegecbadeu yeng yoac deu yeac kicfu kuricngic ambade nga yeng ifingoc neac kicfu kuricngic anude. ¹² Ngeni Asuac faka megecdeac homac angemmeande nga ngeni Asuac fakango kpebung meseriyunuande, imoc ifingoc megecdeac mamangkibisia.

¹³ Imocac mong ye nedzarangyoac deude, yeng yoac imoc ifingoc merenudeac Anutu numumbeso. ¹⁴ Ni nedzarangyoacfus sing numuduaeu ongaasunango numuude, fora. Nga negen negennango ine fora mong mi meficgeude.

¹⁵ Ifi anu dafi ambesonga? O, ni ongaasunango numubade nga negen negentegec-nagoc ifingoc numubade. Ni ongaasunango dedengerec yegec heibade nga negen negentegec nagoc ifingoc dedengerec yegec heibade. ¹⁶ Anu ongaasugango Anutu dengerenadeu ngictehec yeni geac dedengerec torokpema, "Imoc fora." degecdeac obo-hogecde. Yeni yoacga mong mi negentegecgec. ¹⁷ Nga ge geanggaoc Anutu dengerena imoc ngereede. Amma yoacga ine ngic ogofocga mi meseriyunuude. ¹⁸ Ni nedzarangyoac

deanduae, imocngo Anutu dengereduae. Amma ngeni feracngunudacma nedzarangyoac homac yombong deanduae. ¹⁹ Ni neanna songoac debade nga kpebung botucnginai kecma yoacna 5 negen negentegecnagoc debade, imocngo nedzarangyoacna teng tauseng ferahade, imoc negenduae. ²⁰ Negen negensinggoc tosofocna, ngeni negen negentegecnginai nambarac isoc mi kecbisia. Ngeni angammeme manganau ine sabac isoc kecbisia nga negentegecnginai yada kecbisia.

²¹ Dedeseriyoacfу yoac yofi oho ohoya fede,
“Yoacfusing siriha mong nga ngicngac yeneac enacbobicnginai dedenginango mong
ande, ni ngicngac imoc meyunuma yoacna debade nga ngicngac yeneng ine
kedzac mi kpegecde, *KEBUNGO ifi dede.*” (*Yesaia 28:11-12; Dedeseri 28:49*)

²² Ngicngac negen negensingngina kpac kecdae, yeneng kufaka bibiagoc henggecdeac nedzarangyoacngo imocac faifaia fede. Ngicngac negen negensingnginagoc kecdae, yeneac amma ine mi fingerude. Amma profeteyoac ngicngac negen negensingnginagoc yeneng bibiagoc anggecdeac faifaia fede. Imoc ngicngac mi negensinggedae, yeneac kpac. ²³ Kpebung sasawa kpeturanggema tacma nedzarangyoac degec ngic monnunac me ngic goa negen negensingngina kpac ngeneac botucfu erema imoc ngenemma degecde, “Ngeni ubangina sufude.” ²⁴ Nga ngeni sasawango profeteyoac dema tacmagemc ngic monnunac me ngic negen negensinga kpac ngenearu ereu yoacnginango ye hereau meu yengena kopocsiha engenu imocngo yoacfу faiude. ²⁵ Faiu ye ubahereau negen negeng mekefu sufuma fede, imoc didiu fingectegerude. Ifi fingectegeru yeng makpema kicmesuya mesufuma Anutu dengerema deude, “Foracngoc, Anutungo ngeneac botucfu kecde.”

²⁶ Tosofocna, yofi naric ambesonga. Ngeni kpeturanggema tacgecde, imohai ngicngac sasawango ngicngac ogofocngina wiac goa edeemegecdeac mehabisia. Mongno mitiyegec mong heingemmebeso nga mongngo yoac edekpou angemmeheso amma mongngo yoac goa dekperagingemmeheso nga mongngo nedzarangyoac debeso nga mongngo imoc merembeso. Ngeni yoac sasawa imoc kpebung meserigecdeac debisia.

²⁷ Anu ngicngac goango nedzarangyoac degecdeu yohockang me harebecngosac debisia. Amma imoc arennu degec mongngo imoc merembeso. ²⁸ Nga nedzarangyoac imocac merem merenggac ngic mong imohai mi tarudeu ngic imoc ye tutumangnginai waickema tacma yengena hereusac Anutugoc denegeng ambeso. ²⁹ Nga kpekpeturanggac amanginai profete yohockang me harebecngosac profeteyoac debisia. Ifi degec ngicngac tosea ngeneng profeteyoacngina negemma isinggebisia. ³⁰ Anu ngic mongngo waraima yoac deu yoac sufu sufuyaac dedekperagiyaoac mong tacde yearu haudeu ngic waracngo waickemanu ogeango debeso. ³¹ Ngeni sasawango profete yoac naric debisia. Nga debeso dema ngic me ngac mocgu mocgungo arennu yoac imoc debisia. Ifi anu ngicngac sasawango negeng megecde nga ngeni ubaherengina midima meseriemegecde. ³² Profete asungo ngicngac profeteyoac deandae yeneac negeng tofohoande. ³³ Anutu ye sicsaucac Anutu kpac, ye ua arengagoc mema ruaea maficgeande.

Kpebung kpetiac, imocac manau ngac yeni yoacngina waickema kecandaе, ifi isoc ³⁴ ngenearu ifingoc ambesonga. Ngac ngeni yoacngina waickema tacma kpebunggac negen negeng modacbsia. Ngeni imohai yoac yoac mi ambisia. Singyoacngo imocac ifi dede. (*Fingec fingec 3:16*)

³⁵ Ngeni wiаc monggac hania obohoma negembeso angemmehu amanginai kemma ewefocngina kpesiyemmebsia. Ngac mongngo kpebung botucnginai yoac yoac anude, imoc faka gameagoc. ³⁶ Anutuac yoac imoc ngenearunac hanahema mi fingerec nga imoc ngenearusac mi kemma fede, kpac.

³⁷ Ngenearunac mongngo yengenaac negenudeu, “Ni profete, ni Asuac negenggoc kecduae.” yeng kibi ohoanduae, imoc hennegeng amma imoc Kebuac singyoac, imoc bic negenghomeude. ³⁸ Nga ngic mongngo yoac yomoc osoma waudeu ngeni ye ifingoc wabisia.

³⁹ Imocac negen negensinggoc tosofocna, ngeni profeteyoac degecdeac homac angemmebeso. Nga nedzarangyoacac mi kpetaribisia. ⁴⁰ Nga ngeni wiac sasawa sirihau nga arengagoc ambisia.

15

¹ Tosofocna, ni siduc gombung dekperagingemmeba ngeni imoc negemma hoanggema seria mekecgec, imoc monggoc heigboringemmabadeac negensiduae. ² Nga yoac edengunuba negenggoc negen negensingngina seria imohai feudeu imocngo kopocsicfunac mesingunu komoc kpegecde. Amma ngeni imoc wagecdeu negen negensingngina uaya kpac anude. ³ Ni hanahema Kebuarunac yoac engena yofi mema ngemmeai, Kristongo nenang kopocsicninaac amma homeu ⁴ tonggogec uameme harebec anu Anutungo megboriu yarec. Faka imoc mi fingecmanu imocac negen negeng mitikibiu bic oho ohoya feec, imoc fingerec. ⁵ Nga ye Petoro fingecmima ngade medacfora 12 fingecyemmeec.

⁶ Imocac ngadeau tosofocnina kpetengina 500 ferahade, yeni yenahafoc tacmagec yeng yeneac kicfu fingeru henggec. Anu yenearunac goa bic homegec nga homacngo yofinenggac kecdaengoc. ⁷ Ye imocac ngadeau Yakobo fingecmima aposoro sasawa fingecyemmeec. ⁸ Nga wisic wisickeau fingecnenec. Nenggac mongngo sabaha kebangsac meude, ni ifi isoc amba yeng sifu fingecnenec. ⁹ Ni Anutuac kpebung yunukporac ayemmemma kefai nga ngicngac yeneng aposoro kpacnuandae, imocacsoc mi anduae, neng ine aposoro yeneac mameangina. ¹⁰ Nga Anutungo wosoefahaac amma ye dafiugeng fainuu ni ifianoc yaguc kecduae. Kecbare wosoefaha eng mi feec. Ni sasawa feracyunudacma ua homac meai. Nga imoc neanna kucac kpac, Anutuac wosoefac nigoc feec, imocngo ua imoc meec. ¹¹ Amma ni nga yeni imocnoc dekperagini ngeni modacma negensinggegек kecdae.

¹² Anutungo Kristo homecfunac megboriec, imoc edekpou angemmekedimbe nga ngenearunac ine goango deandae, "Homecfunac yacyac imoc mi fede." yeni ifi deandae, imoc mi heide. ¹³ Homecfunac yacyac mong mi febac dede Kristongo ifingoc homecfunac naric mi gborima yacbac. ¹⁴ Nga Anutungo Kristo mi megboriu yacbac dede neni yoac edekpou angemmekedimbe, imocngo uaya kpac ambac nga ngeneac negen negensingngina ifingoc uaya kpac ambac. ¹⁵ Homecfunac yacyac mi febac dede Anutungo Kristo mi megboribac, "Anutungo Kristo megboriec." imoc ikocfu hepuc amma debing dede Anutuac dedekperagingic ikoha ambing.

¹⁶ Ni monggoc deba, homecfunac yacyac mi febac Kristo yeng homecfunac naric mi gborima yacbac. ¹⁷ Kristongo homecfunac mi yacbac dede ngeneac negen negensingngina imoc uaya kpac ambac nga ngeni kopocsicnginagoc kecbau. ¹⁸ Nga ngicngac goa yeni Kristogoc kpeketahemma kecma bic homegec, yeni bic sufuma kpac ambau. ¹⁹ Nga nenang yaguc kecma Kristoac amma kekecseri menide, imoc negensima kecdimbe, imocac ngicngac yeni neneac ubamangangtoa naric negembau. Nga ngicngac sasawa feracyunuma ebicninagoc kecbing. Nga imoc fora mi ande.

²⁰ Foracngoc, Kristongo homecfunac gborima yarec. Ye homecfunac yacyac imocac buma heima ngicngac homemea yeni waraiyemmemma homecfunac gborima yarec. ²¹ Ngic mocgungo homecac sing meecac homec fingerec. Imocac amma ngic mocgungo ifingoc sing meu homemea yeneng homecfunac gborima yacgecde. ²² Ngicngac sasawango Adanggac amma homec meficgegoc yeni sasawango ifi isocngoc Kristoac amma gborigecde. ²³ Amma ngicngac nenang tembuc tembuc arenggoc yacnide. Kristongo waraima yarec amma yeng kecma monggoc haude, naso imohai yeac arengfora yeni gborima yacgecde. ²⁴ Ifi fingecmanu naso wisickeude. Yeng imohai kia gawamang nga sasawa kucnginagoc bangecfu nga sawau kecdae, yeni meicyunudaru kpac anggec eucererenga Anutu Manggacac mariu faiude. ²⁵ Kebu ye ngictau kecmanu Anutungo ngabafora sasawa hania bageau faiyunuude.

²⁶ Ifi faiyunuma ngabaya wisic wisickea, imoc kpara homec, ye meickeu kpac anude.
²⁷ Nga

“Anutungo wiac sasawa yeac haniaac bageu bic faidarec.” (Mitiyegec 8:6)
 Amma “Wiac sasawa.” imoc yeac haniaac bageu faiec, imoc deu nenang yofi ireckebisina, Anutu ye yengenaoc Kristoac bageu mi faiemeec. ²⁸ Yeng wiac sasawa Kristoac bageu faiu Medacngo Manggacac bageu faiemema kefude. Nga Manggacngo wiac sasawa Medahaac bageau faidarec, ye yengenaocngoc kecma ngicngac sasawa yeneac oruha anude.

²⁹ Ngicngac goa yeni homemea memefic ayemmegecddeac negensima doku nadzicandae. Homecfunac yacyac mong mi febac dede faka imoc uaya kpac ambac. ³⁰ Uanaac amma ngic yeni nasosoc nubesonga angandae. Nga homecfunac yacyac mi febac dede ni uaac fakana sicsauc ambac. ³¹ Kebunina Yesu Kristoac amma tosofocna ngeneac amma wenacsoc homeanduae, fora. ³² Ni Efeso amau wasaiyang yenigoc ewekpekpe anai. Amma ni ngicngac sicsauc kecdae, yeni isoc kecbai ewekpekpena imocac fora mong mi fingeru yofi debai,

“Homecfunac yacyac mi feudeu nenang yaguc nenedoku naric nema wereckenu homedacnide.” (Yesaia 22:13)

³³ Ngic yeneng ikocfu wangecngunubauac ngeni henghomema kecbisia. Manganameme yenigoc kecnideu imocngo fakanina gombunga memanganeude. ³⁴ Ngeni ubasufu yoac wama sing dindingac modacma kopocsic mong mi maficgebisia. Ngenearunac goango Anutu mi negemmidae, imoc gameagoc anu edengunudiae.

³⁵ Goa yeneng ine yofi kpesigecde gedang, “Homemea yeni dafiugeng gborima yacgecde nga sebi dafia mema yacgecde?” ³⁶ Ge ngic ubafong yombong. Wiac homecan nec, imoc eng mi nemonggeande, kpac. Wiac eseua homeu gboriango kekehagoc ereude.

³⁷ Amma gbome homecannec, imoc foradzuamagoc kpac, imoc eng homecnade. Imoc wit gbomea me gbome goa homecnade socngina mocgu ande. ³⁸ Nga Anutungo songea modacma gbome mocgu mocguac siriha modacma foradzuama miande. ³⁹ Sebinina sasawango siriha mocgungoc mi ande, kpac. Ngic nenang sebinina siriha mong nga yangkposi yeneac mong amma neng yeneac mong nga kondungyang yeneac mong.

⁴⁰ Amma kurumenggac sebi nga bangecac sebi, yeri siricngira mong mong andape. Kurumenggac sebi ye yengena kibikperagiagoc nga bangecac sebi imoc yengena mong.

⁴¹ Wenacac kperagi imoc yengena siriha mong nga afoac kperagi imoc yengena siriha mong amma asomenggac kperagi, imoc yeni siricngina mong ande. Amma yeni kperaginginaac siriha tembuc tembuc ande.

⁴² Homecfunac yacyac, imocac siriha ifinoc fede. Ngic sebingina bangecfu faiandimbe, imoc perekema dzamema kpac anude. Nga Anutungo imoc monggoc megboriu imocngo fekengkebesande. ⁴³ Fareng ye kpauema homuna fiu bangecfu tonggoni, imocngo kibikperagiagoc amma gborima yarude. Wiac kucmama anu bangecfu homecni, imocngo kuhalogoc nemonggema yarude. ⁴⁴ Ngic sebingina tonggoandimbe, imoc sacfusigoc nga Anutungo sebingina megboriude imoc asugoc. Sebi ye sacfusigoc feudeu asu sebi ifingoc feude. ⁴⁵ Imocac yoac yofi oho ohoya fede,

“Adang warac warac, ye ubaongayagoc nga kekehagoc fingerec.” (Fingec fingec 2:7)
 Fingeru Adang wisic wisickea, ye asu kekeha nemmeude. ⁴⁶ Asu sebi ye waraima mi haec, kpac. Sebi sacfusigoc yeng ine hanahema hamanuguc asu sebi ye ngade haec. ⁴⁷ Ngic waraima haec, ye bangecngo memea bangecfunac fingerec. Nga yeac ngadeau haec, yeng kurumennunac haec. ⁴⁸ Nenang ngic bangecngo memea, ye isoc kecdimbe. Nga kurumenggac ngic kecde, ye isoc kurumennu kebesandimbe. ⁴⁹ Nenang bangecngic yeac siric meing, ifi isocngoc kurumenggac ngic yeac siric mema kecbesandimbe.

⁵⁰ Tosofocna, sebi sacfusigocngco Anutuac eucererenggac maridzoming naric mi meude, kpac. Wiac perekema dzameude, imocngo wiac fekengkefudeac maridzoming ifingoc naric mi meude, imocnog edengunudiae. ⁵¹ Yoac mong sufufuya fede, imoc dekperagiba negenggec, nenang sasawa mi homemina Kebungo homemea yenigoc

nenahafoc sasawa heimerennunu siric mong andacnide. ⁵² Imoc yofiac, trampet wisic wisickea imocac nasoyau trampet mongngo arohomana wiac sasawa bic yombong piratac heiande me kicparac kpouandimbe, ifi isoc fingerude. Yeng ngicngac bic homegec, yeni megboriyunu yeni yacma kekec dzonggo dzonggoya kpac megecde. Ifi fingecmanu nenang ifingoc heimerennunu siric mong annide. ⁵³ Anutungo wiac hoac hoaea nga homemea ye kekec dzonggo dzonggoya kpac ngakpi isoc heimiude. ⁵⁴ Nga Anutungo wiac hoac hoaea nga homemea kekec dzonggo dzonggoya kpac ngakpi isoc heimiude, yoac yomoc mitikibiu oho ohoya feder, imoc fora fingerude,

“Kekecnggo firang amma homec gbokou kpac anec.”

(Yesaia 25:8)

⁵⁵ “Homec ge firang monggoc mi annade, waega imoc kpac anec.”

(Hosea 13:14)

⁵⁶ Homecac waea, imoc kopocsic nga kopocsic kuc imoc dedeseriyoac. ⁵⁷ Nga Anutungo sing meficgenemmeu nenang Kebunina Yesu Kristoac amma firang angkecdimbe, imocac Anutu ubangerec ammidimbe. ⁵⁸ Tosofocna, Kebuac ua meandae, imoc sicsauc mi meandae, ngeni imoc negendae. Ngeni imocac Kebuac ua mi wabisia, kpac. Ngeni nasosoc seria namma imoc mekecbisia.

16

¹ Kpetiac areng Yerusarennu kecdae, yeneac amma hiedzo yofinenggac kpedzuc-nekecdimbe, imocac yoac yofi deba, ni Garata kpebung edekpou ayemmeai, ngeni imocngoc ambisia. ² Ngeni sondasoc tembuc tembuc dzongina ereandesoc, imohacnac tosea hendzicma amanginau faigec tacbeso. Ifi anggec ni habade, naso imohai kpekpedzucac uatoa mi menide. ³ Ngeni ifingoc ngic goa meisinyunugec nga neng hama Yerusarennu ubangerecac hiedzo nga ngic kibinginagoc naric sueyunubade. ⁴ Nga negemba naric kekenggac siric anu ni ifingoc yenigoc nenahafoc kennide.

⁵ Ni Makedonia kemmaguc ngenearu sing habade. Nocac ni Makedonia prowins ferecgemaguc habade. ⁶ Hama ngenigoc tacba wisickeu noboc me noboc kembade. Uaac titinga fingeru ngenigoc naso herea isoc kecbade. Naric anude isoc nomang naso hafoangoc kecbade. ⁷ Ni yofinenggac ngenearusing eng ferecgema kembadeac mi anende. Kebungo negemmanu hama naso herea isoc ngenigoc kecbadeac ine negensiduae. ⁸ Amma Efeso bangecfu kecbare Pentekos naso wisickeu monggoc wama kembade.* ⁹ Yomohai ua kuneng yombong mebadeac sing sarima feder. Nga ngabafocna homac yomohai ifingoc kecdae.

¹⁰ Timoteongo ngenearu haudeu ye negengyohoha kpac botucnginau kefudeac areng faibisia. Ye ni isoc Kebuac ua mema kecde. ¹¹ Ngenearunac mongngo ye mi ngadehebeso. Ye monggoc nearu dzigeneudeac deu ngeni singa meefaima ruaegoc suegec habeso. Ni nga negen negensinggoc tosofocnina neni yeac tomai kecnide.

¹² Ni Aporo homac igockema yofi negenai. Yeng kpebunggac areng goa yenigoc ngenearu habeso. Amma ye bic haudeac mi ammiec. Ngade kecma titinga mong fingeru naric haude. Yeac ifi deduae.

¹³ Ngeni garengemema efaima kecma negensinggema serima nambisia. Ngeni ngic siric amma seserigoc kecbisia. ¹⁴ Amma ngeni hoangemema heresongogoc wiac sasawa ambisia.

¹⁵⁻¹⁶ Stefana nga arengfora yeneng Akaia bangecfu hanahema uaac buma heima ubamereng anggec. Yeni ubamereng amma hanahema kpebung kpetiac meficngunugec, ngeni ngicngac imoc negengyunudae. Tosofocna, igocngunuma yofi deduae, ngeni ngicngac ifia nga goa yenigoc kecma uatoa mema kecandae, yeneac yoacngina modacbsia.

¹⁷ Stefana nga Fortunato amma Akaiko, yeni ngeneac tatac mema nearu hagecac amma ubangerec negenduae. ¹⁸ Amma yeni neac ongaasu nga ngeneac ongaasu momoc midigec ngereeing, imocac ngeni ngic ifia eweheiymmebisia.

¹⁹ Asia prowins manau kpebung fekendae, yeneng wenacngerecngina faigec ngenearu hade. Nga Akpira amma Prisika, yereac amau kpebung kpedzucneandae, yeni Kebuac

* 16:8: Pentekos imoc ifingoc Yuda yeneac hombang mong.

kpacfu wenacngerecngina suegec ngenearu hade. ²⁰ Amma negen negensinggoc tosofocnina sasawango wenacngerecngina suegec ngenearu hade. Ngeni titikokoc kpetiac angemema wenacngerec angemebsia.

²¹ Ni Paurongo wenacngerecyoac yomoc neanna marinango ohongemmeduae. ²² Mong ye Kebu heresongogoc mi hoanggeudeu sowecngo yeac witiu febeso. O Kebu, ge hana.

²³ Kebunina Yesuac wosoefacngo ngenigoc febeso. ²⁴ Ngicngac Yesu Kristogoc kpeketahemahem kecdae, songonango sasawa ngenearu febeso. Imoc fora.

**Paurongo
Korinti Kpebung Yeneac Ngadekibi
Ohoe**

¹ Anutungo Pauro negennenu Yesu Kristoac aposoro anduae. Ni nga tosonina Timoteo, nereng kibi yomoc Anutuac kpebung Korinti taonnu kecdae nga kpetiac areng sasawa Akaia bangecfu kecdae, ngenearu faidipe. ² Mannina Anutu nga Kebunina Yesu Kristo, yereac danggunuc nga ruaengo ngenearu febeso.

³ Nenang Kebunina Yesu Kristo, yeac Anutu Manggac kenehebisina. Yeng Manggacnina amma ye nenanggac ubia manganeande. Ye Anutunina amma memeseri hafoangoc, imocac mingina. ⁴ Nenang ebic sasawau kecni yeng meserinunuande. Imocngo meefainunuunenang yeac memeseri mema ngicngac ebicnginagoc yenearu kemma meseriyununide. ⁵ Kristongo kpendzeng kpeec, nenang kpendzeng ifia ebirangoc kpeandimbe, imocac Anutungo Kristoac amma ebirangoc meserinunuude. ⁶ Ngeni memeseri megecde nga komoc kpegecdeac ebic tofohoandimbe amma meseringununideac Anutungo meserinunuude. Ifi meseringununi ngeni ebicnginau serima nanggecde. Ngeneac ebic nga neneac ebicngo siricngira mocgu andape. ⁷ Nenang nenhafoc ebicnina medereandimbe, ifi isoc memeserinina medereemenide, imocac ngeneac negengyohoc mong mi mekecdimbe.

⁸ Tosofocnina, Asia bangecfu nenearu ebic fingeru kpendzeng kpeing, ngeni imoc mi obohogecdeac negemma yomoc edengunudimbe. Ebictoango memanunuma kucnina kpeu ubahereninau yofi negening, “Nenang homecac areng andimbe.” ⁹ Anu Anutungo homecfunac ngicngac megboriyunuande, ye negensinggenideac yeng homecac arennumac mesinunuec. Nenang kucngo soha mi ande, ye imoc edzacnunuudeac ifi anec. ¹⁰ Yeng homecac arennumac mesinunuec amma ye ngade ifingoc homecac arennumac mesinunuude amma mesinunubesande, neni yeac ifi negensinggema kecdimbe. ¹¹ Nga imoc fingerudeac ngeni nunumuuf meficnunubisia. Nga Anutungo danggunuha nemmeude, imoc fingeru ngicngac homac yeneng hemma neneac negemma Anutu dengeregecde.

¹² Ngicngac yeneac kicfu nga ngeneac kicfu amma Anutuac kicfu angammemenina gombunga nga kpetiac amma kongaha kecdimbe. Amma here negen negennina kpetiac bangec yomohai ifi kecma negenni engena angkecde. Nga uba eseaac ngen negeng modacma botucnginau mi kecandimbe, kpac. Anutuac danggunucngo sing edzacnunuukpetiac kekec kpetofohoma kecandimbe. ¹³⁻¹⁴ Wiac ohongemmeandimbe, ngeni imoc sasawa osoma naric negentegecgecde. Wiac oboc obohoa mong mi ohoandimbe.

Kebunina Yesu, yeac nasotoau ngeni neneac naric negensima sebingina meenggecde nga neni ifi isocngoc ngeneac negensima sebinina meennide. Yofinenggac ngeni kapianecsac negennunudae nga wisic wisickeau ngeni hafoangoc ine negennunugecde.

¹⁵⁻¹⁶ Ni imoc negensima yofi arenggeai, neng ngenearusing hama ferecgema Makedonia bangecfu kembade. Kemma monggoc ngenearu dzigenema habade. Haba ngeni Yudaia bangecfu suenugede. Ni ifi ambai dede waraima ngenearu hama dzigeneba monggoc neac amma ubangerec negembau.

¹⁷ Ni imoc hanahema arenggema ngade eng kosa mi wayai. Ni “oc, oc” nga “kpac, kpac” naso socfungoc mi deanduae amma uba eseausing uana mi arenggeanduae.

¹⁸ Foracngoc, Anutu yoacdedea modackecke ngeni ifi isoc yoac edengunuandimbe, ihai “Oc” nga “Kpac” naric mi kpeturanggenide. ¹⁹ Amma ni nga Siriwanu amma Timoteo, neneng Yesu Kristo Anutuac Medac botucnginau dekperagingemmeing, yeng “Oc” nga “Kpac” mi kpeturanggeude, kpac. Yearu oc yoacsac fede. ²⁰ Anutungo wiac nemmeudeac deseriec, ye medahaac negensima “Oc” deec. Ifi deu Medahaac amma dedeseria fora fingerec nga fingeckenude. Fingeckenu Anutungo nenanggac amma

kpac kuneng meude. ²¹⁻²² Yeng ngeni nga nenihafoc Kristoaru nanggenunuude. Nanggenunuunenang ngade kurumenggac wiac menideac yeng yofinenggac Tiri Asuac kerecdokuyango nadzicnemmemma ubahereninau faiec. Faiu imocnggo Anutuac ma anude.

²³ Anu Korinti amau mi hayai, imocac hania yofi, ni botucnginau demeting yoacsac debaiac imoc wama mi hayai. Dedena imoc Anutu yengenaoc negemma hepucna ande.

²⁴ Nga neneng nege negensingnginaac garengtoa mi kecdimbe, kpac. Ngeni Kebu negensinggema serima nandae. Ifi namma ubangerec negenggecdeac ngeni nga nenihafoc ua mekecdimbe.

2

¹ Negen negennango yofi negensidua, ni monggoc ubaebic meficgengemmehabiac wama mi habade. ² Neng hanahema ubaebic meficgengemmehabaeu ngeneearunac monggo ubangerec naric mi meficgenenude. ³ Nga ngeneearu haba goa ngeneng ubangerec meficgenengandae, imocac negemba ngereede. Ngeni ubaebic meficgenembauac kibi mong ohongemmeai. Ni ngeneac yofi negengyombonggeduae, sogac sogai nearu fedeu ngeni sasawango sogaigecde. ⁴ Ni heresongotoagoc hoangngunuduae, imoc negenggecdeac kibi ohoai. Amma herenango dehou anenu ubaebic kuneng mema kiacma kibingina ohongemmehabae, imocnggo ebic ngemmehabae mi ohoai, kpac.

⁵ Ngic ubaebic meficgenemmeec, ye ubaebic nisac mi meficgenenec, kpac. Yeng ine ngeni sasawa ubaebic meficgengemmehabae. Imocac homac mi debade, imocsac deduae.

⁶ Nga ngeni homacnggo ngic imoc kopocsihaac amma demeting bic ammigec, imocnggo yofinenggac soha anu ifi monggoc mi ammibisia. ⁷ Yeng ubamangang ebirangoc kecma kpac ambacac ngeni ine kopocsiha wama demeseri ammima ⁸ heresongongina edzahebisia, imoc seria dema edengunuduae. ⁹ Ngeni sasawango yoacna tofohogecde me kpac, imoc negentegecbadeac kibina ohongemmeai. ¹⁰ Nga ngeni ngic monggac kopocsic wagecdeu neng ifingoc yeac kopocsic wabade. Nga kopocsic mong wabadeu imoc Kristoac kpacfu ngeneac amma waduae. ¹¹ Satanggac faitobannu manunubacac ifi ambisia. Yeng faitobang arenggeande, imocac sirihaac mi obohodimbe.

¹² Anu Troa taonnu hama Kristoac siduc gombung edekpou ayemmebadeac Kebungo singa bic mesarinene. ¹³ Hama Tito hoforaiac ongaasunango ruae mi meficgeu ine dekenec amma faiyunuma Makedonia bangecfu kenai. ¹⁴ Anu Kristogoc kpeketahemeha kecni Anutungo nasosoc yeac firanggac arennu hesicnunuude. Hesicnunuunuruamasoc kenni Yesuac siducnggo homung kerengagoc amma imocnggo uaninau fingecma kengkefude. ¹⁵⁻¹⁶ Kristogoc kpeketahemeha kecni sebihomunnina gombunga Anutuaru enude. Ngicngac komoc kpegecde, yeneac botucfu imocnggo homuna gombunga kekehagoc amma kekec yemmeude. Nga hofeac sing modacandae, imoc yeneac botucfu ine hoachomung kpedzini imocnggo homec yemmeude. Tembuchnina ua imoc naric mi mebing, kpac. Kristogoc kpeketahemeha kecni ifi fingerude.

¹⁷ Ngic goa yeni hiedzotoa kirecgeyemmeudeac negemma Anutuac yoac deandae. Yeni isoc mi angkecdimbe, kpac. Anutungo suenunuunyeac negensima Kristogoc kpeketahemeha kecni ubaherenina dindingac femanu Anutuac yoac dekperagiandimbe.

3

¹ Neni uaninaac hania monggoc edengununide me kibi mong nanggenunuudeac ohoma ngeneearu mehani obohoude, ngeni imoc bic negendae. ² Ngeni ngeneaoengoc neneac kibi andae. Nga Kristongo kibi imoc ubaherenina manau bic ohou ngicngac sasawa yeneng kibi imoc osonegeng angkecdae. ³ Anu neni ngeneearu ua meni ngeneng Kristoac kibi andae, imoc didiu bic fingectegerec. Amma kibi imoc pengdokuyango mi oho ohoaya, kpac. Anutu kekehagoc yeac Asungo ine kibi imoc ohoec. Nga ye imoc tafebisic hocnggo memea, imohai mi ohoec, kpac. Imoc ine ngicac sebfusiac tafeu ngicngac ubaherenginau oho ohoaya fede.

⁴ Yesugoc kpeketahemha kecma yofi negensidimbe, Anutungo uaya nanggema garenggeude. ⁵ Nga nenii yofi negemma naric mi debisina, "Neni naric nenaoc ua imoc menideacsoc andimbe." kpac. Ua menideac kuc, imoc Anutuarunac hanemmekecde. ⁶ Yeng meserinunu dzadzahac gboriaac kingangkpekpe kecnideac. Imoc dzadzahac Mosengo ohoec, ifi isoc kpac. Asungo dzadzahac imoc ubahereninau ohoec. Amma dedeseriyoacngo yoacf u fainunu homenide nga Asungo ine kekec nemmeude.

⁷ Anutungo dedeseriyoac imocac kibi hocfu ohoec. Yoac imocngo homec meficgenemmeec amma sifu kuc nga kibikperagiagoc haec. Moseac kicmesuya kperagiu Israe ngicngac yeni kicmesuyau kic figecdeac osigec. Ngade ine kuha maec. ⁸ Moseac ua areng imoc kuc kibikperagigoc hanahema kuha maecac amma Tiri Asuac ua arenggac kuc nga kibikperagiango wiac imoc monggoc feraheude. ⁹ Ua arengngo yoacf u fainunuande, imocngo kuc kibikperagiagoc anecac amma ua areng sing dindingac meficgenemmeude, imocac kuc kibikperagiango monggoc ferahade. ¹⁰ Ifi anu kuc kibikperagia engenatoa imocngo kuc kibikperagia warac feec yeac kuc memaude. ¹¹ Wiac kuc kibikperagiagoc haec, imocac kuha bic mama kpac anec, fora. Nga wiac feengkefude, imocac kuc kperagiango wiac ifia monggoc ferahaude.

¹² Anu wiac feengkefude, imoc negensima kengeha kpac ua mekecdimbe. ¹³ Moseac kicmesuyaac kperagia, imocac kuha mamanu ye yofi negemma kicmesuya kporucng kperahaec, "Israe ngicngac faka imoc mi hembisia." Nga neneng ine ifi mi angandimbe, kpac. ¹⁴ Yeneac negen negeng ine fonggou ifi anec. Nga yofinenggac kpou kpoufocngina dzadzahac eseaac yoac osoyemmeandae, imohai kporuc imocngangoc seria namma negen negengngina hedzickekecde. Anu ngic yeni Kristogoc kpeketahegecdeu kporuc imoc meicmeickea anude. ¹⁵ Oc, yofinenggac kpou kpoufocngina Moseac yoac osoyemmegec kporuc imoc ubaherengina hedzickekecde. ¹⁶ Nga ngic mong ye ubamereng amma Kebuaru kenudeu kporuc imoc meickema kpac anude. ¹⁷ Kebu ye Asu amma Kebuac Asungo ngicfu kefu ngic ye witiha kpac kefude. ¹⁸ Nga nenang sasawa kicmesunina kperaha kpac kecni Kebuac kuc kibikperagingo kicninau wiking isoc heimerenu yeac onga annide. Amma yeac kperagingo kekecninau yadima saheude. Kebu ye Asu amma Asungo uaya meu faka imoc fingerude.

4

¹ Anutungo wosoefahaac amma ua areng ohoaimoc, imoc nemmeec. Imocac amma kucmama mi angandimbe. ² Neni faka sufu sufu gameagoc sasawa bic wadacma dekerec naric mi angammenide. Amma Anutuac yoac mereng kpereng amma naric mi edengununide, kpac. Yoac fora didiu fingectegerudeac nenii Anutuac kicfu yoara deni ngicngac sasawa here negengnginau naric ireckegecde. ³ Nga siduc gombung deandimbe, imoc goa yenearu sufu sufu anude isoc. Ngicngac imoc yeni hofeac sinnu kemegecde, yenearu ifia fingerude. ⁴ Kristo ye Anutuac onga nga yeac siric. Anu bangec yomocac nemu Satang, ye ngicngac mekundungkpeyunuu negen negensingngina kpac kecdae nga yeni Kristoac siduc gombungng ngicngac mekperagiyemmeande, imoc mi henggecdeac kicpisic anggec. ⁵ Kebu Yesu Kristo dekperaginide nga nenii nenang mi dekperagiemeandimbe, kpac. Yesuac amma ngeneac kingangkpekpe amma kecdimbe.

⁶ Anutungo yofi deec,

"Kundununac kperagi fingecna."

(Fingec fingec 1:3)

Anutu yennoc ubaherenina mekperagikecde. Amma Kristo ye Anutuac kuc nga kibikperagia negentegecde, negen negentegec imocngo yeac kicmesuyaunac hama ubaherenina mekperagiude.

⁷ Nenang enang isoc kecdimbe. Anutuac kibikperagia imocac kuha engena nga imoc dzofinac isoc ubahereninau faifaia fede. Dzofinactoa imoc yearunac haande nga ngicngac yeni imoc negentegecgecdeac yeng imoc ubahereninaac enannu faiec. ⁸ Anu ebic hania haniango noboc noboc igocnunuande, imocngo ine mi dzegenunuude. Nga faka nga uaninaac gagabuma mi ukuni kpeande. ⁹ Ngic yeneng kporacnunumagec Kebungo

naric mi wanunuude. Yeni nunugec manunu sifu mi kpac angandimbe. ¹⁰ Yesuac kekec sebininau fingegegerudeac amma neni Yesuac homec sebininau tofohoma mekecdimbe. ¹¹ Yesuac kekecnggo bangecsebininau fingegegerudeac ngicngac yeni nasosoc Yesuac amma sebinina homecac arenna faigecde. ¹² Nga homec ye nenearu ua ifi mekecmu kekecnggo ngenearu ifingoc uaya mekefude.

¹³ Yoac mong yofi oho ohoya fede,
“Ni negen negensinggoc kefaiac ebicasou ifingoc negensinggumangoc kefai, imocac amma deduae.” *(Mitiyegec 116:10)*

Anu neni ifingoc negen negensinggac Asugoc kecma negensinggema yoac dekecdimbe. ¹⁴ Anutungo Kebu Yesu homecfunc megboriec, yennoc Yesugoc homecfunc megborinuma neni nga ngeni nenahafoc menunuma yengena hoannu fainunu nannide, imoc negendimbe. ¹⁵ Wiac sasawa imoc ngeneac amma fingerude. Nocac Anutuac danggunucnggo torokpeu torokpe ngicngac yenearu hakefu ngicngac homac yeneng ubangerec ebirangoc negemma Anutu dengeregecde.

¹⁶ Sebininango kucmama maficgema kpac ambeso anu Anutungo sifu ubaherenina wenacsoc heigborinemmekecde, imocac nenang ubanina mi maude. ¹⁷ Anu ebic nga kpendzeng kpeandimbe, imoc naso wegenanecsac feude, imocnggo wiac kuneng mi ande. Imocnggo ine sinnina meu kekecseriac kuc nga kibikperagia engenatoa menide. ¹⁸ Wiac kicnggo hengandimbe, imoc nasoya hau kpac ambesande. Nga wiac kicnggo mi hehena, imocnggo fefeseri feude. Imocac wiac kicnggo mi hehena, imohaigeng kicnina fima kecdimbe nga wiac kicnggo hengandimbe imoc wanide.

5

¹ Neni yofi negendimbe, sebininaac bedzo yomoc, imoc bangecfu bedzoac onga ande. Amma imoc dzamema barackeu Anutungo amanina mong maringo mi memea kurumennu bic fainemmeec. Ama imocnggo fefeseri amma feengkefude. ² Ifi anu, nenang sebibedzonina* yomohai kecmina asoringa anemmeu kurumenggac ama heinemmeu kemeudeac songotoanina ande. ³ Yeng imoc heinemmeu kemeudeu senggang mi nanide. ⁴ Nga nenang bedzo yomohai kecma asoringa ebirangoc anemmeu imoc hesinideac mi anemmeude. Kekecnggo ine homec gbokoudeac negemma ye sebi gboria witiau heiu kemeudeac anemmede. ⁵ Anutu yengenaoc kekec imoc menideac mengerenunuec, yennoc Tiri Asu nemmeu imocnggo dzadzahacac dzicnina.

⁶ Nga sebingo amanina anu ihai kuric kecma Kebugoc araing kecdimbe, nenang ifi negemma ubayohoc mi kecnide. ⁷ Nenang yofinenggac yoara negensinggema fora kicnggo mi hengandimbe. ⁸ Ifi kecma negengyohohka kpac kecnide. Nga singa febac dede neni bangecsebinina yomoc naric wama Kebuaru kemma amanina gboriau kecbing. ⁹ Imocac yofi negenseridimbe, edi yegoc me yei kecni ubea ngereudeac nenang enara tofobobisina.

¹⁰ Nenang sasawa Kristoac ising isinggac tatahau kembisina. Kenni yeng naso imohai faka nga angammemenina gombunga nga mangana angkefing, imocac turunga kpounemmeude.

¹¹ Kebu ye damuyagoc, neni imoc negendimbeac kengecnunude. Imocac amma ngicngac kpedziyununideac uatoa mekecdimbe. Nga Anutungo hanianina didiu bic faima hemma negende. Anu ni negemba ngeni ifingoc here negengnginau hanianina naric ireckebisia. ¹² Ngeni heitainunugecdeac uaninaac hania monggoc dema mi edengununide. Goa yeni hama sebingina meenggec ubaherenginango fora mi maficgeande. Ngic ifia hagec yofi naric edeyunubisia, “Neni Pauro nga Timoteo amma Siriwano yeneac negenni engena ande.” ¹³ Ngeni ubasufu denemmegecdeu imoc neni Anutuac negemma andimbe. Nga negen negentegecog kecnideu imoc ngeneac negemma angkecdimbe.

* 5:2: Ye sebinina negenu bedzo isoc ande, nasohere mi kefudeac.

¹⁴ Ngic mocgungo ngicngac sasawa donina mema homeec. Nga neni sing imohaingoc sasawango homedaring, ifi negendimbe. Imocac amma Kristo heresongogoc hoanggema ua mekecdimbe. ¹⁵ Kristongo ngicngac sasawa neneac amma homeec. Nga ngicngac kecdimbe, neni nenanggac kekecacsac negemma monggoc mi kecbisina, kpac. Nenang Kebuac amma kecbisina, nocac yeng nenanggac amma homeu Anutungo ye monggoc megboriu yarec.

¹⁶ Imocac amma yofinenggac namma emma uba esea faka wama ngicngac yeneac negenni mamea mi ambeso. Amma warac Yesuac ngictehec isoc negening, yofinenggac ine kpac. ¹⁷ Mong ye Kristoaru kpeketahama kefudeu Anutungo ye meficgeu gboria fingecma kefude. Kekec eseaac wiac imoc bic kpac anec nga kekec gboria imocngo fingecma feudenoc. ¹⁸ Imoc sasawa Anutuarunac hakecde. Kristongo turunnina kpouu Anutungo uba mocguac faka nemmeu yegoc ruae fingerec. Fingeru raeaoyoc dekperaginideac ua nemmee.

¹⁹ Anutungo Kristoaru kecma bangectoa bangec yegoc uba mocgu anggecdeac faka meec. Nga ngicngac nenang yoara kpema kecminangoc yeng kopocsicnina waec. Wama ngicngac yegoc uba mocgu anggecdeac ubahereninau yoac imocnoc faiu dekperagiyem-meandimbe.

²⁰ Nenang Kristoac enacdede nga Anutungo enacnina meefaiu yeac desambicyoac Kristoac amma ngicngac yofi edeyunuandimbe, “Ngeni Anutugoc uba mocgu anggecdeac yegoc ruae meficgebisia.” ²¹ Kristo ye yengena kopocsiha kpac. Amma yeng donina mema kopocsicac ebicfu enec. Enu nenang yegoc kpeketahema Anutuac ngicngac dindingac amma kecdimbe.

6

¹ Neni nenhafoc ua mekecdimbeac yofi serima edengunudimbe, “Ngeni Anutuac wosoefac bic megec, imoc eng kpedzonggebauac amma edengunudimbe.” ² Anutungo imocac yofi deec,

“Nasokereng anu ni kedzac kpema nunumuga negenai. Amma ni noc nasou ebicfunac mesigubadeac imocac isingga meficguai.” ^(Yesaia 49:8)

Negenggec, yagucngoc nasokereng ande nga ye yofinenggac ebicfunac mesinunuude.

³ Anu ye ua nemmeu ngicngac yeneng imoc demanganema ubanginango wabauac neni fakanina garenggeandimbe. ⁴ Nga Anutuac kingangkpekpefora kecdimbe, imoc fakanina sasawau ngicngac edzacyunuma kpendzennu seriyombonggema kecandimbe. Amma yare witiau kecma ebic hania hania meficgema ubanina kuha mau kecandimbe. ⁵ Ngic yeni dzikacngo nunuandae nga witicamau fainunuandae amma neneac amma dzomugerec meficgeandae. Neni uatoa mekecma gaugbori kecma hereninaac homeandimbe. ⁶ Neni Tiri Asugoc kpeketahema seria namma negen negentegecgor kecma faka kongahau nanggeemema ngicngac ogofocnina yeneac ubanina manganeu heresongo forau hoangyununide. ⁷ Anutuac kuc mekecma yoac fora dema kekec dindingac, imocngo dzikacac wiacnina angkecde nga imoc mari foininai* mema ua meandimbe nga kanau† mema garengemeandimbe, faka imoc sasawa amma Anutuac kingangkpekpe kecdimbe.

⁸ Ngicngac goa yeneng ewehei anemmeandae nga goa yeneng demanganenunugecde. Goa yeneng enacfu faifai anemmeandae nga goa yeneng dengerenunugecde. Neni yoac fora deni goa yeneng imocac negemma ikoc degecde. ⁹ Ngicngac homacngo wanunuandae amma sifu negennunuandae. Neni homebeso amma sifu gbori kecdimbe. Ngic yeneng dzikacngo nunugec sifu ine mi homeandimbe. ¹⁰ Nga ubahodung negemma sifu nasosoc sogaima kecdimbe. Neni makpekpea kecma sifu ngicngac meficyununi yeni kurumenggac finactoagoc anggecde. Wiacnina kpac yombong kecma sifu wiacnina sasawa fenemmede. Ifi isoc kecni ngicngac yeneng hanianina naric negentegecgecde.

* 6:7: Foininai, imocac yofi nenganda, imocngo kucgoc ewebesonga. † 6:7: Kanau, imocac yofi negenganda, imoc garengemenideac dzikac wiac amma kaso isoc ua mebeso.

¹¹ Ngicngac Korinti taonnu kecdae, ngeneac negemma sing dindingac denide. Amma ngeneac ubaherenina kuneng yombong fede. ¹² Nga ngeneng neneac negemma herengina dzegergec neneng sifu ngeneac amma ubaherenina mi dzegenide, kpac. ¹³ Nambaracfocna, ni yaguc ngeneac yofi deduae, neneng ngeneac angkecdimbe, ifi isoc ngeneng ifingoc ubaherengina hafangoc neneac angemmebeso.

¹⁴ Dindingac kekec nga singyoac kpekpe yeri yoac dedzege naric mi anecde. Nga kperagi nga kundung yeri uba mocgu naric mi anecde. Imocac ngeni ngicngac goa negen negensingngina kpac, yenigoc yoac dedzege mi ambisia. ¹⁵ Kristongo Beriagoc‡ uba mocgu naric mi anude. Nga ngicngac negen negensinggoc yeni ngicngac negen negensingngina kpac, yenigoc negen negengngina mocgungoc naric mi anggecde. ¹⁶ Negenggec, Anutuac womong nga nemuonga botucngirau yoac dedzege naric mi feude. Imoc yofiac, nenang Anutu kekehagoc, yeac womong. Anutungo imocac yofi deec, “Ni amagerecna yenearu mema yenigoc kecbade. Kecma yeneac Anutu amba yeneng ngicngacfocna anggecde.” *(Sesememe 26:12; Yeremaia 32:38; Edzekie 37:27)*

¹⁷ Imocac amma, “Kebungo yofi dede,

‘Ngeni yeneac botucfunac meickema wayunuma tembuungina kecma wiac mong wononggagoc mekpesere mi ambisia. Ngeni ifi anggecdeu neng hoangngunuma negengngemmabade. *(Yesaia 52:11; Edzekie 20:24,41)*

¹⁸ Amma ni ngeneac Mangngina nga ngeneng neac naroang medacfocna anggecde, KEBU Kuctoa Minginango ifi dede.’” *(2 Samue 7:14)*

7

¹ Songo tosofocna, Anutungo botucninau kefudeac deseriec, imocac nenang wiac sasawa ongaasunina nga ubasebinina heidzadzu kpekecde, imoc dzuacmengere amma kongaha ambisina. Amma Anutu eweheiheigoc hoanggekecma kpetiac kekec kecnideac ua hanaheing, imoc mesidacma yadiseri ambisina.

² Ngeni ubaherengina meyadima hafangoc hoannunubisia. Neni ngic me ngac mong faka mangana mi ammiing. Amma wiacngina mong ikocfu mi wangeungunu. ³ Ngeni manganaac areng kecdae, imoc mi debade, kpac. Ngeni neneac heremanau kecdae, imoc bic edengunuai amma homenide me kecnide, imoc sasawa nenhafoc andacnide. ⁴ Ni ubaherenango hoangngunuma ngeneac negemba ngereema engena ande. Amma neni ebic hania hania witiau kecmina ngeneng nanggenunugec, imocac ubangerec ebirangoc negenduae.

⁵ Foracngoc, neni Makedonia bangecfu kensikeni ebic hania hania fingecnemmeu tacyacnina gombunga mong mi fingerec. Sebiugeng ngicngac yeni yoacsic hania hania amma ngaba anemmegec ubahereninau kengecgoc kefing. ⁶ Nga Anutungo ngicngac ubaebicgoc kegec meseriyunuande, yeng Tito sueu nenearu hau imocngo meserinunuec. ⁷ Amma Tito haec, imocsac kpac, ngeneng dafiu demeseri ammigec, yeng yoac imoc edenunu ubangerec negening. Amma ngeni nenggecdeac songongina ande nga kpebunggac ebicac amma ubamangang andae amma ngeni dafiu neac songotoa negendae, ye imoc momoc edenunu ubangerecta negenai.

⁸ Kibina warac ohoai, imocngo ubamangang meficgengemmee. Ni imoc negemma naso wegenanecsac negengyohoc amma ubanango waec, yofinenggac ine ubanango mi Wade. ⁹ Neng ngeneac ubangerec negemma sogaiduae. Imoc yofiac, ngeni ubahodungsac negembau imoc mi sogaibai. Nga ngeneng ubamangang negemma ubamereng anggec. Ngeni Anutuac songo nga ngen negeng modacma ubamereng anggec. Ifi anggecak yofinenggac kibininaac amma ebicngina fingerecmoc, imoc bic kpac anec. ¹⁰ Anutungo ubamangang meficgengemmee imocac ubanginango mi wabisia, kpac. Imocngo ine ubamereng meficgengemmee komoc kpegecde. Bangecac ubamangang, imocngo ine homec meficgengemmeeude.

‡ 6:15: Beria imoc Satanggac kpara mong.

¹¹ Anutungo ubamangang ifia meficgengemmeu imocngo ngenearu fora yofi fin-gecngemmee, ngeni serima namma kopocsicfakaac kengecngunu imoc kpebungng-inauac meickegecdeac dema ngicngac demeting ayemmegec kekecngina hafoangoc kongaha fingeru hengkecdimbe. ¹² Ni warac kibi ohongemmeai, imoc ngic mongng ogea memanganeec me mangana ammiec, kibi imoc yereac amma mi ohoai, kpac. Ngeni Anutuac kicfu dafiu heresongogoc hoannunuandae, imoc fingectegeru ngenaocngoc imoc henghomegecdeac amma ifi ohongemmeai. ¹³ Imocac amma memeseri meing. Mema torokpema yofi negening, ngeni sasawango Tito ongaasuya menomanema kuc gboria meficgemigec. Neni imoc negemma sogac sogai ebirangoc meficgeni imocngo meserinunuec.

¹⁴ Ni Titoac kicfu ngeni dengerengunuma yofi edeai, ye ngenearu hama ngenenu earu game mong mi fingerec. Neni ngenearu hama yoacnina sasawa imoc fora deing, ifi isoc Titoac kicfu dengerengununi fora fingerec. ¹⁵ Yeng ngeneac negemma ubeango songotoagoc hoangngunuude. Ye ngenearu hau ngeni dafiu ama heimima kengecngunu eweheimima yoara tofohogec, ye imoc mi nigeckpeec. ¹⁶ Ngeni serima kecdaec negengyohocna kpac ubangerec negemma kecduae.

8

¹ Tosofocna, Anutungo Makedonia kpebung tackendae, yeni wosoefac dafiu ayem-mee, imoc edengunubesonga negendimbe. ² Imoc yofiac, yeni makpekpea kecma ebic witiau kpendzeng kpema sifu kpebung kpetiac Yerusarennu kecdae, yeneac ubangerec negemma wosoefac amma sese ebirangoc faigec. ³ Yeni wiac feyemmeec soha faigec. Nga neng hepucngina amba yeni imoc ifingoc ferahagec. Yeni yenaocngoc ifi arenggema anggec. ⁴ Yeni serima deigoc anemmema yofi degec, “Neni ifingoc ubangerec faka torokpema Yerusareng kpebung meficyununideac negendimbe.” ⁵ ifi degec kpetea mong hanahema negensima faiiing. Faini yeni imoc ferahama faigec. Ferahama torokpema Anutuac negen negeng nga songo modacma yenaoc Kebuac mariu faiemegec. Ifi faiemema nenearu torokpema ifingoc faiemegec.

⁶ Ifi anggec, Tito ye ubangerec sese imoc faigecdeac ua ngenearu hanaheec, ye imoc mesiudeac deserima edeing. ⁷ Ngenearu wiac sasawa ebirangoc fede, imoc yofi, negen negensing nga enac dedengina fengemmede. Amma negen negentegec nga uaac songo amma neneac heresongotoa fengemmede. Ifi femanu ngeni ifingoc Yerusarenggac ubangerec sese ebirangoc naric faigecde.

⁸ Ni yoac yomoc dedeseriyoacac siricfu mi edengunuduae, kpac. Goa yeni ua imohai faiemegecdeac songotoangina fede. Anu ngeni ngicngac hoangyunuma yeneac heresongo fora negendae me kpac imocac faitobannu faingunuduae. ⁹ Ngeni Kebunina Yesu Kristoac wosoefac negendae. Ye kurumennu finactoayagoc kecma ngeneac amma finaha wadacma makpekpea amma kefec. Yeng makpekpea anecac ngeni kurumenggac finactoanginagoc anggec.

¹⁰ Anu ngeni sese faigecdeac neac negen negeng torokpeba imocngo meficngunubeso. Ngeni kifa bageau ua imoc megecdeac negemma bic deserima waraima ua imoc bic hanahegec. ¹¹ Ngeni hanac hanaheau efaima ua imoc heresongogoc megec, ifi isocngoc mamangkima yofinenggac uangina mesibisia. ¹² Nga ngeni efaima kucngina fengemmedesoc sese faigec, imoc Anutuac kicfu ngereede. Nga kucngina mi fengemmedeu imoc yoara kpac. ¹³ Ngicngac goa yeni ebicngina kpac kecgecde nga ngeni ebicgoc kecgecde, faka ifia mi ngereede, kpac. Ngeni siricngina mocgu amma kecgecdeac deduae. ¹⁴ Ifiac amma naso yofinenggac ngenearu wiac homac fede, imocac nobohango ngicngac wiac monggac obohodae, yeni meficyunuude. Anu ngade kecma ngeneng wiac monggac obohogecdeu, imohai yenearu wiac homac feude, imocngo ngeni ifingoc meficngunuude. Ngeni ifi amma siric mocgu kecgecde. ¹⁵ Imocac yofi oho ohoya fede, “Ngic wiac homac meec, yeng semengtoagoc mi anec nga efeanec meec, yeng wiac mong mi hoforec.”

(Makekeng 16:18)

¹⁶ Anu neni ngenearu ubangerecgoc ua meandimbe, ifi isocngoc Anutungo Titoac ueba midiu ye ngenearu uaya ubangerecgoc mekefec, imocac Anutu dengereduae. ¹⁷ Ye ngenearu ua meudeac ubea bic faiu meserimini yeng songotoa negemma ngenearu haec.

¹⁸ Anu tosonina mong, ye siduc gombung deu kpebung sasawa fekendae, yeni yeac negenggec ngereeande, ye Titogoc sueni yerahafoc haecde. ¹⁹ Kebungo kpac kuneng meudeac negemma neni Yerusarenggac ubangerec sese garenggekecdimbe. Kpebung yeneng ngic imoc meisinggegec yeng nenigoc sese Yerusarennu mekennide. ²⁰ Nga hiedzo imoc dafi garenggekecdimbe, ngic mongngo imocac ngadeyoac debacac neni nenhafoc mekennideac songonina ande. ²¹ Kebuac kicfu nga ngicngac yeneac kicfu momoc faka dindingac anni ngereeude. ²² Nga neni tosonina mong yerigoc sueyununi kenggecede. Ngic imoc ye ua hania haniaac songotoa negengande, neni naso homac imoc henni ubanina ngereec. Yeng ngeneac negenu engena ande.

²³ Anu ni Titoac yofi deba negenggec, ye ua ogona anu neri ngenearu hade nenhafoc ua meandimbe. Nga ngihoc yeri kpebunggac aposoro kecma uangirau Kristoac kpac miacandape. ²⁴ Imocac ngeni kpebung kicnginau songongina edzacyunuma heresongogoc hoangyunubisia. Ifiac amma neneng ngeneac negemma dedengerecyoac deing, imocngo ikoc mi ambeso.

9

¹⁻² Ni kpetiac areng Yerusarennu kecdae, yeni maficyunugecdeac ohongemmeduae. Ngeni ua imoc megecdeac bic efaigec, imoc negenduaeac kibi yomohai yoac imoc naric wabaiacsoc. Nga Makedonia yeneac kicfu ngeneac yofi dengerengunuanduae, "Tosofocnina Akaia kecdae, yeni ua imoc megecdeac kifa bageaungoc bic efaigec."* Anu ngeneng wiac yemmeyemmeac wosoefac maficgegec yeneng ngeneac siduc imoc negemma herengina yaru yeni ifingoc ambesonga negensigec.

³ Anu ngeneng dengerengunuuing, imocngo fora kpac ambacac tosofocnina imoc sueyunuduae. Yoac bic deai, ngeni ifi isoc memefic anggecdeac efaima kecbisia. ⁴ Anu kecma habeso deba Makedonia ngic goango nigoc hagec ngeni ua imohai mi efaigecdeu imoc ngenenggec neni nga ngeni momoc gamekpekpe ambinggac. ⁵ Imocac amma neng tosofocnina edeyunuba yeneng warainemma hama kembisia, ifi negenduae. Yeni hama maficngunugec ngeneng ubangerecac wiac faigec kenudeac bic deserigec, imoc mengerema kpedzucne fai ambisia. Nga ngeni ubaebiha kpac ubangerecgoc sesengina faigecdeac tosofocnina sueyununi hadae.

⁶ Ngic mong ye yaka efeanec semeng uau homerude, yeng fora efeanecsac maficgeude. Nga mong ye yaka ebira homerude, yeng fora ebirangoc maficgeude, ngeni imoc negensibisia. ⁷ Mong ye ubangerecgoc ngicngac wiac yemmeu Anutungo yeac heresongo negenude. Imocac ngeni negengyohocfu me ngicngac goa yeneac hodzinnu wiac ngicngac yemmegecde, imocngo mi ngereeude. Ngeni ine tembul tembul ubanginau wiac mong bic negenserigec, imoc yemmebisia. ⁸ Ifi anggec kpekpedzuc ua gombunga hania hania fingeru Anutungo maficngunukefu wiac fengemmekefude nga ngeni nasosoc imohai wiac homac faigecdeacsoc anggecde. Anutungo nenesemengngina nga dzongina keneheu wiacnginaebirangoc nasosoc fekefude. Ifiac amma ngeni sesenasou sasawango sesengina naric faigecde. ⁹ Imocac yofi oho ohoya fede,

"Ye songea modacma wiac mederema ngicngac makpekpea yemmeude. Yeac faka dindingac, imoc nasoya nasoya feengkefude." (Mitiyegec 112:9)

¹⁰ Anutungo komoc maficgeu ua mingina ye imoc homerude. Amma semenga ifi miande, yeng ngeneac komoc ifingoc maficgema semengngina ebirangoc mesaheude. Nga ngeneac fakangina dindingac, imocac fora torokpeu torokpe homac amma kenude.

¹¹ Ngeni wiac hendzicma ngicngac ebic hania hania fingeru yeng ubangerecgoc wiac yemmegecdeac amma ngeneac wiacngina homac fingerude. Ifi anu neni ubangerecac wiac imoc ngicngac yemmeni yeni Anutu dengeregecde. ¹² Ngeneng memefic

* 9:1-2: Korinti taong imoc Akaia prowinsiu feec.

ua imoc mema, imocngko kpetiac areng wiac monggac obohodae, yeni maficyunugecde. Imocngko sebinginasac mi maficgeude, kpac. Imoc ifingoc Anutuaru dedengerec ebiran-goc maficgeude. ¹³ Ngeni memeficac ua imoc memagec Yerusareng kpebung yeni enac tofoc tofohongina henggecde. Ifi henggec ngeni Kristoac siduc gombung hoanggema yenigoc nga ngicngac sasawa yenigoc haring meandae, yeni imoc negemma Anutu dengeregecde. ¹⁴ Nga Anutuaru wosoefac ebirangoc ngenearu fedeac yeni ngeneac amma numugecde nga ubaherenginango ngeneac angkecde. ¹⁵ Anutungo wosoefacfu wiac nemmeande imoc wiac engena anu imoc yoacngko dafi debesonga obohodimbe. Neni dengereni.

10

¹⁻² Ngicngac goango neac yofi deandae, “Paurongo nenanggoc yei kecma yoara yumea deande amma hereau kecma yoac seria kengeha kpac edenunuande.” Ni ngenearu haba ngic goa neac yofi deandae, “Pauro ye bangecac faka modacma uaya mekecde.” imoc yenearu yoac seria kengeha kpac naric debade. Kristo ye yumea nga ubaefacgoc nga sing imoc modacma faka angemmebadeac anende. Nga ngeni imoc wama neng kengeha kpac yoac seria edengunubadeac mi igocnubisia.

³ Neni bangecfu kecdimbe, fora. Amma dzikac kpekecma bangecac faka mi modacnide, kpac. ⁴ Tebe mariku dzikacac wiac mekecdimbe, imoc bangecfunac kpac. Imoc Anutuarunac amma imoc kuhagoc anu neneng imoc mema manganaac odasongngina hembarackema negen negengngina ikoha meickenide. ⁵ Faka nga negen negeng engena sasawango Anutuaru negen negeng keme kemea imoc kpekecde, neni imoc momoc meickenide. Meickema negen negeng sasawa kpehafoima dzegema Kristoac enac tofoc tofohoac bageau fainide. ⁶ Nga ngeneac enac tofoc tofohongo hafoangoc fingeru yoackpekpe sasawa imocac turunga kpounideac efaima kecdimbe.

⁷ Anu ngic mongngo deudeu, “Ni Kristoac ngic.” Ye yengenaoc imoc negengemeu, neni ye isocngoc Kristoac ngic kecdimbe. Ye ifingoc yengenaoc negengemebeso. Mongngo ifi negemmanu fakanina imoc yearu ireckeude. ⁸ Kebungo kuc nemmeec, imoc ngeni memanganengununideac mi nemmeec, kpac. Ye meseringununideac kuc nemmeec. Ni kucna imocacsoc fede nga imoc negemba engena ande. Imocac amma gamekpekpeu mi fainugecde. ⁹ Amma kibi ohongemmeanduae, imocngko kengehagoc fingerudeac mi negenganduae. ¹⁰ Nga ngic goa yeneng deandae, “Pauroac kibi imoc yoac seria nga kuhagoc, fora. Anu ye hama nenanggoc kecma ine sebiugeng kucmamayagoc kecma yoac deu ngicngac yeni imoc ngadehema wagecde.” ¹¹ Ngicngac ifi deandae, yeni yofi negentegecbisia, neni hereau kecma yoac kibiu ohongemmeandimbe nga hama ngenigoc kecma angammemenina, imocngko siriha mocgu angkecdimbe.

¹² Ngic goa yeneng ine yofi deandae, “Merang botucninau kuneng kecde?” yeni imoc denegeng amma isinggeandae. Ngic ifia yeni wiac mong mi negentegecma sing segegecde. Neni yenigoc namma merang nenanggaru engena kecde, imoc naric mi debing. ¹³ Anutungo meisinnunuma uayoac nemmeu neni imoc modacma ngenearu ifingoc sikeing. Nga ma imoc ferahama sebinina naric mi meennide. ¹⁴ Neni ngenearu hama Kristoac siduc gombung edengunuing. Ngenearu mi habinnu uaninaac yoacsiduc imocngko sebiengeng ambac. ¹⁵ Nga ngic goa yeneng ua bic megec, neni ihai kemma kiwa amma engena annideac negemma mong mi meandimbe, kpac. Neni yofi negendimbe, ngeneac negen negensingngko yadiseri anu neneac ua ngenearu ifingoc yadiseri anude.

¹⁶ Nga ngeneng yadiseri anggec neni ngeneac ngadeau bangec goa fekende, ihai ifingoc kemma siduc gombung dekperagiymmenide. Ifi amma imohai ngic monggac uaac kiwa mi annide. ¹⁷ Nga mong ye yengenaac negenu engena angkecde, yeng KEBUAC negenu wiac engena anu sogaibeso. ^{(Yeremaia 9:24) 18} Anutungo ngic mong nanggeu ua meude, imocngko ngereeude. Nga mong ye yengena kuha nanggeemema ua meude, imoc naric mi ngereeude.

11

¹ Ni yoac mong mereng kpereng deba modzongina mi tibeso. ² Anutungo herea gerek dzeande, ifi isoc ni ngeneac amma herena dzema kecde. Imoc yofiac, ngac mong ye ngic bingeha bic demigec kecande, neng ifi isoc Kristoaru enembingec kongaha faingunubadeac negensiduae. ³ Ngeneng Kristo hoanggema kongaha kecma heregoc yeac songo negendae. Nga boidzocngo Ewa ikoc ammima tobanggeec, ngic mongngo ifi isoc kekecngina kongaha nga Kristoac songo imocac negen negeng wangecngunubacac kengecnude. ⁴ Ni fakangina mong henganduae, imoc ine naric mi ande. Neneng Yesuac siduc dekperagingemmeing nga ngic mongngo hama imoc kpema Yesu siriha monggac dekperagingemmeudeu ngeni yeac yoac mi isinggema engsac ubangerec negemma meandae. Faka imoc naric mi ande. Ngeni Asu bic megec, imoc wama asu siriha mong ngic ynearunac ubangerecgoc meandae. Nga neneng siduc gombung dekperagingemmeing, imoc kpema siduc gombung siriha mong deudeu ngeni imoc ifingoc mi isinggema engsac ubangerecgoc negemma megecde.

⁵ Ni neanna yofi negenduae, aposoro ifia yeni sebingina meengandae nga ni yeneac mamea mi anduae, kpac. ⁶ Yoac dedeac kuc homac nearu mi fede, fora. Nga negen negentegec sifu soha fenende. Ngeni sing hania hania ngenearu bic fingeru henggec.

⁷ Ni hiedzoac arennu siduc gombung mi dekperagingemmekefai. Ngeneng engena anggecdeac memaemeai, imocac negemba kopocsic mi ande. ⁸ Anu ni ngenearu kingang ua mebadeac kpebung goa yeni hiedzo nenggec meai, fora. Nga ngenearunac ine hiedzo mong mi meai, kpac. ⁹ Amma ni ngenigoc kecma wiac monggac obohoma ngenearunac mong ebicna mi miai, kpac. Tosofochna Makedonia prowins, ihacnac hagec, yeni ine wiac obohoai, imoc sasawangoc meficnudacgec. Ifi anggec ni garengemema ebic mong mi ngemmeai amma mong mi ngemmebade. ¹⁰ Nga Kristoac yoac forau kecduaeac ngicngac Akaia bangefu kecdae, yeneng dedengerecna imoc naric mi meickegecde. ¹¹ Ni heregoc ngeneac songo negenduaeac ebic mong ngemmebeso mi anende. Neng ifi hoangngunuma ngeneac heresongo negenduae, Anutungo imoc negende.

¹² Ngic goa wangecngunuandae, yeni nenigoc soc mocgu ambeso amma sebingina ifingoc meembeso anggecde. Yeni ifi anggecdeac ni imoc kpae heima hiedzoac faka damoc anganduae, imoc engngoc amma kecbade. ¹³ Nga ngic ifia yeni aposoro ikoc amma ongeasac mekecma ua fora mi mema siricnginaheimerenggec Kristoac aposoro siric isoc angkecdae. ¹⁴ Faka ifi anggecac ngeni mi kpidohobisia. Satang ye ifingoc yengena sirihaheimerenu kperagiak angero, ifi isoc angande. ¹⁵ Ifi ammanu yeac kingangkpekpefora yeneng ifingoc siricnginaheimeremba faka dindingacac ua ngic, ifi isoc anggecde nga imocnggo wiac engena mi ande. Amma yeni ine kecma wisic wisickeau angammemenginaac turunga megecde.

¹⁶ Anu ngeni neac yofi mi negembisia, "Ye ubea sufude." imoc monggoc edengunuduae. Amma ngeni neac ifia negendaeu ngeni sifu ngic ifia dema hoannubisia. Ifi anu neng ifingoc neanna kpacna miacma yoac kapianec debade. ¹⁷ Amma yoac yomoc deduae, imoc Kebuac enac modacma mi deduae, imoc ine ubasufuyoac isoc neannaoc dema kpacna miacma deduae. ¹⁸ Ngic homac yeneng bangecac negen negeng modacma yenang kpacngina miacgecdeac yoac deandae. Imocac amma ni ifingoc neanna kpacna miacma yoac goa debadeac negenduae. ¹⁹ Nga ngeni ngenaoc negen negentegecninagoc kecdimbe negendae, ngeni ubasufuyoacac songo negendae, imoc hemma kecduae. ²⁰ Ngic goa yeni wanac mengunuma iwaingina wangecngunuma kpekpe patang angemmema kpacngina meenggecde. Ifi angkecgec ngeni imoc hemma ngeni kpae mong mi heiyemmeandae, kpac. ²¹ Ifi anggec gamenuu yoac yofi deduae, nenearu kucfaka ifia mong mi fede, ifi ambing dede imoc nenenggec gameagoc ambac.

Nga ngic goa yeneng kengecngina kpac kecma kpacngina miacandae, ni ifi isocngoc kengeha kpac ubasufuyoac dema kpacna miacba negenggec. ²² Yeni hebiraio ngic, fora. Nga ni ifingoc hebiraio ngic. Yeni Israe ngic nga neng ifingoc israe ngic. Yeni Abarahanggac bangefora amma ni ifingoc yeac bangec anduaengoc. ²³ Nga yeni

Kristoac kingangkpekpefura andae nga neng imocac engena anduae. Amma monggoc ubasufuyoac isoc deduae. Ni Kristoac ua feracyunuma mekecduae. Ifi feracyunuba ngaba yeneng naso homac witicamau fainugec tarai. Tacba yeneng naso homac dzikacnggo ebirangoc nugec nga naso homac homecfu heima kefai.

²⁴ Yudangic yeneng dzikacnggo nugec, imoc atac faif anec. Amma nugec, imoc kpetea 40 imohacnac mocgusac meickegec. ²⁵ Nga naso harebec kocbing kiai amma naso mocgu hocngo neregec. Nga naso harebec wageu kenni dokungo wageu wakeu kemeing. Amma naso monnu hadzing tofocnac mocgu kondung witiau kefai. ²⁶ Ni naso homac bangeha bangeha yerecgekecma dokutoau manganebeso anai. Nga godzungic yeneng sinnu memanganenubeso anggec amma neanna arengfocna yeneng memanganenubeso anggec nga bangeha bangeha ngic Anutu mi negemmidae, yeneng memanganenubeso anggec. Nga taong goau ngic yeneng memanganenubeso anggec. Anu bangec kisiu nga kondunnu kecma ebic meficgeai. Amma ngic goa ikoc amma yofi degec, "Neni ifingoc negen negensinggoc kecdimbe." yeneng tosonina dema memanganenubeso anggec.

²⁷ Ifi anenggec sifu ua esa kpenzenggoc mekefai. Mekcma naso homac gaugbori kecma nenedoku hoforai nga naso homac wambaac osima tentennuu kefai. ²⁸ Anu ebic imocsac kpac, ni ifingoc wenacsoc kpebung sasawa garengyunubadeac negemma ua ebira mekecduae. ²⁹ Kpebung ynearunac ngic mongngo kuha kpac anu neng ifingoc ubaebic mebade. Nga ynearunac mongngo kopocsicfu makpeu yeac ebic imocnggo hemba herenau gerec isoc dzeude. ³⁰ Nga kpacna miacbeso dema kucmamanaac negemma miacbade. ³¹ Ni ikoc mong mi deduae, imoc Yesu Kristoac Anutu nga Manggacnggo negende. Ye wisic wisickea kpac nasosoc dengerebesonga.

³² Ni Damasko taonnu kecbare ngictau Aretaac gawanango mendannuudeac taonnu garengfora faiyunuec. ³³ Faiyunuu tosofocna yeneng meficnuma uficfu barinuma taonggac odaac titinnusing fainugec oda ngadeau mama yeac mariunac worayai.

12

¹ Hanihana goa torokpema deba, ni kicna tegeru wiac henai nga Kebungo wiac sufufuya dekperaginene, imocnggo ngeneac memeficngina mi ande gedang nga imoc sifu deduae. ² Ngic mong Kristogoc kpeketahemba kecde, ye negenduae, ye kurumeng kpetea harebec, imohai kpedzigec enu yaguc kifaya 14 ande. Amma ye sebigocnggo enec me sebia wama enec, imoc ine mi negenduae, Anutungo imoc negende. ³ Ni ngic imoc negemmiyombonggeduae. Amma yeng sebiagoc me sebia kpac enec imoc mi negenduae, Anutungo negende. ⁴ Ngic imoc ye kpedzigec emma eucererennu kemma yoac goa ngicnggo dedeac soha kpac, imoc kpaeyagoc nga dedeasoc mi ande, imoc hennegeng anec. Imoc ni. ⁵ Ni ngic imocac negemba engena ande. Ni neanna mi miacemeduae, kpac. Ni kucmamanaacsac negemma hanihana ifi dekperagiduae.

⁶ Ni neanna miacemebadeac songona ambac imoc ubasufuyoac mi anu yoac fora debade. Amma ngic yeneng nengandae me siducna negengandae, yenyi imoc ferahema dengerenubauac neanna miacemebadeac waduae.

⁷ Kicna tegeru wiac sufufuya engena yombong henai, imoc negemma neanna miacemebaiac Anutungo wae mong sebinau faiec fede, imoc Satanggac angero mongngo dzikacnggo nuande. ⁸ Nuu waengo sebinaunac meickeudeac Kebu numumiba atac harebec bic anu ⁹ Kebungo yofi edenuec, "Neac wosoefacnggo ge socguude. Nocac kucnango kucmama imocac kekecfu hafoangoc fingectegerude." ifi deecac yofi negenduae, Kristoac kucnggo kperacnuudeac kucmamana dekperagibade. ¹⁰ Anu ni ubahodung negemma ebicfu nga kucmama kecba defagoc anemmma nukporac anengandae, ifi anenggec Kristoac amma sogaianduae. Ni kucmamagoc kecma imohainoc kucnagog anduae.

¹¹ Ngeneng igocnugecac amma ngic kapaya isoc anduae. Ngeni ine ngenaoc dengerenubau imoc ngereebac. Imoc yofiac, ni mameanec kecbare sifu ngic aposoro engenatoa deandae, imoc yeneac mamea mong mi kecduae. ¹² Ni ngeneac botucfu

uana serima mekecba ngeni negensinggegecdeac kucfaka hania hania nga faka mi hehena fingecngemmeu aposoro yeneac ma imoc uanau fingectegeru henggoc. ¹³ Amma kpebung goa yeneac botucfu sing modarai, imoc ifingoc ngenigoc kecma modarai. Wiac mocgusac fede, ni dzofinacac arennu ebic mong mi meficgengemmeai. Imoc henggoc kopocsic andeu ngeni kopocsicna imoc wabisia.

¹⁴ Ngenearu monggoc habadeac efaiduae, imocngo atac harebec anude. Hama sebiac memeficac ebic mi ngemmabade. Nambarac yeneng nonggo mang yeneac wiac mimekpedzuc anggecde, kpac. Nonggo mang yeneng ine nambaracfocngina yeneac wiac mekpedzuc anggecde. Imocac dzofinacngina mebadeac mi habade, kpac. Ni ngenanggac amma habade. ¹⁵ Amma ngeneng kekecngina ngereeudeac amma dzofinac fenende, imoc ubangerecgoc naric meficngunuma faingemmabade. Nga imocsac kpac, ni ifingoc neanna kekec hafoangoc ngeneac amma naric wabade. Ni ngeneac heresongtotoa negenduae, imocac ngeni ifingoc neac songo kapia naric negembisia.

¹⁶ Ni ebic mong mi meficgengemmeai, ngeni imoc yagucnog negendae. Nga dekerecfu me ikocfu wiacngina mong mi wangecngunuai. ¹⁷ Amma ngic sueyunuba hagec, yeneng neac negensima wiac mong mi wangecngunugec, kpac. ¹⁸ Amma neng Tito ngenearu haudeac edema yegoc tosonina mong sueyuruba haoc. Hama Titongo ifingoc wiac mong mi wangecngunuec. Neri Asu mocgu nerahafo modacemema hanititinira mocgungoc tima kecdipe.

¹⁹ Neni ngenearu hama hanianina dema ngeneac kicfu mengereemenideac dedae, ngeni imoc mi negensibisia. Tosofocna, neni ine Kristogoc kpeketahemma kecma Anutuac kicfu yoac denide. Ngeni nanggengununi yadiseri anggecdeac ua sasawa menide. ²⁰ Ni ngenearu hama ngenemba ngeni neac songo mi modacgecde nga ngeneng ifingoc neac mi angemmeude, imocac kengecnude. Ngeni gubekisang kecma enacfu faifai amma yoacngina deendema keracmangang nga herebu angemmema sebingina meemma yoackpekpegoc kecma uba mocgu mi kecandae, ngeni siringina ifia hembaiac kengecnude. ²¹ Nga haba ngicngac homac ngenearunac kopocsic meficgema faka wonongagoc nga sero faka mekecma sicsauc kekec mong mi wagec, imoc hemma kiac ubamangang amba Anutungo ngeneac kicfu memanubacac kengecnude.

13

¹ Ni monggoc ngenearu habeso negenduae, imoc haba nasona harebec anude. Yoac yofi oho ohoya fede,

“Ngic yohockang me harebec yoacngina mocgu anudeu ngeni kopocsicmeme yoara naric isinggema foraya degecde.” *(Dedeseri 19:15)*

² Anu ni naso dzongiau hama kopocsicmeme nga kpebungtoa ngeni gorongina kpema yoac edengunuai. Nga yaguc ngenigoc tacbai ifi isoc yoac imoc hereau kecma monggoc ohongammeduae. Ifiac amma ni monggoc ngenearu dzigene habade, imohai ngicngac goa ngeni kopocsicfunac ubamereng mi anggec, ngeni demeting seria angemmabade.

³ Kristo ye ngenearu uaya kucmamaya kpac, yeng ua kuhagoc meande. Nga enacnau yoara deanduae me kpac imocac kpesi kpesi ngenearunac haec. Ni dzigene hama demeting angemmeba yeac kucfu yoara deanduae, imoc negentegecgecde. ⁴ Ngic yeneng ye gagabuu mariponnu kpegec homeec. Homeu Anutungo ye nanggeu yacma yaguc yeac kucfu kecde. Neni yegoc torokpema kucmama kecma yearu kpeketaheni Anutungo nanggenunu yeac kucfu ngenearu ua menide.

⁵ Nga ngeni negen negensinggoc kecdae me kpac, imocac ngenao tembuc tembuc tobangemema isingemebisia. Nga Yesu Kristongo ubaheregau mi kecdeu ge faitobannu makpenade, imoc negentegecbesena. ⁶ Nga neni faitobannu mi makpeing, ngeni imoc meficgegecdeac negensiduae. ⁷ Ngeni faka nga angammeme gombunga angkecma kopocsic mong mi meficgegecde, imoc Anutu numumikecdimbe. Neni ngicngac yeneng dengerenunugecdeac ngeneac mi numuandimbe, imocac goa yeneng neneac negemmanganeandae. ⁸ Neni yoac nga faka fora naric mi kpenide, neni yoac nga faka

fora nanggenide. ⁹ Neni kucmama kecmina ngeneng kucnginagoc kecgec ubangerec negendimbe. Nga ngeni Kristoac kpeteu yadiseri anggecdeac ifingoc numukecdimbe. ¹⁰ Anutungo uayoac nenu ni ngicngac negen negensinggoc yadiseri anggecdeac ua mekecduae. Nga memanganengunubadeac mong mi deec, kpac. Imocac ni hereau kecma ngeneac kibi yomoc ohoduae. Kecma ngenearu habade, imohai demeting yoac seria naric wabade.

¹¹ Negen negensinggoc tosofocna, ni yoac desima yofi deduae, ngeni ubangerec goc kecma mengereemema meseriemema ruae meficgema uba mocgu kecbisia. Ifi anggec Anutu, songo nga ruae minginango, ngenigoc kefude. ¹² Ngeni wenacngerec ange-mema titikokoc kpetiac angemebisia. Ngicngac kpetiac sasawa yeneng wenacngerec-nrina suegec ngenearu hade. ¹³⁻¹⁴ Kebunina Yesu Kristoac danggunuc nga Anutu ac heresongogoc hoangemekekec amma Tiri Asugoc ureckekec, imocngo ngicngac sasawa ngenearu fekecbeso.

Paurongo
Garata Kpebung Yeneac Kibi
Ohoec

¹ Aposoro Pauro nearunac. Ngic yeneng uayoac yomoc mi nenggec nga ngic mongngo ifingoc ua yomocac sing mi meficgenenec, imoc kpac. Imoc Anutu Manggacngo, Kristo homecfunac megboriec, ye nga Yesu Kristo yereng sing imoc meficgenenocac ua yomoc mekecdue. ² Ni nga tosofocna nenahafoc kecdimbe, neneng Garata kpebung ngeneac kibi yomoc faingemmedimbe.

³ Danggunuc nga ruae Manggacnina Anutuarunac nga Kebunina Yesu Kristo yearunac ngenearu febeso. ⁴ Ye Mannina Anutuac negeng nga songoya modacma ne-nang kopocsicac amma yengena kekeha waec. Ifi amma naso mangana yofinenggac kecdimbe, imohacnac meicnunuec. ⁵ Imocac amma yearu dedengerec wisic wisickea kpac fekengkecbeso, imoc fora.

⁶ Anutungo Kristoac wosoefacfu ye modacgecdeac ngeni kpacngunuec. Amma ngeni ine ye bic yombong wama kengkecma siduc gombung siriha monggac kedzac faima modackecdae, imoc hemba wiac mangana yombong anu imocac negengua homac mema warecngunuduae. ⁷ Amma siduc gombung siriha mong imoc mi fede. Ngic goango ine Kristoac siduc gombunggac siriha netohogecdeac ayemmeu ngeneac uba mesufu angkecdae. ⁸ Nga siduc gombung neneng bic edekpou angemmeing, imoc ine neneng me kurumennunac angero mongngo, imoc netohoma siriha mong edekpou angemmeudeu ye sowecyoacac bageu kecbeso. ⁹ Nga yoac bic deing yoc monggoc deduae, ngeni siduc gombung bic negemma hoanggegec, ngic mongngo imoc netohoma siriha mong edekpou angemmeudeu ye sowecyoacac bageu kecbeso.

¹⁰ Anu ni yaguc yoac deduae, imoc ngic yeneng negeng negecdeac mi deduae. Imoc Anutungo negen ngereenuudeac amma deduae. Amma ngic yeneng neac negenggec ngereeuudeac ua mebai dede Kristoac wanacngic naric mi kecbai.

¹¹ Tosofocna, siduc gombung dekperagianduae, negen negeng imoc ngic dedeunac kpac, imoc edengunubadeac negenduae. ¹² Ngic mongngo deu negenai me mongngo mi kpounenec, imoc kpac. Yesu Kristo yengenaoc imoc ine kpefinnu mekperagima kpounenec. ¹³ Ni warac yudangic yeneac negeng arennu kecma faka anai, ngeni imoc bic negendae. Nga Anutuac kpebungfora efea mi yunukporac ayemmemma memanganeyunuai. ¹⁴ Nga yudangic neneac dedeseri nga fakau negeng negennango yadikecma yudangicngac ogofocna yeni homac feracyunuai. Amma esangabofocnina yeneac singyoac negemma herena gerec dzeu imoc meserikefai.

¹⁵ Nenggac heremanau tacbare Anutu yengenaoc meisinnuma wosoefahaac kpacnuec. ¹⁶ Amma yeng songea modacma Medaha yengenaoc mewakenuu ni Medahaac siduc imoc bangec monnunac ngicngac Anutu mi negemmidae, yenearu dekperagibadeac ifi anec. Anu ni naso imohaingoc kemma dafi ambadeac ngic goa dekpesi mong mi ayemmeai.

¹⁷ Amma ngic warainemmma aposoro anggec yenembadeac Yerusarennu mi kenai, kpac. Ni ine Arabia bangecfu kemma monggoc Damasko dzigeneai.

¹⁸ Ihai kecbare kifa harebec wisickemanu Kefa hembadeac Yerusarennu kemma uameme 15 yegoc kefai.* ¹⁹ Amma imohai kecma aposoro mong mi yenenai. Ni Kebuac munea Yakobosac henai. ²⁰ Yoac ohoduae imoc ikoc kpac, imoc Anutuac kicfu deduae.

²¹ Anu imocac ngadeau Siria nga Kirikia prowinsiu kemma kefai. ²² Nga Yudaia bangecfu Kristoac kpebung kecdae, yeneng ni mi negennugec. ²³ Goa yeneng yofi degec negenggec, “Ngic ye warac nunukporac anemmeec, ye negeng negensinggac siduc gombung memanganeeengo imoc yaguc ngicngac edekpou ayemmekede.” ²⁴ Yeni ifi dema neac amma Anutu dengeregec.

* ^{1:18:} Kefa imoc Petoro. Yesungo kpara mong ifi miec.

2

¹ Anu kifa 14 wisickeu ni monggoc Yerusarennu kenai. Naso imohai Banabagoc neri Tito hesickede nenhafoc kening. ² Ni Yerusarennu kembadeac Anutungo kpefinnu edenuec. Ihai kemma siduc gombung bangec monnunac ngicngac Anutu mi negem-migec, yenearu sing edekpou ayemmekefai siduc imoc ngic enara degec kecgec, yeni tembus tembus dekperagiyemmeai. Ni warac nedziai nga yaguc nedziduaengoc, uana imocngo sicsauc amma fora kpac ambacac yoac imoc dekperagiyemmeai.* ³ Anu Tito grikngicngo nigoc haec, ye sebi tosea herecgegecdeac enara yeneng mong mi degec. ⁴ Ngic goa tosofocnina mi andae, yeneng ine Titoac ifi degec. Yeni sing eseaac bageu fainunugecdeac hama botuchinai kecma Kristongo witicfunac menunuec, imocac kickitong kecdae. ⁵ Nga siduc gombunggac yoac fora ngenearu seria feudeac neneng naso monggac ngic ifia yeneac yoac bageau mong mi kefing, kpac.

⁶ Anu ua mekecduea dema ngic enara yeneng imohai wiac mong torokpema ambadeac mi edenugec, kpac. Nga yeneng warac dafi kecgec, imoc naric mi debade. Anutungo ngic sebiacsac hemma ngicngac mi isingyunuude. ⁷ Yeneng ine faka fora yofia hemma mariu meme anggec. Anutungo Petoro ngic sebi tosangina herec herecgea yenearu siduc gombung dekperagiudeac uayoac miec, ifi isocngoc ni ngic sebi tosangina mi herec herecgea, yenearu siduc gombung dekperagibadeac uayoac nenec. ⁸ Anutungo Petoro ua kucgoc meudeac fenggemiu, yeng ngic sebi tosangina herec herecgea, yeneac botucfu aposoro ua meec. Nga ni ifi isocngoc ua kucgoc mebadeac fenggenenu bangec monnunac ngicngac Anutu mi negemmidae, yeneac botucfu aposoro ua mekecduea.

⁹ Anu kpebunggac ngic wotunga degec, Yakobo nga Kefa amma Yohane, yeni Anutuac danggunuc fenene, imoc hentegecma yeni ni nga Banaba nerigoc uba mocgu amma marinira mema yofi degec, “Ngeri bangec monnunac ngicngac Anutu mi negemmidae, yenearu siduc gombung dekperagibesera nga neneng ngic sebi tosangina herec herecgea, yenearu siduc gombung dekperaginide.” ¹⁰ Ifi dema yoac mocgusac yofi torokpegec, “Ngeni ngicngac makpekpea, yeneac ebic negensibisia.” ifi degecac ni imocnoc negemma mamangkima ua serima mekefai.

¹¹ Anu Petorongo Antiokia hama sing segeec. Imocac amma ni namma kopocsic anec, imoc edeai. ¹² Yakoboarunac areng goa mi hamagec ye bangec monnunac ngicngac yenigoc yaka nekefec. Nga ngic sebi tosangina herec herecgea arengfora goa hasikegec, imohai ye kengec amma bangec monnunac ngic wayunuma yenigoc monggoc mi tarec. ¹³ Ifi anu yudangic tosea yeni ifingoc yegoc sebimeme anggec. Nga Banabango ifingoc ikoc fakangina modacma sing segeec. ¹⁴ Anu yenemba, yeni siduc gombunggac yoac foraac faka mi modacgec, ni ngicngac sasawa yeneac kicfu Petoro yofi edeai, “Ge yudangicnac amma yudangic fakanina wama bangec monnunac ngicngac, yeneac faka modacanne, ge ine bangec monnunac ngic, yeneng yuda neneac faka modacgecdeac fakagau edzacyununec, imoc mi ngereede.”

¹⁵ Neni yuda arenunac fingering nga bangec monnunac ngicngac Anutu mi negemmidae, kopocsicmeme areng yenearunac mi fingering. ¹⁶ Ngic mong ye Yesu Kristo negensinggedeu Anutungo yeac ngic dindingac demiude, imoc negendimbe. Ngic mong ye dedeseriyoac modacma kecde, Anutungo ye dindingac mi demiude, kpac. Nga Anutungo nenen negensinninaac amma dindingac denemmeudeac neni dedeseriyoac sing wama Yesu negensinggema kecdimbe. Imoc yofiac, ngicngac dedeseriyoac modacandae, Anutungo yeni ngicngac dindingac naric mi deyemmeude, kpac. Ye ngicngac Yesu negensinggema kecdae, yeni ine dindingac deyemmeude.

¹⁷ Goa yeni neneac yofi dedae, “Ngeni dedeseriyoac wama kopocsic meficgedae.” Ifi febac dede Kristongo kopocsic sing meficgengemmebac nga ifi kpac. ¹⁸ Ni wiac bic wama meickeai, imocac tataha monggoc mengerebadeu kopocsic meficgebai. Nga ni ine faka eseaac tatac monggoc mi mengerebade, kpac. ¹⁹ Ni Kristogoc mariponnu momoc

* 2:2: Paurongo yoac heima nedzi nedziac yoac homac dede.

nugec nanic. Nga Anutugoc kecbadeac amma dedeseriyoacng Kopocsicna edzacnuu Kristogoc homema yoac imoc wayai.

²⁰ Imocac amma ni neannaoc monggoc mi kecduae. Kristongo neac ubaheremanau kecde. Imocac yofinenggac kecma Anutuac Medac negensinggeba yeng kekecnau mewakenude. Yennoc heresongogoc hoannuma neac amma yengena kekeha waec. ²¹ Anutuac wosofac ubanango mi waduae. Ngic mong ye dedeseriyoac modacande, Anutungo ye ngic dindingac imoc naric mi demiude, kpac. Imocac amma Yesungo mariponnu homeec. Dedeseriyoac kuhagoc febac Yesungo mariponnu naric mi homebac.

3

¹ Garata ngic, ngeni negen negentegecngina kpac yombong. Yesu Kristo mariponnu kpegec nanec, ngeni imoc negentegecgecdeac kicnginau yoac soha kpoungemmeing. Nga ngic monggo ine kundunggac faka mong angemmema negen negengngina mesufuu ngeni ifi isoc kecdae. ² Ngeni yofi isinggebisia, neni siduc gombung edengununi ngeni imoc negensinggema Asu megecnoc. Ngeni ine angammemenginango dedeseriyoac modacgecac amma Asu mi megec, kpac. ³ Ngeni Asugoc kekecngina hanahegecng yaguc ine uba eseaac uau monggoc kecdae, imoc mi ngereede. Ngeni kapafaka yombong andae. ⁴ Ngeni warac Yesuac amma kpendzengtoa kpegec. Nga yaguc ine imocac fora engsac wadae. ⁵ Ngeni Abrahang isoc Anutuac yoac negemma negensinggegecac Asungo hama kucfakaya botucnginau mekecde. Nga faka imoc dedeseriyoac mekecdaec amma mi fingecde.

⁶ Imoc yofi fingerec, Abrahang ye Anutu negensinggeu Anutungo ye ngic dindingac demiec. (*Fingec fingec 15:6*)

⁷ Imocac amma ngicngac Anutu negensinggema kecdimbe, nenang Abarahanggac medacfora, ngeni imoc negentegecbsia. ⁸ Nga Anutungo bangec monnunac ngicngac, yeni negen negensingnginaac amma dindingac deyemmeude. Ye imocac siduc gombung warac Abarahang edeec nga imoc mitikibiu yofi oho ohoya fede,

“Bangec monnunac ngicngac, yeni sasawango gearu hama kenecgoc anggecde.” (*Fingec fingec 12:3; 18:18; 22:18*)

⁹ Abrahangng Anutuac yoac negensinggeec nga ngicngac yeneng Anutuac yoac negensinggedae, yeni Abrahanggoc kenec megecde.

¹⁰ Ngicngac yeneng dedeseriyoac tobanggema tofohokecdae, yeni sasawango sowecac bageu kecdae. Mitikibiu imocac yoac mong yofi oho ohoya fede,

“Ngicngac dedeseriyoacf wiac oho ohoya fede, imoc wama mi modackecdae, yeni sowecac bageu kecdae.” (*Dedeseri 27:26*)

¹¹ Mitikibingo ifingoc yofi dede, “Ngic mong ye negen negensing arennu kefude, Anutungo ye ngic dindingac demiude.” (*Habakuc 2:4*)

Nga mong ye dedeseriyoac modackecde, Anutungo yeac dindingac mi demiude, kpac.

¹² Dedeseriyoacng negen negensinggac yoac mi mekperagiude. Nga yoac mong yofi ine dedea,

“Ngic mong ye yoac imoc modacma kecde, yeng imocac manau kefude.” (*Sesememe 18:5*)

¹³ Yesungo donina mema dedeseriyoacac sowecfunac bummenunuec. Nga yoac yofi oho ohoya fede,

“Ngic sasawa icfu gbedicyunugec nanggoc, yeni sowecnginagoc.” (*Dedeseri 21:23*)

Ifi feecac dedeseriyoacac sowecng Kristo sendenggeu yeng dedeseriyoacac sowecfunac menunuec. ¹⁴ Anutungo kenec Abrahang miec, imocng Yesuac amma bangec monnunac ngicngac, yenearu kendarudeac Yesungo bummenunuec. Ifi anu Anutungo yoac deseriec, imoc modaru nenang Yesu negensinggeni Asu nemmeec.

¹⁵ Tosofocna, ni ngic fakanina fede imocac sirihau edengunuba negenggec. Ngic monggo maridzominggac yoac deserima deu ngic monggo imoc naric mi kpeude nga

yoac mong imocac witiau mi torokpeude. ¹⁶ Anutungo Abrahang nga bangeha yeri wiac goa yemerudeac yoac dedzege anec, imoc ye bangecfora homac yeneac mi deec. Ye ine ngic mocguacsac yofi deec, "bangecga." Nga ngic imocnoc Kristo. (*Fingec fingec 12:7; 13:15; 24:7*) ¹⁷ Ni imocac amma yofi deduae, Anutungo Abrahanggoc dzadzahac deseriec nga kecma kifa 430 wisickemanu Mosegoc dedeserijoac fingerec, imocngo dzadzahac esea naric mi kpeude me meickeude. ¹⁸ Manggac monggo maridzominggac yoac mong mi deude isoc nambaracfora yeni dedeserijoacac sing modacma maridzomingngina megecde. Nga Anutungo Abrahang wiac miec imocngo maridzominggac yoac modarec.

¹⁹ Ifi anudeu dedeserijoac nocac faifaia fede? Imoc yoackpekpeac amma faifaia fede. Abrahanggac bangeha ye mi fingecmanu Moseac dedeserijoacngo kuhagoc feec. Bangeha yeacnoc maridzominggac yoac oho ohoya feec.

Anu angero yeneng ine dedeserijoac mema uba mocgu fingerudeac hengising ngicngina Mose migec. ²⁰ Hengising ngic ye ine areng mocguac yoac mi deude. Nga Anutu ye mocgu amma yengena yoacacsac deude.*

²¹ Anutungo Abrahanggoc yoac dzegeec, imoc dedeserijoacngo mi kpede, imoc kpac yombong. Anutungo dedeserijoac nemmeec, imocngo kekecseri meficgenemmebac dede ye dedeserijoacac amma ngicngac dindingac denemmebac, amma ifi mi fingerec.

²² Ngicngac Yesu Kristo negensinggema Abrahanggac dedzegeyoac hoanggekedae, yeni maridzomingngina megecde. Imoc fingerudeac mitikibingo ngicngac sasawa kopocsicac bageu faiyunuec.

²³ Negen negensingng mi femanu neni witicamau tacni, dedeserijoacngo garen-nunuec. Nga negen negensingng fingeru ebic imoc kpac anec. ²⁴ Nga dedeserijoacngo garen-nunu kecminangoc Anutungo negen negensinnu dindingac denemmeudeac Kristongo fingerec. ²⁵ Nga naso yomoc negen negensinggac sing dindingac kekec bic fingerec. Imocac amma dedeseri garenggac bageu monggoc mi kecdimbe. ²⁶ Ngeni sasawango negen negensinnu Yesu Kristogoc kpeketahemma kecma Anutuac medacfora andae. ²⁷ Nga ngicngac Kristoaru doku nadzicgec, ngeni sasawa siricngina yofi, Kristongo wambangina anu ngeni ye heigec kemeeec. ²⁸ Imoc yudangic me grikngic me wanacngic minginagoc me ngic witiha kpac, ngic me ngac, ngeni areng mong mong mi andae, ngeni sasawango Yesu Kristoaru kpeketahemma areng mocgu andae. ²⁹ Nga Kristogoc kpeketahedaeu Abrahanggac bangecfora kecma Anutuac yoac dedzegegoc kpeturanggema maridzominggac areng Kristogoc anggecde.

4

¹ Ni yofi negemma deduae, medac monggo maridzominga yeac anudeac negemma medacbisic amma imocac tomai kecde, ye kpara kpac kecma wanacngic isoc kefude. ² Ye yengena garenggac bageu amma hiedzo garenggac bageu kecmanungoc mamango naso deec, imoc hasikeu finaha tiu enude. ³ Nenang ifingoc ifi kefing. Nambarac kecminangoc bangecac hadehade yeneng wanac menunugec yeneac bageu kefing. ⁴ Kecmina naso dedea, imoc hasikeu Anutungo yengena Medaha sueu maec. Ye dedeserijoacac bageu ngacfu fingerec. ⁵ Fingecma ngicngac dedeserijoac bageu kecdimbe, nenang ihacnac yungecnunu erema yengena medahaac tatac menideac maec.

⁶ Ngeni nambaracfora andae, imocac amma Anutungo Medahaac Asu sueu hereninau kecma yofi kiackecde, "Manggac, neac Manna." ⁷ Imocac amma, ge monggoc wanacngic mi annade. Ge Anutuac medactatac mena yeng maridzomingga dedea, imoc genude.

⁸ Anu ngeni warac Anutu mi negenggec nemu yeneng wanac mengunugec. Amma nemu imoc yeni Anutuac siric isoc kpac. ⁹ Ngeni yofinenggac ireckema Anutu negem-midae me yofi naric deba, Anutungo ngeni bic negengngunu kecdae. Nga ngeni monggoc dzigenema bangecac hadehade makpekpea nga kucngina kpac, yenearu mong-goc kemma yeneac wanac areng anggecdeac negendae, fakangina imocngo obohode.

* 3:20: Imocac amma yoac dedzege Anutungo Abrahanggoc meec imocngo Moseac ferahede.

¹⁰ Amma ngeni uameme goa nga afo goa nga kpefinnu naso hemma kifaac siriha naso hania haniaac negenggec fora anu imoc modacma kecanda. ¹¹ Nga uatoa ngenearu meai, imocngo fora kpac ambacac amma negengyohoc anduae.

¹² Tosofocna, ni ngeni isoc kecduae, imocac ngeni ni isoc anggecdeac desambic amma edengunuduae. Nga ngeneng mong mi memanganenugec. ¹³ Sebiugeng ebicnagogc amma naso imohai hanahema siduc gombung dekperagingemmeai, imoc bic negendae. ¹⁴ Nga sebinaac ebicngo ngeni tobangngunuec, fora nga ngeneng mi negemmanugec amma mi wanugec, kpac. Ngeni Anutuac angero mong me Yesu Kristongo haec, ifi garenggebau isoc ni hoannuma garenrugec. ¹⁵ Anu yaguc ine songongina engsac kpac ande. Ngeni warac songo homac negemma kicgbomangina mesima nenggecdeac siriha anggec, ngeneac gombung imoc hepuc amma dekperagiduae. ¹⁶ Ni goroyoac edengunuba ngeni neac yoac wagec, imocac obohoduae.

¹⁷ Ngic wangecngunubeso angkecdae, yeneng ngeni yenigoc torokpema nanggecdeac gereagoc yombong dekecdae. Amma yeni ngeneac gombunga mong mi negensidae, kpac. Ngeneng yoacnginaac songo negemma yenearu torokpegecde, imocac ine ayemmede. ¹⁸ Ni ngenigoc kefai, imohai faka gombunga modacgecdeac uatoa megec. Amma faka gombunga modacgecde, uatoa imocac nasosoc mekecbisia. ¹⁹ Nambaracfocna, ni ngeneac amma monggoc kpenzeng gadze isoc nikelde, ifi angkebare Kristongo ngeneac hereu fingectegecbeso. ²⁰ Ni ngeneac negemma dafi ambade, imoc obohoyombonggema negen negeng ua mekecdue. Amma ngenigoc yofinenggac kecbai dede goroyoacna seria naric wama yoac yumea deba ngeni imoc modacbau.

²¹ Anu dedeserioyacac bageu kecbeso angemmedeu, ngeni kedzac faima yoac yomoc negembisia, ²² Abarahang ye medahora yohockang, mitikibiu yoac ifi oho ohoya fede, medac monggo enema yombong, yearunac nga mong ine wanacngac yearunac. ²³ Nga medaha wanacngac yearunac, ye sebiac arenna fingerec nga enemaarunac yombong fingerec, yeng Anutuac dedzegeyaoac feec, imocac arenna fingerec.

²⁴ Ni yoac heima yofi deduae. Ngac yohockang yeri dzadzahac yohockanggac onga andape. Dzadzahac mong imoc Sinai tikiu Arabia bangecfu yoac dedzege anggec, imocac nambaracfura yeni wanac kekecac bageu fingectegecdae, imocngo Haga ande. ²⁵ Amma Yerusareng imoc Hagaac ongea ande. Yerusareng ye yaguc yengena nambaracforagoc wanac areng amma witicfu kecdae. ²⁶ Nga wi kurumennu Yerusareng mong witiha kpac, imoc nenang nonggonina yombong. ²⁷ Nga yoac yofi oho ohoya fede,

“Ngac kufing sabacga kpac, ge sogac sogaigoc kecna. Nga ngac gadze mong mi giec, ge kucgoc sogaima arohona. Ngac kosic yeac nambaracfura homac, kpetenginango ngac eweagoc yeac nambaracfura kpetengina feraheude.” *(Yesaia 54:1)*

²⁸ Tosofocna, Anutungo Abrahanggoc yoac dedzege anu Isaka fingerec, ifi isocngoc Anutungo Yesuac amma yoac dedzege meficgeu yengena nambaracfura fingering.

²⁹ Ngic sebiac arenunac fingerec, yeng naso imohai ngic Asuac arenunac fingerec, ye kpekporac ammiec, siric imocngo yaguc fede. ³⁰ Nga mitikibingo imocac negensima yofi dede,

“Ge wanacngac medahagoc kporacyuruna kenec, nocac wanacngac yeac medahango enengyombonga yeac medacgoc maridzoming naric mi meece, kpac.” *(Fingec fingec 21:10)*

³¹ Tosofocna, imocac nenang wanacngac yearunac kpac, nenang ngac enema yombonga yearunac.

¹ Nenang witiha kpac kecnideac Kristongo witicfunac yungecnunuec, imocac ngeni serima nambisia. Ngeni monggoc wanac kekecac bageu faingunubauac henghomema kecbisia.

² Negendae, ngeni sebi tosangina herecgegecdeu Kristoarunac memefic mong mi megecde, ni Paurongo imoc edengunuduae. ³ Ngic sebi tosangina herecgegecdeu yeni

dedeseriyoac hafoangoc tofohoma modacdacbisia, imoc serima monggoc edengunuduae. ⁴ Nga ngic Anutuac kicfu dindingac nanggecdeac dedeseriyoac modacgecdeac negendae, ngeni Kristoarunac kperecgeemema yegoc monggoc mi kpeketahama Anutuac wosoefac wama ngadeau kecgecde. ⁵ Nga Asungo wangecnunuu nenin negensinnu kecni Anutungo dindingac kpacnunuude, imoc menideac tomai kecdimbe. ⁶ Nenang Yesu Kristoaru kpeketahama kecnideu sebi tosea herec herecgea me mi herec herecgea, imocnggo wiac engena mi ande. Negen negensinninango heresongogoc hoangemema mekecnide, imocnggo fora ande.

⁷ Amma ngeni mitiac sinnu nedzi gombunga nedzimagec ngic merang singngina hedzickeu yoac fora wama kecdae. ⁸ Anutungo kpacngunuec amma yeng faka ifia anggecdeac mi fenggengunuec, kpac. ⁹ Yis kapianecngo uuha sasawa sokodarude. ¹⁰ Nga Kebugoc kpeketahema ngeneac negemma yofi negensima kecduae, ngeni neac negen negeng imoc modacma kecma negen negeng goa wagecde. Nga ngic mong ye negengyohoc meficgengemmekede, yeng kopocsic turunga meficgeude. ¹¹ Tosofocna, sebi tosa herec herecgea sing imoc mi dekperagiduae, sing imoc bic wayai. Imocac amma ngic yeni nukporac anengkecdae. Ngic yeni sebi tosangina herecgecdeac kpouyemmebai dede ngicngac yeni mariponggac yoacac ngaba mi ambau. ¹² Nga ngic goango yoacnina kpekecma negen negengngina mesufuma kecdae, yeni sebi tosangina hafoangoc herecgea meickegac ngereebac.

¹³ Tosofocna, ngeni witicngina kpac kecgecdeac Anutungo kpacngunuec. Ngeni witicngina kpacac amma ine degbedic yoac dema uba esea modacgec mi ngereeude. Imoc mi fingerudeac ngeni songogoc hoangemekecma wanacngic isoc kingang kpeemebisia.

¹⁴ Imoc yofiac, dedeseriyoacnggo hafoangoc kpeturanggema yofi fede,
“Ge geangga anggengande, siriha imocngoc ngicngac ogofocga heresongogoc hoangyunukebesena.” *(Sesememe 19:18)*

¹⁵ Nga ngeni ine ngenaocngoc enacngoc ingiemema ewekpebuc angemekecma memanganemebeauac garengngina meemebisia.

¹⁶ Ni yofi deduae, ngeni Tiri Asugoc heirima kengkecbisia. Amma ngeni uba eseaac negensongo wama imoc mi modacbisia. ¹⁷ Uba eseango Asuac kekec kpeude nga Asungo uba eseaac kekec kpeude. Yeri ngaba angemeandape, imocac ngeni wiac gombunga ambesonga negengkecdae, imoc waandae. ¹⁸ Nga Asungo wangecnunuu kengkecdaeu dedeseriyoacac bageu mi kecgecde.

¹⁹ Nga uba eseaac angammeme didiu yofi fingectegerude, Kaisero faka nga sebiac songo hania hania. ²⁰ Nemiac ewehihei kekec nga dzinac faka amma ngabagoc tohoeme kekec, ngeni yoacngina ngabasiric angandae nga kichodung nga herebu amma tusucnene faka, gurunegigoc tohoeme kekec amma mitiareng ikoha hania hania. ²¹ Imoc keracmangang nga doku seria negec uba mesufu ayemmekede amma faka goa ifia. Warac edengunuai nga yaguc monggoc gorongina kpema edengunudiae, ngicngac faka ifia modacandae, yeni Anutuac eucererenggac maridzoming naric mi megecde.

²² Asuac fora imocngoc heresongogoc hoangemema kekec nga ubangerec amma ruae nga modzotitia kpac amma faka yumea nga faka gombunga amma negen negensinggoc kekec, ²³ nga wosoefacgoc kekec amma faka nomana. Dedeseriyoacnggo faka ifia sasawa kpae mong mi heiude. ²⁴ Anu Yesu Kristoac ngicngac yeni uba eseangina imocac herebyacyac nga negensongogoc, imoc mariponnu bic kpegec homeec.

²⁵ Asungo kekecnina meficgenemmeudeu, yengngoc kekecnina garenggeu nenang ye modacbisia. ²⁶ Modacma sebiengeng me keracmangang angemema mi tobangemebisia.

fuama emekpesi kecbisia. Ifi amma Kristoac dedeseriyoac hafoangoc modacgecde. ³ Ngic mong ye engena mi amma yengenaac negenu engena ande, ye ine yengenaoc ikoc angemeude. ⁴ Nga ngeni tembuc tembuc angammemengina hengising ambisia. Anu mongngo henu fakaya naric anu, imocac ubangerec yengenaru febeso. Femiudeu goa yeneac faka hemma imocgoc mi isinggeboso. ⁵ Ngic tembuc tembuc yeni ebicngina tembuc tembuc tofohogecde.

⁶ Kpoukpoufocngina Anutuac yoac kpoungemmmeandae, ngeni yeneac negensima wiacngina gombunga hendzicma yeneac noboha yemmebisia. ⁷ Anu ngeni ikoc ange mebauac henghomema kecbisia. Ge Anutu ikoc ammima naric mi tobanggenade. Ngic mong ye semeng mong homerude, ye semeng fora siriha ifiangoc kpedziude. ⁸ Ngic mong ye uba esea arennu wiac homecande, yeng uba eseaac arennunac foraya kpedziu manganema kpac anude. Nga Asuac arennu wiac homecande, yeng imocac fora, kekeha wisic wisickea kpac kpedziude. ⁹ Imocac amma faka gombungaac kucmama mi ambisina. Nenang modzotitia kpac kecma faka gombunga amma kecmina nasoyada hau semeng fora gombunga menide. ¹⁰ Nenang nasonina fedengoc, imohai ngicngac sasawa faka gombunga ayemmekecbisina nga arengfocnina Kebunina negensinggema kecdae, yeni momoc gombunga ayemmebisina.

¹¹ Henggec, neannaoc marinango kibi kuneng yombong ohongemmeduae. ¹² Ngic sasawa yeni sebi tosangina herecgegecdeac igocngunuma dekecdae, yeni uba eseaac siricfu engena anggecdeac amma ifi degecde. Amma yeni Kristoac mariponggac amma yunukporac ayemmebauac, imocac ifi angemmekedae. ¹³ Ngic sebi tosangina bic herecgegec, yeni yenaoc dedeseriyoac mi tofohokecdaengoc. Yeni ine ngeneac negemma yenaoc kpac kuneng megecdeac amma ngeneng sebi tosangina herecgegecdeac homac ayemmeude. ¹⁴ Nga neng wiac monggac negemma kpacna mi miacbade, kpac yombong. Kebunina Yesu Kristoac mariponggac amma bangecac wiacngo mariponnu homeec nga neng ifingoc bangecac homemiaiac negemma dedengerec angkecduae.

¹⁵ Ngic sebi tosa herec herecgea me mi herec herecgea imocngo wiac engena mi ande. Nga Anutungo deu wiac gboria fingerec, imocngo ine wiac engena ande. ¹⁶ Nga ngicngac singyoac imoc kekecnginau modackedae, yenearu ruae nga wosoefacngo witinginai febeso amma Anutuac Israe yenearu ifingoc.

¹⁷ Amma yofi desiduae, ngic mongngo ni ubaebic monggoc mi nembeso nocac Yesuac kubehaac ebic sebinau mekecduae

¹⁸ Tosofocna, Kebunina Yesu Kristoac wosoefacngo ngeneac ongaasunginagoc febeso, imoc fora.

**Paurongo
Efeso Kpebung Yeneac Kibi
Ohoeac**

¹ Ni Paurongo Efeso taonnu kpetiac areng kecdae nga Yesu Kristo negensinggedae, ngeneac kibi yomoc faiduae. Anutungo negennenu Yesu Kristoac aposoro anduae.

² Mannina Anutu nga Kebunina Yesu Kristo yereac danggunuc nga ruaeatoango ngenearu fefeseri febeso.

³ Nenang Kebunina Yesu Kristo, yeac Anutu Manggac kenehebisina. Kristogoc kpeturanggema kecdimbeac amma yeng kurumenggac kenec Asuac arennu fedacde, imoc sasawa nemmeec. ⁴ Yennoc bicngoc yombong hanahema bangec kurumeng mi fingecmanu kiwau ebiha kpac nga kpetiac kecnideac Kristoac amma negengising anemmeec. ⁵ Nga medacfora annideac ye songoya nga negen negenga modacma Yesu Kristoac amma meisinnunuec ⁶ Amma ye Medackerengaac amma ubangerec yombong anemmeecac nenang eweheimima dengerebisina.

⁷ Yesu Kristoac danggunucac dzohong imoc wakema fedeac nenang yearu kpeketaheni ye sawango kirecgenunu mangana meic meicke fingerec. ⁸ Imocac dzohongau negen negentegec nga negen negeng fora mengeredacma kpetinggenemmeec. ⁹ Amma yeac ubau wosoefacac negen negeng sufufuya fede, imoc deserima yofi deireckenemmeec, ¹⁰ “Ni Kristo sueba bangecfu mama wiac sasawa bangecfu nga kurumennu fede, imoc kpeturanggema oruha anude. Nga negen negeng ua mema arenggema nasotoaya negenai, imohai fora fingerude.”

¹¹ Ye areng imoc bicngoc negensima yeac amma maridzomininna menideac negengising anemmeec. Ye wiac sasawa ubeau feec, imoc fora fingerudeac ifi arenggeec.

¹² Imocac nenang hanahema erema Kristoac amma kekecesser menideac dedea, imoc negensinggedimbe. Nga Anutu kpara kengkena dengerema afehebisina. ¹³ Ngeni ifingoc yoac fora negemma memengerecac siduc gombung mema Yesu negensinggegec. Negensinggema ngeneng yeac anggecdeac amma Tiri Asu ngemmeudeac deec, ye herenginau faima dzadzahacac dzic ngemmeec. ¹⁴ Kurumennu finacnina fede, imocac dzadzahacac dzic Tiri Asu ande. Imoc nenang nemmenemmea. Imoc mekecnideu Anutungo kuric bangecfunac nambaracfora mesinunuma menunuude. Imocac Anutuac kuc nga kibikperagia dengerebesonga.

¹⁵ Anu ngeni Kebu Yesu negensinggeandae amma yeac kpetiac arengfora sasawa heresongogoc hoangyunuandae, yoacsiduc imoc negenaiac ¹⁶ ngeneac amma nasosoc negensima Kebu numumima dangge dema ¹⁷ yofi numuanduae, Kebu Yesu Kristo yeac Anutu, kibikperagiaac Manggac, yeng negen negentegec nga wiac sufufuya mekperac kperagi Asu ngemmeu Anutu hafoangoc negemmigecde. ¹⁸ Yeng ubaac kicngina mekperagiu wiac kurumennu ngeneac tomai fede, imoc negentegecbrisia. Anutungo ngeni imoc mebesandaeac kpacngunuec. Wiac imoc kuc nga kibikperagiagoc wake wakea fede. Ye ngicngacfora kpetiac maridzomingngina imoc ngemmeudeac faiec fede. ¹⁹ Amma Yesu negensinggedimbe, nenannu yeac kuctoa engenango ua mekecde, imocac hania ifingoc negentegecbrisia.

²⁰ Nga yengena kuha engena, imocnggo Yesuaru ua meu homecfunac megborima meemma kurumennu faiec foiau tacde. ²¹ Nga kia gamang nga ngickuneng amma kuc hania hania nga sawakebangau kebuareng kecdae, yeneac engenatoa faiec tacde, imoc naso yofinenggacsac kpac, imoc ifi fekengkecbesande. ²² Ifi amma wiac sasawa haniaac turumannu kpedzucyunuma orucngina anudeac gununggema kpebungfora yenearu faiu yeng wiac sasawaac kunengngina kecde. ²³ Anu yeni yeac forakebanga hanimaria anggec yeng imoc hafoangoc sing hania hania meficgedacma sasawa mewakedacande.

2

¹ Ngeni warac Anutuac sing ferahem a kopocsigoc amma ongaasungina homemea kecma ² bangetoa bangecac kekec nga sawaac hadehade yeneac ngictau modacgac.

Anu yaguc yoackpekpeac medacfora kecdae, yenearu ngictau imocngu ua mekecdengoc.

³ Ngeni nga neni ifingoc nenahafoc warac yeneac arenna kecma ubasebinina esea yeac songo nga negen negeng sasawa modaring. Modacni Anutuac sowecngu witininau enec.

⁴⁻⁵ Nenang Anutuac sing ferahem a kecni ongaasunina homemea anec. Anu ye sifu negennemmemma wosoefaha engena anemmemma heresongogoc hoannunudeac amma Kristogoc homecfunac nenahafoc megborinunuec. Anutungo wosoefaha ngemmema kopocsicac ebicfunac mesingunu komoc kpegecde. ⁶⁻⁷ Ye Yesu Kristoac gombunggac amma wosoefac kpenemmemma yegoc torokpenunuec. Imocac ngadeau danggunuctoayaac dzohongmekperagiudeac Yesu Kristogoc megborinunuma yegoc kurumennu fainunuec. ⁸ Imoc yofiac, ngeni Yesu negensinggegec yeng danggunuha ngemmema kopocsicac ebicfunac mesingunu komoc kpegecde. Nga imoc ngenang gombunggac kpac. Anutungo wosoefahaac amma wiac imoc ngemmeeec. ⁹ Imoc ngenang angammemeac kpac. Imocac ngic mongngo yengenaac negenu wiac engena mi ambeso. ¹⁰ Nenang Anutuac marikibi nga Yesugoc kpeturanggema kecni Anutungo angammeme gombunga arenggema derecgenemmemec. Nga yeng areng imoc modacma kecnideac denemmemec.

¹¹ Imocac ngeni wioc yomoc negenggec febeso, ngeni warac bangecsebi arenna ngicngac bangec monnunac Anutu mi negemmima kecmagec yudangic yeni sebi tosangina herec herecgeango ngeneac yofi degec, "Ngeni imocngina kpac." Faka imoc sebiu angana imoc ngicngu memea. ¹² Naso imohai ngeni Kristoac kpac kecma israengic yeneac arenna torokpema mi kecgec. Nga Anutungo dzadzahacac yoac dedzege israengicngac kpeyemmemec, imocac ngadeau kecgec. Ngeni bangetoa bangec yomohai Anutua kpac kecgec nga kekec gombunga mong fingebesande, imoc mi negensinggegec. ¹³ Ngeni warac araing kecgec amma naso yofinenggac Yesu Kristogoc kpeturanggema kecdae. Nga Kristoac sawango wangecnunu Anutuac hoannu sikedacma kecdae.

¹⁴ Kristo ye yengenaoc neneac raeaotanina. Yudangic nga ngicngac bangec monnunac, nenang botucninau kpaefeu yeng imoc hendzicma ngaba imoc meickeu kpac anec. Kpac anu ye yengenaaru kpeturannunu habu mocgu aning. ¹⁵ Nenanggarunac ngic gboria mocgu fingerudeac ye sacfusia faima dedeseriyoac manau nonoyoac fede, imoc sasawa meickeec. Ifi anu raeaota fingerec. ¹⁶ Ye mariponnu homema namma habu yohockang ngabagoc tohoemema kefing, nenang kpeturannunu uba mocgu aning. Amma Anutuaru fainunuma sacfusiango kpeturannunu ruae fingerec. ¹⁷ Yeng sikema araing nga wegenac kekeha momoc raeaoyoac dekperaginemmeu negening. ¹⁸ Asu mocgungo wangecnunu ngeni nga neni kpeturanggema Manggacac hoannu naric hama nannide.

¹⁹ Imocac naso yofinenggac kuriha monggoc mi kecdae. Ngeni Anutuac ngicngac kpetiacgoc kpeturanggema ama mingina anggec. Amma yofinenggac Anutuac arengfora kecdae. ²⁰ Ngeni Anutuac ama mengunungunuya. Aposoro nga profete neneng serengunudimbe amma Yesu Kristo yengenaoc hocwotung seria ande. ²¹ Nenang sasawango yeac witiu torokpeu torokpe emma Asuac kucfu yadiseri amma Kebuac womongyada kpetiac fingecyadi annide. ²² Asungo ngenearu ua mema ngeni ifingoc yearu meyadingunuma torokpengunu ngeni Anutuac amma fingecyadi anggecde.

3

¹ Anu ni Pauro imocacnac ngicngac bangec monnunac ngeneac amma Yesu Kristoac witicngic anai kecduae. ² Ngeni neac hania bic negendae. Anutungo danggunuha ngenearu mekemba dema uayoac denenec. ³ Denemmemma negeng sufufuya didiu deficgenenec, yoac imocnac wegena bic choduae. ⁴ Ngeni imoc osoma Kristoac yoac sufufuya hania negentegecduae, ifi naric negenggecde. ⁵ Yoac sufufuya imoc Asungo aposorofora nga profetefora kpetiac kecdae, yenearu deficgeyemmemec. Bicngoc

ngic keceregec, yenearu ifi mong mi dedea. ⁶ Yoac sufu sufuya imoc yofi, nenang Yesu Kristogoc kpeturanggema kecdimbe amma Anutungo bicngoc nenanggac dedzege anec. Ngicngac bangec monnunac nga yudangic neni maridzoming imoc nenahafoc mekecnideac siduc gombung imocngko dekperaginemmeu forakebanga mocgu annide. ⁷ Ni siduc gombung imocac kingangkpekpe kecbadeac Anutungo wosoefahaac ua nga kuc amma danggunuha nenec, imoc yengena kucfu denenec.

⁸ Anutungo ubangerec anenu Kristoaru semengtoa fefea fede, imocac siduha ngicngac bangec monnunac Anutu mi negemmidae, yenearu dekperagiyemmebadeac ua imoc denenec. Ni ngic kpetiac sasawa yenearunac mameanec nga yeng sifu ifi anenec. ⁹ Nga yoac sufu sufuya dekperagibadeac yoac yofi edenuma nene, Anutungo wiac sasawa deu fingecg, ye negen negensufuya uba tembuha bicngoc hanahema negengerekefec. ¹⁰⁻¹¹ Ye negen negentegectoaya imocac hania imoc bicngoc Yesu Kristo Kebunina yearu arenggeu yaguc fora ande. Gareng areng nga areng kuctoanginagoc sawau kecdae, yeni imoc negentegecgecdeac Anutuac kpebungforango imoc dekperagiyemmebisia. ¹² Anu Kristongo sing meficgenemmeu ye negensinggema kengec nga ubayohoa kpac Anutuac hoannu naric fingeckecdimbe. ¹³ Imocac yofi edengunuba negengec: Ni ngeni meficngunubadeac kpenzeng witiau kecba imocac ubangina kuha mi mabeso, kpac. Imoc memeficngina ambeso.

¹⁴⁻¹⁵ Imocacnac nenang Mannina kecde, yefafoc heimima numumiandue. Yeng ngicngachabufora sasawa bangecfu nga kurumennu kecdimbe kpac nemmeu yeac kpac nenannu fede. Ngeneac negemma yearu yofi numuandue,

¹⁶ “Anutu, ge kuc nga kibikperagitoagango Asugaac dzohonnu kuc meficgeyemmeu ubaonganginango yadiseri ambeso. ¹⁷ Amma yeni Kristo negensinggec geng yeneac ubahereu kecbesena nga godongina heresongogoc kekecfu seria kecgecdeac meseriyununa. ¹⁸ Ifi anna yeni ngicngac sasawa kpetiac kecdae, yenigoc heresongogoc kekecac hania wihacnac made nga edihacnac hade amma noboc nobocnac hade nga emuhacnac erede, imoc efaima negentegecbisia. ¹⁹ Amma Kristongo heresongogoc hoannunuande, imoc ngic negen negeng sasawa ferahedacma fede, imoc ifingoc negenggecdeac numugendue. Ammanu gearu ubaac semeng wake wakea, imocngko mewakeyunubeso.”

²⁰ Anutu kuctoayango nenannu ua mekecde, yennoc ua hania hania engena yombong meudeac kuc femide. Amma yeac uango nunumunina nga nege negennina homac ferahedacde amma imoc wisic wisickeakpac. ²¹ Kristo Yesu kpebungfora kpeturanggema kecma kecerebesandae, ngeneac botucfu dedengerecngina yearu fekengkecbesande. Imoc fora.

4

¹ Imocac ni Yesuac amma witicngicngorongina kpema yofi edengunuba, ye kekec siriha monnu kpacngunuec, imocac siriha kecbisia. ² Ngeni yumea amma wosonomang hafoangoc kecma faka yumea mekecma ubangerecfu modzotitia kpac tomai kecma heresongogoc hoangemema nanggeemebisia. ³ Amma Asuac ruaeac witicngodedecknunguu uba mocgu anggec. Amma ngeni imoc herecgebauac seriyombonggema kecbisia. ⁴ Forakebanga imoc mocgu nga Asu ye mocgu, ifi isocngoc Anutungo kpacngunuu wiac gombunga siriha mocgu fingecngemmeudeac negensima kecdae. ⁵ Kebu ye mocgu nga nege negensing imoc mocgu amma dokunadzicngoc mocgu. ⁶ Anutu mocgu, yeng Manggac urecnina mocgu amma engenatoanina. Amma yeng ngicngac sasawa botucninau nga ubahereninasoc kecde.

⁷ Nga Kristongo yengena areng modacma kpebungfora nenang Tiri Asuac danggunutoyaac semeng, imoc hendzicma ubangerehaac wiac tembus tembus denemmeecsoc, imoc mekecdimbe. ⁸ Imocacnac yoac mong yofi fede,

“Ye wi sawau yombong emma witicareng witicyunuma wangecyununa arengau kenggec yeng bangecngic wosoefac wiara yemmeec.” *(Mitiyegec 68:18)*

⁹ “Ye wi enec.” Imoc eng mi dedea, ye waraima mama bangec manau kemeeecn go erema enec. ¹⁰ Ngic maec, yeng dzigenema emma kurumenga kurumenga ferecgedacma bangec nga kurumennu wiac sasawa sokodacma kefudeac enecnoc. ¹¹ Amma yennoc ua yofi denemmeec, goa aposoro nga goa profete amma goa siduc gombung dedekperagi areng* nga goa kpebung yeneac gareng amma goa miti kpoukpou, ifi denemmeec. ¹² Ngicngac kpetiac nenang miti ua kuhaoc mema Kristoac hanimari nga forakebanga meyadini seriudeac ifi fainunuec.

¹³⁻¹⁴ Nenang nambarac kekec monggoc mi kecbisina, kpac. Anutu medahango uayoac denemmeec, imoc negensima hania negen negeng keme kemea mekecma yoara negensinggema uba mocgu amma kecbisina. Nenang sasawa ifi kecma mitiu yadiserima Kristoac kpeteusoc, imohainoc kensikmina Yesu yengenaoc mewakenunuude. Ikocngic yeneng firang isoc ikocyaoacf sing segema sebiu faifaiyoac hania hania kpounemmegec daracburuc kpema kengkpe hakpe mi ambisina. ¹⁵ Ifiac amma nenang heresongogoc hoangemema yoac fora dekecbisina. Ifi anni haifakaninango hafoangoc fingecyadi ammanu orucnina Kristo yearu kpeketahemera for menide. ¹⁶ Yeac marabeau uanina tembus tembus meni, ginongngo hanimari nga wiac sasawa torokpedacma nanggeemeu forakebanga mocguyada fingecyadi annide. Imoc heresongogoc hoangemeemeac fakau fingerude.

¹⁷ Ni Kebuac kicfu gorongina kpema edengunuba negenggec: Ngeni, bangec monnunac ngicngac Anutu mi negemmidae, yeni isoc monggoc mi kecbisia. Yeni negen negengngina kpekeng kpehaac amma sing obohoma kecdae. ¹⁸ Amma yeni negen negentegecngina mi fedear kundung manau dzingfong kpema ubasinginaac amma Anutuac kekec ngadeau kecdae. ¹⁹ Yeni faka gombunga ngadehema gamea kpac kaisero faka nga kekec sicsauhagoc modacma ubawonongnginagoc torokpeu torokpe kecandae.

²⁰ Nga ngeni Kristoac sing ifia mong mi negendae, kpac. ²¹ Kristoac yoac fora kpounemmegec, ngeni imoc negenggec, imoc negenduae. ²² Hensongogina manganganango ubanegen negengngina esea memanganeec. Ngeni faka ifia warac modackecgec amma ngeni imoc wabisia. ²³ Tiri Asungo ubanegen negengngina megboribeso. ²⁴ Amma Tiri Asungo ubanegen negengngina gboria meficgemmeu ngeni imoc heigec kemebeso, imocnac Anutu yengena onga isoc dindingac nga kpetiac yombong kecbisia.

²⁵ Amma nenang sebi mocguac oruc kickedzac nga hanimaria kecma meficemema kecdimbeac ngeni sasawa faka ikoha wadacma yoac fora tosofocngina yenigoc denegeng amma kecbisia. (Dzekaraia 8:16)

²⁶ “Ngeni herengina buu kopocsic mi meficgebisia.” (Mitiyegec 4:4)
Nga ngeni herebu mekecmagec wenackiwango mi kemebeso. ²⁷ Ngeni mangana mingina ama mi heimibisia. ²⁸ Hamangecmeme ngic ye hamangec wama mariango ua fora mema semeng meficgema ngic makpekpaa meficyunubeso.

²⁹ Ngeni isi enacnginaunac mong mi erebeso, kpac. Yoac deandae, imocngic ngicngac yoacngina negemma ebicnginasoc meficyunuma yadiseri anggecdeac meseriyunubesonga. ³⁰ Ngeni Anutuac Tiri Asu ubaebic mi mibisia. Anutungo ebicfunac yungecngunuudeac naso faiet, imohai nanggecdeac dzadzahacac dzic Tiri Asu faingemmeec. ³¹ Botucnginau mundang kpema kekec mi febeso nga ngeni ngaba nga herebu faka wabisia. Amma ngeni yaipararac nga enacf faifai mi ambisia. Ngeni mangana imoc sasawa wadacma ukudacbsia. ³² Ngeni ruae nga wosoefac amma ubamangang angemema kecbisia. Anutungo Kristoaru kopocsicngina waec, ifi isoc ngeni ifingoc ngenaocngoc kopocsicngina waemebisia.

5

¹ Ngeni Anutuac songonambaracfora, imocac ngeni ye isoc amma yeac kekec modacma kecbisia. ² Kristo ye ifingoc heresongogoc hoannunuma yengena sebia

* ^{4:11:} Areng imoc yenyi siduc gombung dekeragigec ngicngac ubangina heiu ubamereng anggec.

desiemema sese imoc Anutuaru mekemma nenanggac donina mema homeec. Sese imocngo homung kerengagoc amma Anutuaru enec. Nga ngeni onga imoc modacma heresongogoc hoangemema kecbisia.

³ Amma ngenang botucfu kaisero faka nga sicsauc kekec wonongagoc hania hania amma kichodung, ngeni faka imoc hafoangoc wama mi yombong debisia, kpac. Ngeni kpetiac kecdaec faka ifia ngenearu angana mi ande. ⁴ Ngeni isi nga tenicfagoc yoac sicsauc kundungagoc, wiac ifia enacnginaunac ereu naric mi anude. Ngeni imoc wadacma ubangerecyoac nga dedengerecyoac degec ngereeude. ⁵ Amma kaisero me ngic ubawonongnginagoc areng ifia yeni Kristo nga Anutuac eucerereng manau naric mi enggecde amma maridzoming imohai naric mi megecde. Nga kichodunggac faka imoc nemu afec afehe faka. Nga ngicngac faka imoc meandae, yeneng eucerereng manau naric mi enggecde, ngeni imoc negenghomebisia.

⁶ Ikocngic mongngo yoac sicsauha edengunu ngeni imocac negenggec fora mi ambeso. Nocac Anutungo angammeme ifiaac kopocsicac turunga yoackpekpeac medac-fora kpouyemmeude. ⁷ Imocac amma ngeni yenigoc mi kpeketahebisia. ⁸ Ngeni warac kundunggac areng kecgec nga yaguc ine Kebuaru kpeketahemma kperagia areng andae. ⁹ Amma kperagiaac faka fora yofi fingeckecde, angammeme gombunga nga dindingac kekec amma faka nga yoac fora dede. Imocac ngeni kperagiaac nambaracfora amma imocac sirihau kecma ¹⁰ Kebungo negenu wiac ngereeude, imoc negengising amma ambisia. ¹¹ Ngicngac areng goa yeni kundunggac faka nga angammemengina fora kpac meandae, ngeni ine yenigoc mi kpeketahebisia, kpac. Nga ngeni faka nga angammeme nonongkac kperagiau mekperagigec haniangina hentegecgec ngereeude. ¹² Nocac yeneng fakangina sufu sufu angkecdae, imoc sasawa naric mi debade. Imoc deba gameagoc anude. ¹³ Nga faka ifia sasawa nonongkacf faini kperagiango imoc mekperagiu ireckeude.

¹⁴ Imocac siriha yofi, wiac sasawa kperagiango henu meaiude. Imocacnog yofi dedea, “O, ngic gau fema kecnec, ge gborima homecfunac yacna. Ifi anna Kristongo mekperagiguude.”

¹⁵ Imocac ngeni singngina gombunga hentegecma kengkecbisia. Amma ngeni ne-gen negengngina kpac isoc mi kecbisia, kpac. Ngeni ne-gen negentegecgor amma kecbisia. ¹⁶ Yofinenggac faka manganango sokodacma fedeac ngeni seserigoc faka gombunga amma kecbisia. ¹⁷ Ngeni ngicngac kapaya isoc mi kecbisia, kpac. Nga Kebungo ua dengemmee, ngeni imoc hentegecma kecbisia. ¹⁸ Ngeni waingdoku seria nema ubasufu mi ambisia. Imocng kekecngina memanganeude. Asungo ubanginau wakebeso. ¹⁹ Yegec mitikibiu fede nga Tiri Asungo yegec ngemmeude, ngeni imoc heima ubaemenegeng ambisia. Amma ngeni yegec heima musi kpema Kebu ubaherengo dengerebisia. ²⁰ nga ngeni Kebunina Yesu Kristo, yeac kpacf nasosoc Anutu Manggac wiac sasawaac amma dangge edebisia.

²¹ Ngeni Kristo eweheimima yeac amma uba mocgu amma enac tofoc tofoho angemema kecbisia.

²² Nenggac Kebuac enac tofoc tofoho kecdae, ngeni ifi isoc ewefocngina yeneac enac tofoc tofoho kecbisia. ²³ Imoc yofiac, Kristongo kpebunggac oruha nga ifi isocngoc eweango enemaac oruha ande. Kristongo kpebunggac oruha nga nenang yeac hanimari forakebanga andimbe nga ye Memengerecnina. ²⁴ Kpebungngo Kristoac enac tofoho kecde, ifi isoc nenggac ngeni ewefocngina yeneac yoac sasawa tofohobisia.

²⁵ Kristongo kpebungfora nenang heresongo negemma hoannunuma donina mema sebia desiemee, ifi isocngoc manggac ngeni enengfocngina heregoc yeneac songo negembisia. ²⁶ Anu nenang kpetiac annideac ye yengena yoaraac kucfu mitidokuyango dzuacnunuec. ²⁷ Dzuacnunuma menunu kpebungfora nenang nekuc nekutuckea kpac nga goctoponina kpac kecma yeac kicfu fingechnide. Nenang gombunga nga kpetiac ebicnina kpac kecma kuc nga kibikperaginagoc yeac kicfu fingechnideac negenec. ²⁸ Manggac ngeni sing imoc modacma enengfocngina heregoc yeneac songo negembisia.

Ngenang sebinginaac angemmeande, ifi isoc enengfocnginaac angemmebeso. Ngic mong ye heregoc enemaac songo negende, yeng yengena songo negenude. ²⁹ Nga ngic mongngo sebia ngaba naric mi ammiude, imoc kpac. Ye sebia henggareng amma nenyaka gombunga mima kecde. Kristongo kpebungfora nenannu ifinoc angkecde. ³⁰ Nenang Kristoac hanimari nga kickedzac mocgu amma kecdimbe. ³¹ Yoac mong yofi fede,

“Imocac ngic mong ye nonggomama wayuruma enemaaru kpeketaheu yeri ubasebi mocgu amma kefecde.” *(Fingec fingec 2:24)*

³² Anu negen negeng sufu sufuya yomoc kpeu keme kemea ande. Imoc Kristo nga kpebungfora ngeneac negemma deduae. ³³ Imocac ngic sasawa ngeni tembuç tembuç ngenang heresongogoc hoangemeandae, ngeni ifi isoc enengfocngina heresongogoc hoangyunubisia. Nga ngac ngeneng ifingoc ewefocngina eweheihei ayemmebisia.

6

¹ Nambarac, ngeni Kebuac amma nonggo mangfocngina yeneac enac tofoc tofoho kecbisia. Imocng sing dindingac ande.

² “Ge nonggo manghocga seseheyurubesena.”

Dedeserijoac imocng wiac ngemmeudeac waracyoac ande, imoc torokpema yofi dedea,

³ “Ge ifi amma wiac sasawa naric fingecgenu bangecfu naso herea kechereenade.” *(Makekeng 20:12; Dedeseri 5:16)*

⁴ Manggac, ngeni nambaracfocngina herebu mi meficgeyemmebisia, kpac. Ngeni Kebuac yoac modacma nonoyoac edeyunuma metingyunuma dederecge ayemmegec, yeni yadiseri ambisia.

⁵ Wanacngic minggingina bageau kecdae, ngeni uanginau negengyohoa kpac, yumea kecma ngisima bangecfu mingfocngina yeneac yoac tofohokecbisia. Dzonongngina fedeu yoacngina ferahebauac Kristoac enac tofohokecdae, ifi isoc yeneac yoac heregoc tofobobisia. ⁶ Nga ngeni mingfocngina yeneac kicfu uanginaac gombungasiric mi ambisia. Ngeni Kristoac ua ngic kecdaec Anutuac enac ubangerecgoc tofohoma songogoc uangina nasosoc gombunga mekecbisia. ⁷ Ngeni ngic yeneac negensima kpac, Kebuac negensima uangina imoc uba feacfu mekecbisia. ⁸ Nga negenggec, ngic mong ye yengena ua mekecde me wanacngic minginagoc kefu minginaac ua gombunga mekefudeu Kebungo imocac turunga socfungoc kpouyemerude.

⁹ Ngic ngeni wanac ngic yeneac minging kecdae, ngeni ifingoc wanac ngicfocngina yumea ayemmemba ngaba mi ayemmebisia. Ngeni yofi negembisia, kurumennu Kebu urecngina mocgu kecde. Yearu monde monde mi fede.

¹⁰ Desima deba, ngeni Kebuaru heisericc kuctoayango ngenearu ferecgema feu kucgoc kecbisia. ¹¹ Mangana minginango ikofu fusiu nendzic ngaba sikengemmu ngeni serima nanggecdeac Anutuarunac tebemariku dzikacac wiac sasawa, imoc megec kemeu serima nanggecde. ¹² Imoc yofiac, nenang ngic sebfusi yenigoc dzikac mi kpekecdimbe, kpac. Nenang sawau enara areng nga wiac kuctoanginagoc hania hania kecdae, yenigoc dzikac kpema kecdimbe. Hade hade imoc yeni kundunggac kuc kuneng nga engena amma gareng kecma bangec noboc noboc uangina mekecdae. ¹³ Imocac Anutuarunac tebemarikungina nga dzikacac wiac sasawa, megec kemeu dzikacnasou seria nammagec ngaba yeneng naric mi memangunuma woragec ngeni seria nanggecde.

¹⁴ Ngeni imocac yofi ambisia, yoac forango fadengngina anu ngeni imoc kebangng-inau dzegebisia. Dindingac kekecngo mariku anu ngeni imocng kperacemebisia.

¹⁵ Ubangina meefaiu faka imocng hanitabengina anu ngeni imoc heigec kemeu tiserima kemma siduc gombung dekperagigec ruae fingecbeso. ¹⁶ Amma ngeni imoc sasawa mekecbisia nga tebeac saia, imoc negen negensingnginaac onga. Ngeni imoc nasosoc mema nanggec mangana minginango tebemedaha gerecborangagocng wedecngunu ngeni imoc mebockebisia. ¹⁷ Amma aieng opoc kpara “Anutuac memengerec.” imoc

heigec kemebeso. Amma Tiri Asuarunac dzikacac beang kpara “Anutuac yoac.” ngeni imoc mekecbisia.

¹⁸ Asungo ngenebaru ua meu nasosoc Anutu kpacsambic ammima kecma nunumungina numumbisia. Ngeni gaugbori kecma seserigoc amma kpetiac areng sasawa yeneac negensima ifi angkecbisia. ¹⁹ Anu enacna efaiu kengecna kpac kecma siduc gombunggac negen negeng sufuya dekperagiyemmebade nga Anutungo yoac nenundeac ngeni ifingoc numubisia. ²⁰ Ni imocac siducedengo witicamau tacma kengeha kpac yoac imoc gombunga edeyunubesare.

Dedesiyoac

²¹ Tikikongo hama kekecnaac hania nga ua meanduae, imoc obohobauac yoacsiduc angemmedarude. Ngic imoc negen negensinggoc tosonina anu ye heresongogoc hoanggedimbe. Ye Kebugoc kpeketahemma seseri amma yeac kingang kpekecde. ²² Yeng neneac yoacsiduc angemmema ubaefac kpengemmeudeac sueba haude.

²³ Anutu Manggac nga Kebunina Yesu Kristo yereng negen negensinggoc tosofocna ngeni ruaegoc nga heresongogoc hoangngunuma negen negensingngina meseribesera.

²⁴ Ngicngac Kebunina Yesu Kristo heregoc yeac songo negendae, ngenebaru danggunuc nga songotoaya wisic wisickea kpac imocngo fekengkecbeso.

**Paurongo
Firipi Kpebung Yeneac Kibi
Ohoe**

¹ Yesu Kristoac wanacngic Pauro nga Timoteo, nereng kibi yomoc faidipe, imoc Firipi taonnu kpetiac areng sasawa nga kpebunggac enarafovngina amma kpebunggac memefic ngicngacfocngina Yesu Kristogoc kpeketahemha kecdae, ngenearu hade.

² Mannina Anutu nga Kebunina Yesu Kristo yereac danggunuc nga ruae ngenearu febeso. ³ Ni ngeneac negensianduae, naso imohai Anutuna ubangerec edeanduae.

⁴⁻⁵ Siduc gombunggac ua hanaheaiunac erema yaguc ande, ngeni nigoc ua areng mocgu mema kefing, imocac amma ngeneac negensima sogac sogaigoc numuanduae.

⁶ Amma yofi negensinggeduae, Anutungo ua gombunga ubaherengina hanahema imoc torokpema mekengkefu Yesu Kristoac nasotoa hau, imohai uaya imoc mesidarude.

⁷ Ni ngeneac ifi negemma herenau baringunuma kecbade imoc ngereede. Witicamau kecbade me mitiac ngabaareng yenearu siduc gombunggac hania dekperagibade me siduc gombung ngenearu meseribade imohai ngeni sasawango nigoc Anutuac wosoe-facfu areng mocgu kecnide.

⁸ Anutungo hepucna kecde. Yesuac wosoefacfu heirima ngenigoc kecbadeac ubasonga fede, imoc fora deduae.

⁹⁻¹⁰ Nga faka damocngo gombunga ande, ngeni imoc naric isinggegecdeac yofi numuanduae, ngeni heresongogoc hoangemema kecbisia. Nga songo imocngo yadima negen negeng kpeu keme kemea meficgeu Anutuac sing negentegecgecde, ifi numuan-duae. Ngeni ifi negentegecma Yesuac nasotoa hasikeu kongaha nga kopocsicngina kpac nanggecde. ¹¹ Nammagec dindingac kekecac fora Yesu Kristoac kpacfu mewaken-gunuude. Imocngo Anutuac kibikperagi nga dedengerec meficgeude.

¹² Tosofocna, nearu faka fingerec, imocngo siduc gombunggac ua monggoc meseriu yadiec. Ngeni imoc negenggecdeac songona ande. ¹³ Yadiu ngicngac ngictauac oda manau kecdae* amma ngicngac noboc noboc kecdae, yeni sasawa bic yofi hentegecgec, “Ngic imoc Kristoac amma witicfu kecde.” ¹⁴ Witicamau tacduaeac tosofocnina homac negen negengngina Kebuaru seriec. Serima Anutuac yoac kengeha kpac dekecdae.

¹⁵⁻¹⁷ Ni seria namma siduc gombung dekperagibadeac Anutungo fainuec, yeni imoc negemma sing dindingac wosoefacfu Kristo dekperagikecdae. Tosea yeneng ine ker-acmanganggoc nga ngabau negen negeng kpeengkpema witiau Kristo dekperagidae. Dekperagima neac yofi negensidae: Ye ebic hania hania meficgeminide. ¹⁸ Yeni Kristo herenginaunac mi dekperagianda me sing forau Kristo deandae, imocac homac mi debesonga, yeneng Kristo dekperagidae, imocngo wiac engena ande. Ifi negemma yofinenggac sogaiduae amma monggoc sogaibade. ¹⁹ Ifi ammagec ngeneac nunumu nga Yesu Kristoac Asungo meficnude, imocac yofi negensidae, witicfunac yungecnugecde. ²⁰ Nga songotoana yofi fede, wiac monggac me monggac negemba gameagoc mi ande. Ni ine kengeha kpac kecma kekecfu me homecfu sebinango Kristo kpac kuneng mibade.

²¹ Kekec yomohai Kristogoc kecduae nga homecngo forana meficgenenude. ²² Nga sebigoc kecma ua meba fora homac fingerudeu imocac dafi debade, imoc mi negentegecduae. ²³ Songo yohockangngko kpedzinuu kecduae. Kemma Kristogoc kecbadeac homac anende, imocngo wiac sasawa ferahemha ngereeyombonggede. ²⁴ Nga ngeneac gombunggac amma sebigoc monggoc torokpema kecbesare. ²⁵ Imoc seria negengy-ombonggeduaeac bangecfu ngicngac sasawa ngenigoc kecma meficngunuba ngeneng negen negensingoc kecma yadiseri amma sogaima kecgecde. ²⁶ Nga ngenearu monggoc

* ^{1:13:} Ngictau yeac oda manau yengena amagereha feec. Amma ofis hania hania nga witicama amma ua arenggac ama fekenec.

hama kecbadeac ngeni nenggec imocngo songo meficgengemmeu Yesu Kristoac amma kekecngina meseriude.

²⁷⁻²⁸ Ni hama ngenembade me hereau kecma ngeneac yoacsiduc yofi negembeso anduae, ngeni ongaasu mocgu nga ubahere mocgu kecma ngabafocngina yeneac mong mi kengecngunumanu serima namma yeni siduc gombung negensinggegecdeac ewema kpendzenggoc uatoa mekecdae. Imoc fingerudeac ngeni Kristoac siduc gombung imocac siriha kecbisia. Faka imocngo ngabafocngina yofi edzacyunuude: Yeni manganema kpac anggecde nga ngeni ine komoc kpegecde. ²⁹ Ngeni Kristo meficgegecdeac areng yofi ngemme ngemmea fede: Ngeni ye negensinggema ifingoc yeac amma kpendzeng kpegecde. ³⁰ Warac uau kpendzenggoc kekec uatoa mekefai imoc kicngo henggec amma yaguc mekecdue imoc negendae, siriha ifiangoc ngeni yaguc mekecdae.

2

¹⁻² Kristongo meseringunuma heresongogoc hoangngunukecde. Nga Tiri Asungo hama kpeturangngunu ngeni ubamangang negengemema wosoefac angemegecde. Imocngo botucnginau ngen negeng mocgu nga uba mocgu amma heresongogoc hoangemegec ubangerec hafoa negembade. ³ Ngeni kuneng tatacac amma kichodung mi ambisia nga sebiengenggoc mi kecbisia. Ngeni faka imoc wama memaemema ngicngac ogofocngina yeneac kpac miacma ngenang kpac memama kecbisia. ⁴ Ge geangga wiacsac mi garenggebesena, ogofocga yeneac wiac ifingoc maficyunuma garenggebesena. ⁵ Yesu Kristoac faka nga ngen negeng fede, faka nga ngen negeng siriha imocngo ngenearu febeso.

⁶ Yeng Anutugoc siricngira mocgu kefoc nga ye Anutu kekeha kefec imoc segereudeac mi negenec.

⁷ Ye yengena kekec wama wanacngicac siric meec. Amma ye ngic sebi mema ngic siric fingeru henggec.

⁸ Ye yengenaoc memaemema Anutuac yoac modackecma homec meficgema mariponnu homeec.

⁹ Imocac amma Anutungo ye miacma engenatoa gununggeec amma kpac kuneng miec, imoc kpac sasawa ferahedadce.

¹⁰ Anu yeni kurumennu nga bangecfu amma bangec bageau kecdae, yeneng Yesuac kpacfufa heidaegecdeac ifi anec.

¹¹ Ifi anecac ngicngac sasawa yeni enacnginango Yesu Kristo ye Kebu, ifi dekperagigec dedengerec imocngo Anutu Manggacac ambesande.

¹² Imocac songoarengfocna, ngeneng warac nasosoc yoacna modacma kecgec, ngenec wegena kecbare enacna modacgec ifi isocngoc yaguc hereau kecbare ngeni yoacna modacmangoc wosokpidocfu nga fagung amma madzacgoc uatoa mema kecmagec nasoya hau komoc kpegecde.

¹³ Anutungo ua arenga gombunga fingerudeac ubaherenginau ua mekecde. Ifi mekefu ngeni efaigecde amma ua imoc megecdeac kuc ngemmekede. ¹⁴ Ngemmekefu ngeni dehesi nga negengyohoha kpac kecma ua sasawa mebisia. ¹⁵ Ifi amma ngeni, ngicngac mangac manganea nga sing sege segea kecdae, yeneac botucfu Anutuac nambarac amma kopocsicngina kpac kecma kpetiac nga kongaha nanggecde. Namma Anutuac yoac kekehagoc mekecma asomeng isoc bangectoa bangecfu mekperagiyemmegecde.

¹⁶ Ngeni ifi anggec, Kristoac nasotoau ngeneac negemba wiac kuneng anude nga neannaac yofi negembade, ni sicsauc mong mi nedziai me uatoa imoc sicsauc mi meai.

¹⁷ Ngeni sesegerec isoc ngen negensingngina mekecdae nga ngabafocna yeni sacna imocac witiau faigecdeu ni sifu songo negemma ngenigoc sogaiduae.* ¹⁸ Nga ngeni sing imohaingoc songo negenggec nenhafoc sogaibisina.

* ^{2:17:} Anutungo songo negenudeac Yuda yeni sesegerecngina witiau waindoku kpakegec. Pauroac sac siric ifiu htinggegecde imocac sogaide. Bangec kisiu 15:3-10

¹⁹ Kebu Yesungo negenu naric anu naso mi hereemanu Timoteo sueba haude. Amma yeng dzigenema ngeni dafi kecdae, imocac siduc edenuu ubana ngereeude. ²⁰ Nocac ye isoc ngic ifia mong nigoc mi kecde, kpac. Ye mocgungo ngeneac hafoangoc angkecde. ²¹ Nga ngicngac homac yeneng yenang wiacacsac negemma Yesu Kristoac uaac mong mi negengkecdae. ²² Nga Timoteo ye fakaya gombunga, ngeni imoc negendae. Ye medacngu mamagoc ua mekecde, if isoc nigoc siduc gombunggac ua meficnuu mekecdipe. ²³ Nga nearu sing dafi fingerude, imoc negenghomemaguc ye bic sueba haudeac negensiduae. ²⁴ Amma Kebu negenserima yofi negeduae, neannaoc naso mi hereemanu ifingoc ngenearu habade.

²⁵ Anu tosona Epafodito sueba ye ngenearu monggoc haudeac negenduae. Ye nigoc ua mekecde amma nigoc kecma Kebuac wasai ngic ande. Nga ngeneng ye suegc hama nanggekufung anenu wiac monggac mi obohobade. ²⁶ Ye hafei ammiu siduha negenggec, imocac ye ngeneac fagung amma hereango ngeneac sasawa ammikecde. ²⁷ Nga foracngoc, ye hafei ammiu homebesonga anec. Nga Anutungo yeacsac kpac, ni momoc ubamangang negennemecma ngerec ngeree meficgemiec. Ifi anu ubahodung kuneng mi fingecnenec. ²⁸ Nga ngeneng ye hemma ubangerec negenggecdeac nga neng ubahodunna kpac kecbadeac ye sueba ngenearu haude, imoc seria negensiyombonggeduae. ²⁹ Nga ngeni Kebugoc kpeketahedaec amma ye hafoangoc hoanggema ama heimima ye nga ngic ifia goa kecdae, yeni eweheihei ayemmebisia. ³⁰ Nga ngeneng meficnugecdeac obohogecac yeng hama meficnuma Yesu Kristoac uaac amma sebia memanganema homebeso anecnoc.

3

¹ Yofi torokpema deduae. Tosofocna, ngeni Kebuaru kpeketahemma sogac sogaigoc kecbisia. Ni yoac warac ohongemmeai imoc monggoc ohongemmabadeac modzona mi tide, kpac. Imocngo kasongina anude.

² Ngic kasi isoc kecdae, ngeni ngic yeneac henghomema kecbisia. Amma ua ngic mangana, ngeni yeneac negenghomema kecbisia amma ngic sebingina herecgema manganegec, ngeni yeneac ifingoc henghomema kecbisia. ³ Anutuac Asungo faka nenearu meu Anutuac ua mekecdimbe, nenannoc sebi tosa heret heretgea areng andimbe. Neni Yesu Kristoac negenni engena ande amma negen negensinnina nenannu mong mi fainide. ⁴ Nga neannaaru negen negenna faiba feudeac negemma sifu naric ambai, fora. Nga ngic goa yeneng yenannu negen negengngina faigec feande, ifi isoc faiba febac dede neng ifingoc feracyunuma ambaiac siriha. ⁵ Nga fingecba uameme 8 ammanu sebi tosana herecgegec. Ni Israe arenunnac nga Benyaminggac kisicfunac Hebiraio ngic yombong amma Hebiraio arenunnac. Amma farisaioac sinnu dedeseriyoac modarai. ⁶ Ni ngombonggema kpebung yunukporac ayemmekefai amma dedeseriyoac mong mi ferahema ihai ngic dindingac kefai. ⁷ Nga warac wiac mekecma negemba memeficna anec, imoc ine yaguc Kristoac amma negemba memefiha kpac ande.

⁸ Ni Kebuna Yesu Kristo ye negemmiba, imocngo memefiha engenatoa ande. Imocac amma warac kecma anai meai, imocac negemba memefiha kpac angkecde. Kekecnau Kristo mekecbadeac amma wiac sasawa negemba seuha andarec, imoc bic wayai.

⁹ Dedeseriyoac modacma neanna kucfu ngic dindingac ambadeac mi negensikecduae. Anutungo negen negensinggac sing yofi faiec, ngic mong ye Kristo negensinggeude, ye ngic dindingac anude. Ifiac amma Kristoaru kpeketaheba Anutungo nenu ngereeudeac anengande. ¹⁰ Amma Kristo yengena nga Anutuac kuc yengenaoc Kristo homecfunac megboriec, imoc negemmibadeac anende. Amma yegoc kecma kpendzeng kpema yeng homeec, ifi isoc homema ye isoc ambadeac negenduae. ¹¹ Ifi angkecbare nasoya hau homecfunac gborima yachesonga negensiduae.

¹² Ni nedzi nedzi ua hafoangoc bic mesiae me firanggac sokoc bic meai, ifi mi deduae, kpac. Yesu Kristongo menuec, imocac amma imoc mebadeac nedzi nedzi ua mekecduaengoc. ¹³ Tosofocna, ni firanggac sokoc bic meai, ifi mi negensiduae. Amma

ua mocgu yofi mema kecduae. Wiac bic anai, imoc monggoc mi negensikecduae nga wiac ngade fingerude, imoc mebadeac ua serima mekecbade. ¹⁴ Amma ni bic yombong kpeteu sikema firanggac sokoc mebadeac nedziduae. Imocacnac Anutungo kpacnunuu Yesu Kristogoc kpeketahemu kurumennu kecnide.

¹⁵ Anu yadiseri bic aning, nenang sasawango ifi negensibisina. Nga ngeni wiac monggac negenggec singa siriha mong anudeu Anutungo wiac sufu sufuya imoc ifingocmekperagingemmeude. ¹⁶ Nga sing mocgu modacma haing, sing imocngoc modacma kembisina.

¹⁷ Tosofocna, neng waraingemmeba ngeni imoc hemma siriha imocngoc modacnubisia. Amma ngic neac siric modackecdae, ngeni kicngina yenearu fibisia. ¹⁸ Warac naso homac yoac edengunukefai, imoc yaguc kiagcog monggoc edengunuduae. Ngic homac yeneng Kristoac mariponggac ngaba amma kecdae. ¹⁹ Ngic ifia yeni hofeac areng anggecde. Heresebinginaac songo, imocngo kebungina angkecde. Nga fakangina gameagoc, imocngo yeneac ubangerec angkecde amma yeneac negen negensi imoc bangecac kekecfu fekecde.

²⁰ Nenang kurumenggac areng kecdimbe nga kpacnina kurumennu fede. Nga neni memengerecnina Kebu Yesu Kristoac tomai kecmina yeng ihacnac hama menunu komoc kpenide. ²¹ Ye wiac sasawa yengena bageu faiudeac kuc femide. Amma yeac kuc imocngo bangecsebinina makpekpeaheimerenu yengena sebi isoc kuc nga kibikperagiagoc anude.

4

¹ Tosofocna, ngeni heresongogoc hoangngunuba herenango ngeneac ammikecde. Ngeneng sogac sogai meficgenemma neac irana andae. Nga songo tosofocna, ngeni imocac amma Kristoaru kpeketahamama seria kecbisia.

² Euodia nga Sintike, ngeri Kebugoc kpeketahemu kecma uba mocgu ambesera, dederecgeyoac imoc edenguruduae. ³ Nga ogona geng yoac modackecnec amma nigoc ua mekecnecac desambic amma yofi edeguduue, ngac yohockang yomoc meficyurubesena. Nocac yeri nga Kremento amma ngicngac tosea goa kpacngina kekecac kibiu fede, yeneng nigoc kecma siduc gombunggac ua arennu uatoa mema kecgec.

⁴ Ngeni nasosoc Kebuaru kpeketahemu kecma sogac sogaigoc kecbisia, monggoc deduae, ngeni sogac sogaigoc kecbisia. ⁵ Kebungo wegena kecde. Ngicngac sasawango ngeneac yumea kekec hentegecbisia. ⁶ Ngeneng wiac monggac negengyohoc mi ambisia. Amma ngeni wiac monggac angemmede, imoc Anutuac kpara kpacma dengerema numumbisia. ⁷ Ifi ammagec Anutuac ruaengo negen negentegec sasawa ferahede, imocngo ubaherengina nga negen negengnginaac kaso anu Yesu Kristoaru kpeketahemu kecgecde.

⁸ Tosofocna, yoac mong yofi debesonga negensidue, faka fora nga eweheiheiagoc nga dindingac amma kongaha, faka henni songea angande amma negenni gombunga ande nga angammeme gombunga dengerenideac siric ande, faka sasawa ifiango negen negengngina mewakedabeso. ⁹ Nga neng negen negeng sasawa kpoungemmeba negenggec nga wiac nearunac kedzacnginango negenggec amma kicnginango henggec, ngeni ua imoc medacbsia. Ngeni ifi anggec Anutungo ruaeaa ngemmema ngenigoc kfude.

¹⁰ Ngeni monggoc neac negensima fakangina heigborima memeficna fainenggec, imocac Kebu dengerema sogaiduae. Ngeni warac bic neac negensigec, fora. Nga memeficac sing mong mi feecac obohoma wagec. ¹¹ Ni wiac goaac obohoma dewaidzocyoac mi deanduae. Iwaina fenende, imocsac mekecma naric kecduae. Ifi kecbadeac negen negeng bic meai. ¹² Nga makpekpea kekec nga finactoagoc kekec imoc tobanggema negenai. Amma yaka negebec kekec nga here home home kekec nga wiaca homac mefeanc kekec, Anutungo negen negeng imoc sasawa edzacnudarec.

¹³ Kuc minginango negennemmanu wiac sasawa imoc naric andacbade. ¹⁴ Ebicfu kecbareng ngeneng meficnugec, faka imocac negemba ngereede. ¹⁵ Siduc gombung-gac ua hanac hanaheau Makedonia prowins wama kenaimoc, imoc Firipi kpebung ngenengsac hiedzoac arennu nanggenugec, imoc negenda. ¹⁶ Tesaronike taonnu kecma wiac kpedadanggeai, imoc ngeneng negemma ifingoc naso goa heimefci anemma fainenggec. ¹⁷ Ifi deba ngeneng wiac nenggecdeac monggoc derecgeduae, ifi mi negembisia. Ua megecac fora, imocngo yadiseri amma wiacngina kurumennu fede imocgoc torokpeude.

¹⁸ Epafoditongo wiac goa ngeneearunac mehaecac wiac monggac mi oboho kecba wiacna ebiriangoc fede. Nga wiac imocngo homung kerengagoc amma sese songea, Anutungo imoc henu ngereede. ¹⁹ Anutuna ye kperagia nga finactoayagoc. Amma yeng ngeni wiac obohodae, imoc Yesu Kristoac amma naric ngemmedarude. ²⁰ Anutu ye Mannina. Yearu dedengerec nga dedengerec fekengkecbeso, imoc fora.

²¹ Kpetiac areng sasawango Yesu Kristogoc kpeketahemka kecdae, ngeni yenearu wenacngerecnina edeyunubisia. Tosofocngina yei nigoc kecdimbe, yeneac wenacngerecngina ifingoc ngenearu hade. ²² Nga kpetiac areng sasawa yei kecdae, yeneng ifingoc ngeneac wenacngerec dedae. Amma Sisaac areng yeac amau kecdae, yeneng wenacngerecngina seria yombong faingammedae.

²³ Kebunina Yesu Kristoac wosofacngo ubaonganginagoc febeso.

**Paurongo
Korosai Kpebung Yeneac Kibi
Ohoec**

¹ Pauro nga Timoteo nerearunac. Anutungo negennenu Yesu Kristoac aposoro anduae nga Timoteo ye negen negensinggoc tosonina. ² Kpetiac areng nga ngicngac Kristogoc kpeketahemha ye negensinggema Korosai taonnu kecdae, kibi yomoc ngenearu faide hade. Anutu Manninango danggunuc ngemmema ruaea ngemmebeso.

³ Neni ngeneac amma nunumu ua meandimbесoc, Kebunina Yesu Kristo yeac Manggac nga Anutu dangge edeandimbe. ⁴ Nocac ngeni Yesu Kristoaru kpeketahemha ye negensinggema kecma kpetiac areng sasawa heresongogoc hoangyunuandae, ngic yeneng imoc edenunugec bic negening. ⁵ Ye wiac kurumennu faiu tomaingina fede imoc ngade megecdeac negensinggema kecdae. Nga kurumenggac siduc gombunggac yoac fora ⁶ ngenearu bic hasikeu negenggec, imocngo bangectoa bangec imohai fingecyadi amma fora gombunga meficgeude. Nga ngeni Anutuac wosoefacac siriha hentegecma siduc gombung negenggec, imohacnac erekecma yaguc ifingoc ngenearu yadima kecde.

⁷⁻⁸ Asungo ngenearu ua meu heresongogoc hoangemedae, songo tosonina Epafarango siduc imoc anemmeec. Epafara ye Anutuac wosoefacac siriha kpoongemmeec amma ye yofinenggac meficngunuma Kristoac kingangkpekpe kecde.

⁹ Anu hanahema ngeneac siduc negening, imohacnac ngeneac amma tatahoc numuma kpesi kpesi yofi kpesikecdimbe, Anutungo wiac negenu ngereede, negen negeng imocngo mewakengunu Asu yengenaoc negen negeng gombunga nga negen negentegec ngemmebeso. ¹⁰ Ifi fingeru ngeni Kebuac yoac hafoangoc modacgec yeng imoc hendacma negengngereeude. Nga ngeni ua nga angammemenginaac fora gombunga meficgedacma Anutuac negen negennu yadiseri monggoc anggecde. ¹¹ Nga yengena kuc nga kibikperagitoa imocngo meseringunuude. Ifi anu ngeni kuc sasawa mema sogac soagaigoc modzotitia kpac seria yombong kecgecde.

¹² Anutu Manggacngo kpataning arenggac wiac kperagiu faifaia fede, imoc menideac mengerenunuec. Nga ngeni yearu sogac soagaigoc dangge dema kecbisia. ¹³ Imoc yofiac, kundungngo garennunuudeac uayoac nga kuc mekefec. Mekecmamu Manggacngo imocac kucfunac meicnunuma Songomedahaac eucererennu fainunuec nga nenang yofinenggac ifi kecdimbengoc. ¹⁴ Medaha ye donina meu Anutungo kopocsicnina waec. ¹⁵ Medac ye Anutu mi hengena yeac siric kefec amma kecde. Kecma wiac sasawa mi fingecmanu ye Anutuarunac kponanga mocgu tohoma fingerec. Fingecma waracdacinna amma kecde. ¹⁶ Nga Anutungo Medahaac negensima wiac sasawa yeac anudeac Medahaarusing wiac sasawa bangecfu nga kurumenga kurumenga manau fedacde, imoc meficgeoc. Yeneac areng yofi, wiac kicngo hengena nga mi hengena amma sawakebangau ngictau tatacnginagoc nga kebuareng kecdae amma ngic yei enara tatac mema kecdae nga ngic gawamang uanina megecdeac uayoacnginagoc kecdae. ¹⁷ Nga wiac sasawa mi fingecmanu ye bic kefec amma yeng wiac sasawaac haniatoa mocgunoc.

¹⁸ Ye kpebunggac oruha nga kpebungngko yeac forakebang. Amma ye warac warac tatacfu tarudeac warainemmemha homecfunac yacma fingerec. Fingecma kpebunggac hanac hanahea kecde. ¹⁹ Anutungo yofi negensi ngereec, “Yeac ubahereau hafoangoc tacbade.” ²⁰ Ye medahaac ifi negemma wiac sasawa bangecfu nga kurumennu fede, imoc Anutugoc uba mocgu anggecdeac medahaac sawa mariponnu maec, imoc mema wiac sasawa imocngo mengereu ruae fingerec.

²¹ Anu ngeni warac ubanegen negengnginango Anutuac kuric kecma yeac ngabafora amma angammemengina manganagoc kecgec. ²² Ifi kecma kpetiac nga kpataning amma kopocsicnina kpac anggecdeac yeng mengunuma yeac kicfu faingunu nanggecdeac negenec. Imoc fingerudeac ye homeec, naso imohaingoc yengena sebiu ngeneac

kopocsicac turunga kpouu ruae fingerec. ²³ Ngic yeneng warac siduc gombung imoc dekperagigec ngeni nga wiac sasawa Anutungo deu fingegec, yeni yoac imoc negenggec. Anu ngeni siduc gombunggac fora ihai tiserima namma mi wagecdeu ngeni yeak kicfu nanggecde. Nga Pauro neng yoac imocac kingangkpekpe kecbadeac Anutungo meficnuec.

²⁴⁻²⁵ Anutungo ua arenga nenec imocac siriha yofi, neng yeac yoac hafoangoc ngenearu dekperagibadeac ua arenga nenec. Nenu yoac imocac kingangkpekpe anai. Nga ngeni Kristoac kpebung yengena forakebanga. Ngeni yeac amma kpendzeng soha mi kpegec. Nga neng meficngunuma ngeneac amma neanna sebiu kpendzeng kpeduae. Ifi kpema ubangerec negenduae. ²⁶ Amma siduc gombung dekecduae, imoc warac nasoya nasoya ngicngac areng sasawa keceregec yenearu sufu sufu feec. Ifi feu yofinenggac yengena kpetiac areng kecdae, ngenearu fingectegecde.

²⁷ Anutungo yoac sufu sufuya feec, imoc kpetiac areng ngenearu dekperagiudeac negenec. Yoac sufu sufuya yofi feec, yeng bangec monnunac ngicngac, yenearu kuc nga kibikperagi homacngoc edzacyunuude. Imoc yofi, Kristongo ubaherengina kecde nga yeac uaac amma Anutungo kurumennu ngeneac kuc nga kibikperagi faiu tomaingina fede. ²⁸ Nga neni ye dekperagiyemmemma ngicngac sasawa tembus tembus gorongina kpema negen negentegecgor yombong yoac edekpou ayemmekedimbe. Ifi ayemmeni ngicngac tembus tembus yeni Anutuac kicfu Yesu Kristogoc kpeturanggema yadiseri amma nanggecdeac gorongina kpekecdimbe. ²⁹ Gorongina kpeni Kristo yengena kuctoango nanggenuma meficnumanu uatoa ebiriangoc mema kecduae amma mekecbadengoc.

2

¹ Korosai ngicngac ngeni nga Raodikea ngicngac amma sasawango kicmesuna mi negendae, ngeneac nga yeneac amma kpendzeng kpema uatoa mekecduae, ngeni imoc negenggecdeac negenduae. ² Ni kpebung ngeneac ubaherengina demeseri ambadeac uatoa mekecduae. Ifi amba ngeni ubango hoangemema hafoangoc negen negeng seria megecde. Imocng finactoa isoc fengemmeu Anutuac yoac sufu sufuya negentegecyombonggecde. Amma yeac yoac sufu sufuya imoc Kristonoc. ³ Yearunoc negen negentegec nga negen negenggac finactoa sasawa sufu sufuya fede. ⁴ Nga ngic mongngo ikocyao dema tobangngunuma uba mesufu angemmebauac kibi yomoc ohongemme-duae. ⁵ Ni sebingo ngenigoc mi kecduae, fora. Nga ongaasuu ine ngenigoc kecma yofi negenduae, ngeni Kristoaru kpeketahemaya ye seria negensinggema kekecngina gombunga arenggekecdae. Ifi ngenemma sogaiduue.

⁶ Ngeni Yesu Kristo Kebungina mema ubaherengina faima hoanggeg, imocac sirihiu ngeni ye modacma kecbisia. ⁷ Amma ngeni yearu godongina seria mema yadiseri ambisia. Nga yoac edekpou angemmeing, imocng negen negensinggina meseriu nambisia. Nga ngenearu dedengerec ebiriangoc febeso.

⁸ Ngic mongngo ngicdede dema ikocfu wangecngunubauac ngeni henghomema kecbisia. Negen negeng ifia, imoc Kristoarunac kpac. Imoc esangabofocngina yeanearunac bangectoa bangec, imocac hadehadegoc meficgeg. ⁹ Imoc yofiac, Kristo yengena sebiu Anutu yengena kekeha hafoangoc fekecde. ¹⁰ Kristo ye sawau nga bangecfu enarameme nga kucnginagoc kecdae, yeneac oruha. Nga ngeni yegoc kpeketahemaya kecmagec yeng mewakengunuude. ¹¹ Anu ngeni yegoc kpeketahemaya kecgec ngenearu herec herecgeac faka fingerec.* Ua imoc ngic mariu mongngo mi meec, kpac. Kristongo herec herecge ua imoc mema ubangina esea herecgea hesima ukuec. ¹² Ukuu Anutungo dokunadzicfu Kristogoc tonggongunuec. Nga Antungo Kristo homecfunac megboriec. Anutungo ua kuhagoc meande, ngeneng imoc negensingggeg yeng sing imohai ngeni ifingoc Kristogoc megboringunuec.

* 2:11: Yuda yeni sebi tosangina herecgeg. Paurongo faka imoc negensima yoac heima deec.

¹³ Anu ngeni warac homemea kecma uba eseangina mi herec herecgea Anutuac yoac kpekecma singa ferahegec. Nga yeng Kristogoc megborungunuma yoackpekpengina sasawa wangemmedacma monggoc mi negensiec. ¹⁴ Kopocsicac kibi mong oho ohoya feec, imocngo manganangina heficgenemmeec nga Kristongo kibi imocnoc biringng mariponnu kpeu nanec. Ye ifi anu yoac kibiu oho ohoya feec, imoc meickema dzuacdarec. ¹⁵ Amma ye yengenaoc mariponnu nanec, imohaingoc sawau me bangecfu enarameme nga kucnginagoc kecdae, yeneac dzikacac wiacngina hesiyemmedaru eng diidiu nanggec.

¹⁶ Imocac amma ngic monggo nenedokungina siriha amma tacnegeng nasotoa me sabatanaso me afo gboria made, naso imohai dafi tacandae, yeni naric mi isingngunuma demanganengunubisia. ¹⁷ Wiac imoc sasawa, imoc wiac ngade fingerude, imocac ongaonga nga Kristongo wiac fora ande. ¹⁸ Nga goa yeni kpefing hania hania hengkecma ikocfu memaemema angero dengereyunuanda, yeneng firanggac iraga mebauac yeneac yoac mi modacbesena. Ngic ifia yeni ubangina eseaac negen negeng sicsauc modacma eng yenanggac negenggec wiac engena angkecde amma yoackpekpegoc kecdae. ¹⁹ Areng ifia yeni kpebunggac oruha Kristo wama kecandae. Yearunac sic ginonnnina mama sebinina kpeturanggema nanggeande. Ifi anu Anutuarunac yadi yadi mekecdimbe.

²⁰ Anu ngeni Kristogoc homema bangetoa bangec imocac hadehade bic wagec ifi isoc andeu, ngeni bangecac ngicngac siricfu yeneac bageu mong mi kecbisia, kpac.

²¹ Ge imoc mi mebesena nga imoc mi nebesena amma imoc mi kpeserebesena, ifi degec mi ngereeude. ²² Imoc ngicac dede nga ngicac negen negengsac nga wiac imoc ngeneng menec amma mekecgec kpac anudeac faifaia. ²³ Anu ngic ifia yeni yenaoc deandae, "Yoacnina imoc negen negentegecgoc." Yeni ifi dema yenaoc miti arengngina meficgeomema yegec nunumu nga memaemema faka ikoha modacma wiac hania haniaac segekecma ngicngac warecyunugecdeac sebingina memanganeanda. Nga faka ifiango fora mong mi meficgeude, kpac. Imoc uba eseaac negen negeng hania meseriude.

3

¹ Ngeni Yesugoc homefunac momoc gborima yacgec, ifi dema wi fede, imocac angemmebeso. Kristongo imohai Anutuac foiau tacde. ² Ngeni wi fede, imocac negensima kecma bangecfu wiac fede, imocac ine mi negensisibis. ³ Ngeni bic Kristogoc homegec kekecngina yegoc Anutuaru sufuu, ngeni yeac hoannu kecdae. ⁴ Kristo ye kekecnginaac hania. Yeng fingectegeru, naso imohai ngeneng yegoc yeac kuc nga kibikperagiau ngenahafoc fingectegecgecde.

⁵ Imocac ngeni bangecac songo hania hania herenginau fengemmede, imoc wagec homebeso. Faka imoc yofia, kaisero nga songo ikoha amma faka seuhagoc nga faka mangana amma kichodung. Kichodung imocngonoc nemuac afec afehe faka ande. ⁶ Nga ngicngac yeneng faka mangana ifia sasawa mekecma Anutuac yoac kpegec yeng imocac turunga kpouyemmeude. ⁷ Ngeni warac yenigoc kecma faka ifia homac angkecgec.

⁸ Amma ngeni yaguc herebu nga faka gereagoc amma ngaba imoc wabisia. Nga desureyoac amma tenicfagoc imoc enacnginaunac mi ereudeac garengemebisia.

⁹ Ngeni ikoc mi angemebisia nocac ngeni ubasebingina esea angammemeagoc bic hesima wagec. ¹⁰ Ngeni imoc wama ubasebingina gboria heima mekecdae. Nga Anutungo ubasebingina gboria meficgema monggoc heigborima negen negentegec foragoc faingemmeeu imoc yengena siric anude. ¹¹ Ifi heigborunguu ngeni grikgic me yudangic andae, imocac dede kpac ande. Nga ngeni sebi tosangina herec herecgea me sebi tosangina mi herec herecgea nga ngeni grikgic arennu mi torokpedae me bangec hereaunac ifi yombong kecdae me ngeni ngicngac wanaha mingingnginagoc kecdae me witihka kpac kecdae, imocac mi dedimbe, Kristongo ngicngac ngeneac ubahereu hafoangoc kefudeu, imocngo wiac fora ande.

¹² Anutungo heresongogoc hoangngunuma meisngnunguu yeac kpataning areng kecdaec ngeni ubaherenginango ngicngac yeneac ubamangang negemma wosoefac ayemmebisia. Amma memaemema yumea kecma ngicngac ogofocngina yeneac modzongina mi tibeso. Ngeni faka imoc sasawa wamba isoc heigec kemeu mekecbisia. ¹³ Amma ngeni ngicngac ogofocngina yeneac modzongina mi tiu kopocsicngina waemebisia. Kebungo ngeneac kopocsic bic wangemmeec, ifi isoc ngic mongngo ngic monggac yoac mekecdeu kopocsicngina waemekecbisia.

¹⁴ Anu ngeni imoc sasawa angkecma heresongogoc hoanggemema kecbisia. Ifi kecgec heresongongo witic isoc amma dzegengunu ngeni yadiseri hafua mocgu amma kecgecde. ¹⁵ Ifi kecmagec Kristoac ruaengo herengina garenggebeso. Ngeni ifi anggecdeac yeng bic kpacngunuec. Ifi anu ngeni ruaegoc sebi mocgu amma dangge dema kecbisia.

¹⁶ Kristoac yoacngo ubaherengina mewakebeso. Nga negen negentegecgoc edekpou angemema gorongina kpeemebisia. Nga Mitiyegecfu yegec fede nga uba furiau yegec amma Tiri Asungo yegec heficengemme kecde, ngeni imoc ubangerecgoc Anutu heimbisia. ¹⁷ Ngeni wiac sasawa degecde me anggecde, ngeni imoc Kebu Yesuac kpacf uambisia. Amma ngeni ye negensima Manggac ubangerec edebisia.

¹⁸ Ngac, ngeni ewefocngina yeneac yoac tofobobis, nocac Kebuac dedeu faka imocngo naric anude. ¹⁹ Ngic, ngeni enengfocngina heresongogoc hoangyunubisia nga modzotiti me ngaba mong mi meficgeyemmebisia. ²⁰ Nambarac, ngeni wiac sasawa negemma nonggo mangfocngina yeneac enac tofohodacbis. Kebungo faka ifia negenu ngereeude. ²¹ Nambarac yeni mangfocngina yeneac modzongina tiu ihoc bahoc ambauac manggac ngeni wosomeme yoac mi ayemmebisia.

²² Ngic wanac kecdae, ngeneac mingfocngina yeneng imoc me imoc degec ngeni yoacngina negemma hafoangoc modacbis. Yeni ubangerec negenggecdeac yeneac kicfusac enac tofoc tofoho mi ambisia. Ngeni uau ubangina suema Kebu eweheimima uangina mekecbisia. ²³ Amma ua imoc me imoc megecde, imohai ubangina suebisia. Ngeni imoc ngic yeneac amma mi mebisia, kpac. Ngeni Kebuac negemma uangina mebisia. ²⁴ Ifi megec Kebungo turunga kpoungemmema maridzominga ngemmeude. Nga Kristongo ngeneac mingfocngina nga ngeni yeac uanoc mekecdae. ²⁵ Kebu ye monde mondea kpac. Imocac ngic mongngo faka angammeme mangana mekefu Kebungo imocac sirihau turunga miude.

4

¹ Ngeni yofi bic negendae, ngeneac ngic kunengngo wi kurumennu kecde. Imocac ngic ngeni wanac areng mingina kecdae, ngeni ua arengfocngina faka dindingacf u nga sirihau ayemmekecbisia.

² Anu ngeni nunumu uau serima ubagbori kecma dengerebis. ³ Ngeni neneac ifingoc negemma yofi numubisia: Anutungo yoacac nagu menemmeu Kristoac negen negeng sufufaya fede, imoc dekperagini negembisia. Yoac imocacnoc witicamau kecduae.

⁴ Yoac imoc didiu faima yoac sirihau dekperagibadeac numubisia.

⁵ Ngeni ngicngac ngadeau kecdae, yeneac botucfu negen negentegecgoc kecma Kebuac sing edzacyunugecdeac nasongina mi ukubisia. ⁶ Nga ngeni nasosoc ngicngac tembus tembus yeneac yoac turunga dafi merengyemmegec negenggecdeac amma yoacnginango wosoefacgoc kondunggac songo angkecde, ifi isoc ambeso.

⁷ Nga neac yoacsiduc, imoc Tikikongo angammedarude. Ni heresongogoc hoanggekecduae nga ye modzotitia kpac Kebuac enac tofohoma kecde. Kebu ye minginnina anu yegoc nenahafoc kpeketahemera yeac wanac areng amma momoc kecdimbe. ⁸ Yennoc neni kecdimbe imocac sirihau edengnuudeac nga ngeni ubaherengina meseriudeac sueba hangemmede. ⁹ Anu yegoc ngeneac amamocgungina mong, Onesimo, sueni haecde. Onesimo ye uayaac goiya heiande, amma ye

heresongogoc hoanggema kecdimbe. Nga yereng faka yei fingerec, imocac siduc angemmedarecde.

¹⁰ Nga Aristako ye nigoc witicamau taric, yeng ngeneac wenacngerec deu hade. Nga Mareko, Banabaac nebera yeng ifingoc wenacngerec dede. Ngeni yeac dedekperagiyaoac bic megec, yeng ngenearu haude isoc ubangerecgoc ama heimibisia. ¹¹ Amma Yesu, kpara mong Yusto, ye wenacngerec deu hade. Ngic harebec imoc yenengsac sebi tosangina herec herecgeaac arenunacngo meficnuma Anutuac eucererenggac ua nenahafoc mekecdimbe. Yeneng meserinuma kecgec amma kecdaengoc.

¹² Kristoac wanacngic Epafara, ye ngeneac arenunacnoc, yeac wenacngerecngc ngenearu hade. Amma ngeneng yadiseri amma nanggecdeac nga Anutuac negen negeng nga songo sasawa ireckema imohai hafoangoc kecgecdeac, ye ifi negemma ngeneac amma nasosoc nunumu ua ebiriangoc mekecde. ¹³ Ye ngeni nga Raodikea ngicngac amma Hierapori ngicngac ngeneac amma uatoa mekecde, imocac hepuc amma edengunuduae. ¹⁴ Nga Ruka, dota heresongogoc hoanggedimbe, ye nga Dema, yereng wenacngerecngira ifingoc faiec ngenearu hade. ¹⁵ Amma Nimfa nga kpebung yeac amau kpedzucneandae nga Raodikea taonnunac tosofocna yenearu wenacngerecnina faini hade.

¹⁶ Anu ngeni kibi yomoc garenggema osoma faigec Raodikea kpebung, yenearu kenu yeneng hemma osobisia. Amma neac kibi Raodikeanac haude siriha imocngoc yombong osobisia. ¹⁷ Nga Arkipo yofi edebisia, “Kebungo ua bic genec, ge ua imoc hafoangoc modacma mekecbesena.”

¹⁸ Anu Pauro ni wenacngerecna yomoc neanna maringo ohongammeduae. Nga witicamaungoc tacduaeac neac negensibisia. Kebuac danggunucngo ngenearu febeso.

Paurongo
 Tesaronike Kpebung Yeneac Warackibi
 Ohoe

¹ Pauro, Siriwano nga Timoteo, neneng Anutu Manggac nga Kebu Yesu Kristogoc kpeketahemha kecma Tesaronike kpebung ngeneac kibi yomoc faidimbe. Wosoefac nga ruae ngenearu febeso.

²⁻³ Neni tatahoc ngeneac amma dangge dema Anutu Manninaac kicfu nunumuninai negensingunukecdimbe. Ngeni negensinggema angammeme gombunga meficgema ngicngac heresongogoc hoangyunugecdeac uatoa meandae. Amma neni modzotitia kpac kecma Kebunina Yesu Kristo, yeac negenserima kecdae.

⁴ Tosofocnina, Anutungo neni heresongogoc hoangngunuma meisngngunuec, imoc negendimbe. ⁵ Imocac hania yofi, neni ngenearu siduc gombung mehaing, imoc kuhagoc nga Tiri Asugoc amma negen negenseri hafoangogoc mekecma mehama ngemmeing, neni yoacsac mi ngemmeing, kpac. Ngenigoc kefing, imohai ngeneac amma areng aning amma meing, neni imocac siriha negendae. ⁶ Neni kpendzeng homac kpema Anutuac yoac negemma hoanggegec. Hoanggegec Tiri Asungo meefaingunuu sogac sogaigoc kecgec. Neni ifi amma fakanina modacma kemma Kebuac faka ifingoc modacma kecdae.

⁷ Imocac Makedonia nga Akaia ngicngac negen negensinggoc kecdae, yeni fakangina gombunga ifia hemma imoc ifingoc modacdae. ⁸ Kebuac yoacngo ngenearunac hanahema Makedonia nga Akaia bangecfu desahegec kenu negenggec. Nga neni Anutu negensinggegec, yoacsiduc imocngo ifingoc bangec noboc noboc sokoma kenec. Ifi anu neneng ua yenearu torokpemamekengkeng imoc ngeneng meefaijeg. ⁹ Neni yenearu kenni yeni yenaoc Tesaronike ngeneac siduc yofi edenunugec, “Pauro ogohoragoc ngenearu hagec neni heitaiyunugec. Amma neni Anutu kekehagoc nga yoara foragoc yeac wanac areng anggecdeac nemungina hania hania wama Anutuaru kenggec. ¹⁰ Amma yofinenggac Medaha kurumennunac maudeac tomai kecdae.” yeneng siduc ifi anemmegec. Anutungo Medaha Yesu megboriu homecfunac gborima yarec nga yennoc ebicfunac mesinunuu turung kpoukpou nasoya hau komoc kpenide. Neni imoc negensinggedae.

2

¹ Tosofocna, neni ngenearu hama kefing, imocnggo foragoc anec, imoc ngenaoc negendae. ² Neni Firipi bangecfu warac kecmina yeneng kpendzennu fainunuma nununenere anemmegec. Nga ngenearu hani Tesaronike ngicngac goa yeneng ifingoc homacngoc yombong deendema anemmegec. Ifi anemmegec neni Anutuaru heirima kengeha kpac kecma Anutuac siduc gombung dekperagingemmeing, neni imoc negendae. (*Aposoro 16:16-40*) ³ Yoac sicsauc mong mi dekperagingemmeing, kpac. Amma ikocfu wiac mong wangecngununideac mi aning. Amma ngac yenigoc sicsauc kecnideac faka mong mi meing. ⁴ Nga Anutungo nenenu naric anecac siduc gombung naric dekperaginide. Ngic yeneng negenggec ngereeudeac yoac mong mi edengunukecdimbe, kpac. Anutu here heheng mingina, yeng songogoc negennemmeudeac yoacnina dekecdimbe.

⁵ Amma neni dekerocyac mong mi edengunuing nga kichodung faka mong ifingoc mi aning, kpac. Imoc Anutungo hepucnina anemmede, imoc negendae. ⁶ Nga ngic yeneearunac kpackuneng menideac mong mi anemmeande. Amma ngenearunac nga ngic goa yeneearunac ifingoc mong mi anemmeande. ⁷ Neni botucnginai Kristoac aposoro kecdimbe, imoc wiac kuneng. Nga sifu memaemema yumea kefing. Nenggac mongngo yengena sabaha namu mima garenggeande, siriha imocacsoc garengngunuing. ⁸ Amma ngenigoc kecma ngeneac heresongotoa negemma hoangngunuma songogoc Anutuac

siduc gombung kpoungemmema mong mi merandziing. Nga imocsac kpac, neni ifingoc ngeneac amma kekecnina naric wanideac negening.

⁹ Anutuac siduc gombung edekpou angemmeing, naso imohai ngenigoc kecma dzofinacac ebic mong mi meficgengemmenideac hadzing tofocnac uatoa kpenzenggoc mema kefing, imoc bic negendae. ¹⁰ Negen negensinggoc tosofocna, neni kpetiac nga dindingac amma kopocsiha kpac faka ifia mema ngenigoc kefing, ngeni imoc hemma negemmagec Anutungo ifingoc hepuc anemmeec. ¹¹⁻¹² Ngeni Anutuac eucer-erenggac kuc nga kibikperagiagoc imohai kecgecdeac yeng heitaingunuec. Ngeni yeac negen negeng nga songo modacgecdeac amma manggacngo yengena nambaracfora meseriyunuma nanggeyunuandae, neni ifi isoc angemmeing.

¹³ Anu ngenearu hama Anutuac yoac dekperagini negemma degec, “Imoc Anutuac yoac, imoc ngicyoac kpac.” Ifi dema yoara hoanggegec. Imocac amma neneng nasosoc Anutu dangge edekecdimbe. Anutuac yoac deing, yoara imoc fora yombong, imoc negensinggegec nga imocnggo ubaherengina uaya mekecde. ¹⁴ Tosofocna, Anutuac kpebung Yudaia bangecfu Yesu Kristogoc kpeketahemera kecdae, yenearu kpenzeng fingerec, siriha imocngoc ngenearu ifingoc fingeru yeni isoc anggec. Areng goa ngeneac bangecfunac ebic imoc meficgengemmegec. Ifi isoc yeneng ifingoc arengfocngina yudangicngac yenearunac ebic meficgegec. ¹⁵⁻¹⁶ Yenennoc Yesu nga profete yunuhome-gec nga yeneng ifingoc nunukporac anemmegec. Bangec monnunac ngicngac yeneng komoc kpegecdeac neni Anutuac yoac edeyunuandimbe. Anu yeni imoc mi anggecdeac yudangic yeni uanina kpetarima ngicngac sasawa ngadeyunuandae. Anutungo imoc hemma negenu mi ngereeande, yeni nasosoc kopocsicngina torokpeu torokpe kecdae. Yudangic yeneng ifi anggec yeng imocac turunga wisic wisiceau yemmeec.

¹⁷ Tosofocna, naso wegenanec nenhafoc kecma sebingosac wanguning, imoc ubahereninango kpac. Ifiac amma kicmesungina monggoc hennideac homac anem- mekecde. ¹⁸ Nocac neni ngenearu monggoc habesonga negensima kefing, fora. Neannaoc ngenearu habadeac naso homac bic tobanggeai. — Nga Satangngo ine sinnina hedzickeu obohoing. ¹⁹ Kebu Yesungo hama ngenemma neneac uaac amma naric deude. Ngeni firanggac kpeteac iranina andae. Neni ifi negensima sogaidimbe. ²⁰ Ngeni neneac dedengerec nga sogac sogainina andae.

3

¹⁻² Anu neni ngeneac negensima ubanina fafic kuneng anu yofi deing, “Neneng Ateng amau naric tacma tosonina Timoteo sueni kembeso.” Ifi dema sueni haec. Timoteo ye Anutuac ua ngicngko nenigoc momoc kecma Kristoac siduc gombung dekperagikecde. Yeng ngenearu hama negen negensinnu meficngunuma negen negengngina midima meseringunuudeac dema sueni haec. ³ Ebic hania hania ifiangoc ngenearu fingeru ngicngac goa yeneng kengkpe hakpe ambauac nga Anutungo ebic ifia tofohonideac negennemmeec, imoc ngenaoc negendae. ⁴ Ngic yeneng nunukporac anggecde, imoc ngenigoc kecma bic edengunuing. Amma imoc bic fingerec, ngeni imoc negendae. ⁵ Imocac amma ni ifi kecba ubana kuha mau ngeneac negensingnginaac siriha negembadeac Timoteo sueba ngenearu haec. Nga uatoa ngenearu meing, imoc faitobang ngicngko tobangngunuu ine fora kpac ambacac.

⁶ Anu Timoteongo ngenearunac dzigenema ubangerec yoac mehama gombungangina yofi edenunudarec, ngeni negen negensingnginagoc kecma heresongogoc hoange- mekecdae. Amma ngeni nasosoc neneac negensima ubaefac angkecdae. Amma neni kicmesungina hennideac anemmede, ifi isoc ngeni kicmesunina henggecdeac angem- mekecde, ifi edenunuec. ⁷ Tosofocnina, neni medac kpedadang nga kpenzeng sasawaac witiu kecmina ngeneac negen negensinggac siducnggo neneac herenina meseriec. ⁸ Nga ngeni Kebugoc kpeketahemera kekecngina seria kecdaeac amma neni naric kecdimbe.

⁹ Anu neni ngeneac amma Anutunina monggoc nga monggoc dengerenideac negendimbe nga ngeneac amma yeac kicfu songogoc kecma dangge edeni ngereeude.

¹⁰ Nga neni kicmesungina hennideac hadzing tofocnac heregoc seriyombonggema numukecdimbe. Nga negen negensingnginau kapainec kpedadanggedae, imoc meficununideac negendimbe.

¹¹ Anu Mannina Anutu nga Kebunina Yesu yereng sinnina edzacnunumaec neni nge-nearu habisina. ¹² Nga heresongogoc hoangngunukecdimbe, ngeneng siriha imocacsoc heresongogoc hoangemema ngicngac tosea goa ifingoc heresongogoc hoangyunuma kecbisia. Ifi kecmagec Kebu Yesu yengenaoc songongina meyadingemmeeu torokpeu torokpe amma monggoc yadibeso. ¹³ Ifi anu ye ubaherengina meserikecde amma kpetiac arengfora yenigoc maude, imohai ngeni kpetiac nga kopocsicngina kpac kecma Anutu Mannina yeac kicfu nanggecde.

4

¹ Tosofocnina, neni Kebu Yesugoc kpeketahemera negengngina miacnideac goroyoac yofi torokpema monggoc dedimbe. Anutungo ngenenu ngereeudeac ngeni yeac sing modabisia. Ngeni yofinenggac ifi kecdae nga imocngo botucnginau yadiseri ambeso. ² Neni dederecgeyoac Kebu Yesuarunac negemma edengunuuing, imoc sasawa negendae. ³ Imoc yofiac, Anutuac ngen negeng nga songo yofi fede, ngeni kaisero wama kpetiac yombong ambisia. ⁴ Amma ngicngac tembuc tembuc ngeni kpetiac nga dindingac kecma sebingina gombunga garengemebisia. ⁵ Bangec monnunac ngicngac yeni Anutu mi negemmima sebiugenggac kekec, imoc songotoa negemma modacma kecdae, ngeni ifi isoc mi ambisia. ⁶ Ngeni sebiugenggac songoac amma tosofocngina yeneac engengfongngina yenigoc sero mi ambisia. Kebungo kopocsic ifia negemma turunga yemmeude, neni imocac gorongina seria kpema bic edengunuuing. ⁷ Anutungo kpetiac kecnideac kpacnunuec. Sebiac songogoc kecnideac mi edenunuec, kpac. ⁸ Imocac amma yofi ande, ngenearunac mongngo yoac yomoc kpema ngadeheude, ye ngic yoac mi ngadehede, ye ine Anutu kpetiac Asu ngemmeec, yengena yoac kpeude.

⁹ Ngeni heresongogoc hoangemegecdeac Anutungo sing imoc bic edekpou angem-meeec. Imocac ngen negensinggoc tosofocngina heresongogoc hoangemegecdeac yoac mong mi obohodae. Nga neneng yoac imoc monggoc mi ohongemmenide. ¹⁰ Fora, ngeneng tosofocnina Makedonia bangec noboc noboc kpebung hafoangog kecdae, yeni sasawa heresongogoc hoangyunu kecdae, faka imocngo botucnginau yaditegerudeac ngen negengngina midima dedimbe. ¹¹ Nga ngeni yumea kecma uangina garenggegecdeac ngen negengngina seria febeso. Warac edengunuuing, ifi isoc ngenaoc mariginango ua mekecbisia. ¹² Ifi anggec ngic ngadeau kecdae, yeneac kicfu angammemengina dindingacngi herengina wingecgec eweheingemmegecde nga ngeni wiac monggac naric mi obohogecde.

¹³ Ngicngac yeni kurumenggac mi negemma, yeni homecnasou kiac songong ebiria angandae. Tosofocnina, ngeni yeni isoc ubamangang mi negembisia. Ngeni homegec yenearu noc wiac fingerude, imocac hania negenghomegecdeac songonina ande. ¹⁴ Imoc yofiac, Yesungo homema yarec, imoc forangoc negensinggedimbe. Imocac amma ngicngac yeni Yesu negensinggema bic homegec, Anutungo yeni hesicyunuui Yesugoc hagecde, imoc ifingoc negensinggedimbe. ¹⁵ Ngicngac Kebuac hahanasoyau gbori kecdimbe, nenang ngic homegec, yeni naric mi waraiyemmenide, imoc Kebuac dede mong modacma edengunudimbe. ¹⁶ Kebungo imohai yoac kuhagoc demanu angero yeneac enarangina mong yeac ubaudumeng fingerude. Imohaingoc Anutuac trampet arohoude. Arohomana Kebu yengenaoc kurumennunac sawau maude. Mau ngicngac Kristogoc kpeketahemera homegec, yeneng waraima gborima yacgecde. ¹⁷ Yacgec ngicngac gbori kecdimbe, nenang yenigoc ifingoc hoeng manau kpedzinunuui nenahafoc sawau Kebugoc ewacnide. Ewacma Kebugoc nasoya nasoya kecnide. ¹⁸ Ifi negemma ngeni imocac amma yoac yomocngi denangge angemema meseriemema kecbisia.

5

¹⁻² Tosofocnina, Kebuac nasotoa imocngo hamangecngic yeneng tofocnac haandae, ifi isoc haude. Ngeni ngenaoc imoc bic negenghomeda. Imocac noc nasou me yabungnofu yomoc fingerude, imoc kibiu monggoc naric mi ohongemmenide. ³ Nga ngicngac yени degecde, "Ruae nga garengagoc kecdimbe." Ifi dekecmagec, naso imohaingoc memangac manganea ebic fingecyemmeude. Ebic imoc ngac heregoc medac meudeac naso mi negemmanu gadze kiande, ifi isoc bic fingecyemmeude. Fingecyemmeu naric mi woragecde.

⁴ Nga tosofocna, hamangecngic hau ngeni kpidohoandae, ifi isoc wenac imohai yeng hau naric mi kpidohogecde nocac ngeni kundunnu mi kecdae, kpac. ⁵ Ngeni sasawango wenac nga kperagiaac nambaracfora nga nenang tofocnac me kundunggac areng kpac. ⁶ Imocac goa gau feandae, ifi isoc gau mi febisina, nenang ine ubagbori kecma sebiac songo wadacma garengemebisina. ⁷ Nga gaufefe ngic yeni tofocnac gau feandae nga doku seria nene yeni tofocnac doku nema ubangina sufuande.

⁸ Anu nenang wenacac arengfora. Imocac amma sebiac songo wadacma garengemebisina. Negen negensing nga heresongogoc hoangemekekec, imocngo marikuniina ambeso nga kecma komoc kpenideac negensidimbe, imocngo aieng opocnina anu heima nambisina. ⁹ Imoc yofiac, Anutungo desi desi nasoyau manganaac gerea menideac mi denemmeec, Kebunina Yesu Kristongo ebicfunac mesinunu komoc kpenide, imoc denemmeec. ¹⁰ Gbori kecdimbe me bic homegec, nenang sasawango yegoc gbori kecnideac yennoc nenanggac amma homeec. ¹¹ Imocac amma ngeni yofinenggac demeseri angemema meyadiemeandae, ifi isoc monggoc torokpema ambisia.

¹² Tosofocnina, ngeni yofi anggec ngereeude, ua ngicngac yeneng ngeneac botucfu uatoa mema kecdae, ngeni yeni negensiyunubisia. Yeni Kebugoc kpeketahemma garenggunuma gorongina kpema kecdae. ¹³ Yeni ua mekecdaeac amma heresongotoagoc hoangyunubisia, ngeni imocac negenggec engena ambeso. Amma ngenang botucfu raeaegoc angemekecbisia.

¹⁴ Negen negensinggoc tosofocnina, neni gorongina kpema yofi edengunudimbe, ngicngac ua wama sicsauha kecdae, ngeni yeni nono edeyunubisia. Nga ubangina mamea kecdae, ngeni demeseri ayemmebisnia amma ngicngac goa sebiugeng hafei nga kucmama kecdae, ngeni yeni meficyunubisia. Ifi amma modzotitia kpac yumeau ebicngina tofobobisia. ¹⁵ Manganaac turunga kpouemebauac ngeni garengemema kecbisia. Nga ngeni nasosoc ngenang botucfu nga ngicngac sasawa yenigoc faka gombunga anggecdeac uatoa mema kecbisia.

¹⁶ Ngeni nasosoc sogac sogaigoc kecbisia. ¹⁷ Amma ngeni tatahoc numuma kecbisia. ¹⁸ Nga ngenearu wiac fingecngemmeude imocac Anutu dangge edebisia. Ngeni Kristogoc kpeketahemma ifi angkecgecde, imocngo Anutuac ubasongo ande.

¹⁹ Ngeni Tiri Asuac gerec mi hepisickebisnia. ²⁰ Nga ngic profeteyoac edengunugec ngeni imoc meenti memati amma mi ngadehebisnia. ²¹ Ngeni ine yoac imoc sasawa hengising amma gombunga mekecbisia. ²² Amma ngeni mangana hania hania imoc hengkpatibisia.

²³ Anutu ye ruae mingina. Yeng kpetiac kekecac faka meyadingemmema mewakengunu ongaasungina nga ubaongangina amma sebingina hafoangoc soronga nga kopocsiha kpac femanu Kebunina Yesu Kristo haude. ²⁴ Anutu heitaingunuec, ye yoacdedea modacma uaya mekecma mesiude.

²⁵ Tosofocnina, ngeni neneac ifingoc negensima numuma kecbisia.

²⁶ Ngeni tosofocnina sasawa kpetiac fakau titikokoc ayemmemma wenacngerecnina deyemmebisnia. ²⁷ Amma ngeni kibi yomoc negen negensinggoc tosofocnina sasawa osoyemmegec, imoc gombunga garenggegecdeac Kebuac kpacfu edengunuduae.

²⁸ Kebunina Yesu Kristoac wosoefacngo ngenigoc febeso.

Paurongo
**Tesaronike Kpebung Yeneac Ngadekibi
 Ohoe**

¹ Ngicngac Anutu Manninagoc nga Kebunina Yesu Kristogoc kpeketahemha kpebung Tesaronike taonnu kecdae, ngeneac kibi Pauro nga Siriwanu amma Timoteo neneng faingemmedimbe.

² Anutu Manggac nga Kebu Yesu Kristo, yereng wosoefac angemmema ruae ngemmebesera.

³ Tosofocnina, ngeni tembuc tembuc sasawango heregoc songo negengemekecdae amma imocngo botucnginau yadiseri ande. Nga ngeneac nege negensingngina homac yadide, imocac neni ngeneac amma nasosoc Anutu dangge edeni ngereeude.

⁴ Ngabafocnina yeneng ngunukporac angemmecg ngeneng kpendzeng kpema nege negensingngina ukugec mi kpeec. Imoc hemma ngeneac negenni engena anec. Imocac amma Anutuac kpebung fekdae, yeni siduc imoc edeyununi ubanina ngereede.

⁵ Ngeni Anutuac eucererenggac amma kpendzeng kpekecdae. Anutungo kpendzengngina imoc hemma ubea ngereeu ngeni eucererenggac areng dengemmeude. Amma yeng sing dindingacf yoacnina desiude, imocngonoc yeac faka dindingac edzacnunuude. ⁶ Anutu ye faka dindingacac mingina. Imocac ngic kpendzennu faingunukecdae, yeng yeni turunga kpouyemmemma kpendzennu faiyunuude. ⁷ Nga ngeni nga neni kpendzenggoc kecdimbe, imocngo kpendzennina menomaneude. Anu Kebu Yesungo angerofora kucnginagoc, yenigoc kurumennunac mama fingectegecgecde, imohai ifi anude. ⁸ Ye gerek borangagoc mama Anutu mi hoanggegoc nga Kebunina Yesuac siduc gombunggac yoara mi tofohoandae, yeni kopocsicnginaac turunga kpouyemmeude. ⁹ Turunga kpouyemmeu imocngo wisic wisickea kpac memanganeyunuken yeni Kebuac kicfunac nga kuc nga kibikperagiaunac meicyunugecde. ¹⁰ Meicyunugec naso imohaingoc ngicngacfora kpetiac kecdae, yenearu kuc nga kibikperagigoc fekefude. Nga ngicngac sasawango ye negensinggedaeac yeni hemma kpidohoma dengeregecde. Nga ngeni dedekperagioac edengununi negensinggegac amma imoc ngenearunoc fingerude.

¹¹ Imocac amma ngeneac negensima nasosoc yofi numukecdimbe, Anutungo kpacngunuec, yeng ngenenu ubea ngereebeso. Nga ngeni ye negensinggema uaac songo maficgema faka gombunga mekecmu uangina kucgoc mema mesigecde. ¹² Ngeni ifi anggec ngicngac yeni ngeneac amma Kebunina Yesu yeac kpara dengerema eweheimigecde nga yeac amma ngeni ifingoc dengerengunugecde. Imoc Anutunina nga Kebunina Yesu Kristo yereac wosoefacac amma ifi fingerude.

2

¹ Tosofocnina, Kebunina Yesu Kristoac haha naso nga yegoc kecnideac kpeturan-nunugecde, imocac goroyoac mong edengununi negenggoc. ² Ngic goa yeneng Kebuac hahanaso bic haec deandae. Nga goa yeneng neneac enacf netohoma deandae, “Yoac mong nenearu hadac me kibi mong nenearu hadac me asu mongngo dedac.” Ngeni yoac ifia negemma kpidohoma dzonong fede fede bic mi ambisia.

³ Monggo faitobangyoac ifia hania hania edengunu ngeni yoara mi negembisia. Imoc yofiac, Kebuac sike sike naso mi hamantu ngicngac yeni singyoac mi hoanggema ubango ngadehegecde. Ifi anggec singyoac kpekpengic monggo didiu fingectegerude. Anutungo ngade ngic imoc hofeu ukuude. ⁴ Nga yeng ngic nege negeng sasawa kpedarude. Anutu nga nemu nga noc wiac ngicngac yeneng numuyemmeandae, imoc sasawa kpeyemmeude. Ifi amma ye Anutuac womonnu emma ihai tacma yengenaac deude, “Ni anutunoc.” ⁵ Ni ngenigoc kecma imoc bic edengunuai. Ngeni imoc bic

nigecngunuec gedang. ⁶ Ye yofinenggac fingecktegerudeac kpaе feder, ngeni imoc negendae. Imocac amma ye nasoyau hama didiu nanude.

⁷ Anu singyoac kpekpeac negen negeng sufu sufuaс faka, imocngo uaya bic mema kecde. Nga mong ye imoc fingerudeac kpaеa heima kecde, ye meickegecguc ⁸ singyoac kpekpe ngic didiu fingecktegerude. Fingecktegecmu Kebu Yesungo hama enacasuyango memanganeu kuckperagiayango meickeu kpac arude. ⁹ Ngic imoc ye Satangngо maficgeu kefude. Ye ngicngac ikoc ayemmeudeac faka kiwa morora mema kuha sasawa edzacyunuma ¹⁰ kopocsicac ikocfaka sasawa imocgoc wangecyuu hofeac sinnu kemegecde. Yeni yoac fora heregoc mi hoanggegoc, imocac amma komoc naric mi kpegecde.

¹¹ Yeni ifi angkecdaeac Anutungo uba mesufuac kuc yenearu faiu ikoc imoc negensinggegocde. ¹² Imocac amma ngicngac imoc sasawa yeneng yoac fora mi negensinggema sicsaucac faka songogoc hoanggema kecdae. Ifi kecgec Anutungo kopocsicac turunga kpouyemmeude.

¹³ Kebuac songo areng nga negen negensinggoc tosofocnina, Anutungo ngeni hanahema meisingngunuu Tiri Asuyango kpetiac kekecfu meyadingunuу ngeni yoac fora negensinggegoc. Nga ye mengerengunuу komoc kpegecdeac negemma meisingngunuec. Imocac amma neni ngeneac negemma nasosoc Anutu dangge edekecni ngereeude. ¹⁴ Anu neni siduc gombung edengununi ngeni imoc negemma yoac fora megecdeac Anutungo kpacngunuec. Ifi amma ngeni Kebunina Yesu Kristoac kuc nga kibikperagia megecde.

¹⁵ Tosofocnina, imocac amma yofi ande, neneng yoac enacfu nga kibiu edekpou angemmeing, ngeni sing imoc serima namma mekecbisia. ¹⁶⁻¹⁷ Kebunina Yesu Kristo yengenaoc nga Anutu Mannina yeri yoac nga uangina imoc sasawaac manau negen negengngina midima herengina meseribesera. Yerennoc heresongogoc hoannunuma wosoefacngiraac amma ubaherenina nasosoc meserinemmekedape. Yeri ifi anec nenang kecma wiа gombunga mebesandimbe, ifi negensikecdimbe.

3

¹ Tosofocnina, torokpema yofi deni negenggec, ngeni neneac amma yofi numubisia, neni Kebuac yoac desaheni imoc bic yadima kendaru ngicngac areng goa imoc eweheima megec, ngenearu fingerec, siriha imocngoc ngicngac goa yenearu fingeckembeso. ² Ngicngac homac yeni negen negensingngina kpac, ifi kecdae. Nga Anutungo ngicngac ngabagoc nga manganameme yeneac mariunac mesinunubeso, ngeni imocac ifi numubisia. ³ Nga Kebungo yoacdedea modacma meseringunuу mangana minginango mi memanganengunuudeac kasongina kpeude. ⁴ Neni Kebuac amma ngeneac yofi negensinggedimbe, Neni demeseri angemmema yoac edengununi ngeni imoc tofohoma kecdae amma kecgecde. ⁵ Kecgec Kebungo ubaherengina wangeru Anutuac heresongongo semengunuу Kristo isoc serima kecbisia.

⁶ Tosofocnina, goa yeni oyong kecgec sing kpouyemmeing, imoc mi modacgecde. Ngeni ngicngac ifia yeneac hereau kecbisia. Neni imoc Kebunina Yesu Kristoac kpacfу demeseri angemmema edengunudimbe. ⁷ Nga neni kefing, siric imocngoc kecgecdeac negenni ngereeude, ngeni ngenaoc imoc bic negendae. Nga ngenigoc kefing, imohai oyong mong mi kefing, kpac. ⁸ Neni ngeneac botucfu kecma ngic monggarunac yaka buma kpac eng mema mi nekefing. Neni ine ebic goa ngemmебинггac marininango hadzing tofocnac uatoa kpendzennu mema kefing. ⁹ Neni mitiac uabung menideac naric debing dede nga faka aning, imoc ngeneng hemma modacgecdeac aning. ¹⁰ Nga ngenigoc kefing, imohai singyoac yofi edengunuing, “Ngic mong ye ua meudeac mi ammideu, ye yaka mi nebeso.” ¹¹ Neni ifi dema naso monnu ine siduc mong yofi negening, ngenearunac ngic goa ua mi meme oyong kecma gubekisang amma kpounecyoac dekecdae. ¹² Neni Kebu Yesu Kristoac kpacfу ngic ifia demeseri ayemmema yoac yofi edeyununide, “Ngeni kekecngina maficgecdeac ngisima kecma ua mekecbisia.”

¹³ Negen negensinggoc tosofocnina, ngeni angammeme gombunga anggecdeac ubango modzotitia kpac kecbisia. ¹⁴ Nga neni yoac kibi yomohai ohongemedimbe, ngic mongngo yoac imoc mi tofohoudeu ngeni yeac buremema yegoc mi kecbisia. Ifi anggec ye gamekpeu kecbeso. ¹⁵ Amma ngeneng ngic ifia mong ngaba mi ammibisia, kpac. Ye ine tosongina kecdeac goroya kpegec kecbeso.

¹⁶ Kebu ruae mingina ye yengenaoc nasosoc nga sing haniau haniau ruae ngemmebeso. Yeng ngenigoc sasawa kecbeso.

¹⁷ Ni Pauro neannaoc marinango wenacngerec ohongemeduae. Ngicngac sa-sawango neac marikibi hemma negensinggegecdeac ohoanduae.

¹⁸ Kebunina Yesu Kristoac wosoefacngo ngenigoc fekecbeso.

Paurongo
Timoteo Yeac Warackibi
Ohoec

¹ Yesu Kristongo kurumenggac sing meficgenemmeec, ye nga memengerecnina Anutu yereng denenec, ni Pauro Yesu Kristoac aposoro anai. ² Kibi yomoc negen negensinnu medacna Timoteo, geac ohogenduae. Anutu Mannina nga Kebunina Yesu Kristongo wosoefac nga ubamangang amma ruaea gembeso.

³ Ni Makedonia prowinsiu kembeso amma yoac yofi edeguai, ge Efeso mi wama imohai ngic goa yenearu kemma dede goa siriha mong mi kpouyemmegecdeac kpetariyemmebesena. ⁴ Yeni nemusiduc nga esangabo keceregec yeneac kisic kpekecdaeac yoacngina engemmama anu Anutuac yoac negensinggegecdeac sing waandae. ⁵ Geng dederecgeyoac dena foraya yofi fingerude, Anutuac heresongongo ubaherengina mewakeu fagung madzaha kpac negen negengsingngina dindingac anude. ⁶ Goa yeni faka ifia fingerudeac mi negensima yoac sicsauc deandae. ⁷ Amma Anutuac dedeseriyoac edekpou anggecdeac homac ayemmeande. Yeni yenaoc yoac serima deandae, imocac hania mi negentegecdae.

⁸ Monggo dedeseriyoac sing dindingacf u mekefudeu imocngo fora gombunga meficgemiude. ⁹ Ge yofi negembesena, dedeseriyoac imoc ngic dindingac kecdae, yeneac negemma mi faifaia. Imoc ine areng yofia yeneac amma faifaia, ngicngac singyoac ngadehema ihoc bahoc amma Anutu ngadehema kecdae. Yeni kopocsic meficgema kpetiac kekec mi negensima bangecac wiacac songongina anude. Yeni nonggo mangfocngina yunukpebuc amma ngicngac yunuhomeandae. ¹⁰ Amma yeni kaisero nga ngicngogicfu sero ua meandae. Yeni ngicngac hamangec meyunuandae amma wanacngicngac bummeyunuma monggoc sueyunuandae. Amma yeni ine Anutuac kicfu yoac deserima ikocyao dema ngicngac botucnginai ikocyao deandae. Nga negen negeng dindingac kpoungemmeing, imoc ngicngac goa kpeandae. Dedeseriyoac imoc ngicngac ifia yeneac negemma faifaia fede. ¹¹ Anutu ye kenec mingina ye kuc nga kibikperagiagoc. Yeng siduc gombung nenu uaya modacma mekecduae nga dedeseri kpekpe areng yeni imoc ifingoc kpeandae.

¹² Kebunina Yesu Kristongo neac negenu ngereeu uayau naric fainuecac negemma kuc nengkecde, yeac dangge dekecduae. ¹³ Amma ni warac ye demanganema ngaba ammima habufora yunukporac ayemmekecma yarengic anai. Nga yeng sifu wosoefac anenec. Nocac ni faka fora mi negentegecma Yesu mi negensinggema sicsauc kefai. ¹⁴ Ifi kecbare Kebuninaac wosoefac nga heresongotoa yombong, imoc negen negensinggoc Yesu Kristoarunac nearu haec. ¹⁵ Yesu Kristongo bangecfu kopocsicmeme mengerenunuude nga komoc kpenideac maec. Yoac imoc seria nga fora amma ngicngac sasawango imoc negemma hoanggegec ngereeude. Ni kopocsimeme sasawa feracyunuma ngic mangana yombong anai. ¹⁶ Ifi kecbare, ye modzotitia kpac fakaya imoc didiu fingectegerudeac wosoefaha kpenenec. Ifi anenu ngic yeneng negensinggema kekecseri megecdeac sosoha amma waraiyemmeai. ¹⁷ Ngictau wisic wisickea nga home homea kpac nga mi hengena ye mocgungo Anutu kecde. Ye eweheimima yeac dedengerec nga dedengerec fekengkecbeso, imoc fora.

¹⁸ Medacna Timoteo, ngabafocnina yenigoc dzikac gombunga kpekecbesena. Ifi annadeac profete yoac gearu degec negennec. Imoc modacnadeac edeguduae. ¹⁹ Ge negen negensinggoc kecma herenegen negengga garenggena kpetiac febeso. Ngic goa yeni kekec kpetiac imoc wama negen negensingngina ukugec kpeu manganese. ²⁰ Nga yenearunac Himenaio nga Aresande, yeri Satangngo metingyuruudeac yeac mariu faiyuruuai. Faiyuruaiac yeri Anutuac kpac monggoc mi dengbaringgecde.

2

¹ Nenang ngicngac sasawa maficyununideac yeneac amma numuma Anutu dangge edebisina. Imoc ua engena ande, imocac yoac seria deduae. ² Ngicngac yumea nga raeaegoc kecma Anutu eweheimima faka dindingac angkecdae, yeneac kekec gombunga. Nga ifi kecnideac ngictau nga enara tatacfu takecdae, yeneac amma numubisina. ³ Nunumunina ifia imoc gombunga, imoc Anutu memengerecninango negenu ngereeude. ⁴ Amma yeng ngicngac sasawa yeni komoc kpema yoara fora negentegecgecdeac ammikecde. ⁵ Imoc yofiac, Anutu mocgungo kecde amma Anutu nga ngicngac botucninau hengisingngic mocgu kecde, ngic imoc kpara Yesu Kristo. ⁶ Ye yengenaoc ngicngac sasawa donina meudeac kekeha waec. Yoac imocac nasoya hau dekperagiu negenggec. ⁷ Ni yoac imoc dekperagibadeac Anutu yengenaoc meisinnuma aposoro fainuec. Fainuu yeac yoac negensinggema bangec monnunac ngicngac, yeni yoac fora edekpou ayemmeai. Imoc fora yombong, ikoc mi anduae.

⁸ Neac negen negeng nga songo yofi anu ngic ngeneac deduae, ngic guruama noboc noboc kecdae, ngeni ngaba nga deendema yoacngina wama maringina kpetiac miacma numubisia. ⁹ Ni ifingoc ngac ngeneac yofi deduae, ngac ngeni memaemema wamba isinggema gombunga nga sirihau heibisia. Amma ngeni kibikereng maficgecdeac kubu buma kuneng mi heibisia me orucdzongina mi mudzebisia. Nga ngeni wiac hania hania golngu memea mi fama wamba buma kuneng mi heibisia. ¹⁰ Ngac mong ye faka gombunga mekecma Anutu eweheihei ammiande, faka imocngko kibikerengngina ambeso. ¹¹ Amma ngac ngeni faka yumea amma kpoukpou yoac negemma enac tofoc tofoho andacbisia. ¹² Nga ngac yeneng edekpou angang me ngic yeneac enara anggecdeac mi negenduae. Ngac ngeni dekpeborong wama yumea kecbisia. ¹³ Anutungo hanahema Adang maficgema Ewa ngadeau meec. ¹⁴ Mangana minginango Adang faitobannu mi faiec. Ye ine ngac faitobannu faiu makpema singyoac kpeec. ¹⁵ Ngac mong ye Yesu negensinggema kpetiac kecma ngicngac heresongogoc hoangyunukecma kekeha isinggeudeu ye sabac memeaac amma komoc kpeude.*

3

¹ Ngic mong ye kpebung yeneac enara ua mebeso ammideu ye negen negenga gombunga, yoac imoc seria nga fora yombong. ² Nga kpebunggac enara ye dindingac kecma ngac mocgusac yeac ngic ambeso. Amma ye kekeha nomana ambeso. Ye negen negentegecgecgo yoac dema kekec sirihau kecma ngicngac amayau heitaiyunubeso. Amma kpoukpou ua imocac siric negembeso. ³ Ye waing doku nema ubasufu ngic mi kecbeso amma ye herebungic kecdeu mi ngereeude. Ye ngic yumea amma raeaegoc kecbeso nga hiedzoac songou negen negenga mi febeso. ⁴ Ye yengena enemmedacfora gombunga garengyunubeso amma yengena nambaracfora yoara tofohoma eweheihei ammigecdeac garengyunubeso. ⁵ Imoc yofiac, ngic mong ye enemmedacfora garengyunuudeac sing mi negendeu yeng Anutuac kpebung garengyunuudeac sing siriha ifingoc mi negenude. ⁶ Enarangina ye ubamereng gboriango mi ambeso. Mangana mingina ye sebiengenggac amma yoacf u makpeec ye ifi isoc makpebacac. ⁷ Amma ngicngac yeneac kicfu game maficgebacac nga mangana minginaac botacf u mendanggebacac ngicngac ngadeau kecdae, yeneng ifingoc eweheimigec ngereebeso.

⁸ Kpebunggac enac tofoc tofoho ngic yeneng siriha imocngoc faka nga angam-memengina sirihau ambisia. Yeni nedzarangngina yohockang mekecdaeu mi ngereeude amma waing dokuac songotoa negenggecdeu mi ngereeude amma hiedzo megecdeac kichodunggoc mi kecbisia. ⁹ Yeni ine here negen negengngina kpetiacgoc kecma negen negensinggac yoac kemea mekecbisia. ¹⁰ Ngic kpebunggac enac tofoc tofoho ngic ambeso ayemmede, ngeni yeneac haniangina hengising anggec nga ebicngina kpac anuguc kpebunnu enac tofoc tofoho ua naric mebisia. ¹¹ Amma kpebunggac enac

* 2:15: Pauro ye nocwiac negensima yoac yomoc ohoec, mitiac negen negengngic yeni imocac uba mocgu mi andae.

tofoc tofoho ngac yeni ifingoc faka nga angammeme sirihau mekecbisia. Yeni ngic me ngac monggac ngadegoac degecde, imoc mi ngereeude. Kekecngina imoc nomana ambeso. Amma yeni dewa mong mi ambisia. ¹² Nga kpebunggac enac tofoc tofoho ngic ye ngac mocgusacac ngic kecbeso. Ye yengena enemmedacfora nga goa yegoc kecdae, imoc gombunga garengyunubeso. ¹³ Imoc yofiac, kpebunggac enac tofoc tofoho ngic ua gombunga mekecgec kpebung yeneng eweheihei ayemmegec, yeni Yesu Kristo negensinggema serima nanggecde.

¹⁴ Ni kibi yomoc ohogemma geac negensima gearu bic habadeac anende. ¹⁵ Nga uango dzegenuu bic mi habade isoc kpebunnu yeni sing dafiu kecbisia, imoc negembesena, imocac amma kibi yomoc ohoduae. Kpebung yeni Anutu kekehagoc, yeac ama nga yoac foraac karu amma wotung seria. ¹⁶ Negen negensinninaac hania imoc sufu sufuyau feec: Ye kuneng nga engena yombong, imoc fora.

Ye sebiu fingectegerec nga Asungo haniaya dindingac imoc nonongkacmekperagie.

Angero yeneng ye henggec.

Ngicngac yeni yeac siduc bangec monnunac ngicngac, yenearu dekperagigec bangec noboc noboc kenu negensinggegec.

Ye Anutuac kuc nga kibikperagiau monggoc meemma ihai kecde.

4

¹ Naso wisic wisickeau ngic goa yeneng negen negensingngina ukugec kpeu, yeni hadehade yeneac kpoukpouyoac negenggec asu hania hania yeneng dekerec ayemmemma ikocfu wangecyunugecde. Tiri Asungo imocac yoac didiu dekecde. ² Anu ikocngic herenegen negengngina dzadzu kpekpea, yeneng ngicngac dekerec ayemmemma ikocfu wangecyunuma ³ ngac megecdeac kpae heiyemmemma yakasege anggecdeac dederecge ayemmegecde. Anu ngicngac yeni Anutuac yoac fora negemma Yesu negensinggema kecdae, yeni yakangina ubangerecroc megecdeacnoc Anutungo yakangina maficgeyemmeec nga yeni imoc sege anggecdeac ikocfu deandae. ⁴ Anutungo wiac deu fingecdarec, imoc sasawa gombunga. Nga wiac imoc ubangerecroc mema mekecni, imoc neneacsoc ande. ⁵ Imoc Anutuac yoac nga nunumungo meu kpetiac anude.

⁶ Ge tosofocnina yoac yomoc edekpou ayemmenadeu Yesu Kristoac kingangkpekpe gombunga annade. Kingang kpekpe ifia kecnadeu, negen negensinggac yoac kpougenggec modacnec, imocngo negen negengga meseriude. ⁷ Ge bangecac siduc hania hania ngadehema geangga kekecfu Anutuac faka nga sing imoc meseribesena. ⁸ Ngic ariac ambesonga sebingina meefaiandae, imocngo memefiha efeanecsac ande. Ngicngac yeni Anutuac faka nga sing meseriandae, imocngo kekecngina hafoa maficgeude, imoc yagucac kekec meseride nga kekec ngade haude imoc ifingoc meseriude, Anutungo ifi denemmeec. ⁹ Yoac imoc fora, ubanina ihai naric faini feu negensinggenide. ¹⁰ Anutu kekehagoc, yearu kpeketahemu kecdimbe, yeng ngicngac sasawa yeneac memengerecnina ande nga ye negensinggedae, yeneac yombonnoc. Imocac amma uatoa kpendzenggoc mema kecdimbe. ¹¹ Nga ngicngac yeni yoac imoc modacgecdeac seria edekpou ayemmebesena.

¹² Ge medacgbosing kecnecac mongngo geac negenggec mamea mi ambeso. Nga fakaga kpetiac nga dedega amma angammemega nga negen negensingga amma ngicngac heresongogoc hoangyunuannec, yeneng fakaga imoc hemma modacbsia. ¹³ Anu ngicngac yenigoc mitikibi osonegeng amma ubaherengina midima edekpou ayemmekecmana habade. ¹⁴ Nga enara yeneng maringina witigau faima profeteyoac degec Tiri Asuac wosofacac kuc mong menec, kuc imocgoc ua mekecna mi nomanebeso.

¹⁵ Nga ngicngac yeni yadiseri annec, imoc henggecdeac negen negengga uagau faina seriangoc feu imoc modacma mekecbesena. ¹⁶ Mekecma geangga garenggemema yoac edekpou ayemmekecne, imoc ifingoc garenggebesena. Ifi annadeu ge nga ngicngac yoacga negenganda, ngeni ngenahafoc komoc kpegecde.

5

¹ Ge ngic yada mong yoac edebesonga dema kucgoc nga gereagoc mi ammima ubea midima mangga yoac edeannec, ifi isoc yoac edebesena. Nga medacgbosing yeni dacmunafocga yeneac ubangina midima angannec, ifi isoc ayemmebesena. ² Amma ngac yada yeni nonggogaac angannec, siriha imocngoc ayemmebesena nga naroang yeni naingfocga yeneac angannec, siriha imocngoc herega kpetiac femanu ayemmebesena.

³ Ngac hodzec memeficngina kpac kecdae, kpebung ngeneng yeni eweheihei ayem-mema maficyemmebisia. ⁴ Anu ngac hodzec mong ye nambaracforagoc me esaforagoc kefudeu yenaoc ine warac warac hodzecngina henggareng ammigecdeac ua mebisia. Yeneng ifi amma nonggo mangfocnginaac turung kpouyemmebisia. Faka imocngo Anutuac kicfu ngereeude. ⁵ Nga ngac hodzec mongngo memefiha kpac tembuha kecma Anutungo maficmiudeac negenserima hadzing tofocnac numukefude. ⁶ Anu ngac hodzec mong sebiac songo modacande, ye ine sebiugengsac kecde nga ubahereugeng ine homemea kecde. ⁷ Ngac hodzec yeneac yoac imoc ngicngac seriangoc edeyununadeu yeneac ubakpekpe naric mi fingerude. ⁸ Ngic mong ye sactosofora yenenggareng mi angande nga yengena nonggo mang nga dacmunafora ifingoc mi garengyunuudeu ye negen negensinga bic wama faka mangana amma bangec monnunac ngicngac Anutu mi negemmidae, yeni feracyunuma faka mangana anude.

⁹ Anu ngac hodzec mong ye kifaya 60 bic ferahema ngic mocguac ngac kefec, yeac kpacsac ngac hodzec yeneac kibiu arenggebesonga. ¹⁰ Amma angammemea gombunga feec nga fede, imoc ngicngac sasawango bic hennegeng angkecgec. Imoc yofi, ye nambaracfora gombunga yenenggareng angkefec nga ngicngac edoc bedoc ayemmekefec amma ngicngac kpetiac haningina dzuacyemmekefec. Ye ngicngac ebicfu kecgec meseriyunukefec amma ngicngac maficyunuudeac naso mong mi ukukefec.

¹¹ Ngac hodzec afo engeng kecdaengoc ge yeneac kpac areng imohai mi ohobe-sena. Yeni Kristoac modzongina tiu ngicac songo monggoc negemma ngicfu kembeso anggecde. ¹² Yeni warac yoac dzegergec, imoc wama yoacfу makpema ebic maficgegecde. ¹³ Amma yeni oyong kecma amayuguc kengkecgecde. Nga imocsac kpac, yeni ifingoc yoac gubekisang amma kpounec nga yoac goa yeneac wiac me dedeacsoc mi ammanu imoc sifu degecde. ¹⁴ Imocac amma ngac hodzec afo engeng kecdaengoc yeneac negemma areng yofi faiba modacbisia. Yeneng ngic monggoc mema sabac maficgema amangina garenggebisia. Yeni ifi anggec ngabafocnina kecdae, yeneng yoac mangana deyemmegecdeac sing naric mi maficgegecde.

¹⁵ Ngac hodzec goa yeni sing bic segema Satang modacgec. ¹⁶ Nga negen negensinggoc ngac kecdae, yeneac amau ngac hodzec goa kecdae yeneac heimefic ayemmegec kpebung yenearu ebic mi fingebebeso. Kpebung ngeneng ngac hodzec makpekpea memeficngina kpac yombong kecdae, yeni ine heimefic ayemmebisia.

¹⁷ Ngic enara habu gombunga ngenenggareng angemmema uangina meandae, yeni eweheihei ayemmemma uaac bung yemmebesonga. Yeni yoac dekperagima edekpou angemmema uatoa mema kecdae, yeneacnoc negensibisia. ¹⁸ Mitikibingo imocac yofi dede,

“Burumakango wit sebera kpetiudeac uatoa mema wit witiau tima yerecgeande, imocac dumbenga mi dzegergecde.” *(Dedesi 25:4)*

nga

“Uangic yeni uanginango uabungngina maficgebeso, imocngo ngereeude.” *(Ruka 10:7)*

¹⁹ Amma mongngo ngic enara mong yoacfу faibesonga negenudeu, ngeni yoac imoc hepuha kpac mi negembisia. Ngic yohockang me harebecngо yoac imocac hepuc angemegec, imohai yoac imoc negembisia. ²⁰ Yeni ngicngac yeneac kicfu kopocsic maficgegecdeu, geng ifingoc ngicngac yeneac kicfu demeting seria ayemmena ngicngac tosea yeni ifi hemma yenaoc kekecngina isinggegecde. ²¹ Anu ni Anutu nga Yesu Kristo amma angero meisingsyunuyunuya, yeneac kicfu yoac imoc modacnadeac seria edeguduae. Ge ifingoc negeung yoac mi debesena me monde monde mi ambesena.

²² Nga mariga ngicngac yeneac witiu bic faima mi kenecyunubesena. Ngicngac yeneac kopocsicfu mi torokpebesena. Ge kpetiac kecbesena. ²³ Herekiki nga hafei homac anggengande, imocac doku tehcsac mi nebesena. Ge ine heregaac amma waing kapianec ifingoc nebesena.

²⁴ Ngic goa yeneac kopocsic didiu bic fede, yeni yoacfudicenggecde. Nga goa yeneac kopocsic sufu sufuu fede, yeni yoacfudicenggecde. ²⁵ Ifi isocngoc angammeme gombunga goa yaguc didiu fede. Nga angammeme gombunga goa yaguc didiu mi fede, imoc kecma sufu sufuu naric mi feude.

6

¹ Mong ye wanac arenggac tofo bageau kecdaengo mingfocngina eweheihei ayemmegec ngereeude. Ifi anggec ngicngac yoac kpouyemmeing nga Anutuac kpac, imoc naric mi demanganegede. ² Nga wanac areng goa yeneac mingfocngina negen negensinggoc kecdae. Yeni negen negensinggoc tosofocnina andae, ifi dema negengyemmegec mamea mi ambeso. Yeni ine wanac arenggac siricfu songogoc torokpema mingfocngina monggoc yombong kingang kpeymebisia. Yeni wanac areng yenigoc Yesu negensinggema heresongogoc hoangemema kecdae. Yofinenggac mingfocngina siricngina ifia kecdaec, wanac arenggo yeneac amma ua gombunga yenearu mebisia. Ge faka imoc kpouyemmemma herengina midibesena.

³ Ngic mong ye netohoma sing mong kpoungemmema Kebunina Yesu Kristoac yoara dindingac wama Anutuac faka nga sing kpoungemmemaing, imoc ngadeheande, ⁴ ngic ifia ye hereau sebiengeng fede amma ye wiac mong mi negende. Yeac songo ine manganagoc kekec nga ngic yenigoc nesisic yoac nga negen negeng hania hania deande, faka ifia keracmangang nga ngabasiric amma yoac mangana nga negeung maficgeude. ⁵ Ngicngac ifia yeni negen negengngina fonggou ngaba wisic wisickea kpac angemeandae. Yoac fora imoc ubanginaunac bic meic meickea, monggoc mi fede. Yeni dzofinac maficgegecdeacsac Anutuac faka nga sing modacbesonga negensidae.

⁶ Fora, mong ye dewaidzoha kpac ruaegoc kecma Anutuac faka nga sing modackecde, yeng sing imohai wiac gombunga homac maficgeude. ⁷ Ni foracngoc deduae, bangectoa bangec yomohai entegeng fingering. Nga bangectoa bangec yomoc wama kembesonga dema ifingoc entegeng kennide. ⁸ Semeng nga wambanina soha fenemmeudeu ruaegoc dewaidzoha kpac yumia kecbisina.

⁹ Ngicngac dzofinactoagoc anggecdeac negengareng angandae, yeni faitobannu kecma mangana minginaac botacfudicenggecde. Faka ifiango memanganeyunuukpac anggecde. ¹⁰ Imoc yofiac, hiedzoac songo negen negeng, imocngo mangana sasawaac hania. Ngicngac goa yeni hiedzoac songo kuneng mekecdae, imocngo negen negensingngina wangecyunuukkemma hereebic kuneng maficgeyemmeude.

¹¹ Anutuac ngic, ge faka imoc hemma ngadehema woramibesena. Kekec dindingac modacma Anutuac faka nga sing kekecgau seriudeac mamangkima Yesu negensinggema Anutu nga ngicngac heresongogoc hoangyunuma modzotitiae kpac kecma kekec yumea mekecbesena. ¹² Negen negensinnu magubacac dzikac gombunga kpema nedzibesena. Amma uatoa mema nedzima kekecseriu hasikenade. Imoc menadeac Anutungo kpacguec. Amma sing gombunga imoc modacbeso annec, imoc warac ngicngac yeneac kicfu deficgena hepuc anggenggec.

¹³ Anu Anutungo wiac sasawa kekecnginagoc faiec nga Yesu Kristo yeng Pontio Piratoac kicfu haniaya gombunga deficgeec, yereng hepucna anec yofi edegudeae, ¹⁴ dederecgeyoac negennec, imoc modacma goctopoha nga kopocsiha kpac, imoc mekecmana Kebunina Yesu Kristoac hahanasya fingectegecbesande. ¹⁵ Nga Anutu yengenaoc nasoya negende, imoc fingecbesande. Anutu ye kenehagoc ye tembuha Kuctoa mingina nga yeng ngictau yeneac Ngictau nga kebu yeneac Kebu. ¹⁶ Ye mocgungo dzonggo dzongoya kpac nga kperagia manau kecde. Nga kperagi imocac manau ngic

mongngo naric mi enude, kpac. Amma kperagi imoc mongngo mi henec nga naric mi henude. Kuha nga eweheihei yearu feecngo fede nga nasoya kpac fekengkecbesande. Imoc fora.

¹⁷ Ngicngac naso yomohai dzofinactoanginagoc kecdae, yeni sebiengeng mi anggecdeac nonoseria edeyunubesena. Dzofinac imocngo tinanannina seria kpac. Anutungo wiacnina hania hania songogoc mekecnideac maficgenemmekcde, yeng tinanangngina ambeso, imoc edeyunubesena. ¹⁸ Yeni ua gombunga mekecmagec angammemengina gombungango hiedzotoangina ambeso. Amma yeni wosoefac amma iwaingina mekecdae, imoc medereyemmema kecgecdeac demeseri amma edeyunubesena. ¹⁹ Yeni ifi mekecma kekecngina ngade haude, imohai dzofinacngina tohong kpema tatac gombunga mengeregecde. Mengerema kekec forau hasikebesandae.

²⁰ O, Timoteo, Anutungo wiac garenggenadeac genec, imoc gombunga garengkecbesena. Amma bangecac siduc nga yoac sicsauha hania hania, imohacnac wadzahemima worabesena. Ngic goa yofi deandae, “Neni yoac negen negentegehagoc mekecdimbe.” nga yoacngina imocngo yoac kpekpe ande. Ge imoc negemma ngadehebesena. ²¹ Anu ngic goa yeneng negen negentegec imohai kpeketahemma negen negensinggac sing segegec. Anutuac danggunucngo ngenigoc febeso.

Paurongo
Timoteo Yeac Ngadekibi
Ohoec

¹ Ni Pauro Anutungo negennenu Yesu Kristoac aposoro anai. Nga Yesu Kristoaru kpeketahemha yearunac kekec naric menide, yoac dedzege imoc dekperagiyemmebadeac suenuec. ² Timoteo medacna, ni heresongogoc hoangguma kibi yomoc gearu faiduae. Anutu Manggac nga Kebunina Yesu Kristoac danggunuc nga wosoefac amma ruaengo gearu febeso.

³ Esangabofocna yeni Anutu eweheimigec, ifi isocngoc herenegen negenna kpetiacgoc kecma eweheimima dangge deduae. Ifi dema hadzing tofocnac numuma imohai ge negensiguma kecduae. ⁴ Kickumaga mau henai, imoc negensiba herenango geac ammiu monggoc gembadeac anende. Amma gemma sogac sogai hafoangoc meficgebadeac negensiduae. ⁵ Negen negensingga hafoa fede, imocac negensiba ubana ngereede. Negen negensing imocnoc warac ataga Roisi nga nonggoga Eunike, yerearu feec. Negen negensing imocnoc yofinenggac gearu fede, imoc negengyombonggeduae.

⁶ Imocac amma yofi edeguduau, ni warac marina witigau faibare Anutungo wosoefahac amma kuc mong genec, imoc monggoc heigreenadeac negensigenduae. ⁷ Imoc yofiac, Anutungo Asu nemmeec, imocngko kucmama mi meficgenemmeude, kpac. Yeng kucgoc kecnideac nga heresongogoc hoangyununideac amma tembuc tembuc gombunga garengemenideac faka meficgenemmeude. ⁸ Imocac ge gamea kpac kecma Kebuac yoacsiduc dekperagibesena. Nga yeac amma witicamau tacduaeac negenna gameagoc mi ambeso. Ge ifingoc Anutuac kucfu siduc gombunggac amma ni isoc kpendzeng kpebesena.

⁹ Nga komoc kpenideac negemma ebicfunac mesinunuma kpetiac kecnideac Anutungo kpacnunuec. Nenang faka gombunga aninggac ifi mi anec, kpac. Ye yengenaoc arenga negenu feec, imoc bicngoc yombong bangec nga kurumeng mi fingecmaec Yesu Kristoac gombunggac amma wosoefac anemmeec. ¹⁰ Ifi femanu yagucnac memengerec-nina Yesu Kristongo hau Anutuac wosoefac areng imoc fingectegerec. Fingectegeru yeng homec meickema kekec dzonggo dzonggoya kpac, imoc kperagiau mehau hening. Yeng siduc gombung nemmeu kekecseriac faka hentegering.

¹¹ Nga ni siduc gombung imoc dekperagima ngicngac kpouyemmebadeac imocac aposoro denenec. ¹² Imocacnoc kukusisic witiau kecduae. Imoc yofiac, ni ngic negensinggema kecduae, ye negemmidaeac game naric mi nuude. Nga negen negensina seria yofi fede. Ye kuhagocngo wiaca yearu faiai fede, yeng imoc garenggekecmanu nasoya haude. ¹³ Ni siriha Anutuac yoac ngicngac kpouyemmeanduae, geanggaoc imoc negenec nga imocac sirihaungoc edekpou ayemmebesena. Nga Yesu Kristogoc kpeketahemha negen negensing nga heresongogoc kecma Anutuac yoac imoc hoanggema modacbesena. ¹⁴ Tiri Asu nenang hereu kecde, yeng nonggo tacgemmanu Anutungo wiac gombunga mekecnadeac genec, imoc garenggema febeso.

¹⁵ Ngic Asia prowinsiu kecdae, yeni sasawango ni bic wanugec, imoc negennec. Figo nga Hemogene yeri ifingoc wanuoc. ¹⁶⁻¹⁷ Nga witicamau tacbare Onesiforongo Roma hama serima hofocnukecma meficnuec. Amma ye Roma ngicngac yeneac game mi kpeu naso homac ubangerec meficgenenec. Imocac Kebungo Onesiforo nga arengfora wosoefac ayemmebeso. ¹⁸ Imocac Kebungo negemmanu nasotoayau wosoefac meficgemibeso. Anu Efeso taonnu warac kecbare yeng sebina garenggema ua kuneng yombong meec, imoc geanggaoc hemma bic negennec.

2

¹ Medacna, Yesu Kristoac danggunucngo meseriguu kucgoc kecbesena. ² Ge nga ngicngac homac ngeni ngenahafoc yoacna negenggec. Yoac imoc ngic sing mi sege-andae, yeneac mariu faina yeneng mitiu yadima ngicngac tosea torokpema edekpou ayemmegecde. ³ Anu Yesu Kristoac wasaingic gombunga amma kpendzenggoc kecma modzotiti mi ambesena. ⁴ Wasaingic ua mekecdae, yeni ngadeau ua hania hania fede, imoc mong mi megecde, kpac. Yeni enarafocnginagoc yoac dedzege anggec, yeneac enac modacma ua mekecgecde. ⁵ Nga ngic mong ye ariacf u nedzima ariacac singyoac segeude, ye firanggac ira naric mi meude. ⁶ Nga ngic mong ye seserigoc ua heihomec angkecde, yeng hanahema semengfora mebeso, imoc ngereeuude. ⁷ Ni yoac deduaemoc, imoc negen negenggau faima mekecna. Nga Kebungo wiac sasawa negentegecnadeac maficgegenude.

⁸ Yesu Kristo, Dawidiac fingecsaheunac, ye homecfunac yarec, yeac negensima kecbesena. Yeac siduc gombunnoc dekperagiymmekedduae. ⁹ Ni imoc dekperagikecduae, imocac amma kpendzeng kpema mekecbare ngic yeneng godzungic witicamau faiandae, ifi isoc witicamau fainugec. Nga Anutuac yoacn go withagoc mi ande, kpac. ¹⁰ Yesu Kristongo meisngfora ebicfunac mesiyunuu yeneng ifingoc komoc kpema kekecseriac kibikperagia megecdeac ni kpendzeng sasawa naric kpema serima namma imoc tofohodduae.

¹¹ Yoac fora nga seria mong yofi fede:
Yegoc homeinnu yegoc nenhafoc ifingoc kecnide. ¹² Amma serima kecma ebic tofohonideu yegoc ngictau kecnide.

Nga ye ngadehenideu ine yeng ifingoc ngadenunuude. ¹³ Amma dedeserinina wama mi modacnideu yeng sifu dedeseria modacmangoc kefude, nocac ye monde mondea kpac.

¹⁴ Ge yoac ohodua, imoc kpebung heigboriyemmena. Nga yeni yoac goa negemma yoacngina engemmama ambacac goroyoac imoc seriangoc Anutuac kicfu edeyununa. Yoac engemmamagoc dede, imoc memefiha kpac. Ngicngac yeneng imoc negenggec yoac imocn go homac yombong memanganeyunuude. ¹⁵ Anutuac hehenu ngereeudeac seserigoc kecma uaga mebesena. Amma yoac fora gbomea tongganang dena gamengo ua ngic geac witiu mi embeso. ¹⁶ Nga ngicngac bangecac siduc nga yoac sicsauha deandae, imocac araing kecbesena. Ngicngac yoac ifia degec imocn go wangcyunuu Anutu ngadehemma hereau torokpeu torokpe kenggecde. ¹⁷ Amma yeni yoacngina deyadigec imocn go kubec seria isoc monggoc yadi kenude. Himenaio nga Fireto yeri ngic ifia yenearunac. ¹⁸ Yereng yoac fora wama sing segema deandape, "Homecfunac gborima yacyac, imoc bic fingerec." ifi dema ngicngac goa yeneac negen negensingngina memanganeecde.

¹⁹ Anu Anutungo wotung seria faiu kemee nande, imoc goroc goroc naric mi anude. Imohai yoac yofi oho ohoya fede,

"Kebungo ngicngacfora negengyunuude." *(Bangec kisiu 16:5 Septuagintaunac)*

Nga mong yofi,

"Ngicngac Kebuac kpac kpacandae, yeni faka nga angammeme kopocsicgoc, imoc sasawa wama araing kecbisia."

²⁰ Anu ama kunennu enangtapa siriha hania hania fekende. Goa gol me siriwango memea nga goa ic me gbakingo memea. Nga enangtapa goa imoc uangina kuneng ande nga goa ine uangina seuhagoc ande. ²¹ Nga ngic mong ye yengena wiac seuhagoc imohacnac dzuacemeude, yeng enangtapa uaya kuneng, ifi isoc. Ye kpetiac amma minginaac amau efaima namma ua gombunga meudeac siriha imocacsoc ande.

²² Bangecfu sebiac songo sebigbori yenearu feande, imohacnac worama hereau kecbesena. Ngic goa yeni herengina kongaha mekecma Kebuac kpac kpacandae, yenigoc seseri ua mema sing dindingac modacma negen negensinggoc kecma ngicngac heresongogoc hoangyunuma ruaegoc kecbesena. ²³ Ge yoac sicsauha nga memefiha kpac, imoc hemma

wabesena. Faka imocngonoc ngaba meficgeu ewekpekpe fingerude. ²⁴ Kebuac wanacngicngo eaceasigoc mi kecbeso. Ye ngicngac sasawa yenigoc yumea kecma kpoukpou uaac titiha negemma modzotitia kpac kecbeso. ²⁵⁻²⁶ Nga ngic goa yeni mangana minginaac botacfу tacma yeac negen negeng nga songo modacandae, yeni Kebuac wanacngic yeac yoac kpeandae, ifi ammagec yeng yenigoc yumeau kecma dederecgeyoac edekpou ayemmebeso. Ayemmeu Anutungo ubangina merenggecdeac kuc yemmeu gedang yeni ubangina ireckeу yoac fora negenghomema mangana minginaac botacfunaс fotockema woragecde.

3

¹ Naso wisic wisickeau ebic hania hania fingecbesande, imoc negenna febeso. ² Ngicngac yeni imohai yenanggac songo nga hiedzoac songo homac negenggecde. Yeni yenang wicac negenggec engena anu sebiengenggoc kecma tenicfagoc amma nonggo mangfocnginaac yoac kpegecde. Nga ngicngac wiac yemmegecde, yeneac ubangerec mong mi negenggecde. Amma mitiu kekec yenearu mi feude. ³ Nga yeni ngicngac tosofocngina heresongogoc mi hoangyunugecde amma ngicngac yeneac kopocsic wawa mi anggecde. Yeni enacfу faifai amma angammemengina mi garenggema ubagori faka mekecma faka gombunga ubango wagecde. ⁴ Yeni kererengunuma angammemengina sicsauc anggecde amma sebingina meenggecde. Bangec nga sebiac songo yeneac kekecnginaу yadiu Anutuac songo ine wagecde. ⁵ Amma yeni sebingosac mitiu kekec siric isoc kecgecde nga Anutuac kucfakaya imoc wama ngadehegecde. Nga geng ine wayunuma yeneac hereau kecbesena.

⁶ Yenearunac ngic goango gombunga siric kemma amayuguc amma ngac goa yoacfу yukpe kecdae, yeni metai ayemmeandae. Ngac ifia yeni yukpe yukpe fakangina amma songongina hania hania modackecgec kopocsicngina ebiriude. ⁷ Yeni kpoukpouya negengkecdae nga yoac fora ine naric mi hentegecgecde.

⁸ Nga bicngoc Yane nga Yambere yeri Moseac yoac waoc, ifi isoc ngic deduae, yeni negen negeng ikohagoc kecma yoac fora kpeandae amma negen negensinggac sing segegecde.

⁹ (Makekeng 7:11,22; 9:11) Yane nga Yambere yereac sicsauc faka didiu fingeru sasawango imoc negenggec, ifi isoc sasawa yeneng ngic imocac sicsauc fakangina hentegecgecdeac amma ikoc yoacngina monggoc mi yadiude.

¹⁰ Nga Timoteo, ni wiа kpougenai, imoc negemma modacma kecneс. Ni angammeme anai nga kekecnaac sing faiai, imoc negennec. Amma negen negensinnagoc modzotitia kpac kecma ngicngac heresongogoc hoangyunuma seserigoc kefai. ¹¹ Ni Antiokia nga Ikoniong amma Ristera taonnu kecbare nukporac anenggec ebicfu nga kpendzenggoc kefai. Ifi kecbare Kebungo ebic sasawa imohacnac mesinuec, imoc negennec. ¹² Nga ngicngac sasawa Yesu Kristoaru kpeketahama Anutu eweheimima kecgecdeac negendae, yeni ifingoc yunukporac ayemmegecde. ¹³ Anu ngic manganameme nga ikocngic yeni faitobannu ngicngac faiyunuandae, yeni manganangina monggoc yadiseri anu manganeyombonggecde. Amma yeni yenaocngoc ikoc angemema goa ifingoc ikocfu wangecyunugec makpegecde.

¹⁴⁻¹⁵ Ngicngac goa gombunga negengyununeс, yeneng sabacgaunac kecerenec, naso imohai kpetiac yoac oho ohoya fede, imoc kpougenggec. Kpougenggec yoac imoc hoanggena negen negengga meefaiu Yesu Kristo negensinggema komoc kpenec. Ge imoc negenserina imocngoc kekecga meseribeso. ¹⁶ Anu yoac mitikibiu oho ohoya fede, imoc sasawa Anutungo asuya fifiu ngicfu kemeeс, imocngо yofi meficnunuude, imoc Anutuac enacyoac kpounemmema dederecge anemmeude. Amma mengerenunuma sing dindingac modacnideac garenнunuude. ¹⁷ Nga Anutuac ngicngac yeni uaac negen negeng nga kuc imocac sirihau mema ua gombunga megecdeac yoara imoc yemmeec.

4

¹ Yesu Kristongo eucererengau fingecma namma gbori nga homemea isingyunuma desiyunuude. Ni yeac nga Anutuac kicfu serima edeguduaе, ² ge nasoyau me nasoya

kpacf Anutuac yoac ngicngac dekperagiyemmemma goroyoac edeyunubesena. Amma dederecge ayemmemma nanggeyunuma modzotitia kpac wiac sasawa kpouyemmebesena. ³ Naso mong haude, imohai ngicngac yeni kpoukpouyoac gombunga negembesonga modzungina tiude. Yeni ine yenang songo modacma kpoukpoungic homac kpedzucyungecde. Kpedzucyungecde yeni ngicngac yeneac kedzacfu wiac songea ande, imocac kpouyemmegecde. ⁴ Amma yeni yoac fora wama ngadehema nemusiduc nga siduc fora kpac, imohaigeng kpeketahem sing segegecde. ⁵ Nga geng wiac sasawa isinggaea geanggaoc garengemema ebic fingecgenu serima nambesena. Ifi namma Anutuac siduc gombung dekperagiyemmemma Anutungo uayoac genec, imoc hafoangoc modacma kecbesena.

⁶ Anu homecnasona bic hadeac ngic yeneng waing Anutuac sese faiandae, ifi isoc sacna kpakegecde. ⁷ Dzikac gombunga kpema bic mesiai. Amma ngic firang anggecdeac nedziandae, ifi isoc hafoa nedzima bic mesiai nga negen negensinna seria mekecmi mi ukuba kpeec. ⁸ Yaguc kekec dindingacac ira neac tomai faifaia fede. Amma Kebungo faka dindingac ising isingngic, yeng naso imohai ira imoc nenude. Nga imoc nisac mi nenude, kpac. Ngicngac sasawa yeni yeac haha nasoya fingectegerudeac songo negendae, yeng imoc ifingoc yemmeude.

⁹ Ua mongngo dzegenude dema naso mi ukuma nearu bic habesena. ¹⁰ Imoc yofiac, Dema ye bangecac kekecac songo negemma bic wanuma Tesaronike taonnu kenec. Nga Kereseke ye Garata prowinsiu kenec amma Tito ye Darimattia prowinsiu kenu ¹¹ Rukangosac nigoc kecde. Mareko ye uaac manau memeficna andeac amma geng ye meficgema hesickena gegoc habesera. ¹² Tikiko Efeso sueba kenec. ¹³ Nga habesonga dema ngakpina herea Troa taonnu Karpoac amau waba feec, imoc nga kibina sasawa ihai faiba fede mehabesena. Nga kibina sasawa rama seberau oho ohoya fede, imoc negemba wiac engena andeac imoc momoc mehabesena.*

¹⁴ Aieng gerecfu oho ohongic Aresande,[†] yeng ebic homac meficgenenec. Nga Kebungo angammemeaac turunga kpoumiude. ¹⁵ Ye faka gerea amma yoacna homac meenti memati angkefec, imocac ge ngic yeac garengga mema kecbesena.

¹⁶ Anu ni hanahema Roma ihai yoacfui namma haniana deai, naso imohai ngic mongngo neac hepuc mi nanec, sasawango ine wanudacgec. Nga ifi anggecac imocngi mi meebliriyuneso. ¹⁷ Ni siduc gombung bangec monnunac ngicngac Anutu mi negemmidae, yeanearu dekperagima mesibadeac Kebungo nigoc namma kuc nemma raionggac enacfunac onggonuma mesinuec. ¹⁸ Ngic yeni ebic hania hania anembesonga negendae nga Kebungo imohacnac ifingoc mesinuu komoc kpeba kurumeng eucererengau fainuude. Yearu dedengerec nga dedengerec fekengkebeso, imoc fora.

¹⁹ Neac wenacngerec Prisika nga Akpira amma Onesiforo arengfora yeanearu kende. ²⁰ Erasto ye Korintiu kemma kefec. Ye mi haec nga Trofimo ye ine hafei meecac Mirete taonnu waba tarec. ²¹ Nga geng naso mong mi ukuma nomannaso mi ammanu bic habesena. Euburongo wenacngerec degende amma Pudeng nga Rino amma Kraudia nga nengen negensinggoc tosofocnina sasawa, yeneng ifingoc wenacngerecngina gearu faigec hade. ²² Kebungo geac ongaasugoc kecbeso. Nga danggunuhango ngenebaru febeso.

* ^{4:13:} Kibingina homac imoc papirus mariango memea imohai ohokecgec. Papirus maria imoc sang maria isoc kuneng. Kibingina goa yeni rama me noning seberau ohogec. Sebera imoc ine buma kuneng. † ^{4:14:} Aresande, ye kopa nganoc imocgoc ua meec.

**Paurongo
Tito Yeac Kibi
Ohoec**

¹ Ni Pauro, Anutuac wanacngic nga Yesu Kristoac aposoro. Anutuac meisingfora yeni yeac faka nga sing fora negensinggema negentegecgecdeac fainuec. ² Yoac imocngo kekecseri meficeude, imoc negensinggedimbe. Anutu memengerecnina yearu ikoc mong mi fede, yeng hanac hanaheaunacngoc kekecseri menideac enarango deseriec. ³ Anu yengena nasoya hau yoara didiu ngicngac faiyemmeu dekperagigec, imoc debadeac fainuec. ⁴ Tito, negen negensinnu medacyombonna, ni kibi yomoc gearu faiduae. Anutu Manggac nga memengerecnina Yesu Kristo yerearunac danggunuc nga ruaengo gegoc febeso.

⁵ Ua noboha feec, imoc mesinadeac negemma Kreta nucfu waguba tacnec. Amma ua areng edzacguai, imoc modacma taong fekendaesoc, imohai kemma kpебunggac enara meisingyunuma uayoac yemmebesena. ⁶ Ngic mongngo dindingac kecma ngac mocguac ewea kecbeso. Ye nambaracfora negen negensingnginagoc kecdae amma yoackpekpe me ihoc bahoc kekec, yoacsiducngina ifia mong mi febeso. Ngic ifia yeng enara naric anude. ⁷ Imoc yofiac, kpебunggac enara ye Anutuac wiac garenggeude, imocac yeng ngic soronga kecbeso. Nga ye yengenaac negenu engena mi ambeso. Amma ye ngic gerea mi ambeso. Ye waing doku nema ubasufu ngic anu mi ngereeude. Ye yarengic mi ambeso amma kichodung faka mi mekecbeso. ⁸ Yeng ngicngac ama heiymemekecbeso amma faka nga angammeme gombunga, imocac songo negembeso. Fakaya nomana ambeso amma dindingac nga kpetiac kecma fakaya nga kekeha garengemebeso. ⁹ Nga yoac fora edekpou aning, yoac imoc seria mekecbeso. Ifi amma ngicngac sing dindingac kpouyem-mema ubangina midiude. Nga yoacnina kpeandae, yeneac yoac negen negentegecog merengyemmeu kucngina mabeso.

¹⁰ Ngic enarafocnginaac bageu kekec waandae, ngic ifia homacngoc kecdae. Yeni yoack-pekte amma yoac onea deandae amma ngicngac ogofocngina ikocfu wangecyunuandae. Nga ngic sebi tosangina herecgegec, yenennoc faka ifia angkecdae. ¹¹ Ngic ifia yeneac enac medzickebesong. Yenennoc dzofinactoa ikocfu meficegecdeac yoac dedesifucgoc edekpou ayemmegecde. Ayemmegec ama areng goa hafoangoc tohoma manganegecde. ¹² Kreta ngic yenang kpefing ngic mongngo yenanggac yofi deec, “Kretangic yeni nasoya nasoya ikoc angkecdae amma yaka ondzonggboc nekecma oyong kecma kateyang mangana isoc kecdae.” ¹³ Yeac yoac imoc fora, imocac yeni negen negensingngina mengerema sirihau anggecdeac nonosaeng seria edeyunubesena. ¹⁴ Amma yudangic yeni nemusiduc goa dema singyoac ngicfunac meserima yoac fora wama ngadeheandae. Yeni yoac ifi mi negembisia, imoc seriangoc edeyunubesena.

¹⁵ Nga ngicngac kopocsicngina kpac kecdae, yeneac kekecfu wiac sasawa kongaha feude. Nga ngicngac goa bic manganema kongaha mi andae amma negen negensingnginagoc mi kecdae, yeneac negen negentegec nga herenegen negengngina momocngoc manganeu wiacngina kongaha mong mi feude.* ¹⁶ Yeni Anutu negemmidae, imoc enacnginangosac deficgegecde nga fakanginango ine ye busic kpemigecde. Fakangina mangana imocac amma urumbeso anemmede. Yeni yoac kpekpeareng kecma wiac mong gombunga anganggac siric mi andae.

2

¹ Yoac gombunga nga dindingac fede, ge imoc modacma yofi kpouyemmebesena. ² Ngic yada yeni nomana kecma garengemema fakangina eweheiheigoc mekecisia. Nga

* ^{1:15:} Paurongo dede yaka neneac kpaea mong mi fede. Goa yeneng ine degec, yaka goa imoc kpaeagoc. Mareko 7:19 Roma nadung 14 nga Sesememe nadung 11-15 imocac hania nga negen ihai oho ohoya fede.

yoac yofi edeyununa, yeni negen negensingngina garenggema ngicngac heresongogoc hoangyunuma modzotitia kpac Kebuac ua mebisia.³ Nga ngac yada yeni ifingoc faka nga angammemenginaac arenna ngicngac kpetiac siricfu kecbisia, imoc kpouyemmebesena. Nga yeneng enacfu faifai mi ambisia amma waing doku nene, imocac ebicfu mi kecbisia. Wiac gombunga fede, ngeni imoc ngicngac ogofocngina kpouyemmebisia.

⁴ Imocac ngac naroang ewefocnginagoc yofi kpouyemmebisia, Yeni ewefocngina nga nambaracfocngina heresongogoc hoangyunuma⁵ garengemema kpetiac kecbisia. Amma yeni ama uangina negen negenggoc nga ubangerecgoc mema kecma ewefocngina yeneac yoac tofobobisia. Ifi anggec ngic mongngo Anutuac yoac naric mi demanganeude.⁶ Ge sebigbori ngic ifingoc garengemegecdeac negen negengngina midima edeyunubesena.⁷ Amma wiac sasawau geanggaoc angammemega gombungangoc kecma sirihau anna modacgubisia. Ge kpoukpouga mekecma eweheiheiagoc kecma yoac fora kpouyemmena.⁸ Nga ngabafocga yeni gamenginagoc namma geac yoac mong mi megecdeac ngicngac ubadzidzigaunac yoac memefihagoc edeyunuma kecbesena.

⁹ Wanac ngicngac mingingfocnginagoc kecdae, yeni mingingfocngina yeneac yoac sasawa tofohogecdeac imoc dederecge ayemmebesena. Nga yeni mingingfocngina yeneac yoac turunga mi merengyemmebisia. Amma yeni mingingfocngina yeneng negengyemmegec ngereeudeac uangina mekecisia.¹⁰ Yeni ine mingingfocngina yenearunac wiabisic mong heikpesia kpac eng mi mekembisia, kpac. Yeni ua sasawa mekecma yoac modac modac ngicngac ambisia. Amma yeni faka ifia anggec Anutu memengerecninaac kpoukpouyoac imoc ngicngac yeni ubangerehagoc negenggecde.

¹¹ Anutu engenatoa yeac wosoefacngo ngicngac sasawa yenearu fingectegeru komoc kpegecdeac memengerec meficgeyemmeec.¹²⁻¹³ Ye nga memengerecnina Yesu Kristo, yereng kuc nga kibikperagiau hama fingectegerecde, imocac amma kenehaac tomai kecdimbe. Ifi kecmina Anutuac wosoefacngo metinnunu yofinenggac bangectoa bangec yomocac faka nga songo ngadehema kekecnina garenggema sing dindingac modacma Anutu eweheimima kecdimbe.¹⁴ Anu Yesu Kristongo singyoac kpekpe arennumac yungecnunuudeac yengenaoc ngabafora maringinau faiemeec. Nga nenang yengena ngicngac amma kpetiac kecma ua gombunga mamangkima menideac faka imoc anec.

¹⁵ Ge yoacna imoc mema dederecge ayemmemba ubangina midibesena. Ge yoac sasawa imoc kuc genggena, imocac sirihau edeyunubesena. Nga ngic mongngo geac negenu mamea mi ambeso.

3

¹ Ge yoac yofi heigboriyemmena, ngicngac yeneng gawamangfocngina yeneac yoacngina negemma tofohoma ua gombunga megecdeac nasosoc efaima kecbisia.² Amma yeni ngic me ngac mong demanganegede, imoc mi ngereeude, kpac. Yeni deendema mi amma yumea kecma ngicngac yeneac ebic negentegecma ubangerec faka ayemmedacbisia.³ Nga nenang ifingoc warac negen negentegecgo mi kecma yoac kopeni goa yeneng ikocfu wangecnunugec sing segeing. Amma bangecac hensongo nga negensongo hania hania imocngo witcnunuec. Nenang herebugoc nga ogo yeneac keracmanganggoc kecma ubango ukuemeing.⁴ Anu Anutu memengerecnina, yeac danggunuc nga ubaefacngo didiu fingectegeru⁵ yeng dzuacnunu Tiri Asungo ua meu fingec fingec gboria fingering. Ye ua gombunga meinggac amma mi mengerenunuec. Ye nenanggac ubamangang negemma mengerenunu komoc kpeing.⁶ Anu yeng memengerecnina Yesu Kristo yeac amma Tiri Asu ebiriangoc kpakenemmeec.⁷ Kpakenemmemba wosoefahaac amma dindingac denemmeu kecdimbe. Amma maridzominnina kekec wisic wisickea kpac, imoc menideac negensima tomai kecdimbe.⁸ Yoac imoc fora yombong.

Yoac imoc kucgoc edekpou ayemmenadeac negenduae. Ifi anna ngicngac Anutu negensinggema kecdae, yeneng faka gombunga isingga imoc anggecdeac homac ayemmeude. Ua ifia imoc gombunga nga ngicngac yeneac memeficngina anude.

⁹ Ngicngac goa yeni yoac siriha kpac engemmama deandae amma esangabo yeneac kisic kpema dedeseriac yoac goaac yoacngina engemmama anu ngaba angandae. Geng ine yoac ifia negemma ngadehebesena. Yoac ifia imoc memefiha kpac nga imocngo fora mong mi meficgeude. ¹⁰ Gurunegic ngic mongngo hau naso mocgu nonoyoac edena mi negenu edena atac yohockang ambeso nga yoacga mi negenudeu wana tembuha kecbeso. ¹¹ Ngic ifia ye sing segema kopocsic meficgema yengenaoc yoacfу faiemeude.

¹² Ni Atema me Tikiko gearu sueba hau naso mi wama nearu Nikopori taonnu bic habesena. Ni kianomang nasou ihai kecbadeac bic negensiai. ¹³ Aporo nga desi desi ngic kpara Dzena yeri singgac wiac mong mi obohoecdeac ge memefic seriangoc ayecmebesena. ¹⁴ Anu ngicngacfocnina uaac fora mi meficgebauac yeneng ifingoc ngicngac ebicngina hemma faka gombunga mema meficyunugecdeac sing kpouyemmena negenggecede. ¹⁵ Ngicngac nigoc kecdimbe, yeneng wenacngerecngina gearu faigec hade. Nga ngicngac Anutu negensinggema neneac songo negendae, yeni wenacngerecnina edeyununa. Danggunucngo ngeni sasawa ngenearu febeso.

**Paurongo
Firemong Yeac Kibi
Ohoe**

¹ Ni Pauro Yesu Kristoac amma witicngic nga negensinggoc tosonina Timoteo, nereng kibi yomoc faide Firemong gearu hade. Ge ua mocgunira nga heresongogoc hoangguma kecdipe. ² Negen negensinggoc nainnina Apia nga Kebuac wasaingic ogonira Arkipo yearu amma kpebung Firemonggac amau kpedzucneandae, kibi yomoc ngeneac momoc faidipe. ³ Anutu Mannina nga Kebunina Yesu Kristongo danggunuha ngemmema ruae ngemmebeso.

⁴⁻⁵ Negen negensinggoc tosona, Kebu Yesu negensinggema kpetiac areng sasawa heresongogoc hoangyunukec nec, geac siduc ifi negengkecduae. Imocac amma nunumunuau geac negemma nasosoc Anutu dangge edekecduae. ⁶ Ge negen negensinnu nenigoc urec kecma Kristogoc kpeketahemma kecna wiac gombunga sasawa mekecdimbe, imoc hafoangoc negentegecnadeac numuanduae. ⁷ Nga kpetiac areng ubaherengina heigboriyemmeannec. Heresongogoc ifi hoangyununa henaiac fakaga imocngo meserinuu ebiriangoc sogaiduae.

⁸ Imocac amma Kristogoc kpeketahemma kecma ua genggena menadeac naric edegubai, imocac negenna mi ebiribeso. ⁹ Heresongo negengemeeme fakau namma yoac yumea yofi deba, ni Pauro ngicyada yofinenggac Yesu Kristoac witicngic kecduae. ¹⁰ Amma ni medacna Onesimo* yeac yoac debade. Ye witicamau kecbare fingec fingec gboriau medacna isoc fingecnenec nga yeac negemma desambic anggemma yofi deduae, ¹¹ Ye warac gearu memeficga mong mi anec nga yaguc geac nga neac momoc memeficnira angkecde. ¹² Ni neanna ubaherena suebai isoc ye sueba gearu dzigeneude. ¹³ Siduc gombunggac amma witicamau kecbare yeng geac tatac mema nigoc yei kecma meficnubac, imoc naric ambac ifi negenai. ¹⁴ Nga geng naric mi demana ubanaac segereba wabanggac amma wayai. Nga faka gombungaac anggenu songoga modacnadeac sueba haude.

¹⁵ Onesimo ye negen negensinggoc tosoga kecma wisic wisickea kpac gegoc kefudeac gedang warac waguec. ¹⁶ Waguma wanacngic siricfu monggoc mi haude, kpac. Ye yaguc negen negensinggoc songo tosonina ande. Ni yeac ifi yombong negenduae. Nga geng yeac mingina nga negen negensinnu Kebuac amma ye tosoga momoc ande, faka imoc wiac engena. ¹⁷ Ge negenna nerang ogo ogo andipeu Onesimo haude, ye ifingoc neng haba ambang isoc mema ye hoanggebesena. ¹⁸ Nga yeng sing ferahema wiacga mong memanganeeec me yeac turung gearu fedeu imoc sasawa wana neac turung ambeso. ¹⁹ Pauro neanna marinango kibi yomoc ohoduae. Ni turung imoc kpougembade. Nga geangga kekecac turung nearu feder, imocac yoac ine mi deduae.

²⁰ Ge foracngoc negen negensinggoc tosona, Kebunina Kristoac amma meficnuna ubaherenango ruae meficgeude. ²¹ Nga enac tofoc tofohoga fede, imoc negemma kibi yomoc ohogenduae. Nga wiac deduae, geng imoc torokpema monggoc annade, imoc negenduae.

²² Amma mong yofi negensiduae, ngeneac nunumunginaac amma witicamaunac mesinugec ngenearu habade. Imocac neac ama mana mong mengerebesena.

²³ Ni Epafragoc neraha foc Yesu Kristoac amma witicamau kecdipe, yeng geac wenacngerec dede. ²⁴ Ngic nigoc kecma ua nenhafoc meandimbe Mareko, Aristako, Dema nga Ruka yeneng ifingoc wenacngerecngina degec hade. ²⁵ Kebunina Yesu Kristoac danggunucngō ongaasunginā fekecbeso.

* ^{1:10:} Onesimo imoc titiha memefihagoc.

Hebiraio Yeneac Kibi

¹ Anutungo bicngoc naso homac singa hania hania imohai yoara profete yeneac enacfu faiu, yeneng bangecfocnina yoac edeyunukecgec. ² Nga yofinenggac naso wisic wisickeau ye yoara Medahaac enacfu faiu yeng yoac edenunuec. Bangecfu nga sawau amma kurumennu wiac sasawa fekende, imoc Anutu medahaarusing yegoc meficgeoc nga maridzominga sasawa medahango meudeac desimiec. ³ Anu Medac ye yengenaoc Anutuac kperagia amma yeri siricngira mocgu andape. Nga Medac ye yoara kucgoc amma imocngo wiac sasawa bangecfu nga sawau amma kurumennu fekendacde, imoc nanggedaru fede. Amma ye ngicngac sasawa nenanggac kopocsic heidzuac ua mesima kurumennu Ngictau kuhagoc yeac foiau enec tacde.

⁴ Medac ye angero sasawa yeneac kunengngina. Amma yeng kpac kuneng maridzom- inggac arennu meec, kpara imocngo angero yeneac kpac sasawa feracyunuude. ⁵ Nga Anutungo angero monggac yofi mi edeec,

“Ni yagucnoc megudua. Ge medacna nga ni geac Mangga.” *(Mitiyegec 2:7)*
Amma yeng angero monggac negemma yofi mi deec,

“Ni yeac Manggac nga yeng neac Medac anude.” *(2 Samue 7:14; 1 Ngictau siduc 17:13)*

⁶ Amma ye waracmedaha bangectoa bangecfu kefudeac hesicke haec, naso imohai yofi deec,

“Anutuac angero sasawa yeneng ye ngonducnemima afehebisia.” *(Dedeseri 32:43 Septuaginta mitikibiuac.)*

⁷ Amma angero yeneac ine yofi deec,

“Ye angerofora sueyuu yeneng yoara mema kenggec gerecborang uayoac edeyunu yeneng ye kingang kpemigecde.” *(Mitiyegec 104:4)*

⁸ Amma Medahaac negemma yofi deec,

“Anutu, geac ngictau tatac imoc wisic wisickea kpac amma feengkefude. Amma ngictau yasugaac kpara imoc faka dindingac. ⁹ Ge dindingac kekecac anggengande nga singyoac kpekpe, imocac ine ubagango waannec. Imocac amma Anutugango, geac Anutungoc dema ge meisnguma sogac sogaiac kerecdokungo nadzicgenu geac sogac sogai imocngo tosofocga yeneac ferahede.” *(Mitiyegec 45:6-7)*

¹⁰ Amma yeng monggoc Medahaac yofi deec,

“O Kebu, hanac hanaheaungoc bangecac kpesinga fainec amma kurumenga kurumenga fekende, ge imoc sasawa marigango meficgedacne. ¹¹ Yeni kpac andacgecde nga geng ine kecbesanne. Yeni sasawango ngakpi isoc dzamema kpac anggecde. ¹² Geng kurumenga kurumenga fekendae, yeni ngakpi isoc kpouyununade nga ngicngac wamba mesima gboria faiandae, ge ifi isoc ine esea meicyunuma gboria fainade. Nga geng nasosoc siric mocgungoc kecnade nga geac kifanaso imoc wisic wisickea kpac.” *(Mitiyegec 102:25-27)*

¹³ Anu Anutungo angero monggac yofi mi edeec,

“Ge foinaugeng tacmana ngabafocga hanigaac bageau faiyunuba yeni hanititiga anggecde.” *(Mitiyegec 110:1)*

¹⁴ Angero sasawa yeni asuareng amma ua mema kecdae nga ngicngac memengereac maridzoming megecdeac tomai kecdae yeni yeneac kingang kpegecdeac Anutungo sueyunuande.

kopocsicnginaac siriha turunga megec. ³⁻⁴ Anu Kebungo monggoc memengerecac sing mong kuha engena yombong edenunuec. Yeng imoc hanaheu yoara negenggec yeneng imocac hepuc amma edenunugec. Anu Anutu yengenaoc yoara meserima negensinggegecdac kucfaka nga faka kiwa morora mema songoya modacma Tiri Asuac wosoefacac kuc nemmekefec. Ye ifi anecac nenang memengerecac sing kpenideu turungaac naric mi woranide.

⁵ Bangectoa bangec gboria fingerudeac yoara deandimbe, imoc angero yeneac bageng-inau mi faifaia. ⁶ Nga kibiu mongngo yofi bic dekperagiec, “Geng bangecfu ngicngacnec negensinunuma ngicac medac gombunga garennunukec-nec, imocac warecguduae. ⁷ Naso wegenanecsac angero yeneac mamea anudeac geng faina kefec. Amma ye kuc kibikperagiagoc kekecac iraya heiminec. ⁸ Nga Anutungo wiac sasawa yeac bageu faiec.” *(Mitiyegec 8:4-6)*

Yeng wiac sasawa yeac bageau faima wiac mong mi herandzima hafoangoc faiec. Nga yofinenggac faka imoc mi hengandimbengoc amma sifu hennide. ⁹ Anu nenang Yesuac yofi hendimbe, Anutungo faka meu Yesungo naso wegenanec angero yeneac mameang-inia kefec. Kefu Anutungo wosoefac anemmeu Yesungo ngicngac sasawa donina mema kpendzeng kpema homeec. Imocac ye kuc nga kibikperagia amma eweheihei mekecma imocngyo yeac ira ande. ¹⁰ Anutungo wiac sasawa meficgedarec amma ye imocac ming-inia. Amma yeng medacfora homac hesicyunuma kibikperaginginagoc anggecdeac ine memengerecac hanac hanahengic kpendzennu faiec. Faiu ye yengena sebiu kpendzeng negemma uaya mesiu kekeha hafoangoc gombunga anec. Yeng ifi anecac Anutuac medacfora yeni kibikperagiau naric enggecde. ¹¹ Yesungo kpetiac kekecac duac duac ua mekecde nga ngicngac kpetiac kekecac duac duac mekecdimbe, nenang kpetiac amma arenina mocgu kecdimbe. Imocac amma ye nenanggac munafocna debesonga game mi kpeude. ¹² Ye yofi dede,

“Ni geac kpac kuneng munafocna dekperagiyemmema kpebung botucnginau namma eriendzong megembade.” *(Mitiyegec 22:22)*

¹³ Amma monggoc yofi dede,

“Ni yearu heiriduae.”

Amma monggoc dede,

“Nenenggec, ni nga nambaracfocna Anutungo nenec, neni yei.” *(Yesaia 8:17-18)*

¹⁴ Yesungo homec nga mangana mingina memanganeudeac homeec. Anutuac nambaracfocra nenang sebifusinagoc nga ye siric ifiangoc sebifusiagoc anec, ifi anecac amma mangana mingina naric memanganeec. ¹⁵ Amma ye arengfora kekecnina hafoangoc homecac kengecnunuande, nenang kengecac witicfunac naric yungecnunuude.

¹⁶ Foracngoc, ye nenang Abrahanggac bangecfora hoannunuma kecde. Ye angero ifi mi hoangyunude, kpac. ¹⁷ Ye donina meudeac amma wiac sasawa negemma munafocra nenanggac siric yombong amma mong mi segeec. Ye ifi amma ngicngac nenanggac wosoefac amma uayoara modacma Anutuac kicfu ngicngac nenanggac womonggareng-toa anec nande. ¹⁸ Ye ine yengena kpendzeng kpema faitobannu enec, imocac yeng ngicngac faitobannu engandae, yeni meficyunuudeacsoc ande.

3

¹ Kpetiac tosofocna, kurumenggac kpakpacnggo ngenearu ifingoc haec. Imocac ngeni negeengngina Yesuaru faibisia. Yenoc aposoro nga womong garengtoanina nga nenang yeac kpara deficgekecdimbe. ² Mose ye Anutuac uayoac modackecma Anutuac amau yoara tofohoma kefec. Nga Anutungo Yesu uayoac miu yeng Moseac siricfu uayoac imoc modackefec. ³ Ama memengicngko kpac kuneng meande, fora. Amma imocngko amma yengenaac kpac kuneng ferahade. Siriha ifia amma Yesungo Mose feraheu nenang yeac kpara afehedimbe. ⁴ Amatehec sasawa imoc ngicngko memea nga Anutungo ine wiac sasawa meficgedarec. ⁵ Mose ye wiac ngadeau fingerudeac sosoha anec. Ye ifi kecma Anutuac amau kingangkpekpe kefec. ⁶ Mose ye kingangkpepe kecma Anutuac uayoac

modackefec nga Kristongo Anutuac Medac kecma uayoac modacma yeac amagareng kecde. Amma nenang kengeha kpac kurumenggac wiac menide, imoc wiac engena negemma serima mekecnideu Anutuac amanoc angkecnide.

⁷ Imocac amma Tiri Asungo yofi dede,

“Ngeni yaguc yeac yoac negendae, imohai ⁸ herengina mi dzegegec. Ngeni warac bangec kisiu yoacna kpema tobannugec, ifi isoc monggoc mi ambisia. ⁹ Bangecfocngina yeneng imohai neng ua mekefai, imoc kifa 40ac manau hengkecma ni ine tobannukecgec. ¹⁰ Nga ngicngac naso imohai kecgec, yeneac herebu negemma yofi deai, ‘Yeni herenginango nasosoc sing segekecma neac sing fekende, imoc negenggecdeac mi ayemmeande.’ ¹¹ Imocac ni herebu amma deserima yofi deai, ‘Yeni neac kecnegeng kekecfu naric mi enggecde.’” *(Mitiyegec 95:7-11)*

¹² Tosofocna, ngeneearunac mongngo ubahereau negen negeng mangana ereu negen negensing wama Anutu kekec mingina ngadehebauac ngeni henghomema kecbisia.

¹³ Mitikibingo “yaguc” ifi demanu ngeni uamemesoc ubaherengina midiemebisia. Kopocsicngoa ngeneearunac goa ikoc ayemmeu herengina dzegebauac ngeni ifi ambisia.

¹⁴ Nenang urecfu Kristo seria negensinggema kefing, negen negensinnina siriha imocngomekecnideu naso wisickeau serima nanni yeng deude, “Ngeni neac ogofocna.”

¹⁵ Anu monggoc dedea yofi fede,

“Ngeni yaguc yeac yoac negendae, ngeni imohai herengina mi dzegegec. Ngeni warac yoacna kpegec, ifi isoc monggoc mi ambisia.” *(Mitiyegec 95:7-8)*

¹⁶ Negenggec, Mosengo Aigita bangecfunac ngicngac hesicyunuma kenu yeni sasawango Anutuac yoac negemmaguc ine faka hania hania angkecma yoara kpegec. ¹⁷ Amma yeni yoara kpema kopocsic maficgegecac yeng kifa 40 ngaba ayemmeu bangec kisiu homedacgec fedaengoc. ¹⁸ Nga yeng ngicngac yeac yoac kpegec, yenengsac kecnegenggac kekecfu mi enggecdeac deseriec. ¹⁹ Amma yofi hentegecdimbe, yeni mi negensinggegec, imocac amma yeneng bangec deec, imohai enggecdeac osigec.

4

¹ Anutungo kecnegeng kekecfu ennideac deec, imoc nandengoc. Nga kecma ngenearunac goango enggecdeac obohobauac, ngeni garengngina mema kecbisia. ² Yeneng siduc gombung negenggec, nenang ifi isocngoc imoc negening. Nga yeni ine imoc negemma mi negensinggegec amma Yosua nga Karebe yerigoc uba mocgu mi anggecac amma yoac negenggec, imocngomekecnideu yenearu memefiha kpac anec. ³ Nga ngicngac negensinggema kecdimbe, nenaoc kecnegeng kekecac areng andimbe. Anutungo bangec nga kurumenggac kpesinga faiu wisickeu wiac sasawa mesidacma kecnegeng kekecac uameme faiec. *(Fingec fingec 2:2)*

Ye ifi faima sifu yofi dede,

“Imocac ni yeneac herebu negemma ine yofi deseriae, ‘Yeni neac kecnegeng kekecfu naric mi enggecde.’” *(Mitiyegec 95:11)*

⁴ Uameme 7gac yoac fekende imocac yoac mong yofi fede,

“Uameme 7 fingeru Anutungo uaya sasawa faidacma tacnegenec.”

⁵ Nga yomohai yoac imocac nobohango yofi dede,

“Yeni ine neac kecnegeng kekecfu naric mi enggecde.”

⁶ Ngicngac goa yeni ine kecnegeng kekecfu naric enggecde. Nga goa yeni hanahema siduc gombung negenggec, yeneng ine enac tofoc tofohongina kpac, imocac kecnegeng kekecfu mi enggec. ⁷ Imocac amma naso hereangoc anu Anutungo monggoc naso mong kpara “yaguc” ifi deserima yoac Dawidi miu yennoc yofi deec,

“Ngeni yaguc yeac yoac negemma, herengina mi dzegebisia.”

(Mitiyegec 95:7-8)

⁸ Yosuango kecnegeng bangecfu hesicyunu embacfu Anutungo ngadeu Dawidiac nasou naso monggac naric mi debac. ⁹ Imocac yofi negendimbe, Anutuac ngicngac yeneac hombanggac kecnegeng naso fedengoc. ¹⁰ Nga Anutungo uaya faima tacnegenec, ifi isocngoc ngic mong ye Anutuac kecnegeng kekecfu emma uaya faima kecnegenude.

¹¹ Nga warac areng yeneng makpegec, nenanggarunac mongngo yeni isoc yoac kpekpe ambauac nenang kecnegeng kekec imohai ennideac negemma seserigoc ua mema kecbisina.

¹² Anutuac yoac imoc kekehagoc nga uaya nasosoc mema kecdengoc. Imoc wa-saibeang sasawa enara noboc noboc imoc feracyunuma enara santac yombong ande. Imocnggo wiac sasawa nendzicma noboc nesariande. Imoc ongaasu nga ubaonganina hendzicyuruma sic gbotoc gbotoc nga sic manau kereha nendzicyuruude. Amma ubahereninau negen nengeng nga faka sufuma mekecdimbe, imoc isinggema forayamekperaginemmeude. ¹³ Nga Anutungo wiac sasawa deu fingecdarec imocac wiac mongngo yeac kicfu sufu sufuya mi fede. Wiac sasawa imoc fingec fingec nga didiu yeac kic witiau fedacde amma yearunoc kekecninaac siduc memini imoc isinggedarude.

¹⁴ Nga womong garengtoanina engenango kurumenga kurumenga ferahedacma enec kecde, imoc Yesunoc, Anutuac Medac. Ye ifi kecdeac negen negensinnina deficge-andimbe, imoc negemma seria mekecbisina. ¹⁵ Faitobang fingecnemmeande, ifi isoc womong garengtoanina ye ifingoc fingecmidarec nga yeng ine kopocsic mong mi meficgeec. Imocac ye kucmamanina hennegeng andacma nenanggac ubamangang negengkecde. ¹⁶ Imocac nenang kengec nga negengyohoakpac kecma Anutuac danggunucac ngictau tatacac wegenac kembisina. Ifi anu memefic naso yombong hau yeac wosoefac meficgeni yeng danggunuha nemmema meficnunuude.

5

¹ Anutungo Yuda yeneac womong garengtoa ngicfunac meisnggema desiu yeng ngicngac yeneac amma Anutuac kicfu namma uaya mema ubangerecac nga kopocsicac sesegerec faiande. ² Amma womong gareng ye yengena kucmamaac bageau ifingoc kecde. Imocac ngicngac negen negentegecngina kpac me sing segeandae, yeni gombunga ayemmeudeacsoc ande. ³ Yeng kucmamayaac amma yengena nga ngicngac yeneac kopocsicac sesegerec momoc faiande, imoc ngicngac yeneacsac kpac. ⁴ Amma ngic mongngo womong garengtoaac tatac yengena ubeaac naric mi meude. Anutungo Arong kpacma womong garengtoa uayoac miec, ifi isocngoc Anutungo womong garengtoa sasawa kpacyunuma uayoac yemmeande. ⁵ Nga Kristo ye yengenaoc ifingoc womong garengtoa anudeac amma kpactoagoc mi meemeec, kpac. Anutungo yeac yofi deec, “Ni yagucnoc megudua. Ge medacna nga ni geac Mangga.”

(Mitiyegec 2:7)

⁶ Amma monnu yofi oho ohoya fede,

“Geng Merikisedeac siricfu womonggareng wisic wisickeakpac kecengkecnade.” (Mi-
tiyegec 11:4) *

⁷ Yesungo bangcsebigoc kecma yofi numuec, “Ge homecfunac megborinubesena.” Ifi numumima kpacsambic ammima kunengngoc arohma kiarec. Nga ye Anutu eweheimima enac tofoc tofoho kefecac Anutungo nunumuya negenec. ⁸ Yesu ye Medac yombonga. Amma yeng sifu kpenzeng kpema enac tofoc tofoho kekecac faka meec. ⁹ Amma ye kpenzeng kpema hafoangoc gombunga anec. Yeng ifi anu ngicngac yeneng yeac enac tofohoma uayaac amma komoc kpema wisic wisickeakpac kecengkecde. ¹⁰ Ifi anu Anutungo yeac yofi deec, “Geng Merikisedeac siricfu womonggareng wisic wisickeakpac kecengkecnade.”

¹¹ Wiac imocac yoac homac fenemmede nga ngeni yoac negenggecdeac tondzera angandae, imocac edekpou angemmiba dema obohoduae. ¹² Ngeni naso herea bic negen negensinggoc kecma kpoukpou ua bic megec ngereebac. Amma yofinenggac mongngo hama ine Anutuac yoac haniaunac mongoc edekpou angemmedesoc ande. Ngeni yaka seria negecdeacsoc mi amma namuacsac angemmede. ¹³ Nga ngic mong ye namuungoc kecde, ye sabac kecdengoc. Nga neni dindingac kekecac yoac kpoumini ye imoc negemma meudeacsoc mi ande. ¹⁴ Yaka seria imoc ngicngac bic yadiseri angana,

* 5:6: Merikisedeac siduc imoc Fingec fingec 14:17-24 oho ohoya fede.

yeneac. Amma ngicngac ifia yeni negen negengngina naso herea bic midima faka damocngo gombunga me mangana, imoc ireckema negentegecma kecdae.

6

¹ Ngeni mitiu wiac efea hanahema kpoungemmeing imoc monggoc mi denide. Amawotung monggoc ukuni kemeu imoc mi ngereeude. Imoc amma faka kpakparoha wagecde nga Yesu negensinggegecde amma ² doku nadzicac kpoukpou hania hania nga mari faifaiac ua amma homecfunac gborima yacyac nga hofeac kpendzeng wisic wisickea kpac, ³ imoc Anutungo negenu naric anudeu monggoc mi denide.

⁴ Imoc yofiac, ngicngac goa yeni kperagi bic yemmeyemmea nga kurumenggac ubangerecac yaka nehemma Tiri Asugoc bic anggec. ⁵ Amma yeni Anutuac yoacac songea amma bangec nga kurumeng ngade kecma fingecbesande, imocac kuc ifingoc nehenggoc. ⁶ Nga ngicngac imoc nehemma makpema ngadehegecde, yeni monggoc ubamereng meyunuma heitaiyununideac singa mong mi fede. Ifia yeneng Anutuac Medac didiu deengdema ammima mariponnu monggoc kpeandae. ⁷ Bangec mong medzameni kiango naso homac kpema uau doku meficgeu ngicngac yeni yakangina imohai homecgec fora meficgeyemmeu yofi debesonga, bangec imoc Anutuac kenecfu fede. ⁸ Nga bangec mong medzac medzameango ine witic waeagoc nga tebanghaseng meficgeudeu bangec imocngo uaya kpac amma soweagoc anu naso wegeneu gerecngo dzeu kpac anude.

⁹ Songo tosofocnina, ngeni ngicngac ifia kpac amma ngeneng komoc kpegecdeac areng, ifinoc negensima kecdimbe. Ifi negensima sifu goroyoacngina dedimbe.

¹⁰ Anutungo sing dindingacfyoac nga fakangina isinggeude. Ngeni uanina meandae nga kpara songogoc hoanggeandae, yeng imoc naric mi nigeckpeude. Amma ngeni kpetiac areng heimefic ayemmegec nga torokpema ayemmekedaengoc, ye imoc ifingoc naric mi nigeckpeude. ¹¹ Nga ngeni negengyohoha kpac kecma wiac fingecngemmeudeac negensingema kecdae, ngeni imoc megecdeac tembuc tembuc mamangkima ua mekecmagec naso wisic wisickea haude. Ngeni ifi kecgecdeac anemmede. ¹² Imocac ngeni oyonga mi ambisia. Ngicngac negen negensing seriangoc modzotitia kpac mekecdae, yeni maridzomingngina Anutungo warac deyemmeec, imoc megecde, ngeni ifi amma yeneac siric modacbsia.

¹³ Anutungo Abarahanggoc yoac dedzege anec. Amma wiac ngade miudeac deseribeso amma yeac kunenga mong mi kefecac ye yengenaac kpacfungoc kpacma yofi dema deseriec,

¹⁴ “Foracngoc, ni kenecgubade nga fingecsahega sahebesande.” (*Fingec fingec 22:16-17*) *

¹⁵ Anu Abarahang ye naso hereangoc tomai kefec. Amma ueba kuha mi mamanu Anutungo wiac miudeac deec, imocac fora fingeru henec.

¹⁶ Nga ngicngac yeni yoacngina meserigecdeac kunengngina kpacma yoacngina deseriandae. Yeni ifi anggecdeu deengdema fakangina wisickedarude. ¹⁷ Anu Anutungo ifingoc yoara deseriec. Nga Abrahanggac bangecfora yenearu yoara monde monde mi anec, yeni imoc negemma dzadzahac kuha momoc negentegecyombonggegecdeac ifi deec. ¹⁸ Ye ifi dema yoac seria yohockang meficgenemee. Yoac yohockang ifi feecac yoara ikoc naric mi anude.[†] Fakaya ifia negenni imocngo ebiriangoc meserinunuu bangecac wiac naric wama wiac ngade menideac deec, imoc seria mekecnide. ¹⁹ Nga Anutungo wiac menideac denemmeec, yoac imocngo ubaonganinaac angka isoc angande. Imocngo yeac womongtoau emma kpoructoa ferecgema kpetiac nga kpetiac yombonggac manau seria fede. ²⁰ Anu Yesungo nenanggac amma imocac manau

* ^{6:14:} Anutungo Abrahanggoc dzadzahac meec, imoc yomohai oho ohoya fede, Fingec fingec 12:1-3; 13:14-18; 15:1-21; 17:1-27; 18:1-15; 22:1-18. † ^{6:18:} Fingec fingec 12:7; 13:15; 15:1-21, imohai Anutungo Abrahanggoc yoac dedzege anoc. Amma Fingec fingec 22:16-17 imohai ye yoara deseriec. Imocac yoac seria yohockang oho ohoya fede.

warainemmemma enec. Ye womong garengtoa wisic wisickea kpac kecengkefudeac emma Merikisedengo kefec isoc kefude.

7

¹ Merikisede ye Sareng taonggac ngictau amma Anutu engenatoa yeac womong gareng kefec. Nga Abarahang ye ngictau yenigoc ewema kpebucyuncfunac dzigenema hamanu yeng sinnu ye meficgema keneheec. ² Keneheu Abarahangngo iwaiya sasawa dzikacfunac meecmoc, ihacnac tennunac mocgu hendzicma Merikisede miec. Nga Merikisede yeac kpara titiha imoc, “Dindingac kekecac ngictau.” amma monggoc “Sarenggac ngictau.” imocac titiha “Ruaeac ngictau.”

³ Amma ye nonggomama nga esangabofora yeneac kpacarengngina mong mi oho ohoya. Nga ye fingec fingecnasoya kpac amma homec nasoya ifingoc kpac, ye Anutuac Medac siric isocngoc amma womong gareng nasosoc kecengkefude. ⁴ Anu dzite hania bangecnina Abarahangngo wiara dzikacfunac meec, imoc hendzicma teng imohacnac mocgu miec. Imocac ngeni hentegecbisia Merikisede ye ngic engenatoa.

⁵ Nga Rewiac bangecfora yeneng womong gareng ua mekecgecdeac uayoac megec, yeni ngicngac yeneearunac tennunac mocgu imocmekpedzuc ambisia, dedeseringo ifi dede. Nga ngicngac imoc yeni Abarahanggac bangecfora nga sanctosofocngina kecma sifu yeneearunac tennunac mocgu mekecgec. ⁶ Anu Merikisede ye yeneac arenunac mi fingerec, kpac. Amma ye sifu Abarahanggarunac tennunac mocgu mema ngic Anutuac dzadzahac mekefec, yenoc keneheec. ⁷ Nga ngic merang kenec miec, yeac kpacngo kenec meec, yeac ferahede. Mongngo yoac imoc naric mi kpeude.

⁸ Anu mong yofi, womong gareng homec bageau kecdae, yeneng tennunac mocgu kpedzucnema mekecdae. Nga Abrahangngo tennunac mocgu Merikisede miu meec, yeng ine kecdengoc, dedekperagi ifi nemmegec. ⁹ Amma yoac yofi naric denide, Rewi ye tennunac mocgu memeac ngic nga Merikisedengo Abarahanggarunac tennunac mocgu bic meec, imoc Rewiarunac meecac amma Rewi yengenaoc tennunac mocgu ifingoc faiec. ¹⁰ Merikisedengo Abarahanggoc sinnu ewaroc, naso imohai Rewi ye bangehaac hereu bic tarecac amma Abarahangngo Merikisede wiac miec, imoc Rewingo ifingoc miec ande.

¹¹ Nga Isirae ngicngac yeneng dedeseriyoac megec, imohai yofi feec, Rewiac areng yeni womong gareng ua mebisia. Nga yeneng womong gareng ua megec wiac hafoangoc ngereebac dede Anutungo womong gareng monggoc fingerudeac mong mi debac. Nga yofi fingecbeso, womong gareng ngic mong Merikisede yeng kefec, siriha ifia fingecbeso amma ye Aronggac arenunac fingecbac imocngo mi ngereebac. ¹² Nga womong garenggac ua areng gboria fingerudeu dedeseriyoacac areng gboria ifingoc fingecbeso, sing mong mi fede. ¹³ Amma womong gareng imoc ine kisic mong yeneearunac nga yeac kisicfunac mongngo arata henggareng mong mi angkfec. ¹⁴ Kebuninango Yuda kisic yeneearunac fingerec, imoc negendimbe. Nga Yudaac areng, yeneearunac mongngo womong gareng anude, imocac Mosengo mong mi deec, kpac.

¹⁵ Anu Kebuninango Yuda kisicfunac fingecma Merikisedengo womong gareng kefec, ifi isoc womong gareng anec, imocngo monggoc dekperagi Rewi arenggac womong-gareng ua soha mi anec. ¹⁶ Womong garengtoa ye sac areng mocguac manau modacma fingecbeso, dedeseringo imoc dede. Nga Kebunina ine kekec dzonggo dzonggoa kpac imocac kucfu womong garengtoa anec. ¹⁷ Yeac negemma dedekperagi yoac yofi fede, “Geng Merikisedeac siricfu womonggareng wisic wisickea kpac kecengkecnade.” (*Mitiyegec 110:4*)

¹⁸ Dedeseriyoac kucmama nga memefiha kpac warac hau yoac imocngo faka warac feec, imoc meickeu kpac andarec. ¹⁹ Dedeseriyoacngo memengerec ua hafoa mong mi meec, kpac. Nga Anutungo yofinenggac sing mong mesarinemmee, imocngo warac sing feec, imoc ferahede. Nga nenang sing imoc modacma Anutuac hoannu kengkecnide.

²⁰ Anutungo yoara meserima Yesungo womonggareng anudeac deseriec. ²¹ Womong gareng Rewiac arenunac yeneac demeseriyoac ifia mong mi feec. Ye imoc Yesuaru faima yofi edeec,

“Kebungo yoara meserima yofi deec, ‘Ge womong gareng wisic wisickea kpac kecengkec-nade.’ ye yoara ifi meserima naric mi waude.”

²² Anutungo Yesuac ifi meseriec, imocac amma Yesungo dzadzahac gboria imocac nonggo tarec. Ifi taru dzadzahac gboriango eseaac kuc feraheude.

²³ Womong gareng Rewiac arenunac yeni ngic homac. Nga homebesandaengo ua imoc mekecgecdeac homecngo womonggareng ua imocac kpae anec. Imocac amma mong homeu mongngo torokpeu torokpe meerekecma womong gareng ua megec amma yaguc meandae. ²⁴ Nga Yesungo ine wisic wisickea kpac kecengkefude, imocac womong gareng ua yegoc wisic wisickea kpac amma feeng kecbesande. ²⁵ Ye nasosoc Anutuaru kennide, nenang hafoangoc mengerenunuudeac mi obohoude.

²⁶ Anu womong garengtoa yennoc naric meficnunuude. Ye kpetiac nga kopocsiha kpac, kongaha amma wononga kpac. Anutungo ye ngic kopocsicmeme yeneac botucfunac meickeu ye kurumeng sasawa fekende, imoc feracyunuma wi kecde. ²⁷ Nga womong garengtoa Rewiac arennu yeni wenacsoc yenang kopocsicac sese faimaguc ngicngac yeneac kopocsicac ngade faikecdae. Nga Yesungo faka imocac bageau mi kefec, kpac. Ye ine sese dema yengena faimeec nga yeng imoc naso mocgusac meu soha anec. ²⁸ Foracngoc, dedeseringo ngic kucmamacgoc uayoac deyemmeu womong garengtoa angkecdae. Nga demeseriyoacgoc fingerec, imocnggo Medac uayoac demiu yeng tatac mema kucmamea kpac nga hafoangoc gombunga wisic wisickea kpac feengkefude.

8

¹ Imocac amma yofi feder, womong garengtoaninango kurumenggac ngictautatac, imocac foiau tataha mema tacde. ² Amma ye Anutuaru womong yeac kporuc bedzo fora kurumennu nande, ihai kingangkpekpe ua mema kecde. Kporuc bedzo imoc ngicngi mi memea, kpac. Anutu yengenaoc imoc mema faiec.

³ Anutungo womong garengtoa uayoac deyemmeu yeni ubangerec nga kopocsicac sesegerecngina faikecdae. Imocac amma Yesungo ifingoc sese mong faibeso. ⁴ Womong gareng yeni dedeseriyoac modacma Anutu sese heiheimiac ua imoc bic mekecdae, imocac ye engngoc bangecfu kecbacfu womong gareng naric mi ambac. ⁵ Mosengo kporuc bedzo mema miabeso anu Anutungo goroyoac dema yofi edeec,

“Ni tikiu onga edzacguai, ge siriha imoc yombong modacma wiac sasawa medacnadeac henghomema mebesena.” *(Makekeng 25:40)*

Nga ngic yaguc womonnu ua meandae, yeni Mose isoc kurumenggac onga modacma uangina mekecdae.

⁶ Yesu ye dzadzahac gboriaac ngicbotuc, dzadzahac imoc dedzege yoac kuha monggoc mekecde, nocac dzadzahac gboriaac dedeseriyoacnggo eseaac feraheude. Amma yeac womong gareng ua, imocnggo bangecac womong gareng ua siriha ifi isoc ifingoc feraheude. ⁷ Dzadzahac esea ebiha kpac ambac dede dzadzahac gboria monggo tataha naric mi mebac. ⁸ Nga Kebu Anutungo ine ngicngacfora yenenu kopocsicnginagoc anggecac yofi deec,

“Kecma naso mong haude, imohai ni Israe nga Yuda areng yenigoc dzadzahac gboria mong mebade. ⁹ Dzadzahac imoc warac bangecfocngina yenigoc meai, imocfia isoc kpac. Naso imohai neng maringinau mema Aigita bangecfunac hesicyunu hayai. Yeni dzadzahac meai, imoc wama imocgoc mi kecgecak ni ifingoc wayunuma yohoc bahoc ayemmeai.”

Ye ifi dema monggoc torokpeec,

¹⁰ “Ni ngadeu dzadzahac gboria Israe areng yenigoc mebade, imocac siriha yofi, dedeseriyoacna ngicngac yeneac negennu faima kibia imoc herenginai

yombong ohobade. Amma neng Anutungina kecba yeneng ngicngacfocna kecgecde. ¹¹ Nga imohai monggo Israe ogea me munea mong edekpou ammima yofi mi deude, ‘Ge Kebu negemmina.’ Nocac ngicngac kapiaunac erema kunengtoau wisickeude, yeni sasawango negennugecde. ¹² Ni wosoefac ayemmeba sing segema me kopocsic meficgeandae, imoc sasawa wama monggoc mi negensibade.” *(Yeremaia 31:31-34)*

¹³ Ye dzadzahac gboria monggac deec, imohai dzadzahac warac meec, imocnggo esa anec, ifi dekperagiec. Nga wiac mong bic wawayesa ande, imocnggo naso kapiianecsac fema kpac anude.

9

¹ Dzadzahac waraima haec, imocac fakaya nga singyoara feec. Nga kpetiac amaya yei bangecfu feecngoc. ² Anu kporuc bedzo mana warac warac feec, imocac kpara Mana kpetiac. Nga mana warac warac imohai kifa nananga amma tebo ic sogongagoc nanoc. ³ Nga kporuc monggac ngadea imohai kporuc bedzoac mana mong feec, kpara Mana kpetiac nga kpetiac yombong. ⁴ Imohai hosuc homuna gombunga oho ohoac arata golngo memea nga dzadzahacac katapa taroc. Dzadzahacac katapa imoc golngo faimamekatahedacgec nga imocac manau enang golngo memea mannayakagoc* faigec tarec. Aronggac yasu sera kpekpea nga dzadzahacac tafe ihai ifingoc faigec feec. ⁵ Katapa imocac witiau kerobing kibikperagingiragoc yohockang kpegangngirango tapeau hedzic hedzic ammima semeec feec. Antungo ihainoc kopocsicnginaac turung kpoukpou ua mekefec. Nga imocac hania sasawa yofinenggac mi debade.

⁶ Yeni kporuc bedzo siriha ifi mekecgec womong gareng yeni ama mana warac warac imohai emma uangina mekecdae.[†] ⁷ Nga womong garengtoangosac ama mana mong imohai kifasoc atac mocgu engande. Amma ye eng naric mi engande, kpac. Ye sac mema emma yengena kopocsic nga ngicngac yeni kopocsic hania kpacfu eng sicsauc megec, imocac amma sese faiudeac meengkecde. ⁸ Nga Tiri Asungo yofi edzacnunude, Kporuc bedzoac kuha femanu mana kpetiac nga kpetiac yombong ngicngac ihai enggecdeac singa mong mi fingectegerude. ⁹ Ngicngac yofinenggac kecdae, yeni imocac ongea isoc ande. Yeni Anutuac womonnu yeac ubangerec nga kopocsicac sesegerec meemma faiimiandae nga imocnggo ine yeneac herenegen negengngina hafoangoc naric mi dzuacyemmeude. ¹⁰ Nga ua imocac nenedoku nene nga dzuac dzuacac faka hania hania imoc sebiu uasac meandae. Anutungo singyoac imoc yemmeu, yeni imoc modacma kecmagec nadung gboria monggac nasoya haude.

¹¹ Anu Kristongo bic hama wiac sasawa gombunga yei fede, imocac womong garengtoa anec. Ifi amma kporuc bedzo mong gombunga yombong maringo mi memea amma bangecfunac wiac monggo mi memea, imoc nande, imoc kuneng nga hafoangoc gombunga amma esa feraheyombonggede. ¹² Kristo ye noning ngiwa me burumaka medahaac sac mema mi enec, kpac. Ye yengena sacngo naso mocgusac sese mema mana kpetiac nga kpetiac yombong, imohai enec. Emma yengena sacngo bunnina meec, imocnggo fefeseri fekecbesande. ¹³ Ngicngac yeneng Anutuac kicfu wonongnginagoc anggec womong gareng yeneng noning me burumaka ngiwa yeneac sac nga burumaka ngagera medac mi memea gerecnggo dzeu hama ande, hamaya imoc mema ngicngac wonongnginagoc yenearu kpegiandae. Kpegec wisickeu ngicngac yeni Anutuac kicfu sebiugeng kpetiac anggecde. Imocac amma yofi negembisia, ¹⁴ Kristongo kekecseriac Asugoc namma yengena soronga amma kekeha Anutuaru faiemeec. Yeac sacngo yangburumaka sacngina homac ferahede. Imocnggo herenegen negennina dzuacdaru angammemenina kpakparoha kpac anu Anutu kekehagoc kingang kpeminide.

* 9:4: Anutungo bangec kisiu mannayaka Israe ngicngac engsac yemmeu yeni imoc asoacsoc sobing isoc bangecfunac kpedzucnekecgec. Manna imoc hebiraio yoac amma titiha yofi, “Noc wiac?” † 9:6: Naso imohai Anutuac womong Herodengo meec imoc nanec. Kporuc bedzo nga Anutuac womong imocac hania “Yoac goaac dedekperagi” hafac 1126 imohai henggec.

¹⁵ Kristo ye yengena kekeha faiemema dzadzahac gboriaac ngicbotuc anec. Nenang dzadzahac esea imocac dedeseriyoac kpeing. Kpeni yeng homema bunnina mema dzadzahac esea imocac bageaunac menunuec. Anutungo ngicngac kpacnunukecde, nenang kekeceriac maridzoming menideac Kristongo ifi anec. ¹⁶ Maridzominggac kibi mong fedeu yofi ambesonga, minginango homeudeu, imoc dekperagibesonga. ¹⁷ Mingina gbori kecmanungoc maridzoming kibi imoc ohogec eng feude. Minginango homeude, imohai maridzominggac kibi seriude.

¹⁸ Imocac amma dzadzahac esea imoc sacngo meserigec. ¹⁹ Nga Mosengo dedeseriyoac sasawa ngicngac edederecge ayemmedaru wisickeu burumaka nga noning ngiwa sacngina mema dokugoc yerecgema ramadzoea sacsac nga babacmeac mema sacfu nemuruckema imocngko kibi kpouya amma ngicngac sasawa witinginai kpegiu nadzicyemmemec. ²⁰ Nadzicyemmemec yofi edeyunuec,

“Sac yomoc, imoc dzadzahacac sac. Anu ngeni dzadzahac manau kecgecdeac Anutungo edengunuec.” *(Makekeng 24:8)*

²¹ Anu Mosengo kporuc bedzo witiau nga manau amma sesegerec faifaiac wiac hania hania tarec, imoc ifingoc sacngo kpegiu sasawa nadzicmidarec. ²² Ifi anu dedeseri fakau sacngo wiac meu kpetiac anude nga sac mong mi kpakeudeu kopocsic wawa mong mi fingerude.

²³ Bangecfu kporuc bedzoac wiac feder, imocngko womong kurumennu feder, imocac ongea ande. Nga imocngko Anutuac kicfu kpetiac anudeac sacngo dzuacgec. Nga wiac fora kurumennu feder, imoc kpetiac anudeac sac gombunga nga engena yombongngofeder. ²⁴ Kristongo ama kpetiac maringo memea amma wiac fora feder imocac ongea ande, amma imohai mi enec, kpac. Yeng nenanggac amma Anutuac kicfu nanudeac kurumeng forau enec. ²⁵ Amma womong garengtoa ye kifasoc yangsawa mema mana kpetiac nga kpetiac yombong, imohai engande. Nga ye angande, Kristongo ifi isoc mi angande. Ye naso homac sese meemeudeac mi engkecde.

²⁶ Kristongo ifi kecbac dede ye bangec nga kurumeng hanac hanaheunaengoc naso homac kpendzeng kpeerekebacfu imoc naric mi wabac. Nga ye ifi mi anec, kpac. Ye naso wisickebeso ammanu bangectoa bangecfu naso mocgusac fingecma ngicngac kopocsicnina meickeudeac Anutuaru yengena sebia desima faiu sese uaya medarec. ²⁷ Anu ngicngac sasawa naso mocgusac homenideac dedea nga ngadeau kecma yoacfurnambesonga. ²⁸ Ifi isocngoc Kristongo naso mocgusac ngicngac sasawa nenanggac kopocsic tofohodarudeac amma sesenina anec. Amma ngade haude, imohai kopocsic tofohoudeac mi haude. Naso imohai Kristongo ngicngac yeac tomai kecdae, yenearu fingecma mengereyunuu komoc kpegecde.

10

¹ Wiac gombunga ngade haude, Moseac dedeseriyoac imoc wiac imocac ongea, imocngko wiac fora mi ande. Ifi anu ngic yeni kifaya kifaya Anutu afehegecdeac yeac hoannu hama sesengina siriha mocgusac faiandae nga imocngko ine dedeseriyoacac kucfu hafoangoc naric mi mengereyunuu. ² Dedeseringo hafoangoc mengereyunubacfu yeneac sese faifai imoc bic kpac ambac. Amma kopocsicngina bic kpac anu yeni herenegen negengngina kpetiac kecma kopocsicnginaac gamegoc monggoc mi kecbau. ³⁻⁴ Imoc yofi, burumaka ngiwa nga noning ngiwaac sawango kopocsic meickeudeacsoc mi ande, kpac yombong. Imocac amma sesegerec faifaiac faka imocngko kifasoc kopocsicngina heigboriyemmekedenc. ⁵ Anu Kristongo bangectoa bangecfu mama imocac negensima Anutu yofi edeec,

“Ge ubangerec nga kopocsicac sesegerec hania hania, imocac mi anggengkefec. Nga geng ine bangecsebi mong mengerema nenne. ⁶ Anu Ngicngac yeneng ramaburumaka hafoangoc kopocsicnginaac amma gerecfu faigec dzeande, imocngko songo mi meficgegenude, kpac. ⁷ Ifi anu deai, ‘Anutu, negenna, geac songo

modacbadeac hayai nga kibi kpoukpouac manau neac yoac oho ohoya fede.' " *(Mitiyegec 40:6-8 Septuagintaunac)*

⁸ Sesegerec sasawa imoc dedeseriyoac modacma faiandae nga Kebungo ine yoac yofi deec, "Ubangerec nga kopocsicac sesegerec hania hania nga ramaburumaka hafoangoc kopocsicngina amma gerecfu dzeande, imocac mi anggenude nga imocngō songo mi meficgegenude." ⁹ Ifi dema yofi deec, "Negenna, geac songo modacbadeac hayai." Ifi dema yeng sing gboria meseriudeac sing esea imoc meickeec. ¹⁰ Yesu Kristongo nenanggac negemma songo imoc modacma sebiamekemma naso mocgusac sese faiu sing imohai kpetiac aning kecdimbe. ¹¹ Womong gareng yeni wenacsoc namma womong gareng uangina mekecdae amma yeni sesegerec siriha mockicngoc nasoya nasoya mekecdae, imocngō ine ngicngac kopocsicngina meickeudeacsoc mi ande. ¹² Nga Kristongo kopocsic meickeudeac sese mocgusac kuha wisic wisickeak pac, imoc faima Anutuac foiau tataha mema tacde. ¹³ Nga Anutungo ngabafora yeac hania bageu hanititi siricfu faiyunuude, ye imocac tomai tacde. ¹⁴ Yeng sese mocgusac faima ngicngac hafoangoc mengereyunuu yeni wisic wisickeak pac kpetiac kechereema kecbesandae.

¹⁵ Anu Tiri Asungo ifingoc hepuc amma yofi edenunuec,
¹⁶ "Kebungo yofi dede, 'Ni ngadeguc dzadzahac gboria yenigoc mebade, imocac siriha yofi, dedeseriyoacna ngicngac yeneac negen negennu faima kibia imoc hereng-inau ohobade. ¹⁷ Amma kopocsicngina nga singyoac kpekpengina imoc sasawa wama monggoc mi negensibade.' " *(Yeremaia 31:33-34)*

¹⁸ Nga Kebungo kopocsicnina wau pac anecac kopocsic meic meickeac seseac ua monggoc mi mebesonga.

¹⁹⁻²⁰ Negen negensinggoc tosofocnina, Yesu yengena sawaac kucfu nenang kengeha kpac kecma kporucnagu ferahemma mana kpetiac nga kpetiacfu naric ennide. Yeng sing gboria nga kekehagoc witinemmeec nga kporucfusing kennideac yengena sebingo sing imocnoc menemmeec. ²¹ Womong gareng engenatoaninango Anutuac arengfora garennumuna kecde. ²² Nga nenang hanahema herenegen negennina gameagoc nga mi ngereeande, yeng imoc dzuaru kongaha fede nga sebinina doku kongahango dzuaru kongac kpeing. Imocac amma nenang ubaherenina fora imocgoc kekecnina isinggey-ombonggema ye hafoangoc negensinggema Anutuac hoannu kembisina. ²³ Kebu marid-zoming nemmeudeac yoac deseriec, yeng dedea modarude. Nga imoc nenanggaru fingerudeac negensegec amma kecma deficgekecbisina. ²⁴ Amma songo nga angammeme gombunga botucninau feudeac nenang henggareng angemema meseriemekecbisina. ²⁵ Ngicngac goa yeni kpekpeturannina waandae, imoc mi ngereede. Nasotoa wegenede, ngeni imoc bic negendaeac meseriemekecbisnia.

²⁶ Nenang yoac foraac negen negeng mema negentegecmaguc kopocsic faka arenggema mekecnideu ine kopocsicninaac amma monggoc sese mong mi feude.

²⁷ Ebictoaninagoc kecni ising ising nasou gerecoa mongngo nonohoma memangane-nunuudeac tomainina feude.

²⁸ Ngic mongngo Moseac dedeseriyoac kpeu ngic yohockang me harebec yeneng imoc hemma yoara wama yoacfу faigecdeu, ye ubamanganga pac kpebucgegecdeac areng anude. ²⁹ Anu dzadzahacac sacngō ngic mong bic dzuarec, yeng ngade sac imoc ongea kpac dema Anutuac Medac witiau goteng tima Danggunucac Asu demanganeudeu, yearu turunga noc efea fingecmiude, imoc bic negendae. ³⁰ Nga

"Kopocsic turung kpoukpou imoc neac uanoc nga ni ngicngac kopocsicnginaac turung kpouyemmebade." *(Dedeseri 32:35)*

Kebungo yoac imoc deec, ye negendimbe. Ye monggoc yofi deec,
"KEBUNGO ngicngacfora isingyunuma yoacngina deude." *(Dedeseri 32:36; Mitiyegec 135:14)*

³¹ Anutu kekehagocac mariu embesonga, imoc ebihagoc nga kpenzengagoc yombong.

³² Ngeni hanahema Kebuac kperagia megec, naso imohai siduc gombunggac amma uatoa mema kpenzeng kpegec, imoc mi nigeckngunubeso. ³³ Amma ngic yeneng naso

goau ngicngac yeneac kicfu faingunuma gamekpekpe nga defagoc amma ngunukporac angemmec. Nga naso goau ngaba yeneng ngeneac tosofocngina ifi ayemmegec ngeni ogo angemmema yenigoc nanggoc. ³⁴ Ngeni witicngic yenigoc ngenahafoc kpendzeng kpegec nga ngic yeneng goa ngenearunac witicamau faiyunugec nga ngaba yeneng goa ngenearunac hamangec faka angemmema hiedzongina megec. Ifi anggec ngeni ine sogaima yofi negenggec, hiedzonina feengkefude imocngo banectoa bangecac hiedzo ferahedadce. ³⁵ Imocac ngeni kengeha kpac kecbisia. Kecma faka imocac buma kuneng meficgegecde. ³⁶ Ngeni modzotitia kpac kecgec, imoc ngereeude. Imocng meficngunuun ngeni Anutuac enac tofoc tofoho amma maridzomingngina deec, imoc megecde.

³⁷ Anu naso wegenanec fede, imoc wisickeu,
“Ngic haudeac dedea, ye naso mong mi ukuma haude. ³⁸ Ngicngacfocna dindingac kecdae, ngeni negen negensinggoc kecheregegecde. Nga ngenearunac mongngo wanuma kenudeu neng ine yeac negemba ubaherenango mi ngereede.” (*Habakuc 2:3-4*)

³⁹ Nenang ine ye ngadehema hofeac sing modacma kemenide, imocac areng kpac. Negen negensinggoc kecma firang amma ubaonganinagoc kekecseriu ennide.

11

¹ Wiac mong fingecnemmeudeac seriangoc negensima kecdimbe, imoc kicng mi hemma sifu negenni fora ande, fakanina imocac kpara negen negensing. ² Ngicngac bicngoc kecgec yeni negen negensingnginagoc kecgec ac amma Anutungo hepuc ayem-mema yoac nga fakangina deseriec. ³ Wiac kicngo hengandimbe, imoc wiac hehenaunac mi fingerec. Anutungo yoac deu kurumenga kurumenga nga banectoa bangec fekende, yeng imoc meficgedaru fingerec, imoc negen negensinggoc kecma negentegegecnide.

⁴ Abengo negen negensingagoc kecma Anutuac sesegerec faiec, imocng Kainggac sese feraheec. Ferahau Anutungo yeac sesegerec hemma negenu ngereeu ngic dindingac demiec. Abe ye bic homeec, amma sifu negen negensingau yoara dekecdengoc. ⁵ Enoko ye negen negensinggac amma homec mong mi fingecmiu henec. Nga Anutungo ye engsac meickeu enec. Ye mi emmanu Anutungo yeac yofi demiec, “Ni geac negemba ngereede.” Ifi dema Anutungo ye meickeu ngicngac yeneng hofocma monggoc mi meficgegec.

⁶ Anu ngic mongngo Anutuac hoannu kembeso negende, ye yofi negensinggema kecbeso, Anutu ye kecdenoc nga ngicngac ye kpachofoc angandae, yeni turunga gombunga yemmeude. Nga mong ye negen negensinga kpac kecande, Anutungo yeac negenu naric mi anude, imoc kpac yombong. ⁷ Ngicngac yeni dokutoa haudeac ebic mi hemmagec Anutungo Noa goroyoac edeu yeng yoara negensinggema eweheimima wagetoa mong meec. Ifi mema yengena arengfora ebicfunac onggongyunuec. Yeac negen negensingngi banectoa bangecac faka mangana mekperagiu Anutuac yoacf kenggec. Yeng ine negen negensingaac amma ngic dindingac maridzoming meec.

⁸ Anutungo Abrahang kparu yeng yoara negensinggema imoc modacma bangeha wama bangec dahai kenudeac obohoec. Nga bangec Anutungo miudeac deec, imocng maridzominga anec. ⁹ Anutungo bangec miudeac dedzege ammiec, ye ihai kemma kuric isoc kefec. Kecma Anutuac yoac negensinggema kporucbedzoya faiu nanu Isaka nga Yakobo ihai yerigoc kecgec. Yereng Abrahanggoc bangecac dzadzahac imoc mekecgec imocng maridzomingngina anec.* ¹⁰ Anutu yengenaoc taong wotungseriagoc warac arenggema meficgeec nga Abarahang ye kuric kecmanu imocac tomai kefec. ¹¹ Anu Sara ye sabacmembe nasoya kpac anec. Nga ye Anutuac yoac negensinggema kefecac heregoc amma medac kpenanggema meec. Anutungo dzadzahac yoac dema imoc modarudenoc, ye ifi negensiec. ¹² Imocac amma ngic sabac meficmeficgeacsoc kpac, yearunac bangefora homac sahema fingecgec sawaac asomeng nga kondung tegiau sangi isoc anggec nga ngicngko kpetengina oso osoacsoc mi ande.

* ^{11:9:} Imocac hania Fingec fingec 15:1-21 fede.

¹³ Yenennoc Anutuac yoac negensinggema homegec. Nga Anutungo bangec yomohai bangecngina deec, imoc mong mi meficgeyemmeec. Yeni ine wiac hereaungoc feu kpedzima hemma yofi deficgegec,

“Neni bangecfu kuric amma naso wegenanecsac yei kecdimbe.” *(Fingec fingec 23:4; 1 Ngictau siduc 29:15)*

¹⁴ Anu ngicngac yoac siriha ifia deandae, yeni yenang bangec yombong meficgegecdeac hofoc hofoc ua mema kecma deficgedae. ¹⁵ Amma yeni bangecngina warac kecma wagec, imoc negensibau dede yeni naric monggoc dzigenebau. ¹⁶ Nga bangec mongngo esea ferahede kpara kurumeng, yeni bangec imocac ayemmeec. Imocac amma “Anutu ye Anutunina.” yeni ifi degec, ye game mi kpekecde, nocac yeng yeneac negemma taong mong bic mengereec.

¹⁷⁻¹⁸ Anutungo Abrahang faitobannu faiu, yeng yoara negensinggema medaha faiu sesegereha ambeso anec. Nga Anutungo medac yeac warac yofi deec,

“Isakaarusing bangefcogga fingecsahe anggecde.” *(Fingec fingec 21:12)*

Medaha mocgu imocnoc ye dzadzahacac areng kefec ye sifu mema sesegereha anudeac deec. ¹⁹ Nga ye yofi negensima kefec, “Anutungo ye homecfunac ifingoc naric megboriude.” Imocac yoac yofi heima dedimbe, “Anutungo Isaka homecfunac meec.”

²⁰ Isakango dzadzahacac yoac negensinggema wiac ngade fingerude, imoc negensima Yakobo nga Esau kenecyuruec. ²¹ Nga Yakobo ye Anutu negensinggema kefecac homebesonga amma yeac kpacfu Yosefeac medachora tembac tembac kenecyuruec. Kenecyuruma yasuya susiau merandzima ngonduncnema Anutu numumima dengereec. ²² Yosefe ye Anutuac kuc negensima dzadzahac yoara negensinggema Israe areng Aigita bangecfunac dzigenegecdeac kpefing deec. Amma yengena sicmekenggecdeac negensima derecgeyemmeec.

²³ Mose fingerec, naso imohai medac fingecgec yunuhomebesonga, ngictauac dede ifi feec. Anu yeac nonggomama yeri siriha gombunga hemma kengec mi amma ngictauac dedeseri kpema Anutu negensinggema afo harebec medacngira mesufuec feec. ²⁴ Nga Mosengo negen negensinggoc kecma yadiu Faraoac naroanggac medac, yeac ifi degecdeac waec. ²⁵ Ye kopocsicac ubangerec hania hania negemma naso wegenanec kefudeac mi ammiec. Ye ine Anutuac ngicngac yenigoc ebic tofohoma kefudeac negenu ngereec. ²⁶ Amma ye Aigita bangecac dzofinac imocac negenu mamea anec. Kristoac amma game meudeac negenu engena anec, imocngo Aigitaac dzofinac ferahede. Ye imoc negensima Anutuarunac bung meudeac kic fier. ²⁷ Ye Anutuac yoac negensinggema Aigita bangecac ngictauac kengec mong mi kpeu Aigita bangec waec. Ye Anutu mi hengena, ye kicngo mi henec nga henec isoc kpendzeng kpekecma ubea mi maec. ²⁸ Ngic kpekpe angerongo morocmedacfocngina yunuhomebacac yeng Anutu negensinggema makekenggac ramamedaha kpehou amma sawango nagunginasoc hosoe. ²⁹ Nga Israe ngicngac yeni negen negensinggoc kecma kondung sacsac imohacsing ferecgema bangec kerengaiu kenggec. Kemmagec Aigita areng yeneng ifingoc ferecgeni dema doku nema homedacgec.

³⁰ Israe yeneng Anutuac yoac negensinggema Yerikoac odatao hocngi memea, imoc yerecgegec uameme 7 ammanu barackema madarec. ³¹ Ngic yohockang yeri Yeriko sufufu hengkperecge ambesonga kenec singtoangac Rahabango Anutu negensinggecdeac raeaegoc heitaiyuruec. Imocac amma ye negen negensinggina kpac yenigoc managanema mi kpac anec.

³² Nga ni Gideong nga Baraki amma Simsong nga Yefita amma Dawidi nga Samue amma profete sasawa, yeneac siduc ifingoc naric debai nga nasona mong mi fede. ³³ Yeni negen negensinggoc kecgecac dzikacfu ngictau siduc homac yeneac wasaingic memayunuma ngictaufocngina anggec amma raiong enacngina medzickegec. Nga singyoac feec imoc garenggema Anutungo wiac deseriec imoc megec. ³⁴ Yeni gerecyada kucngina meno manegec. Nga ngabafocngina yeneng wasaibeangngi yunuhomebeso anggec woragec. Yeni kucmama kecgec Anutungo kuc yemmeec. Yeni dzikac kucgoc kpema kuric

wasaingic homac kporacyunugec. ³⁵ Ngac goa yeni negensinggema kecgec Anutungo arengfocngina homecfunac megboriyunuma yenearu monggoc faiyunuec.

Ngictau goa yeni profete dzikacngo yunuma medzoicyunuma Anutuac yoac wagecdeac degec. Nga profete yeni ine homecfunac yacyac, imocac kekec gombung negensima ngictau yeneac yoac wama witicamaunac mi woragec. ³⁶ Nga goa yeni ngickicfu deendema amma defagoc ayemmemma dzikacngo yunugec. Amma goa monggoc sengngo witicyunuma witicamau faiyunugec. ³⁷ Anu goa hocngo yeneregec nga goa segengo sebingina merecgegec nga goa wasai beangngko kpebucyunugec. Nga goa yeni wambahinga kpac anu rama nga noning sebera heima kengkecma sebiac wiacak obohokecgec. Ifi anggec ngicngac yeneng yunugec ebic witiau kecgec. ³⁸ Kecma yeni bangec kisiu nga bangec sifehau amma kedzebeu me bangec singau yerecgema kecgec. Yeneng gombungngina mehama ngicngac amabangeengina botucfu kecgecdeac sing mong mi feec. Ngicngac kopocsicnginango sing imoc hedzickeec.

³⁹ Nga ngicngac imoc yeni negen negensinggoc kecgecac Anutungo yenenu ngereec. Amma yeni wiac megecdeac dzadzahac yoac dedea, imoc bangecfu kecma mong mi megec. ⁴⁰ Anutungo nenannu wiac engena faiudeac negenec. Nga yeni nenanggoc hafoangoc mengereyunuudeac imoc negensiec.

12

¹ Ngicngac siducngina arenggema ohoduae, yeni hoeng isoc yerecnunuma boifocnina amma kecdae. Imocac amma wiac sasawa meeblirinunuande, imoc meickedacbisa. Nga kopocsicngi mendannunuyombonggema witicnunukede, imoc herecgdedacma sing edzac edzacnunuya fede, imoc seserigoc modacma nedzima kembisina. ² Kemma kicnina Yesuaru fikecbisina. Yeng negen negensinnina hafoangoc mengerema kefude nga yennoc ua imocac hania. Ye sogac sogai ngade haude, imoc negensima mariponggac kpendzennu emma game kpekpe bageau kekec, imoc tofohoma wiac efea negenec. Ifi amma Anutuac tatacac foiau emma yaguc tacdenoc. ³ Nga ngeni kucmama amma ubangina mabacac yeac negensima kecbisia. Yeng waraima kpendzeng kpemanu kopocsicmeme yeneng yeac deendema ammigec.

⁴ Anu ngeni ine kopocsic tidzamegecdeac eweyombonggegec amma sac hetic hettinggeaac nadunnu mi emma kecdae. ⁵ Nga Kebungo medacfora meseringunuudeac yofi edengunude, ngeni imoc naric mi nigecngunubeso.

“Medacna, Kebungo gumeting anggenu ge imoc mi ngadehebesena nga yeng yoac seria deu ubaga mi mabeso. ⁶ KEBUNGO medac mong songogoc hoanggekecde, ye metinggeude nga medaha songo negemmide, ye kpemeting ammiude.” *(Yoac negen negengagoc 3:11-12)*

⁷ Ngeni Anutuac medacfora. Nga manggac sasawango medacfocngina metingyunuan-dae, ifi isocngoc Anutungo kpendzennu faingunuma mengerengunuude. ⁸ Nga yeng medacfora sasawa fakanginaac memengere ua mema ngeni ifi mi angemmeudeu yeac nambaracfora yombong mi anggecde amma ngeni hamangefunac fingecgec isoc anude.

⁹ Amma bangecfu mangfocninanango metinnunugec nenang fakangina ifia negensima ewengina heiing. Nga asu yeneac Manggacngo metinnuu yeac yoara monggoc yombong tofohoma kekec mebisina. ¹⁰ Mangfocnina yeni negen negengngina feec, imocac sirihau naso wegenanecsac metinnunugec nga Anutungo metinnunuande, imocngi ine memefihagoc yombong ande. Nenang yeac kpetiac kekecfu torokpema kecnideac ifi angkecde. ¹¹ Anu memetinnina imoc yofinenggac ubahodung meficgenemmeande, imoc ubangerehagoc mi anude, kpac. Nga ngicngac yeni memetinnu kecma yadiserikecdae, yenearu faka imocngi ngade faka dindingacac ruae kekecac fora meficgeude.

¹² Imocac amma ngeni maringina kucmama me fafocngina mangana meseriemebisia.

¹³ Amma ngicngac hanimangang haningina mepatickebauac ngeni singngina heitume-bisia.

(Yoac negen negengagoc

Ngeni ifi anggec haningina ngereebeso.

¹⁴ Ngeni kpetiac kekec mi kecgecdieu Kebu naric mi henggecde, imocac ngeni ngicngac sasawa yenigoc ruae nga kpetiac kecgecdeac uatoa mebisia. ¹⁵ Ngenearunac mongngo Anutuac wosoefacfunac mangunubacac henghomema kecbisia. Nga botucnginaunac wiac herebu nga ubaebic imocngo sera mi kpebeso. Imocngo sera kpema ebic meficgengemmeu wosohodung isoc homac memanganengunuude. ¹⁶ Amma ngeneac botucfunac mongngo kaisero faka ambacac me Esau isoc Kebuac ihoc bahoc ambacac ngeni henghomema kecbisia. Esau ye naso mocguac yakango waracmedacac kenec muneagoc emekpesi anoc. ¹⁷ Amma yeng ngade mamaarunac kenec imoc mebeso anu mamango waec. Ye imoc meudeac kiaru mengec mengereac sing mong ine mi fingecmiec.

¹⁸ Israe ngicngac yeni tikingina mewegenema henggec gerecborang dzeu kundung kpema medzickeyombonggeec. Nga firang kpeu ¹⁹ trampet mong kunengngo arohou enacudumeng mongngo yoac deu mi negenggecdeac desambic anggec. ²⁰ Yoac yofi dedea, imocngo ebictoa meficgeyemmeeec,

“Ngic me yang mongngo tiki imoc kpesereudeu ngeni imoc hocngo hebucgebisia.”
(*Makekeng 19:12-13*)

²¹ Anu wiac henggec imocac homac yombong kengcyunu Mosengo yofi deec,
“Ni kengecnuu dzononna fedede.” (Dedeseri 9:19)

²² Ngeni ine tiki ifiau mong mi hagec, kpac. Ngeni Siong tiki, imoc Anutu kekehagoc yeac taong amma kurumenggac Yerusareng, imohai sogac sogaiac tutumannu hagec.

²³ Ihai areng yofi bic kpeturanggegec kecdae. Ngicngac sasawaac Anutu, yeng desi desingicngina. Nga Angero habu teng tauseng dafiguc amma ngicngac Anutungo hafoangoc mengereyunuma yeneac dindingac deyemmeec, yeneac ongaasungina. Nga kurumenggac osokporennu kpacngina oho ohoya waracmedac isoc kecdae, yeni kuru-menggac kpebung habu andae. Yeni sasawango kpeturanggema ihai kecdae. ²⁴ Nga ngeni Yesuaru hagec yeng dzadzahac gboriaac ngic botucnina andenoc. Amma ye sawa kpegiec, imocngo Abeac sacngo yoac deec, imoc ferahema kuhalog yombong deude.

²⁵ Imocac ngeni ngic yoac edengunukecde, ye ngadehebauac garengngina mema kecbisia. Imoc yofiac, Mosengo bangecfu kecma ngicngac goroyoac seria edeyunuu yeni yeac yoac negenggecdeac wama kecma kopocsicac turunga, imohacnac naric mi woragec. Nga yeng kurumenga kurumenga imohacnac mama goroyoac edenunumanu yoara ngadehenideu kopocsicac turung imohacnac ifingoc naric mi woranide. ²⁶ Moseac nasou Anutuac ubaudumengngo bangec kpemindzaheec nga yofinenggac ine yofi deserima edenunukecde,

“Naso monnu monggoc bangec kpemindzahebade, imohai ine bangecsac kpac, kuru-mengenya kurumenga ifingoc kpemindzahebade.” (Hagai 2:6)

²⁷ Nga “Naso monnu monggoc.” yoac imocngo yofi dekperaginemmede, wiac hanac hanaheau deu fingecdarec ye imoc kpemindzaheu kpac anude. Nga wiac sasawa mi fingecmanu nanec, ye imoc ifingoc kpemindzaheu seria namma fefeseri feude.

²⁸ Nga eucerereng mong ifi nemmeu mekecdimbe, imoc kpemic kpemindzahenasou naric mong mi manganeude. Imocac amma nenang Anutu ubangerec negemmima yeng negenu ngereeude, sing imohai yeac bageau memaememaa eweheimibisina.

²⁹ Foracngoc, Anutunina ye gerecborang amma wiac sasawa dzeu kpac andarude.
(*Dedeseri 4:24*)

13

¹ Negen negensinggoc tosofocna, ngeni ngenaoengoc heresongogoc hoangemema kecbisia. ² Ngicngac hagec ngeni yeneac ama heiyemmegedeac mi nigecngunubes. Ngicngac goango ifi anggec, yeni mi negemma angero goa ama heiyemmegec. ³ Nga ngicngac witicamau tacgec ngeni ngenahaoc tacdae, ngeni ifi isoc yeneac negensima

meficyunubisia. Nga ngic goa witicamau yunuandae, imoc ngeneac sebi momoc kpedae, ifi isoc negemma meficyunubisia.

⁴ Nga eweeneng memeturanggac fakaya imoc eweheiheiagoc ambeso. Nga eweeneng yerahafoc fefengira eweheimiec imocngo wononga kpac febeso. Noac, Anutungo kaisero ngicngac haniangina isingga turunga yemmeudenoc. ⁵ Anu ngeni hiedzoac tusuc faka mi ambisia, ngeni ine wiac bic fengemmede, imoc soha ande, ngeni ifi negemma kecbisia. Anutu yengenaocngoc yofi bic deec,

“Ni ngeni wangunuma me wiacngina segerema naric mi ngadengunubade, imoc kpac.”

(*Dedeseri 31:6*)

⁶ Imocac serima kengeha kpac kecma yofi naric denide, “KEBU ye nenanggac memeficnina nga ngic mongngo wiac mong anemmeu imocac naric mi kengecnunuude.” (*Mitiyegec 118:6-7*)

⁷ Ngeni enarafocngina Anutuac yoac edekpou angemmekecgec amma dafi kecma fora maficgegec, imoc negensima kecbisia. Ngeni negen negensingngina henghomema namma yeneac siric modacbisia. ⁸ Yesu Kristo ye worang nga yaguc amma nasosoc siric mocgungoc kecengkefude.

⁹ Anutuac danggunucngko ubaherengina meseriua seria nanggecde, imocngo wiac gombunga. Nga nenedokuac singyoac hania hania imocngo ine ubaherengina naric mi meseriude. Imocac ngeni kpoukpou gboria hania hania wagec wiac ifiango mi wangecngunubeso, kpac. ¹⁰ Anu arataninagoc kecma womong gareng yeni kporuc bedzou ua mekecdae, yeni arata imohacnac yaka mong naric mi mema negecde.

¹¹ Womong garengtoango yang yeneac sac mema womong mana kpetiac amma kpetiac yombong, imohai meemma kopocsic meic meickeac sese faiande. Amma yang fora ine tacyac anggec imocac ngadeau faigec dzema kpac angande. ¹² Imocac Yesungo ifingoc yengena sawango ngicngac kpetiac meyunuudeac taong naguac ngadeau kpendzeng kpeec. ¹³ Imocac tacyac angandimbe, imocac ngadeau yearu kemma yegoc gamekpekpe witiau momoc embisina. ¹⁴ Yei bangecfu nenang taong seria mong mi fede. Nga nenang ine taonnina ngade haudeac kicfifi kecdimbe.

¹⁵ Imocac nenang Yesuac kpacf Anutu nasosoc dedengerec ammini, imocngo sese fora ambeso. Enacobibicnirango kpara dekperagikecma fora maficgebisina. ¹⁶ Nga ngicngac goa heimefic ayemmebesonga amma wiacnina fede, imoc hendzicma yemmebisia, faka imoc mi nigecngunubeso. Anutungo sese ifiaacnac negenu ngereeude.

¹⁷ Ngeni enarafocngina yeneac ewengina heima yoacngina tofobobisia. Imoc yofiac, yeni ubagbori kecma ubaonganina garenggema kecma uanginaac yoacsiduc degecdeac nasoya faifaia fede. Nga yeneac ua imoc ubangerecgoc ambeso. Ngeni ubaebicfu ua imoc mebau debac ni ngeneac negemba memefihagoc naric mi ambac.

¹⁸ Ngeni neneac numubisia. Neni herenegen negennina kpetiac, ifi negenserima kecdimbe. Nga angammemenina sasawa gombunga feudeac anemmede. ¹⁹ Ngeni nunumuu monggoc yombong maficnumagec neng naso mi ukuma ngenearu bic dzigene habadeac negensiduae.

²⁰ Rueac Anutungo dzadzahac fefeseriac sacngo, ramagarengtoa Kebunina Yesu homefunac megborima miarec, ²¹ yennoc ua gombunga sasawa megecdeac kuc ngemema mewakengunu yengena songo nga negen negeng modacgecde. Yeng ifi anemema negenu ngereeue, faka imoc nenearu fingecbeso. Nga yearu dedengerec nga dedengerec fekengkebesande, imoc fora.

²² Negen negensinggoc tosofocna, ni kibi yomoc ohongemeduae, imocngo herea mi ande, imocac ngeni dederecge yoac yomoc modzotitia kpac kecma negenggecdeac igocngunuma deduae. ²³ Amma mong edengunuba negenggec, yeni tosonina Timoteo witicamaunac yungecgec. Imocac yeng naso mi ukuma nearu bic hasikeudeu yegoc ngeneendedeac ngenearu bic hadede.

²⁴ Neneac wenacngerecngko enarafocngina amma kpetiac areng sasawa yenearu kembeso. Amma tosofocnina Itarianac yeneac wenacngerecngko ngenearu ifingoc hade.

²⁵ Anutuac danggunucngo ngicngac sasawa ngenearu febeso.

Yakoboac Kibi

¹ Ni Yakobo Anutu nga Kebu Yesu Kristo yereac wanacngic kecma kibi yomoc ohoma Israe kisic 12 bangeha bangeha singsararang kpema kecdae, wenacngerecna ngenearu faiba hade.

² Negen negensinggoc tosofocna, faitobang nga ebic hania hania fingeckgemmeu imoc sasawa wiac sogac sogaigoc, ngeni ifi negembisia. ³ Negen negensingngina faitobannu faigec imocngo meseringunu ngicngac seria anggecde. ⁴ Amma ngeni modzotitia kpac kecma serima uangina hafoangoc mesigecde. Mesima yadiseriy-ombonggema wiac monggac naric mi obohogecde.

⁵ Anutungo pakeng dedea kpac songogoc kecma ngicngac wiac homac yem-mekede. Imocac ngeneac botucfunac ngic me ngac mongngo negen negentegecak kpedadanggeudeu ye Anutuaru numuma kpesimi miude. ⁶ Nga ye kpesima numumi-ude, imohai ine negengyohoha kpac negensinggema numubeso, nocac ngic mong ye negengyohoc anude, ye kondunggac siri isoc, firangngko imoc wangecma kengha anu sicsauc kpekefude. ⁷ Ngicngac ifia yeni, "Kebuarunac wiac mong naric menide," imoc mi negensibisia. ⁸ Ngicngac ifia yeni ubayohoc amma negen negeng mocgucfu naric mi serima yenanggac sing sasawa negengyohogocsac anggecde.

⁹ Negen negensinggoc tosonina mong ye mamea kecande, ye yengenaac negenu engena ambeso. ¹⁰ Nga ngic mong dzofinahagoc, ye yengenaac negenu mamea ande, imoc negensibeso. Dzaring dzuriango kpindzing manau tohma moronggema kpac angkecde, ifi isoc ye ifingoc kpac anude. ¹¹ Nga asoac wenac gereango erema kpindzing kpeu imocngo gbanggema dzuria siriha gombunga moronggeu kpac anude. Nga ngic dzofinactoayagocngko wiac meficeudeac uatoa meande, ye siriha ifi isoc bic moronggema kpac anude.

¹² Ngic mong faitobannu serima namma ebic tofouhoude, ye kenehagoc. Nga ngicngac Anutu songo negemmiandae, yeni kekecac ira yemmeudeac deseriec. Ngic mong ye faitobannu heiserima kefude, ye imocnoc meude. ¹³ Kopocsicac faitobang ngic fingeckmu ye yofi mi debeso, "Anutungo faitobannu fainudac."

Imoc yofiac, wiac manganango Anutu naric mi memaude nga yeng ngic mong kopocsicac faitobannu ifingoc mi faiude, kpac. ¹⁴ Ngic tembuc tembuc yengenaac songongo ngic faitobannu faiyunuande amma yengena songongo ye wangecma ikoc negen negeng negemma faka hania hania meudeac songo meficeude. ¹⁵ Anu negensongo man-ganango kpenanggema medac mong meude, ye kpara kopocsic. Nga kopocsicngko hafoa yadiseri amma homec kpenanggema meude.

¹⁶ Songo tosofocna, ngeni ngenaocngoc ikocfu mi wangecemebisia. ¹⁷ Anutu ye kurumeng kperagiac manggac amma yearu kundung mong mi kpeude, kpac. Yearu kperagia feec nga fede nga fekengkefude. Nga yeng wihaenac wiac gombunga nga soronga suenemmu maude. Ye ubangereha ifi nemmekede. ¹⁸ Anutu ye songoya nga nogen negenaac amma yoac forau yeac nambarafora fingering kecdimbe. Yeng deu wiac sasawa bangecfu fingeckdarec, imocac buma heihei annideac ifi anec.*

¹⁹ Songo tosofocna, ngeni yofi negenggoc, yoac mong degec hau ngeni bic kedzac faibisia. Faima imocac turunga bic mi merembisia me herebu bic mi ambisia. ²⁰ Ngicac herebungo Anutuac kicfu faka dindingac mi heficeude, kpac. ²¹ Imocac amma ngeni faka seuhagoc nga faka mangana ifia homac fede, imoc sasawa meickedacbisia. Amma ngeni yumea kecmagec yoac herenginau homec homera, imocac kucngko ubaongangina ebicfunac mesiu komoc kpegecde.

²² Ngeni Anutuac yoac kedzacak nebasac mi negembisia. Ngeni yoara negemma tofogecde, imocngko ngereeude. Ifi mi anggecdeu ngeni ngenaocngoc ikoc angemegecde.

* 1:18: Kontucac buma heiandimbe, ifi isoc annideac denemmeec.

²³ Ngic mong ye Anutuac yoac engsac negemma imoc mi modarudeu ye ngicngo yengena kicmesuya wikinnu hengande, ifi isoc. ²⁴ Ye ongea engemma kemma imohaingoc yengena siriha dafia, imoc bic nigeckpeude. ²⁵ Anutuac singyoac soronga, imocngo witicfunac yungecnunuude. Nga ngic monggo imoc hennegeng amma mekecma nigera kpac uaya mekefude, Anutungo yeac ua keneheude.

²⁶ Ngic mong ye yengenaoc yofi negenude, “Ni Anutu eweheimima kecduae,” ifi dema enacbibiha mi garenggeudeu yeac eweheihei imocngo sing segeu fora kpac anude. Ye yengena ubaherea ikoc ammiudenoc. ²⁷ Nga Anutu Manggacnina yeac kicfu eweheihei faka kpetiac nga kongaha, imocac siriha yofi, bangectoa bangec yomocac songo ngadehema wonong mi heiemema beging nga ngachodzec ebicfu kecdae, yeni yenengareng ayemmebesonga. Imocngo Anutuac eweheihei gombunga.

2

¹ Tosofocna, Kebunina Yesu Kristo ye kuc nga kibikperagiagoc kecde. Nga ye negensinggedae, ngeni ngic engena mamea sebinginaac siriha faka ayemmeandae, imoc naric mi ngereede. ² Imoc yofi, ngic monggo ngeneac kpekpeturannu ring golngu memea amma ngakpi kibia gombunga heima hau naso imohaingoc ngic mong makpekpea wambaya esea wonongagoc heima haude. ³ Ifi haec ngeni ngic wamba kibia gombunga faidac, ye hemma yeac degecde, “Ogo, ge yei hama tatac gombungau tacna.” Ifi dema ngic makpekpea yeac ine yofi degecde, “Ge edimoc kemma nanna.” me “Ge haninau parannu matacna.” ⁴ Ifi anggecdeu ngeni ngenaoengoc siricngina hentegecma sing manganau ngicngac ogofocngina isingyunugecde nga imocngo mi ngereede.

⁵ Songo tosofocna, ngeni kedzac kpema negenggec, ngicngac bangectoa bangec yomohai makpekpea kecdae, yeni negen negensinggoc kuneng anggecde amma eucererenggac mingina amma imocac maridzoming megecde, Anutungo ifi negemma meisingyunuec. Ngicngac heregoc Anutuac songo negengandae, imoc yeneac anudeac deyemmeec. ⁶ Amma ngeni ine ngicngac makpekpea game maficgeyemmeandae. Nga ngic finactoanginagoc yenennoc memanganengunuma yoacfus faingunuandae. Nga ngeni yenisac eweheihei ayemmeandae, imoc mi ngereede. Makpekpea yeni faka ifia mong mi angemmeandae. ⁷ Yesuac kpara gombunga warac witinginau enec nga dzofinactoanginagoc yenennoc kpac imoc demanganeandae.

⁸ Anu dedeseriyoac mitikibiu yofi oho ohoya fede,
“Ge geangga anggengande, siriha imocngoc gegoc wegena kecdae, yeni heresongogoc hoangyunubesena.” *(Sesememe 19:18)*

Ngeni eucererenggac yoac imoc foracngoc modacgecdeu faka gombunga anggecde.

⁹ Nga ngeni ngic engena mamea sebinginaac siricfu ayemmeandaeu kopocsic maficgegocde. Nga dedeseriyoacngo manganangina dekperagima singyoac kpekpe, ifi dengemmeude. ¹⁰ Imoc yofiac, ngic mong ye dedeseriyoac hoanggema nadunga sasawa modacdacma nadunga mocgusac kpeudeu, ye nadung sasawa imocac turunga meude. ¹¹ Anutungo yofi deec,

“Ge kaisero mi ambesena.”
amma monggoc yofi,

“Ge ngicngac mi yunuhomebesena.” *(Makekeng 20:13-14; Dedeseri 5:17-18)*

Nga kaisero mi amma ngicngac yunuhomeadeu dedeseriyoac kpekpengic bic annec.

¹² Anutuac singyoacngo witicfunac yungecnunuude, yeng singyoac imoc modacma fakanina isinggeude. Imocac ngeni ifingoc singyoac imoc yoacnginau nga fakanginau modacisia. ¹³ Ngic mong ye ngicngac ogofora wosoefacgoc mi ayemmekede, yeac wosoefac faka mong yoacfus mi fingerude. Nga wosoefacgoc kekecngo yoacfus namma firang anude.

¹⁴ Tosofocna, ngic monggo deude, “Ni negen negensinggoc kecduae.” ifi dema angammemea mi feudeu negen negensinga imocac fora mi maficgeude. Nga negen negensing ifiango ebicfunac naric mi mesiyunuude nga yeni komoc mi kpegecde.

¹⁵ Negen negensinggoc ngic me ngac toso mong ye kekehau noc wambaya heiude nga yakaya wenacsoc neudeac kpedadanggekecmanu ¹⁶ ngeneearunac mongngo yeac deude, “Ge rueagoc kemma nomang ngakpiga heima yaka negebec ambesena.” ye enacngosac ifi dema sebiaac wiac obohode, imoc mi miudeu, negen negensinggaac fora mong mi fingerude, kpac. ¹⁷ Nga negen negensingga angammemea kpac fede, imocngo homemea ande.

¹⁸ Nga ngic mongngo deude, “Ge negen negensinggagoc kecnec. Nga ni ine angammemena mekecduae. Negen negensingga angammemea kpac, imoc edzacnuna hemmaguc angammemena edzacguba negen negensinna naric hennade.” ¹⁹ Amma Anutu ye mocgusac kecde, imoc bic negensinggenec, imoc gombunga. Nga asu mangana yeni ifingoc imoc negensinggema kengec amma dzonongngina fedekedengoc.* ²⁰ Nga geng ine negen negensinggagoc kecma angammemega kpac kecnec, imoc fora mong mi maficgeude, kpac. Ge ngic negen negengga kpac isoc, imocac siriha negenghomebesena. ²¹ Warac nenang bangecnina Abarahang ye medaha Isaka sese dema aratau faiu Anutungo yeac negen negensing angammemeagoc hemma ngic dindingac demiec.

²² Nga yeac negen negensing nga angammeme yeri maficemema yerahafoengoc ua meoc. Amma angammemeango negen negensinga nanggeu yeri mocgu anoc. ²³ Anu imoc fora ande nga mitikibingo edzacnunuma yofi dede, “Abarahang ye Anutu negensinggeu Anutungo yeac ngic dindingac demiec.” (*Fingec fingec 15:6*)

Amma yeac yofi degec, “Ye Anutuac ogea.” ²⁴ Anutungo ngic angammemea arennu yeac dindingac deude nga negen negensinggac arennusac kpac, ngeni imoc hendae.

²⁵ Nga Anutungo singtoangac Rahaba angammemeaac amma dindingac demiec. Yeng ngic sueyuruyuruya ama heiyemecma sing monnusing sueyuruu woraoc. ²⁶ Sebi ongaasuya kpac, imoc homemea nga siriha ifiangoc negen negensing angammemea kpac, imoc ifingoc homemea.

3

¹ Tosofocna, ngeneearunac homacngo kpoukpou anggecdeac mi negensisibis. Anutungo yoacfudemoc naso imohai kpoukpou hanianina ebiriangoc isingga yoaclina desiude. ² Nenang sasawa naso homac kopocsicfu manunuude. Amma ngic mong ye yengenaac yoac segema kopocsic mi maficgeudeu ye ngic hafoangoc gombunga amma yeng sebia ifingoc garenggeudeac mi obohoude. ³ Anu becosi yeni yoacnina negemma modagecdeac enacngina aiengbisic faima sebinginai hafoa kisangyunuandimbe. ⁴ Nga wagetoa kondunnu kecdae imoc ifingoc hembesonga. Yeni kunengtoa nga firang seriango meyunuu wage gareng ye wiacbisha merengfai anu wagetoa yeac maria modarude.

⁵ Anu nedzarang ye ifingoc sebinina wiac kapia ande nga sifu yoactoa dema sebinina meenude. Nga negenggec, gerec kapiabasicngo hanahema dzeu ickate kunengtoa faiu dzeande. ⁶ Nedzarannina imoc gerec isoc, imocngonoc sebininaac wiac sasawa feracyunuma manganaac nonggea angkecde. Nga hofengo nedzarannina faiu dzeu nedzaranninango sebinina sasawa meu wonong anu kekecnina hafoa imoc faiu dzeude. ⁷ Yangkasi nga neng amma boudzoc nga kondunnu yang hania hania fedacdae, yeni warac nga yaguc yoac kpouyemmemma garengyunuandimbe. ⁸ Nga ngicngo nedzaranga garenggeudeac obohokecde, imoc tacnegenga kpac mangana mekefu marasing manganganago yearu wakede. ⁹ Nenang nedzaranninango Kebu Manninaac kenecyoac deandimbe* nga nedzarannina imocngonoc ngicngac Anutuac siric meyunuyunuya, yeni ine sowecyunuandimbe. ¹⁰ Enacbibic imohacnaengoc kenecyoac nga sowecyoac momoc

* 2:19: Asu mangana yeni eng negensinggadai angammemengina gombunga mong mi fede. Imoc negen negensinggina fora kpac. * 3:9: Anutungo maficunuu nenang bangecnigcngacne yumia kecma Anutuac kenecyoac debisina, yoac imoc mitikibiu homac fede nga yeng faka imocac negenu ngereude. (Fingec fingec 9:26; 14:20; 24:48; Mitiyegec 16:7; 26:12; 103:22 nga goa homac fede.)

maande. Tosofocna, imoc naric mi ande. ¹¹ Doku kiwa mocgu imohacnacngoc doku sawera nga hodungagoc momoc naric mi maecd, kpac. ¹² Tosofocna, fig icngo oriwa gbomea naric mi meficgeude nga waing witicfu fig gbomea naric mi fingerude. Siriha ifingoc doku kondunggocngo doku sawera naric mi meficgeude.

¹³ Ngeneearunac ngic mongngo negen negentegec nga negen negenga irec ireckea mekecdeu, ye yumea kecma negen negentegec fakaya gombunga edzacngunubeso. ¹⁴ Nga ngeni ubaherengina keracmangang kuneng amma kichodung negemmangang-goc hoanggedaeu ngenang sebingina meemma ikocgoc kecma yoac foraac yoackpekpe mi ambisia. ¹⁵ Negen negeng ifia imocac hania kurumennunac kpac, imoc ine bangecfunac nga uba eseavnac amma hadehade yeneac ua. ¹⁶ Ngeni ubaherengina keracmangang amma kichodung tusucfaka feudefu ngeni ifingoc ewekpekpegoc kecma memanganeemegecdeac faka hania hania angkecma tohoemema kecgecde. ¹⁷ Negen negentegec wihacnac maande, imocngco hanahema negen negenga kpetiac faima monggoc ruae nga faka yumea meficgeude. Imohai ubaseri me ubagori me ikocyaoac mong mi fede nga monde monde mi angande. ¹⁸ Ngicngac ruae kekecac ua meandae, yeni ruae komoha homecgec fora dindingac kekec fingecyemmeude.

4

¹ Ubasebinginau hensongo fede, imocngco igocngunuma botucnginau dzikac meficgeu ewekpekpe angandae. ² Ngeni wiac mebesonga negemma wiac mi mekecdae nga yunukpebuc amma hodzinnu faka mekecma wiac naric mi tigec enude. Amma ngeni gorec gorec nga ewekpekpe angkecdae. Amma ngeni nunumungina kpac kecdaec wiac gombunga naric mi megecde. ³ Ngeni ine wiac megecdeac numuma yofi negensiandae, “Sebiac hensongou dzofinacnina naric ukunide.” Ifi negemma ngeni sicsauc numuma imocac fora mong mi megecde.

⁴ Ngicngac waemeeme faka angandae, ngeni yofi negembisia, mong ye bangectoa bangec yomocac kekec imocac ogea angande, ye Anutu ngadeheude. Imocac mong ye bangecac kekec ogo ammibeso ande, yeng Anutuac ngaba areng anude. ⁵ Mitikibiu yoac yofi fede, “Ye ongaasu nenang hereu faiu tacde, imocac nenang yeac areng kecnideac homac ammikecde. Ngeni yeac herebu meficgebauac ye mi wabisia.”* Yoac imoc eng oho ohoya mi fede, imoc negembisia. ⁶ Anu yeng ferahema wosoefac kuneng anemmeude, imocacnac mitikibingo yofi dede,

“Anutungo ngic sebiengenggoc kecdae, yeni kekecngina memaude nga ubasebingina memama kecdae, yeni wosoefaha yemmeude.” *(Yoac negen negengagoc 3:34)*

⁷ Imocac ngeni Anutuac yoacac bageau kecma mangana minginaac yoac kpema ngade-hegec yeng wangunuude. ⁸ Anu ngeni Anutuac hoannu kenggec yeng ifingoc nge-neac wegenac haude. Manganameme ngic, ngeni maringina dzuacgec nga ngicngac ubayohogoc kecdae, ngeni ubaherengina dzuacmengere anggec kpetiac anu. ⁹ Ngeni ubamangang nga ubahodung negemma homac kiacbisia amma dzomocgoc kecdae, ngeni meremma kiacgec nga sogac sogaigoc kecdae, ngeni meremma ubaebicgoc ambisia. ¹⁰ Ngeni Kebuac kicfu memamegec yeng miacngunuude.

¹¹ Tosofocna, ngeni ngenaocngoc mi demanganeemebisia. Mong ye ogea demanganede me fakaya isingga demanganeudeu ye dedeseriyoac deendema amma memaude. Nga dedeseriyoac isingga demanganeudeu imohai dedeseriyoac mi modac-nade, kpac. Geng ine dedeseriyoac ising ising ngic annade. ¹² Yoac ising isingga ngic dedeseriyoac oho ohongic imoc mocgungosac amma yennoc naric ebicfunac mesingunu komoc kpegecde me memanganengunu kpac anggecde, ye imocac kuc femide. Nga ge ogoga isinggaadeac kuc mi genggena, kpac.

* 4:5: Mitiac negen negengngic yeni imocac yoac yofi nensidae, Yakobo ye mitikibiunac yoac goa yofia isoc kpeturanggema dede. Makekeng 20:5; 34:14; Dzekaraia 8:2

¹³ “Neni yaguc me wereckenu taong imohai me taong monnu kemma kifa mocguac manau ihai kecma iwaiac emekpesi amma hiedzonina monggoc meficgenide.” ngicngac ifi deandae, ngeneac yofi deba negenggec, ¹⁴ Ngeneng wereckenuac siriha nga kekecngina dafi anude, imoc mong mi negendae. Kekecngina imoc hosuc isoc, naso wegenanecsac erema kpac anude. ¹⁵ Ngeneng yofi degec ngereebac, “Kebungo negenu ngereeude isoc nga kecnideu ua imoc me imoc menide.” ¹⁶ Anu ngeni sebiengeng yoac dema sebingina meengandae. Yoac ifia sasawa faka mangana yombong ande. ¹⁷ Imocac negenggec, ngic mong ye angammeme gombunga anudeac negen negengtegec femiu imoc sifu waude, ye kopocsihagoc.

5

¹ Ngicngac dzofinactoanginagoc, ngeni negenggec, ebic kunengngo ngenearu fingegecma memanganengunuudeac amma ngeni arohma kiacgec. ² Ngeni iwaingina dzamema kpac anude amma wambangina imoc dzaupadzazangng neu kpac anude. ³ Hufengngo gol nga siriwangina meude nga hufeng imocng siducedde amma hanangina dekperagi sebingina gerec isoc ngonohoude. Ngeni naso wisic wisickeunoc hiefinacmekpedzuc anggec, imocng ifi fingegecmeude. ⁴ Negenggec, ua ngicfocngina yeni semeng uanginaunac fora kpengemmegec ngeni ua bung yemmebeso wagec, imocng kiackede. Nga ua ngic yeneac kiacng ifingoc Kebu Kuctoa mingina yeac kedzacfu bic kemee. ⁵ Ngeni bangecfu kecma sebiac songo modacgec dzofinacnginango kekecnginau wakeude. Nga Anutungo ngicngac kpebucyunuudeac nasoya wegenemanu ngeni ine ondzonggboc amma kecdaengoc. ⁶ Ngeni ngic dindingac yoacfufa faima kopocsihagoc dema kpebucgegec nga yeng ngaba mong mi mekefec.

⁷ Tosofocna, imocac ngeni modzotitia kpac tomai kecmagec Kebungo habeso. Nga negenggec, semeng ua minginango semenga homeru kia kpeu yeng semenga bangec-funac yadiudeac modzotitia kpac fora nasoac tomai kefude. ⁸ Nga Kebuac hahanaso bic wegene hadeac amma ngeni ifingoc ubaherengina meserima modzotitia kpac tomai kecbisia. ⁹ Tosofocna, ising isingngic ye nagu ngadeau bic hama nande. Ngeni yoacfufabauac ngenaocngoc gubepakeng mi angemebisia. ¹⁰ Profete warac Kebuac kpacfufyoac dekecgec, yeneng modzotitia kpac yumea kecma ebic tofohokecgec. Tosofocna, ngeni yeneac siric modacma ifi ambisia. ¹¹ Ngicngac modzotitia kpac kecgec, yeneac negenni kenehagoc anec nga ngeni Hiobeac yoac bic negenggec. Ye ebicfu serima kefecac amma Kebungo yearu faka gombunga meec. Kebungo ubamangang kuneng nga wosoefactoagoc fakaya anemmeude.

¹² Nga yoac fora mong yofi, ngeni yoacngina seriudeac wiac mong kpacma mi deseribisia. Ngeni kurumeng me bangec kpacma yoacngina mi deseribisia nga wiakuneng mong kpacma ifingoc mi deseribisia. Ngeni kecma yoacfufakopebauac fora imoc fora nga kpac imoc kpac, ifi debisia.

¹³ Ngenearunac ngic me ngac mongngo ebic goa fingegecmiu ye numubeso nga mongngo sogac sogaigoc kefude, yeng afec afeheyegec heibeso. ¹⁴ Nga ngenearunac mongngo hafei ammiu kpebunggac enara kpacyunu yeneng yeac amma Kebuac kpacfukerecdokungo nadzicmima numubisia. ¹⁵ Ifi anggec nunumu negen negensinggoc, imocng hafeigoc yearu ngerec ngeree fingegecmiude nga Kebungo meficgema miaru yarude. Nga kopocsihagoc andeu Kebungo kopocsiha wau kpac andarude. ¹⁶ Imocac ngeni ngerec ngeree meficgegecdeac kopocsihagoc ngenaocngoc deficemema nunumungo meficemebisia. Ngic mong dindingacng numuude imocng wiac kuhagoc amma memefihagoc anude. ¹⁷ Eria ye ngic yombong nenang isocng kia mi kpeudeac numuu kia mi kpekpe kifa harebec nga noboha anec. ¹⁸ Nga ye monggoc numuu sawaunac kia mau bangecng semeng monggoc meficgeu fingerec.

¹⁹ Negen negensinggoc tosofocna, ngenearunac ngic mongngo yoac foraac sing segema sicsauc kenudeu mongngo ye dzigeneudec deu dzigeneudeu ²⁰ yeng yofi negem-

beso, ngic tosoya manganaac sinnunac merende, ye ngic yeac ubaongaya homecfunac mesimiu kopocsic homac kperaheude.

Petoroac Kibi 1

¹ Ni Petoro, Yesu Kristoac aposorongo meisingfora Ponto nga Garatia amma Kapadokia nga Asia amma Bitinia bangectoau israengicngac singsararang kpema kuric kecdae, ngeneac kibi yomoc ohoduae. ² Anutu Manggacngo bic negenu feecac yeng meisingngunuma yofi desiec, Tiri Asungo ngenearu ua meu yadiseri amma kpetiac anggecde. Ifi amma ngeni yeac enac tofohogec Yesu Kristoac sacngo kpegiu nadzicngemmeec kecdae. Yeac danggunuc nga ruaengo ngenearu sahema febeso.

³ Nenang Kebunina Yesu Kristo, yeac Anutu Manggac kenehebisina. Yeng wosoefactoa kpenemmema Yesu homecfunac megborie. Sing imohai nenang kekec meficgenemmeu fingec fingec gboria fingering. Ifi fingecma yeac wiac kekehagoc fingecnemmebesande, imoc negensinggema kecdimbe. ⁴ Ye ifi amma kurumenga kurumenga fekende, imohai maridzominhina tini enudeac bic faiec fede. Nga wiac imoc mi kpac anude amma imoc naric mi dzameude, imoc kongaha feengkefude. ⁵ Ngeni negen negensinggoc kecmagec Anutu ye kuhagocngo garengngunu naso wisic wisickeau komoc kpegecde. Imoc fingerudeac efaima fede.

⁶ Anu naso kapianc yomohai ebic nga faitobang hania hania fingecngemmeu ongangina dzokonemanu ngeni sifu wiac ngade haude, imocac negemma mamangkima sogaima kecbisia. ⁷ Gol siriha negendimbe. Ngic yeneng imoc tobanggema siriha henggecdeac gerecfu faigec dzema isinggeandae. Gol fora ye fingectegerude nga imoc sifu ngade kpac anude. Nga negen negensingngina fora, imoc gol ferahema wiac engena anude. Yesungo fingectegerude, naso imohai negen negensingngina imocngo dedengerec nga kuc kibikperagiagoc amma eweheihei meficgeude. ⁸⁻⁹ Ngeni ye kicnginango mi henggoc amma sifu yeac songo negendae. Nga yofinenggac ye mi hengandae amma ngeni sifu ye negensinggegecde. Amma ngeni ye negensinggegec, yeng ubaongangina kopocsicac ebicfunac mesingemmeu ngeni komoc kpegecde. Ngeni imoc negensima sogac sogai ebiriangoc amma kecdae.

¹⁰ Profete yeni ngeneng Anutuac wosoefac megecdeac kpefing degec amma yeni komoc kpekpea sing negengireckegecdeac uatoa mekecgec. ¹¹ Ifi anggec Kristoac Asungo yenearu kecmanu Kristongo kpenzeng kpema ngade kuc kibikperagiagoc mebesande, imoc Kristoac Asungo herenginai kefecac kpefinnu bic edzacyunuu dekperagingemmegec. Amma imoc meracac yoac nga noc nasou fingeru henggecdeac kicfifi anggec. ¹² Kicfifi amma yenang meficemegecdeac kpac, imoc ngeni meficngunugecdeac yoara dekperagingemmegec, Anutungo imoc edzacyunu yeni ireckegec. Kecma Anutungo Tiri Asu kurumennunac bangecfu sueu mama siduc gombung dedengic kuc yemmeu, yeni yoac imoc mema dekperagingemmegec ngeni imoc negenggec. Nga Angero yeni imoc ifingoc henggecdeac ayemmeande.

¹³ Imocac meheng kpeheng amma ubanegen negengga isinggaoc garenge-memana Yesu Kristoac hahanasoya fingectegeru imohai wosoefaha mehaude, ge negen negengga yeac wosoefacfu hafoangoc seria faina febeso. ¹⁴ Ngeni warac siduc gombunggac yoac mi negentegecma sebiac songo modacgec. Amma ngeni enac tofoc tofoho nambarac isoc kecdaec sebiac songongo monggoc mi garengngunubeso. ¹⁵ Anutungo kpacngunuec, ye kpetiac nga ngeni ifi isoc faka nga angammemengina hafoangoc kpetiac ambeso. ¹⁶ Imocac yofi oho ohoya fede,

“Ni kpetiac, imocac amma ngeni kpetiacngoc kecbisia.” (*Sesememe 11:44-45; 19:2; 20:7*)

¹⁷ Anutu ye monde mondea mi femide nga yeng ngicngac tembus tembus angam-memenginaac sirihau yoacngina desiude. Nga ngeni ye “Manggac” kpacandaeu, ngeni yei kurickekecac nasongina eweheimima kecbisia. ¹⁸ Ngeni warac bangecfocngina yeneac sicsauc fakau kecmagec Anutungo bungngina mema meisingngunuec, imoc siriwa me golngko kpac nocac siriwa nga gol imoc kpac anecde. ¹⁹ Ye Kristoac sacngo

bumengunuec. Nga Kristoac sac imoc wiac engena yombong, imoc rama medaha mong puringa kpac nga ebiha kpac, yeac sac isoc. [\(Makekeng 12:5; 29:1; Sesememe 22:17-25\)](#)

[20](#) Bangec nga kurumeng mi fingecmaec Anutungo Kristo bic meisinggeec. Meisinggeu yeng yaguc naso wisic wisickeau nenanggac amma fingectegerec. [21](#) Fингектегеч маа sing meficgenemmeu yofinenggac Anutu negensinggema kecdimbe. Ye medaha homecfunac megborima kuc nga kibikperagi miu nenang Anutu negensinggema yearu negen negen-nina naric fainide.

[22](#) Ngeni yoac foraac enac tofoghogec, imocngo ubaongangina dzuaru ubaherengin-aunac songotoa ereu ngeni tosofocngina heresongogoc hoangyunugecde. [23](#) Anutuac yoac imoc kekehagoc amma seria nande. Yoac imocngo megboringunuu fingec fingec gboria fingecgec. Kpea imoc dzonggo dzonggoa kpac imocngo nemonggema keke-serigoc anude.

[24](#) Imocac yoac yofi oho ohoya fede,
“Ngicngac sasawa bangecfu kecdae, yeni kpindzing isoc amma kibikperagingina imoc dzaring dzuria isoc. Yeni kpindzing dzanggeande nga dzaring dzuria morongge-ande, ifi isoc dzanggegecde.” [\(Yesaia 40:6-8\)](#)

[25](#) Anutuac yoacn go ine fefeseri feude. Imocngo siduc gombung ande nga ngic yeneng imoc edekpou angemmegec negenggec.

2

[1](#) Ngeni ngaba hania hania nga ikocfaka amma keracmanganggac faka wama ngicngac mi demanganeyunubisia.

[2-3](#) KEBU ye gombunga, ngeni imoc bic tobanggegec. [\(Mitiyegec 34:8\)](#)
Imocac ngeni sabac gboriango namuac ammiande, ifi isoc Asuac arenru namu kongaha imocac angemmebeso. Ngeni imoc nema yadimagec yeng ebicfunac mesingunuu komoc kpegecde.

[4](#) Kebu ye hoctoa kekehagoc, ngeni yearu habisia. Ngic yeneng hoc imocac hoc mangana dema meickegec. Nga Anutungo imocac negenu siriha engena anu imocnog meisinggeec. [5](#) Nga ngeni ifingoc hoc kekehagoc yeac siric andae. Nga Anutungo asu ama mengunuande. Mengunu ngeni yengena womong gareng kpetiac amma Asuac sinnu sese faigecde, imoc Yesuac amma Anutungo henu ngereeude. [6](#) Imocac mitikibiu yoac yofi oho ohoya fede,

“Negenggec, ni hocwotung mong siriha engena imoc meisinggema Sionnu gununggebade. Ngic monggo ye negensinggeude, ye gamekpekpeu naric mi enude.” [\(Yesaia 28:16\)](#)

[7](#) Ngicngac ye negensinggema kecdae, ngenearu hoc imocngo siriha engena ande. Nga mi negensinggedae, yenearu yofi fingerude,

“Amamemee ngic yeneng hoc mong mangana dema ukugec. Nga hoc imocngo amAAC hoc wotung amma seria nanude.” [\(Mitiyegec 118:22\)](#)

[8](#) “Nga yeni hoc imohai kpondzong heigecde nga peperandziu tifainggema negemgang meficegecde.” [\(Yesaia 8:14\)](#)

Yeni Anutuac yoac kpeandaeac ifi anggecde, yoac imoc yeneac bic dedea.

[9](#) Anu ngeni Anutuac faka kuhagoc dekperagigecdeac Anutungo ngeneac areng meisingngunuec. Meisingngunuma ngeni yengena areng ngicngac kpetiac anggecdeac mengunuma ngictauac arenru faingunuu womong garengua mekecgecde. [\(Makekeng 19:5-6; Yesaia 43:20\)](#)

Yennoc kundunnunac hagecdeac kpacngunuma kperagiau heitaingunuma yengena kperagi engena, imohai faingunuec. [10](#) Ngeni warac ngicngac areng mocgu mi kecgec, kpac. Nga yaguc Anutuac ngicngacfora amma yeac areng kecdae. Ngeni warac Anutuac wosoefac mong mi hengkecgec. Nga yofinenggac yeac wosoefac hemma kecdae.

¹¹ Songo tosofocna, ngeni bangec yomohai kuric kecdae, imocac ngeni uba es- eaac negensongo hania haniango ubaonganginagoc dzikac kpeande nga ngeni imoc wama kecgecdeac gorongina kpema deduae. ¹² Ngeni bangec monnunac ngicngac, yeneac botucfu faka nga angammeme gombunga angkecbisia. Ifi anggec yeni nge- neac dedeseriyoac kpekpeareng dema enacfufaifai angemmema angammemengina gombunga henggecde. Ifi hemmagec Anutungo yeni yugucyuuu naso imohai den- geregecde.

¹³ Ngeni Kebuac amma kia gawamang, yeneac enac tofohobisia. Imoc ngictaungo kuc sasawa mekecde nga ¹⁴ yeac bageau gawana sasawa. Yeng uayoac yemmeu yeneng ngicngac angammemengina mangana angkecdae, yeneac turung kpouyemmegecde. Nga faka gombunga angkecdae, yeni dengereyunugecde. ¹⁵ Ngic yeni negen isingngina kpac wiac mong mi negentegecdae, imoc ngeni angammemengina gombungango enacngina midomebisia, imocngo Anutuac songo ande. ¹⁶ Ngeni witicfu mi kecdae nga witiha kpac kekec, imocngo angammemengina mangana mi kperahebeso, kpac. Ngeni Anutuac wanac areng kecbisia. ¹⁷ Amma ngeni ngicngac sasawa ewengina heima negen negensinggoc tosofocngina heresongogoc hoangyunubisia nga Anutuac damungunuu ngictau eweheimibisia.

¹⁸ Wanacngic kecdae, ngeni minginfocngina yeneac enac hafoangoc modacma ewengina heima kecbisia. Ngeni minginfocngina yumea nga gombunga amma gori goria momoc ifingoc ayemmekecbisia. ¹⁹ Ngic mong ye Anutuac yoac ubahereau feu imoc modaru goango kopocsiha kpac hemmaguc sifu ebicfu faigec kpendzeng kpeudeu faka imocngo danggunuhagoc anude. ²⁰ Nga ngic yeneng kopocsicnginaac amma ngunugec ngeni kpendzennu emma imocac bageu seria kecgecdeu imocngo dedengerecac wiac mong mi ande, kpac. Ngeni ine angammemengina gombunga ammagemec kpendzennu faingunugec imocac bageu seria kecgecde, imocngo Anutuaru danggunuhagoc anude.

²¹ Ngeni ifi anggecdeac Anutungo kpacngunuec. Anu ngeni Kristoac hanititi modacgecdeac yeng ngeneac amma kpendzeng kpema sing imoc edzacngunuec.

²² Ye kopocsic mong mi meficgeec amma yeac enacfufac ikocyaoac mong mi negenggec. (*Yesaia 53:9*)

²³ Nga yeni defagoc ammigec yeng turunga sowecyoac mong mi merenec. Nga kpendzeng kpema dekengec mong mi ayemmeec, kpac. Ye ebiha Anutungo yoac dindingac desikecde, yeac mariu faiemee. ²⁴ Ye yengena sebiango nenang kopocsic atickema icfu nanec. Nanu nenang kopocsicfunac homema sing dindingac modacnideac ifi anec. Nga yeac kubecngo ngeni hafeidzoicfunac ngerec ngeree meficgengemmee.

²⁵ Ngeni warac rama isoc sing segema kecgec. Nga yofinenggac ramagarenggaru bic dzigenegec yennoc ubaongangina henggareng angemmeude.

3

¹⁻² Anu ngac ngeni sing imohaingoc ewefocngina enacngina tofohoma kecbisia. Nga yeneac botucfunac goango Anutuac yoac mi negensinggecdeu enengfocngina ngeneng Mitiac yoac mi ede edeyunuu angammemengina gombungangoc angkecgec, imocngo ewefocngina Kebuac sinnu taiyunuu kenggecde. ³ Ngac ngeni orucdzongina dzägeandae nga kubu nganoc golngu memea sebinginau faiandae amma wamba siriha gombunga heiandae, imocngo siric kerengngina mi meficgebeso. ⁴ Nga ongaasungina yumea nga ruaegoc ubaherengina manau sufufuya fede, imocngo siric kerengngina meficgebeso. Imocac kibi kuha mi maande nga imocngo fekengkefude nocac imoc Anutuac kicfu wiac engena ande. ⁵ Ngac kpetiac warac kecgec, yeneng siriha ifingoc kibingina meemma ewefocngina enacngina tofohoma Anutuaru negen negengngina faikecgec. ⁶ Imoc Sara isoc, yeng ewea Abrahang eweheimima kunenna dema enara to- fohekfec. Ngeni faka nga angammeme gombunga mekecma wiac monggac dekengeha kpac kecgecdeu Saraac naroangfora anggecde.

⁷ Ngacac kuc, imoc ngicacsoc kpac. Ngic enengfocnginagoc ngeni imoc negensima imocac sirihaу yenigoc kecbisia. Nga ngeni kekecac danggunuc imocac maridzoming ngenahafoc megecdeac nga ngic ngeni nunumunginaac kpae fingeccbacac amma enengfocngina eweheihei ayemmebisia.

⁸ Kpeturanggema deba, ngeni sasawa negen negengngina mocgu febeso. Ngeni wosoefac angemema heresongogoc hoangemema ubamangang negengemema memae-mema kecbisia. ⁹ Ngicngac yeni mangana angemmegec ngeni turunga manganangoc mi merengyemmebisia nga yeni desofoc angemmegec ngeni turunga desofocngoc mi ayemmebisia, kpac. Ngeni kenec imoc maridzomingngina anudeac kpacngununganuya, imocac yeni ifingoc kenecyoac edeyunubisia.

¹⁰ Imoc yofiac,

“Ngic mong ye kekecac songo negembeso nga naso gombunga hembesonga ammikecde, ye nedzaranga yoac mangana debacac nga enacbibihango ikocyao debacac garenggebeso. ¹¹ Ye faka mangana ngadehema angammeme gombunga angkecbeso. Amma ye ruaeac sing meficgeudeac uatoa mebeso. ¹² KEBUNGO ngicngac dindingac yenearu kic fima nunumunginaac kedzac kpeude. Nga mangana mekecdae, yeni ine yenengwa anude.” *(Mitiyegec 34:12-16)*

¹³ Ge faka nga angammeme gombunga annadeac mamangkima angkecnadeu ngicngac yeni memanganegugecdeac obohoma wagecde. ¹⁴ Amma yeni dindingac kekecnginaac amma kpendzennu faingunugedeu, imoc ngeni kenecnginagoc.

Ngeni yeneac damu nga kengec mi ambisia.

(Yesaia 8:12)

¹⁵ Kebu Kristo ye kpetiac, ngeni negen negeng imoc ubaherenginau mekecbisia. Amma gombungangina ngade haude, imocac hania goriangoc kpесингемеgec turunga merenggecdeac nasosoc efaima kecbisia. ¹⁶ Ngeni ine kpesi kpesiac turunga herebuya kpac, yumea nga eweheiheigoc amma here negen negeng kpataningau merembisia. Ngeni ifi anggecdeu, angammemengina gombunga Kristoac amma angkecdae, imocac ngic dedenggbaring angkecdae, yeni gameyunuude. ¹⁷ Ngic mong ye angammemea gombungaac amma Anutungo negemmiu kpendzeng kpeude, imocngo ngereeude. Nga mong ye fakaya manganaac amma kpendzeng kpeude, ye mi dengerebesonga.

¹⁸ Kristongo Anutuac hoannu fainunuudeac atac mocgu donina mema kpendzengtoa kpeec. Ngic dindingacngo yoackpekpe areng nenanggac amma ifi anec. Ye sebiugeng kpegec homeec nga ongaasuugeng bic megboriu kefec. ¹⁹ Kecma asu goa witicamau kecgec, yenearu kemma yoac edekpou ayemmeec. ²⁰ Noa ye wagea memanu Anutungo modzotitia kpac tomaingina kecbibiemanu yeneng yoara kpegec.

Nga Noango wagea medzickeu naso imohai Anutungo dokungo ngicngac efeanec, 8sac ebicfunac mesiyunuec. ²¹ Dokunadzicngo onga imoc mema ebicfunac mesingunuude. Dokunadzicng sebiac wonong mong mi dzuarude, kpac. Imoc yofi, Yesu Kristongo homecfunac yarecac amma herenegen negengngina kpetiac anude, imocngo Anutuac kicfu deficgeude. ²² Yesungo bic kurumennu enec. Amma ye Anutuac foiau tacde. Nga angero nga wiac kpac kuneng memea amma kuc yemmeyemmea, yeac bageu bic faiyunuyunuya kecdae.

4

¹ Kristongo sebigoc kpendzeng kpeec. Nga ngeni yeng kpendzeng kpeec, ifi isoc naric kpegecde, negen negeng imocngo marikungina ambeso. Ngic mong ye sebigoc kecma kpendzeng kpeec, yeng kopocsicac sing bic waec. ² Nga yofinenggac nangennide, ye ngicngac yeneac negensongo hania hania monggoc mi modacma Anutuac negen negeng nga songo modarude. ³ Bangec monnunac ngicngac Anutu mi negemmidae, yeneac kekecac negensongoac faka yofi fede, imoc kaisero faka nga kickerec angkecdae amma doku seria tosofocnginagoc nema ubangina sufuande nga sing sege segea modacma imocac siricfu nemu hania hania afehegecde. Ngeni warac faka ifia angkecgec imoc monggoc mi ambisia. ⁴ Ngeni bangec monnunac ngicngac sicsauc fakangina hania

hania anggec ngeni yenigoc monggoc mi torokpema kecdaea amma yeni imoc hemma negenggec siriha mong anu desusuic amma demanganengunugecde. ⁵ Anu Anutungo ngic gbori nga homemea angammemengina desiudeac efaima kecde, yearu haniangina debisia. ⁶ Ngicngac homemea yeni siduc gombung edekpou ayemmegec negenggec, yeni warac sebiugeng kekec kecgec, imocac sirihau turunga megecde. Ifi mema asuu Anutu kecde isoc kecgecde.

⁷ Wiac sasawa imoc kpac anudeac naso wegenede. Imocac ngeni garengemema negengisinggoc kecma nunumu ua mebisia. ⁸ Heresongogoc kekec imocngo kopocsic hania hania homac kperaheude, ngeni imocac amma songo fora heregoc negengemema hoangemebisia, imocngo faka engena ande. ⁹ Ngeni ubangerecgoc modzotiti nga ngadeyoara kpac kecma ama heiemema garengemebisia. ¹⁰ Anutungo wosoefahaac amma Tiri Asuac kuc hania hania ngemmeec, imocac ngeni Anutuac kingang kpekpe gombunga kecma tembuc tembuc meficemema kecbisia. ¹¹ Ngic mong ye miti hania ngicngac dekperagiyemmeude, ye Anutuac yoac modacma dekperagibeso. Amma mong ye memeficac arennu kingang kpeyemmekcde, ye Anutungo kuc miande, imocac sirihau kingang kpekpe ua mebeso. Ifi anggec ngicngac yeneng faka sasawa imoc hemma Yesu Kristoac negemma Anutu dengeregecde. Ye kibikperagi nga kuc mingina nasoya wisic wisickea kpac fekengkecbesande, imoc fora.

¹² Songo tosofocna, faitobang kpenzengagoc fingecngemmeude, imocac mi kpidoho-bisia. Nga imoc fingecngemmeude, imocngo faka furia mi ande. ¹³ Nga ifi fingecngemmeu imohai ngeni Kristogoc torokpema kpenzeng kpema imocac sirihau sogaabisia. Ifi anggec yeng kecma kuc kibikperagiaagoc fingectegerude, imohai ngeneac sogac sogaitoa fingerude. ¹⁴ Nga ngicngac yeneng Yesuac kpacac amma demanganengunuma defagoc angemmegecdeu ngeni kenecnginagoc, nocac yeni ifi angemmegec Anutuac Asu kuc nga kibikperagiaagoc, yeng ngeneac witiu tarude. ¹⁵⁻¹⁶ Nga ngic mongngo kpara, "Kristoac ngic," ifi dekeccdaeac kpenzeng kpedeu ye imocac ine game mi kpebeso, ye kpac imocac amma Anutu dengerebeso. Nga ngenearunac mongngo ngic kpekpe me wiac hamangec meec me yarengic ande me ngicngac ogofocngina goa yeneac wiac imocac hodzinggeude, ye fakaya ifiac amma kpenzeng kpeu gameagoc ambacac ngeni faka ifia mi angkecbisia, kpac.

¹⁷ Imoc yofiac, Anutu ye yengena ama arengfora yenearu sing hanahema faka nga angammemengina isingga desidueac nasoya wegenede. Amma ye nenanggaru sing uaya imoc hanaheudeu areng goa yeni siduc gombunggac yoac kpeandae, yenearu uaya torokpema angammemenginaac turunga engenangoc yemmebesande. ¹⁸ Nga,

"Ngicngac faka dindingac modacandae, yeni faitobannu emma kekec uatoa mema firang amma komoc kpegecde. Faka ifia fingecngemmeudeu, kopocsicmeme nga Anutu ngadeheandae, yenearu ebictoa fingerude." *(Yoac negen negengagoc 11:13)*

¹⁹ Ngicngac Anutungo negengyemmeu kpenzeng kpeandae, yeni angammememe gombunga angkecma ubaongangina hafoangoc Anutu bangec nga kurumeng meficgeec, yeac mariu faibisia, nocac ye dedzegeyoara mi waude, kpac.

5

¹ Kristongo kpenzeng kpeec imoc kicnango henai nga imocac hepuc kecduae. Amma kuc nga kibikperagia fingerude, imohai nenahafoc kecnide. Kpebunggac enara ni ngenigoc ifingoc ua imoc mema kecduaengo gorongina kpema yofi deduae, ² Anutuac habungo ngeneac botucfu kecdae, ngeni yeni gombunga garengyunuma ubaebicfu ua mi mebisia, ngeni ubangerecgoc ua megec Anutungo negenu ngereeude. Amma ngeni hiedzonginagoc anggecdeac ua imoc mi mebisia. Ngeni uangina imoc mamangkima mekecbisia. ³ Anutungo kpebung ngemmeec, imoc yeneac engenangina isoc mi kecbsia. Ngeni faka gombunga kpebung edzacyunugec, yeni imoc hemma modacbsia. ⁴ Ifi kecmagec gareng yadango fingectegecma yeng irangina kuc kibikperagiaagoc dzame dzamea kpac ngemmeude.

⁵ Sebigbori ngeni ifingoc yadafocngina yeneac bageu memaemema kecbisia. Amma ngeni sasawa fakangina yumeau angemema kecma imoc wamba isoc heigec kemebeso. Imoc yofiac,

“Anutungo ngicngac sebiengeng kecdae, yeni wayunuma memayunuude nga memae-mema kecdae, yeni danggunuha yemmeude.” *(Yoac ngen negengagoc 3:34)*

⁶ Imocac ngeni Anutuac mariseriaac bageu memaemema kecbisia. Ifi kecmagec Anutungo yengena nasou miacngunuude. ⁷ Ye yengenaoc ngenenggareng angkecddeac ngeni ubaebicngina sasawa yearu faidacbisia.

⁸ Ngabangina mangana mingina, ye raiong isoc arohma yerecgema ngicngac gbokoyunuudeac hofocyunuma uatoa mekecde. Imocac ngeni ubagbori kecma garenge-mema ⁹ gofochima serima namma negen negensingnginango mangana minginaac yoac hefahebisia. Hefahema yofi negembisia, negen negensinggoc tosofocngina bangeha bangeha kecdae, yeni ifingoc kpenzeng imocngoc kpekecdae.

¹⁰ Anutu danggunuc mingina, yeac kuc kibikperagiango fefeseri fede nga yeng ngeni ihai Yesu Kristogoc kecgecdeac kpacngunuec. Nga ngeni kpenzennu naso wegenanec kecekemmagec, yengenaoc mengerengunuma nonggo tacngemmeu seria nanggecde.

¹¹ Ye kuc mingina amma kechereema kecbesande, imoc fora.

¹² Siriwano ye negen negensinggoc tosonina yeac yofi negemma deduae, ye uau serima namma meficnuu kibi wegena yomoc ohongemmeduae. Ni nanggengunuma Anutuac danggunuc fora imocac hepuc amma dekperagingemmeduae, ngeni imocac hoannu seria kecbisia. ¹³ Anu Anutungo Babirong taonnu kpebung kecdae, yeni nga ngeni nge-nahafoc meisngngunuec, yeni nga medacna Mareko, yeneng ubangerecyoac ngenearu faigec hade. ¹⁴ Ngeni heresongogoc hoangemema wenacngerec dema kpetiacfu titikokoc angemebisia. Ngicngac Kristogoc kpeketahemha kecdae, yeac ruaengo sasawa ngenearu febeso.

Petoroac Kibi 2

¹ Ni Simong Petoro, Yesu Kristoac wanacngic nga aposorongo kibi yomoc ohongemme-duea. Nenang Anutu nga memengerecnina Yesu Kristo, yeri dindingac, imocac amma nenang negen negensinggac nadunga mocgu meficgenemmeoc. Imoc wiac engena yombong. ² Anu ngeni Anutu nga Kebunina Yesu hafoangoc negengyemecmagec yereac danggunuc nga ruae, imocngo ngenearu sahema febeso.

³ Anutungo Kristoac dedengerec nga yeac kuc nga kibikperagiau kecnideac kpac-nunuec. Nenang ye negemmini Anutungo hama yengena kucfu kekec nga yeac sing modacnideac kuc sasawa nemmeeec.

⁴ Bangecac songo imocngo faka dzonggo dzonggoya meficgeude. Nga ngeni Anutuac kekecfu torokpema bangecac songo imoc wagecdeac Anutungo Kristoac kuc nga kibikperagia manau yoac dedzege engena angemmeec. ⁵ Ngeni imocac amma efaima serima namma negen negensingnginango faka dindingac meficgeboso nga fakangina dindingacngó negen negentegec meficgeboso ⁶ amma negen negentegecnginango garengeme kekec meficgeboso, garengeme kekecngo seserigoc kekec meficgeboso nga seserigoc kekecngo Anutuac enac tofoc tofoho meficgeboso, ⁷ Anutuac enac tofoc tofohongo dacmunac heresongogoc hoangeme kekec meficgeboso imocngo heresongo meficgeude.

⁸ Faka imoc sasawango ngenearu yadiseri amma fedacdeu ngeni ngisima kecma Kebunina Yesu Kristo hafoangoc negemmima kecgecde. Kecma kekec imocac fora gombunga homac fingecngemmeu mong mi obohogecde. ⁹ Nga ngic mong ye kekec imoc mi femide, ye kicpisic nga hereausing naric mi hentegerude, siriha imocacsoc. Ye kopocsiha warac duac duara, imoc bic nigeckpeec. ¹⁰ Tosofocna, ngeni Anutungo bic kpacngunuma meisngnginuec, ngeni mamangkima kufung tigecdeu naric mi mangunuude. ¹¹ Ifi anggec yeni ubangerec angemmemma Kebu nga memengerecnina Yesu Kristo yeac kekecseriac eucererennu heitaingunugec enggecde.

¹² Ngeni yoac fora bic negemma mekecgec imoc negenduae, amma sifu nasosoc yoac imoc heigbringemmabeadeac negenduae. ¹³⁻¹⁴ Amma sebinaac bedzo yomoc hesibadeac nasoya wegenede, Kebunina Yesu Kristongo imoc bic dekperaginene. Imocac sebinaac bedzogoc kecbade, imohai yoac goa heigbringemmema midingunubadeac negemba naric ande. ¹⁵ Amma ni ua imoc nasosoc mamangkima mekecduae. Mekecma homeba, yoac imoc mi nigeckngunuude.

¹⁶ Neni Kebunina Yesu Kristoac kuc nga hahanasoac deing, imoc nemusiducgoc torokpeni songea anudeac mi deing. Neni yeac kuc nga kibikperagia engena kicninango hemma negeninggac hepuc amma yofi dedimbe, ¹⁷ Anutu Manggacngó eweheihei nga kuc kibikperagia mimanu kuc kibikperagi engenatoa imocac manaunac enacudu-mengno fingecma yeac yofi deec,

“Yomoc neac Songomedacna, ni ye hensongo ammiduae.” (*Mataio 17:5; Mareko 9:7; Ruka 9:35*)

¹⁸ Neni yegoc momoc tiki kpetiacfu nammina ubaudumeng imocngo kurumennunac fingeru negening.

¹⁹ Ifi negemma, profete yeneng yoac ohogec, imoc nenannu seria fede. Imoc kifa mong isoc nga imoc amabangec kundung fede, imohai mekperagimanu ama wereckenu asoac asomengngó herenginau dzema mekperagingunuude, ngeni kicngina ihacgeng fima hoanggegec ngereeude. ²⁰ Nga profete yeneac yoac sasawa mitikibiu oho ohoya fede, imoc yeni yenang ubanginaac yoac mong mi degec, kpac. Ngeni imoc negentegecbsia.

²¹ Imoc yofiac, profeteyoac imoc ngic songou fingeru mi degec, imoc Anutuarunac nga Tiri Asungo imoc mehama enacnginau faiu degec.

2

¹ Warac ngicngac yeneac botucfu profete ikoha kecgec, ifi isocngoc kpoukpou ikoha ngeneac botucfu ifingoc kecgecde. Yeni dedesifuc yoac goa ikoha dema waic waic botucnginau mehama kekecngina memanganegede. Nga Kebungo bic bummeyunuec, ye ifingoc busic kpema yenaoc ebic witinginau faigec, imocnggo bic memanganeyunuude. ² Kpoukpou ikoha yeni faka hania hania mangana gameagoc angkecgec ngicngac homacngo modacyunugec yeni imoc hemma yoac foraac sing deendema anggecde. ³ Anu kpoukpou imoc yeni ngeneac dzofinac hensongo amma ikocyao dema hodzinggema wangecngunugede. Nga Anutungo faka ifia bicngoc ngadeheec amma yofinenggac yoacfу faiyunuma memanganeyunuude.

⁴ Angero yeneng kopocsic maficgegec Anutungo mi onggongyunuma hofeac kundung seriau ukuyunu kemegec. Kemegec ye ihai sengngo witicyunu desidesi nasoac tomai kecdae. ⁵ Nga Noaac nasou habutoa Anutuac yoac ferahegec mi onggongyunuec, kpac. Yeni ine dokudzohong deu erema semeyunu homegec. Nga Noa ye faka dindingac dedekperagingic, ye nga yegoc ngicngac seweng, yenisac onggongyunuec. ⁶ Anu Sodong nga Gomora taong, yeri desiyuruma memanganeyuruu hamangirasac feec. Nga ngicngac Anutuac sing kpema kecdae, yenerau kecma ifi isoc fingebesandeac ongea edzacyunuma ifi anec. ⁷ Yeneng kaisero faka nga mangana hania hania amma Anutuac yoac kpegec, Roti ye ngic dindingacngo fakangina ifia hemma ubea ebiriu Anutungo onggonggeec. ⁸ Ye ngic dindingacngo yeneac botucfu kefecac uamemesoc kopocsic faka angkecgec, imoc henu ubahereango yeneac faka manganaac amma ebic mema modzotitiu kefec.

⁹ Ngeni imoc hemma Kebuac sing yofi negenggecde, ngicngac Anutu eweheimima yeac enac tofohoandae, yeneac faitobang fingecyemmeu Kebungo imohacnac onggongyunudeac kuha fede. Nga fakangina manganagoc kecandae, yeni ine witicamau faiyunuu tacmagec yoacfу faiyunuudeac nasoya haude. ¹⁰ Ngicngac yeni uba eseaac songo modacma faka seuhagoc hoanggeandae, ye yenerunoc ifi angkecde. Yeni Kebu ngadehema deendema amma yenang songo modacma kengeha kpac sawaac asu engena demanganeyunugede. ¹¹ Anu angero kucngina monggoc yeni sifu Kebuac kicfu asu imoc mi demanganeyunugec.

¹² Yangkposi yeni momorongnginaac songo modacandae, yeni fingecgec eng yunuandimbe. Nga kpoukpou ikoha yeni yangkposi isoc momorongngina eng modacma wiac mi negendae, imoc demanganegede. Amma yeni fakangina mangana modacgec Anutungo memanganeyunuude. ¹³ Yeni faka mangana amma imocac turunga megecde. Yeni enackerec amma wenac dzongiau neneyakatoa homac negecdeac ayemmeude. Ayemmeu yeni ngenigoc yaka enacurec nema faka seuhagoc nga gameagoc mema sogaima kecandae. ¹⁴ Ifi kecma kichodung faka homac amma ngac yeneac kickerec amma kopocsic gebeha kpac angkecdae. Amma ngicngac negen negensinggoc amma mi serigec, yeni faka manganau kerereyunuma wangecyunugede. Areng imocfia yeni sowecac nambaracfora.

¹⁵⁻¹⁶ Bireang Beoroac medac, ye dzofinac songo negemma Anutuac sing ferahema hiedzoac ua meu donggi yoac mi dedeango ngic isoc dehanec ammima profetengo sing segema faka kapaya amma kenghei hahei anecac kpae heimie. Nga kpoukpou ikoha, yeneng Bireanggac sing modacma sing dindingac wama sing segegecde. ¹⁷ Yeni dokukiwa dzike dzikea nga hoeng murayowarec yereng kpema fifiranggeandape isoc. Anutungo yeneac tatac imoc kundung dzapac ihai deec.

¹⁸ Ngicngac sing segeandae, yenerunac bure mema woramagec kpoukpou ikohango enacdoku ayemmemba yoac kuneng dema kaiseroac sing nga uba eseaac songou monggoc wangecyunugede. ¹⁹ Hofeac singngo kpoukpou ikoha witicyunude, yeni deandae, "Ngicngac yoacnina negenggecde, ngeni witicngina kpac anggecde." ifi dema sing segeandae. Nocac wiac monggo witicgude, ye kebuga anude. ²⁰ Nga yeni Kebunina nga memengerecnina Yesu Kristo negentegecma namma bangecac faka seuhagoc bic wagec,

yeni monggoc kopocsicfu kenggec witicyunu makpegecdeu ebictoanginagoc anggecde. Nga ebic imocn go warac ebicgoc kecgec, imoc feraheude.

²¹ Ngic mong ye ubamereng amma Kebuac kpetiac singyoac mema sing dindingac negemma modacande, ye imohacnac monggoc dzigenema keema ebictoa meficgeude. Imocac yeni hanahema sing dindingac negenggec naso imohai mi hoanggebraungo ngereebac. ²² Anu yoac heiheia mong yofi fede,

Kasingo urumma urung urunga imoc monggoc dzigenema neude. *(Yoac negen negengagoc 26:11)*

Nga berecngo doku nadzicmaguc monggoc goteng nadzirude.
Imocac fora imoc yeneac kekecfu fingerec.

3

¹ Songo tosofocna, ngenec kibi andenga yohockang yomoc ohongemmeduae. Kibi yohockang imocn go ubanegen negengngina heigboriu negentegecma kongaha kecbisia.

² Profete kpetiac, yeneng wiad ngade fingerudeac yoac imoc bic ohogec. Nga Kebu memengerecninango singyoac aposorofora yemmeu yeneng ngenearu hama imoc edengunugec, imoc negenggec fedeac monggoc heigboringemmeduae. ³ Ngeni yofinoc negenghombisnia. Naso wisic wisickeu desusuic ngicngac goa yeneng fingecma yenang faka manganaac hereyacyac modacma desusuic angemmema ⁴ degecde, “Haudeac edengunuec, ye damoc kecde? Anutungo hanac hanaheunaacngoc wiad sasawa deu fingerec nga mangesafocnina homegecfunac nang erekecma yaguc kecdimbe, imoc sasawa yeni warac feec isoc siriha mockicngoc fede.”

⁵ Yeni ifi dema yoac yomoc wagecde, Anutungo bicngoc bicngoc yombong yoac deu sawa fingerec nga bangec dokuunac fingegecma erema feec. ⁶ Anu kecma ye dokungoc monggoc edeu yadima bangecfu wiad sasawa feec, imoc semeu manganema kpac andarec. ⁷ Amma Anutungo yoac monggoc dema, bangec yomoc nga wiad sasawa sawau yofinenggac fedacde, imoc faiyunuu gerekac tomai fedae. Kecma ngicngac Anutu ngadehema kecdae, yeni yeac yoacf u turungngina mema manganegede, naso imohai bangec nga wiad sawau fedacde, imoc gerecngo dzedarude.

⁸ Songo tosofocna, ngeni ine wiad mocgu yomocac mi nigecngunubeso, Kebuac negen negennu uameme mocgu imoc kifa wan tauseng, ifi isoc. Nga kifa wan tauseng, imoc uameme mocgu, ifi isoc.

⁹ Kebungo haudaec deecmoc, ye dafi amma tondzera ande, ngic goango ifi deandae. Nga ifi kpac, imoc ine yofiac, ngicngac ngeni hofeu kemegecdeac songea mi angkecde. Ngeni ubamereng anggecdeac ye modzotitia kpac naso ngemmema tomaingina kecde.

¹⁰ Nga Kebuac hahanaso, imoc hamangec ngicngco haandae, ifi isoc haude. Naso imohai sawau wiad sasawa fedacde, imoc gerecngo yonohodarude nga sawango udumengtoagoc aockema kpac andarude. Amma bangec nga wiad sasawa maringo memea imocac witiau fede, imoc monggoc mi feude.

¹¹⁻¹² Ifi anu wiad sasawa sawau fekendacde, imoc gerecngo yonohodaru sisingaima gagubang amma kpac andarude. Imocac amma ngeni kekecngina garenggema kpetiac kecma Anutuaru hama yegoc ruaeua uba mocgu kecgecdeac ngeni kpetiac nga kongaha kekecac tembuc tembuc ngombongemema kembisia. ¹³ Nga ngeni komoc kpegecdeac Kebuninango modzotitia kpac uaya mekecde, ngeni imoc negensibisia. Nga negen negentegec imoc Anutungo songo tosonina Pauro miec, ye imoc modacma yoac imocnog negensima kibi ohongemmee osogec. ¹⁴ Nga yeng kibi sasawa ohoec, imohai yoac yoc ohongemmeduae, imoc momoc dekperagiande. Amma yoac goa ohoec, imoc ngicngac goango negentegecgecdeac siriha

¹⁴ Songo tosofocna, ngeni imocac tomai kecma Anutuaru hama yegoc ruaeua uba mocgu kecgecdeac ngeni kpetiac nga kongaha kekecac tembuc tembuc ngombongemema kembisia. ¹⁵ Nga ngeni komoc kpegecdeac Kebuninango modzotitia kpac uaya mekecde, ngeni imoc negensibisia. Nga negen negentegec imoc Anutungo songo tosonina Pauro miec, ye imoc modacma yoac imocnog negensima kibi ohongemmee osogec. ¹⁶ Nga yeng kibi sasawa ohoec, imohai yoac yoc ohongemmeduae, imoc momoc dekperagiande. Amma yoac goa ohoec, imoc ngicngac goango negentegecgecdeac siriha

kpac. Nga ngicngac goa mitiu mi heiserima negen negentegecngina kpac kecdae, yeneng yoac imoc mereng kpereng dema kecdae, imoc yeni yenaoc memanganeemema kpac anggecde. Amma mitikibiu yoac fede, yeni imoc momoc mereng kpereng deandae.

¹⁷ Songo tosofocna, ngeni imoc bic negendae, imocac singyoac kpeandae, yeneng wangecngunugec tiposockema mangunubacac ngeni garengemema kecbisia. ¹⁸ Nga ngeni Kebu memengerecnina Yesu Kristo yeac danggunuc nga negen negengtoa imohai yadiseri ambisia. Ye yaguc nga nasoya kpac dengerebesonga, imoc fora.

Yohaneac Kibi 1

¹ Bicngoc bicngoc yombong hanac hanaheaunacngoc kefec, neni ye kedzacninan go negemma kicninango siriha nga fakaya hemma marininango kpesereing. Kekecac Yoac, ngic yenoc dekperagidimbe. ² Kekec imocnoc fingectegeru hemma kekecseri mingina yeac hepuc amma dekperagima edengunudimbe. Yeng warac Manggacgoc kefecngo nenannu fingerec. ³ Neni wiac hennegeng aning, imoc ngeneng nenigoc urec kekec kecnideac dekperagidimbe. Nga urec kekec, imocngo Manggac nga Medaha Yesu Kristo, yerigoc fede. ⁴ Sogac sogaininango hafoangoc fingerudeac yoac yomoc ohongemmedimbe.

⁵ Neni yearunac yoac yomoc negemma ngenearu yofi dekperagidimbe, Anutu ye kperagi nga yearu kundung mong mi fede. ⁶ Nga yegoc urec kecdimbe dema kundunggac fakaungoc kecnideu nenang ikoc amma faka fora mi modacnide. ⁷ Ye kperagiau kecde, ifi isoc nenang kperagiau kecnideu, ureckekec kecnide. Ifi kecmina medaha Yesuac sacngo kopocsicnina sasawa dzuacnemmekefude.

⁸ Nga kopocsicgoc mi kecdimbe denideu nenang ikocfu wangece meni yoac forango ubahereninau mi feude. ⁹ Nga kopocsicnina deficgenideu Anutu faka dindingac mekec-dengo yoac dedea modacma kopocsicnina wanemmema mangananina sasawa dzuarude. ¹⁰ Nga nenang kopocsic mong mi meing denideu Anutu ye ikocngic demini yeac yoacngo ubahereninau mong mi feude.

2

¹ Nambaracfocna, ngeni kopocsic mi megecdeac kibi yomoc ohongemmeduae. Nga mongno kopocsic meficgeudeu nenang memefic yoacdede mong kecde, imoc Yesu Kristo. Ye ngic dindingacngo Manggacac kicfu agennina tikecde. ² Ye nenang kopocsic ac amma yengena sacfusiango bunnina bic meec. Amma nenangsac kpac, ngicngac bangectoa bangec yomohai kecdae, yeneac momoc.

³ Anu nenang Anutuac singyoac modacnide, imocngo ye negemmima negentegecnide. ⁴ Ngic mong ye Anutu negemmiduae dema yeac singyoac mi modacande, yeng ikocngic nga yeac ubahereau yoac fora mong mi fede. ⁵ Nga mong ye Anutuac yoac mekefude, yeac heresongongo ubahereau hafoangoc fingerude. Sing imohainoc Anutuac hereu kecdimbe, imoc negentegecnide. ⁶ Nga mong ye Anutugoc kecduae deande, yeng Yesungo kefec, ifi isoc kecbeso.

⁷ Songo tosofocna, ni singyoac gboria mong mi ohongemmeduae, kpac. Ngeni yoac esea warac hanac hanaheaunacngoc negemma mekecgec, imocnogc mong-goc ohongemmeduae. Ngeni yoac warac negenggec, imocngo singyoac esea ande. ⁸ Kundung meickemanu kperagi fora bic fingectegecdeac amma singyoac yomoc gboria monggoc ohongemmeduae. Imocnko Kebuaru nga ngenearu fora ande.

⁹ Anu ngic mong ye kperagiau kecduae dema ogea ubango ukuude, ye kundunnu kecdengoc. ¹⁰ Nga mong ye heregoc ogeaac songo negengande, yeng kperagiau kefu ubahereau wiac mongno fuseu mi makpeude. ¹¹ Nga mong ye ogea ubango ukuude, yeng ine kundung manau kengkefude. Nga kundungngko kiwa mekundungkpeu ye sing dahai kende, imoc mi negenude.

¹² Nambaracfocna Anutungo Yesuac kpacac amma kopocsicnina waec, imocac kibi yoc ohongemmeduae.

¹³ Hanac hanaheaunacngoc kefec nga kecde, manggac ngeni ye bic negemmigecac amma kibi yomoc ohongemmeduae.

Nga sebigbori ngic, ngeni mangana mingina bic ferahegec ac amma kibi yomoc ohongemmeduae.

¹⁴ Naroangmedac, ngeni Anutu Manggac bic negemmigecac kibi yomoc ohongemmeduae.

Hanac hanaheunacngoc kefec nga kecde, manggac ngeni ye bic negemmigecac amma kibi yomoc ohongemmeduae.

Sebigbori ngic, ngeni kucnginagoc nga Anutuac yoacngo ngenearu feu mangana mingina bic ferahegecac kibi yoc ohongemmeduae.

¹⁵⁻¹⁶ Ngeni bangectoa bangec yomocac kekec nga bangecfu wiac sasawa fede, imocac songo mi negembisia. Imoc yofiac, wiac sasawa bangectoa bangec yomohai, imocac songo yofi fede, sebiac songogoc kekec nga kickerecgoc kekec amma bangectoa bangec yomocac finacac amma kpac kunenggoc kekec, imocnggo Manggacarunac kpac, imoc bangectoa bangec yomohacnac. Nga ngic me ngac mong ye bangectoa bangec yomocac songo mekefude, yeac ubahereau Manggacac heresongo mi fede. ¹⁷ Anu bangectoa bangec nga imocac songofaka, imoc kecma kpac andarude nga ngic mong ye Anutuac enac tofohoande, yeng kechereema kefude.

¹⁸ Nambaracfocna, naso yomoc wisickebeso ande. Nga Yesuac ngabayombong haudeac degec negenggec, ifia homac bic fingectegecgec kecdaeac amma naso wisickebeso ande, imoc negentegecdimbe. ¹⁹ Yeni nenanggoc kecgec nga sifu nenang arenannunac kpac. Yeni nenannunac ambau dede nenanggoc kecbau. Yeni sasawa nenanggarunac kpac, imoc didiu fingectegeerdeac, ifi fingerec.

²⁰ Kpetiac minginango Asuac dzimbonggo nadzicngemmieu ngeni sasawango yoac fora negendacdae. ²¹ Ngeni yoac fora mi negentegecdaec amma ngenearu kibi ohoai isoc kpac. Ngeni yoac fora negendae nga ikoc mong yoac foraunac mi hakecde, imoc negentegecdaec amma kibi yomoc ohongemmeduae.

²² Yesungo kopocsicac witicfunac mesinunuudeac maec, ngic mongngo imoc busic kpeude, ye ikocngic anude. Nga mong ye Manggac nga Medac yereac busic kpeude, yennoc Yesuac ngabayombong anude. ²³ Ngic mong ye Medac busickpede, ye ifingoc Manggac mi hoanggeude. Nga Medac dekperagima hoanggeande, yeng Manggac ifingoc hoanggeude.

²⁴ Ngeni yoac hanahema negenggec, imocnggo ngeneac hereu fekecbeso. Ngeni ifi anggecdeu Medac nga Manggac yereac heremanau kecgecde. ²⁵ Medac ye yengenaoc kekecserinoc nemmeudeac deserinemmee. ²⁶ Ngic goa yeneng ikocfu wangecn-gunubauac kibi yomoc ohongemmeduae.

²⁷ Ngeni Tiri Asuac dzimbong warac megec, imocnggo ubaonganginau feu ngeni kpoukpou monggac mi obohogecde. Yeac dzimbong imocnggo ine wiac sasawa kpoungemmekede. Nga yeng yoac kpoungemmede, imoc fora yombong, imoc ikoc kpac. Ngeni sing imohaingoc yeac hereu kecbisia. ²⁸ Nambaracfocna negenggec, Kebungo fingectegebru neni hahanasoyau yeac kicfu gamea kpac serima nannideac ngeni yeac heremanau kecbisia. ²⁹ Yesu ye kongaha, ngeni ifi negengandaeu ngic mong ye faka dindingac mekecde, yeac ifingoc negemma yofi negenggecde, ngic imocnggo Kebuarunac fingec fingera.

3

¹ Negenggec, Manggac ye nenanggac noc isoc ammiecac songogoc hoannunuma yengena nambaracfora denecdenemmea. Nga nenannoc nambaracfora kecdimbe. Anu bangectoa bangecac ngicngac yeni Manggac mi negemmidaeac nenang ifingoc mi negennunugecde. ² Songo tosofocna, nenang yaguc Anutuac nambaracfora kecdimbe. Kecma dafi ambesandimbe, imocac mi dekperaginemmeu negendimbe. Kecma yeng fingectegebru yengenangoc hennide imocac yeac siric isoc amma yengena onga annide, imoc ine negendimbe. ³ Ngicngac Yesugoc kpeketahemha wiac gombunga fingerudeac negensinggema kecdae, yeni sasawango kekecngina duacemema ye kpetiac, ifi isoc kpetiac anggecde.

⁴ Anu kopocsicngo dedeseri kpekpefaka andeac amma ngicngac kopocsic meficgandae, yeni dedeseriyaoac kpegecde. ⁵ Yesungo kopocsicnina meickeudeac fingerec. Amma yearuo kopocsic mong mi fede, ngeni imoc negendae. ⁶ Nga ngicngac yeac heremanau

kecdae, yeneng kopocsic mi mekecgecde. Anu ngicngac kopocsicgoc kecdae, yeni ine ye mi henggec nga ye mi negemmigec.

⁷ Nambaracfocna, ngic mongngo ikocfu wangeckunuu ngeni ye mi modacbisia. Ngic mong ye faka dindingac angkecde, yeng Yesu isoc dindingac anude. ⁸ Mangana minginango hanac hanaheaunacngoc kopocsic meficgeecac ngic mong ye kopocsic mekecde, yenoc mangana mingina yearunac. Anu Anutuac Medacngo mangana minginaac uaareng memanganeu kpac anudeac amma fingerec. ⁹ Ngicngac Anutuarunac fingecgect, yeni kopocsic mong mi mekecdae, kpac. Anutuac kpeango yeneac heremanau fedeac kopocsic megecdeac obohogecde. ¹⁰ Anu ngicngac faka dindingac mi mekecdae me tosofocngina heregoc yeneac songo mi negengandae, yeni sasawa Anutuarunac kpac. Imohainoc Anutuac nambarac damoc nga mangana minginaac nambarac damoc, imoc fingectegerude.

¹¹ Ngeni hanac hanaheaunacngoc dedekperagi yofi negenggec, nenang songogoc hoangemebisina. ¹² Ngeni Kaing isoc mi ambisia. Ye Satangng mingi ammiu munea kpehomeec. Amma ye yengena angammemea mangana femiec nga muneaac angammemengo dindingac anecac munea kpehomeec. ¹³ Negen negensinggoc tosofocna, bangectoa bangec yomocac ngicngac yeneng ubango ukungunugecde nga wiac imoc faka gboria, ngeni ifi mi negembisia. ¹⁴ Nenang tosofocnina heresongogoc hoangyunuandimbeac amma homec wama ferecgema kekecfu ening, imoc negendimbe. Nga ngic me ngac mong ye heresongogoc kekec mi negende, ye homecfungoc kefude. ¹⁵ Anu ngicngac tosofocngina ubango ukuyunuandae, yeni sasawa ngickpekpe andae. Nga ngic ifia yeneac hereu kekecseri mi fede, imoc negendae.

¹⁶ Yesu Kristongo nenanggac amma kekeha waec. Nga faka imoc hemma songogoc kekec foraac negen negeng meing. Imocac nenang ifingoc negen negensinggoc tosofocninaac amma kekecnina wabisina. ¹⁷ Ngic mongngo bangectoa bangec yomocac finacgoc kecma ogea henu sebiaac memeficfu makpekpea kefu ubahereau wosoefacgoc mi meficgeudeu Anutuac heresongongo yeac hereu mi feude.

¹⁸ Nambaracfocna, “Nenang heregoc songo negengemeeme.” Imoc enacobibicng me yoacac mi debisina, kpac. Nenang imoc faka foragoc yombong angkecbisina. ¹⁹⁻²⁰ Ifi amma yoac foraac arennu kecdimbe, imoc negendimbe. Anu ubahereninango wiac monggac yoacfu fainunu Anutuac kicfu monggoc meseriemenide. Anutu ye engenatoa nga ye nenang ubahereu wiac sasawa fede, imoc negendacde. Amma Anutungo nenang ubahere ferahede.

²¹ Songo tosofocna, ubahereninango yoacfu mi fainunuudeu Anutugoc seria kecnide. ²² Ifi kecma nenang singyoara modacma yeac songou wiac sasawa fede, imoc angkecdimbeac wiac mong me monggac Anutuarunac kpesima menide. ²³ Nenang Medaha Yesu Kristoac kpac negensinggema yeng edenunuec, ifi isoc heresongogoc hoangemebisina. Yeng singyoac imocnac nemmeec. ²⁴ Ngic mong ye singyoac yomoc modarude, yeng Anutuac hereu kefu Anutungo yeac hereu kefude. Amma yeng hereninau kecde, imoc Anutungo Asuya nemmeec, yeac kucfu negendimbe.

4

¹ Songo tosofocna, profete ikoha homacnjo bangectoa bangec yomohai kemma kecdaec amma ngeni asu sasawa mi negensingyunubisia. Ngeni hengising amma asu imoc Anutuarunac me kpac, imocac hentegecbris. ² Ngeni Anutuac Asu yofiu hensigecde, Asu sasawango Yesu Kristongo ngic siricfu fingerec, imoc deficgegecde, yeni Anutuarunac.

³ Nga asu sasawango Yesuac ifi mi deficgegecde, yeni ine Anutuarunac kpac. Asu imocnjo Yesu Kristoac ngabayombong anude. Yeng haudeac degec negenggec, imoc bic bangectoa bangec yomohai fingecma kecde.

⁴ Nambaracfocna, ngeni Anutuarunac. Nocac Asu ngeneac hereu tacde, yeac kucnjo bangectoa bangec yomocac asu ferahede, imocac amma ngeni profete ikoha bic feracyunugec. ⁵ Yeni bangectoa bangec yomohanac. Imocac yeni bangectoa bangec

yomocac negen negeng mekecma yoac degec bangetoa bangec yomocac ngicngac yeneng yenearu kedzac faigecde. ⁶ Nenang Anutuarunac, imocac ngicngac Anutu negemmidae, yeneng nenang yoac negenggecde. Amma mong Anutuarunac kpac, yeng ine nenang yoac mi negenude. Imohainoc nenang yoac foraac Asu nga asu ikoha hentegecnide.

⁷ Songo tosofocna, nenang heresongogoc hoangemebisina. Heresongogoc hoangeme kekec, imoc Anutuarunac, imocac heresongogoc hoangemema kecbisina. Nga ngicngac ogofocngina heresongogoc hoangyunuanda, yeneng Anutuarunac fingecgac amma yeni Anutu negendae. ⁸ Anutungo heresongogoc kekecac hania, imocac ngic mong ye ngicngac ogofora heresongogoc mi hoangyunuande, ye Anutu mi negende. ⁹ Nga Anutungo Medaha mocgu, yearu kekecseri menideac sueu bangetoa bangec yomohai maec. Sing imahainoc Anutungo heresongogoc hoannunu songea nenannu fingectegerec. ¹⁰ Nenang hanahema Anutu heresongogoc mi hoanggeing, kpac. Yeng ine nenang heresongogoc hoannunuma Medaha kopocsicinaac turung sacfusiango kpouudeac sueu maec. Imocngo songoac hania ande. ¹¹ Songo tosofocna, Anutungo heresongogoc ifi hoannunuecac nenang ifingoc heresongogoc hoangemebisina. ¹² Ngic mongng Anutu mi henec. Nga nenang heresongogoc hoangemekecdimbeu Anutungo nenang hereu kefu yeac heresongogoc kekecngko nenannu hafoangoc bic fingectegerec.

¹³ Anu ye yengena Asuya nemmeecac amma yofi negendimbe, nenang yeac heremanau kecni yeng nenang heremanau ifingoc kefude. ¹⁴ Manggacngo ngicngac bangetoa bangec yomocac ebicfunac mesiyunuudeac Medaha faiu maec. Neni imoc hemma hepuc amma dekperagikecdimbe. ¹⁵ Ngic mong ye yofi dema deficgeude, "Yesu ye Anutuac Medac" Anutungo yeac hereu kefu yeng Anutuac hereu kefude. ¹⁶ Nga Anutungo heresongogoc hoannunukecde, imoc negentegecma negensinggedimbe.

Anutu ye heresongogoc kekecac hania nga ngic mong ye ngicngac ogofora heresongogoc hoangyunu kecde, yeng Anutuac hereu kefu Anutungo yeac hereu kefude. ¹⁷ Ifi kecmina heresongogoc kekecngko nenannu hafoangoc feude. Feu desidesi nasou nenang negengyohoha kpac serima nannide. Nga nenang bangetoa bangec yomohai Yesuac onga isoc kecdimbe. ¹⁸ Kengecgoc kekec, imoc memetingagoc. Nga ngic mong kengecgoc kefudeu heresongogoc kekecngko yearu hafoangoc mi fingectegerude. Imoc yofiac, kengecngko heresongogoc kekec, imocac manau naric mi feude. Imocac amma heresongogoc kekecngko hafoangoc fede, imocngo kengec kporarude.

¹⁹ Anutungo hanahemangoc nenang heresongogoc hoannunuec, imocac amma heresongogoc kecdimbe. ²⁰ Nga ngic mong Anutuac songo negenduae, ifi dema ogea ubango ukuude, ye ikocngic. Ngic mong ye tosea kicngo hehena, ye heresongogoc mong mi hoanggeudeu ye Anutuac kicngo mi hehena, yeac songo naric mi negenude. ²¹ Kebungo singyoac yofi nemmee, ngic mong Anutuac songo negende, yeng ifingoc tosoya heresongogoc hoanggebeso.

5

¹ Yesungo ebicfunac mesinunuudeac maec, ngicngac ifi negensinggedae, yeneng Anutuarunac fingecgac. Nga ngicngac Manggacac songo heregoc negendae, yeni Medacyombonga yeac songo ifingoc negenggecde. ² Imocac sirihau nenang heregoc Anutuac songo negemma singyoara tofohonideu Anutuac nambaracfora yeneac anemeude, imoc negendimbe. ³ Nenang Anutuac singyoac tofohoma yeac songo heregoc negengyombonggenide. Nga yeac singyoac imoc ebira kpac.

⁴ Ngicngac Anutuarunac fingec fingera, yeni sasawango firang amma bangetoa bangec yomocac kuc ferahegecde. Nga nenang negensinninanganonoc firang amma bangetoa bangecac kuc sasawa feraheude. ⁵ Merang firang amma bangetoa bangecac kuc ferahaude? Yesu ye Anutuac Medac nga ngic me ngac mong imoc negensinggede, yeng bangetoa bangecac kuc ferahaude.

⁶ Yesu Kristongo dokuu nga sacfu haec. Ye dokuusac mi haec, kpac. Ye dokuu nga sacfu momocngoc haec. Amma Asu ye yoac foraac Asu, imocac amma yeng Yesuac hepuc amma ye dekperagiude. ⁷ Wiac harebec yeneng Yesuac hepuc amma ye dekperagikecdae. ⁸ Imoc Asu nga doku amma sac, yeni uba mocgu amma yeac hepuc angkecdae. ⁹ Ngic yenyi ogonginaac hepuc anggec yoacngina hoanggedimbe. Ifi annideu yofi negembisina, Anutungo wiac mong nanggeudeu imocngo engena ande. Amma ye medaha nanggema yeac hepuc ande. ¹⁰ Ngic mong ye Medaha negensinggede, ye hereango yofi dekperagide, “Yesu ye Anutuac Medac.” Nga mong ye Anutungo Medahaac yoac hepuc amma dekperagiec, imoc mi negensinggeudeu, yeng Anutu ye ikocngic, ifi demiude. ¹¹ Nga dedekperagia yomocngo hepucnina ande, Anutungo kekec wisic wisickea kpac nemmeec nga kekec imocngo Medahaaru fede. ¹² Ngic mong ye Medac hoanggeude, yeng kekec foragoc kefude. Nga mong ye Anutuac Medac mi hoanggeude, ye ine kekec foragoc mi anude.

¹³ Ngicngac Anutu Medahaac kpac negensinggedae, yeneng kekecserigoc kecgecde, ngeni imoc negentegecgecdeac kibi yomoc ohongemmeduae. ¹⁴ Anu nenang yofi negentegecma negensinggedimbe, wiac monggac numubeso dema yengena songo modacma kpesimini imoc negennemmeude. ¹⁵ Nga nenang wiac mong me monggac numuni yeng negennemmeu wiac imoc bic meing dema yeac ifi negendimbe.

¹⁶ Ngic mongngo kopocsic mong homecac sinnu mi kende, ifia maficgeu tosoyango imoc hemma yeac numuudeu Anutungo kopocsicmeme ye kekec miude. Nga kopocsic goango homecfu kengkengac sinnu fede, kopocsic ifiaac numugecdeac ine mi deduae. ¹⁷ Mangana sasawa imoc kopocsic nga kopocsic goa imocngo ngic homecfu mi faiyunuude.

¹⁸ Nenang yofi negendimbe, ngicngac Anutuarunac fingec finger, yeni sasawango kopocsic mi megecde. Nga yengena Medahango habangyunuu mangana minginango naric mi memanganeyunuude. ¹⁹ Anu nenang Anutuac nambaracfura kecdimbe, imoc negentegecdimbe. Nga banectoa bangec yomoc mangana minginaac kucac bageu fede. ²⁰ Anu nenang yoac fora Mingina negemminideac Medahango hama negen negentegec nemmeec, imoc negendimbe. Amma Anutu yoac fora mingina, yeac heremanau nga Medaha Yesu Kristo, yeac heremanau momoc kecdimbe. Yennoc Anutu fora amma kekecseri. ²¹ Nambaracfocna, ngeni nemu yeneac hoannu mi kenggecdeac garengemebisia.

Yohaneac Kibi 2

¹ Nenggac meising isingga, ge nga nambaracfocga ngenearu yadanginango kibi yomoc ohongemmduae. Ni yoac foraac amma ngeneac heresongo negenduae. Nga nisac kpac, ngicngac sasawa yoac fora negendae, yeneng ifingoc heregoc ngeneac songo negendae. ² Nga heresongo imocngo yoac foraac amma nenang hereu fema nasosoc nenanggoc fekengkefude.

³ Anutu Manggac nga Medacyombonga Yesu Kristo, yereac danggunuc nga wosoefac amma ruae, imocngo yoac forau nga songogoc kekecngo nenanggoc febeso.

⁴ Nambaracfocga goa yeni yoac fora Manggacngo denemmeu meing, imocac enac tofoc tofoho kecdae, ni yoac imoc negemma ubangerectoa negenduae. ⁵ Nga nenggac, ngeni neac yoac yomoc modacgecdeac ohongemmema desambic angemmeduaeac negemma imoc modacbisia. Nenang heresongogoc hoangemebisina, imocngo singyoac gboria kpac. Imocnoc hanahema modacereing. ⁶ Nga Anutuac singyoac modacerekecni imocngo songoac hania. Nga ngeni singyoac hanac hanaheaunacngoc negenggec, imoc yofi, ngeni heresongogoc hoangemema kecbisia.

⁷ Anu uba mesufungic homacngo bangetoa bangec yomohai kemma kecandae, yeni Yesu Kristo ngic siricfu fingerec, imoc mi negensinggema ye busic kpeandae. Yesuac ngabayombong, ye uba mesufungic amma ye siriha ifia. ⁸ Ngeni imocac burengina gombunga meemebisia. Wiac megecdeac uatoa meing, imocngo wangunubacac garengemekecma bungngina hafoangoc mebisia. ⁹ Netoc netohongic kecma Yesu Kristoac kpoukpou yoacac sing feraheandae, yeni Anutua kpac kecdae. Nga mongngo kpoukpou yoara seria mekefu Manggac nga Medac yeri yerahafocngoc yegoc kecdape.

¹⁰ Nga ngic mongngo kpoukpou yoara siriha imocngoc mi mehaudeu ngeni ine yegoc mari meme faka mi ambisia nga ngeni amanginau mi heitaibia. ¹¹ Ngic mong ye ngic ifia yegoc mari meme faka anudeu, ye ngic imocac ua mangana, imoc emema mekefecde.

¹² Nearu yoac yofia ohongemmbeadeac homac fenende, anu kibiu ohoba mi ngereeude. Imocac amma ubangerecnina hafoangoc fingerudeac neannaoc haba ewacma enacfu denegeng annideac negensiduae.

¹³ Naingga meising isingga, yeac nambaracfocga yeneng ubangerecngina ngenearu faigec hade.

Yohaneac Kibi 3

¹ Gaio songo tosona, ni yadanginango yoac forau geac songo negemma kibi yomoc ohogenduae.

² Songo tosona, ge ubaongagango ebiha kpac nga wiacga sasawa ifingoc naric anudeac nga hafeia kpac kecnadeac numuanduae. ³ Ge faka fora nga yoac fora mekecma imoc gombunga tofohoanne, geac dedekperagi imoc tosofocnira yeneng hama degec negemba ngereyombonggeec. ⁴ Nambaracfocna yoac forau kecdae, imoc negemba ubangerecnango wiac sasawa ferahede.

⁵ Songo tosona, fakaga gombunga imoc mi wanec amma nenang arengfocnina nga hereaunac hakecdae, yeni momoc maficyunuannec. ⁶ Amma ge heregoc yeneac songo negemma maficyunuannec, ngic yeneng dedekperagiga imoc kpebung yeneac kicfu degec negening. Nga yeni monggoc kenggecdeac anggec geng Anutu songoyaac sirihau ayemmemma singgac memefic goa yemmemma sueyununa ngereeude. ⁷ Yeni Yesuac kpacac amma ua mekenggec, imohai bangec monnunac ngicngac yenearunac memefic mong mi megec. ⁸ Imocac yoac foraac ua nenhafoc menideac sing, imoc fingerudeac ngic ifianoc ubangerecac memefic yemmebisina.

⁹ Ni kpebung ngenearu kibi mong ohongemmei. Nga Diotrefe ye yengenaoc enara kecbeso ammide, yeng ine wanunuma mi hoannunude. ¹⁰ Nga neng kecma ngenearu habade isoc, yeng faka angkecde, imoc didiu dekpesi ammibade. Nga ye neneac dedengg-baringyoac sicsauc dema faka mangana ifia angande, imocng mi hetuckeu arengfocnina ifingoc ama mi heiyemmeande. Nga yeni arengfocnina ama heiyemmebeso degec yeng kpetarima kpebung ngadeau faiyunuande, imocnoc dekperagibade.

¹¹ Songo tosona, geng ine faka mangana ifia mi modacbesena, kpac. Ge faka gombunga modacbesena. Nga ngic mong ye faka gombunga angkecde, yeng Anutuarunac nga faka mangana angkecde, ye ine Anutu mong mi henec. ¹² Ngic sasawa yeni Demetrioac fakaya gombunga deandae nga yoac forango ifingoc ye dekperagikecde. Neni ifingoc yeac hepuc amma dengerekedimbe nga nenang dedekperagi imocng fora ande, imoc negennec.

¹³ Nearu yoac ohogembadeac homac fenende nga imoc kibiu ohogemba mi ngereeude.

¹⁴ Ni wegenanec gearu haba gegoc ewacma enacfu denegeng andedeac negensiduae.

¹⁵ Wosonomangngo gegoc febeso. Tosofocnina yei kecdae, yeneng gearu ubangerecyoac faigendae. Nga geng tosofocnina kpacnginasoc ubangerecyoac tahockema yenearu dekembesena.

Yudaac Kibi

¹ Ni Yuda, Yesu Kristoac wanacngic nga Yakoboac munea. Anutu Manggacngo ngicngac kpacngunuma heresongogoc hoangngunuande, ngeni seria nanggecdeac Yesu Kristongo garengngunuma kecde, ngenearu kibi yomoc hade. ² Anutuac wosoefac nga ruae amma heresongogoc kekec imocngo ngenearu sahema kembeso.

³⁻⁴ Songo tosofocna, Anutungo nenahafoc komoc kpenideac mengerenunuec, imocac yoac kibiu ohongemmabadeac efaiyombonggeai. Nga yoac imoc wama ngic goa botucnginau sufu sufuu bic eregec kecdaengoc, yeneac amma yoac mong ohobeso negenduae. Imoc yofi, ngeni sing dafi Anutu negensinggegecdeac yeng warac nenang kpetiac areng nemmedarec, imocac dzikac seriangoc kpebisia amma ngeni imoc mi wagecdeac gorongina kpeduae.

Ngic imoc yeneac negemma warac mitikibiu yofi oho ohoya fede, "Anutungo fakangina isingga desiu kopocsicac turunga fingecyemmeude." Yeneng bangecac faka hoanggema Anutuninaac danggunuc nga wosoefac faka mereng kpereng dema sebinginaac negensongo amma manganaac kpaе mong mi heiandae. Nga yeni Kunennina nga Kebunina Yesu Kristoac negenggec mamea anu basic kpeandae.

⁵ Anu ngeni yomoc bic negenggec nga monggoc heigboringemmabadeac negenduae. Kebungo hanahema ngicngacfora Aigita bangecac ebicfunac mesiyunuу hagec amma ngade ngicngac mi negensinggegec, yeni kpebucyunuу homedacgec. ⁶ Nga angero goa yeni kuneng tatacngina imocac negenggec engena mi anu amayombongngina wama magec. Magec Anutungo seng seria wisic wisickea kpac, imocngo witicyunuma kundung seria manau faiyunuu desi desi nasotoaac tomai kecdae. ⁷ Yeneng warac Sodong nga Gomora ngicngac amma guruama yereac wegenacfу tackenec, yeneng faka angandae, ifi isoc anggec. Yeni kaisero amma sebinginaac songo sicsauc modacgec.* Sodong nga Gomora ngicngac, yeni gerecfu yonohoec, yeneng gerec wisic wisickea kpac imocac ongea andae amma ihai yaguc kecma kopocsicnginaac turung mekedcaengoc.

⁸ Amma gaukpeping sicsauc deandae, yeni imoc negemmaguc sebingina sifu memanganegec wonongagoc angande. Yeni kuc engena hania hania, imoc ubango wama asu engena kecdacdae, yeni eyemmemu desusuic angande. ⁹ Nga Mikae ye angero yeneac enara mong kecde, yeng mangana minginagoc Moseac farenggac amma ewema yoacngira engemmama anec. Anu ye kengec amma mangana mingina emmima desusuic ammima ebicfu faibesonga yoac mong mi deec, kpac. Ye yofisac deec, "Kebungo geac yoac desibeso." ¹⁰ Anu ngic deduaemoc, yeni yamberec isoc negen negengngina kpac kecma wiа monggac hania mi negendae. Yeneng asu engena siricngina mi negentegecma eyemmemu desusuic angandae. Amma wiа ubasebinginau negendae, imoc modacma yenaoc memanganemegecde.

¹¹ Yeni Kainggac sing modacma hiedzongina fingerudeac Bireanggac sicsauc faka imocngo wangecyunuу yeni sing imoc bic kenggec. Amma Korango yoackpekpe anec, ifi isoc yeni bic yoackpekpe anggec, imocngo ebiriangoc memanganeyunuec. Imocac yeni sowecnginagoc. ¹² Ngeni yaka songogoc urecfu neandae, yeni botucnginau seuc heima gamengina kpac, yenaoc garengemegecde. Amma yeni wenacac hoeng kiaya kpac firangngko fifirangyunu kengandae, ifi isoc andae. Amma yeni ic goa foranasou fora kpac imoc kpefuckema ukugecde, ifi isoc andae. Ngic imoc yeni homec yohockang bic homegec. ¹³ Nga tempong kuneng kpema sofororoc seuhagoc mehaande, yeni ifi isoc gamengina ifi kapegecde. Yeni asomeng sing segedae, ifi isoc kecdae. Nga yeneac amma kundung dzapac wisic wisickea kpac faifaia fede.

¹⁴ Anu Enoko ye Adanggac fingecsahe yenearunac andenga sewennu fingerec, yeng yeneac profeteyoac yofi deec, "Henggec, Anutungo kpetiac arengfora teng tauseng

* 1:7: Fингec fingec 18:16-19:29; Sesememe 18:22-23; Roma 1:24-28.

nga dafiguc meyunuu hama ¹⁵ ngicngac sasawa angammenginaac sirihau isingyunuma desiyunuude. Nga ngicngac sasawa bangecac faka hania mekecma kopocsic meficgema Anutuaru ngabayoac dema yoac kpekpe kecgec, yeni imocac turunga megecde.”† ¹⁶ Yeni yoac homac osoma negeung nga ubakpekpe amma ubasebinginaac songo modacandae. Ifi modacma ngicngac yeni gombunga ayemmegecdeac, yeni sebingina meemra dekered ayemmeanda.

¹⁷ Songo tosofocna, Kebunina Yesu Kristoac aposoro yeneng wiac fingerudeac warac degec, ngeni imoc negenggec febeso. ¹⁸ Yoac yofi edengunugec, “Naso wisickeau desusuicngic hania hania kecgecde, yeneng bangecac wiacsac negensima yenang ubasebiac songo modacgecde.” ¹⁹ Yenennoc kpebung hendzicyunuma uba eseango garengyunuu Tiri Asugoc mi kecgecde. ²⁰ Anu songo tosofocna, ngeni negen negensingngina kpetiac ande, imoc negemma yadiseri anggecdeac nanggeemebisia. Nga Tiri Asungo ngenearu ua meu ngeni nunumu ua mekecma ²¹ Anutuac heresongou kecgecdeac ua mekecbisia. Nga ifi kecmagec Kebunina Yesu Kristongo ubamangang angemmema kekec wisic wisickeu kpac ngemmeudeac tomai kecbisia.

²² Ngicngac negengyohoc angkecdae, ngeni yeneac ubamangang negemma ²³ goa gerecfunac meicyunubisia. Nga yeni uba eseango wambangina meu wonong angande, yeneac ifingoc ubamangang negembisia. Ifi amma yeneac kopocsicac kengecngunuu uba eseaac wambangina wonongagoc ngadehebisia.

²⁴ Anutu yengenaoc garengngunuudeac kuc femide, imocac ngeni naric mi mangunuude. Yeng ngeni hesicngunuma yengena kuc nga kibikperagiaac kicfu faingunuu ngeni kopocsicngina kpac sufufugoc imohai nanggecde. ²⁵ Memengerecnina Anutu mocgungo kecde. Kebunina Yesu Kristo yeac amma eweheimima dengeren, yeng engenatoanina nga kuc mingina amma wiac sasawa fede, imocac buma ande. Ye wiac mi fingecmanu kefec nga yaguc kecde amma kecbesande, imoc fora.

† ^{1:15:} Yoac imoc 1 Enoko 1:9 imohacnac. Kibi imoc mitikibiu mi fede.

**Yesuac
Mekperac Kperagi
Yohanengo Ohoe**

¹ Yoac yomoc Yesu Kristoac memekperagi. Yeac wanac ngicngacfura yeni wiac bic fingerudeac edzacyunubeso imoc Anutungo Yesu miec. Amma angeroya mong sueu yearusing yoara dekperagima wanacngiha ni Yohane, yoac imoc edenuec. ² Edenuu neng Anutuac yoac nga Yesu Kristoac dedekperagi amma wiac neannaoc hennegeng anai, imoc sasawa mekperagingemmeduae. ³ Naso wegenedeac mongngo profeteyoac yomoc osonegeng anude, ye kenehagoc. Nga ngicngac yeni yoac yomohai oho ohoya fede, imoc negemma hoanggegecde, yeni ifingoc kenecnginagoc.

⁴ Ni Yohanengo Asia prowins manau kpebung 7 kecdae, ngeneac kibi yomoc ohoduae. Anutu kefec nga kecde amma kecma habesande. Ye nga asu 7 yeac ngictau tatacac hoangau kecdae, yenearunac ruae nga danggunuc imocngo ngenigoc febeso. ⁵ Nga Yesu Kristoarunac ifingoc. Yeng yoac modac modac seria amma ye siducedengic fora. Ye fingecma homegec yeneac waracmedac amma bangecac ngictau yeneac kunengngina. Amma ye nenang songo negemma sawango kopocsicninaunac mesin-unuec. ⁶ Mesinunuma eucererenggac habu menunuma yegoc arenunuu neni yeac Anutu nga Mamaac kurumenggac womong gareng amma kecnide, imocac ifi anec. Yearu kibikperagi nga kuc imoc wisic wisickea kpac fekengkecbeso, imoc fora.

⁷ Henggec, ye hoenggoc hau ngicngac sasawa yeneng kicnginango hendacbesandae nga sebiau nenesari ammigec, yeni kicnginango ye ifingoc henggecde. Nga bangeha bangehaac areng sasawa yeni ye hemma fagung madzacgoc kiacbesandae. O, imoc fora.

⁸ Kebu Anutu ye kefec nga kecdeno amma kecma habesande, ye Kucseri minginango yofi dede, “Ni neannaoc A nga Y, hanac hanahea nga wisic wisickea.”*

⁹ Ni Yohanengo Anutuac yoacac nga Yesuac dedekperagiac amma Patmos nucfu kefai. Ngeneac dacngina, ngeni nga ni nenahafoc Yesugoc kpeketahemu kpendzeng nga eucerereng mekecma modzotitia kpac seria kecdimbe. ¹⁰ Kebuac naso kereng monnu Asungo nearu ua meu ngadenu enacudumeng kunengtoa mong trampet udumeng isoc negembare yeng yofi deec, ¹¹ “Ge wiac hennecmoc, imoc kibiu ohona. Ohoma kpebung 7 Efeso nga Simirna amma Peagamong nga Tiatira amma Sarde nga Firadefia amma Raodikea, ge kibi imoc yenearu faina kenu.”

¹² Ifi deu udumeng imoc hembadeac dzigeneai. Dzigenema hemba kifa nanangagoc 7 golngu memea nanggec yenena. ¹³ Yenembare yeneac botucfu mongngo Ngicac Medacac siric isoc nanec. *(Danie 7:13)*

Ye ngakpia herea hani susia kpesec kpeserea nga mokuhau fadeng golngu dzuge dzugea feec. ¹⁴ Ye orucsira nga orucdzoeya kongac kongac imoc ramadzoeya nga hoeng isoc† amma kiwa imoc gerec borang isoc. ¹⁵ Nga aieng sacsac gerecfu ohogec wewengaima feande, ye hania imoc isoc anec. Nga enacudumenga, imoc doku homac yeneac udumeng isoc anec. ¹⁶ Ye marifoiau asomeng 7 menanec nga enaraunac wasai beang mana ngadea enaragogcngo ereec. Kicmesuya imoc wenackiwa kuhogoc neraranggeande, ifi isoc anec.

¹⁷ Nga ye hemma haniau manuu homemea isoc febare yeng marifoango witinai faima deec, “Ge mi kengecguu, ni hanac hanahea nga wisic wisickea amma kekecnagoc.

¹⁸ Henna, ni homeai nga monggoc gbori kecduae. Nga negenna, ni wisic wisickea kpac kecengkecma homec nga hofe yereac ki mekecduae.

* ^{1:8:} Ye yofi deec, “Ni neannaoc Arafa nga Omega.” Arafa imoc grik yoac nonggeaac kibi hanac hanahea nga Omega imoc wisic wisickea. A imoc dedua yoac nonggeaac hanac hanahea nga Y imoc wisic wisickea. † ^{1:14:} Hania yoacf uohenggac “Nomang kongac kongac kiac isoc maande.” ifi oho ohoya fede.

¹⁹ Imocac ge wiac hendang imoc ohona. Ge wiac yaguc fede nga ngade fingerude, imoc momoc ohona. ²⁰ Asomeng 7 marifoiau menandua nga kifa nanangagoc 7 golngo memea hendang, imocac negen negeng sufufuya yofi ande, asomeng 7 yeni kpebung 7, yeneac angero. Nga kifa nanangagoc 7 yeni kpebung 7 andae.”

2

¹ “Ge Efeso kpebung, yeneac angeroaru kibi yomoc ohoma faina kenu.”*

“Ngic ye asomeng 7 marifoiau menande nga kifa nanangagoc 7 yeneac botucfu yerecgede, yeng ngeneac yofi dede, ² ‘Ni geac angammemega nga ua esaga amma seserigoc kecannec, imoc negendacduae. Amma ge ngicngac mangana yeneac mi anggengande, imoc negenduae. Ngic goa yeni yenanggac aposoro dedae nga aposoro mi andae, ge tobangyununa yeni ikocngic, imoc bic fingectegerec. ³ Ge modzotitia kpac serima kecannec nga kpacnaac amma ebic homac tofohoma kucga mi maec.’”

⁴ “Nga hanahema heresongogoc hoangyunuma kecne, faka imoc wanec, imoc ine negemba mi ngereede. ⁵ Ge warac kekecga dafiu wama maguec, imocac negen negeng ua mebesena. Amma ubaga meremma angammemega hanahema dafi angkecne, imoc mebesena. Ifi mi amma ubaga mi merennade isoc ni gearu hama kifaga nanangagoc tatahaunac meickebade. ⁶ Geac gombungaga ine yofi ande, ge Nikora yeneac angam-memengina ubango waanne, neng ifingoc imoc ubango wayai.”

⁷ “Kedzahagoc yeng Asungo kpebung yoac edeyunude, imoc negembeso. Nga firang anude, ye kekecac ic Anutuac eucererennu nande, imohacnac fora naric miba neude.”

⁸ “Ge Simirna kpebung yeneac angeroaru kibi yomoc ohoma faina kenu,”

“Ngic homema gboriec kecde, ye hanac hanahea nga wisic wisicke, yeng ngeneac yofi dede, ⁹ Ge kpndzeng kpema kecne, nga ge makpekpea, imoc negendacduae. Nga sifu finactoagagoc annec. Yudangic yeni yenanggac yudangic dema yudangic mi amma Satanggac kpekpeturang ama andae, yeni deendema anggengandae, ni imoc ifingoc negenduae. ¹⁰ Ge kpndzeng kpenadeac kengec mi ambesena. Mangana mingina yeng faitobannu faingunuudeac negemma ngenearunac goa witicamau faingunu ngeni uameme 10gac manau ubahodunggoc kecgecde. Goa ngunuhomegecde isoc geng ine yoacdedena modacma seria kecmana kekecac ira gembade.”

¹¹ “Kedzahagoc yeng Asungo kpebung yoac edeyunude, imoc negembeso. Firang anude, ye homec kpetea yohockanggo naric mi memanganeude.”

¹² “Ge Pegamong kpebung yeneac angeroaru kibi yomoc ohoma faina kenu.”

“Ngic wasai beang mana ngadea enara santac metacde, yeng ngeneac yofi dede, ¹³ ‘Satanggac ngictau tataha tacde, ge bangec imohai kecne, imoc negenduae. Amma Satangngko kecde, imohai yeni dedekperagingic nga enactofoc tofohana seria Antipa, ye kpehomegec. Anu ngeneac botucfunac Antipa kpehomegec ge sifu negensinnuma kpacna seria mekecma kpacnaac busic mi kpenec.’”

¹⁴ “Faka goa gearu fede, imoc ine modzona tide. Ngicngac goa gegoc kecandae, yeneng Bireanggac kpoukpou hoanggeandae. Yeng Israe nambaracfora mayunuudeac suba siriha dafi faiude, imoc Barake kpoumiec. Yeni nemuac seseyang nema sero ua megecdeac ifi anec.† ¹⁵ Anu goa yeni Nikoraac kpoukpou hoanggeandae, yeneng ifingoc gegoc kecdae. ¹⁶ Imocac amma ubaga merembesena. Ifi mi annadeu ni gearu bic yombong hama enacnaac wasai beangngoo yunubade.”

¹⁷ “Kedzahagoc yeng Asungo kpebung yoac edeyunude, imoc negembeso. Ngic me ngac firang anude, ni ye mannayaka‡ sufufuya, imohacnac mima hoc mong kongac kongac nga kpac gboria mong ihai oho ohoya fede, imoc mibade. Kpac imoc mongngo mi negemmanu ngic hoc nearunac mede, yengsac negenude.”

* 2:1: Grikyoacfusing angero titiha imoc siducedde. Siducedde yoc fede, imoc angero mong me ngic mong imoc mi dekperagide. † 2:14: Bangec kisiu 25:1-3, 31:16 ‡ 2:17: Yaka imoc yofi, Israe yeneng bangec kisiu yakaya kpac kecgec Anutungo asoacsoc yaka yemmeu bangecfu meficgegec, imoc kpara mannayaka degec. “Manna” imoc hebiraio yoac nga imocac titiha “Noc wiac?”

¹⁸ “Ge Tiatira kpebung yeneac angeroaru kibi yomoc ohoma faina kenu.”

“Anutuac medac ye kiwa gerek borang isoc nga hania aieng sacsac gerek dzema wewengaima feande, kperagia ifia, yeng ngeneac yofi dede, ¹⁹ ‘Ni angammemega nga ngicngac songogoc hoangyunukecne, imoc negenduae. Nga negen negensingga nga seserigoc kecma enactofoc tofoho angkecne, imoc negendacduae. Amma angam-memega wisic wisickeango hanac hanahea monggoc ferahade.’”

²⁰ “Anu ngac kpara Isebe, ye yengenaac profete deande. Ye kpoukpou ua ikocfu mekecma serofaka nga nemuac yang nene, imocac sinnu wanacngicfocna wange-cyunuande. Nga geng imoc mi kpetarimianneac modzona tide.[§] ²¹ Ye ubea meren-nudeac naso bic miba yeng ine ubea meremma kaiseroafakaya waudeac mi ammide.”

²² “Negenggec, ye hafei ammiu fefeu tarudeac faibade. Nga damoc yeneng yegoc kpeketahemma serofaka angandae, yeni yeac angammemeaunac ubangina mi merenggecde isoc kpndzeng homac kpegecde. ²³ Nga ni yeac nambaracfora kpe-bucyunuba kpebung sasawango yofi negentegecgecde, ni ubaherenginaac hengis-ingngic. Ni ngic tembuc tembuc angammemeaac sirihau turung kpoumibade. ²⁴ Nga Tiatira kpebunnu ngicngac tosea kecdae, ngeni sifu yeac kpoukpou nga Satanggac negen negeng keme kemea dedaemoc, imoc mi megec. Nga ngeni yofi edengunuduae, ngeneac witiu ebic gboria monggoc mi faibade. ²⁵ Amma wiac fengemmede, ngeni imoc seria mekecbisia nga ni kecma habade.”

²⁶ “Ngic firang anude nga neac angammeme seria mekecmanu naso wisickeude, yeac yofi deduae. Ni Mannaarunac kuc meaiac bangeha bangeha yeneac kuneng kecduae. Nga ifi isocngoc ngic firang anudengo bangeha bangeha yeneac kuneng kefudeac uakibi nga kuc mibade.

²⁷ ‘Nga yeng garengyunuma ngictauyasuya aiengngo memea mekecde, imoc mema ng-icng enang kpedzameandae, ifi isoc yasuyango kpedzameyunuude.’ (*Mitiyegec 2:9*)

²⁸ Amma ni asoacac asomeng ifingoc mibade. ²⁹ Kedzahagoc yeng Asungo kpebung yoac edeyunude, imoc negembeso.”

3

¹ “Ge Sarde kpebung yeneac angeroaru kibi yomoc ohoma faina kenu.”

“Ngic Anutuac asu 7 nga asomeng 7 metacde, yeng ngeneac yofi dede, ‘Ni angam-memega negendacduae. Ge naric kecne degengandae nga sifu homemea siric kecne.”

² Ge imocac amma gauunac yacma homeecac tosea homebeso amma fede, imoc men-gerema meserina. Imoc yofiac, geac angammemega hengising amba Anutuac hehennu soha mi anec. ³ Yoac hanahema gearu hau menec nga kedzacgango negennec, imoc negensima hoanggema angammemega mengerebesena. Ge gbori gbori mi kecnadeu ni hamangecngic isoc gearu habade. Amma noc nasou habade, imoc naric mi negennaden-goc.”

⁴ “Anu geac arenunac ngicngac efeanecngo ine wambangina wonong mi megec. Ni haniangina ifia henaiac ngeni wamba kongac kongac heima nigoc nenahafoe kengha naric annide. ⁵ Ifi anu mong ye firang ande, ye wamba kongac kongac heimigecde. Nga ni yeac kpac kekecac kibiunac naric mi meickebade. Amma yeac kpara Manna nga angerofora yeneac kicfu dekperagibade. ⁶ Kedzahagoc yeng Asungo kpebung yoac edeyunude, imoc negembeso.”

⁷ “Ge Firadefia kpebung yeneac angeroaru kibi yomoc ohoma faina kenu.”

“Kpetiac kekec nga faka foraac mingina, yeng Dawidiac ki metacde. Ye nagu witiu ngic monggo naric mi heiude nga nagu hei monggo naric mi witidue. Nga yeng ngeneac yofi dede, ⁸ ‘Ni angammemega negendacduae. Imoc yofiac, ge kucmama kecne amma sifu neac yoacna hoanggema kpacna mi ngadehenec. Imocac nagu mong witigemba ngic monggo imoc naric mi heiude.’”

[§] ^{2:20:} Ngac profeteyoac deec, yeac fakaya ngictau Ahaba enema Isebeac isoc anec.

⁹ ‘Anu ngic goango Satanggac kpekpeturang amaunac, yeni yenanggac ikoc amma yudangic dema yeni yudangic mi andae, kpac. Nga ni geac songo negenduae, imoc yeneng negentegecgecdeac ayemmeba yeni gearu hama hanigaufafoc heima ewehei anggenggecde. ¹⁰ Ge modzotitia kpac serima kecnadeac edeguai, imoc seriangoc mekecnecac amma ni faitobannunac meicgubade. Faitobang imoc bangectoa bangecac ngicngac yenearu fingerudeac dedea fede. Nga imoc fingeru neng ifingoc hoangguma imohacnac meicgubade.’

¹¹ ‘Ni bic habade, imocac geng ira mekecnec, imoc ngic mongngo mi meudeac angammemega garenggema seria mekecbesena. ¹² Firang anude, neng ye gununggeba Anutunaac womong manaac wotung seria anude. Nga ye womong imoc monggoc mi waude. Nga ni yeac witiau Anutunaac kpac amma Anutunaac taongtoaac kpara nga neanna kpacna gboria ifingoc ohobade. Taongtoa imoc Anutunaac taong nga imoc Yerusareng gboria amma kurumennunac neac Anutuarunac maude.’

¹³ Kedzahagoc yeng Asungo kpebung yoac edeyunude, imoc negembeso.”

¹⁴ “Ge Raodikea kpebung yeneac angeroaru kibi yomoc ohoma faina kenu.”

“Ngic kpara Fora, ye dedekperagingic amma yoara modackecde nga yoac fora dekecde. Ye Anutungo wiac sasawa deu fingerec, imocac hania kecde, yennoc yoac yomoc dede, ¹⁵ Ni angammemega negendacduae. Ge gerea me nomana mi kecne. Gerea me nomana kecbannu songo negembai. ¹⁶ Nga geng ine gerea me nomana mi kecma botuhau aka saraka annecac enacnaunac urunggubeso anduae. ¹⁷ Ni finactoanagoc nga wiac monggac mi obohoduae, ge geanggaac ifi dema sifu mangana yombong kecne ngic yeneng geac ubahodung negenggecdeac siriha, imoc mi negennec. Ge makpekpea nga kicpisic amma senggang kecne, imocac yofi edeguduue, ¹⁸ finactoagagoc annadeac nearunac gol gerecngo dzedzea mebesena. Amma senggang gameagoc mi nannadeac wamba kongac kongac mema wambagagoc ambesena. Nga kicfifi annadeac kicac kereha kicga imocnggo dzuacnadeac bummebesena.”

¹⁹ ‘Neng ngicngac damoc ngeneac songo negengngemmmeanduae, ngeni demeting nga ngunumengere angemmmeanduae. Imocac serima ubaga merembesena. ²⁰ Henna, ni naguu namma kpong kpong heikecduae. Heikecba mongngo neac kedzac faima ubadzidzina negemma nagu mesideu neng yearu emba neri neraha foc tacma yaka nedede.’

²¹ ‘Ngic firang ande, ni emba Mannagoc yeac tatacfu tacandipe, ifi isoc firang andemoc neng ngictau tatacfu tatacna miba neraha foc tacdede. ²² Kedzahagoc yeng Asungo kpebung yoac edeyunude, imoc negembeso.’”

4

¹ Anu ni nagu mong witi witia kurumennu henai. Amma ubaudumeng warac trumpet isoc yoac edenuu negennai, yeng yofi deec, “Ge yei erena. Yomocac ngadeau noc faka fingecbesande, imoc edzacgubade.” ² Ifi deu imohaingoc Asungo kicna merecgeu ni kurumennu ngictau tatac faifaia hemba ngic mongngo imocac witiau tarec, ³ yeac siriha hoc seria nga gombunga kpacngira yaspa nga kaneriang, yeri isoc. Nga asommadoc mong emerare hoc isoc, imoc ngictau tatac yerecgema feec.

⁴ Ni ngictau tatac goa, kpetengina 24, yenenai, imoc yeneng ngictau tatac yerecgema nanggec. Tatac imocac witiau ngic enara 24 tacgec. Ngic enara yeni ngakpingina kongac kongac heima orucngina witiau ira golngo memea heigec. ⁵ Ifi yenembare piratac nga udumengtoa amma gbumparandang ngictau tatacfunac fingerec. Ngictau tatacac kiwau kifa 7 dzetacgec, imoc Anutua Asu 7. ⁶ Nga ngictau tatac kiwau wiac mong kondungtoa isoc garasngo memea, garas imoc gontaninga henai.

Anu ngictau tatacac noboc noboc 4, imohai wiac kekecnginagoc 4 oronggema nanggec, ifi yenenai. Yeni hoangnginau nga ngadenginau imoc sasawa kicngo wake wakea. ⁷ Wiac kekehagoc warac warac, yeac siriha raiong isoc. Nga wiac kekehagoc mong yeac ngadeau, ye burumaka ngiwa kuhagoc isoc. Nga wiac kekehagoc mong

yeac ngadeau ye kicmesuya siriha ngic isoc nga wiac kekehagoc wisic wisickea, ye huntoctoa kpututuckeande, ifi isoc anec.⁸ Wiac kekecnginagoc 4 yeni tembus tembus kpegangngina 6. Nga sebingina imoc kicngo sasawa soko sokoya amma kpegangngina bageau, imoc ifingoc kiwagoc anec. Amma yeni wenac nga tofocnasoc kecnegenga kpac yofi dema kecgec,

“Kebu Anutu Kuctoa mingina ye kpetiac, kpetiac nga kpetiac. Ye kefec nga kecde amma kecma habesande.”

⁹ Anu wiac kekecnginagoc yeni ngictauac tatahau takecde nga wisic wisickea kpac kecbesande, dengerema eweheimima dangge dekecgec, naso imohai¹⁰ ngic enara 24 yeni Kebu ngictau tatacfu takecde nga wisic wisickea kpac kecbesande, yeac haniu makpegec. Makpema ye afehema irangina mesima ngictau tatacac haniau ukuma yofi dekecgec,

¹¹ “Ge Kebu nga Anutunina. Geng wiac sasawa dena fingecdarec. Ifi negemma meficgedacnecac geng kibikperagi nga eweheihei amma kuc sasawa medacna ngereeyombonggede.”

5

¹ Kebu ngictau tatacfu tarec, ye kibi kpou kpouya mong marifoiau mekefec. Nga imoc kibi manaac ngadeau kibi oho ohoya feec. Anu imohai kendokereha 7 onganginagoc, imocngo mendac mendanggea henai.² Ni angero mong kuhagoc hemba yeng uba kunengngo yofi arohoec, “Merac eweheiheiagocngo kibi mendac mendanggea mekpacgema kpou kpouya imoc witiudeac siriha ande?”³ Arohou kurumennu me bangecfu me bangec bageau ine ngic mong kibi kpou kpouya imoc witiude me oho ohoya, imoc hehenggacsoc mi kefec.⁴ Nga ngic mongngo kibi imoc mekpacgeudeac me hengenggac siriha hofogecac kiachodung hodung kiarai.⁵ Kiacba ngic enarafocngina yenearunac mongngo yofi edenuec, “Negenna, ge kiac wana! Yuda kisicfunac raiong nga Dawidiac godeaunac sera, yeng firang anec. Imocac amma ye kibi kpou kpouya mendac mendanggea 7 mekpacgema kibi imoc naric witiude.”

⁶ Ifi deu yofi henai. Ngictau tatac nga wiac kekecnginagoc 4 amma ngic enara 24 yeneac botucfu ramamedaha mong nanec nga ye kpehomemea isoc anec. Ramamedaha imoc ye baiha 7 nga kiwa 7. Kiwa imoc Anutuac Asu 7 nga imoc yeni banectoa bangecfu sueyunuyunuya.⁷ Yennoc kemma ngictau tatacfu tarec, yeac marifoiaunac kibi kpou kpouya meec.⁸ Kibi imoc memanu kekecnginagoc 4 nga ngic enara 24 yeneng yeac kicfu makpegec. Yeni sasawa tembus tembus gita kurerenganoc* nga sokoc golngo memea metacgec. Sokoc imohacnac hosuc homuna gombunga ereec. Wiac hosuhagoc sokocfu feec, imoc ngicngac kpetiac yeneac nunumungina, imocngo sokocngina wake wakea feec.

⁹ Anu yeni yegec mong gboria yofi heigec,

“Geng kibi kpou kpouya mema kendokereha naric mekpacgenade. Imoc yofiac, ngic yeneng kpebucgugec geac sacngo ngicngacfocga bummeyununec. Ge ngicngac fakaga fakangina nga yoacga yoacna amma sebi siric hania nga bangeha bangeha sasawa yenearunac bummeyununec Anutuac areng amma kecdae.

¹⁰ Bummeyunuma Anutuac eucererennu arengyununa yeni womong imocac gareng anggecdeac areng, imoc menec. Mena yeni bangeha bangeha yeneac gareng anggecde.”

¹¹ Ni kicna merec merecgeangoc kecbare angero homac yeni ngictau tatac nga wiac kekecnginagoc amma ngic enara 24 orongyunugec ubaudumengngina negennai. Amma yeneac kpetengina imoc 10 tauseng naso 10 tauseng nga tauseng naso tauseng.¹² Yeni ubaudumengtoanginagoc yofi degec,

“Ramamedaha kpebuc kpebucgea, ye kpac kuneng nga finactoa amma negen negentegec nga kuc nga eweheihei nga kibikperagi amma kenec mibesonga ngereede.”

* 5:8: Musiac onga goa hafac (244) imohai fede.

YOHANEAC KPEFING 5:13 438 YOHANEAC KPEFING 6:16

¹³ Nga wiac sasawa Anutungo deu fingecdarec kurumennu nga bangecfu amma bangec bageau nga kondunnu, yeneac manau wiac sasawa kecdae, yeneng yoac yofi degec negennai,

“Ngictau tatacfu tacde nga ramamedaha, yerearu kenec nga eweheihei amma kibikper- agi nga kuc wisic wisickeak pafekengkecbeso.”

¹⁴ Ifi degec wiac kekecnginagoc 4 yeni “Imoc fora.” degec nga ngic enara 24 yeni makpema ye afehegec.

6

¹ Ni imoc hembare ramamedahango kendokereha 7 ongayagoc warac warac kibi mendac mendanggeau tarec, imoc mekpacgeec. Nga wiac kekecnginagoc 4 yenearunac mongngo ubaudumenga parandanggac udumeng isocngo kpacma yofi deu negennai, “Ge hana!” ² Ifi deu ni fina becosic kongac kongac mong henai nga imocac witiau ngic mongngo tebeagoc tarec. Taru ira mong migec ye imoc heima firang anganggac arenna firang anudeac becosicfu kenec.

³ Nga ramamedahango kendokereha mong mekpacgeec, imohai negemba wiac kekehagoc mongngo “Ge hana!” deec. ⁴ Ifi deu becosic mong sacsacngo haec. Yeac witiu ngic tarec, ye wiac goa migec. Ye ngicngac yeni kpebucemegecdeac bangeha bangeha, imohacnac ruae meic meickeac kuc migec nga wasai beangtoa mong migec.

⁵ Nga Ramamedaha kendokereha monggoc mekpacgeu wiac kekehagoc mongngo monggoc yofi deec negenai, “Ge hana.” ifi deu becosic dzadzu mong henai. Nga ngic yeac witiu tarec, ye sigeri mong mariau metarec. ⁶ Nga wiac kekecnginagoc 4, yeneac botucfunac ubaudumeng isoc mongngo yofi deu negennai, “Wit lita mocguac buma, imoc uameme mocguac uabung ande nga bari lita harebec, imoc uameme mocguac uabung ande. Anu ge kerecdoku nga waing mi memanganebesena.”*

⁷ Ramamedahango kendokereha monggoc mong mekpacgeu negemba wiac kekehagoc mongngo monggoc “Ge hana!” deec. ⁸ Ifi deu hemba becosic meac meac mong amma ngic yeac witiu tarec, kpara homec, yeng hofe hesickeu haoc. Haec yereng bangectoa bangec tegia 4, imohacnac noboha mocgu ($\frac{1}{4}$) imoc yereng wasai beang nga bodi amma homectoa nga kateyang mehaoc. Mehaec imocngko ngicngac yunuhomegecde, imocac uakibi nga kuc yemecyemera.

⁹ Nga ramamedahango kendokereha mong monggoc mekpacgeec, imohai yofi henai. Ngicngac Anutuac yoac mekecma dekperagigecac yunuhomegec, yeneac ubaongangina arataac bageau fegec. ¹⁰ Yeni ihai fema kucgoc arohma yofi kpacgec, “O Kunennina, ge kpetiackekec nga yoac foraac mingina, ge nocac turung kpoukpou naso mehereema sacninaac kopocsic negemma ngic bangecfu kecdae, yeni kopocsicnginaaa turunga mi yemmenec.” ¹¹ Ifi degec ngakpi herea kongac kongac tembus tembus yemmemea edeyunugec, “Wanacogofocngina nga tosofocngina yeni ifingoc yunukpebuc ayemegec kpeteu heiudeac ngeni kapiianec monggoc tacnegembisia.”

¹² Anu ye kendokereha wisic wisickeaac bageau mekpacgeu henai. Hembra usoctoa meu wenackiwa dzadzu kpeec. Imoc ubahodunggac ngakpi isoc, ifia nga afo hafoangoc sac isoc anec. ¹³ Nga firangtoa kpema ic kpemindzaheu ic gbomea mangganga icfunac kpemorongyunuu maandae, asomeng yeni ifi isoc[†] bangecfu fotockema magec. ¹⁴ Magec ngicngko kibi kpouandae, kurumenggo ifi isoc kpouma kpac anec. Kpac anu tiki nga nuc sasawa tatacnginaunac meickedacgec.

¹⁵ Ifi anu bangecac ngictau nga ngickuneng amma dzikacac ngickuneng nga ngic finactoanginagoc amma ngic seria amma wanac areng mingningina bageau kecgec nga ngicngac witicngina kpac kecgec, yeni sasawango kemma kedzebe manau nga hoctoatoa bagenginai sufudacgec. ¹⁶ Sufuma tiki nga hoc yeni yofi edeyunugec, “Ngeni

* 6:6: Siriwa dzo me denari mocgu nande. Yohaneac nasou siriwa dzo mocgungo uameme mocguac bung anec.

† 6:13: Ic kpara fig dede.

witininau mama ngictau tatacfu tacde, yeac kicfunac nga ramamedahaac ngabaunac semenunubisia. ¹⁷ Yereac ngabaac nasotoa bic hadacac neni naric mi serima nannide.”

7

¹ Imocac ngadeau angero 4 yenennai. Yeni bangectoa bangec, imocac tuturung 4, imohai nanggec. Nga yenemba yeni bangecac firang 4 medzickema nanggec firang imoc yeni bangecfu me kondunnu me icfu kpegecdeacsoc mi anggec.

² Anu ni angero mong henai. Ye Anutu kekehagoc yeac onga mekecma wenac ere eraunac haec. Nga angero 4 yeni bangec nga kondung memanganegedeac ua yemeyemmea, yeng yeneac kpacma yofi deec, ³ “Ngeni bangec me kondung me ic bic mi memanganebisia. Neneng Anutuninaac wanacarengfora mesunginai kibi faiminaguc ngeni ine wiac sasawa memanganebisia.” ⁴ Anu ngicngac mesunginai kibigoc, yeneac kpetengina 144 tauseng degec negenai. Kibinginagoc imoc yeni Israe medacforaac habuareng 12, yenearunac sasawa. ⁵ Mesunginai kibigoc yeneac kpetengina yofi, Yuda kisicfunac 12 tauseng

Rubeng kisicfunac 12 tauseng

Gade kisicfunac 12 tauseng

⁶ Ase kisicfunac 12 tauseng

Naftari kisicfunac 12 tauseng

Manase kisicfunac 12 tauseng

⁷ Simong kisicfunac 12 tauseng

Rewi kisicfunac 12 tauseng

Isasa kisicfunac 12 tauseng

⁸ Seburong kisicfunac 12 tauseng

Yosefe kisicfunac 12 tauseng nga

Benyaminggac kisicfunac 12 tauseng.

⁹ Imocac witiau habutoa yombong yenennai nga kpetengina imoc ngic mongngo naric mi osoude. Ngicngac yenennai, yeni bangeha bangeha nga fakaga fakangina amma yoacna yoacga nga sebi siric hania hania, yenearunac. Amma yeni ngakpingina herea kongac kongac heima maringinai pam icac maria mema ngictau tatacfu nga ramamedahaac kicfu nanggec. ¹⁰ Namma yofi dema kunengngoc arohogec,

“Anutunina ngictau tatacfu tacde nga ramamedaha yeri memengerec mingina.”

¹¹ Ifi degec angero sasawango hama ngictau tatac nga ngic enara 24 amma wiac kekecnginagoc 4 orongyunuma nanggec, yeni ngictau tatacac kiwau makpema kicngina hetutuckema Anutu afehegec. ¹² Afehema yofi degec,

“Fora, kenec nga kibikperagi, negen negentegec nga ubangerec, eweheihei nga kpac kuneng nga kuc imoc Anutunina ammini nasoya nasoya feengkebeso, imoc foranoc.”

¹³ Ifi degec, ngic enara yenearunac mongngo yofi kpesinenec, “Ngicngac ngakpingina herea kongac kongac yomoc, yeni merac merac nga yeni dahacnac hagec?”

¹⁴ Kpesinenu merenai, “Kunenna, ge geanggaoc negennec.” ifi deba yeng yofi edenuec, “Ngic yomoc yeni kpendzengtoaunac hama ngakpingina ramamedahaac sawango dzuacgec kongac ande. ¹⁵ Imocac amma yeni hadzing tofocnac Anutuac womong manau ngictau tatacac kiwau namma yeac kingang kpema ua mekecdae. Megec Kebu ngictau tatacfu tacde, yeng yenigoc kecma kporucbedzoya yeneac witiu faiu tarude.

¹⁶ Nga yeni herenginaac monggoc mi homegecde nga dokuac mi ayemmeude. Wenacngo monggoc mi yonohoude nga wiac goaac gereango naric mi yonohoude. ¹⁷ Imoc yofiac, ramamedaha ngictau tatacac dzongiau nande, yeng ramagarengngina amma kekecac dokukiwau hesicyunuude. Nga Anutungo kickumangina sasawa kicnginaunac mekerenggeude.”

8

¹ Ramamedahango kendokereha wisic wisickea mekpacgeec, imohai kurumennu aua nobohaacsoc ning yombong kpeec.

² Ning kpeu angero 7 Anutuac kicfu nandae, yeni trampet 7 yemmeyemmea yenennai.

³ Anu angero mongngo sokoc golngu memea meemma arata kiwau nanec. Nanu sopo homuna gombunga imoc homac migec. Migec imoc ngicngac kpetiac yeneac nunumugoc kpeturanggema arata golngu memea, imohai gerecfu faiec. ⁴ Ye ifi ammanu yeac mariaunac hosuc homuna gombungango ngicngac kpetiac yeneac nunumugoc kpeturanggeu Anutuaru enec. ⁵ Enu angero ye sokohango arataunac gerec fiu wakeu bangecfu ukuec. Ukuu gbumparandang nga udumengtoa amma piratac homac fingeru usoc mee.

⁶ Meu angero 7 trampetnginagoc yeneng fifigecdeac efaigec. ⁷ Efaigec angero warac warac yeng trampeha fifiu nomang gbomea* nga gerec, imoc sacgoc kpeturanggema imocngko fingecma bangecfu maec. Mau bangectoa bangec, imocac tegia harebec imohacnac noboha mocgu ($\frac{1}{3}$) dzeeec nga ic sasawa bangectoa imocac manau nanggoc, yeneacunac harebecac noboha mocgu ($\frac{1}{3}$) dzeeec amma kpindzing tengging tengging sasawa gerecngko dzedarec.

⁸ Nga yeac ngadeau angero mongngo trampeha fifiu tiki kuneng gerehagocngko kondunnu mau kondungtoa tegia harebec imohacnac noboha mocgu ($\frac{1}{3}$) sac anec.

⁹ Anu kondunnu wiac kekecnginagoc kecdae, yeneacunac harebecac noboha mocgu ($\frac{1}{3}$) homedacgec amma wage yeneacunac harebecac noboha mocgu ($\frac{1}{3}$) kpac anggec.

¹⁰ Amma yeac ngadeau angerongo monggoc trampeha fifiu kurumennunac asomeng-toa mong ahakifa isoc dzema fotockema maec. Mama dokutoa nga dokukiwa yeneacunac harebecac noboha mocgu ($\frac{1}{3}$) witinginau heiec. ¹¹ Asomeng imoc kpara Hodunga. Anu doku yeneacunac harebecac noboha mocgu ($\frac{1}{3}$) imoc hodunga anec. Nga doku hodunga anecac amma ngicngac homacngko homegec.

¹² Nga angero mongngo trampeha fifiec. Fifiu wenac nga afo amma asomeng yeneac kperagiaac kuc imohacnac harebecac noboha mocgu ($\frac{1}{3}$) kundung kpeudeac meickeec. Meickeu hadzing tofocnac yereac kperagiaac kuc imohacnac harebecac noboha mocgu ($\frac{1}{3}$) mi fingerec.

¹³ Anu hemba huntoc mong wi kurumeng botuhau kpututuckeu ubaudumenga negembare kunengngoc yofi arohoec, “Angero harebec yeneng trampetngina fifigec arohou ngicngac bangecfu kecdae, ngenearu ubahodung, ubahodung, ubahodung fingerude.”

9

¹ Angero 5ngko trampeha fifiu ni asomeng mong kurumennunac mamaya henai. Hemba ye teng buya kpac, imocac ki migec. ² Migec yeng ki imoc mema teng buya kpac mesiec. Mesiu gerecngko ua dzeu hosuc kuneng ereande, hosuc siriha ifia isocngko tennunac ereec. Teng imohacnac hosuc ereu wenac nga sawaac kperagi kucngira maec. ³ Anu hosufunac ipua erema bangecfu magec. Magec bangecac weme weme yeneac kuc isoc yemmem ⁴ yofi edeyunugec, “Ngeni kpindzing nga wiac sasawa maria tengging tengging fede amma ic, imoc mi memanganebisia. Ngeni ngicngac Anutuac kibi mesunginai mi mekecdae, yenisac memanganeyunubisia.”

⁵ Nga yeni dederecge yofi ayemmegec, “Ngeni afo 5 kpindzing yemmebisia nga ngeni mi yinihomebisia.” Nga kpindzenga imoc weme wemengo yiniu angande, ifi isoc anec.

⁶ Naso imohai ngicngac yeni homec hofocma naric mi homegecde. Nga homegecdeac negenggec homecngko yeneacunac woraude.

⁷ Anu ipua siricngina imoc dzikacac becosic mengereandae isoc. Orucnginau ira golngu memea isoc tarec nga kic samacngina imoc ngicngac yeneac isoc. ⁸ Nga orucdzongina imoc ngac yeneac isoc amma enacsicngina imoc raiong yeneac enacsic

* 8:7: Bangec nomanau kia gbomeango sawau nomanema seria anude.

isoc. ⁹ Nga mariku heigec, imoc aiengngakpi isoc amma kpegangnginaac udumeng imoc becosic homacngo dzikacf u nedzima keretac kpedzima udumenggoc kengandae isoc. ¹⁰ Amma dzingina enaragoc imoc weme weme enacngina isoc anec. Nga yeni ngicngac memanganeyunugecdeac kucngina afo 5 imocacsoc feec. Nga kucngina imoc dzinginai tarec. ¹¹ Hofe buya kpac, imocac angerongo* yeneac ngictaungina kefec. Yeac kpara imoc hebiraio yoacf u Abadong nga grik yoacf Aporiong.[†]

¹² Yei ubahodung warac warac wisickede. Negenggec, imocac ngadeau ubahodung yohockangngoc haecde.

¹³ Nga angero wisic wisickeaac bageau, yeng trampeha fifiu Anutuac hoannu arata golngo memea, imocac tuturungasoc baiha 4, yenearunac enacudumeng mong negen-nai. ¹⁴ Negemba yeng angero wisic wisickeaac bageau trampehagoc yofi edeec, “Angero 4 Eufrata dokutoa tegiau witicyunugec nandae, yeni yungecyununa.” ¹⁵ Angero 4 yeni ngicngac yenearunac harebecac noboha mocgu ($\frac{1}{3}$) kpebucyunugecdeac aua nga uameme amma afo nga kifanaso yomocac amma efac efaia kecgec yeng yungecyunuec. ¹⁶ Anu wasaingic becosic witiau tacgec, yeneac kpetengina 200 mirieng (200,000,000) degec negenai.

¹⁷ Nga kicna tegecmangoc taru wasaingic becosicnginagoc yeneac siricngina yofi henai, yeni aiengngakpingina kpaia nga dzadzu amma asong botuc nga dzagec dzagec, imoc hoc kpara sarafa‡ isoc. Nga becosicac oruc imoc raiong isoc nga enacnginaunac gerec nga hosuc amma asenga mangac manganea erema kenec. ¹⁸ Kpendzeng harebec, gerec nga hosuc amma asenga mangac manganea, yeneng becosic enacnginaunac erema ngicngac yenearunac harebecac noboha mocgu ($\frac{1}{3}$) kpebucyunugec. ¹⁹ Kuc imoc becosic enacnginau nga dzinginai tarec. Nga dzingina imoc yeni boudzoc isoc orucnginagoc nga yeni imocngo wiac hania hania memanganekecgec.

²⁰ Anu ngicngac tosea kpendzeng 6 yomocngo mi yunuhomeec, yeneng ine ubangina mi dzigenegec. Amma yeni asu mangana nga nemuonga gol siriwa kopa nga hoc amma icngo memea numuyemmegecdeac faka mi wagec nga nemuonga mariginango memea, imoc mi ngadehegec. Nemuonga ifia yeneng wiac mong mi henggecde nga kedzacnginango mong mi negenggecde amma haningnginango naric mi tikenggecde. ²¹ Nga ngicngac yeni ubangina mi dzigeneu yunukpebuc, dzinac nga mosoc faka amma kaisero faka nga hamangecmeme, faka imoc sasawa mekecma mong mi wagec.

10

¹ Anu ni angero kuhagoc mong hemba kurumennunac maec. Ye hoengngo temboc tembonggea oruhau asommadoc heiec nga kicmesuya imoc wenackiwa isoc amma hanihora imoc wotung isoc gerehagoc. ² Amma ye kibibisic kpou kpouya mong mariau yungec yungera metarec. Metacma hanifoia imoc kondunnu nga kanaya imoc bangecfu faie. ³ Faima raiongngo arohoande, ifi isoc kucgoc arohoec.

Arohomanu gbururung 7 yeneac enacudumengnginango yoac degec. ⁴ Ifi degec ohobeso ambare kurumennunac enacudumeng mongng yofi edenuu negennai, “Gbururung 7 yoac degec ge imoc mi ohona. Imoc mesufuna febeso.”

⁵ Ifi deu angero bic henaimoc, yeng kondunnu nga bangecfu namma marifoia kurumennugeng miacma ⁶ yoac deserima yofi deec, “Kebu kecde nga kecengkefude nga kurumenga kurumenga nga kondung amma yeneac manau wiac sasawa fede, imoc yeng deu fingecdarec, ni yeac kpac kpacma yoara meserima yofi deduae, ‘Naso wisickede.’ ⁷ Angero wisic wisickeango trampeha fifibeso ammanu udumeng negenggecde, imohai yofi negembisia. Anutungo wanacngicfora profete yoac bic edeyunuec nga Anutuac negen negeng sufu sufuya feec, imocngo naso imohai fingectegerude.”

* 9:11: Hania yoacf u angero imocac titiha siducedde me suesuea. † 9:11: Kpara imocac titiha memangac mangane ngic. ‡ 9:17: Hoc imoc gerecikiunac maande nga imoc dzagec dzagec amma homuna mangana.

⁸ Anu enacudumeng warac kurumennunac negenaimoc, yeng yofi edenuec, “Ge kemma angero kondunnu nga bangecfu nande, yeac mariunac kibi kpou kpouya yungec yungera, imoc mebesena.” ⁹ Ifi deu angeroaru kemma kibibisic kpou kpouya imoc nenudeac edeai. Edeba yeng deec, “Ge mema nena imoc heregau kemema herega dzeude nga enacgau ine kukundzau isoc songea anude.” ¹⁰ Ifi deu ni angeroac mariunac kibibisic kpou kpouya mema neba imoc enacnau kukundzau isoc songea anec. Nga herenau kemema aengagoc anu ¹¹ yofi edenuec, “Ge ngicngac sebi siriha hania hania nga bangeha bangeha amma yoacna yoacga nga ngictau homac yeneac profeteyoac monggoc debesena.”

11

¹ Anu yeni kpetememe mong yasu isoc nemma yofi edenugec, “Ge yacma Anutuac womong nga arataac kpetengira mema ngicngac ihai Anutu dengeredae, yeneac kpetengina momoc mebesena. ² Nga sobeng odayagoc amakiwau fede, imoc bangec monnunac ngicngac yemmeyemmea. Imoc ac amma ge imoc ac kpete mi mebesena. Yeni afi 42ac manau taong kpetiac* tidzamema memanganegede. ³ Anu ni enacdedehocna kuc yemecba yeri toruwamba heima uameme 1 tauseng 2 handret 60ac (1260) manau profeteyoac deecde.” ⁴ Yeri oriwa ic yohockang nga bangecac Kebuac kicfu kifa nanan-gagoc yohockang nangkecdape. ⁵ Ngic mongngo yeri memanganeyurubeso negendeu gerecng enacngiraunac erema ngabafocngira yonohou homegecde. Monggoc deba, mongngo yeri memanganeyurubeso negendeu ye homecac areng amma ifi homeude. ⁶ Enacdedehocna yeri profeteyoac dekecma kurumeng heiec kia mong mi kpeude, yeri uayoac nga kuc ifia mekecdape. Amma yeri yeraoc naso dema dokuheimerenec sac anudeac uayoac nga kuc mekecdape. Amma yeri kpendzeng hania hania bangecfu faiecddeac uayoac nga kuc ifingoc mekecdape.

⁷ Anu yeri dedekperagingira edeyunudarec wisickeu wasaiyangtoango teng buya kpac, imohacnac erema yerigoc ewema firang amma kpebucyuruude. ⁸ Kpebucyuruu farengngira taonggac sinnu feecde. Taongtoa imoc ac kpara kpefing yoacf Sodong nga Aigita nga bangec imohaingoc Kebunina mariponnu kpegec homeec. ⁹ Nga uameme harebec nga nobohaac manau ngicngac sebi siriha hania hania nga fakaga fakangina amma yoacga yoacna nga bangeha bangeha ngicngac yeneng farengngira hemma tonggogecdeac kpetariyemmegecde. ¹⁰ Kpetariyemmegec ngicngac bangeha bangeha kecdae, yeni sasawango songo nga ubangerec negemma ubangerec iwai goa emegecde. Profete yohockang yereng bangeha bangeha ngicngac kpendzennu faiyunuocac ifi ayecmegecde.

¹¹ Anu uameme harebec nga noboha wisickemanu kekecak asungo Anutuarunac hama yerearu kemeu yeri yacma nanoc. Nanec yeremma yeni damu kuneng yunuec. ¹² Nga kurumennunac enacudumengtoa mong negenggec yofi edeyuruec, “Ngeri yei ereec!” ifi deu yeri ngabafocngina yeneac kicfu hoeng manau kurumennu enoc.

¹³ Enec naso imohaingoc usoctoa meu taongyada tegia 10 imohacnac noboha mocgu (1/10) barackeec. Usocyada meec, imoc ac manaunac ngicngac kpetengina 7 tauseng yeni homegec. Homegec ngicngac tosea yeni kengec amma Anutu kurumennu kecde, ye afehegec. ¹⁴ Ubahodung botuha imoc yomohai wisickeu ubahodung wisic wisickeango bic haude.

¹⁵ Anu angero wisic wisickeango trampeha fifiu kurumennunac enacudumengtoa mong fingecma yofi degec,

“Kebunina nga yeac danggunucngic Kristo yeri yaguc bangectoa bangec sasawaac mingina andape. Amma Kebuninango ngictau kecde nga kecengkefude.”

¹⁶ Ifi degec ngic enara 24 Anutuac hoannu ngictau tatacngina tacdae, yeni makpema kicngina hetutuckema Anutu afehegec. ¹⁷ Afehema yofi degec,

* 11:2: Taong kpetiac, imoc Yerusarenggac kpara mong.

“Kebu Anutu Kuctoa mingina, nenii dangge edegudimbe. Ge bicngoc kecnec nga yaguc kecnec, ge geangga kuctoa mema mekecma yaguc ngictau kecnec. ¹⁸ Ngicngac bangeha bangeha kecdae, yeni herebu anggec geac herebuac naso ine yofineng-gac hau geng homegec yeni yoacngina isingga desinade. Wanacngifocga profete nga kpetiac arengfocga kuneng nga kapiango geac kpacga eweheianda, yeni angammemenginaac turunga megecde. Nga ngicngac bangec memanganegc geng memanganeyununade.”

¹⁹ Anu kurumennu Anutuac womonggac naguya megec yeac dzadzahacac katapa kicng-inango henggec. Hemmagec piratac heiu udumengtoa nga gbururungtoa heiec amma usoc meu nomang gbomeatoa maec.†

12

¹ Anu soi engena mong kurumennu yofi fingeru henggec. Ngac mong tarec, ye wambaya wenac nga hania bageau afo amma oruhau ira mong asomeng 12ngo memea.

² Ye hereagoc amma sabac fingerudeac gadze kiu arohoec.

³ Nga faka mong ifingoc kurumennu fingeru henggec. Imoc sekactoa sacsac mong kuneng yombong. Ye oruha 7 nga baiha 10 nga ye oruhau ira 7 heiu tarec. ⁴ Taru yeac dziango kurumenggac asomeng yeneearunac harebecac noboha mocgu ($\frac{1}{3}$) taiyunuma bangecfu ukuyunuec. Nga ngacngo sabac meu sekactoa ye sabac gbokoudeac negemma ngac yeac kicfu nanec. ⁵ Nanu ngacngo medac mong meec. Meu yeac sabaha ine faratac wangecma Anutuaru, yeac ngictau tatacfu meemma faigec feec. Nga medac imoc, yeng bangeha bangeha ngicngac aiengyasungo garengyuniude. ⁶ Nga ngac ye worama bangec kisiu dokuya kpacfu kenec. Kenu yeneng ye uameme 2 tauseng 2 hundred 60ac (2260) manau nenesemeng mima henggareng ammigecde. Anutungo yeac tatac ihai bic mengereec.

⁷ Anu kurumennu dzikactoa fingerec. Imoc yofi, Mikae nga angerofora yeneng sekactoagoc ewegec sekac nga angerofora yeni turunga merenggec ⁸ kucngina soha mi anu kurumennu tatacnginaac titing monggoc mi feec. ⁹ If anu sekactoa, imoc boudzoc esea kpara mong Mangana mingina nga Satang, ye nga angerofora bangecfu ukuyunugec. Ukuyunugec yeng bangecngicngac sasawa ikocfu wangecyuu yeni ye modacandae. ¹⁰ Nga enacudumengtoa mong kurumennu negemba yofi deec,

“Memengerec nga kuc amma eucerereng imocac mingina Anutu. Nga yeac danggununcngic Kristongo yaguc imocac uakibi nga kuc metacde. Ngic tosofocnina yoacfufaiyunukefec, yeng Anutuninaac kicfu hadzing toforec yoacfufaiyunuma kefu yeneng yegoc ewema firang amma ye bic kurumennunac ukugec maec. ¹¹ Yeni ramamedahaac sawa nga Kebuac yoac dekperagigec amma yenang kekecngina mi segerema homecac wagecac amma firang anggec. ¹² Kurumeng nga areng kurumennu kecdae, ngeni imocac amma ubangerec negembisia. Nga bangec nga kondung ngeri ebictoa meficgeecde. Mangana mingina ye nasoya wegeneu negemma ngabatoagoc yombong ngenearu haecac ngeri dafi anecde, imoc obohode.”

¹³ Yeni sekactoa bangecfu ukugec, yeng imoc hentegecma ngac sabac medac meec, ye kisanec. ¹⁴ Kisanu ngac ye boudzoctoaaac kicfunac worama bangec kisiu dokuya kpacfu kenudeac yeneng ngac imoc huntocfa kpeganga migec. Ye ihai naso mocgu nga naso goa amma naso noboha taru yeni henggareng ammima yaka migecde. ¹⁵ Migece boudzocngi ye kisanudeac enaraunac dokuyuyuano urunu maec. ¹⁶ Mau bangecngi ngac agenga tima enara anggeu sekacngi enaraunac dokuyuyua urunu bangecngi imoc nedarec. ¹⁷ Nedaru sekactoango ngacac amma herebu negemma kemma yeac arengfora tosea Anutuac singyoac modacma kecdae nga Yesu Kristoac dedekperagi mekecdae, yenearu dzikac kpeudeac kenec. ¹⁸ Anu ye sangi witiau kondung tegiau nanec.

† 11:19: Kia kpema seriu heima dzimbong kuneng ukuu maande isoc.

13

¹ Hemba kondung manaunac wasaiyang yeneac mimiha mong ereec. Ye baiha 10 nga oruha 7 amma baiha imocac witiau ira 10. Nga oruc imoc yeneac witinginau Anutuac desure kpac hania hania feec. ² Imocac sebia wasaipusitoac sebi isoc anec nga enara imoc raiong isoc amma ye bea isoc soriherehagoc.

Anu sekactoango uakibi nga kuc nga ngictau tatac wasaipusitoa mima ngicngac homac garengyunuudeac uakibi miec. ³ Miu wasaipusitoa oruha mong yofohagoc henai. Oruha imoc yunugec kubectoa anu homeandae, ifia isoc hemba bangeha bangeha ngicngac yeni wasaipusi imoc hemma kerectegec amma modacgec. ⁴ Modacma sekactoa numumigec nga sekactoa yeng wasaipusingo garengyunuudeac uayoac nga kuc miecac amma yeni wasaipusi numumima yofi degec, "Mongngo ye isoc amma yegoc naric mi eweude."

⁵ Enara migec ye dearogoc sicsauc amma Anutu desure ammiec. Nga yeni kuc yofi migec, yeng afo 42ac manau ngicngac garengyunuudeac uayoac nga kuc mekefec.

⁶ Amma ye enara anggema Anutu desure ammima Anutu kpara nga amea amma kurumennu kecdae, yeni desure ayemmeec. ⁷ Ayemmeu yeng ngicngac kpetiac yenearu dzikac kpema firang anudeac migec. Migec yeng ngicngac fakaga fakangina nga sebi siric hania hania amma yoacna yoacga nga bangeha bangeha garengyunuudeac uayoac nga kuc migec. ⁸ Ifi migec ngicngac sasawa bangecfu kecdae, yeneng wasaipusi numumigecde amma ramamedaha kpebucgegec, yeac kekecac kibiu ngicngac kpacngina bangec meficmeficgeaunac mi fede, yeneng wasaipusi numumigecde. ⁹ Kedzahagoc kecdengo yoac yomoc negembeso.

¹⁰ Ngic mong megec witicamau faigecdeac degecdeu ye witicamau kembeso. Ngicngac wasai beangngo yunuhomegecdeac degecdeu imocngo yunuhomebisia.

Anu ngicngac kpetiac yeni modzotitia kpac nga negen negensinggoc kecbisia.

¹¹ Ifi hemba wasaiyang mong bangec manaunac ereec. Ye rama isoc baiha yohockang metacma sekactoa yeneac faka modacma yoac deec. ¹² Ifi deu yeng wasaipusiac uakibi nga kuc sasawa mekecmayac amma ngicngac garengyunuudeac ua sasawa meec. Mema bangectoa bangec nga bangecac witiu ngicngac kecdae, yeni wasaipusi homemeaac kubec bic mosiec, ye numumigecdeac ayemmeude. ¹³ Ayemmeu wasaiyang baiha yohockang, yeng yoara negensinggecdeac fakatoa meu gerec kurumennunac ngicngac yeneac kicfu bangecfu maec. ¹⁴ Mau ye wasaipusiac kicfu faka meudeac kuc migecac amma ngicngac bangecfu kecdae, yeni ikocfu wangecyunuu ye modacgecde. Modacgec ngicngac bangecfu kecdae, yeni deu wasaipusi wasai beangngo heigec monggoc gboriec, yeac onga mong megec.

¹⁵ Megec yeng wasaipusiac ongea ongaasu miudeac kuc meec. Meu ongango ifingoc yoac dede negenec. Nga ngicngac sasawa onga mi numumigec, yeni kpebucyunuudeac kuc metarec. ¹⁶ Metacma ye ngicngac sasawa kuneng nga kapia, finacgoc nga finaha kpac, wanacngic nga ngicngac yengenaoc kecde, yeni kibis mong sebikibi isoc marifoing-inau me mesunginai mekecgecdeac deseriyemmeec. ¹⁷ Ifi anu ngic mongngo kibia me wasaipusiac kpara me kparaac kpete mi mekefude, yeng wiac mong naric mi bummeude me faiude. ¹⁸ Kibi yomoc negen negentegecgoc osobesonga. Wasaipusiac kpete imoc ngic monggac kpete nga ngic irec ireckeagocngo yomoc osonegeng ambeso. Wasaipusiac kpete imoc 666.

14

¹ Ni ramamedaha hemba ye Siong tikiu ngicngac 144 tauseng yenigoc nanggec. Nanggec, yeni ramamedahaac kpackibi nga Manggacac kpackibi mesunginai mekecgec.

² Nga kurumennunac udumeng mong doku homac gbururungtoa yeneac udumeng isoc negemba imoc gita kpekpe yeneng gitangina kpegec udumeng fingecande, ifi isoc anec. ³ Anu yeni ngictau tatacfu nga wiac kekecnginagoc 4 amma ngic enara yeneac kicfu namma yegec gboria mong heigec. Heigec ngic 144 tauseng bangecfunac bic bummeyunuyunua, yeneng yegec imoc naric negemma heigec. ⁴ Ngic imoc yeni ngac

yenigoc mi kecma wonongngina kpac amma kongaha yombong kecgec ramamedahango ihai me ihai kengande, imohai ye modackecdae. Ramamedahango bangecac ngicngac yeanearunac buma heima yeni bummeyunuu yeni Anutu nga yeac waracareng anggec.

⁵ Amma enacnginaunac ikoc mong mi ereu yeni kpetiac nga manganangina kpac kecgec.

⁶ Ni angero mong henai, ye sawakebangau herecge kenec. Kemma siduc gombung feengkefude, imoc yeng ngicngac bangecfu kecdae, yeni edeyunuudeac metarec. Metacma bangeha bangeha ngicngac nga fakaga fakangina amma yoacga yoacna nga sebi siric hania hania, yeni ⁷ enacudumeng kunengngo yofi deec, “Ngeni Anutuac damungunuu eweheimibisia. Anutungo ngeneac yoac desiude imocac naso bic hadeac ngeni kurumeng nga bangec amma kondung nga dokukiwa maficyunuec, ye numumbisia.”

⁸ Ifi deu angero mongngo ye modacma yofi deec, “Makpedacnoc, Babirong taongtoa imoc bic makpedac. Yennoc ngaba nga kaisero fakayaac waindoku seria ngicngac sasawa gumecyunuu nedacgec.”

⁹ Ifi deu angero harebecngo modacyuruma enacudumeng kunengngo yofi deec, “Mong ye wasaipusi nga ongea numumima yeac kibi mesuyau me mariau mema mekefudeu ¹⁰ ye Anutuac ngabaac waindoku seria nebeso. Waing imoc seria yombong dokugoc mi yerec yerecgea yeac ngabaac taseu kpakegec. Kpakenigec, yeng angero kpetiac amma ramamedaha, yeneac kicfu gerec nga sarafa* manau kpenzeng kpeude. ¹¹ Kpeu ngicngac wasaipusi nga ongea numumikecma yeac kparaac kibi megec, yeneac kpenzenggac hosuc imoc naso wisic wisickea kpac erekefu yeni hadzing tofocnac ruae mong mi maficgegecde. ¹² Ifi anu ngicngac kpetiac Anutuac singyoac modacma Yesu negensinggema kecdae, yeni modzotitia kpac seria kecbisia.”

¹³ Ifi negemba kurumennunac enacudumeng mong fingecma yofi edenuec, “Ge kibiu yofi ohona, ‘Yaguc hanahema ngicngac Kebuaru kpeketahama homedae, yeni kenecnginagoc. O, Asungo yofi dede, angammemengina gombungango modacyunukecdeac yeni ebicfunac tacnegenggecde.’”

¹⁴ Anu ni hoeng mong kongac kongac henai. Hemba imocac witiau ngic mong siriha (Danie 7:13) ngicac medac isoc tarec.

Ye oruhau ira mong golngu memea heima mariau soe mong enaragoc wit fora heiandae, ifia metarec. ¹⁵ Metaru angero mongngo womonnunac erema hoeng witiau tarec, yeng enacudumeng kunengngo arohoma yeac yofi deec, “Bangecac semeng fora anu kpememenaso bic hadacac amma ge forakpekpe soega sinema kpekpe ua mena.” ¹⁶ Ifi deu ngic hoeng witiau tarec, yeng witkpekpe soea bangecfu ukuma bangecac semeng fora kpeec.

¹⁷ Kpeu angero mong kurumenggac womonnunac ereec, ye ifingoc forakpekpeac soe mong enaragoc metarec. ¹⁸ Nga angero mong gerec garenggeudeac uayoac nga kuc mekefec, yeng arataunac hama enacudumeng kunengngo forakpekpeac soe enaragoc metarec, yeac yofi kparec, “Bangecac waing gbomea bic kpauedac. Imocac ge forakpekpeac soega enaragoc faina kenu waing gbarihagoc kpedzucnedacna.”

¹⁹ Kparu angerongo forakpekpeac soea bangecfu ukuma bangecac waing gbarihagoc herecgema kpedzucyuna Anutuac ngabaac waing tidzoc tidzohoac hoctoa ukuyunuec. ²⁰ Ukuyunuu waing tidzoc tidzohoac hoctoa taong ngadeau nanu tidzamegec. Nga waing tidzoc tidzohoac hoctoaunac sacngo enec, imoc becosic yeneac enacaieng kpeserema feu bangecfu ukuma bangecac waing gbarihagoc kpedzucnedacna.†

15

¹ Ni kurumennu soi mong engena bibiagoc henai. Hemba angero 7 yeneng kpenzeng 7 wisic wisickea metacgec. Anutuac ngabaac kpenzeng 7 ngo fingecma kpac andarude.

² Ni kondung garas isoc mong gerecgor yerec yerecgea henai. Hemba ngicngac yeni

* ^{14:10:} Imoc hoc dzedzea dzagec dzagec homuna mangana. † ^{14:20:} 300 kiromita imoc Finschhafen kemma Goroka herea, imocacsoc. Ye stadi 1600 ohoec. Stadi mogu imoc mita 185 isoc ande.

wasaipusi nga ongea nga kibia amma kpara imocac kpeteagoc, yeni areng imoc yenigoc ewema firang anggec yeneng kondung witiau Anutuac gita menanggec.³ Menamma yeni Anutuac wanacngiha Mose nga ramamedaha, yereac yegec yofi dema heigec, “Kebu Anutu Kuctoa mingina, angammemega imoc engena nga bibiagoc nga ge bangeha bangeha yeneac ngictau. Geac sing imoc dindingac nga fora.⁴ Kebu ge kpetiac, imocac amma sasawango geac damuyunuu kpacga afehebisia. Amma geac faka dindingac didiu fingerecac bangeha bangeha ngicngac yeneng hama geac kicfu numugenggecde.”

⁵ Ifi heigec wisickeu hemba kurumennu Anutuac womonnu dzadzahac katapaac kporucbedzo naguya megec. ⁶ Megec angero 7 kpendzeng 7 metacdae, yeni wamba kongaha linengngo memea nga kperagiagoc heima fadeng golngo memea mokucnginau yerec yerecgea heima womonnunac magec. ⁷ Magec wiac kekecnginagoc 4 yenearunac mongngo angero 7 sokoc 7 yemmeec. Sokoc imoc golngo memea nga Anutu kecde nga kecengkefude, yeac herebungo imohai wakema feec. ⁸ Feu Anutuac kibikperagi nga kuc, imocac hosucngo womong mewakeec. Ngic mongngo womonnu mi engengkecmanu angero 7 yeneac kpendzeng 7 sasawa wisickedarec.

16

¹ Ni womonnunac enacudumeng kuneng mong negemba yeng angero 7 yofi edeyunuec, “Ngeni kemma Anutuac herebuac sokoc 7 bangecfu kpakegec mau.” ² Ifi deu angero warac waracngo kemma sokoha bangecfu kpakeec. Kpakeu ngicngac wasai-pusiac kibi metacgec nga ongea numumigec, yeni kubecngina gereagoc nga mangana fingecyemmeec. ³ Anu angero yohockangngoko sokoha kondunnu kpakeu kondungngoko sac amma meremma ngic homececac sac, ifi isoc anec. Nga wiac sasawa kekehagoc kondunnu feec, imoc homeec. ⁴ Homeu angero harebecngoko sokoha doku yuyuya nga mafefeaac kiwau kpakeu imoc sasawango sac anec. ⁵ Nga negemba dokuac angerongo deec,

“Kebu kpetiac mingnina, ge bicngoc kecma yaguc kecnec. Geac fakaga imoc dindingac, ifi anu wiac yomoc sasawa yoacfufaiyunuec. ⁶ Nga yeneng areng ifia amma ngicngac kpetiac nga profete yeneac sac kpakegec. Imocac amma geng sac negecdeac gumecyununa negecdeac ngereede.”

⁷ Ifi deu negemba aratango deec,

“O Kebu Anutu kuctoa mingina, ge yoac fora dema ngicngac fakangina isinggema sing dindingacfuforayangina denec.”

⁸ Anu angero 4ngo sokoha wenacac witiau kpakeu imoc ngicngac gerehang yono-houdeac kuc meec. ⁹ Memma gereango homac yombong yonohou ngicngac yeni ubangina sifu mi dzigeneec. Yeni kpendzeng 7gac mingina Anutu, ye mi afehema yeac kpara desure ammigec.

¹⁰ Anu angero 5ngo sokoha wasaipusiac tatacfu kpakeu yeac eucerereng kundung kpeec. Kundung kpeu ngicngac yeni asira kuneng negemma nedzarangngina kirecgegec.

¹¹ Amma yeni asirangina nga kubecnginaac amma kurumenggac Anutu desure ammima angammemenginaunac ubangina sifu mi dzigeneec.

¹² Anu angero 6ngo sokoha Eufrata dokutoau kpakeec. Kpakeu ngictau wenac ere eraunac singngina meficgeudeac doku imoc dzikeec. ¹³ Dzikeu hemba sekactoa nga wasaipusiac dumbengngiraunac amma profete ikoha, yeac enaraunac asu harebec wononginagoc erema magec nga yeni siricngina waborac isoc.

¹⁴ Asu imoc yeni hadehade mangana yombong amma negensinggegecdeac faka kuhagoc meandae. Nga yeneng bangec sasawaac ngictau Anutu kuctoa mingina, yeac uamemetoa, naso imocac dzikacfufkpaczucyundacgecac yenearu kenggecde.

¹⁵ “Negenggec, ni hamangecmeme ngic isoc habade. Haba mong ye gbori kecma wambaya garengge kefu ngicngac yeneng sengganga mi henggecde nga gamea mi henggecde, ngic ifia ye kenehagoc.”

¹⁶ Nga asu wononginagoc yeni ngictau bangec mong kpara hebiraio yoacf u Hamage-dong, ihai kpedzucyunguec.

¹⁷ Kpedzucyunguec angero 7ngu sokoha sawau kpakeu womonnunac enacudumeng kuneng ngictau tatacfunac hama deec, "Bic fingeccdac." ¹⁸ Ifi deu piratac nga udumeng amma gbururung fingeru, usoctoa meec. Nga ngicngac bangeefu keceregec, imohai usoc kunengtoa nga engenayombong ifia mong mi meec. ¹⁹ Usoc mema taongtoa mendziru harebec anec. Nga ye bangeha bangeha yeneac taong homac hembarackeec. Hembarackeu Anutungo Babirong taong negensiu ngaba nga herebuac waingsokoha miec. ²⁰ Anu nuc sasawa woragec nga ngicngac yeni tiki hofocma monggoc mong mi meficgegec. ²¹ Nga kurumennunac nomang gbomea kia isoc ngicngac witinginau mau yeni kpendzeng kuneng kpegec. Gbomea mocgu mocguac ebiha imoc 30 kiroacsoc anec nga ngicngac yeni Anutu desure ammigec. Nga nomang gbomeango kpendzeng kuneng yombong yemmeec.

17

¹ Angero 7 sokoc 7 mekecgec, yeneearunac mongngo nearu hama nigoc denegeng amma yofi deec, "Singtoangac kuneng doku homac yeneac witinginau tacde, ye angam-memeaac turunga migece. Ge hana imoc edzacgubade. ² Bangecac ngictau yeneng yegoc serofaka anggec nga yeac serofakaac waingdokungo ngicngac bangeefu kecdae, yeneac ubangina mesufuec."

³ Nga angerongo Asuac kucfu menuu bangec kisiu dokuya kpacfu kenic. Kemma hemba ngac mong wasaiyang kpauc kpaucac witiu tarec. Nga wasaiyang ye oruha 7 nga baiha 10 amma sebia sasawa imoc desure kpacngo wake wakea. ⁴ Ngac ye wamba giweng giweng nga kpauc kpauc nga gol nga hoc gombunga amma kubu buma kuneng heima kperagiagoc tarec. Nga ye kpakenec mong golngo memea, imohai kaiseroftakaya wonongagoc wake wakea mariau metarec. ⁵ Amma yeac mesuyau kpac mong negensufuya oho ohoya feec. Kpac imoc Babirong taongtoa, ye bangecac singtoangac amma faka mangana yombong yeneac nonggongina ande.

⁶ Nga ngac henai, yeng ngicngac kpetiac nga Yesuac dedekperagi yoac dema kecgec, yeneac sac nema ubasufu anec. Anu ni ye hemma homac kpidohoi. ⁷ Kpidohoba angerongo yofi edenuuec, "Ge mi kpidohona. Ni ngac nga wasaiyang oruha 7 nga baiha 10 ngac atickekecde, yereac negensufu edegubade. ⁸ Ge wasaiyang henna ye bicngoc kefec nga yaguc mi kecde. Ye teng buya kpac imohacnac eredac nga ye manganedacma kpac anudeac kenude. Anu ngicngac bangeefu kecgec kpacngina bangec hanac hanaheauac kekecac kibiu oho ohoya mi fede, yeni wasaiyang bicngoc kefec nga yaguc mi kecma haude, imocac amma yeni hemma kpidohogecde.

⁹ Yei negen negengtegec nga negen negeng irec ireckea mekecbesonga. Oruha 7 imoc tiki 7 anu ngac ye tataha yeneac witinginau ande. ¹⁰ Nga yeni ifingoc ngictau 7. Yeneearunac 5 bic makpegec nga mocgu taru mong ye mi hadacngoc. Ye hama naso kapianecsac tacbeso. ¹¹ Wasaiyang bicngoc kefec nga yaguc mi kecde, ye ifingoc ngictau kpetea 8 nga ye sifu 7 yeneearunac mong amma manganedacma kpac anudeac kenude.

¹² Baiha 10 hennec, imoc ngictau 10 bangecac eucererengngina mi megecengoc, yeni ine aua mocguacsoc wasaiyanggoc ngictau ua megecdeac uayoac nga kuc yemmegec megecde. ¹³ Yeni negen negeng mocgu mekecma uakibingina nga kucngina wasaiyang wamima yeng kuc imoc mekefude. ¹⁴ Amma yeni ramamedahagoc ewemagec yeng firang anude. Imoc yofiac, ramamedaha ye kebu yeneac Kebu nga ngictau yeneac Ngictau. Nga ngicngac kpacyunuyunya nga segec segereyunuya amma ngicngac ramamedaha negensinggema kecdae, yeni yegoc firang anggecde."

¹⁵ Anu angerongo yofi edenuuec, "Singtoangac doku homac yeneac witinginau tacde, imoc yeni habu toa, sebi siric hania hania nga yoacga yoacna amma bangeha bangeha imoc yeneac ngicngac. ¹⁶ Ge wasaiyanggac baiha 10 hennec, yeni wasaiyanggoc singtoangac ngadehema wiara megec ye senggang entegeng tarude. Taru yeni yeac

fusia nema ngac imoc gerecfu ukugec dzeude. ¹⁷ Anutungo ubanginau negen negeng yemmeecac yeni negen negeng mocgu amma ngictau uaac kucngina wasaiyang migece. Mima yeneng wasaiyang yoara modacgec kecma Anutungo negenecfu uaareng sasawa mesigece. ¹⁸ Anu ngac hennec yeng taongtoa nga bangecac ngictau yeneac witiu ngictau uaac kuc metacde.”

18

¹ Imocac ngadeau hemba angero mong garengyuuudeac uayoac nga kuctoa metarec, ye kurumennunac mau yeac kperagingo bangecmekperagie. ²⁻³ Mekperagi enacudu mengtoayango kucgoc yofi arohoec,

“Babirongtoa ye makpema hadehade yeneac amabangec nga asu wonongnginagoc sasawa amma neng sasawa mangac manganea wonongnginagoc, yeneac amabangec fingerec.

Yeac kaisero fakayaac waindoku bangeha bangeha ngicngac sasawa yeni imoc negec. Bangecac ngictau yeni yegoc serofaka anggec nga bangecac emekeng emehaac ngickuneng yeni yeac kuc nga finactoa gombunga uaya kpac, ihacnac finactoang-inagoc anggec.”

⁴⁻⁵ Anu negemba kurumennunac enacudumeng mongno yofi deec, “Ngicngacfocna, yeac kopocsicgoc mi anggecde nga kpendzenga mi kpegecdeac ngeni yearunac wama kenggec.

Yeac kopocsicngkurumennungoc heiengkefu Anutungo imoc negensima kecde. ⁶ Nga yeng ngeni ngemmeec, ngeni imocac turunga ifi meremmima angammemeyaacsoc naso yohockang amma mige. Nga ye kpakenec yerecgeec, imohai noc wiac tarec negemma ngeneng naso yohockang yerecgemigec. ⁷ Ifi anu ye yengena sebia meemma finac nga kekec uaya kpac, imohai faiemeec, imocac sirihau kpendzeng nga ubahodung mige. Ye ubeau yofi dekecde, ‘Ni hodzec kpac, ni ngactau kecma ubahodung naric mi negembade.’ ⁸ Imocac amma uameme mocguac manau homec nga ubahodung amma here homehome hanahemima yeac witiau kpendzeng ifia fingeru ngac ye gerecfu dzeude. Imoc yofiac, Kebu Anutu ye kuhagoc, yeac faka isinggema foraya desiec.

⁹ Nga bangecac ngictau ngac yegoc serofaka angkecgec amma finactoa nga kekec uaya kpac mekecgec, yeni gerehaac hosuc hemma yeac kiasonggong anggecde. ¹⁰ Yeni yeac kpendzenggac kengec amma hereau yombong namma yofi degecde,

‘Ge aua mocguac manau hanahema yoacfufaifaiguac forayaga bic hadacde. Imocac amma yei yei Babirong, ge taongtoa nga taong kucgagoc.’

¹¹ Nga bangecac emekeng emehangic yeni finacngina wageu faiandae, imoc mongno monggoc mi bummeudeac yeac amma kiasonggong anggecde. ¹² Finac goa, gol nga siriwa amma hoc seria nga gombunga nga kubu buma kuneng amma wamba gombunga siricngina giweng giweng nga kpaua amma hiring harang. Nga ic sasawa homuna gombunga amma wiac sasawa erefanggac baihangomea nga wiac hania hania ic seria buma kunengno memea amma kopango nga aiengngomemea nga hoc seria nga kibia gombunga wiac sasawa imocngomemea. ¹³ Imoc mosoki nga wiac hosuc homuna kerengagoc nga kerecdoku homuna gombunga nga hosuc homuna gombunga kendo isoc seria amma waingdoku nga kerecdoku nga flawa uuha nga wit gbomea. Burumaka nga rama amma becosic nga keretac. Nga ngicngac sebi nga ubaonganginagoc momoc wanac megec, imoc sasawa wagininau wakema kengha anggec.

¹⁴ Amma geac ubasebigango wiac forayaac ammikefec, imocngowaguma wiac sasawa gombunga kibikperaginginagoc, imoc gearunac bic woraec. Worau ifia monggoc mi meficegecde.

¹⁵ Ifi anu emekeng emehangic yeni singtoangacngomeficyunuwiac sasawa yomoc faima finactoanginagoc anggec, yeneng yeac kpendzenggac kengec amma hereau yombong namma kiasonggong anggecde. ¹⁶ Amma yofi degecde,

‘Yei yei taongtoa, ge wamba gombunga giweng giweng nga kpauc kpauc nga gol nga hoc seria buma kuneng, amma kubu buma kuneng, imocngo faifaia heidang.

¹⁷ Imoc aua mocguac manau finactoa sasawa gerecngo memanganeu kpac andarec.’ Amma wage kisang kisang sasawa nga yeneac bagenginau wageu ua meandae amma ngicngac sasawa kondunnu ua meandae, yeni hereau namma ¹⁸ yeac gerekac hosuc hemma yofi dema kpacgec,

‘Taongtoa ifia mong mi fede, kpac.’

¹⁹ Yeni orucnginai sendung ukuma kiacsonggong amma kpacma degec,

‘Ye aua mocguac manau gerekngac memanganeu kpac anecac amma, yei yei taongtoa. Nga yeac ngicngac sasawa wagenginagoc kondunnu kengandae, yeni yearunac finactoanginagoc anggec.’

²⁰ Anutungo ngeneac turunga yeac witiu faiecac amma kurumeng nga kpetiac areng kecdae nga aposoro amma profete, ngeni yeac amma sogaibisia.”

²¹ Anu angero kuhagoc mong, yeng dzamandzingtoa mong mema kondunnu ukuma yofi deec,

“Yeni Babirong taongtoa gereagoc kondunnu ifi ukugec monggoc naric mi meficgegecde.

²² Ukugec gitakpekte nga yegec heihei nga kungac fifi fifi nga trumpet fifi fifi, imoc geac manau naric monggoc mi negenggecde. Nga marikibi hania hania imocac uamemengic, yeni geac manau monggoc naric mi kecgecde. Nga hocfu flawa uuha medzameandae, imocac udumeng geac manau monggoc naric mi negenggecde. ²³ Geac manau kifaac kperagia monggoc naric mi kperagiude. Nga ngicngac meturangemebeso andape, yereac ubangerec arohoandae, udumeng ifia geac manau monggoc naric mi negenggecde. Ge mosoc fakagango bangeha bangeha imocac ngicngac sasawa uba mesufu ayemmenec. Imocac amma geac emekeng emehangic yeni bangecac ngickuneng kecgec. ²⁴ Nga taongtoa imocac manau profete nga ngicngac kpetiac amma ngicngac sasawa bangecfu yunuhomegec, yeneac sacngina meficgegec.”

19

¹ Imocac ngadeau kurumennu areng kuneng yombong ubaudumeng isoc negemba yofi degec,

“Halleluya, memengerec nga kuc kibikperagiagoc, imocngo Anutuninaac ande. ² Imoc yofiac, ye ngicngac yoacngina isinggema fora nga dindingac desiude. Amma yeng singtoangac kuneng serofakayango bangec memanganeec, yeac faka isinggema wanacarengfora yeneac sacnginaac turunga yearunac meec.”

³ Yeni monggoc yofi degec,

“Halleluya, yeac hosuc imoc naso wisic wisickea kpac engkefude.”

⁴ Ifi degec ngic enara 24 nga wiac kekecnginagoc 4, yeni makpema Anutu ngictau tatacfu tacde, ye numumima yofi degec,

“Imoc fora, halleluya.”

⁵ Ifi degec enacudumeng mong ngictau tatacfunac erema yofi deec,

“Anutuac wanacarengfora nga ngicngac kuneng nga kapia amma ngicngac eweheimidae, ngeni dengeregec.”

⁶ Ifi deu udumeng mong negemba, imoc areng kuneng yeneac enacudumeng isoc anec. Imoc doku homac yeneac udumeng nga gbururungtoaac udumengtoa isocngo yofi degec,

“Kebu Anutunina kuctoa minginango ngictau bic amma kecde, halleluya.

⁷ Ramamedahaac memeturangnaso hau enemango bic efaidacac amma yeac ubangerec negemma sogaima ramamedaha afehebisina. ⁸ Ifi anu wambaya gombunga kongaha nga kibikperagiagoc heiudeac migec. Wambaya gombunga imoc ngicngac kpetiac yeneac angammeme dindingac.”

⁹ Ifi deu angerongo yofi edenuec, “Ge kibiu yofi ohona, Ramamedahaac memeturanggac fatau kpacyunuyunuya, yeni kenecnginagoc.” ifi dema yofi deec, “Anutuac yoac yomoc imoc fora.”

¹⁰ Ifi deu ye numumibadeac haniau makpeai. Makpeba yeng yofi edenuec, “Ifi mi anna! Ni ge nga tosofocga Yesuac dedekperagi metacdae, ngeneac wanac ogongina. Yesuac dedekperagi imoc profeteyoacac asu. Imocac amma ge Anutu numumina.”

¹¹ Imocac witiau kurumeng anggeu henai. Hembal ngic mong becosic mong kongac kongac, imocac witiau tarec. Nga tarec, yeac kpac yofi, Yoacdedea modackecde nga Yoac fora modackecde. Amma ye ngicngac yoacf uude nga dzikau kecma faka dindingac modarude. ¹² Ye kiwa imoc gerec borang isoc nga oruhau ira homac heiec. Amma kpara mong oho ohoya, imoc mongngo mi negende, yengenaocsac negende.

¹³ Nga ye wamba mong sacfu nemuc nemuruckea heiec. Ngic yeac kpara imoc Anutuac yoac. ¹⁴ Nga kurumenggac wasaiareng ye modacgec, yeneac becosicngina kongac kongac nga wambangina siriha gombunga imoc kongac nga dzuac dzuara. ¹⁵ Nga enaraunac wasai beang mong enaragoc ereec, ye imocngo bangeha bangeha imocac ngicngac yunuude nga ye aiengyasungo garengyunuude. *(Mitiyegec 2:9)*

Amma ye Anutu kuctoa mingina yeac ngaba nga herebuac waing tidzoc tidzohaoac hoctoau tidzohoude. ¹⁶ Kporuhau nga kopohau kpac mong yofi oho ohoya feec, “Ngictau yeneac Ngictau nga kebu yeneac Kebu.”

¹⁷ Hembal angero mongngo wenac manau namma enacudumeng kunengngo arohoma neng sasawa sawakebangau kpututuckeandae, yeni yofi edeyunuec, “Ngeni kpedzucnema Anutuac yakatoau hama ¹⁸ ngictau nga wasaienara amma ngic kucnginagoc negec. Ngeni becosic nga ngicngac yeneac witiau tacdae, yeneac sebifusingina negec. Ngeni ngicngac witicngina kpac nga wanac meyunuyunuya amma ngicngac kuneng nga kapia, yeneac sebifusingina ifingoc negec.”

¹⁹ Anu ni wasaipusi nga bangecac ngictau wasaiarenginagoc yenai. Yenemba yeni ngic becosic witiau tarec, ye nga wasaiarengfora yenigoc dzikac kpegecdeac kpedzucnegec. ²⁰ Nga profete ikohango wasaipusiac kicfu faka kuhagoc mekefu ngicngac wasaipusiac kibi megec nga yeac ongea numumigec, yeni ubamesufu ayemmee. Anu yeneng wasaipusi nga profete ikoha yeri meyuruma kondung gerec nga sarfango* dzema kecde, imocac manau gbori ukuyurugec. ²¹ Nga becosic witiau tarec, yeac enaraunac wasai beang ereec, imocngo tosea yunu homegec. Homegec neng sasawango sebi-fusingina negec gebecyunuec.

20

¹ Imocac witiau angero mong henai. Hembal ye kurumennunac maec nga yeng teng buya kpac, imocac ki nga sengtoa mong mariau metarec. ² Metacma sekactoa, boudzoc esea kpara mong Mangana mingina nga Satang, ye mema kifa 1 tausenggacsoc tarudeac witickeec. ³ Witickema ngicngac ikocfu monggoc mi wangecyuniudeac teng buya kpac, imohai ukuma nagu heimima kpae faiec. Faiu kecma kifa 1 tauseng wisickeu monggoc naso kapianec ye yungecgecde.

⁴ Anu ni ngictau tatac homac henai. Ngictau tatac imocac witiau tacgec, yeni ngicngac yoacf uudeac uayoac yemmeyemmea. Amma wasaipusi nga ongea mi numumima kibia mesunginai me maringinai mi megec yeneng Yesuac dedekperagi amma Anutuac yoac dekperagigec. Imocac amma ngic yeneng ubangina herecgegec, yeneac ubaongangina henai. Hembal yeni sasawango kifa 1 tausenggacsoc Kristogoc kecma ngicngac garengyunugedeac ua megec. ⁵ Yomocngo homecfunac yacyacac warac warac ande. Nga tosea homegec, yeni mi gborima kecmagec kifa 1 tauseng wisickeec.

⁶ Nga Kebungo ngicngac warac warac yacyac imohai metorokpe ayemmeude, yeni kpetiac nga kenecnginagoc. Nga homec kpetea yohockangng yeni garengyunuudeac

* 19:20: Imoc hoc dzedzea dzagec dzagec homuna mangana

kuc mong mi metaru yeni Anutu nga Kristoac womong gareng kecma kifa 1 tauseng yegoc ngicngac garengyunugede.

⁷ Anu kifa 1 tauseng wisickeu Satang witicamaunac yungecgecde. ⁸ Yungecgec, yeng kemma bangeha bangeha imocac ngicngac ikocfu wangecyunuma ngicngac banectoa bangec, imocac tegia 4 kecdae, yeneac kpacarengngina Gogo nga Magogo, yeni dzikac kpegecdeac kpeturangyunuude. Imoc yeneac kpetengina kondung tegiaac sangi isoc. ⁹ Yeni bangeha bangeha, ferecgema kpetiac areng tacgec amma songotaongtoa, imohai kemma yerecgema nanggec. Nanggec kurumennunac gerecngo mama yonohodarec. ¹⁰ Yonohodaru mangana minginango ikocfu wangecyunei, ye gerek nga sarafa* kondunnukugec. Nga wasaipusi nga profete ikoha, yeri imohai bic kecma hadzing tofocnac kpendzeng kpegecde nga kpekengkecbesandae, imoc wisic wisickea kpac.

¹¹ Imocac witiau ngictau tatactoa kongac kongac mong henai. Nga imocac witiau tarec, yeac kiwaunac bangec nga sawakebangga woraec tatacngira mong mi feec. ¹² Nga ngicngac kuneng kapia bic homegec yenai. Yenemba yeni Anutuac kicfu nammagec kibi homac mesima kibi mong kpara Kekecac kibi mesigec, kibi imohai homegec yeneac angammemengina oho ohoya fede. Nga yeni imoc hemma yoacngina desigec. ¹³ Nga kondung manau homegec kecdae, kondungo yeni wayunuec. Homecac eucerereng manau homegec kecdae, ye nga homecngi yeni wayunuoc. Ifi anu ngicngac tembus angammemenginaacsoc yoacngina desigec. ¹⁴ Faiyunuma homec nga homecac eucerereng gereckondunnukugec. Imocngi homec kpetea yohockang ande. ¹⁵ Nga mongngi kpara kekecac kibiu oho ohoya mi feec, ye kondunggac gerecfu ukugec.

21

¹ Ni kurumeng nga bangec gboria yerai. Imoc yofiac, bangec nga kurumeng warac feoc, yeri kpac anoc nga kondung imoc monggoc mi feec. ² Ni Yohanengo taongtoa kpetiac, Yerusareng gboria hemba Anutuarunac kurumennunac maec. Mama efaima ngac ngicfu kende, ifi isoc ewebingezaac amma siriha gombunga yombong anudeac memengere ammigec tarec. ³ Taru ni enacudumengtoa ngictau tatactfunac negemba yofi deec,

“Henggec Anutuac kporubedzongo ngicngac yenigoc kefu yeni yeac areng anggec Anutu yengenaoc yenigoc kecma Anutungina kefude. ⁴ Amma yeng kickumangina sasawa kicnginaunac mekerenggeude. Nga homec nga ubahodunggac kiasonggong amma asira monggoc mi feude. Wiac warac feec, imoc bic kpac anec.”

⁵ Nga Kebu ngictau tatacfu tarec, yeng yofi deec, “Henggec, ni wiac sasawa gboria mebade.” dema edenuec, “Ge yoac imoc ohona nocac yoac yomoc fora nga ngicngac yeneng imoc negensinggegecdeacsoc ande.” ⁶ Dema monggoc edenuec, “Imoc bic fingecdac. Ni A nga Y, hanac hanahea nga wisic wisickea. Ngicngac mongngo dokuac ammide, ye dokukiwaunac kekecac doku eng neudeac mibade. ⁷ Firang anude, yeng wiac sasawa yomoc maridzoming meu neng yeac Anutu amba yeng medacna anude. ⁸ Anu ngic karoha nga negen negensingngina kpac amma fakangina mangana wonongagoc nga ngickpekpe amma serongic nga mosocfaka angandae amma nemu numumiandae nga ikocngic sasawa, yeni ine kondung gerek nga sarafa dzema kecde, imohai torokpegecde. Yomocngi homec kpetea yohockang anude.”

⁹ Anu angero seweng yeni sokoc seweng kpendzeng seweng wisic wisickea wake wakea metacgec, yeneareunac mongngo nearu hama deec, “Ge hana, ni ramamedahaac enembingezaa edzacgubade, ye yeac enema.” ¹⁰ Ifi deu Asungo nearu ua meu tiki kuneng nga herea, imocac bumau menu emma kpetiac taongtoa Yerusareng, kurumennunac Anutuarunac maecmoc, imoc edzacnuec. ¹¹ Ye Anutuac kuc nga kibikperagigoc amma hoc seria buma kuneng nga yaspis hoc seria, ifia isoc kperagiagoc gontaning amma pirac pirac heiec. ¹² Nga odaya hocngi memea, imoc kuneng nga herea amma naguya

* 20:10: Imoc hoc dzedzea dzagec dzagec homuna mangana

12 nga naguyau angero 12 nanggec. Amma naguyau ifingoc Israeac kisic 12 yeneac kpacngo nanec. ¹³ Anu wenac ere ereaubigeng nagu harebec, nortbigeng nagu harebec nga sautbigeng nagu harebec amma wenac keme kemeaugeng nagu harebec nanggec. ¹⁴ Taongtoaac oda imoc hocngo memea nga imocac titiseria 12. Amma titiseria 12 imohai ramamedahaac aposoro 12 yeneac kpacngina oho ohoya nanec.

¹⁵ Anu angero nigoc denegeng anec, yeng taongtoa nga naguya amma oda hocngo memea, imocac kpetememeyasu mong golngo memea mananec.

¹⁶ Menanu hemba taongtoa ye titiha 4 amma tegia sasawa yeneac kpetengina socfungoc anec. Nga angerongo kpetememeyasungo kpetea meu kpete imoc 2 tauseng 2 handret 20 kiromita anec nga tegia amma witiau kpetengina socfungoc anec.* ¹⁷ Ye odaya kunenggac kpetea meu imoc 72 mita anec.† Kpete imoc ngicngac yeneac kpete amma angero yeneac kpete ifingoc ande. ¹⁸ Oda imoc yaspa hocngo memea nga taongtoa imoc gol tegengngo memea amma garas imoc isoc gontaning anec. ¹⁹ Nga taongtoaac oda titiseria hocfu siricngina fingerudeac hoc seria sasawa buma kuneng, ifi faigec. Titiseri warac warac imohai yaspa faigec, ngade, imohai sapaja, harebecfu karsedong nga 4u emerare, ²⁰ 5 imohai sadoniks, 6fu koniriang, 7nu krisorite, 8 imohai berire, 9nu topase, 10 imohai krisoprase, 11nu haiasing amma 12 imohai ametise, ifi faifaia nanec. ²¹ Ihai naguya 12 yeni kubu gbomea kuneng 12. Nga nagu tembus tembus imoc gbomea mocgu mocgungo memea. Amma taongtoaac sing imoc goltegengngo memea, garas isoc ngadeau naric hentegecnaade.

²² Nga imocac manau womong mong mi henai. Imoc yofiac, Kebu Anutu kuctoa mingina nga ramamedahango womonga andape. ²³ Nga Anutuac kuc nga kibikperagiango taongtoa mekperagiec nga ramamedahango kperagia anec. Imocac amma taongtoa ye wenac me afokperagi uangira kpac, imohai monggoc mi mekperagiecde. ²⁴⁻²⁵ Nga tofocnac imohai mi feudeac naguya wenacfu naric mi heigecde. Anu bangeha bangehaac ngicngac yeni imocac kperagiau kengha anggec bangecac ngictau kibikperagingina mema imohai faigecde. ²⁶ Faigec bangeha bangeha, imocac ngicngac yeneng afec afehe nga kibikperagingina imocac manau mekenggecde. ²⁷ Amma wiac mong wonongagoc nga ngicngac angammemengina mangac manganea amma ikocnginagoc, yeneng taongtoa imocac manau naric mi enggecde, kpac. Ngicngac kpacngina ramamedahaac kekecac kibiu fede, yenengsac enggecde.

22

¹ Imocac witiau angerongo doku mong mafefea kekecac dokugoc edzacnuec. Doku imocng goantning pirac pirac amma Anutu nga ramamedaha yereac ngictau tatacfunac erema ² taongtoaac singtoa botuhau mekengfeec. Feu tegia noboc noboc imohai kekecac ic nanggec, yeni kifasoc foranasoya 12. Yeni afosoc foragoc angkecgec amma ic imocac maria nigha nigha yeneac hafeiac memengerec ande. ³ Nga sowec sasawa kpac andarude. Anutu nga ramamedahaac ngictau tatacngira imohai taru wanacarengfora ye kingang kpemigecde. ⁴ Yeni yeac kicmesuya henggecde nga yeac kpara mesunginau oho ohoya feude. ⁵ Imohai tofocnac monggoc mi anude nga kifa me wenacac kperagi imoc yeni uangina kpac, nocac Kebu Anutungo mekperagiyunuude. Nga ngicngac yeni ngictau ua megec nga mekecgec imocac nasoya wisic wisickeu kpac.

⁶ Anu yofi edenuec, “Yoac yomocngo fora nga ngicngac yeni imoc negens-inggegecdeacsoc ande. Amma profete yeneac asunginaac Anutu, yeng wanacarengfora wiac bic fingecbeso, imoc henggecdeac amma angeroya sueec.” ⁷ “Henggec, ni bic habade. Mong ye profete yeneac yoac kibi yomohai oho ohoya fede, imoc gombunga onggonggema mekefude, ye kenehagoc.” ⁸ Ni Yohanengo wiac yomoc hennegeng anai.

Nga hemba wisickeu angerongo wiac edzacnuec, yeac haniau numumibadeac makpeba ⁹ yeng yofi edenuec, “Ifi mi anna. Ni ge nga tosofocga profete, yeni amma

* 21:16: 2 tauseng 2 handret 20 kiromita imoc Vanimo kemma Honiara imocacsoc. Ye stadi 12 tauseng ohoec. Stadi mocgu imoc mita 185 isoc ande. † 21:17: Ye stadi 144 deec.

ngicngac kibi yomocac yoac gombunga onggonggema mekecandae, ngeneac wanac ogongina. Ge Anutu numumibesena.

¹⁰ Naso wegenedeac amma ge kibi yomocac profeteyoac kasoyagoc wana mi febeso. ¹¹ Mong ye faka dindingac mi angande, ye faka imocngoc mekecbeso. Nga wonongagoc kecde, ye ifingoc kecbeso. Nga faka dindingac angkecde, ye dindingacngoc kecbeso. Amma kpetiac kecde, ye kpetiac kekecfu yadiseriudeac ua mekecbeso.”

¹²⁻¹³ “Henggec, ni A nga Y, warac warac nga ngade amma hanac hanahea nga wisic wisickea. Ni bic hama ngicngac tembus tembus angammemenginaacsoc turunga yemmebadeac mehabade. ¹⁴ Mehaba ngicngac kekecac icac deyecdeyemmea nga naguusing taongtoau naric eregecde amma wambangina dzuac dzuara, yeni kenecng-inagoc. ¹⁵ Anu ngicngac kasi isoc kecdae nga mosocfaka mekecdae nga seroareng amma ngickpekpefaka mekecdae nga nemu numumiandae amma sasawango ikocfakaac songo negemma ikoc angandae, yeneng ine ngadeau kecgecde. ¹⁶ Ni Yesungo angerona sueba yeng dedekperagi yomoc kpebung sasawa ngenearu dekperagingemmeudeac haec. Ni Dawidiac sera nga bangeha amma asoacac asomeng kibikperagiagoc.”

¹⁷ Asu nga enembingeja yeri yeac, “Ge hana.” ifi deec mongngo imoc negende, yeng, “Ge hana.” ifi debeso. Mong ye dokuac homeande nga dokuac ammiande, yeng hama kekecac doku buma kpac eng mema nebeso.

¹⁸ Anu ngicngac kibi yomocac profeteyoac negendae, ngeni sasawa gorongina kpema yofi deduae, “Mongngo yoac yomohai nande, imohai yoac mong torokpeudeu Anutungo ye kpendzeng kibi yomohai oho ohoya fede, imoc torokpemide. ¹⁹ Amma mongngo yoac yomoc nande, imohacnac profeteyoac mong meickeudeu Anutungo kekecac icfunac yeac noboha nga taongtoa kpetiacac manaunac noboha amma wiac sasawa kibi yomohai oho ohoya fede, imohacnac meickeude.” ²⁰ Anu wiac yomocac dekperagingemmeude, yeng yofi dede, “Foracngoc, ni bic habade.” Imoc fora. O Kebu Yesu, ge hana. ²¹ Kebunina Yesu Kristoac wosoefacng Anutuac ngicngac kpetiac sasawa ngenearu febeso, imoc fora.

Read the New Testament daily

January

date	Scripture
1	Mataio 1:1-2:12
2	Mataio 2:13-3:6
3	Mataio 3:7-4:11
4	Mataio 4:12-25
5	Mataio 5:1-26
6	Mataio 5:27-48
7	Mataio 6:1-24
8	Mataio 6:25-7:14
9	Mataio 7:15-29
10	Mataio 8:1-17
11	Mataio 8:18-34
12	Mataio 9:1-17
13	Mataio 9:18-38
14	Mataio 10:1-23
15	Mataio 10:24-11:6
16	Mataio 11:7-30
17	Mataio 12:1-21
18	Mataio 12:22-45
19	Mataio 12:46-13:23
20	Mataio 13:24-46
21	Mataio 13:47-14:12
22	Mataio 14:13-36
23	Mataio 15:1-28
24	Mataio 15:29-16:12
25	Mataio 16:13-17:9
26	Mataio 17:10-27
27	Mataio 18:1-22
28	Mataio 18:23-19:12
29	Mataio 19:13-30
30	Mataio 20:1-28
31	Mataio 20:29-21:22

February

date	Scripture
1	Mataio 21:23-46
2	Mataio 22:1-33
3	Mataio 22:34-23:12
4	Mataio 23:13-39
5	Mataio 24:1-28
6	Mataio 24:29-51
7	Mataio 25:1-30
8	Mataio 25:31-26:13
9	Mataio 26:14-46
10	Mataio 26:47-68
11	Mataio 26:69-27:14
12	Mataio 27:15-31
13	Mataio 27:32-66
14	Mataio 28:1-20
15	Mareko 1:1-28
16	Mareko 1:29-2:12
17	Mareko 2:13-3:6
18	Mareko 3:7-30
19	Mareko 3:31-4:25
20	Mareko 4:26-5:20
21	Mareko 5:21-43
22	Mareko 6:1-29
23	Mareko 6:30-56
24	Mareko 7:1-23
25	Mareko 7:24-8:10
26	Mareko 8:11-9:1
27	Mareko 9:2-29
28	Mareko 9:30-10:12

date	Scripture
1	Mareko 10:13-31
2	Mareko 10:32-52
3	Mareko 11:1-26
4	Mareko 11:27-12:17
5	Mareko 12:18-37
6	Mareko 12:38-13:13
7	Mareko 13:14-37
8	Mareko 14:1-21
9	Mareko 14:22-52
10	Mareko 14:53-72
11	Mareko 15:1-47
12	Mareko 16:1-20
13	Ruka 1:1-25
14	Ruka 1:26-56
15	Ruka 1:57-80
16	Ruka 2:1-35
17	Ruka 2:36-52
18	Ruka 3:1-22
19	Ruka 3:23-38
20	Ruka 4:1-30
21	Ruka 4:31-5:11
22	Ruka 5:12-28
23	Ruka 5:29-6:11
24	Ruka 6:12-38
25	Ruka 6:39-7:10
26	Ruka 7:11-35
27	Ruka 7:36-8:3
28	Ruka 8:4-21
29	Ruka 8:22-39
30	Ruka 8:40-9:6
31	Ruka 9:7-27

date	Scripture
1	Ruka 9:28-50
2	Ruka 9:51-10:12
3	Ruka 10:13-37
4	Ruka 10:38-11:13
5	Ruka 11:14-36
6	Ruka 11:37-12:7
7	Ruka 12:8-34
8	Ruka 12:35-59
9	Ruka 13:1-21
10	Ruka 13:22-14:6
11	Ruka 14:7-35
12	Ruka 15:1-32
13	Ruka 16:1-18
14	Ruka 16:19-17:10
15	Ruka 17:11-37
16	Ruka 18:1-17
17	Ruka 18:18-43
18	Ruka 19:1-27
19	Ruka 19:28-48
20	Ruka 20:1-26
21	Ruka 20:27-47
22	Ruka 21:1-28
23	Ruka 21:29-22:13
24	Ruka 22:14-34
25	Ruka 22:35-53
26	Ruka 22:54-23:12
27	Ruka 23:13-43
28	Ruka 23:44-24:12
29	Ruka 24:13-53
30	Yohane 1:1-28

date	Scripture
1	Yohane 1:29-51
2	Yohane 2:1-25
3	Yohane 3:1-21
4	Yohane 3:22-4:3
5	Yohane 4:4-42
6	Yohane 4:43-54
7	Yohane 5:1-23
8	Yohane 5:24-47
9	Yohane 6:1-21
10	Yohane 6:22-40
11	Yohane 6:41-71
12	Yohane 7:1-29
13	Yohane 7:30-52
14	Yohane 7:53-8:20
15	Yohane 8:21-30
16	Yohane 8:31-59
17	Yohane 9:1-41
18	Yohane 10:1-21
19	Yohane 10:22-42
20	Yohane 11:1-53
21	Yohane 11:54-12:19
22	Yohane 12:20-50
23	Yohane 13:1-30
24	Yohane 13:31-14:14
25	Yohane 14:15-31
26	Yohane 15:1-27
27	Yohane 16:1-33
28	Yohane 17:1-26
29	Yohane 18:1-24
30	Yohane 18:25-19:22
31	Yohane 19:23-42

date	Scripture
1	Yohane 20:1-31
2	Yohane 21:1-25
3	Aposoro 1:1-26
4	Aposoro 2:1-47
5	Aposoro 3:1-26
6	Aposoro 4:1-37
7	Aposoro 5:1-42
8	Aposoro 6:1-15
9	Aposoro 7:1-29
10	Aposoro 7:30-50
11	Aposoro 7:51-8:13
12	Aposoro 8:14-40
13	Aposoro 9:1-25
14	Aposoro 9:26-43
15	Aposoro 10:1-33
16	Aposoro 10:34-48
17	Aposoro 11:1-30
18	Aposoro 12:1-23
19	Aposoro 12:24-13:12
20	Aposoro 13:13-41
21	Aposoro 13:42-14:7
22	Aposoro 14:8-28
23	Aposoro 15:1-35
24	Aposoro 15:36-16:15
25	Aposoro 16:16-40
26	Aposoro 17:1-34
27	Aposoro 18:1-21
28	Aposoro 18:22-19:12
29	Aposoro 19:13-41
30	Aposoro 20:1-38

date	Scripture
1	Aposoro 21:1-16
2	Aposoro 21:17-36
3	Aposoro 21:37-22:16
4	Aposoro 22:17-23:10
5	Aposoro 23:11-35
6	Aposoro 24:1-27
7	Aposoro 25:1-27
8	Aposoro 26:1-32
9	Aposoro 27:1-20
10	Aposoro 27:21-44
11	Aposoro 28:1-31
12	Roma 1:1-17
13	Roma 1:18-32
14	Roma 2:1-24
15	Roma 2:25-3:8
16	Roma 3:9-31
17	Roma 4:1-12
18	Roma 4:13-5:5
19	Roma 5:6-21
20	Roma 6:1-23
21	Roma 7:1-14
22	Roma 7:15-8:6
23	Roma 8:7-21
24	Roma 8:22-39
25	Roma 9:1-21
26	Roma 9:22-10:13
27	Roma 10:14-11:12
28	Roma 11:13-36
29	Roma 12:1-21
30	Roma 13:1-14
31	Roma 14:1-23

date	Scripture
1	Roma 15:1-21
2	Roma 15:22-16:7
3	Roma 16:8-27
4	1 Korinti 1:1-17
5	1 Korinti 1:18-2:5
6	1 Korinti 2:6-3:4
7	1 Korinti 3:5-23
8	1 Korinti 4:1-21
9	1 Korinti 5:1-13
10	1 Korinti 6:1-20
11	1 Korinti 7:1-24
12	1 Korinti 7:25-40
13	1 Korinti 8:1-13
14	1 Korinti 9:1-18
15	1 Korinti 9:19-10:13
16	1 Korinti 10:14-11:1
17	1 Korinti 11:2-16
18	1 Korinti 11:17-34
19	1 Korinti 12:1-26
20	1 Korinti 12:27-13:13
21	1 Korinti 14:1-17
22	1 Korinti 14:18-40
23	1 Korinti 15:1-28
24	1 Korinti 15:29-58
25	1 Korinti 16:1-24
26	2 Korinti 1:1-11
27	2 Korinti 1:12-2:11
28	2 Korinti 2:12-17
29	2 Korinti 3:1-18
30	2 Korinti 4:1-12
31	2 Korinti 4:13-5:10

date	Scripture
1	2 Korinti 5:11-21
2	2 Korinti 6:1-13
3	2 Korinti 6:14-7:7
4	2 Korinti 7:8-16
5	2 Korinti 8:1-15
6	2 Korinti 8:16-24
7	2 Korinti 9:1-15
8	2 Korinti 10:1-18
9	2 Korinti 11:1-15
10	2 Korinti 11:16-33
11	2 Korinti 12:1-10
12	2 Korinti 12:11-21
13	2 Korinti 13:1-14
14	Garata 1:1-24
15	Garata 2:1-16
16	Garata 2:17-3:9
17	Garata 3:10-22
18	Garata 3:23-4:20
19	Garata 4:21-5:12
20	Garata 5:13-26
21	Garata 6:1-18
22	Efeso 1:1-23
23	Efeso 2:1-22
24	Efeso 3:1-21
25	Efeso 4:1-16
26	Efeso 4:17-5:2
27	Efeso 5:3-33
28	Efeso 6:1-24
29	Firipi 1:1-26
30	Firipi 1:27-2:18

date	Scripture
1	Firipi 2:19–3:6
2	Firipi 3:7–4:1
3	Firipi 4:2–23
4	Korosai 1:1–20
5	Korosai 1:21–2:7
6	Korosai 2:8–23
7	Korosai 3:1–17
8	Korosai 3:18–4:18
9	1 Tesaronike 1:1–2:9
10	1 Tesaronike 2:10–3:13
11	1 Tesaronike 4:1–5:3
12	1 Tesaronike 5:4–28
13	2 Tesaronike 1:1–12
14	2 Tesaronike 2:1–17
15	2 Tesaronike 3:1–18
16	1 Timoteo 1:1–20
17	1 Timoteo 2:1–15
18	1 Timoteo 3:1–16
19	1 Timoteo 4:1–16
20	1 Timoteo 5:1–25
21	1 Timoteo 6:1–21
22	2 Timoteo 1:1–18
23	2 Timoteo 2:1–21
24	2 Timoteo 2:22–3:17
25	2 Timoteo 4:1–22
26	Tito 1:1–16
27	Tito 2:1–14
28	Tito 2:15–3:15
29	Firemong 1:1–25
30	Hebiraio 1:1–14
31	Hebiraio 2:1–18

date	Scripture
1	Hebiraio 3:1-19
2	Hebiraio 4:1-13
3	Hebiraio 4:14-5:14
4	Hebiraio 6:1-20
5	Hebiraio 7:1-19
6	Hebiraio 7:20-28
7	Hebiraio 8:1-13
8	Hebiraio 9:1-10
9	Hebiraio 9:11-28
10	Hebiraio 10:1-18
11	Hebiraio 10:19-39
12	Hebiraio 11:1-16
13	Hebiraio 11:17-31
14	Hebiraio 11:32-12:13
15	Hebiraio 12:14-29
16	Hebiraio 13:1-25
17	Yakobo 1:1-18
18	Yakobo 1:19-2:17
19	Yakobo 2:18-3:18
20	Yakobo 4:1-17
21	Yakobo 5:1-20
22	1 Petoro 1:1-12
23	1 Petoro 1:13-2:10
24	1 Petoro 2:11-3:7
25	1 Petoro 3:8-4:6
26	1 Petoro 4:7-5:14
27	2 Petoro 1:1-21
28	2 Petoro 2:1-22
29	2 Petoro 3:1-18
30	1 Yohane 1:1-10

date	Scripture
1	1 Yohane 2:1-17
2	1 Yohane 2:18-3:2
3	1 Yohane 3:3-24
4	1 Yohane 4:1-21
5	1 Yohane 5:1-21
6	2 Yohane 1:1-13
7	3 Yohane 1:1-14
8	Yuda 1:1-25
9	Yohaneac Kpefing 1:1-20
10	Yohaneac Kpefing 2:1-17
11	Yohaneac Kpefing 2:18-3:6
12	Yohaneac Kpefing 3:7-22
13	Yohaneac Kpefing 4:1-11
14	Yohaneac Kpefing 5:1-14
15	Yohaneac Kpefing 6:1-17
16	Yohaneac Kpefing 7:1-17
17	Yohaneac Kpefing 8:1-13
18	Yohaneac Kpefing 9:1-21
19	Yohaneac Kpefing 10:1-11
20	Yohaneac Kpefing 11:1-19
21	Yohaneac Kpefing 12:1-18
22	Yohaneac Kpefing 13:1-18
23	Yohaneac Kpefing 14:1-20
24	Yohaneac Kpefing 15:1-8
25	Yohaneac Kpefing 16:1-21
26	Yohaneac Kpefing 17:1-18
27	Yohaneac Kpefing 18:1-24
28	Yohaneac Kpefing 19:1-21
29	Yohaneac Kpefing 20:1-15
30	Yohaneac Kpefing 21:1-27
31	Yohaneac Kpefing 22:1-21